

001 無上金玄上妙道德玄經

經名：無上金玄上妙道德玄經。
簡稱《玄經》。撰人不詳，約出於南北朝或隋唐之際。《正統道藏》未收。原本三卷，現存上卷（殘）及中卷。底本出處：敦煌 P. 2002 號抄本^①。

〔無上金玄上妙道德玄經上〕

（前缺）

有其德將曰明，天帝有其德將曰享，萬物有其德將曰寧，天人有其德將曰清。四象无其德則裂，萬道无其德則失，三景无其德則缺，九晨无其德則逸，萬物无其德則滅。若明上妙則德一，能用玄德萬事畢。一百八十一字。

妙无爲道德元皇，妙有爲道德丈

人，空无爲道德元君，上妙爲道德元尊。寂妙之道，爲德淵源。寂微之道，爲德之根。泯泯不息，運之无極。未天未地，廿四神其中矣。三合成象，其功至妙。五合明德，曰傲上妙。空无中應，清澄妙无。明真廿有四，妙有清凝。神功用妙，則廿四靈明運妙應。清凉凝真，則飛玄飛凝其中，廿四靈爲運上洞。三元妙寂，上妙中曰天寶，妙无中曰真寶，妙有中曰玉寶。天无寶不靈，地无寶不形，萬物无寶不生。天有寶則長存，地有寶則長久，萬物有寶等三元。是以三寶有道而玄德，道應運也，九真鎮也，上妙寂也，身相明也。二百七字。

大道初應无先，開明於冥漢，功用在於眇漭。致此四象成焉，光象定焉，玉景應焉，上妙中元一焉。亦大亦妙，亦久亦微，亦寂亦空，亦无清凝。真妙洞妙，其曰衆妙。光相玄應，十方清澄。瑞應俱應，四象清凝。明運功用，成就天地。大象猶不稱有道，玄象亦不敢明道，四象亦不稱道。妙德爲道

德，玄德爲智德，上德爲慧德，神德爲通，至德〔爲〕^②洞，聖德乃容，其德乃功。亶亶而應，六德咸同，猶不稱有道也。天德不德，地德无德，萬物稱德，其不德也。其道不長，其德不久。天高不勉^③，崩，地厚不勉淪。道无名，德无形，非陰非陽，非炁非緒，真空眇眇，无等无隔，應運无窮，妙化无終。妙无融融，正道將自功。二百廿二字。

玄中有玄，上妙爲衆妙之淵。十方天地至真大聖，及得萬物，以道爲光相，以德爲瑞應。光相能莊嚴，瑞應能成就。道是衆妙之經，德爲衆妙之緯。十方之內名曰域，十方之外爲玄極。天地之間曰盈，天地之外曰清。經爲四象之綱，緯爲四象之紀。日月爲天地光象，星宿爲天地精明。四象守其一則不淪，萬物守其一則長久。一爲天地之璣衡，亦致長烟於天地，亦致炁洲於萬物。道處衆妙之首，衆妙終惡，道爲玄德。一百五十八字。

寂无寂空，其妙自功。開妙則萬道一，應妙則天地一，運妙則萬物一。

萬道依於妙，天地歸於妙，萬物憑於妙。萬道无妙不明，妙爲萬法中王。妙則洞虛洞空，洞淵洞源，洞清洞通，洞真洞玄，洞神洞无，其爲衆洞上妙，衆妙之妙真曰洞明。十洞迴周十方，无所不洞，无所不通，其曰空妙，〔妙〕道玄容，以此功用長存也。道應无名，天地將自化；道運无形，萬物將自成。長不可極曰道，久不可窮曰德，玄不可測曰妙。知道將爲正，知德將爲聖，知妙則真矣，則至空矣，則至道矣。天圓爲萬物蓋，地方能載，而爲不長久。萬歲之靈，其神將朽；千齡之神，其死不去。是以道隱則萬道僞，道應而萬法正。得吾道者寂定，失吾道者億劫將之泯泯，終於死生之內，其爲罪鬼穢之神。衆僞不除則非道，衆累不盡則非真。天如輪難轉，地如車難乘，風如炁難御，炁如烟難壅。唯道乘之爲相輪之車，運於十方之功用也，可不大哉。三百五字。

虚无自然，道寂其中。上妙明於玉高，妙无應於玉虛，妙有運於玉靈。

道自然金元洞明，德亦自然於金玄无景，以有景曰玉景，玉景洞明曰玉皇，玉皇妙應曰四象。功於妙无曰三景，用於妙有曰三元，運於長烟曰九天，寂於无間曰八景，澄於九清曰九玄，凝於始運曰九地，造於太混曰九靈。道以妙覺曰光相，德以正真曰光象也。天地處一，光象長存；萬物處一，精明長久；真人處一登上妙，其德正真。一百五十二字。

玉高爲四象之精魄，玉靈爲四象之靈魂，萬道歸玉高，萬象依玉靈。玉高中有妙，天地憑之而有成；玉靈中有神，萬物因之而有形成。體寂歸於道，形寂歸於德。玉高處乎无景而有功，玉靈弘於洞景而有用。妙无寂而天地清，妙有寂而萬物寧。道應妙无，其功任所，德應妙有，其用融融。任所玄通，融融皆同，並歸寂空，寂空中元一也。其道上妙，德亦自然，其運自然，其曰无上无下，无窮无極，其功難測，真无至大焉。一百五十八字。

正道則正寂，正真則正法，正教則

正化，正應則正運。此則至空至寂，至妙至道，妙道在其中也，道應亦其中也，道運亦其中也。玉高雖妙依於道，玉靈終由道，元高明於道，虛皇應於道，元始運於道。道應萬道正，萬道正則寂妙定，則得洞天洞地，洞虛洞无，洞幽洞冥，真曰冥室之寂空。寂空正妙，其中上妙，則妙覺也。彌玄群方之上空，妙无以朗之未悟，妙有以明之始終，群方既應，則无所不應。四象同應，其功任重，則通天通地，通幽通虛，通冥通漠，无所不通，至於道也。太混既判，清凝豁然，自然憑道凝住。若非憑道，其將還混。是以道應天地成，道運萬物形，萬象不依道則滅，萬化不依道則絕，萬道不歸道則泄，萬法不依則不正，萬善不依則不定。二百四十八字。

虛玄大冠者，道上妙應也。則使太混以判，四象清澄，天地若鏡，萬象若鏡，萬物若鏡，幽虛清凝。天如相輪，地如靈藏，萬物寓其中，萬品萬類，萬形萬象，惣處其間，皆得清涼之運，而得成就上下清凝。奇妙妙无，妙寂

寂妙，妙有應於明運，神澄自然，无色无炁，萬行俱備，无諸氛穢，是道應也。正道上妙之運，當有莊嚴之功，亦在其中；當有光相，亦在其中；當有瑞應，亦在其中；當有功用，亦在其中；當有四象，亦在其中；當有三景，亦在其中；當有九晨，亦在其中；當有至真大聖、无極尊神，亦在其中；當有玉皇玉帝、天帝象帝、十方諸天天帝，亦在其中；當有真仙飛仙上聖、神仙靈仙、天仙地仙、真人玉女，亦在其中；當有九微九皇九元，亦在其中；當有萬道，亦在其中；當有萬象，亦在其中；當有萬法萬教萬化、萬福萬善、萬行萬品，亦在其中；當有十方諸天宮殿城臺，亦在其中；當有天人品類萬物，亦在其中；當有大劫運數周始，天地興廢，亦在其中。真曰融融，无所不容，其功大也，道之應也，德之運也。三百四十一字。

道應上上明空，空空有，真妙上妙。妙曰玄寂，寂應常容，容容寂空，空有上空，十方玄同。上十空，中十

空，下十空，迴周百億，真曰十方玄極。通極妙空，无中曰道。道妙衆妙曰真妙，妙運有功功曰靈，玄運運成功由妙，運成由玄運清凝。上妙玄應明運，運中玄通，通應无窮。通由光應，容由光相，上由威明，中由光景，下由靈相，成此光象，合爲大象，其中一也。妙在於玉高，應在於玉靈，運在於玉景。其虚无无形曰精妙。妙甚窈甚冥，其〔中〕有靈，非恍非忽，其中有物。分濁分清，明運有成；非不恍忽，物混爲一。應則數矣，運則判矣，分一萬象備矣，歸一則萬象合同一矣。反一則非正道，正道則一矣，其爲道紀自然也。二百卅二字。

大道應則冲冲，天地之運，寂妙融融。自然之化，天地憑之爲一大也，致得清凝妙也。天地若非憑之，則混爲一。天地有劫運矣，萬物有三灾矣。故知天地不久，萬物不久，其體空无，所以寄寓於道。是以道大德久，不處大者終於天地也，不處久者萬物也。上一中一下一，同以元一爲上妙，正道

中一尊也。非元不應，非一不運，元爲道綱，一爲德紀，則衆妙中王。萬道皆不存，一道不亡。萬物謂言天長地久，吾恐之无長久。何然哉？由不免大劫也，安能長久也。故以長久之言者，以接引於萬物，吾恐之絕思道斷，還而无逕矣。有道之君，能以空心存於妙鏡，栖神上妙寂空寂妙中者，妙亦應爾心，道真成矣。身相清凝，神亦澄矣。其真寂妙，則登於大寂，至道妙鏡也。故知无道之君，與道絕矣，滅將至，在於死生中，其神苦，其爽毒，其鬼徒方存正道，弗及也。道正其真妙，道應則十方清凝矣，道運則天地清涼也。妙曰凝然，自然凝住，爲衆妙中妙鏡正道焉。三百廿三字。

上妙玄經十三章真解有二千八百廿四字。

① 敦煌抄本殘存原經上品十一章，以及中品。文本有缺損，模糊難辨。以下錄文中少數文字係整理者擬定，不再一一注明。

② 原本無「爲」字，據前後文義補。

③不勉：當作「不免」。下句同此。

④原本無「妙」字，據文義補。

⑤系：原本作「無」，據前後文義改。

⑥原抄本「靈」字上有二十八字衍文，今刪。

無上金玄上妙道德玄經中

自然靈智大覺品

天尊告元高虛皇、元始天寶玉皇曰：斯經尊妙，功德無量，真曰大乎。其功巍巍堂堂，功用長久。上妙無窮，其任至重，无所不容，成就十方天地方圓，瑩發三景九晨之光象。莊嚴至真、大聖尊神，靡所不周，无所不備，致周十方，四象清澄，奇妙清凝，而得成象，於是清涼。五億五萬五千五百五十五億萬重天地，俱得成就，光景洞徹，普得光明。無量衆聖，俱然玄應，自然凝住，清凝洞妙，各各品位，而得分判，安置成立，巖然虛峙，皆由是經功德使之然也。

余時天尊則命金玄上妙道德元皇丈人元君三真曰：余則爲此經中上妙鎮經之主，以賞錄玄經，藏而錄之，永保明運，應於來劫无量之劫中也。今以相付，可不尊而奉焉。

於是金玄上妙道德元皇三真，則又手作禮稱善。余時十方俱明，諸天至真大聖无量之衆，一時歡喜踊躍，光明映照中外，光明清澄，清凝清涼，俱得上妙自然玄應成就也。

无上金玄上妙道德元皇丈人元君三真，巡虛三周，而作金玄上妙道德玉章誦曰：

大道无名形，妙无真寂空。玄德空无景，寂然自虚冲。妙无中天尊，妙有自然功。道妙德亦妙，上妙寂寂中。不動亦不涌，四象並齊蒙。虚寂寂微界，十方皆清凝。清涼玄應運，妙有自繩繩。妙寂道真大，德久清且澄。形无象亦无，功用妙難稱。明運威光妙，成就非三乘。身相真妙鏡，光明自有恒。莊嚴天地功，衆聖並飛凌。妙道寂妙妙，俱妙亦俱升。大寂中真妙，上妙无能勝。

无上金玄上妙道德妙通玉章誦曰：

道瑞德亦應，未天未地先。獨挺玉高上，非炁亦非烟。明運建大功，開

妙盡光妍。妙有中有靈，妙无真自然。八應四象立，十應並金身。功造洄沙衆，天寶妙爲真。萬道非妙寂，道妙非其神。正道元真一，正覺妙爲因。億億乘空出，身相跂瓊蓮。光明十方現，投光天尊前。莊嚴七寶相，上妙妙玄玄。

无上金玄上妙道德妙運玉章誦曰：

大道應无先，上妙甚澄清。開明冥漠內，玄運若虛征。儵忽飛凝定，八十四中靈。上妙天寶運，非象妙无形。妙无中真寶，明運流金成。妙有玉寶功，清凝難爲名。長存天地運，並從妙玄經。清涼四象立，虛擬自虛亭。三元方始造，妙覺塵沙形。功應无方外，十方並流明。道乘玄元始，乘此若飛駟。左迴元景上，大混以凝清。豁落四象分，億億皆齊并。威光照十外，大久自然榮。寂寂上妙鏡，道應永長亨。諸天並登位，稽首慶劫齡。

金玄上妙道德元皇三真誦畢，則迴心作禮，稽首天尊，左迴復位，寂妙

寂然靜真。於是天尊告元高高上天寶玉皇曰：金玄上妙道德元皇丈人元君三真，乃從太寂妙無妙有中而來，應我明運也。其真上妙則與玄經同，應之以上妙玄經，有其位也。今以是三真賞錄大道金玄上妙玄經，則爲玄經中大法王矣。金以天寶真實玉寶，而爲萬法中王上首。於是元高高上天寶玉皇，則又手作禮稱善，左迴巡虛三周，而作自然金玄上妙玉章誦曰：

上妙清涼運，虚无自然俱。寂中有上妙，三寶其中遊。清凝光相好，妙運无稽留。自然四象判，澄澄隨空浮。玉高常寂妙，妙應未常休。玉景玉皇運，上妙妙亦周。玉靈開三明，來運甚悠悠。正道明正寂，正一空寂寂。正法真中王，正教無改易。正化天地立，正應真利益。流明十方煥，正運靡不歷。萬道寓寂下，妙應方澄滌。十洞並光明，天地從運來。億億河沙衆，玄應自同齊。虛玄大冠中，相輪以三迴。无色无烝緒，靈瑞自然開。莊嚴成就功，妙中妙妙哉。

元高高上天寶玉皇誦畢，則朝天尊，巡虛復位升寂。

道言：天寶玉皇自然金玄上妙玉章誦者，其文乃出玄經中也。故以鎮玄經中矣。十方至真大聖，有得玉章而誦其章者，其真自然，身相清澄，光相具足，諸天朝慶，真王懽悅。金玄玉章，侍衛形神，清凝上妙，聖智洞達，六慧通明，萬道設禮，聲暢遠妙，十方聞響，莫不俱到同會，虛空凝住恭禮，又手稱讚也。光明玄映有經之身，其妙自然，真爲上妙，而得登乎大寂也。真曰寂焉。

道言：玄經妙重，其真自然，其功上妙，其德无量。致得成就十方天地莊嚴，无量河沙之衆，皆身相具足，開明光象，上下周迴十方，皆得自然，清凝微妙，立在須臾，真曰上妙，无上无極，妙中之妙，難可稱焉。自非天尊妙應玄應，十方諸天莫之聞也。

道玄玄經，常有无上金玄上妙金靈玉童卅一萬人，侍衛真文，熾百和自然之香，散五霞流雲之華，以慶真文玄

經也。寶之成真，泄慢之者，失道殃至矣。十方至真大聖、真人玉女，詣天上帝、天王天人、真仙飛仙大神、靈仙神仙、天仙地仙真人等。可慎之，誠之誠之者也。

無上金玄上妙道德玄經中

(王卡點校)

002 無上妙道文始真經

經名：無上妙道文始真經。又名《關尹子》。相傳為周大夫關令尹喜所作。據余嘉錫考證，應為南宋人假託。一卷。底本出處：《正統道藏》洞神部本文類。參校本：一、牛道淳《文始真經注》；二、《叢書集成初編》所收《關尹子》。

關尹子



關令尹喜，周大夫也。老子西游，喜望見有紫氣浮關，知真人當過，候物色而迹之，果得老子。老子亦知其奇，

為著書。喜既得老子書，亦自著書九篇，名《關尹子》。今陝州靈寶縣太初觀，乃古函谷關候見老子處。終南宗聖宮，乃關尹故宅，周穆王修其草樓，改號樓觀，建老子祠，道觀之興，實祖于此。老子授經後，西出大散關，復會于城都^①青羊肆，賜號文始先生，即《莊子》所謂博大真人者也。

無上妙道文始真經

一字

字者，道也。

非有道不可言，不可言即道。非有道不可思，不可思即道。天物怒流，人事錯錯然，若若乎回也，戛戛乎鬥也，勿勿乎似而非也。而爭之，而介之，而哢之，而嘖之，而去之，而要之。言之如吹影，思之如鏤塵，聖智造迷，鬼神不識。惟不可為，不可致，不可測，不可分，故曰天、曰命、曰神、曰玄，合曰道。

無一物非天，無一物非命，無一物非神，無一物非玄。物既如此，人豈不然。人皆可曰天，人皆可曰神，人皆可致命造玄^②，不可彼天此非天，彼神此非神，彼命此非命，彼玄此非玄。是以善吾道者，即一物中知天盡神，致命造玄。學之徇異，名析同實，得之契同，實忘異名。

觀道者如觀水，以觀沼爲未足，則之河、之江、之海，曰水至也，殊不知我之津液涎淚，皆水。道無人，聖人不見，甲是道，乙非道。道無我，聖人不見，己進道，己退道。以不有道，故不無道，以不得道，故不失道。

不知道，妄意卜者，如射覆盂。高之者，曰存金存玉，中之者，曰存角存羽，卑之者，曰存瓦存石。是乎非是乎？惟置物者知之。

一陶能作萬器，終無有一器能作陶者，能害陶者。一道能作萬物，終無有一物能作道者，能害道者。道茫茫而無知乎，心儻儻而無羈乎，物迭迭而無非乎。電之逸乎，沙之飛乎，聖人以知心一、物一、道一，三者又合爲一。不以一格不一，不以不一害一。

以盆爲沼，以石爲島，魚環游之，不知幾千萬里而不窮乎^③，夫何故？水無源無歸。聖人之道，本無首，末無尾，所以應物不窮。

無愛道，愛者水也，無觀道，觀者火也，無逐道，逐者木也，無言道，言者

金也，無思道，思者土也。惟聖人不離本情而登大道，心既未萌，道亦假之。

重雲蔽天，江湖黯然，游魚茫然，忽望波明食動，幸賜于天，即而就之，漁釣斃焉。不知我無我，而逐道者亦然。

方術之在天下多矣，或尚晦，或尚明，或尚強，或尚弱，執之皆事，不執之皆道。

道終不可得，彼可得者，名德不名道，道終不可行，彼可行者，名行不名道。聖人以可得可行者，所以善吾生，以不可得不可行者，所以善吾死。

聞道之後，有所爲有所執者，所以之人，無所爲無所執者，所以之天。爲者必敗，執者必失，故聞道於朝，可死於夕。

一情冥，爲聖人，一情善，爲賢人，一情惡，爲小人。一情冥者，自有之無，不可得而示，一情善惡者，自無起有，不可得而祕。一情善惡爲有知，惟動物有之，一情冥爲無知，溥天之下，道無不在。

道無不在。

勿以聖人力行不怠，則曰道以勤成，勿以聖人堅守不易，則曰道以執得。聖人力行，猶之發矢，因彼而行，我不自行。聖人堅守，猶之握矢，因彼而守，我不自守。

若以言行學識求道，互相輾轉，無有得時。知言如泉鳴，知行如禽飛，知學如擷影，知識如計夢，一息不存，道將來契。

以事建物則難，以道棄物則易，天下之物，無不成之難，壞之易。一灼之火，能燒萬物，物亡而火何存？一息之道，能冥萬物，物亡而道何在？

人生在世，有生一日死者，有生十年死者，有生百年死者。一日死者，如一息得道，十年百年死者，如歷久得道。彼未死者，雖動作昭智，止名爲生，不名爲死。彼未契道者，雖動作昭智，止名爲事，不名爲道。

不知吾道無言無行，而即有言有行老求道，^④忽遇異物橫執爲道。殊不知捨源求流，無時得源，捨本求末，無

無時得源，捨本求末，無

時得本。

習射、習御、習琴、習弈，終無一事可以一息得者，惟道無形無方，故可得之一息。

兩人射相遇，則工拙見，兩人弈相遇，則勝負見，兩人道相遇，則無可示。無可示者，無工無拙，無勝無負。

吾道如海，有億萬金投之，不見，有億萬石投之，不見，有億萬污穢投之，不見。能運小鰕小魚，能運大鯤大鯨。合衆水而受之，不爲有餘，散衆水而分之，不爲不足。

吾道如處暗，夫處明者，不見暗中一物，而處暗者，能見明中區事。

小人之權歸于惡，君子之權歸于善，聖人之權歸于無所得。惟無所得，所以爲道。

吾道如劍，以刃割物即利，以手握刃即傷。籩不問豆，豆不答籩，瓦不問石，石不答瓦，道亦不失。問與答與一氣往來，道何在。

仰道者跂，如道者駸，皆知道之事，不知道之道。是以聖人不望道而

歉，不恃道而豐，不借道于聖，不賈道于愚。

二柱

柱者，建天地也。

若碗若盂，若餅若壺，若瓮若盎，皆能建天地。兆龜數蓍，破瓦文石，皆能告吉凶。是知天地萬物成理，一物包焉，物物皆包之，各不相借。以我之精合彼之精，兩精相博^⑤而神應之。一雌一雄卵生，一牝一牡胎生。形者彼之精，理者彼之神，愛者我之精，觀者我之神。愛爲水，觀爲火，愛執而觀，因之爲木，觀存而愛，攝之爲金。先想乎一元之氣，具乎一物，執愛之以合彼之形，冥觀之以合彼之理，則象存矣。一運之象，周乎太空，自中而升爲天，自中而降爲地。無有升而不降，無有降而不升，升者爲火，降者爲水，欲升而不能升者爲木，欲降而不能降者爲金。木之爲物，鑽之得火，絞之得水。金之爲物，擊之得火，鎔之得水。金木

者，水火之交也。水爲精爲天，火爲神爲地，木爲魂爲人，金爲魄爲物，運而巳者爲時，包而有在者爲方，惟土終始之，有解之者，有去之者^⑥。

天下之人，蓋不可以億兆計，人人之夢各異，夜夜之夢各異，有天有地，有人有物，皆思成之，蓋不可以塵計，安知今之天地，非有思者乎。

心應棗，肝應榆，我通天地。將陰夢水，將晴夢火，天地通我。我與天地似契似離，純純各歸。天地雖大，有色有形，有數有方，吾有非色非形，非數非方，而天天地地者存。

死胎中者，死卵中者，亦人亦物，天地雖大，彼固不知，計天地者，皆我區識，譬如手不觸刃，刃不傷手^⑦。

夢中、鑑中、水中，皆有天地存焉。欲去夢天地者，寢不寐，欲去鑑天地者，形不照，欲去水天地者，盍不汲。彼之有無，在此不在彼，是以聖人不去天地，去識。

天非自天，有爲天者，地非自地，有爲地者。譬如屋宇舟車，待人而成，

彼不自成。知彼有待，知此無待，上不見天，下不見地，內不見我，外不見人。

有時者氣，彼非氣者，未嘗有晝夜。有方者形，彼非形者，未嘗有南北。何謂非氣？氣之所自生者。如搖簞得風，彼未搖時，非風之氣，彼已搖時，即名爲氣。何謂非形？形之所自生者。如鑽木得火，彼未鑽時，非火之形，彼已鑽時，即名爲形。

寒暑溫涼之變，如瓦石之類，置之火即熱，置之水即寒，呵之即溫，吸之即涼。特因外物有去有來，而彼瓦石無去無來，譬如水中之影，有去有來，所謂水者，實無去來。

衣搖空得風，氣噓物得水，水注水即鳴，石擊石即光，知此說者，風雨雷電皆可爲之，蓋風雨雷電皆緣氣而生，而氣緣心生。猶如內想大火，久之覺熱，內想大水，久之覺寒，知此說者，天地之德皆可同之。

五雲之變，可以卜當年之豐歉，八風之朝，可以卜當時之吉凶，是知休咎灾祥，一氣之運爾。渾人我，同天地，

而彼私智認而已之。

天地寓，萬物寓，我寓，道寓，苟離于寓，道亦不立。

三極

極者，尊聖人也。

聖人之治天下，不我賢愚，故因人之賢而賢之，因人之愚而愚之。不我是非，故因事之是而是之，因事之非而非之。知古今之大同，故或先內，或先外。今，知內外之大同，故或先內，或先外。天下之物無得以累之，故本之以謙，天下之物無得以難之，故含之以虛，天下之物無得以窒之，故變之以權。以此中天下，可以制禮，以此和天下，可以作樂，以此公天下，可以理射，以此周天下，可以禦侮，以此因天下，可以立法，以此觀天下，可以制器。聖人不以一己治天下，而以天下治天下，天下歸功於聖人，聖人任功於天下，所以堯舜禹湯之治天下，天下皆曰自然。

天無不覆，有生有殺，而天無愛惡。日無不照，有妍有醜，而日無厚薄。

聖人之道天命，非聖人能自道，聖人之德時符，非聖人能自德，聖人之事人爲，非聖人能自事，是以聖人不有道，不有德，不有事。

聖人知我無我，故同之以仁，知事無我，故權之以義，知心無我，故戒之以禮，知識無我，故照之以智，知言無我，故守之以信。

聖人之道，或以仁爲仁，或以義爲仁，或以禮以智，以信爲仁，仁義禮智信，各兼五者，聖人一之不膠，天下名之不得。

勿以行觀聖人，道無蹟，勿以言觀聖人，道無言，勿以能觀聖人，道無爲，勿以貌觀聖人，道無形。

行雖至卓，不離高下，言雖至工，不離是非，能雖至神，不離巧拙，貌雖至殊，不離妍醜，聖人假此以示天下，天下冥此，乃見聖人。

聖人師蜂立君臣，師蜘蛛立網罟，

師拱鼠制禮，師戰螳制兵。衆人師賢人，賢人師聖人，聖人師萬物，惟聖人同物，所以無我。

聖人曰：道觀天地人物皆吾道，倡和之，始終之，青黃之，卵翼之，不愛道，不棄物，不尊君子，不賤小人。賢人曰：物物不同，旦旦去之，旦旦與之，長之短之，直之方之，是爲物易者也。殊不知聖人鄙雜廁，別分居，所以爲人，不以此爲己。

聖人之於衆人，飲食衣服同也，屋宇舟車同也，貴賤貧富同也，衆人每同聖人，聖人每同衆人，彼仰其高侈其大者，其然乎，其不然乎。魚欲異羣魚，捨水躍岸即死，虎欲異羣虎，捨山入市即擒，聖人不異衆人，特物不能拘爾。道無作，以道應世者，是事非道，道無方，以道寓物者，是物非道，聖人竟不能出道以示人。如鐘鐘然，如鐘鼓然，聖人之言則然，如車車然，如車舟然，聖人之行則然，惟莫能名，所以退天下之言，惟莫能知，所以奪天下之智。蛆食蛇，蛇食蛙，蛙食螂蛆，互相食也。

聖人之言亦然，言有無之弊，又言非有非無之弊，又言去非有非無之弊，言之如引鋸然，惟善聖者不留一言。

若龍若蛟，若蛇若龜，若魚若蛤，龍皆能之。蛟，蛟而已，不能爲龍，亦不能爲蛇爲龜，爲魚爲蛤，聖人龍之，賢人蛟之。

在己無居，形物自著，其動若水，其靜若鏡，其應若響。芒乎若亡，寂乎若清，同焉者和，得焉者失，未常先人，而常隨人。

渾乎洋乎，遊太初乎，時金已，時玉已，時糞已，時土已。時翔物，時逐物，時山物，時淵物，端乎權乎，狂乎愚乎。

人之善琴者，有悲心，則聲悽悽然，有思心，則聲遲遲然，有怨心，則聲回回然，有慕心，則聲奕奕然。所以悲思怨慕者，非手非竹，非絲非桐，得之心，符之手，得之手，符之物，人有道者，莫不中道。

聖人以有言有爲有思者，所以同乎人，以未嘗言未嘗爲未嘗思者，所以

異乎人。

利害心愈明，則親不睦，賢愚心愈明，則友不交，是非心愈明，則事不成，好醜心愈明，則物不契，是以聖人渾之。

心之愚拙者，妄援聖人之愚拙自解，殊不知聖人時愚時明，時巧時拙。

以聖師聖者賢人，以賢師聖者聖人，蓋以聖師聖者，徇跡而忘道，以賢師聖者，反跡而合道。

賢人趨上而不見下，衆人趨下而不見上，聖人通乎上下，惟其宜之，豈曰離賢人衆人，別有聖人也哉！

天下之理，夫者唱，婦者隨，牡者馳，牝者逐，雄者鳴，雌者應，是以聖人制言行，而賢人拘之。

聖人道雖虎變，事則鼈行，道雖絲棼，焚事則棊布。

所謂聖人之道者，胡然子子耳，胡然徹徹爾，胡然臧臧爾，惟其能徧偶萬物，而無一物能偶之，故能貴萬物。

雲之卷舒，禽之飛翔，皆在虛空中，所以變化不窮，聖人之道則然。

四符

符者，精神魂魄也。

水可析可合，精無人也，火因膏因薪，神無我也，故耳蔽前後皆可聞無人，智崇無人，一奇無人，冬凋秋物無人，黑不可變無人，北壽無人，皆精。舌即齒牙成言無我，禮卑無我，二偶無我，夏因春物無我，赤可變無我，南天無我，皆神。以精無人，故米去殼則精存，以神無我，故鬼憑物則神見。全精者忘是非，忘得失，在此者非彼，抱神者，時晦明，時強弱，在彼者非此。

精神水火也，五行互生滅之，其來無首，其往無尾。則吾之精，一滴無存亡爾，吾之神，一歛無起滅爾。惟無我無人，無首無尾，所以與天地冥。

精者水，魄者金，神者火，魂者木。精主水，魄主金，金生水，故精者魄藏之。神主火，魂主木，木生火，故神者魂藏之。惟火之爲物，能鎔金而銷之，能燔木而燒之，所以冥魂魄。惟精

在天爲寒，在地爲水，在人爲精。神在天爲熱，在地爲火，在人爲神。魄在天爲燥，在地爲金，在人爲魄。魂在天爲風，在地爲木，在人爲魂。惟以我之精，合天地萬物之精，譬如萬水可合爲一水，以我之神，合天地萬物之神，譬如萬火可合爲一火。以我之魄，合天地萬物之魄，譬如金之爲物，可合異金而鎔之爲一金。以我之魂，合天地萬物之魂，譬如木之爲物，可接異木而生之爲一木。則天地萬物皆吾精吾神、吾魂吾魄，何者死，何者生。

五行之運，因精有魂，因魂有神，因神有意，因意有魄，因魄有精，五者回環不已，所以我之僞心，流轉造化幾億萬歲，未有窮極。然核芽相生，不知其幾萬株，天地雖大，不能芽空中之核，雌卵相生，不知其幾萬禽，陰陽雖妙，不能卵無雄之雌。惟其來干我者，皆攝之以一息，則變物爲我，無物無我，所謂五行者，孰能變之。

衆人以魄攝魂者，金有餘則木不足也，聖人以魂運魄者，木有餘則金不

足也。蓋魄之藏，魂俱之，魂之游，魄因之，魂晝寓目，魄夜舍肝，寓目能見，舍肝能夢。見者魂無分別，析之者分別，析之曰天地者，魂狃習也，夢者魄無分別，析之者分別，析之曰彼我者，魄狃習也。火生土，故神生意，土生金，故意生魄。神之所動，不名神名意，意之所動，不名意名魄。惟聖人知我無我，知物無物，皆因思慮計之而有。是以萬物之來，我皆對之以性，而不對之以心，性者心未萌也。無心則無意矣，蓋無火則無土。無意則無魄矣，蓋無土則無金。一者不存，五者皆廢。既能渾天地萬物以爲魂，斯能渾天地萬物以爲魄，凡造化所妙皆吾魂，凡造化所有皆吾魄，則無有一物可投我者。

鬼云爲魂，鬼白爲魄，於文則然，鬼者，人死所變。云者風，風者木，白者氣，氣者金，風散故輕清，輕清者上天，金堅故重濁，重濁者入地，輕清者，魄從魂升，重濁者，魂從魄降。有以仁升者爲木星佐，有以義升者爲金星佐，

有以禮升者爲火星佐，有以智升者爲水星佐，有以信升者爲土星佐。有以不仁沉者木賊之，不義沉者金賊之，不禮沉者火賊之，不智沉者水賊之，不信沉者土賊之。魂魄半之，則在人間，升魂爲貴，降魄爲賤，靈魂爲賢，厲魄爲愚，輕魂爲明，重魄爲暗。揚魂爲羽，銳魄爲毛^⑤，明魂爲神，幽魄爲鬼。其形其居，其識其好，皆以五行契之。惟五行之數，參差不一，所以萬物之多，盈天地間猶未已也。以五事歸五行，以五行作五虫，可勝言哉。譬如兆龜數著，至誠自契，五行應之，誠苟不至，兆之數之，無一應者。聖人假物以游世，五行不得不對。

三者具有魂，魂者識，目者精，色者神，見之者，爲魂耳口鼻心之類。在此生者，愛爲精，爲彼生父本，觀爲神，爲彼生母本，愛觀雖異，皆因識生。彼生生本，在彼生者，一爲父，故受氣於父氣，爲水，一爲母，故受血於母血，爲火，有父有母，彼生生矣。惟其愛之無識，如鑱之交^⑥，觀之無識，如燈之照，

吾識不萌，吾生何有。

如桴叩鼓，鼓之形者，我之有也，鼓之聲者，我之感也，桴已往矣，餘聲尚存，終亦不存而矣^⑦。鼓之形如我之精，鼓之聲如我之神，其餘聲者，猶之魂魄，知夫倏往倏來，則五行之氣我何有哉。

夫果之有核，必待水火土三者具矣，然後相生不窮，三者不具，如大旱大潦大塊，皆不足以生物。精水神火意土三者本不交，惟人以根合之，故能於其中橫見有事。猶如術呪，能於至無見多有事。

魂者水也^⑧，木根於冬水，而花於夏火，故人之魂藏於夜精，而見於晝神。合乎精，故所見我獨，蓋精未嘗有人，合乎神，故所見我同^⑨，蓋神未嘗有我。

知夫此身如夢中身，隨情所見者，可以飛神作我而游太清，知夫此物如夢中物，隨情所見者，可以凝精作物而駕八荒。是道也，能見精神而久生，能忘精神而超生。吸氣以養精，如金生

水，吸風以養神，如木生火，所以假外以延精神。漱水以養精，精之所以不窮，摩火以養神，神之所以不窮，所以假內以延精神。若夫忘精神而超生者，吾嘗言之矣。人勤於禮者，神不外馳，可以集神，人勤於智者，精不外移，可以攝精。仁則陽而明，可以輕魂，義則陰而冥，可以御魄。

蜣螂轉丸，丸成，精思之，而有蜣白者存丸中，俄去殼而蟬，彼蜣不思，彼蜣奚白。

庖人羹蟹，遺一足几上，蟹已羹，而遺足尚動，是生死者，一氣聚散爾，不生不死，而人橫計曰生死。

有死立者，有死坐者，有死卧者，有死病者，有死藥者，等死，無甲乙之殊。若知道之士，不見生，故不見死。

人之厭生死超生死^⑩，皆是大患，譬如化人，若有厭生死心，超生死心，止名爲妖，不名爲道。計生死者，或曰死已有，或曰死已無，或曰死已亦有亦無，或曰當幸者，或曰當懼者，或曰當任者^⑪，或曰當超者，愈變識情，馳驚不

已。殊不知我之生死，如馬之手，如牛之翼，本無有，復無無，譬如水火，雖犯水火，不能燒之，不能溺之。

五鑑

鑑者，心也。

心蔽吉凶者，靈鬼攝之，心蔽男女者，淫鬼攝之，心蔽幽憂者，沉鬼攝之，心蔽逐放者，狂鬼攝之，心蔽盟詛者，奇鬼攝之。如是之鬼，或以陰爲身，或以幽爲身，或以風爲身，或以氣爲身，或以土偶爲身，或以彩畫爲身，或以老畜爲身，或以敗器爲身。彼以其精，此以其精，兩精相搏，則神應之。爲鬼所攝者，或解奇事，或解瑞事，其人傲然，不曰鬼于躬，惟曰道于躬，久之，或死木，或死金，或死繩，或死井。惟聖人能神神，而不神于神，役萬神而執其機，可以會之，可以散之，可以禦之，日應萬物，其心寂然。

無一心，五識並馳，心不可一，無虛心，五行皆具，心不可虛，無靜心，萬

化密移，心不可靜。借能一則二偶之，借能虛則實滿之，借能靜則動搖之。惟聖人能斂萬有於一息，無有一物可役吾之明徹，散一息於萬有，無有一物可間吾之云爲。

火千年，俄可滅，識千年，俄可去。

流者舟也，所以流之者，是水非舟，運者車也，所以運之者，是牛非車，思者心也，所以思之者，是意非心。不知所以然而然，故其來無從，其往無在。其來無從，其往無在，故能與天地本原，不古不今。

知心無物，則知物無物，知物無物，則知道無物，故不尊卓絕之行，不驚微妙之言。故物我交心生，兩木摩火生，不可謂之在我，不可謂之在彼，不可謂之非我，不可謂之非彼，執而彼我之，則愚。

無恃爾所謂利害是非，爾所謂利害是非，果得利害是非之乎，聖人方且不識不知，而況於爾。

夜之所夢，或長於夜，心無時，生於齊者，心之所見皆齊國也，既而之宋

之楚，之晉之梁，心之所存各異，心無方。

善弓者，師弓不師羿，善舟者，師舟不師鼻，善心者，師心不師聖。

是非好醜，成敗盈虛，造物者運矣，皆因私識執之而有。於是以無遣之猶存，以非有非無遣之猶存，無曰莫莫爾，無曰渾渾爾，猶存，譬猶昔游再到，記憶宛然，此不可忘，不可遣，善吾識者，變識爲智。變識爲智之說，汝知之乎？曰：想如思鬼，心慄，思盜，心怖，曰：識如認黍爲稷，認玉爲石，皆浮游罔象，無所底止。譬睹奇物生奇物想，生奇物識，此想此識，根不在我，譬如今日，今日而已，至於來日想識，殊未可卜，及至來日，紛紛想識，皆緣有生。曰想曰識，譬犀望月，月影入角，特因識生，始有月形，而彼真月，初不在角，胸中之天地萬物亦然，知此說者，外不見物，內不見情。

物生於土，終變於土，事生於意，終變於意，知夫惟意，則俄是之，俄非之，俄善之，俄惡之，意有變，心無變，

意有覺，心無覺。惟一我心，則意者塵往來耳，事者歛起滅爾，吾心有大常者存。

情生於心，心生於性，情波也，心流也，性水也，來干我者，如石火頃，以性受之，則心不生，物浮浮然。

賢愚真偽，有識者，有不識者，彼雖有賢愚，彼雖有真偽，而謂之賢愚真偽者，繫我之識，知夫皆識所成，故雖真者亦偽矣。

心感物不生心，生情，物交心不生物，生識，物尚非真，何況於識，識尚非真，何況非情。而彼妄人，於至無中執以為有，於至變中執以為常，一情認之積為萬情，萬情認之積為萬物，物來無窮，我心有際。故我之良心受制於情，我之本情受制於物，可使之去，可使之來，而彼去來，初不在我，造化役之，固無休息。殊不知天地雖大，能役有形，而不能役無形，陰陽雖妙，能役有氣，而不役無氣。心之所之，則氣從之，氣之所之，則形應之，猶如太虛，於至無中變成一氣，於一氣中變成萬

物，而彼之一氣，不名太虛。我之一心，能變為氣為形，而我之心無氣無形，知夫我之一心，無氣無形，則天地陰陽不能役之。

人之平日，目忽見非常之物者，皆精有所結而使之然，人之病日，目忽見非常之物者，皆心中所歉。而使之然。苟知吾心能於無中示有，則知吾心能於有中示無，但不信之，自然不神。或曰厥識既昏，孰能不信？我應之曰：如捕蛇師心不怖蛇，彼雖夢蛇，而無怖畏，故黃帝曰：道無鬼神，獨往獨來。

我之思慮日變，有使之者，非我也，命也，苟知惟命，外不見我，內不見心。

譬如兩目，能見天地萬物，暫時回光，一時不見。

目視雕琢者，明愈傷，耳聞交響者，聰愈傷，心思玄妙者，心愈傷。

勿以我心揆彼，當以彼心揆彼，知此說者，可以周事，可以行德，可以貫道，可以交人，可以忘我。

天下之理，小不制而至於大，大不

制而至於不可制，故能制一情者，可以成德，能忘一情者，可以契道。

六七

匕者，食也，食者，形也。

世之人以我思異彼思，彼思異我思，分人我者，殊不知夢中人亦我思異彼思，彼思異我思，孰為我，孰為人？世之人以我痛異彼痛，分人我者，殊不知夢中人亦我痛異彼痛，彼痛異我痛，孰為我，孰為人？爪髮不痛，手足不思，亦我也，豈可以思痛異之。世之人以獨見者為夢，同見者為覺，殊不知精之所結，亦有一人獨見於晝者，神之所合，亦有兩人同夢於夜者，二者皆我精神，孰為夢，孰為覺？世之人以所見為夢，久見為覺，殊不知暫之所見者，陰陽之氣，久之所見者，亦陰陽之氣，二者皆我陰陽，孰為夢，孰為覺？

好仁者，多夢松柏桃李，好義者，多夢刀兵金鐵，好禮者，多夢簞簋籩豆，好智者，多夢江湖川澤，好信者，多

夢山嶽原野，役於五行，未有不然者。然夢中或聞某事，或思某事，夢亦隨變，五行不可拘。聖人御物以心，攝心以性，則心同造化，五行亦不可拘。汝見蛇首人身者，牛臂魚鱗者，鬼形禽翼者，汝勿怪，此怪不及夢，夢怪不及覺，有耳有目，有手有臂，怪尤矣。大言不能言，大智不能思。有人問於我曰：爾族何氏？何名何字，何衣何食，何友何僕，何琴何書，何古何今？我時默然不對一字。或人叩之不已，我不得已應之曰：尚自不見我，將何爲我所。

形可分可合，可延可隱，一夫一婦可生二子，形可分，一夫一婦二人成一子，形可合，食巨勝則壽，形可延，夜無月火，人不見我，形可隱。以一氣生萬物，猶棄髮可換，所以分形，以一氣合萬物，猶破唇可補，所以合形，以神存氣，以氣存形，所以延形，合形於神，合神於無，所以隱形。汝欲知之乎，汝欲爲之乎。

無有一物不可見，則無一物非吾之見，無有一物不可聞，則無一物非吾

之聞。五物可以養形，無一物非吾之形，玉味^⑤可以養氣，無一物非吾之氣，是故吾之形氣，天地萬物。

畊夫習牛則獷，獵夫習虎則勇，漁夫習水則沉，戰夫習馬則健，萬物可爲我。我之一身，內變螻蛄，外蒸蝨蚤，瘦則龜魚，瘦則鼠蝮，我可爲萬物。

我之爲我，如灰中金，而不若礦砂之金，破礦得金，淘沙得金，揚灰終身，無得金也。

一蜂至微，亦能游觀乎天地，一蝦至微，亦能放肆乎大海。

土偶之成也，有貴有賤，有士有女，其質土其壞土人哉。

目自觀，目無色，耳自聽，耳無聲，舌自嘗，舌無味，心自揆，心無物，衆人逐於外，賢人執於內，聖人皆僞之。

我身五行之氣，而五行之氣，其性一物，借如一所，可以取水，可以取火，可以生木，可以凝金，可以變土，其性舍攝，元無差殊。故羽虫盛者，毛虫不育，毛虫盛者，鱗虫不育，知五行互用者，可以忘我。

枯龜無我，能見大知，磁石無我，能見大力，鐘鼓無我，能見大音，舟車無我，能見遠行。故我一身雖有智有力，有行有音，未嘗有我。

蟻射影能斃我，知夫無知者亦我，則普天之下，我無不在。

心憶者猶忘飢，心忿者猶忘寒，心養者猶忘病，心激者猶忘痛。苟吸氣以養其和，孰能飢之？存神以滋其暖，孰能寒之？養五臟以五行，則無傷也，孰能病之？歸五臟於五行，則無知也，孰能痛之？

人無以無知無爲者爲無我，雖有知有爲，不害其爲無我，譬如火也，躁動不停，未嘗有我。

七釜

釜者，化也。

道本至無，以事歸道者，得之一息，事本至有，以道運事者，周之百爲。得道之尊者，可以輔世，得道之獨者，可以立我。知道非時之所能拘者，能

以一日爲百年，能以百年爲一日。知道非方之所能礙者，能以一里爲百里，能以百里爲一里。知道無氣，能運有氣者，可以召風雨。知道無形，能變有形者，可以易禽獸。得道之清者，物莫能累，身輕矣，可以騎鳳鶴。得道之渾者，物莫能溺，身冥矣，可以席蛟鯨。

有即無，無即有，知道道者，可以制鬼神。實即虛，虛即實，知道道者，可以入金石。上即下，下即上，知道道者，可以侍星辰。古即今，今即古，知道道者，可以卜龜筮。人即我，我即人，知道道者，可以窺他人之肺肝。物即我，我即物，知道道者，可以成腹中之龍虎。知象由心變，以此觀心，可以成女嬰。知氣由心生，以此吸神，可以成鑪冶。以此勝物，虎豹可伏，以此同物，水火可入。惟有道之士能爲之，亦能能之而不爲之。

人之力，有可以奪天地造化者，如冬起雷，夏造冰，死屍能行，枯木能花，豆中攝鬼，杯中釣魚，畫門可開，土鬼可語，皆純氣所爲，故能化萬物。今之情情不停，亦氣所爲，而氣之爲物，有合有散，我之所以行氣者，本未嘗合，亦未嘗散。有合者生，有散者死，彼未嘗合未嘗散者，無生無死，客有去來，郵亭自若。

有誦呪者，有事神者，有墨字者，有變指者，皆可以役神御氣，變化萬物。惟不誠之人，難於自信，而易於信物，故假此爲之，苟知爲誠，有不待彼而然者。

人一呼一吸，日行四十萬里，化可謂速矣，惟聖人不存不變。青鸞子千歲而千歲化，桃子五仕而心五化，聖人賓事去物，豈不欲建立於世哉，有形數者，懼化之不可知也。

萬物變遷，雖互隱見，氣一而已，惟聖人知一而不化。爪之生，髮之長，榮衛之行，無頃刻止，衆人能見之於著，不見之於微，賢人見之於微，而不能任化，聖人任化，所以不化。

室中有常見聞矣，既而之門之鄰，之里之黨，既而之郊之山之川，見聞各異，好惡隨之，和競從之，得失成之，是以聖人動止有戒。譬如大海，能變化億萬蛟魚，水一而已。我之與物，翦然蔚然，在大化中，性一而已。知夫性一者，無人無我，無死無生。

天下之理，是或化爲非，非或化爲是，恩或化爲讎，讎或化爲恩，是以聖人居常慮變。

人之少也，當佩乎父兄之教，人之壯也，當達乎朋友之箴，人之老也，當警乎少壯之說，萬化雖移，不能厄我。

天下之理，輕者易化，重者難化，譬如風雲，須臾變滅，金玉之性，歷久不渝。人之輕明者，能與造化俱化而不留，殆有未嘗化者存。

二幼相好，及其壯也，相遇則不相識，二壯相好，及其老也，相遇則不相識，如雀蛤鷹鳩之化，無昔無今。

八籌

籌者，物也。

古之善揲著灼龜者，能於今中示

古，古中示今，高中示下，下中示高，小中示大，大中示小，一中示多，多中示一，人中示物，物中示人，我中示彼，彼中示我。是道也，其來無今，其往無古，其高無蓋，其低無載，其大無外，其小無內，其本無一，其末無多，其外無物，其內無人，其近無我，其遠無彼。不可析，不可合，不可喻，不可思，惟其渾淪，所以惟道④。

水潛，故蘊爲五精，火飛，故達爲五臭，木茂，故花爲五色，金堅，故實爲五聲，土和，故滋爲五味，其常五，其變不可計，其物五，其雜不可計。然則萬物在天地間，不可執謂之萬，不可執謂之五，不可執謂之一，不可執謂之非萬，不可執謂之非五，不可執謂之非一。或合之，或離之，以此必形，以此必數，以此必氣，徒自勞爾，物不知我，我不知物。

即吾心中可作萬物，蓋心有所之，則愛從之。愛從之，則精從之，蓋心有所結，先凝爲水，心慕物涎出，心悲物淚出，心愧物汗出。無暫而不久，無久

而不變，水生木，木生火，火生土，土生金，金生水，相攻相尅，不可勝數。嬰兒藥女，金樓絳宮，青蛟白虎，寶鼎紅爐，皆此物，有非此物存者。

鳥獸俄呦呦，俄甸甸，俄逃逃，草木俄茁茁，俄亭亭，俄蕭蕭，天地不能留，聖人不能繫，有運者存焉爾。有之在彼，無之在此，鼓不桴則不鳴，偶之在彼，奇之在此，桴不手則不擊。

均一物也，衆人惑其名，見物不見道，賢人析其理，見道不見物，聖人合其天，不見道，不見物，一道皆道。不執之即道，執之即物。

知物之僞者，不必去物，譬如見土牛木馬，雖情存牛馬之名，而心忘牛馬之實。

九藥

藥者，雜治也。

勿輕小事，小隙沉舟，勿輕小物，小虫毒身，勿輕小人，小人賊國。能周小事，然後能成大事，能積小物，然後

能成大物，能善小人，然後能契大人。天既無可必者人，人又無能必者事，惟去事離人，則我在我，惟可即可，未有當繁簡可，當戒忍可，當勤儉可。

智之極者，知智果不足以周物，故愚，辯之極者，知辯果不足以喻物，故訥，勇之極者，知勇果不足以勝物，故怯。

天地萬物，無有一物是吾之物，物非我，物不得不應，我非我，我不得不養。雖應物，未嘗有物，雖養我，未嘗有我。勿曰外物然後外我，勿曰外我然後外心⑤。道一而已，不可序進。

諦毫末者，不見天地之大，審小音者，不聞雷霆之聲。見大者亦不見小，見邇者亦不見遠，聞大者亦不聞小，聞邇者亦不聞遠。聖人無所見，故能無不見，無所聞，故能無不聞。

目之所見，不知其幾何，或愛金，或愛玉，是執一色爲目也，耳之所聞，不知其幾何，或愛鐘，或愛鼓，是執一身爲耳也⑥。惟聖人不慕之，不拒之，不處之。

善今者可以行古，善末者可以立本。

狡勝賊能捕賊，勇勝虎能捕虎，能克己乃能成己，能勝物乃能利物，能忘道乃能有道。

函堅則物必毀之，剛折矣，刀利則物必摧之，銳斯挫矣。威鳳以難見爲神，是以聖人以深爲根，走麝以遺香不捕，是以聖人以約爲紀。

餅有二竅，水實之，則倒瀉，閉一，則水不下，蓋不升則不降，井雖千仞，汲之水上，蓋不降則不升。是以聖人不先物。

人之有失，雖已受害於已失之後，久之，竊議於未失之前，惟其不恃己聰明，而兼人之聰明，自然無我，而兼天下之我，終身行之，可以不失。

古今之俗不同，東西南北之俗又不同，至於一家一身之善又不同，吾豈執一豫格後世哉。惟隨時同俗，先機後事，捐忿塞慾，簡物恕人，權其輕重而爲之，自然合神不測，契道無方。

有道交者，有德交者，有事交者。

道交者，父子也，出於是非賢愚之外，故久；德交者，則有是非賢愚矣，故或合或離；事交者，合則離。

勿以拙陋曰道之質，當樂敏捷，勿以愚暗曰道之晦，當樂輕明，勿以傲易曰道之高，當樂和同，勿以汗漫曰道之廣，當樂要息，勿以幽憂曰道之寂，當樂悅豫，古人之言學之多弊，不可不救。

不可非世是己，不可卑人尊己，不可輕忽道己，不可訕謗德己，不可鄙猥才己。

困天下之智者，不在智而在愚，窮天下之辯者，不在辯而在訥，伏天下之勇者，不在勇而在怯。

天不能春蓮冬菊，是以聖人不違時，地不能洛橘汶貉，是以聖人不違俗。聖人不能使手步足握，是以聖人不違我所長，聖人不能使魚飛禽馳，是以聖人不違人所長。夫如是者，可動可止，可晦可明，惟不可拘，所以爲道。少言者，不爲人所忌，少行者，不爲人所短，少智者，不爲人所勞，少能者，不

爲人所役。

操之以誠，行之以簡，待之以恕，應之以默，吾道不窮。

謀之于事，斷之以理，作之于人，成之于天，事師于今，理師于古，事同于人，道獨于己。

金玉難捐，土石易捨，學道之士，遇微言妙行，慎勿執之，是可爲而不可執，若執之者，腹心之疾，無藥可療。

人不明於急務，而從事於多務它務奇務者，窮困灾厄及之，殊不知道無不在，不可捨此就彼。

天下之理，捨親就疏，捨本就末，捨賢就愚，捨近就遠，可暫而已，久則害生。

昔之論道者，或曰凝寂，或曰邃深，或曰澄徹，或曰空同，或曰晦冥，慎勿遇此而生怖退。天下至理，竟非言意，苟知非言非意在彼微言妙意之上，乃契吾說。

聖人大言金玉，小言桔梗芣苢，用之當，桔梗芣苢生之，不當，金玉斃之。言某事者，甲言利，乙言害，丙言

或利或害，丁言俱利俱害，必居一於此矣，喻道者不言。

事有在事言有理，道無在道言無理，知言無理，則言言皆道，不知言無理，雖執至言，為梗為醫^⑮。疑當作翳。

不信愚人易，不信賢人難，不信賢人易，不信聖人難，不信一聖人易，不信千聖人難。夫不信千聖人者，外不見人，內不見我，上不見道，下不見事。

聖人言蒙蒙，所以使人聾，聖人言冥冥，所以使人盲，聖人言沉沉，所以使人瘖。惟聾則不聞聲，惟盲則不見色，惟瘖則不音言。不聞聲者，不聞道、不聞事、不聞我，不見色者，不見道、不見事、不見我，不音言者，不言道、不言事、不言我。

人徒知偽得之中有真失，殊不知真得之中有真失，徒知偽是之中有真非，殊不知真是之中有真非。

言道者如言夢，夫言夢者曰：如此金玉，如此器皿，如此禽獸，言者能言之，不能取而與之，聽者能聞之，不能受而得之，惟善聽者不泥不辯。

圓爾道，方爾德，平爾行，銳爾事。

無上妙道文始真經

①「城都」，當為「成都」。

② 造玄，《關尹子》（載《叢書集成初編》）和《文始真經注》（載《道藏》維字號）皆作「通玄」。

③ 而不窮乎，《關尹子》和《文始真經注》皆作「而不窮也」。

④ 此句，《關尹子》作「而即有言有行者，求道」，《文始真經注》作「而即有言有行求道」。

⑤ 兩精相博，《關尹子》和《文始真經注》皆作「兩精相搏」。

⑥ 有去之者，《關尹子》和《文始真經注》皆作「有示之者」。

⑦ 刃不傷手，《關尹子》和《文始真經注》皆作「刃不傷人」。

⑧ 此句，《關尹子》和《文始真經注》皆作「可以理財」。

⑨ 此句，《關尹子》和《文始真經注》皆作「其聲斐斐然」。

⑩ 此句，《關尹子》和《文始真經注》皆作「世之愚拙者」。

⑪ 此句，《關尹子》和《文始真經注》皆作「事則某布」。「焚」字衍。

⑫ 据《關尹子》和《文始真經注》在「胡然徹徹爾」之後，尚脫「胡然堂堂爾」一句。

⑬ 据《文始真經注》，在「故神者魂藏之」句後，尚有「惟水之為物，能藏金而息之，能滋木而榮之，所以析魂魄」句脫漏。

⑭ 此句，《關尹子》作「則無有一物可役我者」；《文始真經注》作「則無一物可役我者」。

⑮ 此句，《關尹子》和《文始真經注》皆作「鈍魄為毛」。

⑯ 此句，《關尹子》和《文始真經注》皆作「如鎖之交」。

⑰ 此句，《關尹子》和《文始真經注》皆作「不存而已矣」。

⑱ 此句，《關尹子》作「魂者木也」。

⑲ 此句，《關尹子》和《文始真經注》皆作「故所見人同」。

⑳ 此句，《關尹子》和《文始真經注》皆作「人之厭生死超生死者」。

㉑ 此句，《關尹子》和《文始真經注》作「或曰當皆喜者」。

㉒ 「奇鬼攝之」句後，《關尹子》和《文始真經注》尚有「心蔽藥餌者，物鬼攝之」句。此脫。

㉓ 「或解奇事」句後，《關尹子》和《文始真經注》尚有「或解異事」。

㉔ 「不知所以然而然」句後，《關尹子》和《文始真經注》尚有「惟不知所以然而然」句，此脫。

㉕ 据《關尹子》和《文始真經注》，在「則知道無物」句後，尚有「知道無物」句，此脫。

㉖ 「故物我交心生」，《關尹子》和《文始真經注》皆作「物我交心生」。

㉗ 「爾所謂利害是非」，《關尹子》和《文始真經注》皆作「爾所謂利害是非者」。

㉘ 「善吾識者」，《關尹子》和《文始真經注》皆作「善去識者」。

㉙ 「譬犀望月，月影入角」，《關尹子》和《文始真經注》皆作「譬如犀望月，月形入角」。

㉚ 「何況非情」，《關尹子》和《文始真經注》皆作「何況于情」。

㉛ 「而不役無氣」，《關尹子》和《文始真經注》皆作「而不能役無氣」。

㉜ 「皆心中所歎」，《關尹子》和《文始真經注》皆作「皆心有所歎」。

㉝ 二校本在此句之下，尚有「彼痛異我痛」句，此脫。

㉞ 此二句，《關尹子》作「世之人以暫見者為夢，久見者為覺」，《文始真經注》作「世之人以暫見為夢，久見為覺」。

③5 「爾族何氏」，《關尹子》和《文始真經注》皆作「爾何族何氏」。

③9 玉味，《關尹子》和《文始真經注》皆作「五味」。

③7 「郵亭自若」，《關尹子》和《文始真經注》皆作「郵常自若」。

③8 此句，《關尹子》和《文始真經注》皆作「不能見之于微」。

③9 此句，《關尹子》和《文始真經注》皆作「所以無化」。

④0 《關尹子》和《文始真經注》皆作「所以爲道」。

④1 此句，《關尹子》和《文始真經注》皆作「勿曰外形然後外心」。

④2 此句，《關尹子》和《文始真經注》皆作「是執一聲爲耳也」。

④3 此句，《關尹子》和《文始真經注》皆作「當樂要急」。

④4 此句，《關尹子》和《文始真經注》皆作「天不能冬蓮春菊」。

④5 此句，《關尹子》和《文始真經注》皆作「爲梗爲翳」。

(曾召南點校)

003 文始真經註

經名：文始真經註。宋元之際道士牛道淳注解。九卷。底本出處：《正統道藏》洞神部玉訣類。參校本：一、《文始真經》；二、《叢書集成》所收《關尹子》。

關尹子

關令尹喜，周大夫也。老子西遊，喜望見有紫氣浮關，知真人當過，候物色而迹之，果得老子。老子亦知其奇，為著書。喜既得老子書，亦自著書九篇，名《關尹子》。今陝州靈寶縣太初觀，乃古函關候見老子處。終南宗聖宮，乃關尹故宅，周穆王修其草樓，改號樓觀，建老子祠，道觀之興，實祖于此。老子授經後，西出大散關，復會于成都青羊肆，賜號文始先生，所著書，

後為《文始真經》。

文始真經直解跋引

皓月圓明，普見千江之水，真空妙有，該通萬卷之經，因水見圓明，由經悟妙有。圓明以皓月為本，妙有以真空為源，本末是同，源流非異，既循末以歸本，仍泝流而還源，源即真空，乃是不容思議，流為妙有，爰非專一無言，無言之言以為經，無說之說以為妙，無說之說以薦言前，無言之言以明意外。言前洞奧，意外幽深，非由直解以難通，不假詳箋而莫曉，因指見月忘指，而真月昭彰，因解悟經忠解，而真經洞徹，見千江之月影，知一月之維綱，究羣經之真詮，悟一真之統攝，見知雙泯，究悟俱忘，天眼龍睛，詎可窺於彷彿，神靈聖智，豈可測於依稀，意外難思，言前莫議也。

文始真經註卷之一

神峰逍遙子牛道淳直解

一字篇

字者，喻真空之道也，凡二十八章。

關尹子曰，非有道不可言，

非有道者，元無道之強名，故不可以言議也。經云：唯莫能名，所以退天下之言是也，故云非有道不可言也。

不可言即道。

言前薦悟也，向言議未有之前，了然薦悟妙道，故言之不可及也，故云不可言即道也。

非有道不可思，

非唯元無道之強名，抑乃不屬思惟也，思惟則屬意識知解也，道不可以知而識也，故云纔落思惟，即是鬼家活計，正謂此也。經云：唯莫能知，所以奪天下之智，故云非有道不可思也。

不可思即道。

言前薦悟也，向思惟未生之前，了然薦悟妙道，方知思惟不可及也。故云不可思即道也。

天物怒流，人事錯錯然，

天物者，本分天真也，怒者威光也，威光赫赫，廣無邊際也，流者心也，源流注六用紛紛與人事交雜而不一也。經云：性水也，心流也，故云天物怒流，人事錯錯然也，錯者雜也，言迷人從事於道，見解紛紛不一，如下文也。

若若乎回也，

若者象也，似也，想像道似太虛，似明月，似澄潭，似冰壺，如此想象比似，則與道相違之遠，故云若若乎回也，回者違也。

戛戛乎鬪也，

戛戛者，相擊之聲也，鬪者諍論也，以言語相詰難，辯論其道，以戒諍論也，故云：以承稟為戶牖，各自開張，以經論為盾矛，遞相攻擊，以戒諍論也，故云：戛戛乎鬪也。

勿勿乎似而非也。

勿思象，勿辯諍，論擬此見解似即，似即不是，故云勿勿乎似而非也。而爭之，

爭者，鬪志也，三人兩衆同處學道，勇猛精進，鬪志為高，萌此見者，亦未悟也，故云而爭之也。

而介之，

介者，孤介也，孤然獨處，精思妙道，萌此見者，亦未悟也，故云而介之。而覘之，

覘者，唯古人之言贊美妙道也，逐言思惟贊美妙道，亦未悟也，故云而覘之也。

而嘖之，

嘖者，呵嘖古人名言法相，默默精思妙道，如此見解，亦未悟也，故云而嘖之也。

而去之，而要之。

去者，捨也，要者，取也，捨諸妄而取真道也，既有取捨，即是有為，亦未悟也，故云而去之而要之也。言之如吹影，

影者，喻名也，即戛戛諍論、喞噴之贊美呵嘖者也，言呵叱名相，如吹影不能去也，何謂也。

思之如鏤塵，

塵者，喻識也，鏤者，削刻也，即前若若想象，比似勿思辯爭之鬪之介之，獨思去要取捨者是也，如此屬識見，如削刻塵而不得淨盡是也。

聖智造迷，

聖智能解萬法，以智造道而不能至，即智是迷也，絕聖棄智，了悟妙道，如此則即智是迷也，故云聖智造迷也。

鬼神不識。

鬼神存識見，識見不能知道也，故云鬼神不識。

唯不可為，

道本自然，不假修為也，故云不可為也。唯者，因上仍下之辭。

不可致，

致者，從外邀至也，道本自具足，不假外求，故云從門入者不是家珍也，故云不可致也。

不可測，

道鬼神難窺，陰陽莫測、況其凡乎，故云不可測。

不可分，

道混然天理，杳冥莫測，故不可以心思言議而分辯，故云不可分。

故曰天，曰命，曰神，曰玄，合曰道。

故曰，因上結下之辭。天者，無為而為，自然而然而然也，命者，不知所以然而然也，神者，陰陽不測之謂也，玄者，杳冥莫測，玄之又玄也，合者，契悟也，了悟天命神玄，方契妙道也。此章明道不在言思，在人心開了悟而密契之也。

右第一章

關尹子曰：無一物非天，

天者自然而然而然，自然而然而然，即道之異名也。物物皆道生，即物是道，如漚從水生，即漚是水，故云無一物非天也。

無一物非命，

命者，不知所以然而然，不知所以然而然，亦道之異名也。物物具道之

命也，故云無一物非命。

無一物非神，

神者，不神之神，陰陽不測亦道之異名也。物物咸具神道，故云無一物非神也。

無一物非玄。

玄者，窈冥莫測，亦道之異名也，物物具此玄道，故云無一物非玄也。物既如此，人豈不然。

天地萬物，巨細洪纖，飛潛動植，咸具妙道，人豈不然乎，故云物既如此，人豈不然也。

人皆可曰天，人皆可曰神，人皆可致命通玄。

天命神玄，既是道之異名，名雖有四，其道不二，道者人人具足，箇箇見成，若人了悟，不假修為，立證無生，位齊諸聖矣，故云人皆可曰天，人皆可曰神，人皆可致命通玄。

不可彼天此非天，彼神此非神，彼命此非命，彼玄此非玄。

人人俱有本分天真，人人俱有不神之神，人人俱有不知所以然而然之

命，人人俱有窈冥莫測之玄，天命神玄者，在凡不減，在聖不增，纖細不少，洪巨不多，豈可彼物而獨有此，我獨而無哉，故云不可彼天此非天，彼神此非神，彼命此非命，彼玄此非玄。

是以善吾道者，即一物中知天盡神，致命造玄。

是以者，因上仍下之辭也。善吾道者，即一物中知天盡神，致命造玄者，從緣悟道也，故云盡十方世界是道人眼，盡十方世界是道人身，盡十方世界是自己光明，盡十方世界在自己光明裏，便怎麼去，只是光影裏作活計，向光影未發之前，洞然開悟，方信道無不在，即一物中了悟天命神玄，非他物也。故云是以善吾道者，即一物中知天盡神，致命造玄也。知者，悟也，致造者皆至也，言吾之至也。

學之徇異，名析同實，

學人徇逐天命神玄之異，名分析不異道之誠實，惑於名而迷於實也，故

云學之徇異，名析同實也。得之契同，實忘異名。

道本無名，因名悟道，道者實也，名者實之賓也，因名契悟名異而實不異，悟實而忘名，得魚忘筌，得兔忘蹄，得意忘言，名者言也，故云得之契同，實忘異名。此章明道無不在，悟實忘名。

右第二章

關尹子曰：觀道者如觀水，

觀者，照也，以智照理，如照水也，此借喻也。

以觀沼為未足，

沼者，喻凡人也，以智沼度量凡人，雖是有道，疑道在凡人不具足也，故云以觀沼為未足。

則之河、之江、之海，曰水至也。

之者，往也，河者，喻君子，江者，喻賢人，海者，喻聖人，疑道在凡人不具足，又往觀君子，又疑道在君子不具足，又往觀賢人，又疑道在賢人不具足，又往觀聖人，方不疑曰道之至也，故云則之河之江之海，曰水至

也。

殊不知我之津液涎淚，皆水。

津液涎淚，喻動靜語默也，殊不知動靜語默，皆是道之用也，因用悟體，方信道在凡不少，在君子賢人聖人不多，故云殊不知我之津液涎淚，皆水也。此合喻也。此章明道無欠無餘，聖凡平等具足是也。

右第三章

關尹子曰：道無人，聖人不見，甲是道，乙非道。

甲喻聖人，乙喻凡人，道本無我相，豈有人相哉，了道聖人忘其見解，故不見，聖人是道，凡人非道也，故云道無人，聖人不見，甲是道，乙非道也。

道無我，聖人不見，已進道，已退道。

進者取也，退者捨也，道者取之不得，捨之不失，道既無我相，聖人忘見解，故不見，已進道而取之，已退道而捨之也，故云道無我，聖人不見，已進道，已退道也。

以不有道，故不無道，

道不屬有無，聖凡平等，此釋不見甲是道乙非道，故云以不有道，故不無道。

以不得道，故不失道。

道不屬得失，本自見成，此釋不見，已進道，已退道。此章明道不屬有無得失。

右第四章

關尹子曰：不知道，妄意卜者，如射覆盃。

不知道者，迷人也，妄意卜者，妄以意識卜度也，射者，猜量也，覆盃者，喻迷塵覆蔽也。迷人不悟妙道，妄以意識卜度妙道，如猜量覆盃之下所合之物，故云不知道，妄意卜者，如射覆盃。

高之者，曰存金存玉，

金玉喻玄妙之言，又金者，明白也，玉者，瑩淨也，智見高者，妄以意識卜度妙道，曰如金之明白，如玉之瑩淨。又曰金鉛玉汞，又曰玄之又玄，衆妙之門，或是道否，迷塵覆蔽，雖執至言，亦未悟也，故云高之者，曰

存金存玉。

中之者，曰存角存羽，

角者，喻智鋒銛利，羽者，喻輕清中智之士，妄以意識卜度妙道，曰智鋒銛利，無為清靜，保養精神，身輕體健。又曰：如羚羊卦角，鸞鳳冲霄，敢是道也，如此猜量，亦未悟也，故云中之者，曰存角存羽。

卑之者，曰存瓦存石。

瓦者，喻曾經燒鍊也，石者，喻堅固也，下智之士，妄以意識卜度妙道，煅鍊頑心，一志堅固不移。又曰：道在瓦礫，如此莫是道否，如此猜量，轉不悟也，故云卑之者，曰存瓦存石也。

是乎非是乎？唯置物者知之。

置者，委棄也，知者，悟也。已上高中卑三等之人，妄以意識卜度金玉角羽瓦石之物，或是或不是，唯委棄物外，內忘意識，了然開悟，迷盃去盡，無所覆蔽，方信道不從外得，故云是乎非是乎，唯置物者知之。此章明道由心悟，非妄意卜度而知。

右第五章

關尹子曰：一陶能作萬器，終無有一器能作陶者，能害陶者。

範土曰陶，陶者，燒磁瓦窑匠也，一陶能作萬般磁瓦之器，陶能使器之成壞，器安能成壞陶者乎，故云一陶能作萬器，終無有一器能作陶者，能害陶者也。此章借喻。

一道能作萬物，終無有一物能作道者，能害道者。

道運陰陽，生成天地萬物，故云一道能作萬物也，作者，生也，道如虛空，窈冥莫測，本自見成，不假修為造作，故云無有一物能作道者，道既似虛空，萬物焉能害虛空哉？故云無有一物能害也。此合喻也。此章明道生萬物，無物能害道者也。

右第六章

關尹子曰：道茫茫而無知乎，心儻儻而無羈乎，物迭迭而無非乎。

道者心之體，心之體者，真空也，真空窈冥，茫茫然，知識未萌之前也，心既以真空為體，則儻儻然萬緣無

由羈絆，物者心之用，即體即用，應變常寂，則迭迭然無非道也。迭迭者，周行而不殆之義也，故云道茫茫而無知乎，心儻儻而無羈乎，物迭迭而無非乎。

電之逸乎，

大達之人，得自利利他人之妙，為上根之人，機鋒迅急，如擊石火，似掣電光，擬議之間，千山萬水，上根之人直下頓悟、洞徹妙道也，故云電之逸乎。

沙之飛乎，

大達之士，平等普利不遺中下，以迅機接上根，以善巧方便，廣演萬法，罔遍沙界，接中下之人，故云沙之飛乎也。沙之飛乎者，言廣演妙法如風飄塵沙也。

聖人以知心一、物一、道一、三者又合為一。

心一、物一、道一，三一之名，如日之光明，日是明之體，光是明之用，雖有三名，其道不二，故云聖人以知心一、物一、道一，三者又合為一。

不以一格不一，

一者，不二之體也，格者，度量也，不一者，應變之用也，即體即用，無用之用，如空谷傳聲，應變常寂，不以從體生心，度量應變也，故云不以一格不一也。

不以不一害一。

無用之用，如空谷傳聲，應變常寂，即體即用，不以用之妨體也，故云不以不一害一，害者，妨也。此章明道心物不二，體用如如也。

右第七章

關尹子曰：以盆為沼，以石為島，魚環遊之，不知幾千萬里而不窮也，夫何故？水無源無歸。

周回是水，中有山曰島，以盆為沼，中安一石以為島，放魚於水內，魚繞石環游，不知幾千萬里而不窮。為何故，夫何者，設問為何故也，答云：水無源泉，亦無流歸，所以不窮也，此借喻也。故云以盆為沼，以石為島，魚環游之不知幾千萬里而不窮，夫何故？水無源無歸也。

聖人之道，本無首，末無尾，所以應物不窮。

本者真空之體，末者妙有之用，聖人洞了真空妙有之道，道無首尾，莫之可測，環樞應變而無窮盡也，故云聖人之道，本無首，末無尾，所以應物不窮。此章明道無首尾，應物不窮也。

右第八章

關尹子曰：無愛道，愛者水也，

無者，禁止之辭也，言無愛道，道不屬愛，纔萌愛念，則落五行中，屬水也，則與道遠矣，故云無愛道，愛者水也。

無觀道，觀者火也，無逐道，逐者木也，無言道，言者金也，無思道，思者土也。

無得觀逐言思其道，道不屬色行名情，豈可觀逐言思而測知也，纔萌觀逐言思之念，則落五行。觀屬火，逐屬木，言屬金，思屬土，役於五行，則與道遠矣，故云無觀道，觀者火也，無逐道，逐者木也，無言道，言者金也，無思道，思者土也。此垂誠後學

深切也。
唯聖人不離本情而登大道，心既未萌，道亦假之。

唯者，因上結下之辭也。唯聖人不離情者，愛觀逐言思未萌之前也，愛觀逐言思未萌之前，即是真空之體，真空即道也，真空心未萌生，道之名亦假立也，言亦無道之名也，此垂示學人悟道之方也，故云唯聖人不離本情而登大道，心既未萌，道亦假之也。此章明道不屬五行，向愛觀逐言思未萌之前薦悟也。

右第九章

關尹子曰：重雲蔽天，江湖黯然，游魚茫然，忽望波明食動，幸賜于天，即而就之，魚釣斃焉。

重雲蔽天於夜，濃陰重厚，黑雲蔽障於天，無星月以照耀，則江湖之水，黯然而黑暗也，游魚茫茫然迷之也，於是漁者執燈火擲釣餌於水中，魚忽望見波明食動，不意人擲釣餌，而曰幸賜於天，即而就吞之，彼漁者釣之而斃死也。故云重雲蔽天，江湖

黯然，游魚茫然，忽望波明食動，幸賜於天，即而就之，魚釣斃焉也。不知我無我，而逐道者亦然。

迷人無明障礙，重雲蔽天，心地不明，如江湖黯然，不悟妙道，如游魚茫然，智波流浪，泥法求真，如忽望波明食動，智波迷道，法塵障心，如魚即而就之，喪道迷真，如魚釣斃焉。不知者不悟也，不悟我本無我，即是真空之道，而妄有我，向外逐道者，與上譬喻亦然也。此合喻也，故云不知我無我，而逐道亦然也。此章歎迷人不悟道，而喪其生也。

右第十章

關尹子曰：方術之在天下多矣，

凡在天之下，百家之學，道術廣博，故云方術之在天下多矣，方者道。或尚晦，或尚明，或尚強，或尚弱，百家之學不能遍舉，略言其四，尚者貴也，或貴韜晦，不欲人知，或貴彰顯，明明教誨，或貴能行，自強不息，或貴柔弱，不與物爭，故云或尚晦，或尚明，或尚強，或尚弱也。

執之皆事，不執之皆道。

事者用也，若執尚晦、尚明、尚強、尚弱，皆謂之用也，執用而迷體，豈能洞徹妙道哉。若不執其用，則用無用，而無所住著，無所住著，則離種種邊，名為妙道也，故云執之皆事，不執之皆道也。此章明道無不在，不可執著也。

右第十一章

關尹子曰：道終不可得，彼可得者，名德不名道。

道本真空，不屬得失，有得則有失，道在人，聖凡同體，無欠無餘，如初生赤子，與大人同體，不與大人同用。凡人與聖人同體，不與聖人同用，體本無名，隨功用立名，用之於惡，則名凡人，用之於善，則名賢人，用之無所得，則名聖人。無所得而得之，則名德不名道也，故曰道終不可得，彼可得者，名德不名道也。道終不可行，彼可行者，名行不名道。道要心悟，不離本情而登大道，故不可行也，彼可行者，名善不名道也，

故云道終不可行，彼可行者，名行不名道。

聖人以可得可行者，所以善吾生，

聖人得自利利他人之道，平等普利，不求報恩，名為德行，此德行所以善吾接物利生也，故云聖人以可得可行者，所以善吾生，此利他也。

以不可得不可行者，所以善吾死。

死者，心休歇也，以不可得不可行者，藏諸用也，藏諸用則無為也，無為所以善吾心之休歇也，故云以不可得不可行者，所以善吾死也，此自利也。此章明德行為用，道為體。

右第十二章

關尹子曰：聞道之後，有所為有所執者，所以之人，

若學人聞道之後，所行有為之事，有所執持智解，則所往與人事同也。之者，往也。故云聞道之後，有所為有所執者，所以之人。

無所為無所執者，所以之天。

天者，天真也，聞道悟解，罷參絕學，藏諸用，無所為，外不執相，內不著

空，湛然清靜，則契本分天真也，故云無所為無所執者，所以之天。

為者必敗，執者必失，

有為者，必敗於道，有執者，必失於德也，故云為者必敗，執者必失也。

故聞道於朝，可死於夕。

故者，因上結下之辭也。聞道於早朝，可死於晚夕，便全身放下，心死休歇而保任之也，故云聞道於朝，可死於夕也。此章明悟道者無為無執，休歇保任。

右第十三章

關尹子曰：一情冥，為聖人，

冥者，真空，窈冥莫測，一情者，情返歸於真空也，如此則名聖人也，故云一情冥，為聖人也。

一情善，為賢人，一情惡，為小人。

從真空體上忽萌情念，不趨於善，必趨於惡，情起時，其可不謹乎。若趨於善而積於善，積之大也，則成德行之福，而名賢人也；若趨惡而積惡，積之大也。則成凶暴之禍，而名小人也，故云一情善為賢人，一情惡為

小人也。

一情冥者，自有之無，不可得而示，

一情冥者，自有之無，從跡復本也，從跡復本，冥契真空之道，不得出示於人也。經云：聖人竟不能出道以示人是也，故云：一情冥者自有之無，不可得而示也。

一情善惡者，自無起有，不可得而祕。

無者，真空也，有者，情也，從真空上忽萌情念，趨善積善，趨惡積惡，是從本降跡。從本降跡，而善惡之跡，不可得而祕隱也，故云一情善惡者，自無起有，不可得而祕也。

一情善惡為有知，惟動物有之，

言一情善惡屬知識，則與蠢動有識之物者無異也，故云一情善惡為有知，惟動物有之也。

一情冥為無知，溥天之下，道無不在。

一情與真空冥符，則知識未萌之前也，知識未萌之前，真空妙有之道，充塞太虛，無所不在，故云一情冥為無知，溥天之下道無不在也。此章明道不屬情識，無處不是道也。

右第十四章

關尹子曰：勿以聖人力行不怠，則曰道以勤成。

勿者，禁止之辭也，勿得言以聖人力加精進，行之不懈怠，則曰聖人學道，因以勤苦，而得道成。言非如此也，道由心悟，本自見成，豈待力行不怠，勤苦而後成哉，故云勿以聖人力行不怠，則曰道以勤成是也。

勿以聖人堅守不易，則曰道以執得。

勿得言聖人堅固保守而不改易，則曰聖人因以執持而得道。言亦非如此也，聖人心開悟解，以道為體，真常不變，無為無執，無失無得也，故云勿以聖人堅守不易，則曰道以執得也。

聖人力行，猶之發矢，因彼而行，我不自行。

矢者，箭也，聖人應物慈悲，普利而不息，人以謂力行，殊不知力行慈悲，普利不息，猶似人射，以弓發箭，感而後應，不得已而後行也。故云聖人力行，猶之發矢，因彼而行，我

不自行也，言行之無心。

聖人堅守，猶之握矢^②，因彼而守，我不自守。

握者，把也，聖人恬然獨處，人以謂堅守，殊不知聖人堅守，猶似人未射之時，以手把箭，因彼不應，所以靜默，豈有心守靜默哉。故云聖人堅守，猶之握矢^③，因彼而守，我不自守也。此章明聖人動靜無我。

右第十五章

關尹子曰：若以言行學識求道，互相展轉，無有得時。

道本無名，不可以言求，道本無跡，不可以行求，道本無法，不可以學求，道本無情，不可以識求。若以名跡法情求之，如石輾之互相宛轉，不離名跡法情，何時得悟道哉，故云若以言行學識求道，互相展轉，無有得時。

知言如泉鳴，知行如禽飛，知學如擷影，知識如計夢，一息不存，道將來契。

知言如泉鳴，則聲不可辯，聲不可辯，忘名也；知行如禽飛，則跡不可

循，跡不可循，忘跡也；知學如擷影，則偽不可取也，不可取，則忘法也，知識如計夢。則妄不可信，妄不可信，則忘情也。息者，一呼一吸為一息，一息之間，名跡法情頓忘而不存，則契於妙道，故云知言如泉鳴，知行如禽飛，知學如擷影，知識如計夢，一息不存，道將來契也。擷者，以手提取也。此章明道不屬名跡法情，不可以言行學識而求之。

右第十六章

關尹子曰：以事建物則難，以道棄物則易。

以事者，皆用也，建者，建立妙用也，物者，人物也，言建立妙用，普利天下，令人人了道，則誠為不易也，故云以事建物則難也。掃蕩復本，一物不留，獨露真空妙體，有何難哉，故云以道棄物則易。

天下之事^①，無不成之難，壞之易。

天下之物，紛紛億萬，俱要圓成，誠為不易，故云天下之事，無不成之難也。此釋以事建物則難也，如秦之

阿房宮，非一歲而成，楚之一火而盡，豈不壞之易耶，故云壞之易也，此釋道棄物則易。此章明建立不易，復本不難。

右第十七章

關尹子曰：一灼之火，能燒萬物，物亡而火何存？

火者，無我之物，或鑽木，或擊石，取火之一星而灼爇之，及其大也，則劫火洞然能燒萬物，及至燒盡萬物，火亦不存，為火無我也，故云一灼之火能燒萬物，物亡而火何存。此起喻也。

一息之道，能冥萬物，物亡而道何在？

一喘息之間，洞徹真空之道，則窈然冥然，元無一物，如此，則外忘萬物，外忘萬物，則內亦忘，真空道之強名也，故云一息之道能冥萬物，物忘而道何存也。此合喻也。此章明了悟道者，亦無道之強名也。

右第十八章

關尹子曰：人生在世，有生一日死者，有生十年死者，有生百年死者。

人生壽夭不等，或為赤子而死者。或為童子而死者，或壽滿百歲而死者，故云人生在世，有生一日死者，有生十年死者，有生百年死者，此借喻也。

一日死者，如一息得道，十年百年死者，如歷久得道。

利根之人，遇師垂接，直下頓悟，於一息之間，當時心死絕疑，如人生一日死也，故云一日死者如一息得道也。中下之士，遇師垂接，卒難了悟，如水浸物，漸漸得透，或十年，或二三十年，志心不退，觸著磕著，有日洞徹心休，如人在世十年百年而死，故云十年百年死者，如歷久得道者也。此合喻也。

彼未死者，雖動作昭智，止名為生，不名為死。

彼者，指上一日死者、十年、百年死者三等之人也，彼三等人未死之前，雖動靜作為，昭昭靈靈智慧，止名為生，不名為死也。故云彼未死者，雖動作昭智，止名為生，不名為死。

彼未契道者，雖動作昭智，止名為事，不名為道。

彼者，指上頓漸三等人也，彼上中下三等，於未了悟契道之前，雖動靜作為，昭昭靈靈智慧之用，止名為人事而已，不名為妙道也，故云彼未契道者，雖動作昭智，止名為事，不名為道。此合喻也。此章明悟有頓漸，道則不二也。

右第十九章

關尹子曰：不知吾道無言無行，而即有言有行求道^⑤，忽遇異物橫執為道。

迷人不悟，道本無名跡，故云不知吾道無言無行也，迷人泥著古人名言法相求道，或古人靈跡異迹求道，既有尚靈異之心，忽遇邪魔化為異人，談天論地，說事說理，或逞神異變化，迷人橫執以為道聖人，而欲師之求道，故云而即有言有行求道，忽遇異物橫執為道。

殊不知捨源求流，無時得源，捨本求末，無時得本。

道由心悟，靈源妙湛，體用如如，迷

人不悟，源名跡而向外求道，此迷靈源而逐名跡流浪也。本即源也，未即流也，如此流浪逐末，欲返本源不可得也，故云殊不知捨源求流，無時得源，捨本求末，無時得本。此章垂誠學人，勿逐名跡而求道也。

右第二十章

關尹子曰：習射、習御、習琴、習弈，終無一事可以一息得者，

習射者，習射弓箭也，習御者，習御車也，習琴者，習撫琴也，習弈者，習弈碁也，已上四者，必以歲月而習之，四者終無一事可以一喘息之間而得其妙者，故云習射習御習琴習奕，終無一事可以一息得者也。

唯道無形無方，故可得之一息。

道乃真空，故無形像，無方位，利根之人直下頓悟真空，於一息之頃而得洞徹，故云唯道無形無方，故可得之一息也。此章明道易學於事也。

右第二十一章

關尹子曰：兩人射相遇，則工拙見，兩人弈相遇，則勝負見，

弓人相遇而鬪射，則中者見為工巧，不中者為魯拙也，故云兩人射相遇，則工拙見也。兩箇弈碁人相遇鬪弈碁，則贏者見為勝，則輸者見為負，故云兩人弈相遇，則勝負見也。

兩人道相遇，則無可示。無可示者，則無工無拙，無勝無負。

兩箇洞徹妙道之人相遇，則無可出示呈似也，無可出示呈似，則不似射奕有工拙勝負也，故云兩人道相遇，則無可示，無可示者，則無工無拙無勝無負也。此章明道無工拙勝負，無可出示呈似於人也。

右第二十二章

關尹子曰：吾道如海，有億萬金投之，不見，有億萬石投之，不見，有億萬汗穢投之，不見。

海喻真空，金喻微言妙行，真空能冥衆妙萬行，窈然觀之不見，故云吾道如海，有億萬金投之不見也。石喻衆善，真空能冥衆善，窈然示之不見，故云有億萬石投之不見。汗穢喻衆惡，真空能冥衆惡，窈然視之不

見，故云有億萬汗穢投之不見。能運小鰕小魚，能運大鯤大鯨。

小鰕小魚喻小人衆生，大鯤大鯨喻君子賢人，真空能運小人衆生，君子賢人，平等普利，自生至死，受用恃廢，但日用而不知也。故云能運小鰕小魚，能運大鯤大鯨。

合衆水而受之，不為有餘，散衆水而分之，不為不足。

真空益之不盈，故冥天地萬物，而不為有餘，真空損之而不虧，故生天地萬物，而不為不足，故云合衆水而受之，不為有餘，散衆水而分之，不為不足。此章明道無欠無餘，而無所不容也。

右第二十三章

關尹子曰：吾道如處暗，夫處明者，不見暗中一物，而處暗者，能見明中區事。

道乃真空，窈窈冥冥，陰陽莫測，鬼神難窺，故云吾道如處暗，夫處明者，不見暗中一物也。真空雖然窈窈冥冥，陰陽莫測，鬼神難窺，其用

事也，似酌醴以投器，其應物也，如懸鏡以鑑形。又如空谷傳聲，寂然不動，感而遂通，萬物不能逃其鑑也，故云而處暗者，能見明中區事。此章明道窈冥莫測，應變無窮。

右第二十四章

關尹子曰：小人之權歸於惡，

權者，用也，小人愚癡顛倒，所用皆歸於惡。惡者，何也？殺生偷盜邪淫、妄語綺言、惡口兩舌、貪愛瞋恨、癡迷大逆、不孝不忠、不仁不義是也，故云小人之權歸於惡者也。

君子之權歸於善，

君子燭理，所用皆歸於善，善者何也？不殺不盜，不邪淫不誑語，不巧言令色，恭行五常百行是也，故云君子之權歸於善。

聖人之權歸於無所得。唯無所得，所以爲道。

聖人之用，平等普利，不求報恩，上德不德，應變無方，離種種邊，超諸法相，一無所得，強名真空之道也，故云聖人之權歸於無所得，唯無所

得，所以爲道也。此章明道不屬善惡，迴超諸有也。

右第二十五章

關尹子曰：吾道如劍，以刃割物即利，以手握刃即傷。

以劍喻道，道冥萬物，普利無窮，故云吾道如劍，割物即利也，執持染著，昧性迷道，故云以手握刃即傷也。此章明道普利無窮，迷執者自傷也。

右第二十六章

關尹子曰：籩不問豆，豆不答籩，瓦不問石，石不答瓦，道亦不失。

籩者，以竹爲之，以盛棗栗，豆者，以木爲之，以盛菹醢，以供祭享。道無不在，籩豆瓦石不相問答而終日問答，雖問答而未嘗問答也。道亦不失也。故云籩不問豆，豆不答籩，瓦不問石，石不答瓦，道亦不失也，此無情說法，昧者不知也，故云不應答藏真應答，無知知處是真知，正謂此也。

問與答與一氣往來，道何在。

道本無問亦無答，向問答未萌之前，薦吾問答未萌之前，則心不生，心不生，則一氣不往不來，一氣不往不來，則心無生滅，無生滅即契妙道。既萌問答之心，心之所之，則氣從之，是知一問一答，則一氣往來，一氣往來與道遠矣，故云向上一機擬議即墮是也，故云問與答與一氣往來，道何在也。此章明道無不在，問答殊離也。

右第二十七章

關尹子曰：仰道者跂，如道者駁，皆知道之事，不知道之道。

跂者，企羨也，駁者，馳求也，如者，往也，仰慕聖人之道，企羨不及，故云仰道者跂也。往外馳求妙道而不得也，故云如道者駁也。事者，用也，已上企羨馳求，即道之用也，隨用而迷體，故云皆知道之事，不知道之道也。故云道源不遠，性海非遙，但向己求，莫從他覓，覓亦不得，得亦不真，正謂此也。

是以聖人不望道而歉，不恃道而豐，不

借道於聖，不賈道於愚。

歉者，欠少也，豐者，餘多也，借者，假也，賈者，賣也，是以者，因上結下之辭也。真空妙道，本自具足，無欠無餘，聖人了了洞徹，道本具足，故不望道而欠少，真空無有，亦不恃道而餘多，道既人人具足，亦不假借道於聖人，聖人不能出道以示人，亦不賣道於愚，故曰是以聖人不望道而歉，不恃道而豐，不借道於聖，不賈道於愚也。此章明道人人具足，不相假而取捨之也。

右第二十八章

文始真經註卷之一

- ①「人皆可致命通玄」，與《叢書集成初編》之《關尹子》同，而《道藏》慕字號之《無上妙道文始真經》則作「人皆可致命造玄」。
- ②「握失」，誤，《關尹子》和《無上妙道文始真經》皆作「握矢」。
- ③此句，《關尹子》和《無上妙道文始真經》作「天下之物」。
- ④此句，《關尹子》作「而即有言有行者求道」。

文始真經註卷之二

神峰逍遙子牛道淳直解

二柱篇

柱者，建立天地陰陽之妙用也，凡一十二章。

關尹子曰：若椀若盃，若餅若壺，若甕若盎，皆能建天地。

椀盃餅壺甕盎六者，皆所用之器也，器之為物者，外實而內虛也，實者屬陰，虛者屬陽，陽屬天，陰屬地，故建立妙用，物物可以取法也。故云若椀若盃，若餅若壺，若甕若盎，皆能建天地。

兆龜數著，破瓦文石，皆能告吉凶。

兆者，吉凶先兆也。以火燒銀而鑽龜殼，詳裂文以辯吉凶之兆也，數著者，著乃蒿屬，出蔡州，一科五十莖，按大衍之數，其用四十有九，一象太一，平分為二，以象二儀，扌一以象閏，以四揲之，以象四時，三揲而為一爻，十八變而為一卦，卦既已定，

吉凶兆焉。破瓦者，打瓦卜也，打瓦破碎而奇者，屬陽，吉之兆也，偶者屬陰，凶之兆也。文石者，打石裂文以辯吉凶，文正數奇則屬陽，告^①之兆也，文斜數偶則屬陰，凶之兆也，故云兆龜數著，破瓦文石，皆能告吉凶者也。

是知天地成理^②，一物包焉，物物皆包之，各不相借。

是知者，因上椀盃餅壺甕盎皆能建天地，兆龜數著破瓦文石，皆能告吉凶^③，以此知天地成理，一物包焉，成理者，道也。言道本自見成，不假修為也，道無不在，天地萬物在道則存生，失之則亡滅，故云知見成之道，物物皆包藏妙道，非物能包之也，為天地萬物不離妙道也，故云是知天地成理，一物包焉，物物皆包之，各不相借也，不相借者，物物具足，不須相借也。

以我之精合彼之精，兩精相搏而神應之。

彼者，龜著瓦石也，我者，占卜之人。

彼枯龜槁著、焦瓦堅石，豈有神靈先兆吉凶哉，為以我之精誠，合彼龜著瓦石，天地成理之精，兩精相激搏，而有此神靈應之也，故云以我之精合彼之精，兩精相搏而神應之也。

一雌一雄卵生，一牝一牡胎生。

以飛禽配偶名曰雌雄，八竅者卵生^①，以走獸配偶名曰牝牡，九竅者胎生也，故云一雌一雄卵生，一牝一牡胎生也。

形者彼之精，理者彼之神，

彼者，雌雄牝牡也，雌雄牝牡交感，精神混融為一，而成卵胎也，卵胎之形，是雌雄牝牡之精也。理者，識性也，是彼雌雄牝牡之神也，故云形者彼之精，理者彼之神也。

愛者我之精，觀者我之神。愛為水，觀為火，愛執而觀，因之為木，觀存而愛，攝之為金。

我者，說一切人之己也，人萌一愛念，則屬己之精情，寓目觀色，則屬己之神也，精屬水，故愛為水，神屬火，故觀為火。愛為水，觀為火，相

執相合，因化為木，其木絞之得水以見母形也。鑽之得火以見子形也，觀為神，愛為精，相存相合，攝化為金，其金擊之得火以見夫形，鎔之得水以見子形也，故云愛者我之精，觀者我之神，愛為水，觀為火，愛執而觀，因之為木，觀存而愛，攝之為金也。

先想乎一元之氣，具乎一物，執愛之以合彼之形，冥觀之以合彼之理，則象存矣。

彼者，母也，父性真空，本來清靜，清靜真空性上忽萌想欲念，如道生一氣也。故云先想乎一元之氣也，既萌慾念，則母形已具乎識中，故云具乎一物也，母形具乎識中，執著相愛以與母交合精血，故云執愛之以合彼之形也，父母交感情識，混融於恍惚窈冥之際，因以觀形而生愛以成交感，父之識性與母識性相合，則成胞胎之象，人形已存於胎內，故云冥觀之以合彼之理，則象存矣。理者，識性也，已上說禽獸與人交感相媾，

精神與人精誠感龜著瓦石之神應同也。

一運之象，周乎太空，自中而昇為天，自中而降為地。

道生一，道者，無極也，一者，太極也，無極而太極，天地萬物之象已具乎太極之中也。太極雖含萬象，猶未離無極，故云一運之象，周乎太空也，太空者，即無極也，太極而動，動而生陽，陽氣輕清，自太極中上昇，結而為天，故云自中而昇為天也；動極而靜，靜而生陰，陰氣重濁，自太極中下降，凝而為地，故云自中而降為地也。

無有昇而不降，無有降而不昇，冬至一陽生，行三十六候，氣上昇一百八十日，陽氣至天，陽極生陰。夏至一陰生，行三十六候，氣下降一百八十日，陰氣至地，陰極又復生陽。屬乎陽自昇，屬乎陰自降，昇降往來，周流不息，所以生生化化而無極矣。有昇則有降，若無昇則無降，無昇無降，則無生死也，故云無有昇而

不降，無有降而不昇也。

昇者為火，降者為水，

火屬陽，自然上昇，火發向上，昇行之象也；水屬陰，自然下降，水流向下，降行之象也。故云昇者為火，降者為水也。

欲昇而不能昇者為木，欲降而不能降者為金。

水生木，木生火，火者木之子，水者木之母，子母之情具在木中，火欲昇，水欲降，木之氣欲昇而不能昇，故云欲昇而不能昇者為木也。水者金之子，火者金之夫，夫子之情具在金中，水欲降，火欲昇，金氣欲降而不能，故云欲降而不能降者為金也。木之為物，鑽之得火，絞之得水。金之為物，擊之得火，鎔之得水。金木者，水火之交也。

鑽木得火，以見子之情也，絞木得水，以見母之情也，此釋欲昇而不能昇者為木也，故云木之為物，鑽之得火，絞之得水。擊金得火，以見夫之情也，鎔金得水，以見子之情也，此

釋欲降而不能降者為金也，故云金之為物，擊之得水也。如上所說，以此知金木各具水火之情，相交孕化為金木也，故云金木者水火之交也。水為精為天，火為神為地，

水者，陰中陽也，如坎卦屬陰，中爻屬陽，屬陽自昇，天之象也。水在五行為水，在氣為天，在人為精，在方為北，在時為冬，在數為一六，在卦為坎，在五常為智，在星為極，在嶽為恒，在臟為腎，在支為亥子，在干為壬癸也，故云水為精為天。火者陽中陰也，如離卦屬陽，中爻屬陰，屬陰自降，地之象也，火在五行為火，在氣為地，在人為神，在方為南，在時為夏，在數為二七，在卦為離，在五常為禮，在星為熒惑，在嶽為衡，在臟為心，在支為巳午，在干為丙丁，故云火為神為地也。

木為魂為人，金為魄為物，

木在五行為木，在氣為人，在神為魂，在方為東，在時為春，在數為三八，在卦為震，在五常為仁，在星為

歲，在嶽為泰，在臟為肝，在支為寅卯，在干為甲乙，故云木為魂為人。金在五行為金，在氣為物，在神為魄，在方為西，在時為秋，在數為四九，在卦為兌，在五常為義，在星為太白，在嶽為華，在臟為肺，在支為申酉，在干為庚辛，故云金為魄為物也。

運而不已者為時，包而有在者為方，五行運轉無窮，以成春夏秋冬四時也，故云運而不已者為時也。天地相包羅萬物，以成八極上下之十方也，故云包而有在者為方也。

惟土終始之，有解之者，有示之者。

土無正行，旺於四季，一歲始終生成俱有土氣，春夏為生，長物之始，秋冬為成，實物之終，故云惟土終始之也。解者，解散而隱者也，正月二月木旺而土隱也，三月本旺十二日，土旺十八日，旺者顯示也，四月五月火旺而土隱，六月火旺十二日，土旺十八日，七月八月金旺而土隱，九月金旺十二日，土旺十八日，十月十一月

水旺而土隱，十二月水旺十二日，土旺十八日。土在五行為土，在方為中，在時為四季，在數為五十，在卦為坤艮，在五常為信，在星為鎮，在嶽為嵩，在支為辰戌丑未，在干為戊己，在臟為脾，在神為意。意識聞微言，則妙意解悟，得自利之妙，故云有解之者也，妙意解悟，既得自利，亦可利他，為上根者動容密示，直下頓悟，妙意亦無妙意之量，故云有示之者也。此章明建立天地萬物之妙用者也。

右第一章

關尹子曰：天下之人，蓋不可以億兆計，

凡在天下之人，種類無窮，蓋不可以十萬為一億，十億為一兆之數而計筭之，故曰天下之人，蓋不可以億兆計也。

人人之夢各異，夜夜之夢各異，有天地，有人有物，皆思成之，蓋不可以塵計，

天下之人，同夜做夢，各有夢境不

同，故云人人之夢各異也。天下之人，夜夜夢境不同，故云夜夜夢境亦各不同，故云夜夜之夢各異也。天下之人，夜夜做夢時，一般見有天地人物，故云有天有地有人有物也。夢見天地人物，皆是平日妄識染著天地人物，於其夢時神思昏惑，尸魄專權，平日所染，隨思顯見，故云皆思成之也。天下之人，同夜做夢各異，尚不可以數筭，況夜夜各自不同，蓋不可以塵數計筭也。塵者如日影晃塵。

安知今之天地，非有思者乎。

安者，寧也，寧知今時未睡，見天地人物不有思者乎，言未悟之人，識見染著，所見天地人物亦與今時不異也，為晝夜俱迷也，故云安知今之大地，非有思者乎。此章明識迷覺夢計天地人物皆事妄識也。

右第二章

關尹子曰：心應棗，肝應榆，我通天地。

天地生物各屬五行，棗赤屬火，火在

臟為心，故云心應棗也，榆青屬木，木在臟為肝，故云肝應榆也。天地陰陽二氣交通而生棗榆，心應棗，肝應榆，是我與天地相通也，故云我通天地也。

將陰夢水，將晴夢火，天地通我。

天氣欲降，地氣欲昇，將作陰雲為雨，陰氣感人，夜即夢水，故云將陰夢水也。天氣欲斂其降，地氣欲收其昇，陽氣感人，夜即夢火，故云將晴夢火也。如上所說，天地陰陽之氣感人，先夢水火，即是天地與我相通也，故云天地通我也。

我與天地似契似離，純純各歸。

如上說，我通天地，天地通我，即是我與天地似契合，則又不契合，天地有人，人亦有天地，天地即大人，人即小天地也，似離遠又不遠，故云我與天地似契似離也。天地與我並生，天地有道，人亦有道，道者純一而無雜，本自全真，道為天地人歸宿之所，故云純純各歸也。此章明天地人物咸生之道也。

右第三章

關尹子曰：天地雖大，有色有形，有數有方，

天玄而地黃，故有色也，天圓而地方，故有形也，天地既有色形，會歸於壤，故有數也，天地有八極上下，故有方也。天地雖廣大，有色形之可觀，有數方之可盡也，故云天地雖大，有色有形有數有方者也。

吾有非色非形，非數非方，而天天地地者存。

吾有真空之道，視之不見，故非色也，搏之不得，故非形也，真空無盡，故非數也，真空無處所，故非方也。真空之道，生天生地，天地有數，會歸於壤，壤而復生，生而復壤，壤而又復生，生生壤壤，而道無生無壤，浩劫長存，故云吾有非色非形非數非方，而天天地地者存。此章明天地有成壤，道無成壤。

右第四章

關尹子曰：死胎中者，死卵中者，亦人亦物，天地雖大，彼固不知，

彼者，死胎中人與卵中物也，人物之性，透入胎卵中，未生而死，天地雖廣大，彼人物之性，固是不知也，故死胎中者，死卵中者，亦人亦物，天地雖大，彼固不知也。

計天地者，皆我區識，

人性雖在胎中，未知有天地，及乎已生，成童之時，始知在上曰天，在下曰地，自童至老不能忘者，是知計度有天地者，皆我區分之情識，故云計天地者，皆我區識也。

譬如手不觸刃，刃不傷人。

手喻識也，刃喻天地也，譬如手不觸握劍刃，劍刃不傷人手也，識不染天地，天地不昧識性也，識若忘時，亦不知有天地也，故云譬如手不觸刃，刃不傷人也。此章明妄識障道也。

右第五章

關尹子曰：夢中，鑑中，水中，皆有天地存焉。

人睡夢之時，恍見天地人，以鏡上下照鑑天地人，視澄潭水中上下皆天，傍照山原亦水中天地也，故云夢中

鑑中水中，皆有天地存焉。

欲去夢天地者，寢不寐，欲去鑑天地者，形不照，欲去水天地者，盍不汲。

迷人不悟，真空無礙於天地，天地亦無礙於真空也，迷識染習妄，去夢中天地，不知夢亦妄也，何可去之哉，若去之者，則寢不能安寐也，故云欲夢天地者，寢不寐也。古人鑄鏡以鑑形容，照天見天，照地見地，鏡本無心，妄識計之曰天地，彼鏡豈知哉，何可去之，若去鏡中天地者，碎鏡則去也，若碎之，則無以鑑形容之妍醜也，故云欲去鑑天地者，形不照也。水之澄也，仰照於天，傍照於山原，決之潤物，汲之濟人，若去水中天地，涸之可也，若涸之，則盍以汲之為用也，故云欲去水中天地〔者〕，盍不汲。

彼之有無，在此不在彼，是以聖人不去天地，去識。

彼者，夢鑑水也，此者，識也，彼夢鑑水中，或有時夢見天地，或有不夢見天地，或不鑑不照天地，即無天地

也，夢鑑水中，或有天地，或無天地，在此妄識計之，而有不在彼夢鑑水也，故云彼之有無，在此不在彼也。是以者，因上結下之辭也。聖人了悟真空，識浪淵澄，天地真空，各自如如，不相罣礙，故云是以聖人不去天地去識也。此章明覺破妄識，真空無礙。

右第六章

關尹子曰：天非自天，有為天者，地非自地，有為地者，

天地不能自生，生天地者道也，道生一，一者太極也，一生二，二者天地也，故云天非自天，有為天者也，地非自地，有為地者也。

譬如屋宇舟車，待人而成，彼不自成。

天地待道以生成，喻似屋宇舟車，待人造作而後成就，彼屋宇舟車豈能自成哉，以此知天地非道運太極元氣而生成哉，故云譬如屋宇舟車，待人而成，彼不自成也。彼者，天地也。

知彼有待，知此無待，上不見天，下不

見地，內不見我，外不見人。

知彼天地有待道而生成，知此大道無所待而生成，經云吾不知其誰之子，象帝之先是也。知者，悟也，了悟妙道，迴絕對待，既絕對待，上下天地，內外人我，對待亦不見矣，故云知彼有待，知此無待，上不見天，下不見地，內不見我，外不見人。此章明天地待道而生，道無對待生死。

右第七章

關尹子曰：有時者氣，彼非氣者，未嘗有晝夜。

有時數者，一氣之運耳，彼妙道真空非氣也，道未生一氣之前，未嘗有天地日月，豈有晝夜十二時哉，故云有時者氣，彼非氣者，未嘗有晝夜也。

有方者形，彼非形者，未嘗有南北。

有方位者，以形定之耳，彼妙道真空非形也，道未生一氣之前，未嘗有天地形位，豈有東西南北之四方哉，故云有方者形，彼非形者，未嘗有南北也。

何謂非氣？氣之所自生者。如搖箠得

風，彼未搖時，非風之氣，彼已搖時，即名為氣。

自設問：何謂妙道真空非氣也？自答云：氣所自生者。譬如人搖竹扇而得風涼，喻道運而生一氣也，故云何謂非氣，氣之所自生者，如搖箠得風也。箠者，竹扇也，彼未搖竹扇時，非風之氣，喻道未生一氣之前也，故云彼未搖時，非風之氣也，彼未搖竹扇時，而得風涼之氣，即名為氣也，喻道運而生一，纔名為氣，故云彼已搖時，即名為氣。

何謂非形？形之所自生者，如鑽木得火，彼未鑽時，非火之形，彼已鑽時，即名為形。

此又自設問：何謂道之真空？答云：天地之形所自生者，譬如人鑽木得火之形見，此喻太極分高厚之形也。故云何謂非形？形之所自生者，如鑽木得火也，彼人未鑽木時，非有火之形狀也，此喻未有太極之前也，故云，彼未鑽時，非火之形也，彼人已鑽木時，有火出見，即名為火

之形狀，此喻無極而太極，太極分而天地之形位矣，故云彼已鑽時，即名為形也。此章明道不屬時數方位者也。

右第八章

關尹子曰：寒暑溫涼之變，如瓦石之類。置之火即熱，置之水即寒，呵之即溫，吹之即涼。

道運元氣，變化陰陽五行，而成冬寒夏暑春溫秋涼，四時之遷變元氣，如瓦石之類，置之火即熱，如夏火旺時，元氣隨火氣而為炎暑也。置瓦石於水內浸之即寒，如冬水旺時，元氣隨水氣而為嚴寒也。人以口呵瓦石，久之即溫暖，如春木旺時，元氣隨木氣而和溫也。人以口吹瓦石，久之即涼，如秋金旺時，元氣隨金氣而清涼也。故云寒暑溫涼之變，如瓦石之類，置之火即熱，置之水即寒，呵之即溫，吹之即涼也。

特因外物有去有來，而彼瓦石無去無來。

瓦石本無寒暑溫涼，而特因物有水

浸火燒呵之吹之人物，而寒熱溫涼有去有來，而瓦石本無寒熱溫涼之去來也，故云特因外物有去有來，而彼瓦石無去無來也。此喻元氣本無寒暑溫涼之去來。特因水火金木之氣盛衰去來，而有寒暑溫涼之去來也。

譬如水中之影，有去有來，所謂水者，實無去來。

先以瓦石水火呵吹，喻元氣寒暑溫涼之去來，恐人未曉，又說譬喻，令人曉悟，元氣如水火金木之氣，如水中之影，影有去來，水實無去來，以此明知水火金木之氣有盛衰去來，而元氣實無去來，元氣尚無寒暑溫涼之去來，而況於道乎，故云譬如水中之影有去有來，所謂水者實無去來也。此章明道不屬元氣，元氣不屬時。

右第九章

關尹子曰：衣搖空得風，氣噓物得水，水注水即鳴，石擊石即光，知此說者，風雨雷電皆可為之，

人即小天地，天地即大人，風雨雷電，天地所為也，人亦能之，人衣搖扇，虛空得風來，人以氣噓呵物得水，此風雨之象也。人以水灌注於水則聲鳴，人以兩石相擊而火光迸流，此雷電之象也，人能知此說者，呼召風雨，立興雷電，不為難矣，故云衣搖空得風，氣噓物得水，水注水即鳴，石擊石即光，知此說者，風雨雷電皆可為也。

蓋風雨雷電皆緣氣而生，而氣緣心生。緣者，因也，蓋風雨雷電因陰陽而生也。陽氣下降，無陰氣以承之，則化為風，陰氣上昇，無陽氣以接之，則化為雲，陰陽激搏，化為雷電，以此知風雨雷電因氣而生，故云蓋風雨雷電皆氣而生也，人了悟真空妙道，得陰陽一氣之源，洞明造化之妙，真心妙運，一氣變化，呼召風雨，立興雷電，聖人之餘事，故云而氣緣心生。

猶如內想大火，久之覺熱，內想大水，久之覺寒，知此說者，天地之德皆可同

也。

先說風雨雷電皆可為之，恐人信之不及，故再說譬喻以曉之，譬猶有人行持有為扭捏之功法，內存想下丹田如大火輪，久之，通身發熱，人覺知此熱，以為冲和，此非也。又如人內作觀想身心如大寒潭，澄澄湛湛，久之，覺通身寒冷，以為清涼境界，此亦非也。彼且妄想寒熱，猶隨心變，況了真心乎。人能知此譬喻之說者，呼召風雨，立致雷電，此天地之德，達人皆可同之也。此章明道為陰陽之祖，德同天地之用也。

右第十章

關尹子曰：五雲之變，可卜當年之豐歉，

五雲者，五色雲也，五色雲者，青黃赤白黑也，變者，五雲互相更變也，當年者，當一年也，豐者，收熟也，歉者，饑饉不收熟。按《占雲書》云：每於正月朔旦，五方觀之，隨方五色雲見，主隨方豐歉也。見黑雲者，主彼方當年雪少雨多也；見赤雲者，

主彼方當年荒旱也，五穀不收熟也；見青雲者，主彼方當年有蟲，小麥薄收；見白雲者，主彼方當年人灾，粳糯薄收；見黃雲者，主彼方當年人安，禾稼薄收；見黃雲蒼色者，主彼方五穀大收熟也。五穀者，稜房芒角穗也。黑赤青白黃各獨見者，主歉也，五色相雜或蒼黃者，主豐也。故云五雲之變，可以卜當年之豐歉也。

八風之朝，可以卜當時之吉凶，

八風者，八卦之方所起之風也，朝者，從彼方起朝來之風也，按《占風書》云：每日寅占之，從乾方風來，名曰不周，不周者，半凶半吉也；從坎方風來，名曰廣漠，廣漠者，無凶無吉；從艮方風來，名曰融風，亦名凶風，融凶者，半吉半凶也；從震方風來，名曰明庶，明庶者，大吉也；從巽方風來，名曰清明，清明者，大吉也；從離方風來，名曰景，景者，大吉也；從坤方風來，名曰涼，涼者凶也；從兌方風來，名曰閭闔，閭闔

者，大凶也。故云八風之朝，可以卜當時之吉凶。

是知休咎灾祥，一氣之運耳。

是知者，因占風雲知豐歉吉凶，以此知風雲變化，為休吉咎凶灾歉祥豐，一氣之運行耳，故云是知休咎灾祥，一氣之運耳。

渾人我，同天地，而彼私智認而已之。

人我天地，咸是一氣之運行，而有其生，彼氣盡，人我天地則死矣，今人我天地存者，以此知渾同一氣耳，故云渾人我，同天地也。已上占風雲渾人我同天地者，皆彼妄識私智計之也，彼妄識私智，非本來之性也，迷人認妄識私智為己之性，則非也，故云而彼私智認而已之。此章明私智非性，皆一氣之運耳也。

右第十一章

關尹子曰：天地寓，萬物寓，道寓，苟離於寓，道亦不立。

寓者，寄託也，氣莫大於陰陽，形莫大於天地，天地者，有形中最巨者也，太虛中細物耳，是知天地寄託於

太虛元氣之內也，故云天地寓也，萬物寄託於天地之間元氣之內也，故云萬物寓也。我本無我，無我之我，寄託於道之元氣而有其生，故云我寓也。道本無名，聖人寄託於強名，以宣此道，故云道寓也。苟，且也，且離了強名之道，則無名可名，而道之強名亦不立也，苟離於寓，道亦不立也。此章明從本降跡，不離於寓，名從跡復本，道之寓名不立也。

右第十二章

文始真經註卷之二

- ①「告」，當爲「吉」之誤。
- ②此句，《關尹子》和《無上妙道文始真經》皆作「是知天地萬物成理。」
- ③「皆能告吉大」，當爲「皆能告吉凶」之誤。
- ④「卯生」，當爲「卯生」之誤。
- ⑤「故云安知今之大地」，當爲「故云安知今之天地」之誤。
- ⑥据上之經文，此句當作「故云欲去夢天地者」。
- ⑦据《關尹子》「萬物寓」之後，尚有「我寓」句。

文始真經註卷之三

神峰逍遙子牛道淳直解

三極篇

極者，超凡越聖了道之極致也，凡二十七章。

關尹子曰：聖人之治天下，不我賢愚，故因人之賢而賢之，因人之愚而愚之。

聖人者，了道之聖天子也，治天下者，聖天子以道德撫安天下之民也，故云聖人之治天下也。不我賢愚者，聖人無我，而賢者自賢，愚者自愚，而賢愚之名，不出於聖人也，故云不我賢愚也。故者，因上仍下之辭也。言衆人皆曰賢聖人，因人稱賢，故亦賢之而進用也，衆人皆曰愚，聖人因人稱愚，故亦愚之而退黜也，故云故因人之賢而賢之，因人之愚而愚之也。

不我是非，故因事之是而是之，因事之非而非之。

聖人既無我，而是非者自是非者也，

自是非之名不出於聖人也，故云不我是非也。事者，用也。體本無名，隨功用立名，用之於善，衆人皆曰是，聖人因人稱是，故亦謂是而賞之也；用之於惡，衆人皆曰非，聖人因人稱非，故亦謂非而罰之也。故云因事之是而是之，因事之非而非之也。

知古今之大同，故或先古，或先今，知者，悟也，古太之前道理也，今者，見前之事也，聖人了道悟事，理不二，古今一貫，故云古今之大同也。聖人得自利利他之妙，故或先以理示人，或先以事示人，上根之人，或從理入，或從事入，理事雖不同，入則不異也，故云或先古或先今者也。

知内外之大同，故或先内，或先外。知者，悟也。聖人了悟妙道，得形神俱妙，身心一貫，故云知内外之大同也，聖人慈悲普利，為上根之人，先以明心悟性示之，上根之人直下頓悟，心源本來清靜，故云或先内也。聖人為中下之人恐難了悟，先以修

身衛生之妙示之，令中下之人漸漸悟解，故云或先外也。

天下之物無以累之，故本以謙^①，

聖人洞徹真空，體同太虛，天下之物，紛紛億萬，豈曾得累礙虛空哉，故云天下之物無得以累之也。聖人在宥天下，法江海之居下，含塵忍垢，萬邦流歸，天下樂推而不厭，皆本謙德之效也，故云本之以謙。

天下之物無得以外之，故含之以虛，

物者，人物也，聖人以道德撫世，萬邦歸德而順化，願為臣民而不厭，是天下之人無得以外於聖人也，故云天下之物無得以外之也。既得萬邦歸德而順化，願為臣民而不厭，聖人亦不以此自滿，心同太虛，故云故含之以虛者也。

天下之物無得以難之，故行之以易，

天下之人樂歸聖德，無徭役難行之事，百姓所樂太平而富庶，無難化之民，故所行政事無難也，故云天下之物無得以難之，故行之以易。

天下之物無得以窒之，故變之以權。

天下太平，百姓富庶，和氣通流，天地陰陽調順，萬物遂其生成，無一物而窒塞不通，聖人以道自牧而無為，以德應變而為用。權者，用也，故云天下之物無得以窒之，故變之以權也。

以此中天下，可以制禮，

以此者，權用也，中者，無太過不及之病也，權用合宜，不失天下民心，則可以制禮，正上下君臣，別尊卑父子也，故云以此中天下，可以制禮也。

以此和天下，可以作樂，

樂者，和也，樂貴和而不淫，以此德用撫世，天下和平，禮樂興盛，而風化美也，故云以此和天下，可以作樂。作者興盛。

以此公天下，可以理財，

以此道德撫世，公正無私之人，可委而理治天下之財用也，故云以此公天下，可以理財也。

以此周天下，可以禦侮，

以此道德撫世，化周天下，其侮尊慢

上之民，不期止而自止也，禦者，禁止也，故云周天下，可以禦侮也。

以此因天下，可以立法，

以此道德撫世，或因有害天下之民者，可以立法除之，或因有利天下之民者，可以立法行之也，故云以此因天下，可以立法。

以此觀天下，可以制器。

以此道德撫世，觀有便於天下之民用者，可以制器而與民用之也，故云以此觀天下可以制器也。

聖人不以一己治天下，而以天下治天下，

聖人無我，以道德撫世，天下之民各安其業，忻樂太平而忘帝力，故云聖人不以一己治天下，以天下治天下是也。

天下歸功於聖人，聖人任功於天下，

天下之民，或有歸太平之功於聖人，聖人亦不自有其功，而不謂我能治天下，聖人以謙自牧，必任功於天下之民，此釋聖人不以一己治天下，而以天下治天下也，故云天下歸功於

聖人，聖人任功於天下也。

所以堯舜禹湯之治天下，天下皆曰自然。

唐堯、虞舜、夏禹、殷湯四帝，治天下太平，使民忘帝力，天下之民皆曰自然太平，帝力何與焉，故云堯舜禹湯之治天下，天下皆曰自然。此章明聖人以道德撫世無我也。

右第一章

關尹子曰：天無不覆，有生有殺，而天無愛惡。

至大者天，無一物而不蒙天之覆蔭，春生秋殺而無心，天豈有愛而生之，惡而殺之耶？故云天無不覆，有生有殺，而天無愛惡。

日無不照，有妍有醜，而日無厚薄。

至明者日，無一物而不蒙日之照臨，因有日照，妍者顯其貌美，醜者顯其貌陋，而日平等妍醜，皆照而無心，豈有厚於妍而偏於照，亦無薄於醜而不照也，故云日無不照，有妍有醜，而日無厚薄。此章以天日喻聖人普利無私者也。

右第二章

關尹子曰：聖人之道天命，非聖人能自道。

道者，不可思議也，天者，自然而然也，命者，不知所以然而然也，聖人洞徹不思議之道，自然而然，不知所以然而然，道之強名亦不立也，亦無所能也，故云聖人之道天命，非聖人能自道也。

聖人之德時符，非聖人能自德。

符者，合也。聖人普利合時，不求報恩，忘其所能，不住著德之名也，故云聖人之德時符，非聖人能自德。

聖人之事人為，非聖人能自事。

事者，用也，聖人以無用之用，普利無窮，用之為人，亦無能用之心也，故云聖人之事人為，非聖人能自事。是以聖人不有道，不有德，不有事。

聖人無心，不知所以然而然，故不有道之名，不有德之跡，不有用之用，故云是以聖人不有道，不有德，不有事也。此章明聖人掃蕩復本而無我也。

右第三章

關尹子曰：聖人知我無我，故同之以仁。

仁者，慈惠利物也，聖人妙體真空，我本無我，假立我名，聖人悟此，在仁與仁無異也，故云聖人知我無我，故同之以仁也。

知事無我，故權之以義。

事者，用也，權亦用也。聖人了悟無我之用以宜物也，故云知事無我，故權之以義。義者，宜也。

知心無我，故戒之以禮。

聖人悟本來妙心，元無我相，故戒人以履儀則之行也，故云知我無我，故戒之以禮也。禮者，履也，亦儀則也。

知識無我，故照之以智。

聖人悟靈識之源，本來無我，故用照之以鑑是非真偽也，故云知識無我，故照之以智也。智者，是是非非之謂智也，亦名審真偽之謂智也。

知言無我，故守之以信。

聖人悟無言之言，亦無我相之名，故

保任真誠，言行相符也，故曰知言無我，故守之以信也。此章明聖人無我，妙用五常之德者也。

右第四章

關尹子曰：聖人之道，或以仁為仁，或以義為仁，或以禮以智，以信為仁，

以者，用也，聖人以道為體，以五常為用，用之於慈惠惠物，故云聖人之道，或以仁為仁也，或裁是非，令物合宜而本於慈，故云以義為仁也，或履儀則而本於慈惠，或鑑真偽而本於慈惠，或言行相符而本於慈惠，故云以禮以智以信為仁者也。

仁義禮智信，各兼五者，

或行仁而兼於義禮智信，或行義而兼於禮智信仁，或行禮而兼於智信仁義，或行智而兼於信仁義禮，或行信而兼於仁義禮智，故云仁義禮智信各兼五者。

聖人一之不膠，天下名之不得。

聖人洞徹真空，離種種邊，超諸法相，一無所得，不染寓名，無名可呼，天下之人，不可得而名貌聖人也，故

云聖人一之不膠，天下名之不得也。不膠者，不染著也。此章明聖人無用之用，不存名跡。

右第五章

關尹子曰：勿以行觀聖人，道無蹟，

聖人逆行順行，鬼神莫測，蓋真空之道，無跡可循，故不可以行觀聖人也，故云勿以行觀聖人，道無蹟也。蹟者，踪跡也，勿者，禁止之辭也。

勿以言觀聖人，道無言，

勿以言觀聖人者，聖人無言之言，令人薦悟言外之旨。言外之旨者，即道也，道本無名，言之不可及也。

勿以能觀聖人，道無為，

勿得以所能觀聖人者，聖人無為而為，為以無為，故云勿以能觀聖人，道無為也。

勿以貌觀聖人，道無形。

勿得以貌相觀聖人，聖人貌不異衆人，體冥真空，無形可睹，故云勿以貌觀聖人，道無形也。此章明聖人之道，不屬跡言為刑，不可以行言貌觀也。

右第六章

關尹子曰：行雖至卓，不離高下，

人修善卓然異衆，衆為下而善行為高，高下對待不離於跡，故云行雖至卓，不離高下也。此章釋前章勿以行觀聖人也。

言雖至工，不離是非，

人有能言妙理異於衆人，衆人言之不妙為非，能言妙理為是，是非對待，不離名相，故云言雖至工，不離是非。工者，巧妙也。此章釋前章勿以言觀聖人。

能雖至神，不離巧拙，

人有能造作，所為神妙異衆，不能者為拙，能為者為巧，巧拙對待，不離有為，故云能雖至神，不離巧拙也。此章釋前章勿以能觀聖人。

貌雖至殊，不離妍醜，

人有相貌美然殊衆，衆貌不美者為醜，而貌美者為妍，妍醜對待，不離假形，故云貌雖至殊，不離妍醜也。此章釋前章勿以貌觀聖人也。聖人假此以示天下，天下冥此，乃見聖

人。

聖人降世，假行言能貌以示天下，故云聖人假此以示天下，天下學人，當於行言能貌未萌之前，薦悟洞徹者，窈冥真空聖人妙道也，故云天下冥此，乃見聖人也。此章明示學人隨流得妙也。

右第七章

關尹子曰：聖人師蜂立君臣，師蜘蛛立網罟，師拱鼠制禮，師戰螳制兵。

上古聖人，因見蜜蜂有尊卑之序，因是得其師，遂立君臣以撫世也，故云聖人師蜂立君臣也。中古聖人，因見蜘蛛結網取食，由是得鬥其師，遂立網罟取禽獸以供祭也，故師蜘蛛立網罟也。聖人因見山中之鼠，望人拱立而鳴，由是得其師，遂制禮樂以正上下，別尊卑序人大倫也。仍見二穴之螻螳，戰鬪爭食相咬，由是得其師，遂制兵以伐逆，故云師拱鼠制禮，師戰螳制兵也。衆人師賢人，賢人師聖人，聖人師萬物，唯聖人同物，所以無我。

衆人師問賢人，以學五常百行，故衆人師賢人也，賢人師問聖人，以學無為大道，故賢人師聖人也，聖人慈悲普利，因萬物天然之理，由是得其師，種種方便普利天下，故聖人師萬物也。聖人洞徹真空，處世和光不耀，同塵不染，不異衆人，體同虛空而無我，故云唯聖人同物，所以無我。此章明聖人普利無窮者也。

右第八章

關尹子曰：聖人曰：道觀天地萬物皆吾道，倡和之、始終之、青黃之、卵翼之，不受道，不棄物，不尊君子，不賤小人。

聖人心冥至道，反觀天地萬物皆吾妙道也，故云聖人曰道觀天地萬物皆吾道也。又觀夫婦之倡和，萬物之始終，草木之青黃，雌雄之卵翼，無非妙道也，故云倡和之、始終之、青黃之、卵翼之，聖人了悟天地萬物，巨細洪纖，飛潛動植，無非妙道，不生愛道棄物、尊君子賤小人之念也，故云不受道，不棄物，不尊君子，

不賤小人也。

賢人曰：物物物不同，旦旦去之，旦旦與之，長之短之，直之方之，是為物役者也。

物者，用也，賢人迷體而專用，用之不一，故賢人曰物物物不同也。旦者，日也，賢人日日捨去諸惡，日日與人善言，令人行之，故旦旦去之，旦旦與之也。賢人訓人，明是者理長，非者理短，務要人行正直端方之行，故長之短之直之方之也。迷體專用，用之不一，捨取去與，長短方直，辯之不息者，是專用為人物之使役也，故云是為物役者也。

殊不知聖人鄙雜廁，別分居，所以為人，不以此為己。

鄙雜廁者，鄙薄雜混廁染不淨之人，別分居者，以禮儀正君臣父子，尊卑上下，別男女夫婦、兄弟之序也。賢人殊不知聖人鄙薄混雜廁染不淨之人，立禮儀，別分居，君臣父子夫婦兄弟男女之居處，不令混雜穢行者，所以為天下人，不以此為己也，故云

殊不知聖人鄙雜廁，別分居，所以為人，不以此為己也。此章明道無不在，聖人利物無我。

右第九章

關尹子曰：聖人之於衆人，飲食衣服同也，屋宇舟車同也，貴賤貧富同也，

聖人洞徹妙道，大隱於世，和光不耀，同塵不染，何謂和光同塵不異衆人？食服屋宇舟車貴賤貧富者是也。聖人處世，凡食亦食，凡衣亦衣，凡居屋宇亦居屋宇，凡乘舟車亦乘舟車，凡仕而貴亦仕而貴，凡庶而賤亦庶而賤，凡無財而貧亦無財而貧，凡有財而富亦有財而富，寓世之跡，未嘗異人。故云聖人之於衆人，飲食衣服同也，屋宇舟車同也，貴賤貧富同也。

衆人每同聖人，聖人每同衆人，彼仰其高侈其大者，其然乎，其不然乎。

衆人之跡，與聖人寓世之跡不異，故云衆人每同聖人也，聖人每同衆人，彼衆人仰慕聖人之道高德大，故云彼仰其高侈其大者也。聖人有時建

立妙用，平等普利，不求報恩，彼衆人仰慕道之高，侈廣德之大，及其聖人掃蕩復本，不立一塵，陰陽不能測，神鬼莫能窺，而況於凡乎，故云其然乎，其不然乎。此章明聖人隱顯莫測也。

右第十章

關尹子曰：魚欲異群魚，捨水躍岸即死，虎欲異群虎，捨山入市即擒。

魚者，喻衆人也，水者，喻汪洋妙道也，人欲履非義，生異謀，則違至道，人誅鬼責不得終其天年而死，如魚異群魚捨去其水，跳躍於岸上，即枯而死也，故云魚欲異群魚，捨水躍岸即死也。虎者，喻君子也，山者，喻巍巍至德也，君子殉名而失德之實，希慕爵祿，被富貴所惑，而不知退止，或被讒下，或悞履危機而不得善終，如虎欲異於群虎，捨離大山入於城市，被人擒捉而擊死，故云虎欲異群虎，捨山入市即擒也。即者，就也。

聖人不異衆人，特物不能拘爾。

聖人行不崖異，跡同衆人，非道不履，非德不行，體冥真空，萬緣無礙，逍遙自在，獨脫無羈，茫然彷徨乎塵垢之外，超然優游乎象帝之先，故云聖人不異衆人，特物不能拘爾。特者，獨也。此章明聖人行不崖異，寓世逍遙。

右第十一章

關尹子曰：道無作，以道應世者，是事非道，

作者，為也，事用也，聖人以道為體，無為自然，故云道無作也。聖人以德為用，從體起用，故云以道應世者也。從體起用，應變無窮，衆人見聖人應用之事，便即為道之妙體，殊不知是用非體也，故云是事非道也。

道無方，以道寓物者，是物非道，

道本無形，豈有八極上下十方哉，以者，用也，物者，人也，寓者，寄託於玄妙之言而教人物者。衆人見聖人有此道理玄妙之言，便即為道，殊不知是訓人之跡，亦非道也，故云道無方，以道寓物者，是物非道。

聖人竟不能出道以示人。

竟者，終也，示者，曉示也，道乃真空，無形無相，無相似無比倫，心不可思而知，口不能言而議，在人心開了悟默契而已。雖是聖人，終不能拈出妙道以曉示學人也，故云聖人竟不能出道以示人也。此章明道由心悟，雖聖人不能與人道也。

右第十二章

關尹子曰：如鐘鐘然，如鐘鼓然，聖人之言則然，

鐘鼓者，不自聲也，感而接應，應聲無心，以喻聖人感而後應，應言無心也。鐘聲清，以喻聖人感而後應，以理訓人，令從理悟入也，故云如鐘鐘然。鼓聲濁，以喻聖人感而後應，以事訓人，令從事而悟入也，故云如鐘鼓然，聖人之言則然也。

如車車然，如車舟然，聖人之行則然，車舟者，不自行也，感而後行，行而無心，以喻聖人迫而後動，不得已而後行，行而無心也。車行有跡，以喻聖人有時撫世，有時輔世，普利天

下，其跡昭然，萬世不泯者也，故云如車車然也。舟行無跡，以喻聖人不得已而應世，所行之德，上德不德，即跡而無跡，使賢愚莫知，鬼神不測，故云如車舟然，聖人之行則然也。

唯莫能名，所以退天下之言，唯莫能知，所以奪天下之智。

道本無名，強名曰道，泯去強名，道亦不立，故云唯莫能名也，莫能名者，言無所議，雖天下有能者，於此而退默也，故云所以退天下之言也。道本無情，思之不可得而知也，思之不可得而知者，雖天下有大知之人，於此奪之而無用也，故云唯莫能知，所以奪天下之智。此章明聖人言行無心，道不可思議者也。

右第十三章

關尹子曰：螂蛆食蛇，蛇食鼃，鼃食螂蛆，互相食也。

螂蛆者，蜈蚣也，鼃者，蝦蟆也，蜈蚣入蛇鼻竅，喫蛇腦髓，蛇吞蝦蟆，蝦蟆吞蜈蚣，三蟲互相吞食，故云螂蛆

食蛇，蛇食鼃，鼃食螂蛆，以起喻也。聖人之言亦然，言有無之弊，又言非有非無之弊，又言去非有非無之弊，

聖人所垂名言法相，喻似螂蛆蛇鼃互相吞食，故云聖人之言亦然，聖人之言有是一邊，無是一邊，迷人住著二邊，乃為學道之弊病也。此一句合螂蛆食蛇之喻也，故云言有無之弊也，既知有無二邊是非者，不著有，不著無，唯行中道，又言非有非無之弊也，既知非有非無中道是病者，則去除非有非無，不立二邊中道。迷人不悟，住著此言便即為道者，亦是學道之弊病也，此合蛇食鼃，鼃食螂蛆之喻也，故云又言去非有非無之弊也。

言之如引鋸然，

向言有無、非有非無，去非有非無，皆為弊者，其言互相掃蕩，如引拽鋸，一來一往，其跡愈深矣，故云言之如引鋸然也。

唯善聖者不留一言。

留者，住也，聖人之言譬如筌蹄，筌

者所以在魚，得魚而忘筌，蹄者所以在兔，得兔而忘蹄，言者所以在意，得意而忘言。忘言者，不住著於言也，唯善悟聖人之道者，不住著於言，默不可得而互相掃蕩也，故云唯善聖者不留一言也。此章明聖人之道，不屬名言，擬議即為弊病。

右第十四章

關尹子曰：若龍若蛟，若蛇若龜，若魚若蛤，龍皆能之。

龍之為物，乘乎雲氣，養乎陰陽，聚而成形，散而成章，變化莫測，能小能大，大則充塞天地，小則為蛟蛇龜魚蚘蛤之類也，故云若龍若蛟，若蛇若龜，若魚若蛤，龍皆能之，此借喻也。

蛟，蛟而已，不能為龍，不能為蛇為龜，為魚為蛤，

蛟似龍而非龍，而終化龍者，必以其蛟也，未化龍時，水獸而已，故云蛟，蛟而已也，蛟為水獸，不能變化，豈能為龍為蛇為龜，為魚為蛤者哉，故云不能為龍，亦不能為蛇為龜，為魚

為蛤，此亦借喻者也。

聖人龍之，賢人蛟之。

水喻道，龍喻聖人，蛟喻賢人，蛇龜喻君子，魚蛤喻衆人。龍蛟水蛇龜魚蛤，俱在水中，自生至老，吞吐受用，各無欠少，蛟蛇龜魚蛤同生在水，而不能變於水，唯龍變之。聖賢君子衆人同生於道，自生至老，日用俱足，各無欠少，賢人君子衆人同生於道，而不了於道，唯聖人了之，故云聖人龍之，賢人蛟之也。此合喻也。此章明道在聖凡，無餘無欠，人不了而聖了也。

右第十五章

關尹子曰：在己無居，形物自著，其動若水，其靜若鏡，其應若響。

唯真常在，故云在己，不住空相，故云無居，真空圓明，物物昭彰，故云形物自著也。著者，昭彰也，真空獨露，不住空相，頭頭顯見，物物昭彰，其動也如水，流復澄而無跡，其靜也如明鏡，鑑形而無心，其應物也如空谷傳聲，而常寂，故云在己無居，形

物自著，其動若水，其靜若鏡，其應若響也。

芒乎若亡，寂乎若清，

聖人洞了真空，心如寒灰枯木，似無生意，故云芒乎若亡也。芒者，芒昧也，如寒灰無光也，亡者，如枯木無生意也。心源澄徹湛然，清淨如水之靜定而清澄也，故云寂乎若清也，寂者，靜之也。

同焉者和，得焉者失，

利根之人，同氣相求學於聖人，聖人動容密示利根者，直下洞徹，轉凡成聖，故云同也，先聖唱之於前，後聖和之於後，故云同焉者和也。鈍根之人，未悟道，無所得，執持聖人名言法相，似為有所得，有此見解，不忘，失之遠矣，故云得焉者失。

未嘗先人，而常隨人。

聖人寓世，感而後應，不得已而為中下者立名言法相，盡是方便，然未嘗先立此名言，為中下之人有此染著迷病，然後隨分釋縛，隨病施方也，故云未嘗先人，而常隨人也。此章

明聖人動靜無心，感而后應者也。

右第十六章

關尹子曰：渾乎洋乎，遊太初乎，

大道渾然，汪洋無邊，即聖人之體也，故云渾乎洋乎也。太易者，未見氣也，太初者，氣之始也，一氣始萌，道之用，乃聖人即體即用，即體即用，遨遊無朕也，故云遊太初乎也。

時金已，時玉已，時糞已，時土已，

了道聖人，寓世不違時，時可輔世而治天下，人以謂如金之貴，故云時金已，時可撫世而安天下，人以謂如玉寶之尊也，故云時玉已也。時可晦隱，卑辱貧賤，利物濟人，人輕如糞土，故云時糞已，時土已。

時翔物，時逐物，

聖人寓世，時可獨善，則逍遙翱翔，如鸞鳳冲霄，不見其跡，故云時翔物也。時可隨衆，不露神通，故云時逐物也。逐者，隨之也。

時山物，時淵物，

聖人寓世，時可山居澗飲，月卧雲眠，而韜光自樂。或時可孤舟短棹，

煙蓑雨笠，遨遊江湖，天子不得臣，諸侯不得友，放任逍遙，故云時山物，時淵物也。

端乎權乎，狂乎愚乎。

端乎權乎者，此釋前時金已、時玉已也，言輔世撫世，端正法則，權變政治，以安慰天下也。故云端乎權乎。狂乎愚乎者，此釋前時糞已、時土已，時翔物、時逐物，時山物、時淵物也，謂聖人有時放任自得，不拘法則，隱顯莫測，如狂如愚，不可得而彷彿也，故云狂乎愚乎也。此章明聖人隨時達變，隱顯莫測也。

右第十七章

關尹子曰：人之善琴者，有悲心，則聲悽悽然，有思心，則聲遲遲然，有怨心，則聲回回然，有慕心，則聲裴裴然。

悽悽者，悲愴之聲也，遲遲者，思慮之聲也，回回者，違怨之聲也，裴裴者，慕戀之聲也，人心所念，寓之於琴，隨聲發見。心念悲哀，則琴聲悽悽然感愴也，故云人之善琴者，有悲心，則聲悽悽然也；心念思慮，則琴

聲遲遲然如思慮也，故云有思心，則聲遲遲然也；心念怨人，則聲回回然違恨也，故云有怨心，則聲回回然也；心念慕羨，則聲裴裴然戀著也，故云有慕心，則聲裴裴然。

所謂悲思怨慕者，非手非竹，非絲非桐，得之心，符之手，得之手，符之物，人之有道者，莫不中道。

向之所謂心念悲思怨慕，非是手竹絲絃桐琴而自有此悽遲回裴之聲也，故云所謂悲思怨慕者，非手非竹，非絲非桐也。因人善琴得之於心，心之所念，符合於手，手之所動，符合於絲竹桐琴之物，自然心之所念，隨聲發見，彼善琴者，尚能隨聲發見心之所念，況善悟有道之士乎！有道之士體用如如，拈來放下，語默起居，無非中道也，故云得之心，符之手，得之手，符之物，人之有道者，莫不中道也。此章明動靜語默，無非是道也。

右第十八章

關尹子曰：聖人以有言有爲有思者，

所以同乎人，

言為思者皆用也，聖人應用之跡，有時與凡人不異，故云聖人以有言有為有思者，所以同乎人也。

以未嘗言未嘗為未嘗思者，所以異乎人。

嘗者，曾也，未曾言為思者，言為思未萌已前真空之體也。聖人真空之體，本與凡人不異，為凡迷而聖悟，所以異乎凡人也，故云以未嘗言未嘗為未嘗思者，所以異乎人也。此章明迷人同聖人之跡、不同聖人之道也。

右第十九章

關尹子曰：利害心愈明，則親不睦，賢愚心愈明，則友不交，是非心愈明，則事不成，好醜心愈明，則物不契，

心專明審，何者為利，一向求利，心專明審，何者為害，一向避害，如此，雖父子親，亦不相和睦，況於他人乎，故云利害心愈明，則親不睦也。心專明審，何者為賢，何者為愚，一向親賢而遠愚，彼既賢於我，必以我

為愚，亦遠之矣，如此，則至老不能交同志之友也，故云賢愚心愈明，則友不交也。心專明審，何者為是，何者為非，一向就是而捨非，被是非之名所拘，凡事無巨細，皆不敢為，如此，則事無大小，皆不能成也，故云是非心愈明，則事不成也。心專明審，何者為好，何者為醜，一向愛好而惡醜，愛惡迷心，一向著色，雖夫婦之情，不相契合矣，故云好醜心愈明，則物不契也。愈者，專也，物者，人物也。

是以聖人渾之。

是以者，因上結下之辭也，渾者，渾然真心，不生分別也。是以聖人真心渾然，不生分別，則無利害賢愚，是非好醜之名，故云是以聖人渾之也。此章明聖人真心渾然，不生分別者也。

右第二十章

關尹子曰：世之愚拙者，妄援聖人之愚拙自解，

援者，引也，世間有等愚魯拙鈍之

人，恐人笑之，妄引聖人韜晦佯狂愚拙之跡，以九^七解釋，謂聖人亦有此愚拙也，故云世之愚拙者，妄援聖人愚拙自解。

殊不知聖人時愚時明，時拙時巧。

世之愚拙之人，殊不知聖人隨時達變，不滯於跡，時可隱者，則佯狂如愚，則隱之至也，時可顯者，則名超日月也，時可無為，則忘所能而如拙鈍也，時可有為，善巧方便垂示迷人也，故云殊不知聖人時愚時明，時拙時巧也。此章明聖人隱顯莫測也。

右第二十一章

關尹子曰：以聖師聖者賢人，以賢師聖者聖人，

以聖知師聖人之德，造之極者，僅為賢人也，故云以聖師聖者賢人也，以賢人之心師聖人之道，造之極者，乃為聖人也，故云以賢師聖人也。

蓋以聖師聖者，徇跡而忘道，以賢師聖者，反跡而合道。

德用有跡，蓋以聖智師聖人之德用，是徇德用之跡，忘道之體也，故云蓋

以聖師聖者，徇跡而忘道也。道體真空，無跡可徇，蓋以賢人之心師聖人之道，心開悟解，體冥真空，與跡相反而合道也，故云以賢師聖者，反跡而合道也。此章明從本降跡，徇跡而為賢人，從跡復本，反跡而為聖人。

右第二十二章

關尹子曰：賢人趨上而不見下，衆人趨下而不見上，聖人通乎上下，惟其宜之，

賢人明理，謂形而上者謂之道，形而下者謂之器，一向見於理，殊不知理障是一邊，故云賢人趨上而不見下也；衆人昧於理，迷著事用，殊不知事障亦是一邊也，故云衆人趨下而不見上也。上者，理也，下者，事也，聖人洞了真空，不拘事理，有時以理示人，有時以事示人，觀機垂訓，聖人逆順合宜，應變無方也，故云聖人通乎上下，惟其宜之也。

豈曰離賢人衆人，別有聖人也哉。

聖人如水，賢人衆人如冰，水因寒而

凝結為冰，冰遇暖而復化為水，冰雖未化，不可謂冰不是水也。為冰通身是水也，聖迷為凡，凡悟復為聖，雖凡未悟，不可謂凡不是聖也，為凡通身是聖也，迷者不悟，悲哉！如此則要知水者休離冰，尋即冰是水也，要悟聖人之道休離凡，究即凡是聖也明矣。故云豈曰離賢人衆人，別有聖人也哉也。哉者，深嘆迷人之辭也。此章明道在聖凡，平等具足，但迷悟不同也。

右第二十三章

關尹子曰：天下之理，夫者唱，婦者隨，牡者馳，牝者逐，雄者鳴，雌者應，天下有自然之理，陽尊陰卑，陽剛陰柔，陽先陰後，故夫先唱而婦隨後應和也。走獸牡陽先馳行，牝陰隨後逐趕之也，飛禽雄陽先鳴於上風，雌陰應鳴於下風也。故云天下之理，夫者唱，婦者隨，牡者馳，牝者逐，雄者鳴，雌者應。

是以聖人制言行，而賢人拘之。

聖人因觀天下有自然陰陽尊卑先後

之理，遂制立君臣父子夫婦兄弟尊卑先後之言行，古今賢人不敢違越而行之，是彼此言行拘束定，而不得自在逍遙也，故云是以聖人制言行，而賢人拘之。此章明聖人道超法則，垂範後世也。

右第二十四章

關尹子曰：聖人道雖虎變，事則鼈行，道雖絲棼，事則棊布。

虎變者，喻聖人道之威光赫然，應變無方，鼈行者，喻聖人用事，不得已而緩緩後應，故云聖人道雖虎變，事則鼈行。絲棼者，喻聖人之道紛然無所不包羅，棊布者，喻聖人用事，著著有條道理路下落也，故云道雖絲棼，事則棊布也。此章明聖人之道難測，用事有法則也。

右第二十五章

關尹子曰：所謂聖人之道者，胡然子子爾，胡然徹徹爾，胡然堂堂爾，胡然臧臧爾，

子子者，無對待也，徹徹者，盡善盡美也，堂堂者，深奧難測也，臧臧者，

妙之又妙也，胡者，何也。言聖人之道，何其子子然超諸對待也，故云所謂聖人之道者，胡然子子爾也。聖人之道何其徹徹然盡善盡美，何其堂堂然深奧難測，何其臧臧然妙之又妙、讚美不盡也，故云胡然徹徹爾，胡然堂堂爾，胡然臧臧爾者也。惟其徧偶萬物^⑧，而無一物能偶之，故能貴萬物。

偶者，待也，惟道無我，能生萬物，而與萬物不異，而萬物待道而生，而道無所待，故能超貴乎萬物，故云惟其能徧偶萬物，而無一物能偶之，故能貴萬物也。無一物能偶者，無一物比配道也。此章明道超諸有，迥絕對待。

右第二十六章

關尹子曰：雲之卷舒，禽之飛翔，皆在虛空中，所以變化不窮，

雲之為物，地水之氣上升結而為雲，在虛空中，或卷或舒，聚散往來，無跡可見也。禽之為物，陽氣化生，飛翔虛空中，南北東西，惟意所適，來

往縱橫，無跡可覓。雲禽皆在虛空中，卷舒飛翔，變化往來不窮也，故云雲之卷舒，禽之飛翔，皆在虛空中，所以變化不窮也。此借喻也。聖人之道則然。

聖人之道，洞了真空妙有，體用如如，應變無方，如雲之卷舒，禽之飛翔，縱橫變化，無有窮極，而無蹤跡可循也，故云聖人之道則然也。此章明聖人之道變化無窮，而隱顯莫測也。

右第二十七章

文始真經註卷之三

① 此句，《關尹子》和《無上妙道文始真經》皆作「天下之物無得以累之，故本之以謙」。

② 此「無」字原脫印，據前後文意補。

③ 此句，《關尹子》和《無上妙道文始真經》皆作「道觀天地人物皆吾道」。

④ 「不受道」，《關尹子》和《無上妙道文始真經》皆作「不受道」。

⑤ 此句，《關尹子》作「是為物易也」，《無上妙道文始真經》作「是為物易者也」。

⑥ 此句，《關尹子》和《無上妙道文始真經》皆作「亦不能為蛇為龜」。

⑦ 「九」當為「自」之誤。

⑧ 此句，《關尹子》和《無上妙道文始真經》皆作「惟其能徧偶萬物」。

文始真經註卷之四

神峰逍遙子牛道淳直解

四符篇

符者，精神魂魄也，凡一十七章。

關尹子曰：水可析可合，精無人也，

五行中，水析而分為萬水，合而為一水，不假他物而獨見，以此知水無人也。水在人屬腎藏之精，故精無人也，故云水可析可合，精無人也。

火因膏因薪，神無我也，

五行中，火因油膏燈草，或以柴薪爇之見火之形，若無膏薪，則火不能獨見，以此知火無我也。火在人屬心藏之神，故神無我也，故云火因膏因薪，神無我也。

故耳蔽前後皆可聞無人，智崇無人，一奇無人，冬凋秋物無人，黑不可變無人，北壽無人，皆精。

水既無人，所在皆無人也，水在藏為腎，在形為耳，耳乃腎之外表，耳蔽

著聲聽之前後皆聞，耳既屬水亦無人也，故云耳蔽前後皆可聞，無人也；水在五當^①為智，智見孤高名曰崇也，智既屬水無人，故曰智崇無人也；水在數為一，一乃奇數，即水生數也，一既屬水，亦無人也，故云一奇無人也；水在時為冬，冬嚴寒，故能凋秋草木之物，冬既屬水，亦無人也，故云冬凋秋物無人；水在色為黑，黑不可以變別色，黑既屬水，亦無人也，故云黑不可變無人也；水在方為北，水壽長久不枯涸，以此知全精者多壽也，北既屬水，亦無人也，故云北壽無人也。已上耳智一故云皆精。

舌即齒牙成言無我，禮卑無我，二偶無我，夏因春物無我，亦可變無我，南天無我，皆神。

火既無我，所在皆無我也，火在藏為心，在形為舌，舌乃心之外表，舌獨不能言，即齒成言也，舌既屬火，亦無我也，故云舌即齒牙成言無我

也；火在五常為禮，禮以謙卑為本，禮既屬火，亦無我也，故云禮卑無我；火在數為二，二乃偶數也，即火之生數也，二既屬火，亦無我也，故云二偶無我也；火在時為夏，夏因春生草木之物而長之也，夏既屬火，亦無我也，故云夏因春物無我；火在色為赤，赤可變為別色也，赤既屬火，亦無我也，故云赤變無我也；火在方為南，火易滅，故壽夭，是知縱真火者多夭也，南既屬火，亦無我也，故云南天無我也。已上舌禮二故云皆神也。

以精無人，故米去穀^②則精存，

水在五神為精，水既無人，精亦無人，以精無人，譬如穀去皮殼，則精米存之，此無人之象也，故云以精無人，故米去殼則精存也。

以神無我，故鬼憑物則神見。

火在五神為神，火既無我，神亦無我，以神無我，譬如鬼憑附人物則見神通，此無我之象也，故云以神無

我，故鬼憑物則神見也。

全精者，忘是非，忘得失，在此者非彼，人能保全至精，孤然不與萬法為侶，則善是惡非、寵得辱失俱忘之矣。既孤然不與萬法為侶，是在此精而已，不假彼法而獨存也，故云全精者忘是非，忘得失，在此者非彼者也。抱神者，時晦明，時強弱，在彼者非此。

人能保抱至神，冥然無我，隨時達變。時可晦隱，則晦隱而獨善，時可明顯，則明顯而濟天下。時可行仁德，自強不息，則行仁德而自強不息也，時可謙卑柔弱，則謙卑柔弱而自牧也。晦明強弱在彼時而已，非在此神也，為神無我也，故云抱神者，時晦明，時強弱，在此者非彼也。此章明全精神者無我人者也。

右第一章

關尹子曰：精神水火也，五行互生滅之，其來無首，其往無尾。

精屬水，神屬火，故精神水火也，水生木，木生火，火生土，土生金，金生水；水滅火，火滅金，金滅木，木滅

土，土滅水也，故云五行互生滅也。

正月二月木旺，三月木旺十二日，土旺十八日，四月五月火旺，六月火旺十二日，土旺十八日，七月八月金旺，九月金旺十二日，土旺十八日，十月十一月水旺，十二月水旺十二日，土旺十八日，春夏秋冬四時，循環往來，首尾可尋，故云其來無首，其往無尾也。

則吾之精，一滴不存亡爾，

精屬水，故曰一滴也，吾之至精之道，不屬有無存亡也，故云則吾之精，一滴不存亡爾也。

吾之神，一歛無起滅爾。

神屬火，故曰一歛，吾之至神，一歛之間無生無滅也，起者生也，故云吾之神一歛無起滅爾。

惟無我無人，無首無尾，所以與天地冥。

如上所說，神無我，精無人，五行互生滅之，其來無首，其往無尾，以此知惟無我人。首尾者，所以與天地同本於窈冥之道也，故云惟無我無

人，無首無尾，所以與天地冥也。此章明精神無人我，與天地同生於道。

右第二章

關尹子曰：精者水，魄者金，神者火，魂者木。

水在五神為精，故云精者水也，金在五神為魄，故云魄者金也，火在五神為神，故云神者火也，木在五神為魂，故云魂者木也。

精主水，魄主金，金生水，故精者魄藏之。

精屬水，魄屬金，金是水之母，金生水也，以此知魄隱藏精也，故云精主水，魄主金，金生水，故精者魄藏之也。

神主火，魂主木，木生火，故神者魂藏之。

神屬火，魂屬木，木乃火之母，木生火，以此知魂隱藏神也，故云神主火，魂主木，木生火，故神者魂藏之也。

惟水之為物，能藏金而息之，能滋木而榮之，所以析魂魄。

希玄子賈本有此四句，似與經文勢相聯，不失次序，故亦從而解之也。金放於水中，則隱息而不見，木得水，則滋生榮旺，精既屬水，魄既屬金，魂既屬木，水既藏金，以此知精能析分魂魄也。故云惟水之為物，能藏金而息之，能滋木而榮之，所以析魂魄。

惟火之為物，能鎔金而銷之，能燔木而燒之，所以冥魂魄。

火能鎔銷其金，亦能燒燔其木，神既屬火，魄既屬金，魂既屬木，火既能銷金燔木，以此知神能合魂魄也。故云惟火之為物，能鎔金而銷之，能燔木而燒之，所以冥魂魄也。

惟精在天為寒，在地為水，在人為精。

精屬水，水在天時則為冬寒，水在地形則為五行之水，水在人五神則為精也，故云惟精在天為寒，在地為水，在人為精也。

神在天為熱，在地為火，在人為神。

神屬火，在天時則為夏熱，在地形則為五行之火，在人五神則人五神則

為神也^①，故云神在天為熱，在地為火，在人為神。

魄在天為燥，在地為金，在人為魄。

魄屬金，在天氣則為炎燥，在地形則為五行之金，在人五神則為魄也，故云魄在天為燥，在地為金，在人為魄。

魂在天為風，在地為木，在人為魂。

魂屬木，在天氣則為風，在地形則為五行之木，在人五神^⑤則為魂也，故云魂在天為風，在地為木，在人為魂也。

惟以我之精，合天地萬物之精，譬如萬水可合為一水。

因萬水可合為一水之喻，以此知吾之精，可合天地萬物之精為一精也，故云惟以我之精，合天地萬物之精，譬如萬水可合為一水也。

以我之神，合天地萬物之神，譬如萬火可合為一火。

因萬火可合為一火之喻，以此知吾之神，可合天地萬物之神為一神也，故云以我之神，合天地萬物之神，譬

如萬火可合為一火。

以我之魄，合天地萬物之魄，譬如金之為物，可合異金而鎔之為一金。

因異金可合鎔之為一金之喻，以此知吾之魄，可合天地萬物之魄為一魄也，故云以我之魄，合天地萬物之魄，譬如金之為物，可合異金而鎔之為一金也。

以我之魂，合天地萬物之魂，譬如木之為物，可接異木而生之為一木。

因異木可接為一木之喻，以此知吾之魂，可合天地萬物之魂為一魂也，故云以我之魂，合天地萬物之魂，譬如木之為物，可接異木而生之為一木也。

則天地萬物皆吾精吾神、吾魄吾魂，何者死，何者生。

如上所說，則天地萬物精神魂魄同生於道也，既同生於道者，道豈有生死哉，故云天地萬物皆吾精吾神，吾魄吾魂，何者死何者生也。此章明天地與我並生，萬物與我為一，一生於道，道無生死者也。

右第三章

關尹子曰：五行之運，因精有魂，因魂有神，因神有意，因意有魄，因魄有精，金木水火土五行運轉，互相生也。精屬水，魂屬木，水生木，故云五行之運，因精有魂也；神屬火，木生火，故云因魂有神也；意屬土，火生土，故云因神有意也；魄屬金，土生金，故云因意有魄也；精屬水，金生水，故云因魄有精也。

五者回環不已，

精神魂魄意五者相生，循環不已也。已者，止也，故云五者循環不已也，相生者，精生魂，魂生神，神生意，意生魄，魄生精，精復生魂也。若人心神不生，則意不生，為無火，則無土也；意不生，則魄不生，為無土，則無金也；魄不生，則精不生，為無金，則無水也；精不生，則魂不生，為無水，則無木也；魂不生，則神不生，為無木，則無火也。以此則知，一心不生，五者皆廢，乃出輪迴之捷徑也。

所以我之偽心，流轉造化幾億萬歲，未有窮極。

偽心者，業識也，一切衆生業識忙忙，無本可據，流浪生死，出穀入穀，四生六道，販骨如山，輪迴不知幾億萬歲，尚未有窮極出離也。大聖垂慈是經，由是而說也，故云所以我之偽心，流轉造化幾億萬歲，未有窮極也。造化者，生死也，我者，一切衆生是也。

然核芽相生，不知幾萬株，天地雖大，不能芽空中之核，

果木有核者，埋於土內，則生芽長成樹，復結果生核，核復埋土生芽，芽又長成樹，生核，如此相生，不知幾萬株樹而不窮，故云然核芽相生，不知幾萬株也。此喻心含識，則偽心流轉造化幾億萬歲，未有窮極也。若將果核以線繫之懸於空中，彼天地雖大，豈能生芽哉，故云天地雖大，不能芽空中之核也。此喻一心合於真空，造化不能輪迴也。

雌卵相生，不知其幾萬禽，陰陽雖妙，

不能卵無雄之雌。

禽之雌，因與雄交而生其卵，雌覆卵而生小禽，長大復有雌雄相交而生卵，如此相生，不知其幾千萬億禽也，故云雌卵相生，不知其幾萬禽也。此喻心背覺合塵，生死不已也。彼禽之雌不與雄交合，彼陰陽雖妙，豈能生卵哉，故云陰陽雖妙，不能卵無雄之雌。此喻心不合塵，則無生死者也。

惟其來于我者，皆攝之一息，則變物為我，無物非我，所謂五行者，孰能變之。

我者，心也，心本無心，因物境來相干，則一息之間，心忽見也，以此知即物是心也，故云惟其來于我者，皆攝之一息，則變物為我也。若無物境來干，則心不見，心既不見，即是真空，五行豈能變真空哉，不能變真空者，則無生死輪迴也，故云無物非我，所謂五行者，孰能變之。故云見物便見心，無物心不見，十方通塞中，真心無不遍，正謂此也。此章明

一念纔生，則落五行，輪迴不已，一心不生則真空，陰陽不能陶鑄矣。

右第四章

關尹子曰：衆人以魄攝魂者，金有餘則木不足也，

魄者，陰也，妄想貪著衆惡是也，魂者，陽也，清靜無染衆善是也，衆人愚癡顛倒，妄想貪著，外行衆惡，內貪色慾，外損陰德，內耗元陽，陽魂耗盡，陰魄獨強，惡習所攝，死沉陰界，如水流下，蓋屬乎陰者自降也，陰魄既獨強，陰魄屬金，是金有餘也，陽魂既耗盡，陽魂屬木，是木不足也。攝，制伏也，以強魄制伏弱魂也，故云衆人以魄攝魂者，金有餘則木不足也。

聖人以魂運魄者，木有餘則金不足也。

運者，周行也，聖人初學道時，心開了悟，清靜無染，外行衆善，不住行善之跡，內保元陽，不住空相，離種種邊，純陽流住，陽魂運化，陰魄消寂，功滿蛻形，升乎陽界，所以為聖人也。如火發往上行，蓋屬乎陽自

升也，陽魂既運化，魂屬木，是木有餘也，陰魄既消寂，魄屬金，是金不足也。

蓋魄之藏，魂俱之，魂之游，魄因之，

魄屬陰，陰主靜，靜者，隱藏之義也，魄隱藏於夜，魂亦俱隨魄隱藏也，故云蓋魄之藏，魂俱之也。蓋者，大蓋如此也。魂屬陽，陽屬動，動者，浮游之義，魂浮游於晝，魄因隨之而浮游也，故云魂之游，魄因之者也。

魂晝寓目，魄夜舍肝，寓目能見，舍肝能夢。

魂乃肝藏之神，目乃肝之外表，魂晝寓目即無疑也，魄乃肺藏之神，鼻乃肺之外表，應當魄夜舍肺，今經言魄夜舍肝，於文理違背，傳寫之誤也。且從舍肝解之，終是牽強。為魂晝寓游於目，魄因隨之寓游於目也，魄夜舍藏於肺，魂俱游而舍藏於肺也，此論之甚當。若言魂晝寓游於目，魄因而隨寓游於目，魄夜舍藏於肝，魂俱隨而舍藏於肝，肝是魂之本家，不應說俱隨之也，以此論牽強尤甚

也。魂晝寓游於目，能見諸色相，皆魂識所辯也，故云魂晝寓目，寓目能見也。魄夜舍藏於肺者，能作諸夢境，皆尸魄妄想顛倒所成也，故云魄夜舍肺，舍肺能夢也。

見者魂無分別，析之者分別，析之曰天地者，魂狃習也，

狃者，狎也，魂晝寓游於目，能見衆色相，皆魂所辯也，故云見者魂也。魂初寓目，本無分別，故云無分別也，忽生分別之識，故云析之者分別也。既生分別之識，則知在上曰天，在下曰地也，故云析之者天地也。既識天地，則是魂識狎習染狎於識性，如犀牛翫月，月形入角雖盡，犀牛形亦不能去角中之月也。識染天地萬物者，亦復如是也，乃輪迴之因塵劫不能出者，為此識也，故云魂狃習也。

夢者魄，無分別，析之者分別，析之曰彼我者，魄狃習也。

魄夜舍藏於肺，能作諸夢，故云夢者魄也。魄初舍肺，本無分別，而生分

別之識，則分析曰彼人此我者，皆魄識狃習，顛倒夢想而迷真著妄也，故云無分別，析之者分別，析之曰彼我者，魄狃習也。

火生土，故神生意，

郭子謙本有此七字，甚與經文勢通暢，故亦從而解之。神屬火，意屬土，火生土，故神生意也，故云火生土，神生意也。

土生金，故意生魄。

意屬土，魄屬金，故意生魄也，故云土生金，故意生魄。

神之所動，不名神名意，意之所動，不名意名魄。

動者，生也，神之所生，即不得名神也，乃名之為意，神屬火，意屬土，火生土，以此知神生則名意也。故云神之所動，不名神名意也，意之所生，不得名意，乃名之為魄也，魄屬金，土生金，以此知意生則名魄也，故云意之所動，不名意，名魄也。

惟聖人知我無我，知物無我，皆因思慮計之而有。

聖人了悟真空，元本無我，真空者，思慮未萌，思慮未萌者，內不知有我，外不知有物也。知者，悟也，聖人了悟真空，元無物我，今計物我者，皆因思慮妄計之而有也。故云惟聖人知我無我，知物無物，皆因思慮計之而有。

是以萬物之來，我皆對之以性，而不對之以心，性者心未萌也，

是以者，因上仍下之辭也。因上凡人以思慮妄計萬物彼我，以此萬物之來，吾但以性對之，性者真空，真空應物常寂，故云是以萬物之來，我皆對之以性也。但對之以性，而不對之以心者，何也？答曰：性者，心未萌生也，心未萌者，即是真空之性也，故云而不對之以心，性者心未萌也。

無心則無意矣，蓋無火則無土。無意則無魄矣，蓋無土則無金。

心屬火，意屬土，無火，不生土，故云無心則無意矣，蓋無火則無土也。意屬土，魄屬金，無土，則不生金，故

云無意則無魄矣，蓋無土則無金。一者不存，五者皆廢。

一者，心也，一心不生，則神意魄精魂五者皆廢，而不相生也，故云一者不存，五者皆廢也。

既能渾天地萬物以為魂，斯能渾天地萬物以為魄，

既者，因前章說，以我之魂合天地萬物之魂也。既能以我之魂，渾同天地萬物之魂，斯能以我之魂，渾同天地萬物之魂也，故云既能渾天地萬物以為魂，斯能渾天地萬物以為魄。凡造化所妙皆吾魂，凡造化所有皆吾魄。則無一物可役我者。

如上說者，我之魂魄，渾同天地萬物之魂魄，以此知凡造化者所妙所有，皆吾魂魄也，故云凡造化所妙皆吾魂，凡造化所有皆吾魄，造化者，造物也，既與造物者游，則能役萬物，無一物能役吾也。經云：一道能作萬物，終無有一物能作道者，能害道者，與此同也，故云則無一物可役我者也。此章明一心既萌，則五神妄

生不已，一心不生，則五神還原，可與造物同游。

右第五章

關尹子曰：鬼云為魂，鬼白為魄，於文則然，

云字傍鬼字為魂字，白字傍鬼字為魄字，於文字則如是，故云鬼為魂，鬼白為魄，於文則然。

鬼者，人死所變。

有一分陰不盡，不能為仙，有一分陽不盡，不能為鬼，以此知人元陽耗盡，雖未死亦死也。人是戴殼鬼，鬼是脫殼人，蓋妄結惡習，死沉陰界，變而為鬼也，故云鬼者，人死所變也。

云者風，風者木，白者氣，氣者金，

陽氣為云，云昇，無陰相接，化而為風，風屬巽，巽屬木，故云云者風，風者木也，白色屬金，金氣化為白色，故云白者氣，氣者金。

風散故輕清，輕清者上天，金堅故重濁，重濁者入地，

風屬陽，能散萬物，故輕清也，風既

屬陽，又輕清，自然上昇於天，故云風散故輕清，輕清者上天也。金形屬陰，故堅而重濁，金既屬陰形，堅而重濁，自然下沉於地也，故云金堅故重濁，重濁者入地也。

輕清者，魄從魂昇，重濁者，魂從魄降。

人修衆善則屬陽，死則善福所資，則其氣輕清，自然魄從魂昇於陽界，此亦自然之類也，故云輕清者，魄從魂昇也。人行衆惡則屬陰，死則惡業所攝，則其氣重濁，自然魂從魄降，下沉於陰界，亦自然之類也，故云重濁者，魂從魄降也。

有以仁昇者為木星佐，有以義昇者為金星佐，有以禮昇者為火星佐，有以智昇者為水星佐，有以信昇者為土星佐。

人專一行仁惠，行之至也，死而上昇為木歲星之輔佐也，為仁屬木也，亦自然然而各從其類也，故云有以仁昇者為木星佐也。人專行義以宜物，行之至也，死而上昇為金太白星之輔佐也，為義屬金也，故云有以義昇者為金星佐也。人專行禮以尊君

父，行之至也，死而上昇為火熒惑星之輔佐也，為禮屬火也，故云有以禮昇者為火星佐也。人專以智別真偽是非，從真是而不從偽，行之至也，死而上昇為水極星之輔佐也，為智屬水也，故云有以智昇者為水星佐也。人專行誠信，言行相符，行之至也，死而上昇為土鎮星之輔佐也，為信屬土也，故云有以信昇者為土星佐也。

有以不仁沉者木賊之，不義沉者金賊之，不禮沉者火賊之，不智沉者水賊之，不信沉者土賊之。

人行不仁，則衆惡獨擅，行之至也，則死而沉於陰界，則東嶽拘而治罪，為東嶽屬木，既拘而治罪，非木賊而何，故云有以不仁沉者木賊之也。人專行不義，一切顛倒，不合義理，行之至也，則死而沉於陰界，則西嶽拘而治罪，為西嶽屬金也，故云有以不義沉者金賊之也。人專行無禮，侮慢君父，不忠不孝，行之至也，則死而沉於陰界，則南嶽拘而治罪，為

南嶽屬火，故云有以不禮沉者火賊之也。人專行不智，愚癡所障，不鑑真偽是非，一切倒錯，則死而沉於陰界，則北嶽拘而治罪，為北嶽屬水也，故云有以不智沉者水賊之也。人專行不誠，信一切誑言妄語，言行相違，誑妄過重，則死而沉於陰界，則中嶽拘而治罪，為中嶽屬土也，故云有以不信沉者土賊之也。已上行五常之德，則為五星之佐，背五常之德者，反彼^⑧五行賊之，可不慎歟！

魂魄半之，則在人間，

人行半善半惡，則罪福兩停，善屬陽魂，惡屬陰魄，如此則不昇陽界，不沉陰界，只在人間宛轉生死也，故云魂魄半之，則在人間。

昇魂為貴，降魄為賤，靈魂為賢，厲魄為愚，輕魂為明，重魄為暗。

前生作善多，則昇魂為今生富貴，故云昇魂為貴也。前生作惡多，則降魄為今生貧賤之人也，故云降魄為賤也。前生有慧，明理，則靈魂為今生賢人也，故云靈魂為賢也。前生

無慧，愚癡剛悍，則厲魄為今生愚人，故云厲魄為愚也。前生智性為善，則輕魂為今生聰明人也，故云輕魂為明也。前生無智性為惡，則重魄為今生癡暗也，故云重魄為暗。陽魂為羽，鈍魄為毛，明魂為神，幽魄為鬼。

今生輕薄作惡，死而陽魂為羽蟲之類，故陽魂為羽也。今生癡鈍作惡，死而鈍魄為毛蟲之類，故鈍魄為毛也。今生聰明正直，疾惡樂善，死而明魂為神祇也，故明魂為神也。今生好幽暗，行奸盜，作諸不善，死而幽魄為鬼也，故幽魄為鬼也。

其形其居，其識其好，皆以五行契之。

貴賤賢愚，明暗羽毛神鬼，其形狀居處雖不同，皆因業識所好之因，各報如此之果也。如好五常之因，得報為五星卿佐之果也，如違五常之因，報有五嶽治罪之果也，故云其形其居，其識其好，皆以五行契之。

惟行之數^⑨，參差不一，所以萬物之多，盈天地間猶未已也。

水生數一，成數六，火生數二，成數七，木生數三，成數八，金生數四，成數九，土生數五，成數十，故云惟行之數^⑩，參差不一也。五行陰陽，相推相蕩，交感變化，巨細洪纖，飛潛動植，所以紛紛擾擾不止，於萬億之多，充盈於天地之間，生生化化，感異類創生，猶未止息也，故云所以萬物之多，盈天地間猶未已也。

以五事歸五行，以五行作五蟲，可勝言哉。

以事者，皆用也，五用者，視聽食息思。歸五行者，目乃肝之外表，肝屬木，故目視屬木也，耳乃腎之外表，腎屬水，耳聽屬水也，舌乃心之外表，心屬火，故舌食屬火也，鼻乃肺之外表，肺屬金，故鼻息屬金也，意乃脾之神，屬土，故意思屬土也。故云以五事歸五行也。五行者，木火土金水也。五蟲者，鱗羽倮毛甲也，東方甲乙木，作鱗蟲三百六十種，龍為長也，南方丙丁火，作羽蟲三百六十種，鳳凰為長也，中央戊己土，倮

蟲三百六十種，聖人為長也，西方庚辛金，作毛蟲三百六十種，麒麟為長也，北方壬癸水，作甲蟲三百六十種，靈龜為長也，故云以五行作五蟲，可任論動植之物也，故云可勝言哉也。勝者，任也，言者，論也。

譬如兆龜數著，至誠自契，五行應之，誠苟不至，兆之數之，無一應者。

兆龜數著，見解二柱首章也。向來所說貴賤賢愚明暗羽毛神鬼五常之因果，譬如以至誠祝願鑽龜殼數著草，五行應之以吉凶之兆也，人之其形其居其識其好，皆以五行契之，亦復如是也，故云譬如兆龜數著，至誠自契，五行應之也。若鑽龜數著之時，而心不至誠，吉凶之兆無一應也。人心無所愛著，絕其所好，清淨無染，離種種邊，不落因果，輪迴亦復如是也，故云誠苟不至，兆之數之，無一應者也。

聖人假物以游世，五行不得不對。

聖人假借四大之貌物，以五常之德，普利羣品，為之妙用也。既以五常

為妙用，寓游世間，普利羣品，以仁屬木，義屬金，禮屬火，智屬水，信屬土，既為之五常，不得不對屬於五行也。故云聖人假物以游世，五行不得不對也。此章明心有染著，則落因果，心離染著，則出輪迴。

右第六章

關尹子曰：三者具有魂，魂者識，目者精，色者神，見之者，為魂耳口鼻心之類。

魂具此識精神，三也，故云三者具有魂也。魂畫寓目，目視而辯五色，亦具識精神，然後能視辯之也，故云魂者識，目者精，色者神也，謂目之辯色者，魂識也，目之神水乃精神也。不獨視為然，耳聽聲，口嘗味，鼻聞香，心思境，皆同具有識精神，方能別辯聲味香境也，故云見之者，為魂耳口鼻心之類也。類者同也。

在此生者，愛為精，為彼生父本，觀為神，為彼生母本，愛觀雖異，皆同識生。

在此生身者，為彼父，生愛識戀母，愛為精，精屬水，彼母生觀識戀父，

觀為神，神屬火，父母交感精神，為此生身之本也，故云在此生者，愛為精，為彼生父本，觀為神，為彼生母本，父母愛觀雖不同，皆用識情交感生子則同也，故云愛觀雖異，皆因同生也。

彼生生本。在彼生者，一為父，故受氣於父氣，為水，二為母，故受血於母血，為火，

彼父母，生生之本也，為父精屬水，水數一，故一為父也，此身受生之初，先得父之精氣以成胎元，精氣屬水，故云彼生生本，在彼生者，一為父，故受氣於父氣，為水也；為母血屬火，火數二，故二為母也。此身受生之初，次得母之血氣以成胎本，血氣屬火，故云二為母，故受血於母血，為火。

有父有母，彼生生矣。

有父有母，陰陽交感，彼為父父母母，而生生不窮矣，故云有父有母，彼生生矣。

惟其愛之無識，如鎖之交，觀之無識，

如燈之照，吾識不萌，吾生何有。

惟以至仁不仁，平等普利而無識，不求報恩，不住行仁之跡，雖與世交，如鎖鑰相交，而無情識之心也，故云惟其愛之無識，如鎖之交也。仁者兼愛也，圓明定慧，如大圓鏡，鑑物無心，如燈破暗，照物無識也，故云觀之無識，如燈之照也。如上所說，至仁不仁，平等普利而無心，定慧圓明，應物而無識，吾識不萌生，吾生死何有哉，故云吾識不萌，吾生何有哉。此章明識是生死之種，無識則無生死輪迴也。

右第七章

關尹子曰：如桴扣鼓，鼓之形者，我之有也，鼓之聲者，我之感也，桴已往矣，餘聲尚存，終亦不存而已矣。

寓游於世，物來相感，如似桴槌扣擊於鼓，感而後聲也，故云如桴扣鼓也。我之所有精神，如鼓之形，我之應感，如鼓之聲也，故云鼓之形者，我之有也，鼓之聲者，我之感也，桴槌已往，鼓餘聲尚在。如感我者已

往，我之精神魂魄之識，尚未能忘，回光照破此識而忘之，是終亦不存也，故云桴已往矣，餘聲尚存，終亦不存而已矣。

鼓之形如我之精，鼓之聲如我之神，其餘聲者，猶之魂魄。

吾之歷歷精明，如鼓之形也，吾之寂然不動，感而遂通，如鼓之聲也，故云鼓之形如我之精，鼓之聲如我之神也。吾之魂魄之識，物感不忘，猶似桴已往矣，鼓之餘聲尚存也。故云餘聲者，猶魂魄也。

知夫倏往倏來，則五行之氣我何有哉。

人能了悟本性真空，物境倏忽來往，應變常寂，如此，金木水火土五行之氣，於真空何有哉。故云知夫倏往倏來，則五行之氣我何有哉。此章明真空不屬五行也。

右第八章

關尹子曰：夫果之有核，必待水火土三者具矣，然後相生不窮，三者不具，如大旱大潦大塊，皆不足以生物。

果木之中，有子核埋於土內，必待雨

陰水之滋潤，晴陽火之薰蒸，然後核生芽，芽長成樹，樹復結果核，核依前種之，水火土三者滋潤薰蒸，復生芽長樹結果核，相生無有盡期也。故云夫果之有核，必待水火土三者具矣，然後相生不窮也，若果核不埋於土，無陰雨陽晴滋潤薰蒸，安能生芽成樹哉，若無水火土，如似大亢旱時，大水澇時，大乾土塊時，三時種物皆不得生也。故云三者不具，如大旱大潦大塊，皆不足以生物也。潦者，澇也，足者，得也。

精水神火意土三者本不交，惟人以根合之，故能於其中橫見有事。

精屬水，神屬火，意屬土，精神意三者本不交生於物，惟人之父母，以二根交合，精神意識混融於恍惚之際，橫妄見其象有此胞胎之事，生生不窮，如果核得水水土，生芽長樹復結果核，生生不窮也。故云精水神火意土三者本不交，惟人以根合之，故能於其中橫見有事也。

猶如術呪，能於至無見多有事。

父母未交合之時，各自真空之性，本來清靜無物，以二根交合，精神意而生子者，猶法術呪士巫覡之類，能於至無中呼召鬼神，妄見變化怪異之事也，故云猶如術呪，能於至無見多有事也。此章明本來清靜，元無生死，人迷愛慾，屈沉生死也。

右第九章

關尹子曰：魂者水也^①，木根於冬水，而花於夏火，故人之魂藏於夜精，而見於晝神。

魂者，木也，木冬時歸根復命，得冬水炁滋養，於夏得火炁薰蒸，則發花也，故云魂者木也，木根於冬水，而華於夏火也。精屬水，魂屬木，水生木，故云人之魂藏於夜精也，夜屬陰，陰屬水，晝屬陽，陽屬火，神屬火，魂晝寓目以見神彩，故云而見於晝神也。

合乎精，故所見我獨，蓋精未嘗有人，合乎神，故所見人同，蓋神未嘗有我。精屬水，水無人也，精亦無人也，合乎至精，則歷歷孤明，不與萬法為侶

也，故云合乎精，故所見我獨。蓋精無人也，合乎至神，則冥冥莫測，感而後應，應人事而無我也，神屬火，火無我，神亦無我也，故云合乎神，故所見人同，蓋神未嘗有我。此章明全乎至精至神者，無人我也。

右第十章

關尹子曰：知夫此身如夢中身，隨情所見者，可以飛神作我而遊太清，

知者，悟也，人能了悟四大假合之身，如塵埃聚沫、浮漚夢幻不堅固，虛妄不實之身，皆是隨妄情所見，以為有我，了悟如此，洞徹真空，以飛騰神用不疾而速，不行而至，太清之境無日不遊也。太清者，真空之妙道也，故云知夫此身如夢中身，隨情所見者，可以飛神作我而遊太清也。知夫此物如夢中物，隨情所見者，可以凝精作物而駕八荒。

物者，用也，人能悟此六用神通，亦如夢幻不實，了悟知此，洞徹真空，以凝澄清精微之體，而作生妙用，駕馭八荒，而為頃刻之遊也，故云知夫

此物如夢中物，隨情所見者，可以凝精作物而駕八荒也。八荒者，四海之外謂之八紘，八紘之外謂之八演，八演之外謂之八區，八區之外謂之八極，八極之外謂之八荒，八荒之外謂之鴻荒，廣莫之界也。又太清者，太上所居之天也，在四種民天之上，即太清仙境也。大開之士，以真空太虛為體，遠及八荒之外，近在眉睫之間，陰陽莫測，鬼神難窺，不假他物，八荒之外太清仙境而為咫尺頃刻之遊也。或示變化警愚迷，啟誠信向道之心，或以飛神作身外之身，而乘空履虛，昇遊太清仙境，或以凝精作龍虎鸞鳳，龜鶴梁鯉箕樓之類，駕馭而適八荒之外，以為遊戲也。是道也，能見精神而久生，能忘精神而超生。

是者，此也，道者，不可思議之道也，了悟不可思議之妙道，則形如枯木，心似寒灰，自然神定精凝，返老還童延形，長生久視，如廣成子千二百歲，身未嘗衰是也。故云是道也，能

見精神而久生也。既身心如枯木寒灰，即是以忘精神，而遠超生滅也，故云能忘精神而超生也。

吸氣以養精，如金生水，

氣白色屬金，世有衛生小功法，以鼻吸氣在息須臾，微微緩出，以為養精攻病，以氣養滋其精，如金生水，為氣屬金，精屬水也，故云吸氣以養精，如金生水也。

吸風以養神，如木生火，

世有小功法以治心者，以鼻引清風，微微來往出入，則心不亂而神定，亦得其所養，如木生火，為風屬木，神屬火也，故云吸風以養神，故木生火也。

所以假外以延精神。

如上所說，吸氣吸風以養精神，是假外以延留精神，不令耗散也，故云所以假外以延精神也。

漱水以養精，精之所以不窮，

世有小功法，以漱津液而保養其精，不令走泄，而精益無窮也，故云漱水以養精，精之所以不窮也。

摩火以養神，神之所以不窮，

世有小功法，凝思以手摩臍輪，令熱如火，久而神益無窮也，故云摩火以養神，神之所以不窮也。

所以假內以延精神。

如上所說，漱津液之水，摩臍輪之火，不假外物，是假內以延留精神，不令耗散也，故云所以假內以延精神也。

若夫忘精^⑬而超生者，吾嘗言之矣。

若夫洞了真空，精神返源，窈冥莫測，不知有精神之可忘，亦無生滅之可超，吾嘗垂示學人言之矣，其他假外假內小功小法，吾未嘗言之也，故云若夫忘精神而超生者，吾嘗言之矣。此章明道由心悟，而行小功小法莫之及也。

右第十一章

關尹子曰：人勤於禮者，神不外馳，可以集神，

禮在五行屬火，神亦屬火，禮者，謹敬也，人心專以謹敬慎獨，不欺闇室，則心神不馳騁，而凝集靜定也，

故云人勤於禮者，神不外馳，可以集神也。謹者專也。

人勤於智者，精不外移，可以攝精。

智在五行屬水，精亦屬水，智者，明真偽是非，專以保真忘偽，則名從是違非也，如此則精不妄泄於外，可以攝養至精也，故云人勤於智者，精不外移，可以攝精也。攝者，養也。

仁則陽而明，可以輕魂，義則陰而冥，可以御魄。

仁在五行屬木，魂亦屬木，仁以靜自利，以慈利他，慈善屬陽，靜則明了，魂神輕清而澄湛也，故云仁則陽而明，可以輕魂也。義在五行屬金，魄亦屬金，洞了真空，與道相真，陰隱窈冥，令尸魄止靜而澄徹也，故云義則陰而冥，可以御魄也。御者，使止也。此章明五常為道之妙用也。

右第十二章

關尹子曰：蜣螂轉丸，丸成，精思之，而有蜣白存丸中，俄去殼而蟬，

蜣螂推糞轉為丸毬，丸毬既成，鑽入土中，抱丸而精一思之，其蜣螂精神

氣俱入丸中，化為蛻白蟲，經秋冬春三時氣含養，得夏火氣薰蒸，出土緣上草木墻壁之類，俄頃之間，從脊裂開，退去皮殼，化而為蟬，飛遊林木，吸風飲露而鳴也。故云蛻螻轉丸，丸成，精思之而有蛻白存丸中，俄去殼而為蟬也。

彼蛻不思，彼蛻奚白。

彼蛻螻不抱糞丸精思之，彼蛻蟲何得生白哉！皆因妄想，而形隨之而變也，故云彼蛻不思，彼蛻奚白也。奚者，何也。此章明生死變化，皆因妄想貪著而有也。

右第十三章

關尹子曰：庖人羹蠃，遺一足机上，蠃已羹，而遺足尚動，是生死者，一氣聚散爾，

庖厨之人，將螃蠏作羹之時，遺留螃蠏一腳足机卓案上，其螃蠏作成羹，而遺留之脚尚自搖動，以此知是生死者，一氣聚散爾，氣聚則生，氣散則死，遺足尚動者，氣未散盡也，故云庖人羹蠃，遺一足机上，蠃已羹，

而遺足尚動，是生死者，一氣聚散爾。

不生不死，而人橫計曰生死。

橫者，妄也，本來面目真空之性，稟自五太之前，五太之前未有一氣，以此明知真空之性不屬氣也，不屬氣者，則無聚散，無聚散者，則無生死也，如此則知不悟性者，但見氣聚成形以為生，氣散形壞以為死，豈不妄計哉，故云不生不死，而人橫計曰生死也。此章明性本無生死，迷人妄計而恐怖也。

右第十四章

關尹子曰：有死立者，有死坐者，有死卧者，有死病者，有死藥者，等死，無甲乙之殊。

世間或有人立地化去者，或有坐地化去者，或有卧地化去者，或有因病重化去者，或有因服毒藥化去者，立坐卧病藥五等之不同，其死則不異也，無甲死者如何、乙死者如何之殊異也。故云有死立者，有死坐者，有死卧者，有死病者，有死藥者，等死，

無甲乙之殊也。

若知道之士，不見生，故不見死。

知者，悟也，悟道之士，洞了真空，心無生滅，反觀四大假合，如塵埃聚沫，如蘆廬賃舍暫寄而已，不見生死之可逃也，故云若知道之士，不見生，故不見死也。此章明道無生死，了道者無生死之可見也。

右第十五章

關尹子曰：人之厭生死超生死者，皆是大患，

患者，病也，迷人不悟道無生死而能生死者，則不生不死也，未悟如此起厭生死之心，擬欲直超生死者，皆是學道之大病也，故云人之厭生死超生死者，皆是大患也。

譬如化人，若有厭生死心，超生死心，止名為妖，不名為道。

化人者，教化人也，譬如為人師範，教化迷人學道，令人生厭離生死之心，超越生死之心，止名為教人學妖，怪不祥之事，豈名為教人學道哉！故云譬如化人，若有厭生死心，超生

死心，止名為妖，不名為道也。此章明了道者無生死之可厭超也。

右第十六章

關尹子曰：計生死者，或曰死已有，或曰死已無，或曰死已亦有亦無，

妄計生死之人，或曰假身如賃舍，舍壞人存，身死性存也，故云計生死者，或曰死已有也。或有人曰，人生一世，草生一秋，人死如燈滅，已死則無有也，故云或曰死已無也。或有人曰，人死無蹤跡，却有附人而通傳者，直疑亦有亦無也，故云或曰死已亦有亦無也。

或曰當喜者，或曰當懼者，或曰當任者，或曰當超者，愈變識情，馳騖不已。或有人曰，生不靈而死靈，生不樂而死樂，惟神之有形，猶形之有疣，苟無其疣，何所不可，如此不亦以死而為喜乎，故云曰當喜者也。或有人曰，人死為鬼，冥冥長夜，無三光之所照，無家鄉之所居，無相識之依託，無飲饌之所食，黑暗陰界，誠可懼也，故云或曰當懼者也。或有人

曰，人之生死，倏然而來，倏然而往，不喜不懼，任其自然，故云或曰當任者也。或有人曰，人之生死，欲超不難，一志學道，直超生死，故云或曰當超者也。向來妄計生死者，言死已有已無，亦有亦無，當喜懼任超之，八人所言^①，愈變妄識，迷情奔馳，驚驟之不止也，故云愈變識情，馳騖不已也。

殊不知我之生死，如馬之手，如牛之翼，本無有，復無無，譬如火水，雖犯火水，不能燒之，不能溺之。

向來妄計生死之人，殊不知本來元無生死，而妄計生死者，如妄計馬有手而妄執，如牛有翼而妄飛，馬牛本來無手翼，而妄計有手翼也，以譬喻則知本來元無有生死，復無無有也，故云殊不知我之生死，如馬之手，如牛之翼，本無有，復無無也。本來真空妙有，與太虛同體，以空合空，如以火投火，不問其明，火不燒火也，以水投水，不問其清，水不溺水也，故云譬如火水，雖犯火水，不能燒

之，不能溺之也。此章明情識不萌，元無生死也。

右第十七章

文始真經註卷之四

①「五當」，當為「五常」之誤。

②「去穀」，誤，《關尹子》和《無上妙道文始真經》皆作「去殼」。

③「惟水之為物」下幾句，《關尹子》和《無上妙道文始真經》皆無。

④此句，當作「在人五神則為神也」，「則人五神」幾字為衍文。

⑤「王神」，當為「五神」之誤。

⑥此句，《關尹子》和《無上妙道文始真經》皆作「皆攝之以一息」。

⑦此句，《關尹子》和《無上妙道文始真經》皆作「知物無物」。

⑧「反彼」，疑為「反被」之誤。

⑨此兩句，《關尹子》和《無上妙道文始真經》皆作「惟五行之數」。

⑩據前之經文，此句當作「皆同識生也」。

⑪此句，《關尹子》作「魂者木也」。

⑫「若夫忘精」，《關尹子》和《無上妙道文始真經》皆作「若夫忘精神」。

⑬「八人所言」，疑當作「人人所言」。

文始真經註卷之五

神峰逍遙子牛道淳直解

五鑑篇

鑑者，心也，凡二十章。

關尹子曰：心蔽吉凶者，靈鬼攝之，心蔽男女者，淫鬼攝之，心蔽幽憂者，沉鬼攝之，心蔽逐放者，狂鬼攝之，心蔽盟詛者，奇鬼攝之，心蔽藥餌者，物鬼攝之。

蔽者，執蔽也，蒙昧也，人心專一執蔽吉凶禍福、五行陰陽者，則有靈通之鬼統攝而蒙昧也，故云心蔽吉凶者，靈鬼攝之也；人心專一執蔽嬰姪夫婦、御女採戰之術，則有淫慾之鬼統攝而蒙昧也，故云心蔽男女者，淫鬼攝之也；人心專一執蔽幽暗憂愁，則沉溺之鬼攝而蒙昧也，故云心蔽幽憂者，沉鬼攝之也；人心專一執蔽逐走放飛畋獵者，則有狂蕩之鬼統攝而蒙昧也，故云心蔽逐放者，

狂鬼攝之也；人心專一執蔽盟誓咒詛者，則奇異之鬼統攝而蒙昧也，故云心蔽盟詛者，奇鬼攝之也；人心專一執蔽修合服食藥餌者，則有藥物之鬼統攝而蒙昧也，故云心蔽藥餌者，物鬼攝之也。

如是之鬼，或以陰為身，或以幽為身，或以風為身，或以氣為身，或以土偶為身，或以彩畫為身，或以老畜為身，或以敗器為身。

如上所說，靈鬼、淫鬼、沉鬼、狂鬼、奇鬼、物鬼，六等之鬼，統攝蒙昧六等執蔽之人也，故云如是之鬼也。鬼無形相，必附託物以為身，或以附託陰影為身，而見形昧人者，故云或以陰為身也；鬼或有附託幽暗以為身，而見形昧人者，故云或以幽為身也；鬼或有附託旋風以為身，而見形昧人者，故云或以風為身也；鬼或有附託陰氣以為身，而見形昧人者，故云或以氣為身也；鬼或有附託土偶塑人以為身，而見形昧人者，故云或以土偶為身也；鬼或有附託

彩畫人物之像以為身，而見形昧人者，故云或以彩畫為身也；鬼或有附託老畜走獸以為身，而見形昧人者，故云或以老畜為身也；鬼或有附託敗壞器物以為身，而見形昧人者，故云或以敗器為身也。

彼以其精，此以其精，兩精相搏，而神應之。彼者，附託陰、幽、風、氣、土偶、彩畫、老畜、敗器八者之鬼也，此者，心蔽吉凶、男女、幽憂、逐放、盟詛、藥餌六者之人也，為此人專一執蔽已上六者之事，精執不移，彼附託鬼之精，與人精兩相激搏，而鬼有靈通神異之應也。故云彼以其精，此以其精，兩精相搏，而神應之也。

為鬼所攝者，或解奇事，或解異事，或解瑞事，其人傲然，不曰鬼于躬，惟曰道于躬。

心執蔽之人，為靈淫沉狂奇物六鬼統攝蒙昧者，或解珍奇之事，或解異怪之事，或解祥瑞之事，預言必應，眾人敬之以為聖，其解奇異瑞事之

人，傲然不言有鬼附於身，唯言至道於身有此靈通也。故云為鬼所攝者，或解奇事，或解異事，或解瑞事，其人傲然，不曰鬼于躬，惟曰道于躬也。

久之，或死木，或死金，或死繩，或死井。

為鬼所攝之人，預解奇異瑞事，傲然以為得道，久之，或自觸樹木而死，或以刀刃自刎而死，或以繩自縊而死，或自投井而死也。故云久之，或死木，或死金，或死繩，或死井也。

惟聖人能神神，而不神於神，役萬神而執其機，可以會之，可以散之，可以禦之，日應萬物，其心寂然。

惟有了道聖人，洞徹真空妙有，了悟不神之神，陰陽莫測，神鬼難窺，化身周遍塵沙界，妙用神通無量，韜晦不顯也，故云惟聖人能神神，而不神於神也。了道聖人能呼召風雨，役使萬神而執機也，執者，把握也。了道聖人不唯能呼召風雨，而役使萬神，更能使可以會而聚之，可以散而

分之，可以禦而止之也，故云可以會之，可以散之，可以禦之也。了道聖人之心，如月印衆水，如風鳴萬籟，如懸鏡鑑形，如空谷傳聲，應變而常寂常明，常清常靜也，故云日應萬物，其心寂然也。此章明心有執蔽皆邪心，無蔽皆道也。

右第一章

關尹子曰：無一心，五識並馳，心不可一，無虛心，五行皆具，心不可虛，無靜心，萬化密移，心不可靜。

無者，禁止之辭也，謂本來妙心，元自不二，垂誠學人無得專心守一，若萌專心守一之念，則守一之念，與視聽食息思之五識相並奔馳，不得一也，以此明了，則知心不可守一也，故云無一心，五識並馳，心不可一也。本來妙心元無一物，等同太虛，垂誠學人無得專心虛廓，若萌專心虛廓之念，與喜火、怒木、思土、憂金、恐水之五行，皆同具足不得虛也。以此明了，則知心不萌虛廓之念也，故云無虛心，五行皆具，心不

可虛也，本來妙心元自清靜，垂誠學人無得專心守靜，若蒙專心守靜之念，與萬化密遷移而不得靜也，以此明了，則知心不可守靜也，故云無靜心，萬化密移，心不可靜也。借能一則二偶之，借能虛則實滿之，借能靜則動搖之。

本來妙心元自不二，於不二妙心，萌守一之念，則守一之念，與不二妙心為二偶對也，故云借能一則二偶之也，此釋心不可一也。本來妙心元無一物，等同太虛，於此無物妙心，萌專虛廓之念，則專虛廓之念，填實滿塞無物之妙心也，故云借能虛則實滿之也，此釋心不可虛也。本來妙心元自清靜，猶如虛空無動無搖，於本靜妙心，萌守靜之念，守靜之念既生，則是動搖妙心也，故云借能靜則動搖之也，此釋心不可靜也。惟聖人能斂萬有於一息，無有一物可役吾之明徹，散一息於萬有，無有一物可間吾之云為。

惟了道聖人之心，猶如太虛，無所不

容，化身億萬，一息之間，返本還源，如一切水月，一真月統攝其水月波流，無有一水可沒溺真月之明徹也，故云惟聖人能歛萬有於一息，無有一物可役吾之明徹也。了道聖人，一息之間，散布化身周遍塵沙界，如一真月普見一切水也，一切水波流不停，無有一切水可間斷真月之光，明云為照耀也，故云散一息於萬有，無有一物可間吾之云為也。此章明本來妙心元自不二，虛靜應變縱奪無妨也。

右第二章

關尹子曰：火千年，俄可滅，識千年，俄可去。

火本無我，因膏因薪而見形，雖千年之久，若俄頃膏薪俱盡，則火亦隨之而滅也，故云火千年俄可滅也，此起喻也。迷人業識忙忙，無本可據，輪迴億劫，不能出離者，皆因此識也。識亦無我，依境而見，雖千萬年之久，若蒙師點化，直下頓悟，本來妙心元自清靜，等同太虛，則俄頃之

間，境忘識去矣，如薪盡火滅也，故云識千年俄可去也。此喻也。此章明識是生死根，境忘識去，出輪迴之要者也。

右第三章

關尹子曰：流者舟也，所以流之者，是水非舟，運者車也，所以運之者，是牛非車，思者心也，所以思之者，是意非心。

人但見舟之流行，殊不知所以使舟流行者，是水流行，非舟自能流行也，故云流者舟也，所以流之者，是水非舟也。人但見車之運行，殊不知所以使車運行者，是牛拽之運行，非車能自運行也，故云運者車也，所以運之者，是牛非車也。此舟車二者借喻也。人但知心之思慮，殊不知所以能思慮者，是意識能思慮，非本來妙心有思慮也，故云思者心也，所以思之者，是意非心也。此合喻也。不知所以然而然，惟不知所以然而然，故其來無從，其往無在。

本來妙心，真空為體，妙有為用，體用如如，應變無窮，神鬼難窺，陰陽莫測，不知所以然而然也。不知所以然而然，本來妙心，元在五太之前，象帝之先，洞然明了，其來不知從何而生來，冥然隱密其往，不知所在而居止，故云不知所以然而然。惟不知所以然而然，故其來無從，其往無在也。

其來無從，其往無在，故能與天地本原，不古不今。

疊上二句，謂本來妙心，不知從何而生來，冥然隱密其往，然不知所在，如此，天地與吾同本原，妙心而生本原，妙心不屬時節，故不古不今也，故云其來無從，其往無在，故能與天地本原，不古不今也。此章明本來妙心稟自五太之前，非思慮之所知也。

右第四章

關尹子曰：知心無物，則知物無物，知物無物，則知道無物，知道無物，故不尊卓絕之行，不驚微妙之言。

本來妙心，以道為體，以物為用，了悟道心，元無一物，等同虛空，體用如如，應變常寂，故云知心無物，則知物無物，知物無物，則知道無物也。知者，悟也，物無物者，應變常寂也。洞悟道心體用無物，故不尊尚卓高絕代之行，為行雖卓絕，不離於跡，道本無跡，故不尊尚也。不驚異精微玄妙之言，為言雖微妙，不離於名，道本無名，故不驚異也。故云知道無物，故不尊卓絕之行，不驚微妙之言也。此章明道心應變常寂，非言之可及也。

右第五章

關尹子曰：物我交心生，兩木摩火生，心本無心，因物而見，物我相交而心生顯見，如兩木相鑽摩而生火也，故云物我交心生，兩木摩火生也。不可謂之在我，不可謂之在彼，不可謂之非我，不可謂之非彼，執而彼我之，則愚。我本無我，因物來干，心忽顯見，非我自生心也，故云不可謂之在我也。

物來相感，心雖顯見，心如虛空，與彼物無礙，故云不可謂之在彼也。若無我者，物雖來感，則心不生，心既有生，不可謂之非我也，故云不可謂之非我也。我未無我，彼物若不來感，則心亦不生，心本不生，因感而生，不可謂之非彼物也，故云不可謂之非彼也。迷人不悟無我無心，與物無礙，而妄立我心，與物作對，執有彼我，觸物有礙，非愚而何，故云執而彼我之則愚也。而者，汝也，執汝彼我而不忘，乃愚迷之人也。此章明心本無彼我，與物無礙，迷人妄立彼我，與物作對也。

右第六章

關尹子曰：無恃爾所謂利害是非，爾所謂利害是非者，果得利害是非之乎，無者，禁止之辭也，恃者，倚賴也，言無得恃賴汝之所言利害是非也，故云無恃爾所謂利害是非也。汝所言利害是非者，皆妄情無計，豈可利定為利，害定為害，是定為是，非定為非，利害是非隨妄情變化，豈可一定

之邪？既不可一定，隨時妄情所計之耳，果何得利害是非者哉！故云爾所謂利害是非者，果得利害是非之乎。

聖人方且不識不知，而況於爾。運化利害是非者，造物也，造物窈冥，莫測其所以，雖聖人大智，圓通於窈冥造物，方且不識不知，而況爾凡乎？故云聖人方且不識不知，而況於爾也。此章明利害是非，造物者運化，凡不可預測也。

右第七章

關尹子曰：夜之所夢，或長於夜，心無時，

長於夜，應作晝，於義則通也，蓋傳寫之悞也。迷人夜間作夢，或夢生長於晝，以此知本來妙心，不屬時之數也，故云夜之所夢，或長於晝，心無時也。

生於齊者，心之所見皆齊國也，既而之宋之楚，之晉之梁，心之所存各異，心無方。

有人生長於齊國，心之所見之境，皆

齊國而已。而者，汝也，之者，往也。既汝往宋國，又往楚晉梁之三國，四國境界不同，心之所存之境亦異，以此知本來妙心，不屬方位也。故云生於齊者，心之所見皆齊國也，既而之宋之楚之晉之梁，心之所存各異，心無方也。此章明本來妙心，不屬時數方位也。

右第八章

關尹子曰：善弓者，師弓不師羿，善舟者，師舟不師稟，

羿者，古人善射之號也，昔帝嚳賜羿弓矢，為司射之官，居窮石之地，至堯時，十日並出，命羿射之，中九日而落之也，後篡夏后相之位，號有窮國君，因羿以為名，其臣寒浞殺之，因有其室而生稟，稟多力，能陸地推舟而行，後為夏后相子少康所殺也。師者，法則也，善射弓者，以弓為法取中也，既以中為則，必以羿為法也，故云善弓者，師弓不師羿也。善操舟者，以舟為法則，務所往無滯為法則也，既以舟所往無滯為則，不必

以稟為法也，故云善舟者，師舟不師稟也，此借喻也。

善心者，師心不師聖。

善悟本來妙心，元自清靜無為，逍遙自在，不染不著，既以善了妙心，以悟為則，不必以聖人為法也，故云善心者，師心不師聖也。此合喻也。此章明心以悟為則，因超凡聖也。

右第九章

關尹子曰：是非好醜，成敗盈虛，造物者運矣，皆因私識執之而有。

以善美為是好，以惡陋為非醜，以事物與榮為成盈，以事物廢枯為敗虛也，殊不知是非好醜成敗盈虛，皆自然造物者所運，吾何容心哉，而迷者執之以為有實，殊不知皆因己私妄識計之也。故云是非好醜成敗盈虛，造物者運矣，皆因私識執之而有也。

於是以無遣之猶存，以非有非無遣之猶存，無曰莫莫爾，無曰渾渾爾，猶存，譬猶昔游再到，記憶宛然，

既知是非好醜成敗盈虛，皆因私識

執之而有，於是以無遣其私識，猶有計無之識尚存，故云於是以無遣之猶存也。又以非有非無遣其計無之識，猶有計非有非無之識尚存，故云以非有非無遣之猶存也，曰莫計非有，莫計非無，故云無曰莫莫爾也。又以無遣之，曰渾然無，莫計非有渾然無，莫計非無，猶有渾渾然無莫計之識尚在，故云無曰渾渾爾猶存也。以識遣識，何異泥裏洗土，以識遣識者，譬如昔日曾游之境，今日再到，忽然記憶，舊之識宛然尚在，終不能忘遣也，故云譬猶昔游再到，記憶宛然也。

此不可忘，不可遣，善去識者，變識為智。

此識不可得而忘，亦不可得而遣，善去識者，洞了真空之心體，以識變為智慧，為心妙有之用也，故云此不可忘，不可遣，善去識者，變識為智也。

變識為智之說，汝知之乎？曰：想如思鬼，心慄，思盜，心怖，曰：識如認黍為稷，認玉為石，皆浮游罔象，無所底

止。

底者，平穩也，向來演變識為智之說，汝還曉知之乎麼，故云變識為智之說，汝知之乎。此設問也，却自答曰：曰想者譬如人思此處有妖鬼，則心悚然戰慄而恐懼，又思此處有強盜，則心怯然而怕怖也。故云曰想如思鬼，心慄，思盜，心怖也，曰識者譬如人妄認黍以為稷者，似黍而黑，又如人妄認玉為石，此迷妄想識，皆浮游無象，無所得悟，本來妙心，真空平穩之地而休歇也。故云曰識如認黍為稷，認玉為石，皆浮游罔象，無所底止也。罔者，無也，止者，休歇也。

譬睹奇物生奇物想，生奇物識，此想此識，根不在我，

向來所說想識，譬如人睹奇異之物，則生異物之想識，此奇異想，本心元無，因睹奇異之想識也，故云譬睹奇物，生奇物想，生奇物識，此想此識，根不在我也。想者，心思也，識者，心別辯也。

譬如今日，今日而已，至於來日想識，殊未可卜，及至來日，紛紛想識，皆緣有生。

先說此想此識，根不在我，恐人信之不及，再設喻以曉之。譬如今日從旦至夕，今日想識之事已知之矣，至於來日想識之事，殊未可預卜度而知之，故云譬如今日，今日而已，至於來日想識，殊未可卜也。及至來日，隨事物旋生紛紛擾擾之想識，以知想識根不在我，皆因有事物而旋生也，故云及至來日，紛紛想識，皆緣有生也。緣者，因也。

曰想曰識，譬如犀牛望月，月形入角，特因識生，始有月形，而彼真月，初不在角，

本來妙心，元無想識，恐人信之不及，復設喻以曉之。譬如犀牛角中元無月形，特因犀牛望月，生此月中之想識，月形入角而始生月形也，而彼天上真月，初不曾在角也。故云曰想曰識，譬如犀牛望月，月形入角，特因識生，始有月形，而彼真月，

初不在角也。

胸中天地萬物亦然，知此說者，外不見物，內不見情。

人胸臆中所懷天地萬物之識，亦如犀牛望月，月形入角也，故云胸中天地萬物亦然也。人能曉知如上所說譬喻者，則外不見物，內不見情也。此章明本來妙心元無情識，皆因心迷，妄生情識也。

右第十章

關尹子曰：物生於土，終變於土，事生於意，終變於意，

萬物生於土，萬物終盡之時，復變化為土，故云物生於土，終變於土也。此起喻也。土在脾神為意，萬事生於意，萬事俱忘，終變為意，故云事生於意，終變於意。此合喻也。

知夫惟意，則俄是之，俄非之，俄善之，俄惡之，意有變，心無變，意有覺，心無覺。

如上所說譬喻，則知萬事有無，惟此意根也，知此意根所生之事，俄頃之間，非化為是，是化為非，惡化為善，

善化為惡也，故云知夫惟意，則俄是之，俄非之，俄善之，俄惡之也。意根有遷變，本來妙心無遷變，意根有知覺，本來妙心無有知覺也，故云意有變，心無變，意有覺，心無覺也。

惟我一心，則意者塵往來爾，事者歛起滅爾，吾心有大常者存。

本來妙心，元自不二，故云惟我一心也。塵者，法也。意根能生萬法，能滅萬法，滅則往，生則來，故云則意者塵往來爾也，若意根不生萬事，如火燒薪，歛然而起，薪盡歛然而滅也，故云事者歛起滅爾也。歛者，速也。大常者，乃本來妙心真空之體，廣無邊際，越古今而無有變異，非存而何，故云吾心有大常者存也。此章明心之大常禦意之小變也。

右第十一章

關尹子曰：情生於心，心生於性，情波也，心流也，性水也，

人之妄情從心上生，心從性上生也，故云情生於心，心生於性也。人迷情如水之波浪，人逐境之心如流動

之水，人之本性如水之源也，波流源有三名而無二體，為波流源皆是水也，情心性有三名而無二體也，為情心性皆是真也，故云情波也，心流也，性水也。

來于我者，如石火頃，以性受之，則心不生，物浮浮然。

萬物來相于吾者，俄頃之間，如電光石火，但以真空之性受之，則心不生，知識物境浮浮然，如太虛之雲，不礙虛空，如空谷傳聲，應變常寂也，故云來于我者，如石火頃，以性受之，則心不生，物浮浮然也。此章明心性不二，應變無礙也。

右第十二章

關尹子曰：賢愚真偽，有識者，有不識者，

世間有真賢真愚，有偽賢偽愚，世人或有能變識，或有不能變識者，故云賢愚真偽，有識者，有不識者也。

彼雖有賢愚，彼雖有真偽，而謂之賢愚真偽者，繫我之識，

彼世間雖是賢愚真偽，而別辯賢愚

真偽者，皆繫我之妄識也，故云彼雖賢愚，彼雖真偽，而謂之賢愚真偽者，繫我之識也。

知夫皆識所成，故雖真者亦偽之。

若知別辯賢愚真偽，皆妄識所成，識既是妄，故雖真實，亦名假偽不真也，故云知夫皆識所成，故雖真者亦偽之也。此章明妄識非真心也。

右第十三章

關尹子曰：心感物不生心，生情，物交心不生物，生識，物尚非真，何況於識，識尚非真，何況於情。

本來妙心元自清靜，因物所感也，心本無生，而所以生者情也，故云心感物不生心，生情也。一切物來交于於心，心別變物者非物也，乃心之識見也，故云物交心不生物，生識也。一切物境幻生幻滅，尚猶虛妄，何況於識，豈不為妄偽哉，故云物尚非真，何況於識也。既知識是妄偽，何況於情豈不是妄哉，故云識尚非真，何況於情也。

而彼妄人，於至無中執以為有，於至變

中執以為常，

而彼衆迷妄之人，於本來至真妙心元無一物之中，忽生妄識，堅執為有，染著不捨，不能明了本心也，故云而彼妄人，於至無中執以為有也。彼迷妄衆人，於妄識生滅不停、逐境變化之識神中，堅執為本心之大常，噫，殊不知此妄識之神，乃輪迴之種也，故云於至變中執以為常也。

一情認之積為萬情，萬情認之積為萬物，物來無窮，我心有際。

本來清靜妙心上，忽生一迷情，不覺是妄，認以為真，情情旋生，新新嗣緒，乃積之為億萬之情也，故云一情認之積為萬情也。迷人於萬億之情，又不覺是妄，而認妄為真，染著物境，念念遷流，情波浩渺，積之億萬物境也，故云萬情認之積為萬物也。際者，邊境也。本來妙心猶如虛空，廣無邊際，為妄識迷情專權，間截虛空，妄立境界，限量邊際，迷染萬物，而逐無窮物遷流也，故云物來無窮我心有際也。

故我之良心受制於情，我之本情受制於物，可使之去，可使之來，

心迷逐情，妄立境界，不由了悟良妙之心，專由迷妄之情驅使，是本來良妙之心，倒受制於迷妄之情，如臣反拘制君也，故云故我之良心受制於情也。我之本來正情既迷染萬物，倒被萬物驅使，是本來正情受制於萬物，如百姓反拘制大臣也，故云我之本情受制於物也。心迷逐情，情迷染物，迷情妄染物境，限盡死後，被愛染物境牽引，愛染重處受生，生死死死，百千萬劫輪迴，無有出期，去來不已也，故云可使之去，可使之來也。

而彼去來，初不在我，造化役之，因無休息。

人之五情，則屬五行也，五情者，喜屬火，怒屬木，思屬土，憂屬金，恐屬水。五情既屬五行，五行陰陽造化陶鎔天地萬物，驅役死生去來，無有休息之期也，究其所以，皆因五情迷妄，而有此去來死生，五情未萌之

前，安有死生去來哉。以此知而彼去來初不在我，皆因迷情妄染，落於五行造化，陶鑄中，役使輪迴因無休息也，故云而彼去來初不在我，造化役之，因無休息也。

殊不知天地雖大，能役有形，而不能役無形，陰陽雖妙，能役有氣，而不能役無氣。

迷人妄染愛境，被天地陰陽造化役使，輪迴無休，殊不知迷情未萌之前，本來良妙之心，猶如虛空無形，雖天地陰陽造化之大，但能役使迷染有形之情，豈能役使如虛空良妙之心哉，故云殊不知天地雖大，能役有形，而不能役無形也。迷情既萌，元氣隨之，則落陰陽造化役使輪迴也，迷情未萌，元氣返本，與真空同體，陰陽造化雖妙，豈能役使真空哉。故云陰陽雖妙，能役有氣，而不能役無氣也。

心之所之，則氣從之，氣之所之，則形應之，

之者，往也。心之所往，則氣從之而

往也，心猶帥也，氣猶軍也，氣之從心，如衆軍從帥也，故云心之所之，則氣從之也。心迷妄愛，染著諸境，氣亦從之，而有此輪迴之身形也，故云氣之所之，則形應之也。

猶如太虛，於至無中變成一氣，於一氣之中變成萬物，而彼一氣，不名太虛。

道本無名無形，猶如太虛，能運一氣，一氣分而為陰陽，一氣陰陽變化天地萬物，既名一氣，不名太虛，無形名之道也，而況於萬物乎。故云猶如太虛，於至無中變成一氣，於一氣中變成萬物，而彼一氣不名太虛也。此起喻也。

我之一心，能變為氣為形，而我之心無氣無形，

吾之本來良妙之心，以真空為體，思慮未萌之前，體同太虛，思慮既萌，所之則氣從之，氣之所之則形應之，如太虛中變成一氣，於一氣中變成萬物也，故云我之一心，能變為氣為形也。思慮未萌之前，本來良妙之心，元無氣無形也，故云而我之心無

氣無形也。

知夫我之一心，無氣無形，則天地陰陽不能役之。

知者，悟也。了悟本來不二之良心，猶如太虛未變為氣為形之時，未有天地陰陽，令誰役之？假使有天地陰陽，豈能役使虛空哉，故云知夫我之一心，無氣無形，則天地陰陽不能役之也。此章明心迷墮，陰陽陶鑄而輪迴不已，心悟出陰陽陶鑄，永不輪迴也。

右第十四章

關尹子曰：人之平日，目忽見非常之物者，皆精有所結而使之然，

人之平安之日，目忽然見非常奇異之物境者，皆是精神與物境凝結，而忽然使之變化如此之異也，故云人之平日，目忽見非常之物者，皆精有所結而使之然也。

人之病日，目忽見非常之物者，皆心有所歉而使之然。

人之患熱病之日，被熱氣所燒而眼花，忽然見非常奇異之物境，皆是熱

病所燒，而心不足使然也，故云人之病日，目忽見非常之物者，皆心有所歉而使之然也。歉者，不足也。

苟知吾心能於無中示有，則知吾心能於有中示無，

苟者，識也，知者，悟也。如上所說，平日病日，目忽見非常之物，以此誠能了悟本來妙心元無一物，等同太虛，皆於無中示見非常之有，以此了悟即非常之有，昭示本來無物之妙心也，故云苟知吾心能於無中示有，則知吾心能於有中示無也。

但不信之，自然不神。或曰厥識既昏，孰能不信？我應之曰：如捕蛇師心不怖蛇，彼雖夢蛇，而不怖畏，

若人平日或病日，目忽見非常鬼神怪異之境，但悟本心清靜元無一物，一切有相，皆是虛妄，如此則明了，不信不著，彼怪自然不呈神異也，故云但不信之，自然不神也。厥者，其也，孰者，誰也。或有人問其識情既昏昧，妄見非常神鬼奇異，誰便能不信哉，故云厥識既昏，孰能不信？此

設問也，却自答曰：譬如能以法禁蛇之師，捕捉其蛇，心不怕蛇，彼雖睡夢見蛇，亦無怕怖畏懼之心也，以此明了，則知但不信之，自然不神也。故云應之曰：如捕蛇師心不怖蛇，彼雖夢蛇，而無畏怖也。此答上問也。

故黃帝曰：道無鬼神，獨往獨來。

以捕蛇譬喻答或問之人，恐信之不及，又引軒轅黃帝書中所載之言以證之。黃帝書中，有言道無鬼神，鬼屬陰，神屬陽，妙道不屬陰陽，故無鬼神也，假使有鬼神，亦不能窺妙道也，妙道運幹，陰陽往來，而陰陽不能對偶於道也，故云故黃帝曰，道無鬼神，獨往獨來也。此章明隨流得妙心悟妙道，鬼神不能測也。

右第十五章

關尹子曰：我之思慮日變，有使之者，非我也，命也，苟知惟命，外不見我，內不見心。

我本無我，因識妄立，思慮營營，日千變萬化，本非無我之我也，乃是

不知所以然而然之命運化思慮也，故云我之思慮日變，有使之者，非我也，命也。命者，不知所以然而然也，使者，運化也。誠能了悟不知所以然而然，乃是真空之道也，命者，道之異名也，了悟真空之道，則外無我相可見，內無心相之可見也，故云苟知惟命，外不見我，內不見心也。此章明我心本空，道非思慮可及也。

右第十六章

關尹子曰：譬如兩目，能見天地萬物，暫時回光，一時不見。

真空心體，元無一物，窈冥莫測，忽生思慮妄有，所見了然，回光返於真空，譬如人之兩目，能觀見天地萬物之形狀，暫時收回眼光，一時俱不見天地萬物也。故云譬如兩目能見天地萬物，暫時回光，一時不見也。此章釋前章思慮日變，命使之然也。

右第十七章

關尹子曰：目視雕琢者，明愈傷，耳聞交響者，聰愈傷，心思玄妙者，心愈傷。

目徹視為明，目專視雕琢金玉精巧

花樣，久視不已，而愈傷其明，經云：五色令人目盲是也，故云目視雕琢者，明愈傷也。耳徹聽為聰，耳專聞五音交響，久聽不已，愈傷其聰，經云：五音令人耳聾是也，故云耳聞交響者，聰愈傷也。玄妙之法為塵，心本清靜，元無一法，即是玄妙之源也，不悟本心，專思古人玄妙之法，殊不知玄妙之法俱是塵垢，染汙本心愈甚傷心也，經云滌除玄覽是也，故云心思玄妙者，心愈傷也。此章明本來妙心，不屬六塵也。

右第十八章

關尹子曰：勿以我心揆彼，當以彼心揆彼，

勿者，禁止之辭也，揆者，忖度揣量也。垂誠學道之人，寓遊於世，勿得有心忖度揣量彼人，或有人用，當因人之賢而賢之，因人之愚而愚之，以此進退於人，不失人心也，故云勿以我心揆彼，當以彼心揆彼也。知此說者，可以周事，可以行德，可以貫道，可以交人，可以忘我。

人能知此無心，因彼揆彼賢愚進退，而賢愚進退無心不失人心也，如此，何事不周備，何德不行普，何道不貫通，何人不交友，何我不忘哉，唯了心一法盡善盡美也。故云知此說者，可以周事，可以行德，可以貫道，可以交人，可以忘我也。此章明無心寓世，自利利他，衆美從之也。

右第十九章

關尹子曰：天下之理，小不制至於大，大不制至於不可制^③，

凡在天之下，所有事理，譬如水火，涓涓不塞，漸成江河，熒熒不救，炎炎奈何。又如積木成林，積石成山，積惡成禍，可不慎歟！故云天下之理，小不制至於大，大不制至於不可制也。

故能制一情者，可以成德，能忘一情者，可以契道。

故者，因上結下之辭也，制者，治也。人能於一情萌起之時治之，令正而向善，如此，可以成德行也，故云故能制一情者，可以成德也。人能於

一情萌起之時，了然照破而忘之，則契於無極妙道也，故云能忘一情者，可以契道也。此章明為凡為聖，在一情之迷悟也。

右第二十章

文始真經註卷之五

①「我未無我」，疑為「我本無我」之誤。

②「惟我一心」，《關尹子》和《無上妙道文始真經》皆作「惟一我心」。

③「小不制至於大」二句，《關尹子》和《無上妙道文始真經》皆作「小不制而至於大，大不制而至於不可制」。

文始真經註卷之六

神峰逍遙子牛道淳直解

六七篇

匕者，食也，食者，形也。凡一十六章。

關尹子曰：世之人以我思異彼思，彼思異我思，孰為我，孰為我？

彼者，人也。世之迷人，以我之思慮異人之思慮，謂人之思慮，亦與我思慮不同，如此分別人我，妄生見解，殊不知妄生思慮彼此，天真隨思慮之妄境作夢也，不獨夜間睡夢為夢，至於白日，性隨妄慮皆是夢也，豈可以思夢想異所思所夢之境不同，而所謂之思夢者不異也，以此論之，誰為我，誰為人哉。故云世之人以我思異彼思，彼思異我思，孰為我，孰為人也。

世之人以我痛異彼痛，彼痛異我痛分

人我者，殊不知夢中人亦我痛異彼痛，彼痛異我痛，孰為我，孰為人？

世之迷人，以我疼痛相異，如二人同灸，灸處不同，而疼痛不異也，豈可以疼痛妄分同異人我哉，殊不知夢中之人，亦以疼痛相異，及至覺來，却又無別人，如此則知夢中疼痛是妄識，白日疼痛亦是妄識，如此，誰為我，誰為人哉？故云世之人以我痛異彼痛，彼痛異我痛分人我者，殊不知夢中人亦我痛異彼痛，彼痛異我痛，孰為我，孰為人也。

爪髮不痛，手足不思，亦我也，豈可以思痛異之。

先說思痛妄幻不異，恐人信之不及，又設譬喻以曉之。如人之爪甲與頭髮，剪之不害疼痛，又如人手共脚不思慮，爪髮手脚皆我所有，不痛不思，豈可以思痛妄分人我哉。故云爪髮不痛，手足不思，亦我也，豈可以思痛異之也。

世之人以獨見者為夢，同見者為覺，殊不知精之所結，亦有一人獨見於晝者，

神之所合，亦有兩人同夢於夜者，二者皆我精神，孰為夢，孰為覺？

世之迷人，以獨自所見之境，他人不見者，以為是夢，眾人同見之境，以為覺也，故云世之人以獨見者為夢，同見者為覺也。殊不知人之精與物凝結，正晝日忽見非常之境，亦他人不得見，唯我獨見之，以此知不獨夜夢為夢也，故云殊不知精之所結，亦有一人獨見於晝者也。以我之神與彼之神相合，亦有兩箇人同夢於夜也，以此知同見未必為覺也，故云神之所合，亦有兩人同夢於夜者也。

精結獨見，神合同見，二者皆我之精神變化，而妄生同異之境，以此知誰為夢，誰為覺，夢是妄夢，覺是妄覺，覺夢皆妄，奚有彼此之異哉。故云二者皆我精神，孰為夢，孰為覺也。

世之人以暫見為夢，久見為覺^①，殊不知暫之所見者，陰陽之氣，久之所見者，亦陰陽之氣，二者皆我陰陽，孰為夢，孰為覺？

世之迷人，以夜夜暫見之境以為夢，

以日日久見之境以為覺也，故云世之人，以暫見為夢，久見為覺也。殊不知夜間暫見之夢境，乃是精神魂魄陰陽之氣變化所成，晝中久見之境，亦是精神魂魄陰陽之氣妄有色塵之見也，故云殊不知暫之所見者，陰陽之氣，久之所見者，亦陰陽之氣。暫見久見二者，皆是精神陰陽之氣變化識見，識見既妄，覺夢非真，以此知孰為之夢，孰為之覺哉，非有真覺者，不知此妄覺夢也，故云二者皆我陰陽，孰為夢，孰為覺也。

此章明迷人夢覺皆妄也。

右第一章

關尹子曰：好仁者，多夢松柏桃李，好義者，多夢兵刀金鐵，好禮者，多夢簋簠豆，好智者，多夢江湖川澤，好信者，多夢山嶽原野，役於五行，未有然者^②。

仁屬木，人專好行仁慈，識神多夢松柏桃李之木也，故云好仁者，多夢松柏桃李也。義屬金，人專好行義宜^③，識神多夢兵刀金鐵之金也，故

云好義者，多夢兵刀金鐵也。禮屬火，禮者，儀則也，人專好行禮儀，識神多夢燒荒烈焰，或夢簠簋豆祭器儀則之物也，故云好禮者，多夢簠簋豆也。簠者，以竹為之，內外皆圓也，簋者，以竹為之，外圓內方也，籩者，外方內圓，以盛乾物，豆者，以木為之，以盛濕物也。已上四物，皆以紅漆漆之，按火色也。智屬水，人專好行智以別真偽者，識神多夢江湖川澤之水也，故云好智者多夢江湖川澤也。信屬土，人專好行信實不妄，識神多夢山嶽原野之土也，故云好信者，多夢山嶽原野也。然人專好仁木、義金、禮火、智水、信土，役於五常，夢此五行之偏也，故云然。

夢中或聞某事^①，或思某事，夢亦隨之^⑤，五行不可拘。

晝為妄想，夜為妄夢，方其夢中，忽聞某事，忽思某事，念逐境遷，夢亦隨之，以此心偏執於五行，心不偏執，五行亦不可得而拘之，故云夢中

或聞某事，或思某事，夢亦隨之，五行不可拘也。

聖人御物以心，攝心以性，則心同造化，五行亦不可拘。

御物者，皆用也，聖人以真空之性為心之體，以妙有之物為心之用，體用如如，應變常寂，上與造物者同游，下與外死生無終始者為友，而陰陽五行不可得而拘也。造化者，造物也。故云聖人御物以心，攝心以性，則心同造化，五行亦不可拘也。御物以心者，以心御物為用也，攝心以性者，以心攝還真空之性為體也。此章明心迷，被五行拘之，心了，出五行之拘也。

右第二章

關尹子曰：汝見蛇首人身者，牛臂魚鱗者，鬼形禽翼者，汝勿怪，

汝者，普指世間人也。世間人，或見人生頭似蛇而人身者，或見人生臂似牛上有鱗如魚者，或見人生似鬼形狀而兩腋有翅如禽翼者，汝世人勿怪，如古人伏犧蛇身人首，神農牛

首而人身，岑彭鬼面，此中國之共知也。如東方朔所載四夷之人，西北荒有人，面目手足皆人同，而兩腋有翼而不能飛者，西南荒有人，身毛猪頭者，東北荒有人，朱髮蛇身人面，而無手足者，南荒有人，口如鳥而有翼，能飛無足者，西荒有人，如虎長毛，人面虎足獠牙，尾長一丈八尺者，西北荒又有人，狀如虎而食人，有翼而能飛，知人言語，此皆感陰陽錯戾之氣，而有非常之形，豈足怪哉，故云汝見蛇首人身者，牛臂魚鱗者，鬼形禽翼者，汝勿怪也。

此怪不及夢，夢怪不及覺，有耳有目，有手有臂，怪尤矣。

向之所說人生非常之形，不足為怪，此怪不及夢。只此一人，及其睡也，夢見諸般異境，人物天地，山川草木，樓臺禽獸，或祥瑞奇異，忽然覺來，一切皆空，不知是箇甚麼物，便能作諸般夢境，此誠可怪也，故云此怪不及夢也。覺來看人，一塊肉團，有耳能聞聲，有目能觀色，有手能把

物，有臂能運動，無線索抽牽，是誰主張，便能恁麼云為中節恰好，此怪尤甚，而世人不知怪也，故云夢怪不及覺，有耳有目，有手有臂，怪尤矣也。

大言不能言，大智不能思。

究其六用之源，乃無名無情，真空妙有之道也，無名則大言不能言也，無情則大智不能思也，當於言思未萌之前薦悟，洞然心開，方曉大常御諸小變，向之所怪亦未是也，故云大言不能言，大智不能思也。此章明大常御小變，百姓日用而不知也。

右第三章

關尹子曰：有人問於我曰，爾何族何氏，何名何字，何衣何食，何友何僕，何琴何書，何古何今？我時默然不對一字。

或有人問曰：爾之宗族何姓氏，諱何名，表德何字，故云有人問於我曰：爾族何氏，何名何字也。又問：爾穿何衣服，喫何飲食，與何人為朋友，使何人為奴僕，撫何等琴，

看何等書，師何古人理，行何今人事？我默然不答一字，蓋密示不言之教也。故云何衣何食，何友何僕，何琴何書，何古何今？我時默然不對一字也。

或人叩之不已，我不得已應之曰：尚自不見我，將何為我所。

密示向上一機，其人不悟，又叩之不已，又不得已而應之曰：自己尚猶不見我，真空之上將何為我所哉，故云尚不見我，將何為我所也。

右第四章

關尹子曰：形可分可合，可延可隱，一夫一婦可生二子，形可分，一夫一婦二人成一子，形可合，食巨勝則壽，形可延，夜無月火，人我^①，形可隱。

人得道之深者，骨肉都融，形神共妙，可分之為億萬不為足，可合之為一不為有餘，永劫不壞，形可延也，冥冥莫測，形可隱也，故云形可分可合，可延可隱也。恐人信之不及，以俗譬喻曉之。於世俗一夫一婦雙生二子，此形可分之象也，一夫一婦二

人交合生一子，此形可合之象也，人服食巨勝子則壽長，此形可延之象也，夜無月火，人不見己，此形可隱之象也。故云一夫一婦可生二子，形可分，一夫一婦二人成一子，形可合，食巨勝則壽，形可延，夜無月火，不見我，形可隱也。巨勝，小者名胡麻，大者巨勝，出潞州上黨縣，多生原野，其高三尺餘，其子類牛荊子而小，蒼黑色，八月中採之，仙人作飯，食之長生，昔韓衆服之百歲，纔服壽延千歲，莫知其終也。

以一氣生萬物，猶棄髮可換，所以分形，以一氣合萬物，猶破唇可補，所以合形，以神存氣，以氣存形，所以延形，合形於神，合神於無，所以隱形。汝欲知之乎，汝欲為之乎。

向來以俗譬喻，曉於學人，復以真實妙道之用示之。得道之深者，形神俱妙，變化莫測，以一氣化生億萬之形物，如人頭髮，旋落旋生而無窮，此乃形可分之理也，故云以一氣生萬物，猶棄髮可換，所以分形也。斂

一氣億萬化身之形物，復合而為一身，猶如人破唇可補為無缺，此乃形可合之理也，故云以一氣合萬物，猶破唇可補，所以合形也。以不神之神，虛寂妙湛，則元氣沖和，永無耗散，久之形神俱妙，長生不死，此乃形可延之理也，故云以神存氣，以氣存形，所以延形也。以形合神，以神合無極妙道，窈冥不見，神鬼難窺，陰陽莫測，此乃形可隱之理也，故云合形於神，合神於無，所以隱形也。如此妙道，汝之學人，欲願知之乎？麼，汝之學人，欲喜為之乎？此道不可以知，知亦不可以有為而得也，在人心了悟密契而已，故云汝欲知之乎，汝欲為之乎。此章明了道者，分合延隱而無礙也。

右第五章

關尹子曰：無有一物不可見，則無一物非吾之見，無有一物不可聞，則無一物非吾之聞。

世間物物之形，乃色塵也，道眼大開，無物不見，見見皆道也，故云無

有一物不可見，則無一物非吾之見也。世間物物動鳴，乃聲塵也，天聰大開，無聲不聞，聞聞皆道也，故云無有一物不可聞，則無一物非吾之聞也。

五物可以養形，無一物非吾之形，五味可以養氣，無一物非吾之氣，是故吾之形氣，天地萬物。

五行推遷，陰陽造化，而生稜房芒角穗之五穀，以養人形，天地萬物之形，因陰陽五行造化而有，吾形亦因陰陽五行造化而有，以此論之，天地之間，無一物非吾之形也，故云五物可以養形，無一物非吾之形也。以五行之氣，造化酸鹹甘辛苦之五味，人食之，保養五臟之氣，萬物因五行之氣而有，吾之身亦因五行之氣而有。以此論之，則無一物非吾之氣，如上所說，則天地萬物皆吾形吾氣也，故云五味可以養氣，無一物非吾之氣，是故吾之形氣，天地萬物也。此章明天地與我並生，萬物與我為一也。

右第六章

關尹子曰：耕夫習牛則獷，獵夫習虎則勇，漁夫習水則沉，戰夫習馬則健，萬物可以為我^⑦。

獷者，犷也，剛悍愚戇也。耕種之夫，使牛久，共牛近，習性剛悍愚戇，故云耕夫習牛則獷也。畋獵之夫，逐殺虎豹久，共虎近，習性勇猛大膽也，故云獵夫習虎則勇也。漁取水族之夫，久近於水，習性能沉沒於水而取物也，故云漁夫習水則沉也。征戰之夫，慣騎駿馬久，近於馬，習性便捷輕健也，故云戰夫習馬則健也。人性本來清靜，但因習情染執久同物性，如上所說，習牛習虎習水習馬之四者，則獷則勇則沉則健，豈不以物性習為我之情性也，故云萬物可以為我也。

我之一身，內變蟻蚘，外蒸虱蚤，瘕則龜魚，瘦則鼠蝮，我可為萬物。

蟻者，腹中細蟲也。蚘者，腹中大蟲也，一名蠓蚘也，因所食相感陰陽之氣，變生蟻蚘蟲也，虱子垢蚤，因身

外衣暖，游汗薰蒸而生也。瘕者，瘡也。昔人生瘡於背，徐生一龜，引首嚙肉，苦痛而死也。昔人生瘡於腰，徐生一魚，每動則不勝其痛也。瘕者，亦瘡也，人生瘡於項，有肉鼠也，昔有一僧，嫌蝘緣循於欄楯，以火燒之俱盡，不數日，僧生一瘡，潰開皆蝘也。人身內變蟻蚋之蟲，身外薰蒸生蟲子垢蚤，感疾生瘡，或為龜為魚，為鼠為蝘之七蟲，以此知我亦可為萬物也。故云我之一身內變蟻蚋，外蒸蟲蚤，瘕則龜魚，瘰則鼠蝘，我可為萬物也。此章明有我則物為我，而我為物，無我則造化莫能移也。

右第七章

關尹子曰：我之為我，如灰中金，而不若礦砂之金，破礦得金，淘砂得金，揚灰終身，無得金者。

我者，能所自專之心也，心如火而無我，因膏因薪而見火之形，膏薪若盡，而火為灰矣，心本無我，因境而見境，忘心滅無能所自專之我也，故

云我之為我，如灰中金也。灰中無金，則灰心無我也。礦者，金樸也，礦砂喻六塵也，六塵者，色聲香味觸法也，而不若礦砂之金者，以喻我心也。如要取金，向礦砂尋之可得金也，破鍊其礦，淘去其砂，必得其金，若播揚其灰，直饒終老此身，無得其金也。此喻心本無我，因六塵而見也，如要見心，向六塵諦觀則見心，流因流悟，源隨流得之妙也，若六塵淨盡，心復真空，直饒天眼龍睛亦視之不見，況於凡乎，故云不若礦砂之金，破礦得金，淘砂得金，揚灰終身，無得金者也。此章明我本無我，因境妄立也。

右第八章

關尹子曰：一蜂至微，亦能游觀乎天地，一鰕至微，亦能放肆乎大海。

蜂鰕喻人，天地大海喻大道也。蜂鰕微小，亦能游觀乎天地之間，放肆乎大海之內，人雖微小，亦能了其大道，廣無邊際，超凡越聖，迥出陰陽之外也。故云一蜂至微，亦能游觀

乎天地，一鰕至微，亦能放肆乎大海也。游觀、放肆者，皆自得優游也。此章明人雖微小，能了大道也。

右第九章

關尹子曰：土偶之成也，有貴有賤，有士有女，其質土其壤土人哉。

土偶者，以泥塑人像也。塑成人像，或為官人，或為奴僕，或為男子，或為女人，俱是泥土塑成之形質，人之見識，隨形相而生分別貴賤男女也。噫，殊不知俱是泥土，何妄分貴賤男女哉！此喻人雖有貴賤男女之身，俱是地水火風之四大假合，如塵埃聚沫，何妄分貴賤男女哉！故云土偶之成也，有貴有賤，有士有女，其質土其壤土人哉也。此章明人迷假合，妄分貴賤男女也。

右第十章

關尹子曰：目自觀，目無色，耳自聽，耳無聲，舌自嘗，舌無味，心自揆，心無物，衆人逐於外，賢人執於內，聖人皆偽之。

目是根，色是塵，目離塵返照，方悟

日本清靜，元無色塵也，故云目自觀，目無色也。耳是根，聲是塵，耳離塵返聽，方悟耳本清靜，元無聲塵也，故云耳自聽，耳無聲也。舌是根，味是塵，舌離塵返嘗，方悟舌本清靜，元無味塵也，故云舌自嘗，舌無味也。心是根，物者法也，法是塵，心離塵返自揆度忖量，方悟心本清靜，元無物法塵也，故云心自揆，心無物也。一切衆生，染著六塵，逐緣外事而迷真也，故云衆人逐於外也，賢人捨離外事，執守內理，因有取捨，執守內理，却成理障而違道也，故云賢人執於內也。聖人外不染六塵，則悟事障之偽妄也，內不取捨執守於理，則悟理障之偽妄也，故云聖人皆偽之也，蓋不住三際也。此章明心本清靜，不住三際中邊也。

右第十一章

關尹子曰：我身五行之氣，而五行之氣，其性一物，人身五臟之氣，肝氣屬木，內隱魂也，心氣屬火，內隱神也，肺氣屬金，

內隱魄也，腎氣屬水，內隱精也，脾氣屬土，內隱意也，精神魂魄意，五神復性，乃五氣朝元也。故云我身五行之氣，而五行之氣，其性一物也。言五神復性，五氣朝元，總為不二也。妙性也，物者性之妙用也。借如一所，可以取火，可以取水，可以生木，可以凝金，可以變土，其性含攝，元無差殊。

既是五神復性，五氣朝元，是一性又復能生神火、精水、魂木、魄金、意土也，為五神復性，五氣朝元，即是性中含攝五行，元無差殊之異也。故云借如一所，可以取火，可以取水，可以生木，可以凝金，可以變土，其性含攝，元無差殊也。

故羽蟲盛者，毛蟲不育，毛蟲盛者，鱗蟲不育，知五行互用者，可以忘我。

五蟲言其三者，其二可知也，五蟲者，鱗、羽、毛、甲、倮也。羽蟲屬火，毛蟲屬金，正盛旺時，則金不生也，故云羽蟲盛者，毛蟲不育也。育者，生也。毛蟲屬金，鱗蟲屬木，金正盛

旺時，則木不生也，故云毛蟲盛者，鱗蟲不育也。以此則知鱗蟲盛者，倮蟲不育，倮蟲屬土，木旺土不生也。倮蟲盛者，甲蟲不育，甲蟲屬木，土旺木不生也。甲蟲盛者，羽蟲不育，水旺火不生也。以此則知心不生，則意不育，意不生，則魄不生，魄不生，則精不生，精不生，則魂不生，魂不生，則神不生，神不生，則心不生，心不生，則無我可忘也，故云知五行互用者，可以忘我也。此章明道為五行祖，性為五神之源也。

右第十二章

關尹子曰：枯龜無我，能見大知，磁石無我，能見大力，鐘鼓無我，能見大音。舟車無我，能見遠行。

無我者，無心也，枯乾龜殼而無心，人以誠鑽之，則兆知未來之吉凶，非大知而何，故云枯龜無我，能見大知也。磁石無心，稍近於針，則吸針相著，非大力而何，故云磁石無我，能見大力也。鐘鼓無心，撞之搗之，其聲遠振，非大音而何，故云鐘鼓無

我，能見大音，舟車無心，因水因牛載物到遠，非遠行而何，故云舟車無我，能見遠行也。

故我一身雖有知有力，有音有行，未嘗有我。

聖人無心，無知無不知，洞徹物理，無力無不力，衆魔不敢侵，無音無不音，威音盡妙，無行無不行，頃刻遊遍十方，而未嘗有我有心也。故云故我一身雖有知有力，有音有行，未嘗有我也。此章明無我之道，盡善盡美也。

右第十三章

關尹子曰：蜮射影能斃我，知夫無知者亦我，則普天之下，我無不在。

蜮者，水蟲名也，一名短弧，一名水弩，其狀如鼈，三足長三五寸，多生南方，含沙射人影，能令人死，故云蜮射影能斃我也。以此則知影本無知，蜮但射影能令人死，是知無知亦我也。若知無知亦我，則知溥天之下，有識無情無非是我也，我者，無我之我，體同虛空，無所不在也，故

云知夫無知者亦我，則溥天之下，我無不在也。此章明無我之我，即是妙道，妙道無所不在也。

右第十四章

關尹子曰：心憶者猶忘飢，心忿者猶忘寒，心養者猶忘病，心激者猶忘痛。

人心憶著於事，猶能終日忘於飢餒也，故云心憶者猶忘飢也。人當嚴凝冰雪之時，忿然心火暴發，裸身袒臂於露地，汗流浹體，猶能忘於寒冷也，故云心忿者猶忘寒也。世之君子得養心之術，遇一切危亡，或染篤疾病，亦不動心介懷，如此猶能忘於病疾也，故云心養者猶忘病也。二人互相激發，心怒相擊，殘傷肢體，而不覺疼痛，故云心激者猶忘疼痛也。

苟吸氣以養其和，孰能飢之？存神以滋其暖，孰能寒之？養五臟以五行，則無傷也，孰能病之？歸五臟於五行，則無知也，孰能痛之？

先說世人有心，但因憶忿養激之四者，猶能忘飢寒病痛，何況無心了道

者乎。了道無心，元氣沖和，綿綿呼吸，能一日百食，百日一食而不飢也，故云苟吸氣以養其和，孰能飢之也。孰者，何也。了道無心，精神永固，真火薰蒸能敵嚴寒也，故云存神以滋其暖，孰能寒之也。了道無心，百脉調暢，五臟安和，五神澄徹，五氣氤氳，百病不生也，故云養五臟以五行，則無傷也，孰能病之也。了道無心，心肝脾肺腎，歸屬火木土金水，忘其知識，白刃臨項，不懼不痛，如剪髮去垢，何疼痛之有哉，故云歸五臟於五行，則無知也，孰能痛之也。此章明飢寒病痛，有我而難逃，了道無心，超飢寒病痛之苦也。

右第十五章

關尹子曰：人無以無知無為者為無我，雖有知有為，不害其為無我，

先說枯龜、磁石、鐘鼓、舟車無我，恐人一向認無知無為以為無我，又垂誠學人，無得認以無知無為，如同死物，方名無我，如此，則黑山下鬼窟裏作活計也。殊不知無知無不知，

無為無不為，寂然不動，感而遂通，雖知雖為，何妨以為無我哉，故云人無以無知無為者為無我，雖有知有為，不害其為無我也。

譬如火也，躁動不停，未嘗有我。

既說了有知有為，不害其為無我，恐人信之不及，又說譬喻以曉之。如火本無我，因薪見形，火之發也，躁動緣燒不停，火未曾有我也，如真空應變，常寂而無我也，故云譬如火也，躁動不停，未嘗有我也。此章明真空無我不拘，知為有無也。

右第十六章

文始真經註卷之六

①此二句，《關尹子》作「世之人以暫見者為夢，久見者為覺」。

②此句，《關尹子》和《無上妙道文始真經》皆作「未有不然而者」。

③「人專好行義宜」，當為「人專好行義者」之誤。

④此句，《關尹子》和《無上妙道文始真經》皆作「然夢中或聞某事」。

⑤此句，《關尹子》和《無上妙道文始真經》皆作「夢亦隨

變」。

⑥「人我」句，《關尹子》和《無上妙道文始真經》皆作「人不見我」。

⑦此句，《關尹子》和《無上妙道文始真經》皆作「萬物可為我」，無「以」字。

文始真經註卷之七

神峰逍遙子牛道淳直解

七釜篇

釜者，化也，凡十三章。

關尹子曰：道本至無，以事歸道者，得之一息，事本至有，以道運事者，周之百為。

無者，真空也，至道本來真空，以用復體，一喘息之間了悟也，故云道本至無，以事歸道者，得之一息也。事者，用也，有者，妙有也。以妙有為用也，即體即用，應化無窮也，故云事本至有，以道運事者，用之百為也。

得道之尊者，可以輔世，得道之獨者，可以立我。

尊者，極貴也，不失道之極貴，可用輔佐世之太平利他也，故云得道之尊者，可以輔世也。以者，用也，獨者，不二也，我者，真空之體也。不

失道之不二，可攝妙有之用，復真空之體自利也，故云得道之獨者，可以立我也。

知道非時之所能拘者，能以一日為百年，能以百年為一日。

知者，悟也，道者，真空妙有不可思議之道也，了悟真空妙有不可思議之道，猶如太虛空，非時數之所能拘管也。凡所有形，皆有數盡之時，海有時而枯，山有時而摧，日月有時而昏暗，天地有時而崩陷，唯此真空之道，不屬時數，能用一日為百千萬年，能用百千萬年為一日也。故云知道非時之所能拘者，能以一日為百年，能以百年為一日也。

知道非方之所能礙者，能以一里為百里，能以百里為一里。

道本無形，非十方之能礙，至神無我，非八極之能拘，不疾而速，不行而至，體同太虛，用亦同太虛。了悟如此，能用一里行時周遍八荒之外，能用周遍八荒作一里行時也。故云知道非方之所能礙者，以一里為百

里，能以百里為一里也。

知道無氣，能運有氣者，可以召風雨。

了悟至道一氣未生之前，道運生氣，變化陰陽，而為風雨，大達之士，從真空密運妙用，立致雲雷，呼召風雨也。故云知道無氣，能運有氣者，可以召風雨也。

知道無形，能變有形者，可以易鳥獸也。

了道之士，神通無量，與造物者同游，能無形化有形，能有形化無形，隱顯自如，能令飛禽化走獸，走獸化飛禽，縱橫妙用，變化無窮矣。故云知道無形，能變有形者，可以易鳥獸也。

得道之清者，物莫能累，身輕矣，可以騎鳳鶴。

道不屬清濁，能濁能清。了道之士，清淨無染，猶如虛空，萬物豈能累虛空哉，形神俱妙，與真空同體，空無錙銖之重，不假所乘，頃刻周遍十方之外，示見神變，以警愚迷，或騎鳳鶴，或乘彩雲，昭示中下，啓向道之

誠也。故云得道之清者，物莫能累，身輕矣，可以騎鳳鶴也，如衛叔卿乘白鶴，王子晉乘鳳吹簫昇天也。

得道之渾者，物莫能溺，身冥矣，可以席蛟鯨。

了道之士，寓世同塵不染，和光不耀，隱晦之至也，故云得道之渾者，物莫能溺，身冥矣也。莫能溺者，不染也，身冥者，隱晦也，或示神通，以蛟龍鯢鯨為席，乘坐而游太虛也，故云可以席蛟鯨也。如古人夏禹乘龍而導百川，李太白跨蛟虬，劉知古乘金鯉，琴高控赤鯉昇天者是也。

有即無，無即有，知此道者，可以制鬼神。

有者，妙有之用也，無者，真空之體也。即用即體，即體即用，體用如如，了悟此道，可以制伏鬼神，以為役使之用，故云有即無，無即有，知此道者，可以制鬼神也。如劉根善役使鬼神，漢天師善制鬼神於成都，是也。

實即虛，虛即實，知此道者，可以入金

石。

實者，實有也，虛者，真空也。真空實有者，乃至道之體用不二也。了悟體用不二，則虛實相通，可以蹈水火，入金石而無礙也。故云實即虛，虛即實，知此道者，可以入金石也。

上即下，下即上，知此道者，可以侍星辰。

上者，五太之前妙道也，下者，至德萬行也，妙道為體，德行為用，體用同源，則上下不二，了此道者，萬象森羅以為侍衛也。故云上即下，下即上，知此道者，可以侍星辰也。

古即今，今即古，知此道者，可以卜龜筮。

古者，理也，今者，事也。以理為體，以事為用，體用如如，了此道者，寂然不動，感而遂通，如龜筮之兆吉凶，誠信無妄也。故云古即今，今即古，知此道者，可以卜龜筮也。

人即我，我即人，知此道者，可以窺他人之肝肺。

人者，境也，我者，心也。心境兩忘，

道眼開明，了此道者，則能無見無不見，可測他人肺腹思慮之念也，謂之他心通也。故云人即我，我即人，可以窺人之肺肝也。

物即我，我即物，知此道者，可以成腹中之龍虎。

天地與我並生，萬物與我為一，了此道者，即吾之肝神可化為龍，吾之肺神可化為虎，乘之跨之，而游太清之境也。故云物即我，我即物，知此道者，可以成腹中之龍虎也。

知象由心變，以此觀心，可以成女嬰。

萬象之境，皆由心神變化而見也，以此諦觀，心體真空，內藏妙有之用，即心藏之神化為姤女，腎藏之神化為嬰兒，姤嬰匹配，性命混融，而出離生死也。故云知象由心變，以此觀心，可以成女嬰也。

知氣由心生，以此吸神，可以成鑪冶。

心之所之，則氣從之，以此知氣由心生，心了真空，如水澄徹，呼吸神氣，綿綿無間，則心火下降，腎水上升，水火既濟，以成大丹，若人服之，永

超生死之病矣，故云知氣由心生，以此吸神，可以成鑪冶矣。已上龍虎姤嬰，至鑪冶，後聖以丹喻道者，源於此也。

以此勝物，虎豹可伏，以此同物，水火可入。

以此至道至德，威光赫赫，物物歸尊，虎豹順伏以為乘騎，故云以此勝物，虎豹可以伏也。以此至道，體同太虛，水火豈能溺燒虛空哉，了道者無所不同，故能大浸稽天而不溺，大旱金石流土山焦而不熱也，故云以此同物，水火可入也。

惟有道之士能為之，亦能能之而不為之。

以上從輔世立我，一里一日為百里百年，召風雨，易鳥獸，騎鳳鶴，席蛟鯨，制鬼神，入金石，侍星辰，卜龜筮，窺肺肝，成龍虎，女嬰鑪冶，伏虎豹，入水火之十八神通妙用，唯了道聖人悉能為之，亦能不為，能為之神通變化也。蓋道貴真誠，韜晦為上，驚愚駭俗之神異，聖人不為也，此十

八神異便是，事本至有，以道運事者，周之百為也，故云惟有道之士能為之，亦能能之而不為之也。此章明道德體用，變化無窮，而聖人韜晦，不驚駭愚俗也。

右第一章

關尹子曰：人之力，有可以奪天地造化者，

人能了道者，上與造化者同游，可以奪天地陰陽造化生成之妙也，故云人之力，有以奪天地造化者也。

如冬起雷，夏造冰，死尸能行，枯木能華，

了道者能顛倒陰陽，冬能起雷，夏能凝冰，如老成子學於尹文，能存亡自在，翻校四時，冬起雷，夏造冰，飛者走，走者飛，終身不著其術。世莫傳焉者是也，故云如冬起雷，夏造冰也。昔太上以太玄生符投徐甲之枯骨，即時復活能行，故云死尸能行也。純陽祖師以丹活安州枯柳，又以丹活萊州枯槐，而枝葉復榮華，故云枯木能華也。

豆中攝鬼，

昔郭璞真人，撒小豆數百顆於牆外，盡化為赤衣鬼，以符為神將，一一縛之，投入井中也，故云豆中攝鬼也。

杯中釣魚，

昔左慈真人，共曹操飲酒，以銅盆貯水，擲鈎餌於中，俄頃釣得金鯉尺餘，而鱗之也，故云杯中釣出魚也。

畫門可開，

唐太宗詔吳道子，於宮壁以墨水潑之，以幕幪之，良久撤去幪幕，請太宗觀畫，其山水草木，人煙鳥獸悉具。俄頃，見巖下一洞門，道子指洞曰：此中神仙，遂以手擊之，洞門忽開，道子躡身入洞，以手招帝，帝不敢入洞，須臾復合而不見，故云畫門可開也。

土鬼可語，

昔廬山廟中，泥塑神鬼能言禍福，樂巴真人呪之，乃野狸精所託而見也，彼野狸精尚能使土鬼能語，況神仙乎，故云土鬼能語也。

皆純氣所為，故能化萬物。

如上所說，冬起雷，夏造冰，死尸能行，枯木能華，豆中攝鬼，杯中釣魚，畫門可開，土鬼能語，之八者，皆得純而無雜，真空妙道，能運一氣，變化萬物，此乃是向之所說，人之力有可以奪天地造化者也，故云皆純氣所為，故能化萬物也。

今之情情不停，亦氣所為，而氣為物，有合有散。

今迷入之心情，流浪如水波之不停，亦強陽之氣所為也，彼強陽之氣，自生至壯，氣合而充溢，自壯至老，氣散而衰敗也。故云今之情情不停，亦氣所為，而氣之為物，有合有散也。

我之所以行氣者，本未嘗合，亦未嘗散。

聖人了悟真空之道，乃得元氣之祖，元氣之祖，未曾有合散也，故云我之所以行氣者，本來未嘗合，亦未嘗散也。本者，祖也。

有合者生，有散者死，

彼迷人所受一斤元氣，男子得八數，

二八一十六歲，為始走泄，不知保養，三年損一兩，三十年損十兩，三十六十八，總四十八年一十六兩，元氣耗散俱盡，四十八又加十六歲，乃八八六十四卦，數之盡也。元氣既盡，但有五穀之氣滋養之，雖名曰人，其實為鬼矣。女人所受元氣十四兩，女人得七數，二七一十四歲，天癸降，元氣為始走泄，二年半損一兩，二十五年損十兩，外有四兩，十年損盡，二十五加十年，總三十五年，又加十四歲，乃七七四十九。中陽數盡，天癸枯乾，但有五穀之氣滋養，雖名曰人，其實為鬼也，男女元氣既盡，等候死矣，以此知氣聚則生，氣散則死也。故云有合者生，有散者死也。合者，聚也。

彼未嘗合未嘗散者，無生無死，客有去有來，郵常自若。

彼了道聖人，得元氣之祖，未曾有聚有散，以此則知無生無死也。郵者，驛舍也，客者，使客也，客有去來，而驛舍自若自如，不移不動，無去無

來。客者喻氣也，去來喻散聚也，郵者喻道也。道運元氣，升降往來，氣聚則生，氣散則死，而道運氣者，非氣也，非氣者，無聚散生死去來也，故了道者，無聚散生死去來也，故云客有去來，郵常自若也。自若者，如如不動不變也。此章明道為元氣之祖，變化無窮，而無去來生死也。

右第二章

關尹子曰：有誦呪者，有事神者，有墨字者，有變指者，皆可以役神御氣，變化萬物。

法籙之士傳受呪訣，專精禱誦，以致靈驗，如九字傍通密，誦十萬八千遍，如意使用驗如影響也，故云有誦呪、者也。世有設像，專一恭敬事奉，隨心禱祝，無有不應，故云有事神者也。法籙家有傳受玄壇批降，於紙墨寫字，以報未來吉凶禍福，其驗無爽，故云有墨字者也。法籙家有傳受手降報指，令患者手於香鑪上展之，法師摺訣，召將良久，手指大小變為高低，法師以辯鬼神作崇

之由，其驗無差也，故云有變指者。誦呪事神、墨字、變指之四者，皆可以役使鬼神，御運元氣，能變化萬物，以昭神靈也。故云皆可以役神御氣，變化萬物也。

惟不誠之人，難於自信，易於信物，故假此為之，

人人有真空妙道，威光無量。頭頭具足，用無欠少，一念開悟，位齊諸聖，能役使鬼神，呼召雷雨，神通無量，人人有奇特，說與時人，便自不誠信之，既難信於自己，容易信於物，聖人慈悲，要啓信道之心，故假誦呪事神、墨字、變指之誠，以彰靈驗也。故云惟不誠之人，難於自信，易於信物，故假此為之也。

苟知為誠，有不待彼而然者。苟者，誠也，誠知誦呪、事神、墨字、變指有靈通，因誠而有者，既知唯誠感神，有不待彼誦呪、事神、墨字、變指，而亦能役使鬼神也，故云苟知為誠，有不待彼而然者也。此章明誠為役神之本，誠為入道之由也。

右第三章

關尹子曰：人一呼一吸，日行四十萬里，化可謂速矣。

人一呼一吸為一息，一晝一夜一萬三千五百息，一息氣行六寸，晝夜氣行八百一十丈，脉行五十度也。十百為一千，十千為一萬，十萬為一億，十億為一兆，人之一息，日行四十萬里，即是一息日行四億里，十息日行四兆里，一百息日行四十兆里，千息日行四百兆里，一萬息日行四千兆里，三千息日行一千二百兆里，五百息日行二百兆里，總計一晝夜日行五千四百兆里也。以此則知大化可謂之速疾也，故云人一呼一吸，日行四萬里，化可謂速矣。

惟聖人不存不變。

聖人洞徹真空之道則無我，無在無不在也，真空越古今，而無有變異也，古云添一歲減一年，真空不動然是也，故云惟聖人不存不變也。不存者，無我也。此章明道不屬大化，能運大化也。

右第四章

關尹子曰：青鸞子千歲而千歲化，桃子五仕而心五化。

青鸞子者，古之聖人也，聖人之形，隨時改化，歲歲更變，直至千歲，無時不移易變化也。然化化者，有不化者存也，不化者，真常不變異之道也，如聖人行年六十，而六十化也，未嘗不始之是，而卒之非也，故云青鸞子千歲而千歲化也。桃子者，古之賢人也，五仕而為官，而心五度改化，如蘧伯玉行年六十而六十化，未知六十之是，而非五十九之非也。古云停燈於缸，後焰非前焰，假容於鑑，今吾非故吾是也，故云桃子五仕而心五化也。

聖人賓事去物，豈不欲建立於世哉，有形數者，懼化之不可知也。

事者，用也，聖人賓事不以用為主也。道體真空，不著物境，而物境自遠也，故云聖人賓事去物也。聖人不以建立妙用為主，而保任真空之體，但感而後應，應變常寂，而豈不

欲建立妙用利世哉，但不以用為主也，若以建立妙用為主，而反以真空之體為賓，則墮形數之跡，人天小果有漏之因，如影隨形，雖有非實既墮形數之跡，則彼大化遷移改變也，以此則明有形數者，懼汨大化也，學道之人，不可不悟此也。故云豈不欲建立於世哉，有形數者，懼化之不可知也。不可知者，為纔萌知識，即落大化也。此章明以真之體為主，以建立妙用為賓也，有體有用，則化化而不化也。

右第五章

關尹子曰：萬物變遷，雖互隱見，氣一而已，惟聖人知一而不化。

萬物俄生俄長，俄老俄死，無時不變遷，春木隱，夏火見，夏火隱，秋金見，秋金隱，冬水見，冬水隱，春木見，土隱見於四季。五行四時，互相隱見，生生化化而不息，皆一氣運轉，相推相蕩而行鬼神也。故云萬物變遷雖互隱見，氣一而已也。聖人了悟不二之妙道猶如虛空，故不

隨大化而遷移也。故云聖人知一而不化也。知者，悟也。此章明道運大化而不化也。

右第六章

關尹子曰：爪之生，髮之長，榮衛之行，無頃刻止，衆人見之於著，不能見之於微。

人手爪甲共人頭髮，旋生旋退，及人身血行之榮，氣行之衛，晝夜周流，而共爪髮生長，俱無頃刻之時止息而不生長流行也。故云爪之生，髮之長，榮衛之行，無頃止也。著者，羸跡也，衆人但見羸跡顯見，而不能見微細爪髮之生長，榮衛之行也。故云衆人見之於著，不能見之於微也。

賢人見之於微，而不能任化，

郭子謙本有此十一字添入，甚有次序，故亦從而解之也。賢人但見於微妙而不能了心，故不能任化無化也。故云賢人見之於微，而不能任化也。

聖人任化，所以無化。

聖人了獨立而不改之體，任周行而不殆之用也，任周行而不殆之用，即任化也，了獨立而不改之體，即無化也。故云聖人任化，所以無化也。此章明道獨立而不改，周行而不殆也。

右第七章

關尹子曰：室中有常見聞矣，既而之門之鄰，之里之黨，既而之郊之山之川，見聞各異，好惡隨之，和競從之，得失成之，

堂內退房曰室，五家為鄰，五鄰為里，五百家為黨，城郭之外曰郊也，人居堂室之內，所見聞人物之境，以為尋常日日見聞也。故云室中有常見聞矣也。之者，往也，既以從室往院門，又往鄰里鄉黨，或又往城外郊野，又往山林川澤，眼見衆色形相之境不同，耳聞衆聲之境不同，故云既而之門之鄰，之里之黨，既而之郊之山之川，見聞各異也。眼見耳聞色聲之境各異，有喜而好愛之，有不喜而惡嫌之，有和順同樂之境，有違逆

爭競之境，有可取而得之，有可捨而失之，如此之境，隨情變化，隨從成就之。故云好惡隨之，和競從之，得失成之也。

是以聖人動止有戒。

止者，靜也，戒者，禁止也。聖人垂訓學人，一動一靜，令有禁止聲色，謹慎行藏，不隨見聞聞色聲之境遷變也，故云是以聖人動止有戒也。動止有戒者，訓學人也，彼既是聖人，又何戒哉。此章明迷人隨色聲改變也。

右第八章

關尹子曰：譬如大海，能變化億萬蛟魚，水一而已，

大海喻前道運大化也，蛟魚喻賢愚也。大海能變化億萬蛟魚，俱生在一水中也，道能運大化變億萬賢愚，同生於一道也。故云譬如大海能變化億萬蛟魚，水一而已也。此乃起喻也。

我之與物，翕然蔚然，在大化中，性一而已，知夫性一者，無人無我，無死無

生。

蔚然者，草木叢生稠密之貌也，蔚然者，草木繁盛之貌也。我之與物，蔚然蔚然，如荒草叢生，林木繁盛，不可勝數，俱在大化中，道性不二而已也，故云我之與物，蔚然蔚然在大化中，性一而已。此合喻也。了悟真空不二之道，性外不見人之過，內不見我之自，是心同大虛，無滅無生也。故云知夫性一者，無人無我，無死無生也。死者，滅也。此章明道性無人我，死生不屬大化也。

右第九章

關尹子曰：天下之理，是或化爲非，非或化爲是，恩或化爲讎，讎或化爲恩，天下事理隨人妄情而變，同於己者謂之是，或因公事違己私情，前日之是，化之爲非也；不同於己者爲非，或因私事順己私情，前日之非化之爲是也。故云天下之理，是或化爲非，非或化爲是也。天下之恩莫大於君父，或因公事公理違己私情，前日莫大之恩，化爲莫大之讎也，世有

弑君弑父者是也；天下之讎莫大於敵國，或因私事私理順己私情，前日莫大之讎，化爲莫大之恩也，世有敵國和好結親者是也。故云恩或化爲讎，讎或化爲恩也。

是以聖人居常慮變。

是以者，因上仍下之辭也。聖人垂訓學人，安性之大常，戒情之小變，不徇私也，故云是以聖人居常慮變也。居者，安也，慮者，審思而戒慎也。此章明徇妄情之小變，則是非恩讎之不正，任真性之大常，冥是非之恩讎者也。

右第十章

關尹子曰：人之少也，當佩乎父兄之教，人之壯也，當達乎朋友之箴，人之老也，當警乎少壯之說，萬化雖移，不能厄我。

人之年少之時，父兄有教詔之言，當書之佩帶於身，依從而行之無忘也，故云人之少也，當佩乎父兄之教也。壯年之時，或有同門之朋，同志之友，相為箴規藥石德之，病當通達曉

解，不憚改過，日新其德也。故云人之壯也，當達乎朋友之箴也。人之老年之時，歷事既久，飽諳是非得失，當以所諳事理警戒於少壯之人，演說訓之無厭，乃仁人之心也。故云人之老也，當警乎少壯之說也。如上所說，少從父兄教，壯達朋友箴，老警少壯說，則不逆為人之理也。任理而寓游於世，雖萬化密移，但不違拒造物，順之而無危厄也，故云萬化雖移，不能厄我也。此章明任理則可與造物同游而無厄也。

右第十一章

關尹子曰：天下之理，輕者易化，重者難化，

天下之理性所稟輕清之氣，其人必根性明利，則容易化之而開悟也。故云天下之理，輕者易化也。所稟重濁之氣，其人必根性暗鈍，則難化之而悟也，故云重者難化也。譬如風雲，須臾變滅，金玉之性，歷久不渝。

渝者，變也，譬如風雲之氣，須臾頃

刻變滅，沒而不見也。故云譬如風雲，須臾變滅也。此喻前輕者易化也。金性堅，玉性硬，故能歷時長久不變改也。故云金玉之性，歷久不渝也。此喻前重者難化也。

人之輕明者，能與造化俱化而不留，殆有未嘗化者存。

人之所稟輕清之氣，根性明利，心易開悟，能與造化同游而無滯也。故云人之清明者，能與造化俱化而不留也。不留者，不滯也。既然了悟與造化同游而無滯，則任化而無化，行小變而不失大常也，故云殆有未嘗化者存也。存者不失大常也。此章明利根者易悟，任化而無化也。

右第十二章

關尹子曰：二幼相好，及其壯也，相遇則不相識，二壯相好，及其老也，相遇則不相識，如雀蛤鷹鳩之化，無昔無今。

二人年幼相愛，喜好遊戲相狎，及其相別多年，俱長壯盛，變貌更形，二人再相遇，則不能相識如幼之時也。

故云二幼相好，及其壯也，相遇則不相識也。二人年壯，相為莫逆之交，喜好同學，及其相別多年，更形易貌，皓首蒼顏，皮皴紋皺，二人再相遇，則不能相識如壯年相好也。故云二壯相好，及其老也，相遇則不相識也。二幼化壯，二壯化老，如雀入水化為蛤，又如鳩之化為鷹鷂也，《化書》云：蛇化為龜，雀化為蛤是也。又《列子》云：鷓化為鷓，鷓化為布穀，布穀復化為鷓是也。布穀者，即鳩之異名也。故云如雀蛤鷹鳩之化，無昔無今也，雀為蛤之昔，蛤為雀之今，雀之為蛤，蛤全體是雀也，鳩之為鷓，鷓全體是鳩也，如此形雖變，性無古今也。此章明形隨化化而不息，性越古今而無變異也。

右第十三章

文始真經註卷之七

物」。

按前經文，此句當為「日行四十萬里」。

①「用」，據前之經文，當為「周」。

②此句，《關尹子》和《無上妙道文始真經》皆作「而易於信」。

文始真經註卷之八

神峰逍遙子牛道淳直解

八籌篇

籌者，物也，凡六章。

關尹子曰：古之善揲著灼龜者，能於今中示古，古中示今，高中示下，下中示高，小中示大，大中示小，一中示多，多中示一，人中示物，物中示人，我中示彼，彼中示我。

著龜見解二柱首章，古之人有善揲著草，若以熱鐵錐灼鑽龜殼，以兆未來過去見在之吉凶也，能以今之事，示曉古之理，復以古之理，示曉今事之吉凶得失也。故云古之善揲著灼龜者，能於今中示古，古中示今也。高者，天也，天屬陽，陽屬吉也，下者，地也，地屬陰，陰者屬凶也，揲著灼龜，能於吉中示告人之凶，復能凶中示告人之吉也，故云高中示下，下中示高也。小者，一身也，大者，天

下國家也。揲著灼龜，能於一身告示天下國家之禍福也，復能於天下國家告示一身之吉凶也，故云小中示大，大中示小也。一者，人君也，多者，百姓也。揲著灼龜，能於人君告示百姓之禍福，復能於百姓告示人君之吉凶也，故云一中示多，多中示一也。物者，財物也。揲著灼龜，能於人之得失告示財物多寡也，復於財物多寡告示人之得失也，故云人中示物，物中示人也。彼者，父母兄弟妻子也。揲著灼龜，能於我之八字，告示父母兄弟妻子存亡得失多寡也，復於父母兄弟妻子存亡得失多寡，告示我之八字貴賤禍福也，故云我中示彼，彼中示我也。是道也，其來無今，其往無古，其高無蓋，其低無載，其大無外，其小無內，其本無一，其末無多，其外無物，其內無人，其近無我，其遠無彼。是者，此也。此真空不可思議之道，非同揲著灼龜分析今古高下、大小一多、人物彼我之六對待也。道不

屬時，獨往獨來，無古今之異也，故云是道也，其來無今，其往無古也。道不屬形位，充塞虛空上下，無所不在，非似天地定於蓋載也，故云其高無蓋，其低無載也。道不屬內外中邊，言其大者，廣無邊際，言其小者，視之不見，故云其大無外，其小無內也。道不屬數，不可定於一多也，道為五太、二儀、萬物之本源，運行一氣，化生天地萬物，天地萬物無須與離於道，若離於道，則天地萬物壞滅也，以此知天地萬物為道之末也，故云其本無一，其末無多也。此其本無一，其末無多，郭子謙本有此八字，於經甚有次序，故亦從而解之也。道不屬人物，內外不二也，故云其外無物，其內無人也。道不屬彼我，遠近不二也，故云其近無我，其遠無彼也。不可析，不可合，不可喻，不可思，惟其渾淪，所以為道。道如虛空，無散無聚也，故云不可析，不可合也。道無相似，無比倫，

無情識，故不可以言議而譬喻，不可以心思而知解也，故云不可喻，不可思也。若人了悟，本自具足，本自見成，本自全真，不假修為造作扭捏也，如此強名曰道也，故云惟其渾淪，所以為道也。此章明道不屬形數，不可分析而知也。

右第一章

關尹子曰：水潛，故蘊為五精，火飛，故達為五臭，木茂，故華為五色，金堅，故實為五聲，土和，故滋為五味，

精者，精神之精也，水性好潛隱於內，故蘊積為五蟲之精。五蟲者，鱗羽毛甲倮也，水在藏為腎，在五神為精也，故云水潛，故蘊為五精也。性好飛揚於外，故通達人鼻，為腥羶香焦朽之五臭也，故云火飛，故達為五臭也。木性好榮茂，故華發為青黃赤白黑五色也，故云木茂，故華為五色也。金性堅硬，故實而擊之，為宮商角徵羽之五音，聽之為五聲也。土性溫和，故滋酸鹹甘辛苦之五味也，故云土和，故滋為五味也。

其常五，其變不可計，其物五，其雜不可計。

其常五者，五常也，仁義禮智信也，仁屬木，義屬金，禮屬火，智屬水，信屬土也。其物五者，金木水火土也。變者，雜也。此金木水火土之五行，仰之為五星，俯之為五嶽，位之為五方，變之為五色，擊之為五音，族之為五姓，物之為五金，氣之為五臭，潛之為五精，滋之為五味，動之為五蟲，植之為五行，善之為五德，惡之為五賊，身之為五藏，神之為五神，識之為五情也。故云其常五，其變不可計，其物五，其雜不可計也。

然則萬物在天地間，不可執謂之萬，不可執謂之五，不可執謂之一，

向之五行，變化萬物，紛紛擾擾於天地之間，其雜不可勝數計算，豈定執謂之萬哉，故云然則萬物在天地間，不可執謂之萬也。萬物歸屬五行，其常五，其變不可計，豈可執定謂之五行哉，故云不可執謂之五也。五行歸屬於一，一統億萬，生生化化而

不息，豈可執定謂之一哉，故云不可執謂之一也。

不可執謂之非萬，不可執謂之非五，不可執謂之非一。

天地之間，蒼然蔚然，紛紛擾擾之物，豈止於億萬哉，奈何總名謂之萬物也，故云不可執謂之非萬也。萬物紛紛雖多，終歸屬於五行也，故云不可執謂之非五也。五行雖變不可計，終屬一氣之統攝也，故云不可執謂之非一也。

或合之，或離之，以此必形，以此必數，以此必氣，徒自勞爾，物不知我，我不知物。

或將萬物五行合之為一，或將一氣離之為五行萬物也，故云或合之或離之也。既有合有離，以此必屬萬物之形，故云以此必形也。以此萬物必屬五行之數也，故云以此必數也。以此五行必屬一氣也，故云以此必氣也。向來分別萬物五行一氣，俱屬妄情，已落形數氣化之變也，謾徒自勞爾，若妄情返於真性，

則物我如如，各不相知，迥出形數氣運變化之外也，故云徒自勞爾，物不知我，我不知物也。此章明纔萌妄情，即落形數氣運之化，妄情復本，則形數氣運不可得而拘也。

右第二章

關尹子曰：即吾心中可作萬物，蓋心有所之，則愛從之，愛從之，則精從之。

心本清淨，元無一物，等同太虛，於此清淨心上，忽萌一妄情於此，不覺是妄，則情情相續，積之為萬情，萬情迷染萬物也，經云：一情認之，積為萬情，萬情認之，積為萬物是也，故云即吾心中可作萬物也。蓋心之妄情有所往，則隨所愛之境，從而往之也，愛屬水，水屬精，心情有所愛之境，則精神亦從之所往也，故云蓋心有所之，則愛從之，愛從之，則精從之也。之者，往也。

蓋心有所結，先凝為水，心慕物涎出，心悲物淚出，心愧物汗出。

元氣周身，隨心感而出見，蓋心有住著，彼所住著之境結縛也，故云蓋心

有所結也。心先與物凝滯，則元氣化而為水也，心若有所慕愛可食之物，則元氣於口中化為涎液而出見也，故云先凝為水，心慕物涎出也。心感悽愴，親戚死喪，忽然悲哀，則元氣於眼中化為淚而出見也，故云心悲物淚出也。自作不善之行，見人忽起慚愧之心，則元氣於面化為汗而出見也，故云心愧物汗出也。

無暫而不久，無久而不變，

暫者，不久也，久者，常靜也，變者，動也。若無暫生暫滅之情念，而不能悟真空常靜之心體也，故云無暫而不久也。若無悟真空常靜之心體，而不能應群動之變而常寂也，故云無久而不變也。

水生木，木生火，火生土，土生金，金生水，相攻相剋，不可勝數。

人心藏屬火，內藏神，其神情好喜也。肝藏屬木，內藏魂，其魂情好怒也。脾藏屬土，內藏意，其意情好思也。肺藏屬金，內藏魄，其魄情好憂也。腎藏屬水，內藏精，其精情好恐

也。精生魂，則恐生怒，故云水生木也。魂生神，怒生喜，故云木生火也。神生意，喜生思，故云火生土也。意生魄，思生憂，故云土生金也。魄生精，憂生恐，故云金生水也。攻字應作生字，恐傳寫之誤也，應作相生相剋也。相剋者，水剋火，火剋金，金剋木，木剋土，土剋水也。五行相生相剋，化生天地萬物，萬物相生相剋，不可以數計算也，故云相生相剋，不可勝數也。

嬰兒藥女，金樓絳宮，青蛟白虎，寶鼎紅鑪，皆此物，有非此物存者。

賢藏屬坎，坎中陽爻謂之嬰兒，即精化元陽之氣也。心藏屬離，離中陰爻謂之藥女，即心液之神也。肺藏屬兌，兌屬金管十二節，謂之金樓也，又謂之十二重樓也。心藏屬火，火色赤，謂之絳宮也。肝藏屬木，內藏魂，木色青，謂之青蛟，又謂之青龍也。肺藏屬金，內藏魄，金色白，謂之白虎。故云嬰兒藥女，金樓絳宮，青蛟白虎也。身中元氣屬陽，陽

屬乾也，乾屬金，乃謂之寶鼎也。心中之神屬陰，陰屬坤，心屬火，火色紅，乃謂之紅鑪也。身心謂之乾坤鼎鑪也。既身心為鼎鑪，即神氣為藥物也，故云寶鼎紅鑪，皆此物也。此物者，即神氣也。道無形名，乃為神氣之祖，神氣之祖者，乃不可思議之道也，故云有非此物存者也。此章明道運神氣，變化無窮也。

右第三章

關尹子曰：鳥獸俄呦呦，俄甸甸，俄逃逃，草木俄茁茁，俄停停，俄蕭蕭，天地不能留，聖人不能繫，

呦呦者，鳥獸之子初生之聲也，甸甸者，鳥獸經數旬長大也，逃逃者，鳥獸老而死亡如人逃遁不見也，茁茁者，草木初生芽也，停停者，草木長大停停卓立也，蕭蕭者，草木老枯蕭蕭無葉也，言鳥獸俄生俄長，俄頃之間復變而為死也，故云鳥獸俄呦呦，俄甸甸，俄逃逃也。草木俄生俄長，俄頃之間復變而為枯死也，故云草木俄茁茁，俄停停，俄蕭蕭也。鳥獸

草木生時不得生，長時不得長，老時不得不老，死時不得不死，生長老死四者，大化之流行，雖天地之廣大，聖人之神通，亦不能暫留繫，而使不生長老死也，故云天地不能留，聖人亦不能繫也。

有運者存焉爾。

造物運幹一氣，陰陽五行四時相推相蕩，生生化化無有窮極，故云有運者存焉爾也。

有之在彼，無之在此，鼓不桴則不鳴，偶之在彼，奇之在此，桴不手則不擊。

有造化之運，在彼迷情形氣之數也，故云有之在彼也。無物真空之道，在此心開了悟，與道冥合，不屬形氣時數，造化安能運之哉，故云無之在此也。心既開悟，不生妄情，不染物境，清淨湛然，猶如虛空，彼造物豈能陶鑄虛空哉。心了如此，似鼓不用桴擊，則鼓不鳴響也，故云鼓不桴則不鳴也。與造化對偶，在彼迷情也，故云偶之在彼也。不與造化對偶，則奇然無侶，在此真空了悟之心

也，故云奇之在此也。真空心尚未萌，豈有迷情染物哉，真空如此，似桴不用手則不能擊鼓也，故云桴不手則不擊也。此章明迷染萬物，則不能逃於大化也，悟真空，則大化不能遷也。

右第四章

關尹子曰：均一物也。衆人惑其名，見物不見道，賢人析其理，見道不見物。

一者，不二之道也，物者，天地萬物也，天地萬物，咸賴不二之道而有其生也，故云均一物也，道寓於天地萬物，無所不在，衆人為天地萬物之名惑亂其心，心迷著物，見物不見不二之道也，故云衆人惑其名，見物不見道也。賢人能分析事理，昭昭明白，明見道理，外忘萬物，故云賢人析其理，見道不見物也。

聖人合其天，不見道，不見物，一道皆道。

聖人了悟，冥契天真，了道之實，忘道之名，道名尚忘，何況物哉，故云

聖人合其天，不見道，不見物也。道元不二，道無不在，故云一道皆道也。

不執之即道，執之即物。

心無所住，全身放下，即冥契真空妙有之道也，故云不執之即道也。心有所住，染著種種之邊，即迷情逐於境物也，故云執之即物也。此章明未能洞徹，賢愚一例屬迷，了然悟徹，凡聖不二也。

右第五章

關尹子曰：知物之偽者，不必去物，譬如土牛木馬^①，雖情存牛馬之名，而心忘牛馬之實。

知者，悟也，了悟所有物境，皆是偽妄不真，自然心不染著，湛然清靜，不必去除物境也，故云知物之偽者，不必去物也。了悟所有物境偽妄不真，自然不染，譬如泥土塑成牛，木雕刻成馬，見之，雖然情存牛馬之名像，而心自然忘牛馬之真實也，故云譬如土牛木馬，雖情存牛馬之名，而心忘牛馬之實也。此章明了悟物境

之偽忘^②，心自然清靜無染也。

右第六章

文始真經註卷之八

①此句，《關尹子》和《無上妙道文始真經》皆作「譬如見土牛木馬」。

②「偽忘」，疑當作「偽妄」。

文始真經註卷之九

神峰逍遙子牛道淳直解

九藥篇

藥者，雜治也，凡三十一章。

關尹子曰：勿輕小事，小隙沈舟；勿輕小物，小蟲毒身；勿輕小人，小人賊國。

學道之人，微善必積，小過必除，不可輕易，事雖微小，不可輕易而忽之，如萬斛之舟，雖筋頭小竅，若不塞之，以至於沈沒大舟也，故云勿輕小事，小隙沈舟也。勿者，禁止之辭也，隙者，竅也。勿得輕易於小物，如蝎子七寸蛇，雖微小，若覷小可而近之，則被螫嚙而毒傷人身也，故云勿輕小物，小蟲毒也^①。勿得輕易於小人，如黃巢赤眉黃巾等，雖是小人，而能賊漢唐天下，而況於國乎，故云勿輕小人，小人賊國家也。

能周小事，然後能成大事；能積小物，

然後能成大物；能善小人，然後能契大人。

事者，用也，施之於用也，平等普利，不遺細行，然後能成上德不德之至德，至德者，大德也，大德者，乃道之大用也，故云能周小事，然後能成大事也。小物者，細行微功也，草木昆蟲亦救護而不害，妙有普利如同時雨，不擇荆棘田苗淨穢，平等普濟也，又如大海不擇清濁，包容不辯也，所以能為百谷王也，及其功行，積之大也為賢為聖，豈不是為大人物哉，故云能積小物，然後能成大物也。善以仁德普利，不擇君子小人，平等仁慈，如此則不失人心，人皆推尊而敬之，然後能契大人之道也，故云能善小人，然後能契大人也。

天既無可必者人，人又無能必者事，惟去事離人，則我在我，惟可即可，人之貴賤貧富，壽夭窮通，在乎天命，善惡迷悟為小人君子賢聖，天命豈可必然定之哉，故云天既無可必者人也。事者，用也，用之於惡為小

人，用之於善為君子，用之於德為賢人，用之於道為聖人，人之於用，豈可必然一定之哉，故云人又無能必者事也。若放捨諸緣，外離人相，藏諸妙用而無為清靜，則我不知有我，存亡自在，無可無不可，自由自在逍遙無拘也，故云惟去事離人，則我在我，惟可即可也。

未有當繁簡可，當戒忍可，當勤惰可。

未有正當建立方便之門，衆行齊修，不捨一法，而却掃蕩復本而行簡易，則不可也，故云未有當繁簡可也。未有當合戒慎，而忍行之而不戒，則不可也，故云當戒忍可也。未有當精進善行之時，而却懶惰不精進，則不可也，故云當勤惰可也。此章明防微杜漸，不遺細行，可以為賢，可以為聖也。

右第一章

關尹子曰：智之極者，知智果不足以周物，故愚；辯之極者，知辯果不足以喻物，故訥；勇之極者，知勇果不足以勝物，故怯。

極有智者，可以燭理通法，而智果實不足以周濟萬物，既知如此，未若如愚韜晦契道也，故云智之極者，知智果不足以周物，故愚也。極能辯者，可以自明事理，以此知辯果不足以曉喻天下人物，不如若訥養氣神也，故云辯之極者，知辯果不足以喻物，故訥也。極勇有力者，可勝十人百人，以此知勇果不足以勝天下人物，未若如怯弱謙卑柔和而養德也，故云勇之極者，知勇果不足以勝物，故怯也。此章明治智辯勇之病也。

右第二章

關尹子曰：天地萬物，無有一物是吾之物，物非我，物不得不應，我非我，我不得不養。

一氣運陰陽，生天地萬物，而一氣之源，本來無物，既是本來無物，即是真空，物來相感，不得不應，但應物常寂也，故云天地萬物，無有一物是吾之物，物非我物，不得不應也。吾者，本來也，一氣運陰陽，生四大假合之我，而一氣之源，本來元無四大

假合之我也，既寓假合，不得不資衣食而養之也，故云我非我，我不得不養也。非我者，本來也。

雖應物，未嘗有物，雖養我，未嘗有我。

真空妙有雖應物，如空谷傳聲，應變常寂，谷未嘗有聲也，真空應物亦復如是也，故云雖應物，未嘗有物也。了悟真空，則四大如貨舍，雖資衣食之養，十二時中，獨露真空，而真空無我也，故云雖養我，未嘗有我也。

勿曰外物然後外我，勿曰外形然後外心，道一而已，不可序進。

外者，忘也。四大假合之身既如貨舍，與物何異，俱是妄偽不真，既明俱是妄偽，一時頓忘，勿得言先忘萬物而復忘身也，故云勿曰外物然後外我也。形者，四大之身也，心者，五蘊妄積之心也，不獨四大假合與物無異，而五蘊妄積之心，亦與物無異，而物我形心，均為妄偽不真，既悟妄偽，一齊頓忘，勿得言先忘身而後忘五蘊妄積之心也，故云勿曰外形然後外心也。道既不二，無內外

物我之分也，豈容次序而進之哉，故云道一而已，不可序進也。心者，內也，形者，外也。此章明治迷著物我心形之病也。

右第三章

關尹子曰：諦毫末者，不見天地之大，審小音者，不聞雷霆之聲。

諦者，審察也，毫末者，秋兔毛之尖細也。詳審察視兔之秋毫之末，而心著微色相，故不睹天地之大色相也，故云諦毫末者，不見天地之大也。小音者，螻蛄之聲也，雷聲之大者，為霹靂震霆也。詳審察聽螻蛄之微音聲，故不聞雷之震霆霹靂之大音聲也，故云審小音者，不聞雷霆之聲也。

見大者亦不見小，見邇者亦不見遠，聞大者亦不聞小，聞邇者亦不聞遠。

不獨審視秋毫之末，不見天地之大，若審視天地之大，亦不見秋毫之末也，故云見大者亦不見小也。邇者，近也。不獨見大者，亦不見小，若見淺近，亦不見深遠，生前之實相也，

故云見邇者亦不見遠也。不獨審聽螻蛄之音聲不聞雷霆之音聲，若審聽雷霆之音聲亦不聞螻蛄之音聲也，故云聞大音者亦不聞小也。不獨聞大者亦不聞小，若聞淺近之淫音，亦不聞深遠劫外之威音也，故云聞邇者亦不聞遠也。

聖人無所見，故能無不見；無所聞，故能無不聞。所見者色也，所聞者聲也，故毫末天地，形雖小大不同，而色不異也。螻蛄雷霆，音雖小大不同，而聲不異也，聖人無所見無所聞者，不住著色聲也，不住著色聲者，真空明聰無所不見聞也，故云聖人無所見，故能無不見，無所聞，故能無不聞也。此章明治迷染色聲之病也。

右第四章

關尹子曰：目之所見，不知其幾何，或愛金，或愛玉，是執一色為目也，耳之所聞，不知其幾何，或愛鐘，或愛鼓，是執一聲為耳也。

眼之所觀，不知其幾何之色，大約或

是愛金之黃色，或是愛玉之白色，若愛金之黃色者，則惡玉之白色，若愛玉之白色者，則惡金之黃色也，如此須是愛執一色，為目之偏見也，故云目之所見，不知其幾何，或愛金，或愛玉，是執一色為目也。耳之所聽，不知其幾何之聲，大約或愛鐘之清聲，或愛鼓之濁聲，若愛鐘之清聲者，則惡鼓之濁聲也，若愛鼓之濁聲者，則惡鐘之清聲也，如此須是愛執一聲，為耳之偏聞也，故云耳之所聞，不知其幾何，或愛鐘，或愛鼓，是執一聲為耳也。

惟聖人不慕之，不拒之，不處之。

了道聖人，洞徹真空，不慕愛色聲，亦無色聲可除掃去也，何謂也？為色聲於真空不可得居止也，故云惟聖人不慕之，不拒之，不處之也。處者，居止也。此章明治迷執愛惡色聲之病也。

右第五章

關尹子曰：善今者可以行古，善末者可以立本。

今者，目前之人事也，古者，五太之先道理也，末者，五常百行也，本者，大本大宗之道也。善以目前人事及五常百行為之妙用，可以應變無住，冥符五太之先，卓然獨立於大本大宗之道也，故云善今者可以行古，善末者可以立本也。行者，無住也。此章明治迷著事理本末，不悟體用之病也。

右第六章

關尹子曰：狡勝賊能捕賊，勇勝虎能捕虎，

人心機狡，勝過於賊寇，可以能捕捉賊寇也，故云狡勝賊能捕賊也。人力威勇勝過於虎豹，可以能捕擒虎豹也，故云勇勝虎能捕虎也。此設喻也。

能克己乃能成己，能勝物乃能利物，能忘道乃能有道。

克者，勝也，己者，私也。善能勝去己之私欲，乃能成己之至德也，故云能克己乃能成己也。善能勝去迷貪物欲，乃能普利人物，以成萬億之妙

行也，故云能勝物乃能利物也。善能忘却悟道之智慧，則冥符真空，而不失妙有真空之道也，故云能忘道乃能有道。能有者，不失妙有也。此章明治不能忘悟道智慧之病也。

右第七章

關尹子曰：函堅則物必毀之，剛斯折矣，刀利則物必摧之，銳斯挫矣。

函者，鎧甲也。鎧甲雖堅硬，則必有硬弓強弩箭之物穿透而毀之也，以此則知凡物之太剛，必有物以折碎之也，故云函堅則物必毀之，剛斯折矣也。刀刃鋒利，則必有鋼石之物摧壞其鋒刃也，以此則知凡物銛銳，則必有物以挫毀之也，故云刀利則物必摧之，銳斯挫矣也。以此設喻也。

威鳳以難見為神，是以聖人以深為根，走麝以遺香不捕，是以聖人以約為紀。已上二譬喻，如威尊之鳳凰，以世人希罕難見為神異也，若頻頻見世，則世人不為希罕難見之神異也，故云威鳳以難見為神也。因上譬喻，是

以知聖人韜光，冥符幽深之道，以為五太二儀五常百行之根源也，故云是以聖人以深為根也。香獐，人逐之急，自嚙臍麝而遺棄之，人見之無麝，則不捕捉也，故云走麝以遺香不捕。因上譬喻，是以知聖人儉約聖智神通，冥於真空，物來感之不得已而後應，常應常寂，不離至道，如網之有紀有綱，引之而衆目齊張也，故云是以聖人以約為紀也。此合喻也。此章明治不能摧強挫銳，及不能韜晦聖智神通之病也。

右第八章

關尹子曰：餅有二竅，水實之，倒瀉，閉一，則水不下。蓋不升則不降，井雖千仞，汲之水上，蓋不降則不升。

實者，滿也，餅之兩頭有竅，先塞下竅，以水注於餅內，充實既滿，提起猛塞上竅，取去下竅先塞之物瀉之，水不下流也。何為也？為猛塞一竅，氣不通也，蓋氣不升通，則水不降也，故云餅有二竅，水實之，倒瀉閉一，則水不下，蓋不升則不下降

也。一仞七尺，又如井雖七千尺之深，以繩引桶而汲之，則水亦從之而上出也，故云井雖千仞，汲之水上也，若不以繩引桶下汲之，而水亦無由上出也，故云蓋不降則不升也。此設喻也。

是以聖人不先物。

已上所說譬喻，不升則不降，不降則不升，以此則知是以聖人不先物，則物不先聖人也。不先者，聖人不先自尊大傲人，人亦不敢傲聖人也，故云是以聖人不先物也。物者，人物也。此章明治不能持後之病也。

右第九章

關尹子曰：人之有失，雖已受害於已失之後，久之，竊議於未失之前，

世之迷人，或用之於不善，則於善行而有失，雖然因失善行，而自己受凶禍之害於已失善行之後，久之，自省悔過，私自暗議所用所行之善惡吉凶利害於未失之前，再謹用之而行善行也。故云人之有失，雖已受害於已失之後，久之，竊議於未失之前

也。竊者，私也。

惟其不恃己聰明，而兼人之聰明，自然無我，而兼天下之我，終身行之，可以不失。

惟達士了悟妙道，亦不恃賴了悟妙道之聰明，藏諸妙用兼衆人聰明之用，隨所便利衆人之用，亦從而用之，普利自然無我也，故云惟其不恃己聰明，而兼人之聰明，自然無我也。真空無我，應物見形，如一月普見一切水也，一切水月光明，皆因天上一月光明之統攝也。天下之人聰明，皆是一真空道之威光統攝也，以真空道之威光，應變常寂，則終身無住於中邊，可為妙用普利，不失於道德也，故云而兼天下之我，終身行之，可以不夫也。行者，無住也，以者，用也。此章明治不能無我普利之病也。

右第十章

關尹子曰：古今之俗不同，東西南北之俗又不同，至於一家一身之善又不同，吾豈執一豫格後世哉。

往古來今，風俗淳澆之各異也，故云古今之俗不同也。東夷、西戎、南蠻、北狄風俗之各異也，故云東西南北之俗又不同也。處處各一家，家家各一身，好惡善惡之各異也，故云至於一家一身之善又不同也。天下人之心情隨時改化，所向不同，吾豈可執定一法，豫先為後世之格式哉，故云吾豈執一豫格後世哉。惟隨時同俗，先機後事，捐忿塞慾，簡物恕人，權其輕重而為之，自然合神不測，契道無方。

大達之士，惟能隨時達變而無我，和光同塵而無心，先了真空妙有之活機，事感而後應，應變而常寂也，故云惟隨時同俗，先機後事也。如上所說，既了真空妙有之活機，物來逐之，而心無嗔怒，美色魔之，而心無染著也，故云捐忿塞慾也。心無嗔怒，是捐去其忿怒，心無染著，是塞斷其色慾也，故云懲忿窒慾，源於此也。大達之士，不多貪外物，但資生之具，不得已而用之，不由義而不取

也，故云簡物也。大達之士，虛緣而葆真，清而容物，又如巨海處下，清濁皆容納也，故云恕人也。既能容物恕人，其應物也，如懸鏡以鑑形，不遺妍醜，其用事也，如權衡以等物，不失輕重，無為而無不為也，故云權其輕重而為之也。既無為而無不為，以不神之神為用，而陰陽莫能測，以不可思議之道為體，應變無方也，故云自然合神不測，契道無方也。此章明治不能以活機應變隨時之病也。

右第十一章

關尹子曰：有道交者，有德交者，有事交者。

大達之士，了悟妙道，同契相求為莫逆之交也，故云有道交者也。同行衆善之君子，相為忘年之交也，故云有德交也。同經營公私之事，遂有相得以為交也，故云有事交者也。

道交者，父子也，出於是非賢愚之外，故久；德交者，則有是非賢愚矣，故或合或離；事交者，合則離。

同了道之人，相為莫逆之交，猶如父子之親，相忘是非賢愚，以游物境之外，永無絕交也，故云道交者父子也，出於是非賢愚之外，故久也。同為善人君子，以德行為務，相與為交，不能無心，所以分別是非賢愚，而有合有離也，故云德交者，則有是非賢愚矣，或合或離也。不以道德為心，同經營公私之事，以俗禮為交，雖事合而情離，稍有相違而絕交也，故云事交者，合則離也。《莊子》云：君子結交淡若水，小人結交甘若醴，君子淡以親，小人甘以絕是也。此章明治不能道交之病也。

右第十二章

關尹子曰：勿以拙陋曰道之質，當樂敏捷；勿以愚暗曰道之晦，當樂輕明；勿以傲易曰道之高，當樂和同；勿以汗漫曰道之廣，當樂要急；勿以幽憂曰道之寂，當樂悅豫；古人之言學之多弊，不可不救。

勿得言鈍拙鄙陋以為道之質樸，當以聰敏捷利了悟為樂也，故云勿以

拙陋曰道之質，當樂敏捷也。勿得言愚癡無明黑暗為學道之韜晦，當以輕清明了為樂也，故云勿以愚暗曰道之晦，當樂輕明也。勿得言傲慢輕易於人為道德之高，當以謙遜和光同塵不染為樂也，故云勿以傲易曰道之高，當樂和同也。勿得言汗漫溘蕩頑空以為道之廣大，當以了悟真空為要妙，以妙有為應變急切之用以為樂也，故云勿以汗漫曰道之廣，當樂要急也。勿得言身處幽靜，心懷憂愁，以成學道之寂靜，當以逍遙悅豫不染為清靜之樂也，故云勿以幽憂曰道之寂，當樂悅豫也。如拙陋愚暗傲易汗漫幽憂之五者，皆是古人了達佯狂混世之言，後學不悟，便為真實，依而行之，以為學道之弊病，不可不以藥石之言救療也。故云古人之言學之多弊，不可不救也。此章明治不能悟古人言之病也。

右第十三章

關尹子曰：不可非世是已，不可卑人

尊己，不可以輕忽道已，不可以訕謗德已，不可以鄙猥才已。

學道之人，不可見他人之過惡，專開病眼，舉世之人以為非，以恃所能勝心，自尊自是也，故云不可非世是已也。學道之人，不可小覷眾人，以為卑賤，而自尊自大也，故云不可卑人尊己也。學道之人，不可輕忽傲慢眾人，以為不悟妙道，而自尊以為有道也，故云不可以輕忽道已也。學道之人，不可專一訕謗他人，以為無德，自尊已有德也，故云不可以訕謗德已也。學道之人，不可小覷眾人為鄙猥愚陋無才，而自尊已有才學也，故云不可以鄙猥才已也。此章明治不能忘人我能所之病也。

右第十四章

關尹子曰：困天下之智者，不在智而在愚；窮天下之辯者，不在辯而在訥；伏天下之勇者，不在勇而在怯。

真空窈冥，不可以智知而識識，故能困天下大智之人也，了道之士，默默韜晦如愚，世有智者不可得而知也，

故云困天下之智者，不在智而在愚也。道本無名，不可得而言辯，而天下言辯者，於此窮而無辯也，了悟道者難以告人，未若如訥不辯言也，故云窮天下之辯者，不在辯而在訥也。了悟妙道，以無為清靜保內，以謙卑柔弱不與物爭保外，天下有好爭者，莫能與不爭者爭，如此則天下無敵也。以不爭之德，能伏天下勇力之人，不在於爭也，故云伏天下之勇者，不在勇而在怯也。怯者，柔弱也。此章明治不能忘智辯勇力之病也。

右第十五章

關尹子曰：天不能冬蓮春菊，是以聖人不違時，也不能洛橘汶貉，是以聖人不違俗。

蓮花夏開，菊花秋開，天不能使蓮花冬開，而菊花春開也，是以聖人不逆天之四季，不違時之通塞也，故云天不能冬蓮春菊，是以聖人不違時也。洛者，嵩洛之地也，橘者，柑子也，多生江南暖處，移來嵩山洛水之畔栽

種之，而變為枳也。汶山所出之水為之汶江，在吳越之地也，狐貉生於江北高原山野，將到江南下濕之地則死也，此二者地氣使然也。既地不能洛地生橘，江南生貉，以此聖人不違夷狄蠻戎中夏之風俗也，故云地不能洛橘汶貉，是以聖人不違俗也。

聖人不能使手步足握，是以聖人不違我所長，聖人不能使魚飛禽馳，是以聖人不違人所長。

以掘為手所長，以步為足所長，雖聖人豈能使手步足握，易手足之用哉，以此聖人不違拒我之六用所長也，故云聖人不能使手步足握，是以聖人不違我所長也。長者以能為為長，以不能為為短也，魚以水中能游為長也，禽以空中能飛騰為長也，馳者，馬走速也，雖聖人，豈能易魚禽游馳飛騰哉，以此聖人不違拒衆人所長之用也，故云聖人不能使魚飛禽馳，是以聖人不違人所長也。夫如是者，可動可止，可晦可明，惟不

可拘，所以為道。

如是者，已上所說聖人不違時、不違俗、不違我所長、不違人所長之四者也。如此不違四者，可動時，亦不違時之動，可止時，亦不違時之止，可晦時，亦不違時之晦，可明時，亦不違時之明。惟能不違拒造物之變化，不拘泥於死法，所以應變無窮而為妙道也。故云夫如是者，可動可止，可晦可明，惟不可拘，所以為道也。此章明治不能隨時達變之病也。

右第十六章

關尹子曰：少言者，不為人所忌；少行者，不為人所短；少智者，不為人所勞；少能者，不為人所役。

學道之人，慎言儉語則寡過，不為衆人之所忌憚也，故云少言者，不為人所忌也。於利名場上，慎多貪進行履，則不為衆人所嫉妬短遏也，故云少行者，不為人所短也。智慧收藏，儉於使用，則不為衆人之所勞苦也，故云少智者，不為人所勞也。大巧

若拙，儉施其能，則不為衆人所役使也，故云少能者，不為人所役也。此章明治不能忘言行智能之病也。

右第十七章

關尹子曰：操之以誠，行之以簡，待之以恕，應之以默，吾道不窮。

操者，持也，誠者，真實也，簡者，不繁也，行者，無住也，待者，應也，恕者，寬裕包容也。了悟真空實有，保任護持，無住種種之邊，如此簡當不繁也，故云操之以誠，行之以簡也。與衆同處，或御群下，但應之以寬裕包容，不見人之過失，曲全己德也，故云待之以恕也。或有人來叩問，但動容密示，不假言教，利根頓悟，與吾所悟之道俱無窮極也，故云應之以默，吾道不窮也。此章明治不達誠簡恕默之病也。

右第十八章

關尹子曰：謀之於事，斷之於理，作之於人，成之於天，事師於今，理師於古，事同於人，道獨於己。

圖謀人事，以理裁斷而合其宜也，故

云謀之於事，斷之於理也。所作之事，力與不力在人為，而成與不成在天命也，故云作之於人，成之於天也。事以今人為師，理以古人為師也，故云事師於今，理師於古也。事者用也，用雖與眾人同，而了悟妙道，應變常寂，無染清靜，不與眾人同也，故云事同於人，道獨於己也。此章明治不能事理圓通之病者也。

右第十九章

關尹子曰：金玉難捐，土石易捨，學道之士，遇微言妙行，慎勿執之，是可為而不可執，若執之者，腹心之疾，無藥可療。

金玉者，喻聖人之言行也，土石者，喻凡人之言行也，金玉雖貴，入眼為塵，大道無名跡，故言行不可及也，學人於聖人之言行難忘，如世人難捨金玉也，故云金玉難捐也。學人於凡人之言行容易忘之，如世人易捨土石也，故云土石易捨也。學道之士，若遇聖人微言妙行，慎勿執著不忘也，故云學道之士，遇微言妙

行，慎勿執之也。聖人之妙行，可為之而成德，而不可執著聖人妙行之跡也，故云是可為不可執也。若執著之者，如人皮膚有病，容易治療，若人病在心腹，雖盧醫扁鵲，亦不能療治，迷人執著聖人妙行之跡，亦復如是也，故云執著之者，腹心之疾，無藥可療也。此章明治不能忘言行之病也。

右第十二章

關尹子曰：人不明於急務，而從事於多務他務奇務者，窮困災厄及之，

急務者，道德也，多務者，萬法也，他務者，傍門伎藝也，奇務者，異世之術也。學人不明了道德為簡要急切之務，而務泥萬法，或學傍門小法，或學醫卜工伎之藝，或學異世奇怪之術，學雖不同，失於道德者一也，失於道德而墮輪迴，動經塵劫，無有出期，此窮困災厄莫大於是也，故云人不明於急務，而從事於多務他務奇務者，窮困災厄及之也。從事者，務泥也，及之者，墮輪迴也。

殊不知道無不在，不可捨此就彼。

此者，身心道德急切之務也，彼者，多務他務奇務也。學人殊不知道無不在，即此身心是道也，既道無不在，何獨身心道不在哉。身心從道生，如漚從水生，即漚是水也，即此身心是道，亦復如是也，既悟即此身心是道，不可捨此身心，就彼多務他務奇務求道德也，故云殊不知道無不在，不可捨此就彼也。此章明治不能以道德為務之病也。

右第二十一章

關尹子曰：天下之理，捨親就疏，捨本就末，捨賢就愚，捨近就遠，可暫而已，久則生害。

親者，性命也，疏者，財色也，本者，道也，末者，五常百行萬法也，賢者，智慧之德也，愚者，癡迷也，近者，慈善也，遠者，衆惡也。天下之道理，學人迷之，捨性命道德慈善，而就泥財色萬法，癡迷之衆惡，可暫樂妄情，而久泥不悟，墮輪迴生死，胎卵濕化，無有了期，害莫大於此也。故

云天下之理，捨親就疏，捨本就末，捨賢就愚，捨近就遠，可暫而已，久則生害也。此章明治不悟道之病也。

右第二十二章

關尹子曰：昔之論道者，或曰凝寂，或曰邃深，或曰澄徹，或曰空同，或曰晦冥，慎勿遇此而生怖退。

凝者，定也，寂者，靜也，邃者，幽也。昔之古人論道者，或言泰定安靜者，或言道幽深難窮者，或言道如水之澄徹淵奧者，或言道如虛空廣大者，或言道隱晦杳冥莫測者，學人若遇此，或言凝寂、邃深、澄徹、空同、晦冥之五者，慎勿生怕怖之心，以為道之難學而退怠也。故云昔之論道者，或曰凝寂，或曰邃深，或曰澄徹，或曰空同，或曰晦冥，慎勿遇此而生怖退也。

天下至理，竟非言意，苟知非言非意在彼微言妙意之上，乃契吾說。

天下至理者，道也，竟者，終也。向來所論之言凝寂、邃深、澄徹、空同、

晦冥之五者，總屬名相妄情之意識也，道本無名無情，窮究到徹盡之處，終非言意之可及也，故云天下至理，竟非言意也。誠知非言意之可及，在彼古人微言妙意未萌之前，薦悟了然，洞徹本來見成之道，元自清淨具足，不假修為外求也，如此了悟，乃契合所說之義也。故云苟知非言非意在彼微言妙意之上，乃契吾說也。上者，前也，苟者，誠也。此章明治未了根塵之病也。

右第二十三章

關尹子曰：聖人大言金玉，小言桔梗芣苢，用之當，桔梗芣苢生之，不當，金玉斃之。

聖人大言者，如《道德》、《陰符》二經，如金玉之貴也，故云聖人大言金玉也。桔梗者，草藥之名也，能治風濕之疾也。芣苢者，亦草藥之名也，一名車前草，能治赤白瀉痢之疾也。小言者，如後聖詩詞直言語錄也。或因詩詞直言語錄悟之而了道，如桔梗芣苢之草藥治痊風濕痢疾，而

人復安樂得活也。故云小言桔梗芣苢，用之當，桔梗芣苢生之也。用之當者，治痊疾也，生者，活也，或人背誦《道德》、《陰符》二經如同流水，而不能開悟了道者，如服金玉貴細之藥，不能痊愈風濕瀉痢之疾，以至於喪生也。故云不當，金玉斃之也。此章明治分別經言精麤之病也。

右第二十四章

關尹子曰：言某事者，甲言利，乙言害，丙言或利或害，丁言俱利俱害，必居一於此矣，喻道者不言。

某者，代稱之辭也。世人言論事理，所見不同，一人名甲，言論此事，有利益於世也，一人名乙，言論此事，有損害於世也，故云言某事者，甲言利，乙言害也。一人名丙，言論此事，或有益於世，或亦有損害於世也，故云丙言或利或害也。一人名丁，言論彼此之事，行之正，俱利益於世，彼此之事，行之不正，俱害損於世也，故云丁言俱利俱害也。

甲乙丙丁四人，各論利害不同，然必有一人言之當，安於理也，故云必居一於此矣。居者，安也。道本無名，不可以言比喻，在人心了悟而已，非如事有利害之比喻也，故云喻道者不言也。此章明治未忘利害之病也。

右第二十五章

關尹子曰：事有在事言有理，道無在道言無理，知言無理，則言言皆道，不知言無理，雖執至言，為梗為醫。

世間萬事，所用各有下落，言論一事，自有一理所在也，故云事有在事言有理也。道無處所下落，亦不屬名言事理，聖人之言皆無言之言，以薦言外之旨，若了悟無言之言，不屬事理，則終日言而未嘗言，言言無非道也。知者，悟也，若不悟無言之言，不屬事理，雖執至人之言於道眼上，如人咽喉有物梗塞，又如人眼內有塵眯障也，故云不知言無理，雖執至言，為梗為醫也。醫當作醫。此章明治未忘事理之病也。

右第二十六章

關尹子曰：不信愚人易，不信賢人難，不信賢人易，不信聖人難，不信一聖人易，不信千聖人難。

不信者，不執泥而染著也，凡愚人之言行，不執泥染著則容易，至於賢人之言行則難忘也，故云不信愚人易，不信賢人難也。不執泥染著一聖人之言行，又亦容易，至於千聖人之言行尤難忘也，故云不信一聖人易，不信千聖人難也。

夫不信千聖人者，外不見人，內不見我，上不見道，下不見事。

若夫學人不執泥染著千萬聖人之言行，則心忘名跡，冥然契道，而迥超凡聖人我事理之名跡也，故云不慕諸聖，不重己靈，正謂此也。故云夫不信千聖人者，外不見人，內不見我，上不見道，下不見事也。道者，理也。此章明治未忘凡聖之病也。

右第二十七章

關尹子曰：聖人言蒙蒙，所以使人聾，聖人言冥冥，所以使人盲，聖人言沉沉，所以使人瘖。

聖人之言，盡是無言之言，令人於無言之言，薦悟言外之旨，言外之旨不屬聲，故學人蒙蒙然，迷情障蔽不可得而聞之，如患聾一般也，故云聖人言蒙蒙，所以使人聾也。言外之旨不屬於色，杳杳冥冥，視之不見，令人如患盲病一般也，故云聖人言冥冥，所以使人盲也。言外之旨不屬於名，沉沉靜靜，言之難議，令人如患瘖瘖之病也，故云聖人言沉沉，所以使人瘖也。

惟聾則不聞聲，惟盲則不見色，惟瘖則不音言。

惟患耳聾之病者，則於聲無所聞也，故云惟聾則不聞聲也。惟患目盲之病者，則於色無所見也，故云惟盲則不見色也。惟患瘖瘖之病者，則於聲無所言也，故云惟瘖則不音言也。不聞聲者，不聞道、不聞事、不聞我，不

見色者，不見道、不見事、不見我，不音言者，不言道、不言事、不言我。

言外之旨，既聽之不聞其聲，未若如患耳聾，亦不聞道、事、我三者之聲也，故云不聞聲者，不聞道，不聞事，不聞我也。言外之旨既視之不見其色，未若如患眼盲，亦不見道、事、我三者之色也，亦不生此見解也，故云不見色者，不見道，不見事，不見我也。言外之旨既議之無名，未若患瘖瘂不能言者，亦不言道、事、我三者之名也，故云不音言者，不言道，不言事，不言我也。此章明治未忘色聲名道事我之病也。

右第二十八章

關尹子曰：人徒知偽得之中有真失，殊不知真得之中有真失，徒知偽是之中有真非，殊不知真是之中有真非。

學人謾知認著妄得以為誠失於至道，殊不知真得之見，亦誠失於至道也，如金屑雖實，入眼則為塵翳也，故云人徒知偽得之中有真失，殊不知真得之中有真失也。偽者，妄也，

真者，誠也，徒者，謾也。學人謾知認著妄是以為誠非，殊不知認著真是亦為誠非也，故云徒知偽是之中有真非，殊不知真是之中有真非也。此章明治未忘真假之病也。

右第二十九章

關尹子曰：言道者如言夢，夫言夢者曰：如此金玉，如此器皿，如此禽獸，言者能言之，不能取而與之，聽者能聞之，不能受而得之，惟善聽者，不泥不辯。

大悟大徹之士，如人睡夢覺來，方知夢中所見之境，皆是妄想顛倒識見之所成也，未能大悟大徹之士，以識見能通萬法，為人談演妙道，皆是夢中說夢也，故云言道者如言夢也。夢中說夢曰：夢見如此金寶大山，巍峨無量，如此玉洞，廣闊幽深難測，此二者喻以道德為靈寶洞玄，廣大幽深無量難測也，故云夫言夢者曰，如此金玉也。又夢中說夢曰，夢見如此玉器金皿，使用無數，此喻建立妙用，普利衆善萬行也，故云如此

器皿也。又夢中說夢曰，如此烏兔龜鳳龍虎，此喻金烏玉兔，烏龜赤鳳，白虎青龍，陰陽造化也，故云如此禽獸也。夢中說夢見此金玉器皿禽獸，說者但能說之，不能取金玉器皿禽獸與聽說之人也，此喻聖人不能出道以示與學人也，故云言者能言之，不能取而與之也。夢中聽說夢境之人，但聞說如此金玉器皿禽獸，不能承受取得之也，此喻學道者因師方便點化，言下自悟不從外得也，故云聽者能聞之，不能受而得之也。惟有利根者善聞道德玄妙，不執泥筌蹄，不辯論聖人無言之言，但因聖人無言之言，薦悟言外之旨，了悟不可思議之道也，故云惟善聽者，不泥不辯也。此章明治未悟談道之病也。

右第三十章

關尹子曰：圓爾道，方爾德，平爾行，銳爾事。

爾者，學道之人也。天下學道之人，但能詳讀審誦九篇，精之研之，究之

徹之，自然了悟不可思議之至道，人具足，箇箇圓成，不假修為，位齊諸聖也，故云圓爾道也。方者，正也，德者，道之用也。天下學道之人，若因經了悟不可思議之至道，仍要護持保任也。如何護持保任？但能以無為清淨，逍遙自在，不染不著護其內，以謙卑柔弱，不與物爭護其外，次又正其妙用，用之於衆，善利物安人，不求報恩，皆為用之正，而成上德也，故云方爾德也。天下學人，若因經了悟不可思議之至道，護持保任，要成上德，須是自利利他，平等普惠，不擇貴賤貧富，男女妍醜，仁慈等利，無偏無黨，以成萬德之妙行也，故云平爾行也。銳者，利也，事者，用也。天下學人，因經了悟不可思議真空妙有之道，以為真心之體，以至德妙行為真心之用，自利利他，於事無往不利也，故云銳爾事也。此章尹君自述一經之旨趣也。

右第三十一章

文始真經註卷之九

- ① 據前之經文，此句當作「小蟲毒身也」。
- ② 據前經文，「不夫」當作「不失」。
- ③ 「也不能」，《關尹子》和《無上妙道文始真經》皆作「地不能」。

④ 「為醫」，《關尹子》作「為醫」。

文始真經後序

晉葛仙翁撰

洪體存蒿艾之質，偶好喬松之壽，知道之士，雖微賤必親也，雖夷狄必貴也。後遇鄭君思遠，鄭君多玉笈瓊笥之書，服餌開我以至道之良藥，呼吸洗我以紫清之上味，後屬洪以尹真人《文始經》九篇，洪愛之誦之，藏之拜之。宇宙者，道也，柱者，建天地也，極者，尊聖人也，符者，精神魂魄也，鑑者，心也，匕者，食也，釜者，化也，籌者，物也，藥者，雜治也。洪每味之，泠泠然若躡飛葉，而游乎天地之混溟，茫茫乎若履橫杖，而浮乎大海之渺漠，超若處金碧琳琅之居，森若握鬼魅神姦之印，倏若飄鸞鶴，怒若鬥虎兕，清若浴碧，慘若夢紅，擒縱大道，渾淪至理，方士不能到，先儒未嘗言，可仰而不可攀，可玩而不可執，可鑒而不可思，可符而不可言，其忘物遺世者之所言乎，其絕跡去智者之所言乎，其同陰陽而冥彼

此者之所言乎！何如此之尊高，何如此之廣大，又何如此之簡易也。洪親受之。

咸和二年五月朔丹陽葛洪稚川序

（曾召南點校）

004 文始真經言外旨

經名：文始真經言外旨。陳顯微撰，成書於南宋寶祐二年（1254）。九卷。底本出處：《正統道藏》洞神部玉訣類。參校本：一、《文始真經》；二、《叢書集成初編》所收《關尹子》。

文始真經言外旨序

愚聞三教鼎立於天地間，如三光在天，相須爲明，不可偏廢也。三家經文充府滿藏，其間各有精微極至之書，吾儒六經皆法言，而最精微者《易》也，釋氏大藏累千萬軸，最精微者《楞伽》也，道家大藏亦千萬卷，最精微者《關尹子》書也。三書之在三教，如三光之在三才，然三光雖明，人無眼目，無由見其明，三書雖妙，世無慧哲，無由知

其妙，故三書雖存，旨昧久矣，《傳》曰：苟非其人，道不虛行，信哉。嗚呼！儒更三聖之後，《易》變而爲象數卜筮之書。釋傳四燈之後，《楞伽》變而爲象教之文。道歷秦漢而來，《關尹子》書付淮南方術家矣。況乎道隱小成，言隱浮僞，至人不常生，至言不常行，宜乎《關尹子》書祕而不傳於世矣。雖然天地至靈之氣，發而爲文，載道之言，陰有神護，終不可泯，行之有時爾。《易》自孔子之後數千年，至陳希夷始傳心法。《楞伽》自瞿曇涅槃數千年，至達磨始傳于中國。今《關尹子》書自老子西征出關，亦數千年矣，抱一先生始發明此書玄奧。然此書句讀且難，況通其義耶！先生證悟道真，慈愍後學，乃探老關骨髓，述成言外經旨。或因言而悉旨，或轉語以明經，或設喻以彰玄，或反辭而顯奧，或句下隱義，或言外漏機，或指意於言前，或顯微於意外，大率多《關尹子》言外之旨，故總其多者目之曰《言外經旨》。是書也，真所謂剖大化之祕藏，增日月之光明，泄

大《易》未露之機，述《楞伽》祕密之蘊，即伏羲之本心，盡姬文之神思，探仲尼之精微，究諸佛之命脉，窮諸祖之骨髓，顯黃帝之機緘，露老聃之肺腑也。學者得見此書，誠爲不世之遇，豈可不知其幸耶！愚蒙師親授，得悟道真，無以報稱師恩，敬鋟于梓，傳之無窮，使天下後世志道君子得遇此書，言下打發，了悟道真，皆吾師抱一先生無窮之德施也。是書在處，當過於佛乘之經，陰有神天護持，豈可輕慢耶？！學者當歲拜莊誦，如葛稚川可也。故爲之序。有宋寶祐二禩長至日，門弟子希微子王夷再拜炷香謹序。

漢劉向進《關尹子》書

右新書著定《關尹子》九篇，護左都水使者光祿大夫臣劉向言：所校中祕書《關尹子》九篇，臣向校讎太常存七篇，臣向本九篇，臣向輒除錯不可考，增缺斷續者九篇成，皆殺青，可繕寫。關尹子名喜，號關尹子，或曰關令子隱。

德行，人易之，常請老子著《道德經》上下二篇，列禦寇、莊周皆稱道家書。篇皆寓名有章，章皆首「關尹子曰」四字，篇篇序異，章章義異，其旨同辭與老列莊異，其歸同，渾質崖戾，汪洋大肆，然有式則，使人泠泠輕輕，不使人狂。蓋公授曹相國參，曹相國薨，書葬。至孝武皇帝時，有方士來以七篇上，上以僊處之，淮南王安好道聚書，有此不出。臣向父德因治淮南王事得之，臣向幼，好焉，寂士清人能重愛黃老清淨不可闕，臣向昧死上。永始二年八月庚子，護左都水使者光祿大夫臣劉向所校《關尹子》書謹進上。

文始真經言外旨序

夫道本無名，《老子》曰有物混成，先天地生。吾不知其名，強名曰道。既曰無名，而不知其名矣，則不可以言言也，如是，則聖人於道，惟當不立言，不立文字，然聖人欲曉天下後世，苟不強立其名以述其實，則所謂道者，將絕學而無傳矣。關令尹望雲氣，以候老子出關，邀而留之，師其道，而請立言以惠天下後世，則聖人慈愍後學之心至矣。及乎得老子之道，傳五千言之後，乃述是書，以曉天下後世，而露五千言之所未述之旨。然是道也，不可名言之道也，而是書也，所述無言之言也，則其言豈可以百家窺哉，宜乎莊子聞其風而悅之，自以其學出於關尹，而稱之為古之博大真人也，列禦寇亦師之以傳其道焉。嗚呼！至人不常生，至言不常聞，而關尹之書，自昔以來，祕傳於世，少有知者。雖聖明之朝，以莊列二書名之為經，而是書不傳，不得

上達，使莊列二子有知，豈不有愧於地下乎！莊子不云乎，不離於宗，謂之天人，不離於精，謂之神人，不離於真，謂之至人。以天為宗，以德為本，以道為門，兆於變化，謂之聖人。今觀是書，則知關尹子咸備四者之道，宜其稱之為博大真人矣。自清濁兆分以來，未有立言垂訓，顯道神德，至精至微，至玄至妙，如此書者也。葛稚川謂擒縱大道渾淪至理，先儒未嘗言，方士不能到。惟其尊高也，故淺近者不能窺，惟其廣大也，故孤陋者不能造，惟其簡易也，故該博者不能測。學者望之不及，研之不得，契之不可，咀之無味，捫擷無門，探索無路，甚至指為偽書，以為出於漢儒之口。噫，是書也，莊列不能言，文程不能道，而謂漢儒能述之乎！自漢明帝時，西域之教始流入中國，而其書最精微者，《楞嚴》《楞伽》《金剛》《法華也》，其所言之神通妙義，變化正魔，以至無我無人之說，悉先述於是書矣。然其言簡其義詳，又非重譯之書所可比擬也。關尹聖人，生周末之世，

與孔子同時，二聖人皆親見老子，故其言間有一二與孔子同者，如朝聞道，夕死可矣之類，豈所聞所見亦有同得者乎。今觀是書首篇之言，似發明五千言之旨，而爲《道德經》作傳也，學者當與《道德經》參觀之，庶幾心釋神悟於是書矣。若夫因是書感悟之後，而復隨世俗一曲之士，輕生誣謗，不生恭敬，侮聖人之言，則其人，本以心之神靈者悟是書之旨，必復爲心之不神不靈者昧其性天，而隨失其悟矣。是書之靈，必至如是讀是書者，可不若葛稚川愛之誦之，歲之拜之哉！今欲於強名之下強字表德，故述言外經旨。有宋寶祐二年歲在甲寅重陽日，抱一子陳顯微再拜炷香敬序。

抱一子曰：宇者，盡四方上下之稱也，故以一字冠篇首。謂無是宇，則無安身立命之地，道則徧四方上下無不在焉，無是道，則天地造化或幾乎廢矣，故一字者，道也。宇既立，不可無柱，故以二柱次之。柱者，建天地也，

天地定位，聖人居中。聖人者，道之體也，聖人建中立極，故以三極次之。三才既立，四象位焉，故以四符次之。符者，契神之物也，故爲精神魂魄。五居數之中，心居人之中，故以五鑑居中，以明真心能照也。然無形，則心無所寓，故以六七次之。七者，食也，食以養形，故形食一體，形久則化，故以七釜次之。釜者，變化萬物之器也，釜中不可無物，故以八籌次之。籌者，物也，物物可爲藥，藥可以雜治，故以九藥終之。九者，究也，盡也，物至於爲藥，功用極矣。然藥之功，復能活人，有復生之理，以明萬物皆具是氣是性，可以生物，不逐形盡也，故以藥終焉。今將九篇分爲三卷，以見自一生三，自三成九之義。至九則復變爲一，而無窮矣。原上中下三卷，今離爲九卷

文始真經言外旨卷之一

抱一子陳顯微述

一字篇

宇者，道也，凡二十八章。

關尹子曰：非有道不可言，不可言即道。非有道不可思，不可思即道。天物怒流，人事錯錯然，若若乎回也，戛戛乎鬥也，勿勿乎似而非也。而爭之，而介之，而哢之，而噴之，而去之，而要之。言之如吹影，思之如鏤塵，聖智造迷，鬼神不識。惟不可爲，不可致，不可測，不可分，故曰天，曰命，曰神，曰玄，合曰道。

抱一子曰：《老子》曰：道可道，非常道，名可名，非常名。世之學者，罕見關尹子書，而多以百家之言及臆說解之，愈不能明老子之旨。關尹謂：使有道不可言，則道與言爲二，惟不可言即道，則言與道爲一，學者驟觀，非有道不可言，多誤認爲

有道可言，若有道可言，則當云有道，非不可言，不曰非有道不可言也。今日非有道不可言，不可言即道，是則翻老子之言，以明老子言外之旨也。此言翻之，則曰非有道不可道，不可道即道，既翻出不可道即道，則翻出道可道非道矣，道可道非道，即是《老子》道可道，非常道也。或者猶疑可道為口道之道，愚又翻經言以曉之，曰：如曰空可空，非真空，使其可空，即是有物，窒而不空之處，豈謂之真空乎，知空可空非真空，則知道可道非常道矣。或者喻曰：如心心如性性，皆可用功以人為，而道獨不可以人為，故不可以道也，向非翻言外之言，吾終世不能明《老子》之經旨矣。世人又多被常字轉了，將謂《老子》有非常之道，然《老子》立此常字者，政恐世人疑吾所謂道有異乎人也，殊不知此乃通天下之常道爾，猶強名曰道者，通天下之常名爾。是道也，通天徹地，亘古亘今，無往而不在，纔開口言，則

去道遠矣。故曰二也，纔指此強名之名為可名，則非名矣。惟不可名，故假常名強名之，猶曰非有名不可名，不可名即名也，是則不可言即道，不可名即名，即《老子》可道則非常道，可名則非常名之意也。然則老子大聖人也，其言如天之不言之言，非有大聖人如關尹子者，疇能復以不言之言，發明其言外之旨哉。然關尹子既發明不可名言之旨矣，又恐世人謂道不可名言，則可以思而得之，故又曰非有道不可思，不可思即道，與上意同。噫！可言可思皆人也，不可言不可思皆天也，然則人與天果可以異觀乎？曰人皆可曰天，然則人與天果可以同觀乎？曰天物怒流，人事錯錯然，有相若而回者，有相戛而鬥者，有相勿而似而非者，或爭而目以心鬥，或介而不交於物，或覘而呵叱之，或噴而呼喚之，或去而離之，或要而合之，天物人事，不齊如此，豈可以同觀哉！今欲以人之言思及之，譬如吹影鏤塵，徒

勞心耳。是道也，聖智造之猶迷，鬼神測之不識，惟其不可為，故曰天不可致，故曰命不可測，故曰神不可分，故曰玄，合是四者，強名曰道。關尹子曰：無一物非天，無一物非命，無一物非神，無一物非玄。物既如此，人豈不然。人皆可曰天，人皆可曰神，人皆可致命通玄。不可彼天此非天，彼神此非神，彼命此非命，彼玄此非玄。是以善吾道者，即一物中知天盡神，致命造玄。學之徇異，名析同實，得之契同，實忘異名。

抱一子曰：《老子》言道，繼之以常無欲以觀其妙，常有欲以觀其徼，同謂之玄，玄之又玄，衆妙之門。關尹子恐學者徇異，名析同實，而並以天命神玄四者異觀之，故於此章重言，即一物中，可以知天盡神，致命造玄，物物皆然，人人本具，不可彼天此非天，彼神此非神，彼命此非命，彼玄此非玄也。是則或曰妙，或曰徼，或曰玄，亦物物皆然，人人本具，惟得之者，契其同有之實，忘其異謂

之名，至於玄之又玄，可以入道矣。

關尹子曰：觀道者如觀水，以觀沼爲未足，則之河、之江、之海，曰水至也。殊不知我之津液涎淚，皆水。

抱一子曰：觀道如觀水，則我與水爲二矣，所觀愈大，所岐愈遠，返照回光，則吾身自有沼河江海也，今之津液涎淚皆水，非吾身中之沼河江海之發見者乎，昧者不知耳。

關尹子曰：道無人，聖人不見，甲是道，乙非道。道無我，聖人不見，已進道，已退道。以不有道，故不無道，以不得道，故不失道。

抱一子曰：有人則我與人爲二，有我則我與道爲二，我不可有，道可有乎，我不可得，道可得乎。惟不有我者，然後能不無我，惟不得我者，然後能不失我，不有不無，不得不失，豈如事物之有成壞得喪哉，彼自執有所得者，烏足以語此。

關尹子曰：不知道，妄意卜者，如射覆盂。高之者，曰存金存玉，中之者，曰存角存羽，卑之者，曰存瓦存石。是乎

是非乎，惟置物者知之。

抱一子曰：使置物者不置物於覆盂之下，則徒勞射覆者卜度矣，是則甲置物而乙射覆，爲兩人矣，今焉，甲自置之而甲自覆之，而不知所置何物，何耶？以物欲爲盂，以識陰爲覆，雖有大智力，亦不能射此覆盂，悟其置也，何則？併與置之時忘之矣，自疑以爲他人置之，而我射之，卜度終身而不能得，一旦揭去物欲之盂，破除識陰之覆，而見其所置之物，方悟置之者非他人，而前日存金存玉、存角存羽、存瓦存石之想，皆妄意也。噫！覆盂之下果何物乎，學者毋以爲未嘗置而昧之。

關尹子曰：一陶能作萬器，終無有一器能作陶者，能害陶者。一道能作萬物，終無有一物能作道者，能害道者。

抱一子曰：謂之器矣，焉能作陶，焉能害陶，謂之物矣，焉能作道，焉能害道，然器不作陶，謂之非陶則不可，物不作道，謂之非道則不可，況器不能害陶，而害陶者必器，物不能

害道，而害道者必物。然器存則陶存，物在則道在，去是器，則陶安在哉，亡是物，則道安在哉，果能去是器乎，器成無盡，果能亡是物乎，物生無窮，惟不器器，謂之善陶，惟不物物，謂之善道，善陶者陶乎陶，善道者道乎道，陶乎陶者，不知其陶，道乎道者，不知其道，不知其陶者無器可作，不知其道者無物可成，器乎、物乎，陶乎、道乎。

關尹子曰：道茫茫而無知乎，心儻儻而無羈乎，物迭迭而無非乎。電之逸乎，沙之飛乎，聖人以知心一、物一、道一，三者又合爲一。不以一格不一，不以不一害一。

抱一子曰：見物便見心，無物心不現，見心便見道，無心道不現。或曰先達以無心是道，其說非乎？又曰無心猶隔一重關，其說信乎？曰見物便見心時，汝領會否？曰會，曰無物心不現時，心安在哉！或者茫然自失。他日復問曰，心可見乎？曰心不可見，孰可見？曰道可見乎？

曰汝以為道與心一乎二乎？曰心與道可一矣，物可與道與心一乎？曰汝欲以不一者害一乎？或者唯唯而退。

關尹子曰：以盆為沼，以石為島，魚環游之，不知幾千萬里而不窮也，夫何故？水無源無歸。聖人之道，本無首，末無尾，所以應物不窮。

抱一子曰：有首有尾者，應物易窮，無本無末者，應物不窮。傳曰：如循環之無端，孰能窮之哉。嘗疑夫太素之先有太始，太始之先有太初，是則道未嘗無本末也。太素者，質之始，太始者，形之始，太初者，氣之始，人能及本還源，自太素以至太初，如上百尺竿頭，至矣盡矣，不可以復上矣。殊不知太初之外，更有所謂太易焉。太易者，未見氣也，是猶向百尺竿頭更進一步，方見太易，無首無尾，無源無歸，莫知所終，莫知所始者矣，雖然學者向百尺竿頭如何進步。

關尹子曰：無愛道，愛者水也，無觀

道，觀者火也，無逐道，逐者木也，無言道，言者金也，無思道，思者土也。惟聖人不離本情而登大道，心既未萌，道亦假之。

抱一子曰：愛、觀、逐、言、思五者，出於心，心生則五者皆生，心冥則五者皆泯。經曰：五賊在心，施行於天。世人有執一端以求道者，或以愛，或以觀，或以逐，或以言，或以思，起心動念，去道愈遙。惟聖人非不愛也，愛未嘗愛，非不觀也，觀未嘗觀，以至非不逐、言、思，而未嘗逐、言、思，故不離本情而登大道，聖人本情豈異於人哉，特心未嘗萌爾。

關尹子曰：重雲蔽天，江湖黯然，游魚茫然，忽望波明食動，幸賜于天，即而就之，漁釣斃焉。不知我無我，而逐道者亦然。

抱一子曰：逐者木也，心已萌也，有心逐道，或遇異景異物，異祥異氣，異光異明，異見異趣，異靈異通，橫執為道，是猶魚望波明食動，即而就之也，惟知我無我，則心無心矣，安

事逐哉。或曰進脩亦逐也，精進亦逐也，皆非也，曰：為學日益，故須精進，退脩以成其德，為道則日損，損之又損，以至於無為，無為無不為，是名真精進。

關尹子曰：方術一作方士之在天下多矣，或尚晦，或尚明，或尚弱，或尚強，執之皆是，不執之皆道。

抱一子曰：修真練性，圓通覺輪，所尚不同，或觀音聲而尚晦，或定光耀而尚明，或運動而尚強，或寂靜而尚弱，是數者，皆可以入道。然執之，則非道也，事也，苟不執之，皆可以入道，執不執之間，相去遠哉。

關尹子曰：道終不可得，彼可得者，名德不名道。道終不可行，彼可行者，名行不名道。聖人以可得可行者，所以善吾生，以不可得不可行者，所以善吾死。

抱一子曰：道不可須臾離也，可離非道也。若夫可得可行，則可失可止，可失可止，則有時而離矣，惟不可得不可行，故須臾不可離，須臾不

可離，則我在是，道在是矣。《易》曰：顯道神德行道，固自我以顯矣，而德行尤不可不神也。然聖人於道有所得者，皆德也，於道有所行者，皆行也，所以積德而不敢失德，累行而不敢失行，功滿三千，大羅為仙，行滿八百，大羅為客，此皆以可得可行者善吾生也。若夫不可得不可行者，安有所謂生，安有所謂死哉？此所以善吾死也。

關尹子曰：聞道之後，有所為有所執者，所以之人，無所為無所執者，所以之天。為者必敗，執者必失，故聞道於朝，可死於夕。

抱一子曰：道果可聞乎？聞於心，而不聞於耳，道果可傳乎？傳於天，而不傳於人，天其可有所執乎？故為者必敗，執者必失，皆人也，以是知朝不聞道於天，則人不真死於夕。關尹子曰：一情冥，為聖人，一情善，為賢人，一情惡，為小人。一情冥者，自有之無，不可得而示，一情善惡者，自無起有，不可得而祕。一情善惡為

有知，惟動物有之，一情冥為無知，溥天之下，道無不在。

抱一子曰：文王之不識不知，孔子之無知，老子之能無知乎，皆聖人之冥情也。自有之無，蕩蕩乎不可名狀，豈可得而示哉，若夫顏孟之仁善，桀跖之暴惡，皆自無起有，昭昭乎不可得而祕也。一情善惡為有知，動物皆然，一情之冥為無知，無知則與太虛同體矣，故曰溥天之下，道無不在。

關尹子曰：勿以聖人力行不息，即曰道以勤成，勿以聖人堅守不易，即曰道以執得。聖人力行，猶之發矢，因彼而行，我不自行。聖人堅守，猶之握矢，因彼而守，我不自守。

抱一子曰：時行則行，時止則止，聖人初何固必哉，時乎用九，則聖人自強不息，非勤也，因時而動，不容息也。時乎用六，則聖人利永貞，非執也，因時而靜，不容動也。《易》曰：動靜不失其時，其道光明，故學道有時節因緣，聖人初何所容心於動靜

哉！善觀聖人者，觀其時而已矣。關尹子曰：若以言行學識求道，互相展轉，無有得時。知言如泉鳴，知行如禽飛，知學如擷影，知識如計夢，一息不存，道將來契。

抱一子曰：言行學識，可以進德修業，不可以求道，捨言行學識四者之外，孰從而求之哉！善求道者，不即四者，亦不離四者，知言如泉鳴，無是非之可辨，知行如禽飛，無善惡之可思，知學如擷影，無得失可驗，知識如計夢，無事理之可尋。是則有言忘言，有行忘行，有學忘學，有識忘識，則幾於道矣。曰：然則道可求乎？曰：求則非求也，不求則真求也，故曰：一息不存，道將來契。

關尹子曰：以事建物即難，以道棄物即易，天下之物，無不成之難，壞之易。抱一子曰：以事建物，天下之人爭趨之，而不憚其難，蓋有為之功，有可把握，成之甚難，而為之甚易也。以道棄物，天下之人咸畏之，而不知其易，蓋無為之功，無可把握，成之

甚易，為之甚難也。大而建立世界，次而建邦立國，以至成家立身，莫不積德累功，日將月就，或經歲，或累年，或終身，或積世，不憚勞苦，庶可晞冀，信不易也。至于一行之差，一念之失，一動之非，一事之悞，則隳壞世界，喪覆邦國，破家亡身，可立而待，故曰成之難，而壞之易也。至於懸崖撒手，自肯承當，不假修為，立地成道，至易也，非天下至剛至健之大丈夫，孰能與於此。

關尹子曰：一灼之火，能燒萬物，物亡而火何存，一息之道，能冥萬物，物亡而道何在？

抱一子曰：天下之物皆有形，有形則有我，若夫有形而無我者，惟火而然。何也？火不自立，附物而現，無我也，使不附于草木金石，火可安在哉！是則天下無復存火矣。然擊之金石，鑽之竹木，則火不期至而至矣，火果有乎，火果無乎，聖人以火喻道，噫，善喻哉。

關尹子曰：人生在世，有生一日死者，

有生十年百年死者^③。一日死者，如息得道。十年百年死者，如歷久得道。彼未死者，雖動作昭智，止名為生，不名為死。彼未契道者，雖動作昭智，止名為事，不名為道。

抱一子曰：昔人謂方生方死，方死方生。蓋方生方死者^④，生非真生，方生方死者，死非真死。今有生一日死者，生果真生乎，死果真死乎，以至十年百年，莫不皆然。何以知其真死？曰：動作昭智者是也，曰：孰不動作昭智？曰：未死者，止名為生，未契道者，止名為事而已。噫，安得真死者而與之語道哉。

關尹子曰：不知吾道無言無行，而即有言有行者求道，忽遇異物橫執為道，殊不知捨源求流，無時得源，捨本求末，無時得本。

抱一子曰：言行可以進德，不可以進道，以言行求道，不惟不可得道，併與德失之矣。何則？彼求道者過於求德，則過用其心，以善言善行為不足為，必求奇言異行，以為跨德入

道之蹊，必有異事契其異言，異物感其異行。學者不悟，橫執為道，未有不遭魔境，如道經佛書之所云者，豈止無時得源，無時得本而已哉，其害有不可勝言者矣。

關尹子曰：習射，習御，習琴，習樂一作習弈，終無一事可以一息得者，惟道無形無方，故可得之一息。

抱一子曰：世事有為，用力甚難，而人樂為，大道無為用力甚易，而人不為。何則？世事如射如御，如琴如碁，有物有則，可師可息，故可漸為之，非積歲累時不能臻其妙；大道無色無形，無數無方，不可師，不可習，不可漸造之，有一彈指頃立地成道者，或積歲累時不得，或一彈指頃得之，相去遠矣。此無他，有為之功，與無為之功不同也。

關尹子曰：兩人射相遇，則工拙見，兩人弈相遇，則勝負見，兩人道相遇，則無可示者，無工無拙，無勝無負。

抱一子曰：孔子見溫伯雪子於魯，目擊而道存，無可示者，無可言者。

世有主賓相見，勘辨正邪，以較高下淺深之學者，兩俱失之矣，安得兩眼對兩眼者，與之相視而笑哉。

關尹子曰：吾道如海，有億萬金投之，不見，有億萬石投之，不見，有億萬汗穢投之，不見。能運小蝦小魚，能運大鯤大鯨。合衆水而受之，不爲有餘，散衆水而分之，不爲不足。

抱一子曰：以海喻道，可謂善喻矣。言其體，則金石汗穢，蝦魚鯤鯨，無所不納，言其用，則合受分散，善利善藏，無所不周。大哉海乎！大哉道乎！雖然使海知有一物存留其中，知有一滴合散其中，則海之爲海殆矣，問海知乎哉！問道知乎哉！關尹子曰：吾道如處暗，夫處明者，不見暗中一物，而處暗者，能見明中區事。

抱一子曰：處暗則不見我而見物，不見我則亡我，而身隱矣，見物則昭智而不昧矣，能亡我，而昭智不昧，聖人之功也。若夫處明，則見我，見我則見明，見明則不見暗中一物，是

則衆人熙熙，如春登臺，我形俱顯，寵辱皆驚，昧於倚伏，而不覺不知者矣，奚取哉。

關尹子曰：小人之權歸于惡，君子之權歸于善，聖人之權歸于無所得，惟無所得，所以爲道。

抱一子曰：人皆有是權，顧所歸如何耳。權者，謂無一定之稱也。夫小人豈一定爲惡耶？能遷就爲善，則君子矣，君子豈一定爲善耶，苟造次爲惡，則小人矣。惟聖人權如虛空，歸無所得，學者於不思善不思惡之際，而求其權之所歸，亦幾矣。

關尹子曰：吾道如劍，以刃割物即利，以手握刃即傷。

抱一子曰：人患不達道，達道之人，斷天下事無難無易，莫不迎刃而解，蓋精神剛明，智慧照徹，物來自明，事至自判，不知其所以然而然也，豈容一毫人力於其間哉！若夫揆吾精神，察吾智慧，何剛何明，何照何徹，是猶以手握刃，不自傷者鮮矣。

關尹子曰：籩不問豆，豆不答籩，瓦不

問石，石不答瓦，道亦不失一作識。問與答與一氣往來，道何在。

抱一子曰：道無問，問無應，是則人與人居，道與道會，有問有答，一氣往來耳。胡不觀諸籩豆瓦石乎，籩與豆終日講禮，而昧者不睹，瓦與石終日談道，而聾者不聽，然則籩之與豆，瓦之與石，有問有答乎，一氣往來乎？

關尹子曰：仰道者跂，如道者駸，皆知道之事，不知道之道。是以聖人不望道而歎，不恃道而豐，不借道于聖，不賈道于愚。

抱一子曰：道不可求也，求之者，不得，道不可道也，逐之者不及，道不可恃也，恃之者不尊，道不可銜也，銜之者不貴。世之學者未造道也，仰而跂之，望而慊然，與夫師而資之，如而駸之，皆求之逐之者也，既造道矣，恃之而自豐，銜之而賈愚，皆不尊不貴者也。是則知道之事，不知道之道耳，於道何有哉！若夫聖人則不師而得，不逐而及，不恃而

有，不銜而貴，前無聖人，後無愚者，獨往獨來，知我者稀，我者貴矣。

文始真經言外旨卷之一

①『致命造玄』，《關尹子》（載《叢書集成初編》）和《無上妙

道文始真經》（載《道藏》慕字號）。

②此句，據前後文意，當作『無得失之可驗』。

③此句，上引二校本皆作『有生十年死者，有生百年死者』。

④按前後文意，此句當作『方死方生者』。

文始真經言外旨卷之二

抱一子陳顯微述

二柱篇

柱者，建天地也，凡十二章。

關尹子曰：若椀若盂，若瓶若壺，若甕若盎，皆能建天地。兆龜數著，破瓦文石，皆能告吉凶。是知天地萬物成理，一物包焉，物物皆包之，各不相借。以我之精合彼之精，兩精相薄^①而神應之。一雌一雄卵生，一牝一牡胎生。形者彼之精，理者彼之神，愛者我之精，觀者我之神。愛為水，觀為火，愛執而觀，因之為木，觀存而愛，攝之為金。先想乎一元之氣，具乎一物，執愛之以合彼之形，冥觀之以合彼之理，則象存矣。一運之象，周乎太空，自中而昇為天，自中而降為地。無有昇而不降，無有降而不昇。昇者為火，降者為水，欲昇而不能昇者為木，欲降而不能降者為金。木之為物，鑽之得火，絞之

得水。金之為物，擊之得火，鎔之得水。金木者，水火之交也。水為精為天，火為神為地，木為魂為人，金為魄為物，運而不已者為時，包而有在者為方，惟土終始之，有解之者，有示之者。

抱一子曰：天地者，萬物父母也，萬物生於天地，而各具天地之體而微也，具是體則具是理，雖椀盂瓶盎，皆有天地，龜著瓦石，皆存吉凶。物之無情者尚爾，況血氣有情者乎？沉人為萬物之靈者乎？精神薄應形理愛觀執存，因攝而生生不窮矣，非天下至達，其孰能與於此。人徒知神為天，而精為地，而不知神火自地昇，精水自天降，欲昇不昇者，為木為人，欲降不降者，為金為物，金木者，水火之交也，故各具水火之性。運而不已，四時生焉，包而有在，四方立焉，四時既生，四方既立，則大中成焉，大中成則土為尊矣，故始之終之，解而分之，示而顯之，皆中土之功也。自夫大中之氣周乎太空，則天自中而昇，地自中而降，而天地

之形分矣，無有昇而不降，無有降而不昇，自上下下自上上下下之精神也。故人之髮根在首，而四肢垂下，魂神自天而降也。草木之根茹在下，而枝莖向上，精魄自地而昇也，禽獸橫生，則根在尾矣。故雖具血氣之情，而雜金木之性，五行交雜，則蠢動蟲虫異稟異根，有不可勝窮者矣。

關尹子曰：天下之人，蓋不可以億兆計，人人之夢各異，夜夜之夢各異，有天有地，有人有物，皆思成之，蓋不可以塵計，安知今之天地，非有思者乎！

抱一子曰：夢中天地人物，與覺時天地人物有以異乎，無以異乎？皆思成之乎？非思成之乎，嬰兒未解思念之時，彼見天地人物，亦不知其為天地人物也，謂之天地人物者，係乎識爾。嬰兒未識之時，能夢天地人物否乎？彼初見之，亦未識之，久而後凝，心水印之，夢斯著矣，猶如玉石鱗角之中，有山川星月凝而結秀，則形狀具存也。然則鱗角有思乎，玉石有思乎？知鱗角玉石之思，

則知天地之思也。

關尹子曰：心應棗，肝應榆，我通天地。將陰夢水，將晴夢火，天地通我。我與天地似契似離，純純合歸。

抱一子曰：天地，形之大者也，人身，形之小者，自形觀之，則有小大之辨，自神觀之，則無離契之分。天之日月明暗，即人之精神盛衰，豈特陰夢水，晴夢火哉，地之五味藥食，即人之五臟好惡，豈特心應棗，肝應榆哉，我與天地一乎二乎？同歸乎？各歸乎？

關尹子曰：天地雖大，有色有形，有數有方，吾有非色非形，非數非方，而天地地者存。

抱一子曰：生生者未嘗生，死死者未嘗死，是則天天者非天，地地者非地也。人徒見有形色數方者，謂之天，而不知非形色數方者，能天天能地地，能生生能死死也。學者識認得真，體會得實，然後知不可以名言，不可以形似。昔人謂非心非物，離性離相，寒山子謂之天中之天，亦

強名也，何可云謂哉。

關尹子曰：死胎中者，死卵中者，亦人亦物，天地雖大，彼固不知，計天地者，皆我區識，譬如手不觸刃，刃不傷手。

抱一子曰：識識易，去識難，稚年一見，皓首不忘，識之粘縛於人如此，可畏哉！彼死胎中死卵中者，不見天地固矣，然在胎在卵之時，有識性乎？無識性乎？苟無識性，則胡為而在胎在卵，然則在胎在卵之中，果有天地乎？果無天地乎？釋氏以識為五音之最微者，以其難忘也，使無識則不生矣，不生則不中胎卵化濕之陰矣。今日計有天地者，皆我區識自計之，天地何嘗期人之識哉，故曰我不觸刃，刃不傷人。

關尹子曰：夢中，鑑中，水中，皆有天地存焉。欲去夢天地者，寢不寐，欲去鑑天地者，形不照，欲去水天地者，盜不汲。彼之有無，在此不在彼，是以聖人不去天地，去識。

抱一子曰：天地有大恩於人，亦有大盜於人，知其盜，則不為其所盜

矣。天地本不盜人，而人自盜之，何則？胸中之天地萬物，始如夢見中，如鑑照終凝於神水，至死不能忘其為盜，豈勝言哉！然夢因寐，鑑因照，水因汲，汲者取也，夢生於視，視生於取，取生於識，故曰不去天地，去識。言天地，則萬物在其中矣。

關尹子曰：天非自天，有為天者，地非自地，有為地者。譬如室宇舟車，待人而成，彼不自成。知彼有待，知此無待，上不見天，下不見地，內不見我，外不見人。

抱一子曰：天不自天，所以天長，地不自地，所以地久，使人不自人，我不自我，則可以同天地之長久矣。天地果待人而成乎，待人而成者，成夫人之胸中之天地爾，待固在彼，成不成在我，故不為天地者，上不見天，下不見地，內不見我，外不見人。

關尹子曰：有時者氣，彼非氣者，未嘗有晝夜。有方者形，彼非形者，未嘗有南北。何謂非氣？氣之所自生者，如搖箠得風，彼未搖時，非風之氣，彼已

搖時，即名為氣。何謂非形？形之所自生者，如鑽木得火，彼未鑽時，非火之形，彼已鑽時，即名為形。

抱一子曰：氣不能生氣，生氣者非氣也，形不能生形，生形者非形也。或曰：氣不能生氣，則不問，敢問形不能生形，則人與萬物以形生形，非乎？曰：枯木死屍亦形也，能生形乎？今人與萬物以形生形者，蓋有非形者存乎其中，雖金石草木，莫不皆然，故聖人獨以火而喻之，以明形之最精者，猶若是，況形之粗者哉。非氣者，搖動則生氣，非形者，鑽磨則生形，氣者天也，有時也，有晝夜也，形者地也，有方也，有南北也，世有尅時日、擇方嚮，以求生氣生形者焉，知時在天地未判之先，方乃自然南嚮之位也哉。

關尹子曰：寒暑溫涼之變，如瓦石之類，置之火即熱，置之水即寒，呵之則溫，吸之則涼。特因外物有去有來，而彼瓦石無去無來。譬如水中之影有去有來，而所謂水者，實無去來。

抱一子曰：愚解《參同契》嘗曰：天地不能晝夜也，以日月往來而為晝夜，天地不能寒暑也，以日月遠近而為寒暑也，此言寒暑之常也。若夫盛夏寒風，三冬暴鬱，此不正之氣，非時之風，倏往忽來，非天地有為也，客氣往來爾。故曰如水中之影有去有來，而所謂水者，實無去來。

關尹子曰：衣搖空得風，氣噓物得水，水注水即鳴，石擊石即光，知此說者，風雨雷電皆可為之。蓋風雨雷電皆緣氣而生，而氣緣心生。猶如內想大火，久之覺熱，內想大水，久之覺寒，知此說者，天地之德皆可同之。

抱一子曰：人知精神魂魄，猶天之風雨雷電，風雨雷電出於天，而人且能為之，而自己之精神魂魄，豈不能自生自養，自保自鍊乎。知搖空得風，則鼓吾橐籥可以生氣，知噓物得水，則胎吾之氣可以化精，知注水則鳴，則鍊吾之精可以制魄，知擊石即光，則鍛吾之魄可以益神。是則觀天之道，執天之行，而陰符之制在

氣，而氣之制在心，想火則熱，想水則寒，潛天而天，潛地而地，千變萬化，無不可為矣，德同天地，信哉。

關尹子曰：五雲之變，可以卜當年之豐歉，八風之朝，可以卜當時之吉凶，是知休咎灾祥，一氣之運耳。渾人我，同天地，而彼私智認而已之。

抱一子曰：五雲八風，有灾有祥，皆一氣之運，而預見休咎于天地者也，氣之為氣，神矣哉！靈矣哉！而昧者不知也。一人感之，而五雲為之變，八風為之遷，蓋有至靈至神者存乎其中，如是，則曰人曰我，曰天曰地，莫不貫通，而私智認為己有，安知虛徹靈通大同之道哉。

關尹子曰：天地寓，萬物寓，我寓，道寓，苟離於寓，道亦不立。

抱一子曰：寓者，在己無居之謂也。昔人謂人生天地之間，若白駒之過隙，忽然而已。非寓而何？我寓，則天地寓，天地非自成，待我天天地地而成也，故我寓，則天地寓，天地寓，則萬物寓。我與天地萬物皆寓矣，

而道獨不寓而長存焉，則我與道為二矣，道何立哉？其人存，則其道存，其人亡，則其道息，故苟離於寓，道亦不立。

文始真經言外旨卷之二

① 此句，《關尹子》作「兩精相搏」。

② 此句，《關尹子》（載《叢書集成初編》）和《無上妙道文始真經》（載《道藏》慕字號）皆作「純純各歸」。

文始真經言外旨卷之三

抱一子陳顯微述

三極篇

極者，尊聖人也，凡二十七章。

關尹子曰：聖人之治天下，不我賢愚，故因人之賢而賢之，因人之愚而愚之。不我是非，故因事之是而是之，因事之非而非之。知古今之大同，故或先古，或先今，知內外之大同，故或先內，或先外。天下之物無得以累之，故本之以謙，天下之物無得以外之，故含之以虛，天下之物無得以難之，故行之以易，天下之物無得以窒之，故變之以權。以此中天下，可以制禮，以此和天下，可以作樂，以此公天下，可以理財，以此周天下，可以禦侮，以此因天下，可以立法，以此觀天下，可以制器。聖人不以一己治天下，而以天下治天下，天下歸功於聖人，聖人任功於天下，所以堯舜禹湯之治天下，天下皆曰自然。

抱一子曰：天無為，而萬化成，聖人無為，而天下治。聖人何心哉？人徒見夫制禮作樂、理財禦侮、立法制器，周濟曲成而不遺，將謂聖人物物思之，事事計之，而以一己之智力當天下之事物也。殊不知聖人本之以謙，含之以虛，行之以易，變之以權，因人之賢而賢之，因之愚而愚之^①，因是是之，因非非之，不以古今而先後其心，不以內外而輕重其事，而以天下治天下也，天下歸功於聖人，聖人不自以為功，而任功於天下。是道也，堯舜禹湯得之，故皆曰自然。

關尹子曰：天無不覆，有生有殺，而天無愛惡。日無不照，有妍有醜，而日無厚薄。

抱一子曰：聖人猶天也，物有生殺，天無愛惡，聖人猶日也，物有妍醜，而日無厚薄，是蓋聖人無為無心之治也。

關尹子曰：聖人之道天命，非聖人能自道，聖人之德時符，非聖人能自德，聖人之事人為，非聖人能自事，是以聖

人不有道，不有德，不有事。

抱一子曰：聖人無我，故道以天命，不自有道也，德以時符，不自有德也，事以人為，不自有事也。彼執有道有德有事者，庸人爾，焉能忘我哉！

關尹子曰：聖人知我無我，故同之以仁，知事無我，故權之以義，知心無我，故戒之以禮，知識無我，故照之以智，知言無我，故守之以信。

抱一子曰：聖人之五常，亦猶衆人之五常，夫豈異乎人哉，特衆人之五常未能忘我，而聖人之五常本於無我，此其所以異乎人矣。仁無我，則同天下之我以為仁，義無我，則權天下之事以為義，禮無我，則戒天下之心以為禮，智無我，則照天下之識以為智，信無我，則守天下之言以為信，此其所以不可跂及歟！

關尹子曰：聖人之道，或以仁為仁，或以義為仁，或以禮以智，以信為仁，仁義禮智信，各兼五者，聖人一之不膠，天下名之不得。

抱一子曰：以仁為仁，天下之人能與知而與行，至於以義以禮以智以信為仁，則非天下至聖，其孰能與此。何則？舉一常而五常備，五換循環各兼五者，視賢智之士厚於仁而薄於義，智有餘而信不足者，大有徑庭也。《易》曰：仁者見之謂之仁，智者見之謂之智。然則聖人之道，混混淪淪，何可得而名狀哉，故曰聖人一之不膠，天下名之不得。

關尹子曰：勿以行觀聖人，道無蹟，勿以言觀聖人，道無言，勿以能觀聖人，道無為，勿以貌觀聖人，道無形。

抱一子曰：道無形，無蹟，無言，無為，學者何從而求之哉？不已，則求諸聖人。聖人者，道之體也，然果可求之於聖人乎？求之於聖人者，不過言貌行能而已，愈失之矣，捨言貌行能之外，何從而觀聖人哉？善觀聖人者，觀其心而不觀其迹，然則聖人之心果可觀乎，果不可觀乎，界異於吾心乎^②，果不異於吾心乎？前章有言曰：不借道於聖，此之謂也。

關尹子曰：行雖至卓，不離高下，言雖至工，不離是非，能雖至神，不離巧拙，貌雖至殊，不離妍醜，聖人假此以示天下，天下冥此，乃見聖人。

抱一子曰：聖人本無言貌行能，不得已而假此以示天下，人徒見聖人言之工，貌之殊，行之卓，能之神，而謂道在夫四者之間，而有是非妍醜，高下巧拙之辯，愈不足以識聖人矣。學者冥此，而於四者之外觀之，斯善學矣。

關尹子曰：聖人師蜂立君臣，師蜘蛛立網罟，師拱鼠制禮，師戰螳置兵。一作制兵衆人師賢人，賢人師聖人，聖人師萬物，惟聖人同物，所以無我。

抱一子曰：衆師賢，賢師聖，聖師萬物，固矣。然則聖人果師蜂而立君臣，師蛛鼠螳而置網禮兵乎？聖人同物置作無我，天下之物皆聖人之師也，物生自然，聖人師其自然而已矣，聖人何心哉。

關尹子曰：聖人之於衆人，飲食衣服同也，屋室舟車同也，貴賤貧富同也，

衆人每同聖人，聖人每同衆人，彼仰其高，侈其大者，其然乎，其不然乎。

抱一子曰：聖人之處世，和其光，同其塵，惟恐自異於衆人，而其起居衣食，貧富貴賤，何敢異於人哉，使人仰其高，侈其大者，聖人所懼也。士成綺見老子而問曰：吾觀子非聖人也，鼠壤有餘蔬，生熟不盡於前，而積斂無崖，老子漠然不應。然則聖人之處世，豈容衆人之仰侈哉。

關尹子曰：聖人曰道，觀天地人物皆吾道，倡和之，始終之，青黃之，卵翼之，不愛道，不棄物，不尊君子，不賤小人。賢人曰物，物物不同，旦旦去之，旦旦與之，短之長之，直之方之，是爲物易者也。殊不知聖人鄙雜廁，別分居，以爲人，不以此爲己。

抱一子曰：聖人道則如絲之紛，事則如棊之布，聲倡倡之，聲和和之，事始始之，事終終之，色青青之，色黃黃之，物卵卵之，物翼翼之，無愛道，無棄物，不尊君子，不賤小人，此則道如絲棼也。至於鄙雜衆物，廁

別分居，或短或長，或直或方，物物不同，旦旦去取，井井有條，此則事如棊布也。聖人志於道，無心無我，故不爲物易，賢人志洛物，有心有人，故未免爲物所易。

關尹子曰：魚欲異群魚，捨水躍岸即死，虎欲異群虎，捨山入市則擒，聖人不異衆人，特物不能拘耳。

抱一子曰：莊子謂，昔吾聞之大成之人曰，自伐者無功，功成者墮，名成者虧，孰能去功與名，而還與還人，純純常常，削迹捐勢，無責於人，人亦無責焉。此聖人不異衆人之說也。若夫遊於雕陵而忘其身，見異鵲之利而忘其真，虞人逐之以吾爲戮，反走而三月不庭，此魚捨水躍岸，虎捨山入市之謂也，雖然聖人處衆，雖不自異，物豈能拘之哉。

關尹子曰：道無作，以道應世者，是事非道，道無方，以道寓物者，是物非道，聖人竟不能出道以示人。

抱一子曰：道本無爲，而以道應世者，是事也，道本無體，而以道寓物

者，是物也，聖人終不能將出此道以示人，然則志道之士何從而得之哉。昔人謂使道可獻，人莫不獻之于其君，使道可進，則人莫不進之於其親，使道可傳，人莫不傳之於其子孫，惟其不可以出示於人，故得之者鮮矣！然則聖人終不傳於人乎？孔子不云乎，吾無隱乎爾。善觀聖人者，當於事物之外觀之。

關尹子曰：如鍾鍾然，如鍾鼓然，聖人之言則然，如車車然，如車舟然，聖人之行則然，惟莫能名，所以退天下之言，惟莫能知，所以奪天下之智。

抱一子曰：謂鍾為鍾，人皆然之，謂鼓為鍾，則人不測其言，所以退天下之言也。謂車車行，人皆然之，謂舟車行，則人罔測其行，所以奪天下之智也，是猶犬可以為羊，輪不輟地之辯也，其可以言名乎，其可以智知乎？

關尹子曰：螂蛆食虵，虵食鼃，鼃食螂蛆，互相食也。聖人之言亦然，言有無之弊，又言非有非無之弊，又言去非有

非無之弊，言之如引鋸然，惟善聖者不留一言。

抱一子曰：夫大道無說，善聖者不言，非無說也，不可說也，不可說而言之，則有弊，何則？言不出乎有無也，言有則無，言無則有，言非有則非無，言非無則非有，有無相吞，互相為弊，猶虵鼃螂蛆，互相吞食，如引鋸然去來牽掣，是則有言不如無言也。然則聖人果不留一言乎？聖人之言滿天下，學者苟以聖人之言為言，不惟不知言，併與聖人失之矣。

關尹子曰：若龍若蛟，若蛇若龜，若魚若蛤，龍皆能之。蛟，蛟而已，不能為龍，亦不能為蛇為龜，為魚為蛤，聖人龍之，賢人蛟之。

抱一子曰：聖人能大能小，能智能愚，能垢能淨，能貴能賤，能壽能夭，千變萬化，無可無不可。賢人則不然，能大者不能小，能智則不能愚。昔孔子見老子，歸謂弟子曰：吾乃今於是乎見龍，龍合而成體，散而成

章，乘乎雲氣，而養乎陰陽，予口張而不能嚼，又何規於老聃哉！子貢曰：然則人固有尸居而龍見，雷聲而淵默發動如天地者乎？賜亦可得而觀乎？聖人龍之，賢人蛟之，其是之謂歟！

關尹子曰：在己無居，形無自著^⑤，其動若水，其靜若鏡，其應若響。芒乎若亡，寂乎若清，同焉者和，得焉者失，未嘗先人，而嘗隨人。

抱一子曰：在己不自居，自居則有我矣，能無我，則形物自著，非我分別而著彼形物也，此靜也，靜極則動，而其動也，如水之流，動已復靜，而其靜若鏡之瑩，是則雖有動靜，而何嘗動靜哉。其應物也，若響之應聲，則吾如虛空虛谷矣，芒芴乎若未嘗有寂，湛乎徹底純清，同乎物而不自異，則與物和而不競也，驚其得而不自有，則與道忘而不失也，未嘗先人，常後而不先，不敢為天下先也，而嘗隨人，和而不唱，不得已而後動也，體用具存，權實畢備，此聖人之

所以為善聖歟。

關尹子曰：渾乎洋乎，游太初乎，時金已，時玉已，時糞已，時土已，時翔物，時逐物，時山物，時淵物，端乎權乎，狂乎愚乎。

抱一子曰：老子曰：吾游於物之初。孔子曰：何謂邪，曰：心困焉而不能知，口辟焉而不能言。始終相反乎無端，而莫知乎其所窮，謂之渾乎，洋乎，游太初乎，豈不信然。至於如金在鑛，如玉蘊石，則時金時玉也。道在瓦礫，道在屎溺，則時糞時土也。鶉居而穀食，鳥行而無影，則時翔物也。呼我馬而謂之馬，呼我牛而謂之牛，則時逐物也。塊然如石，槁然如木，則時山物也。如鱗之潛，如魚之泳，則時淵物也。然則皆聖人之正行也，皆聖人之權變乎？大聖若狂，大智若愚，夫豈真狂真愚也哉！

關尹子曰：人之善琴者，有悲心，則聲淒淒然，有思心，則聲遲遲然，有怨心，則聲回回然，有慕心，則聲裴裴一作奕奕

然。所謂悲思怨慕者，非手非竹，非絲非桐，得之心，符之手，得之手，符之物，人之有道者，莫不中道。

抱一子曰：人之善琴者，得之心，而符之手，得之手，而符之物，而悲思怨慕之心，猶足以感絲桐，而聲為之變，而況有道之人，動止周旋無不中道，寧不感天動地，康時豐物哉，昔庚桑楚得老子之道，居畏壘之山，三年而畏壘大穰，其是之謂乎。

關尹子曰：聖人有言有為有思者^⑥，所以同乎人，未嘗言未嘗為未嘗思者^⑦，所以異乎人。

抱一子曰：聖人終日言而未嘗言，終日為而未嘗為，終日思而未嘗思，特人不能測識耳，何以異於人哉。

關尹子曰：利害心愈明，則親不睦，賢愚心愈明，則友不交，是非心愈明，則事不成，好醜心愈明，則物不契，是以聖人渾之。

抱一子曰：衆人昭昭而我獨昏昏，衆人察察而我獨悶悶，昭昭察察，則利害賢愚是非好醜之心愈明矣，愈

明則於親友事物愈難睦交成契矣。惟聖人以無心渾之，則利自利，害自害，賢自賢，愚自愚，是自是，非自非，好自好，醜自醜，如是，則親無不睦，友無不交，事無不成，物無不契，聖人初何容心哉。

關尹子曰：世人愚拙者^⑧，妄援聖人之愚拙自解，殊不知聖人時愚時明，時拙時巧。

抱一子曰：聖人大巧而若拙，有大智而若愚。世之愚拙者，妄援聖人以自解，則愚者愈見其愚，而拙者愈露其拙，豈能自解哉。

關尹子曰：以聖師聖者賢人，以賢師聖者聖人，蓋以聖師聖者，徇蹟而忘道，以賢師聖者，返蹟而合道。

抱一子曰：有聖有賢之分者，跡也，未嘗有聖有賢之分者，道也，視聖人為聖人，豈可跂及哉，是則徇蹟而忘道也。惟不知其為聖，而以賢師資之，則智齊於師，庶乎忘其蹟，而得其道矣，而古人猶謂智與師齊，減師半德，學者須負過師之智，則幾矣。

關尹子曰：賢人趨上而不見下，衆人趨下而不見上，聖人通乎上下，惟其宜之，豈曰離賢人衆人，別有聖人也哉！

抱一子曰：中人以上可以語上，故賢人趨上，中人以下不可以語上，故衆人不見上，皆偏也。聖人渾通上下，無所不趨，無所不見，在賢亦宜，在衆亦宜，和光同塵，所以異於賢人遠矣。

關尹子曰：天下之理，夫者唱，婦者隨，牡者馳，牝者逐，雄者鳴，雌者應，是以聖人制言行，而賢人拘之。

抱一子曰：聖人言滿天下，無口過，行滿天下，無怨惡。何則？任物理之自然，而君臣上下、父子兄弟、貴賤尊卑之間，感應貫通，出於口而行於身，譬如夫唱婦隨，牡馳牝逐，雄鳴雌應，莫不順其自然之理也，聖人初何容心哉。賢人制禮法以防人心，故不得不拘之，至有言行樞機榮辱之戒，善惡千里違順之幾，故學者不得不謹言行也。

關尹子曰：聖人道雖虎變，事則鼈行，

道雖絲棼，事則棊布。

抱一子曰：前云聖人龍之，如《易》之乾卦有大人飛龍之象，今云虎變，如《易》之章卦有大人虎變之象，龍則言聖人之體，變化無常，飛潛莫測，虎則喻聖人之道，煥乎有文章之可觀，凜乎有威風之可畏。及乎行聖人之事，則愚夫愚婦亦可行之，而步履方拙如鼈，初無甚高難行之舉也，道則絲棼，事則棊布者，以言其道若渾而難理，其事則有條而不紊也。

關尹子曰：所謂聖人之道者，胡然子子爾，胡然徹徹爾，胡然唐唐一作堂堂爾，胡然臧臧一作藏藏爾，惟其能徧偶萬物，而無一物能偶之，故能貴萬物。

抱一子曰：聖人之道如太虛，子子然無與為偶，徹徹然無不洞貫，唐唐然充滿乾坤，臧臧然不容視聽，惟其能徧偶萬物，而無一物能偶之，所以貴於萬物，《老子》曰：有物渾成，先天地生。巍巍尊高，其是之謂乎。

關尹子曰：雲之卷舒，禽之飛翔，皆在

虛空中，所以變化不窮，聖人之道則然。

抱一子曰：聖人之道，如雲在太虛而卷舒不定，如禽在太空而飛翔無窮，使無此虛空以容之，則雲禽之變化飛翔窒矣，使聖人之道，不得無方之神，無體之玄以運之，則聖人之變化窮矣。

文始真經言外旨卷之三

- ① 此句，疑當作「因人之愚而愚之」。
- ② 此句，當作「果異于吾心乎」。
- ③ 以上「聖人之于衆人」至「其不然乎」一段，《關尹子》和《無上妙道文始真經》皆放在下面「聖人曰」至「不以此爲己」一段之後。
- ④ 此句，上引二校本皆作「所以爲人」。
- ⑤ 此句，上引二校本皆作「形物自著」。
- ⑥ 此句，前引二校本皆作「聖人以有言有爲有思者」。
- ⑦ 此句，二校本皆作「以未嘗言未嘗爲未嘗思者」。
- ⑧ 此句，《關尹子》作「世之愚拙者」。

文始真經言外旨卷之四

抱一子陳顯微述

四符篇

符者，精神魂魄也，凡十七章。

關尹子曰：水可析可合，精無人也，火因膏因薪，神無我也，故耳蔽前後皆可聞無人，知崇無人，一奇無人，冬彫秋物無人，黑不可變無人，北壽無人，皆精。舌即齒牙成言無我，禮卑無我，二偶無我，夏因春物無我，赤可變無我，南天無我，皆神。以精無人，故米去穀則精存，以神無我，故鬼憑物則神見。全精者忘是非，忘得失，在此者非彼，抱神者，時晦明，時強弱，在彼者非此。

抱一子曰：此言全精抱神之道也。精本無人，故當忘其是非，忘其得失，以全吾之精。神本無我，故當時其晦明，時其強弱，以抱吾之神。精一也，水可分可合一也，耳屬腎，雖蔽之前後，皆可聞一也，水為智，智

崇崇則自尊一也，冬物歸根一也，黑不可變一也，北方主壽有我一也，米去穀則精存一也，一數奇獨也，故皆曰無人也。神二也，火因膏因薪二也，舌屬心，即唇齒而能言二也，火為禮，禮卑則尊人二也，夏物榮華二也，赤色可變二也，南主天無我二也，鬼憑物則神見二也，二數耦兩也，故皆曰無我也。無人，則在此者非彼，無我，則在彼者非此，知乎此，則知所以忘其是非得失，與夫時其晦明強弱之理矣。

關尹子曰：精神水火也，五行互生滅之，其來無首，其往無尾。則吾之精，一滴無存亡耳，吾之神，一歛無起滅耳。惟無我無人，無首無尾，所以與天地冥。

抱一子曰：精神水火也，自水生木，木生火，火生土，土生金，金復生水，則互生也。自火尅金，金尅木，木尅土，土尅水，水復尅火，則互滅也。其來無首，其往無尾，滅已復生，生已復滅，則知精未嘗有一滴存亡，神

未嘗有一歛起滅，惟無我無人，無首無尾，與天地冥契，則精神長存矣。

關尹子曰：精者水，魄者金，神者火，魂者木。精主水，魄主金，金生水，故精者魄藏之。神主火，魂主木，木生火，故神者魂藏之。惟火之為物，能鎔金而消之，能燔木而燒之，所以冥魂魄。惟精在天為寒，在地為水，在人為精。神在天為熱，在地為火，在人為神。魄在天為燥，在地為金，在人為魄。魂在天為風，在地為木，在人為魂。惟以我之精，合天地萬物之精，譬如萬水可合為一水，以我之神，合天地萬物之神，譬如萬火可合為一火。以我之魄，合天地萬物之魄，譬如金之為物，可合異金而鎔之為一金。以我之魂，合天地萬物之魂，譬如木之為物，可接異木而生之為一木。則天地萬物皆吾精吾神、吾魄吾魂，何者死，何者生！

抱一子曰：精水一合魄金四為五，神火二合魂木三為五，精藏魄而神藏魂，是則四物雖居兩處，可以一五

擒之，然魂木為龍，魄金為虎，使魂藏於神，魄藏於精，則二物分於二所，終不能相制。惟火能鎔金燔木，故神可以制魂魄，殊不知神寓於魂，如火附於木，而火二木三之五運於西北，制精鍊魄，使四象五行俱歸於土，實資神火之功也，故丹法始終全資火候者，火之功用大矣哉。至於合天地萬物之水火金木，皆為吾之精神魂魄，譬如萬水可合為一水，萬火可合為一火，異金可鎔為一金，異木可接為一木，此則山河大地，皆吾法身之妙用也，安有所謂生，安有所謂死哉！

關尹子曰：五行之運，因精有魂，因魂有神，因神有意，因意有魄，因魄有精，五者回環不已，所以我之僞心，流轉造化幾億萬歲，未有窮極。然核芽相生，不知其幾萬株，天地雖大，不能芽空中之核，雌卵相生，不知其幾萬禽，陰陽雖妙，不能卵無雄之雌。惟其來于我者，皆攝之以一息，則變物為我，無物非我，所謂五行者，孰能變之。

抱一子曰：精神魂魄意五者，回環相生不已，則人之僞心，輪迴四生六道，經幾億萬年，未有窮極。何則？有此僞心，則有此僞意，有意則有魄，有魄則有精，有精則有魂，有魂則有神，有神則又有意矣。彼空中之核與無雄之雌，胡為而不芽不卵耶？蓋精不存也，物則自清而入濁，故始因精而終成魄，神則自微而入妙，故始因意而終成神。蓋意土數五，而五與人俱生，故首與四肢及手足之指皆五也，使終能至神而不復生意，則遇物對境，當以一息攝之，則變物為我矣，無物非我，則五行皆為吾用，而不復有相生相滅之機，孰能變之哉，此永不輪迴不受生之妙用也，學者欲知之乎。

關尹子曰：衆人以魄攝魂者，金有餘則木不足也，聖人以魂運魄者，木有餘則金不足也。蓋魄之藏，魂俱之，魂之游，魄因之，魂晝寓目，魄夜舍肝，寓目能見，舍肝能夢。見者魂無分別，析之者分別，析之曰天地者，魂狃習也，夢

者魄無分別，析之者分別，析之曰彼我者，魄狃習也。土生金，故意生魄。神之所動，不名神名意，意之所動，不名意名魄，惟聖人知我無我，知物無物，皆因思慮計之而有。是以萬物之來，我皆對之以性，而不對之以心，性者心未萌也。無心則無意矣，蓋無火則無土，無意則無魄矣，蓋無土則無金。一者不存，五者皆廢。既能渾天地萬物以為魂，斯能渾天地萬物以為魄，凡造化所妙皆吾魂，凡造化所有皆吾魄，則無有一物可役我者。

抱一子曰：愚解前章，謂物之自精至魄，從清入濁而魄盛，則死矣，故曰金有餘，則木不足。若夫聖人自意生身，至於成神，則木有餘而金不足，魂有餘者多覺，魄有餘者多夢，覺之與夢，皆能分別者，非魂魄能自析之也，皆有真性存乎其中，而狃習既久，而能生此分別識也。惟聖人知我無我，知物無物，皆因心意計之，故對境忘識無意，而對之以性，性者心未萌也，無心則無意矣，一意

不存，五行皆廢，斯能渾天地造化之所妙者，皆為吾魄，渾天地造化之所
有者，皆為吾魄，是則萬物皆為吾
役，而不役於物矣。

關尹子曰：鬼云為魂，鬼白為魄，於文則然，鬼者，人死所變。云者風，風者木，白者氣，氣者金，風散故輕清，輕清者上天，金堅故重濁，重濁者入地，輕清者，魄從魂昇，重濁者，魂從魄降。有以仁昇者為木星佐，有以義昇者為金星佐，有以禮昇者為火星佐，有以智昇者為水星佐，有以信昇者為土星佐。有以不仁沉者木賊之，不義沉者金賊之，不禮沉者火賊之，不智沉者水賊之，不信沉者土賊之。魂魄半之，則在人間，升魂為貴，降魄為賤，靈魂為賢，厲魄為愚，輕魂為明，重魄為暗。揚魂為羽，鈍魄為毛，明魂為神，幽魄為鬼。其形其居，其識其好，一本作名皆以五行契之。惟五行之數，參差不一，所以萬物之多，盈天地間猶未已也。以五事歸五行，以五行作五蟲，可勝言哉。譬猶兆龜數蓍，至誠自契，五行應之，誠

苟不至，兆之數之，無一應者。聖人假物以游世，五行不得不對。

抱一子曰：云白今之楷字也，楷字出於秦之程邈變篆為隸而後有也，在當時字體與今不同。𤑔字，古之云字；𤑔字，古之白字。是則𤑔鬼為魂，𤑔鬼為魄，於古文則然，𤑔則從虛，輕清故為風，𤑔，古風字。𤑔則從身，重濁故為氣，𤑔古氣字。然則古人製字亦或有道焉。風屬木，氣屬金，木主升，金主降，以五常而升者，為五星之佐，反五常而沉者，為五行所賊。《楞嚴》所述升沉之報，與此同義。魂魄相半則在人間，然常人止有三魂七魄，故魂多者為貴，為賢為明，為羽為神，魄多者為賤，為愚為暗，為毛為鬼，而其識其好皆契五行，惟五行參差不一，故胎卵濕化，有色無色，有想無想等類衆生，盈天地間，生生不已也。然聖人本無我，不假於物則不能游世，如火不附木，則無所託形，然物之在世，豈能堅久哉，聖人必以五行對之，然

後生生不窮，如水火相尅，却成既濟，金木相尅，却成夫婦，皆對法也。是道也，如兆龜數蓍，至誠自契，誠若不至，則五行無一應者矣。

關尹子曰：三者具有魂，魂者識，目者精，色者神，見之者，為魂耳口鼻心之類。在此生者，愛為精，為彼生父本，觀為神，為彼生母本，愛觀雖異，識生^③，彼生生本，在彼生者，一為父，故受氣於父氣，為水，二為母，故受血於母血，為火，有父有母，彼生生矣。惟其愛之無識，如鎖之交，觀之無識，如燈之照，吾識不萌，吾生何有。

抱一子曰：目耳鼻口心，謂之五根，聲色香味事，謂之五塵，觀聽嗅嘗思，謂之五識。五根主於精，精有我無人之物也，五塵主於神，神無我即物而見也，五識主於魂，故曰魂識，蓋根塵識三者具而後有魂也。父以精愛，母以神觀，愛為水，觀為火，水為氣，火為血，父精母血交，而識存乎中，此降本流末，生生不窮之理也。若夫愛無識，而如鎖之交，觀無

識，而如燈之照，則吾識未嘗萌，吾生何嘗有哉。

關尹子曰：如桴叩鼓，鼓之形者，我之有也，鼓之聲者，我之感也，桴已往矣，餘聲尚在，終亦不存而已矣。鼓之形如我之精，鼓之聲如我之神，其餘聲者，猶之魂魄。知夫倏往倏來，則五行之氣我何有哉。

抱一子曰：精如鼓，神如聲，餘聲如魂魄，固矣，然則鼓不叩則不生聲，精不感則不生神，叩鼓以桴，桴亡，則雖有餘聲，終亦不存矣，感精以氣，氣亡，則雖有魂魄，終亦不存矣，是則五行之氣倏往倏來，我本無有，而我之所有者，叩桴感氣者而已矣。或問曰，今欲聲聲不絕，鼓鼓長存，畢竟以何道感之，曰請放下手中桴，方向汝說。

關尹子曰：夫果之有核，必待水火土三者具矣，然後相生不窮，三者不具，如大旱大潦大塊，皆不足以生物。精水神火意土三者本不交，惟人以根合之，故能於其中橫見有事。猶如術呪，

能於至無見多有事。

抱一子曰：世之術呪，能於無中見多有事，如張諧作五里之霧，左慈擲梁上之盃，是道也，無出於精神意三者。合而為之，如果之有核，必待水火土三者俱而後生，三者不交，則如大旱大潦大塊，不能生物。然三者本不能自交，惟人以根合之，如男女二根交精而生形也，然天有天根，地有地根，人有人根，而造化有造化之根，人能於造化之根上以起天地之根，則能無中生有，而知變化之道矣。

關尹子曰：魂者木也，木根于冬水，而華於夏火，故人之魂藏於夜精，而見於晝神。合乎精，故所見我獨，蓋精未嘗有人，合乎神，故所見人同，蓋神未嘗有我。

抱一子曰：此章獨言木喻者，發明上章言根之旨也。蓋木為魂為人，人之所以為人，以魂識晝夜隱見於精神之中而已矣，精一也，故魂識合精，則所見惟我獨，神二也，故魂

識合神則所見與人同，如木之根於冬，而榮於夏，即魂之藏於夜，而見於晝也，知夫木之根，則知魂之根矣，知夫魂之根，則知天地造化之根矣。

關尹子曰：知夫此身如夢中身，隨情所見者，可以飛神作我而游太清，知夫此物如夢中物，隨情所見者，可以凝精作物而駕八荒。是道也，能見精神而久生，能忘精神而超生。吸氣以養精，如金生水，吸風以養神，如木生火，所以假外以延精神。漱水以養精，精之所以不窮，摩火以養神，神之所以不窮，所以假內以延精神。若夫忘精神而超生者，吾嘗言之矣。

抱一子曰：人假精神以有生，善養精神者，能見精神而久生，《陰符經》謂，天有五賊，見之者昌是也。能忘精神而超生，《陰符經》謂，人知其神而神，不知不神之所以神是也。世有夢飛神而游太清者，亦有夢乘物而駕八荒者，此身此物，皆如夢如幻，夢而能之者，靈於神也，覺而不

能者，拘於形也，惟能自見精神者，覺夢一致，可以飛神作我，可以凝精作物，是皆法之妙用也。至於吸氣吸風以益金木於外，漱水摩火以養精神於內，亦皆足以延精神，斯術之租者也⁵，若夫忘精神而超生者，道也，是道也，隱然述于此書，又在夫人自得之而已矣。

關尹子曰：人勤於禮者，神不外馳，可以集神，人勤於智者，精不外移，可以攝精。仁則陽而明，可以輕魂，義則陰而冥，可以御魄。

抱一子曰：聖人因人之常心之所固有者，立為五常，皆自然而然，非有牽強，故曰常也。人能循此常而行之，至可以集神攝精、輕魂御魄，蓋人之五神主此五常，猶天之五星主此五事也。火星主禮，禮主昇，火亦昇，神屬火，人勤於禮者，神不外馳，可以集神，其餘如木星主仁，金星主義，水星主智，而木輕金冥水降，所以能輕魂，御魄攝精，莫不皆然。只言四者，四物具，則土在其中，四常

具，則信在其中，四神具，則意在其中，四方立，則中在其中，《孟子》亦只言四端，而不及信，與此意同。

關尹子曰：蜣螂轉丸，丸成，精思之，而有蜣白者存丸中，俄去殼而蟬，彼蜣不思，彼蜣奚白。

抱一子曰：此章言感化之機，能動無情之物也，圓本無情，而蜣螂轉而精思之，則蜣生圓中，俄去殼而化為蟬。外鑪金丹生於金鼎神室之中，神室本虛器，全藉守鑪之人神識不昧，晝夜精觀，而神丹生於虛器之中，外丹既熟，而內丹亦就，化形而仙矣。《參同契》曰：萬象憑虛生，感化各有類。感化者，亦蜣精思之意耶。

關尹子曰：庖人羹蠚，遺一足几上，蠚已羹，而遺足尚動，是生死者，一氣聚散耳，不生不死，而人橫計曰生死。

抱一子曰：人以動物為有生，今釜中之蠚已羹，而几上之遺足尚動，是則生者一氣之聚，死者一氣之散耳，彼非氣者，何嘗有聚散生死哉，人橫

計之耳。

關尹子曰：有死立者，有死坐者，有死卧者，有死病者，有死藥者，等死，無甲乙之殊。若知道之士，不見生，故不見死。

抱一子曰：世人不知我本無生，而見坐脫立亡者，以為了達，見卧死病死者，以為未了達，殊不知均一死耳，初無甲乙之殊，惟知道者，未嘗有生，故不見其生，未嘗有死，故不見其死。

關尹子曰：人之厭生死超生死者，皆是大患也，譬如化人，若有厭生死心，超生死心，止名為妖，不名為道。

抱一子曰：老子謂專氣致柔能嬰兒，今問嬰兒曰：汝生乎？則不知也，汝死乎？則不知也，然則人之有厭生死心，非大患乎，有超生死心，非妖乎。

關尹子曰：計生死者，或曰死已有，或曰死已無，或曰死已亦有亦無，或曰死已不有不無，或曰當幸者，或曰當懼者，或曰當任者⁶，或曰當超者，愈變情

識，馳驚不已。殊不知我之生死，如馬之手，如牛之翼，本無有，復無無，譬如火水，雖犯火水，不能燒之，不能溺之。

抱一子曰：以馬之無手，牛之無翼，以況我之未嘗有生死也，以水犯火，以火犯火，以況我之入生死也。然則既曰如馬手牛翼之未嘗有矣，又何入哉，曰以未嘗有生而入死，以未嘗有死而入生，是則入亦無入，犯亦無犯。若夫以謂或有或無，或幸或懼，或任或超，愈變情識，而馳驚愈遠矣，安足以知此哉。

文始真經言外旨卷之四

①此句之後，《文始真經注》（載《道藏》維字號）尚有「惟水之爲物，能藏金而息之，能滋木而榮之，所以析魂魄」一段經文缺失。

②「魄狃習也」句後，上引二校本皆有「火生土，故神生意」句。

③「識生」，《無上妙道文始真經》作「皆因識生」，《關尹子》作「皆同識生」。

④此句，二校本皆作「木根于冬水」。

⑤此句，疑當作「斯術之粗者也」。

⑥此句，《關尹子》作「或曰當喜者」。

文始真經言外旨卷之五

抱一子陳顯微述

五鑑篇

鑑者，心也，凡二十章。

關尹子曰：心弊一作蔽下同吉凶者，靈鬼攝之，心弊男女者，淫鬼攝之，心弊幽憂者，沉鬼攝之，心弊逐放者，狂鬼攝之，心弊盟詛者，奇鬼攝之，心弊藥餌者，物鬼攝之。如是之鬼，或以陰爲身，或以幽爲身，或以風爲身，或以氣爲身，或以土偶爲身，或以彩畫爲身，或以老畜爲身，或以敗器爲身。彼以其精，此以其精，兩精相搏，則神應之。爲鬼所攝者，或解奇事，或解異事，或解瑞事，其人傲然，不曰鬼于躬，惟曰道于躬，久之，或死木，或死金，或死繩，或死井。惟聖人能神神。而不神于神，役萬神而執其機，可以會之，可以散之，可以禦之，日應萬物，其心寂然。

抱一子曰：聖人能神神，而不神于神，衆人神于神，而不能神神，能神神，則日應萬物，其心寂然，神于神，則心蔽事物，而爲鬼所攝。鬼亦神之純陰者也，故亦無我而附物身，既認物爲我身，則精存于物，物我相搏則神應之，故爲鬼所攝者，或能瑞異，或知吉凶，其人傲然，自謂得道，不悟魔攝久致喪身，五行賊之，隨類死物，如釋教《楞嚴》所述二十五魔，一同是說也。在周末之時，釋教未入中國，已先述于是書矣，較之釋經，理詳而辭簡，然則《關尹子》書豈一曲之士所能測識耶。

關尹子曰：無一心，五識並馳，心不可一，無虛心，五行皆具，心不可虛，無靜心，萬化密移，心不可靜。借能一則二偶之，借能虛則實滿之，借能靜則動搖之。惟聖人能斂萬有於一息，無有一物可役吾之明徹，散一息於萬有，無有一物可間吾之云爲。

抱一子曰：聖人之心，能斂能散，斂則會萬有於一息，散則敷一息於萬

有，初不待一之虛之靜之也。苟用功於一，則不一矣，用功於虛，則不虛矣，用功於靜，則不靜矣。惟其不用功於一，不用功於虛，不用功於靜，則此心未嘗二，未嘗實，未嘗動也。雖曰斂散，何嘗斂散哉。如是，則日應萬變，吾心寂然，無一物可役吾之明徹，無一物可間吾之云為，聖人以五鑑明心，信乎其為鑑矣。

關尹子曰：火千年，俄可滅，識千年，俄可去。

抱一子曰：火本無我，自清濁兆分而來，天下未嘗有自生之火也，必假人力鑽燧擊石而後生，《列子》曰：人生火是也。夫火本無體，故雖燎爇千年，而俄頃可滅。惟識亦然，自胞胎賦形而來，此心未嘗先具此識也，蓋因根塵取受伊，習而後生，《關尹子》曰物交心，生識是也，夫識本無方，雖計認千年，而俄頃可去，然則滅火易，不然難，去識易，不續難，《傳》曰，得道易，守道難，信哉。

關尹子曰：流者舟也，所以流之者，是

水非舟。運者車也，所以運之者，是牛非車。思者心也，所以思之者，是意非心。不知所以然而然，惟不知所以然而然，故其來無從，其往無在，其來無從，其往無在，故能與天地本原，不古不今。

抱一子曰：心火也，意土也，思亦土也，故所以思者，是意非心也，猶舟流因水，車運因牛，而心思因意也。昔人謂車不行，打車即是，打牛即是，今夫心役於思，去心即是，去意即是。三教聖人皆主張無意，而不主張無心者，旨必有在也。學者當思念之時，推求意之所生，則不知其所以然而然，故其來無從，其往無在。如是則意未嘗有意，意未嘗有意，則思未嘗有思，念未嘗有念，而無思之思，無念之念，與天地之本原，不古不今，而長存矣，視夫斷思絕念，心如土木者異矣。

關尹子曰：知心無物，則知物無物，知物無物，則知道無物，知道無物，故不尊卓絕之行，不驚微妙之言。

抱一子曰：昔人有言曰，若云他是聖，自己却成狂，苟遇卓絕之行而尊之，聞微妙之言而駭之，則徇蹟而不見道矣。蓋道無古今，無聖狂，無言行，前無先達，後無作者，知乎此，則何者為物，何者為心哉？

關尹子曰：物我交心生，兩木摩火生，不可謂之在我，不可謂之在彼，不可謂之非我，不可謂之非彼，執而彼我之，則愚。

抱一子曰：心火也，二也，故物我交而後心生，兩木摩而後火生，彼有執，以為心在我或在彼，又以執，以為火在此或在彼者，不然，則或以為非我非彼者，皆愚人也，烏足以識心哉！

關尹子曰：無恃爾所謂利害是非，爾所謂利害是非者，果得利害是非之乎，聖人方且不識不知，而況於爾。

抱一子曰：利害心愈明，則親不睦，是非心愈明，則事不成，聖人方且不識不知，而況爾？所謂利害是非者，果得而利害是非之乎！

關尹子曰：夜之所夢，或長于夜，心無時，生於齊者，心之所見皆齊國也，既而之宋之楚，之晉之梁，心之所存各異，心無方。

抱一子曰：邯鄲之夢，終身榮辱，不知歷幾寒暑矣，既覺，則黃梁未熟，特片時爾，心豈有定時耶？楚人之子生長楚國，引而置之莊嶽之間，數年，雖日撻而求其楚不可得矣，心豈有定方耶？世有執時執方以求心者，安足以識心哉。

關尹子曰：善弓者，師弓不師羿，善舟者，師舟不師稟，善心者，師心不師聖。

抱一子曰：輪扁斲輪之妙，父不可傳於子，得之心，應之手，豈可以師傳哉。然則逢蒙學射於羿，盡羿之道，果盡乎？曰：使盡羿之道，則不思天下惟羿為愈己也，然學聖人者，自以為盡聖人之道者，如鼠飲河，足厭其量爾。今善弓者師弓，善舟者師舟，以喻善心者師心，可謂善喻矣，弓則有矢的步力之可師，舟則有帆拖風水之可法，至於心明則覺，昏

則而已，孰從而師之哉，雖然學者於動靜語默之間，向明覺昏昧處通得一線，則心之法有餘師矣。

關尹子曰：是非好醜，成敗盈虛，造物者運矣，皆因私識執之而有。於是以無遣之猶存，以非有非無遣之猶存，無曰莫莫爾，無曰渾渾爾，猶存，譬猶昔游再到，記憶宛然，此不可忘，不可遣，善去識者，變識為智。變識為智之說，爾知之乎？曰：想如思鬼，心慄，思盜，心怖，曰：識如認黍為稷，認玉為石，皆浮游罔象，無所底止。譬睹奇物，生奇物想，生奇物識，此想此識，根不在我，譬如今日，今日而已，至於來日想試^①，殊未可卜，及至來日，紛紛相識，皆緣有生。曰想曰識，譬犀望月，月形入角，特因識生，始有月形，而彼真月，初不在角，胸中之天地萬物亦然，知此說者，外不見物，內不見情。

抱一子曰：天地萬物，古今萬事，在人胸中，如月形生於犀牛之角，彼犀不望月而想，則角無由而生月矣，月形既存于角中，則盡犀之形不可去

也，以喻人之胸中萬物萬事，忘不得，遣不得，如昔日曾游之景，再游則憶記宛然，皆識使然也。且如今日見某物某事，至於來日所見，殊未可卜，及乎來日，紛紛想識皆緣有生，若夫來日未至，事物未有之時，此想此識根安在哉，然則今日想識，皆妄想妄識明矣。譬如無鬼思鬼，無盜思盜，本妄想也，而能生慄生怖之妄情，認黍為稷，認玉為石，本妄認也，而能生真稷真石之妄識，然則睹奇物見異事，何異夫妄情妄識耶？執而有之，即於心府，可謂不智矣，知乎此，則知變識為智之說矣，變識為智，則外不見物，內不見情。

關尹子曰：物生于土，終變於土，事生于意，終變於意，知夫惟意，則俄是之，俄非之，俄善之，俄惡之，意有變，心無變，意有覺，心無覺。惟一我心，則意者塵往來爾，事者歛起滅爾，吾心存大常者存^②。

抱一子曰：識生於意，意生於心，善去識者，去其識之所生之母而已矣。

譬如物生于土，則終變於土，識生于意，終變於意，事之是非善惡，雖以識分辨之，而莫不皆隨意變也，意是非，則識隨而在是非，意在善惡，則識隨而在善惡，是則子隨母轉也。然意雖有變，心未嘗變，意雖有覺，心未嘗覺，知心無變無覺，則意如塵之往來，事如欸之起滅，皆不足以動吾心君，而我心惟一，蓋有大常者存焉耳。

關尹子曰：情生于心，心生於性，情波也，心流也，性水也，來于我者，如石火頃，以性受之，則心不生，物浮浮然。

抱一子曰：後世言性者，皆曰性生于心，以心為母，性為子，謂如五常之性，根於一心，皆未達夫真性之所以為性，三教聖人發明性真如出一口，而賢人膠之，此其所以未入聖域歟。孔子言窮理而後盡性，理者心也，與孟子言盡其心者，知其性，知其性，則知天意，同釋氏言明心然後見性，故直指人心，見性成佛，與今言心生於性，皆以性為母，心為子

也。而尚恐學者未明，又以水喻之曰，性水也，心流也，情波也，則本末次第歷然易辨矣。苟事物來于我，而以心應之，不亦勞乎，天下之事物無窮，吾心之精神有限，以有限對無窮，吾心殆矣，惟聖人以性受之，則心不生，而事物浮浮然，不能入吾之靈府矣。

關尹子曰：賢愚真偽，有識者，有不識者，彼雖有賢愚，彼雖有真偽，而謂之賢愚真偽者，繫我之識，知夫皆識所成，故雖真者亦偽之。

抱一子曰：人之賢者，可慕可重，愚者，不必慕不必重，事物之真者，易留意而難忘，事物之偽者，不甚著意而易忘，而謂彼賢愚真偽者，皆我之區識，苟知性識，則雖賢者亦愚之，雖真者亦偽之，則變識為智而易忘矣。

關尹子曰：心感物不生心，生情，物交心不生物，生識，物尚非真，何況於識，識尚非真，何況於情。而彼妄人，於至無中執以為有，於至變中執以為常，一

情認之積為萬情，萬情認之積為萬物，物來無窮，我心有際。故我之良心受制於情，我之本情受制於物，可使之去，可使之來，而彼去來，初不在我，造化役之，固無休息。殊不知天地雖大，能役有形，而不能役無形，陰陽雖妙，能役有氣，而不能役無氣。心之所之，則氣從之，氣之所之，則形應之，猶如太虛^③，於一氣中變成萬物，而彼一氣，不名太虛，我之一心能變為氣為形，而我之心無氣無形，知夫我之一心，無氣無形，則天地陰陽不能役之。

抱一子曰：天地雖大，陰陽雖妙，能役有形氣者，不能役無形氣者，而我之一心無形無氣，天地陰陽尚不能役，反受制於情，受役於物，何耶？於至無中執以為有，於至變中執以為常，因識生情，因情著物，物來無窮，造化無定，使去使來，不得自在。或者謂我之一心能變為氣為形，既為氣矣，既為形矣，役於五行，拘於陰陽，盛衰往來，初不在我，造化役之，安能自由哉！噫，如繪塑師幻像

鬼神，自生怖畏，殊不知我之一心本同太虛，太虛於一氣中變成萬物，而彼一氣不名太虛，昧者直以一氣名為太虛，焉能逃天地陰陽之役哉。

關尹子曰：人之平日，目忽見非常之物者，皆精有所結而使之然，人之病日，目忽見非常之物者，皆心有所歉而使之然。苟之。吾心能於無中示有，則知吾心能於有中示無，但不信之，自然不神。或曰厥識既昏，孰能不信？我應之曰：如捕蛇師心不怖蛇，彼雖夢蛇，而無畏怖，故黃帝曰：道無鬼神，獨往獨來。

抱一子曰：瞪目發勞，勞久精結，故忽見非常之物，與彼病目見空中花及第二月，無以異也。又有心有所慊，忽見冤尤之形，皆無中示有也，既見矣，孰能不信？如捕蛇之師，雖夢蛇不畏者，習慣如自然也，昔有人居山習定，而山精現怪異之形，變化百種，魔撓其人，其人閉目不視，曰：汝之技倆有盡，我之不聞不見無窮，山精退不復見，此即有中示

無，惟不信之，自然不神也。若夫即吾心中可作萬物，而見嬰兒姪女，青龍白虎等物者，皆自我作之，有無在我，與忽見非常之物者異矣，然聖人睹此，猶且見如不見，何哉？黃帝不云乎，道無鬼神，獨往獨來是也。

關尹子曰：我之思慮日變，有使之者，非我也，命也。苟知惟命，外不見我，內不見心。

抱一子曰：人之思慮日日不同，莫之致而致也，孰使之哉？命也，既曰命矣，則由我乎？不由我乎？使我命在天，則思慮不由我，若我命在我，則何思何慮，故外不見我，內不見心。

關尹子曰：譬如兩目，能見天地萬物，暫時回光，一時不見。

抱一子曰：此章當連前章為一章，謂人有思慮，譬如兩目能見天地萬物，若能回光返照，則天地萬物一時不見，是則何庸思慮哉，但世人知此機者鮮矣。

關尹子曰：目視雕琢者，明愈傷，耳聞

交響者，聰愈傷，心思玄妙者，心愈傷。抱一子曰：此章亦與上章意連，謂目不能返照而視，雕琢者明愈傷，耳不能返聽而聞，交響者聰愈傷，心不能無念而思，玄妙者心愈傷。三章相續，其義始圓。

關尹子曰：勿以我心揆彼，當以彼心揆彼，知此說者，可以周事，可以行德，可以貫道，可以交人，一作立人可以忘我。

抱一子曰：若以我心揆彼，則人之識見各各不同，人我既分，町畦斯判，安能周事哉，事且不周，況交人乎？況行德貫道乎？惟以彼心揆彼，此聖人無我之學也。如是，則何事不周，何人不交，何德不行，何道不貫哉！

關尹子曰：天下之理，小不制而至於大，大不制而至於不可制，故能制一情者，可以成德，能忘一情者，可以契道。抱一子曰：學者但知防患於微，而不知制情於微，能制一情，則可以成德，能忘一情，則可以契道，是則德

不難成，而道不難契也，特情之難制耳。一情雖微，苟不制，而必至於大，大不制，而至於不可制，其為害豈勝言哉，天下之理，莫不皆然。

文始真經言外旨卷之五

①「想試」，二校本皆作「想識」。

②此句，二校本皆作「吾心有大常者存」。

③「猶如太虛」句下《無上妙道文始真經》尚有「于至無中變成一氣」句。

④「苟之」，二校本皆作「苟知」。

文始真經言外旨卷之六

抱一子陳顯微述

六七篇

匕者，食也，食者，形也，凡十六章。

關尹子曰：世之人以我思異彼思，彼思異我思分人我者，殊不知夢中人亦我思異彼思，彼思異我思，孰為我，孰為人？世之人以我痛異彼痛，彼痛異我痛分人我者，殊不知夢中人，亦我痛異彼痛，彼痛異我痛，孰為我，孰為人？爪髮不痛，手足不思，亦我也，豈可以思痛異之。世之人以獨見者為夢，同見者為覺，殊不知精之所結，亦有一人獨見於晝者，神之所合，亦有兩人同夢於夜者，二者皆我精神，孰為夢，孰為覺？世之人以暫見為夢，久見為覺，殊不知暫之所見者，陰陽之氣，久之所見者，亦陰陽之氣，二者皆我陰陽，孰為夢，孰為覺？

抱一子曰：昔人有不識我而求我

者，以色求之，不得，又以聲求之，不得，又於臭味覺意求之，俱不得，然後知我之為我，視之不見，聽之不聞，搏之不得，而橫執以為我者，皆妄也，安識所謂真我哉。今夫世之人，以能思能痛者為我，以不能思不能痛者為非我，兩失之矣，能思能痛者果我乎？我本無意無念，思從何來，是則妄有緣塵，於中積聚狃習為思，非我真有是思也？我本無相無體，痛從何起？是則妄有血氣，於中假合觸覺為痛，非我真有是痛也。然則不能思不能痛者，果非我乎？爪髮不痛，手足不思，亦我也，夢中之天地萬物不思，夢中之人神鳥獸不痛，亦我也，豈可以人我異之。世之人以獨見暫見者為夢，以同見久見者為覺，亦兩失之矣，獨見暫見者果夢乎？我本無夢，蓋因陰因夜因寐，與識相緣而有是夢也，我本無覺，蓋因陽因晝因寤，與見相緣而有是覺也。然則同見久見者，果非夢乎，神之所合，亦有兩人同夢於夜

者，陰陽結習，亦有天地萬物久見於夢者，豈可以覺夢異之。人與我不異，覺與夢不殊，然後知遍虛空世界，天地人物，無一物非我之真，無一物是我之已而已矣。

關尹子曰：好仁者，多夢松栢桃李，好義者，多夢兵刀金鐵，好禮者，多夢簋簠豆，好智者，多夢江湖川澤，好信者，多夢山嶽原野，役於五行，未有不然者。然夢中或聞某事，或思某事，夢亦隨變，五行不可拘。聖人御物以心，攝心以性，則心同造化，五行亦不可拘。

抱一子曰：世人不能逃陰陽五行者，以心有所思，而役於事物也，傳曰，寇莫大於陰陽，無所逃於天地之間。又曰，五賊在心，施行於天。是則五賊生於陰陽，而人之所思，不著事既著物，事物不出於五行，所以為五賊所役而不能逃也。是賊也，在陽則為見，在陰則為夢，在覺為事，在夢為物，如好仁者，多夢松栢之類，皆役於五行，雖役於五行，而夢

中忽聞別事，忽思他事，識見變遷，則夢亦隨變，五行亦不能拘。知夢中之五行不能拘，則若事若物皆可以御而役之，而不役於事物也，不役於事物，則陰陽五行烏能為寇為賊哉。聖人御事物不以思，而以心攝心，不以念而以性，此其所以心同造化，而五行不可拘歟。

關尹子曰：汝見蛇首人身者，牛臂魚鱗者，鬼形禽翼者，汝勿怪，此怪不及夢，夢怪不及覺，有耳有目，有手有臂，怪尤矣。大言不能言，大智不能思。

抱一子曰：天不言，而日月運，四時行，天雖不言，而日月運，四時行，乃大言矣。聖人不思而得，聖人雖不思而能得，乃大智矣。今有人見夫未嘗見者，如蛇首人身之類，必以為怪矣，不思夫形寢神息之時，忽有所夢，天地人物從何而生，從何而見，世人習慣不以為怪，細推詳研，吾之精神本自清明寧一，而化為是夢，豈不甚可怪哉，知夢為怪矣，今觀我之形，有耳有目，有手有臂，視聽動止，

比之夢中所見一一有實，豈不尤可怪耶，況口之能言，心之能思，其為怪有不可勝言者矣。或曰，吾道與之貌，天與之形，雖具耳目手足，反為思之不見其為有也，如是則怪可去乎？愚答曰：道甚麼或者，再舉前問愚曰，大言不能言，大智不能思，或者喏然而退。

關尹子曰：有人問於我曰，爾族何氏，何名何字，何衣何食，何友何僕，何琴何書，何古何今？我時默然不對一字。或人叩之不已，我不得已應之曰，尚自不見我，將何為我所。

抱一子曰：人有真我，雖聖智未易自見也，人惟不能自見，故或以色求我，或以聲音求我，轉不可得而見矣，況問我以族氏名字、衣食友僕、琴書古今哉，宜乎聖人默然不對是不對也，乃所以深對也，或者不喻聖人之意，而叩之不已，夫叩之不已者，疑乎信乎？以為信耶，彼之我，即我之彼也，彼之彼，即我之我也，彼彼不能相我，則我我不能喻彼矣。

以為疑耶，則我以不我對，而不對以我對，我以對非對，則以不對對，又何疑焉。而叩之不已耶，聖人於是自其妄見而喻之，謂彼以見見我，不以不見見我，以見不見我見我之處，不以不見見我不見之所，乃應之曰，尚自不見我，將何為我所，噫，是爾第二義矣。

關尹子曰：形可分可合，可延可隱，一夫一婦可生二子，形可分，一夫一婦二人成一子，形可合，食巨勝則壽，形可延，夜無月火，人不見我，形可隱。以一氣生萬物，猶棄髮可換，所以分形，以一氣合萬物，猶破唇可補，所以合形，以神存氣，以氣存形，所以延形，合形於神，合神於無，所以隱形。汝欲知之乎，汝欲為之乎。

抱一子曰：學道有三品，上品者以神為主，中品者以氣為主，下品者以形為主。以神存氣，以氣存形，所以延形；合形於神，合神於無，所以隱形。二者雖有微妙之分，然皆以神為主，上品也。以一氣生萬物，以一

氣合萬物，如採祖氣、服元氣、閉胎息、襲氣母之類，皆以氣為主，中品也。食巨勝則壽，無月火則隱，如服食金石草木，存意形中一處，皆以形物為主，下品也。然三者之中，至清者神，至濁者形，半清半濁者氣，夫以至濁之形，猶可合可分，可延可隱，而況於氣乎，而況於神乎，學者欲知之，欲為之，惟其志而已矣。

關尹子曰：無有一物不可見，則無一物非吾之見，無有一物不可聞，則無一物非吾之聞。五物可以養形，無一物非吾之形，五味可以養氣，無一物非吾之氣，是故吾之形氣，天地萬物。

抱一子曰：五物可以養形，五味可以養氣，則天地之間，無一物非吾之形氣也。至於無一物非吾之見，無一物非吾之聞，則聞與見果何物耶？以為形可聞見乎，則死屍胡不能聞見也，以為氣可聞見乎，則吁呵胡不能聞見也，是則形氣之外別有物焉，為之主張乎是。維持乎是，然則是物果安在哉？經不云乎，恍恍

忽忽，其中有物，窈窈冥冥，其中有精。欲識是物，精神是也。然神無我也，即天地萬物之色以見吾神，精無人也，即天地萬物之聲以聞吾精，是故吾之形氣，天地萬物，吾之精神，萬物聲色。

關尹子曰：耕夫習牛則獷，獵夫習虎則勇，漁夫習水則沉，戰夫習馬則健，萬物可為我。我之一身，內變螻蛄，外烝蝨蚤，瘕則龜魚，瘦則鼠蟻，我可為萬物。

抱一子曰：人之形本非我，有習於物，則與物俱化，病於氣，則與氣俱化，昔人有繪虎入神而化為虎者，是習牛則獷之理也，昔人有患瘤，破之，其中皆蝨者，是則烝變螻蛄之類也，習則與物俱化，病則與氣俱化，而世人執有其身，妄認為已有者，又豈悟夫天地之委形哉。

關尹子曰：我之為我，如灰中金，而不若鑛砂之金，破鑛得金，淘砂得金，揚灰終身，無得金者。

抱一子曰：不知我無我，而盡智求

我者，如揚灰求金，終身不可得也。知無我而不求我，則如金藏於鑛砂，玉蘊於石樸，昔人以喻水中鹹味、色裏膠清，畢竟是有不見其形，可謂善喻矣。

關尹子曰：一蜂至微，亦能游觀乎天地，一蝦至微，亦能放肆乎大海。

抱一子曰：蠢動含靈皆具是心，皆具是道，昔人謂焦冥蟲向蚊蟲眉睫上建立世界，蓋以形觀之，則有巨細之分，以心論之，則無小大之辨，故一蜂可游觀天地，一蝦可放肆大海，豈可以其形微而輕賤之哉。

關尹子曰：土偶之成也，有貴有賤，有士有女，其質土其壤土者人哉。

抱一子曰：人之遇人，有男女貴賤之相，而起愛惡尊卑之念者，分別於識，而不照於智也。今遇土偶之人，亦有男女貴賤之相，而不起愛惡尊卑之念者，知其質為土，而有偽之智也。故前章有言曰：知夫皆識所成，故雖真者亦偽之，此變識為智之妙用也。

關尹子曰：目自觀，目無色，耳自聽，耳無聲，舌自嘗，舌無味，心自揆，心無物，衆人逐於外，賢人執於內，聖人皆偽之。

抱一子曰：目逐於色，耳逐於聲，舌逐於味，心逐於物者，衆人也，目內視自觀，耳返聽自聽，舌收津自嘗，心攝念自揆者，賢人也。逐於外者固非，執於內者亦妄，先達有詩云：雖然放下外塵勞，內又縈心兩何異。是以聖人皆偽之。

關尹子曰：我身五行之氣，而五行之氣，其性一物，借如一所，可以取火，可以取水，可以生木，可以凝金，可以變土，其性含攝，元無差殊。故羽蟲盛者，毛蟲不育，毛蟲盛者，鱗蟲不育，知五行互用者，可以忘我。

抱一子曰：天地之間，鳥獸蟲魚莫不皆具五行之性，比之人則有偏盛之稟耳，偏於火者為羽，偏於金者為毛，偏於水者為鱗，朱雀在南，白虎在西之類是也。偏盛於此，則不育於彼，是知人與萬物各具五行，而五

行之氣輪環互用，迴視我身，皆五行之氣假合而成，而昧者執有此身，豈不惑哉！知此說者，可以忘我。

關尹子曰：心憶者猶忘飢，心忿者猶忘寒，心養者猶忘病，心激者猶忘痛。苟吸氣以養其和，孰能飢之？存神以滋其暖，孰能寒之？養五藏以五行，則無傷也，孰能病之？歸五藏於五行，則無知也，孰能痛之？

抱一子曰：人之飢寒病痛，皆出於妄心，若夫心憶猶能忘飢之類，是則以妄止妄之說也。苟知夫我之妄心皆出於五行，而以五行勝之，則妄心可以消釋矣。故吸氣以養和，則可以忘飢，存神以滋暖，可以忘寒，是則以金實土，以火勝水之術也，養五藏以五行可以愈病，是則生尅補瀉之法也，歸五藏於五行可以忘痛，是則形氣無我之道也。若夫不吸氣而飽，不存神而暖，不養五藏以愈病，不歸五行以忘痛，非天下至精至通之士，其孰能與於此。

關尹子曰：人無以無知無為者為無

我，雖有知有爲，不害其爲無我，譬如火也，躁動不停，未嘗有我。

抱一子曰：此篇逐章言形食，而論無我之說詳矣。聖人又慮學者執無我如木石，故於卒章重發明無我之妙用以為譬，如火也，雖躁動不停，未嘗有我，若人達此妙用，雖終日言行施為，不害其為無，噫，《莊子》所謂深知無心者矣。

文始真經言外旨卷之六

① 此句，《關尹子》作「爾何族何氏」。

② 此段之下，據二校本，尚缺下面二段經文：「枯龜無我，能見大知，磁石無我，能見大力，鍾鼓無我，能見大音，舟車無我，能見遠行。故我一身雖有智有力，有行有音，未嘗有我。『蜮射影能斃我，知夫無知者亦我，則普天之下，我無不在。』」

文始真經言外旨卷之七

抱一子陳顯微述

七釜篇

釜者，化也，凡十三章。

關尹子曰：道本至無，以事歸道者，得之一息，事本至有，以道運事者，周之百爲。得道之尊者，可以輔世，得道之獨者，可以立我。知道非時之所能拘者，能以一日爲百年，能以百年爲一日。知道非方之所能礙者，能以一里爲百里，能以百里爲一里。知道無氣，能運有氣者，可以召風雨。知道無形，能變有形者，可以易鳥獸。得道之清者，物莫能累，身輕矣，可以騎鳳鶴。得道之渾者，物莫能溺，身冥矣，可以席蛟鯨。有即無，無即有，知此道者，可以制鬼神。實即虛，虛即實，知此道者，可以入金石。上即下，下即上，知此道者，可以侍星辰。古即今，今即古，知此道者，可以卜龜筮。人即我，

我即人，知此道者，可以窺他人之肺肝。物即我，我即物，知此道者，可以成腹中之龍虎。知象由心變，以此觀心，可以成女嬰。知氣由心生，以此吸神，可以成鑪冶。以此勝物，虎豹可伏，以此同物，水火可入。惟有道之士能爲之，亦能能之而不爲之。

抱一子曰：《易》曰：知變化之道者，其知神之所爲乎。《孟子》曰：聖而不可知之謂神。今天下之學者，去聖逾遠，望道而未之見，覲其庶幾聖人者，絕代無聞焉，而況不可知之神。故言神者，例以孔子不語怪力亂神絕之，故知道之士絕口不言，至於生死之說，亦祕而不傳矣。且孔子果不言神乎？果不言生死乎？如曰知死生之說。如曰陰陽不測之謂神。鼓之舞之以盡神。皆孔子之言也。今聖人於七釜一篇備言變化之道，蓋釜者，資水火以變物之器也。後世學者觀之，不驚其言者鮮矣。或者指為異端偽書宜哉，《莊子》有言曰：瞽者無以與乎文章之

觀，聾者無以與乎鍾鼓之聲，豈唯形骸有聾瞽哉。夫知亦有之，其是之謂歟，《易》不云乎，天下之動真夫一者也，即以事歸道者，得之一息之理也，以道運事者，周之百為，即能成天下之務一致而百慮也。得道之尊獨者，可以輔世立我，即輔相天地之宜，聖人之大寶曰位也，道非時之所能拘，非方之所能礙，即通乎晝夜之道，而知不疾而速，不行而至之謂也。可以召風雨侍星辰，則風以散之，雨以潤之，可謂祐神之謂也。可以易鳥獸，騎鳳鶴，席蛟鯨，制鬼神，則精氣為物，游魂為變，知鬼神之情狀之謂也。可以入金石，即兌為金，艮為石，山澤通氣，然後能變化成萬物之謂也。可以卜龜筮，即卜筮尚占受命如響之謂也。學者能知乾坤一闔一闢謂之變，則知坎離交遇，水火相射，山澤通氣，雷風相薄之機，然後知我之震兌，即他人之肺肝，能入震兌之神，則可以窺他人之肺肝矣。我之魂魄即龍虎之精英，能凝

魂魄之氣，則可以化腹中之龍虎矣。坎之中有嬰兒，離之中有姤女，能取坎中之實，以點離中之虛，則女嬰相見，各現其形。是道也，因運神火照入坎中，驅逐陰中之陽飛騰，而上至神火本位，遇陽中之陰，擒制交結，如金烏搗兔，磁石吸針，二氣紐結而生變化，或現女嬰之像，或呈龍虎之形，變化萬端，飛走不定，往來騰躍，不出鼎鑪，當是時，則當鼓動巽風，助吾離火猛烹極煨，鍊成真丹，凝成至寶道也。其中有觀心吸神二用，皆助火候之力者。釋氏之觀法觀心，似是而非，方士之服氣嚥津，棄本逐末，安識運神火以觀真心，鼓巽風以吸真神之妙用哉。丹成之後，自然可以伏虎豹，可以入水火，是皆性命之祕，間有形於《易》書者。《易》不云乎，非天下至神至精至變至通，其孰能與於此。苟非其人，道不虛行，故曰惟有道之士能為之，聖人欲顯諸仁、藏諸用，以盡內聖外王之道，故曰亦能能之而不為之。

關尹子曰：人之力，有可以奪天地造化者，如冬起雷，夏造冰，死屍能行，枯木能華，豆中攝鬼，杯中釣魚，畫門可開，土鬼可語，皆純氣所為，故能化萬物。今之有情不停，亦氣所為，而氣之為物，有合有散，我之所以行氣者，本未嘗合，亦未嘗散。有合者生，有散者死，彼未嘗合未嘗散者，無生無死，客有去來，郵常自若。

抱一子曰：列子問，至人潛行不窒，蹈火不熱，行乎萬物之上而不慄，何以至此？關尹答曰：是純氣之守也，非智巧果敢之列。夫人拘於形，則不能變化，若夫鍊形為氣，使形盡化氣，則聚成形，而散為氣矣，故能化萬物。今觀雲之變化，則知氣之變化也。且蜃之為物，不靈於人，而猶積氣之久，可以化樓閣人物以為海市，至於鷹化為鳩，豹變為虎，蜣化為蟬，魚化為龍，鳥獸蟲魚尚能奪天地之造化，人反不若。何耶？以六欲七情內賊其天真，五行六塵外鑱其神氣，雖間有知道者，能制精葆

神，鍊形化氣，而作輟不常，十寒一曝，求其純乎化氣，雖億兆人中而求一人不可得矣。是道也，賢愚貴賤皆可為之，其道不遠，今之性情不停，皆此物也，蓋有非此物者存乎其中，學者知乎此，則知吾之所以行氣者，知所以行氣，則知所以鍊氣，知所以鍊氣，則知所以化氣成醇矣。是寶也，不隨氣合，不隨氣散，不逐形生，不逐形死，故曰客有去來，郵常自若。

關尹子曰：有誦呪者，有事神者，有墨字者，有變指者，皆可以役神御氣，變化萬物。惟不誠之人，難以自信，而易於信物，故假此為之，苟知為誠，有不待彼而然者。

抱一子曰：誠者，可以動天地，感鬼神，故或誦呪事神，或墨字變指，皆可役神御氣，變化萬物。不誠之人，不自信其虛，而易於信外物，故聖人假此變化，以啓其信心，使其苟知其為誠，則不待彼為之，而自能為之矣。

關尹子曰：人一呼一吸，日行四十萬里，化可謂速矣，惟聖人不存不變。

抱一子曰：天地之大，不可以程度計，今云一呼一吸，日行四十萬里，則人一晝一夜凡一萬三千五百息，日行五十四億里，為一周天。昔人以表影長短驗日之行度遠近，亦以世之尋文為準，既可以尋文計，則可以步里計矣。愚妄以謂日行四十萬里，豈得無奇，是蓋總其大數耳，若果有奇，則恐滿五千五億里之數，則與《易》之天地之數五十有五合矣。日月五星離合順逆，聖人皆能測而為曆，而昧者莫不見，莫能知也，故《陰符經》曰：天下莫不見，莫能知者是也。夫速莫速於大化，昔人謂揭天地以趨新，負山嶽以捨故，造化無斯須不移也，萬物無暫忽不變也。山川日更矣，而世人以為如昨，時世日新矣，而世人以為如故，今交一臂而失之者，皆在冥中去矣，故向者之我，非復今我，今日之我，非復故我矣，是則我與今俱往矣。而昧者不

知，橫謂今日所遇可係而存，安知一息之頃，而大化已行四十萬里哉。惟聖人不逆化而存，亦不順化而變，故曰不存不變。億者，謂萬萬為億。

關尹子曰：青鸞子千歲而千歲化，桃子五仕而心五化，聖人賓事去物，豈不欲建立於世哉，有形數者，懼化之不可知也。

抱一子曰：有形有數者必化，在聖人不欲苟免也，何則？既謂之形，必有數焉，非我所有也，天地之委蛻也，天地且不能停化，而形豈能違化哉。雖然，聖人假衆物以游世，對五行以寓形，應萬事不敢為天下先，故不為主而為賓也，御萬物而不為萬物所役，故立於獨而無待也。為賓則如寄，謂來去自如耳，無待則無耦，謂存亡不二耳，如是，則若形若數，豈能拘哉。而聖人猶不欲久立於世者，示此形軀為吾大患，懼化之不可知也。青鸞子，古之得道之士也，住世千歲而千歲化，即此意也。若夫桃子五仕而心五化者，如孔子

行年六十而六十化，曾子再仕而心再化，意同。

關尹子曰：萬物變遷，雖互隱見，氣一而已，惟聖人知一而不化。

抱一子曰：此章意連上章，謂有形之物，雖互隱見，而一氣在天地間未嘗化也，一氣猶且不化，況吾之非氣者哉！何謂非氣？氣之所自生者，前篇已詳述之矣。聖人此章明吾之靈真，若寓於形，則雖千年亦化，寓於氣，則一而不化也。

關尹子曰：爪之生，髮之長，榮衛之行，無頃刻止，衆人能見之于著，不能見之於微^①，聖人任化，所以無化。

抱一子曰：衆人徒見天地日月化行之速，此著而易見者也，而不知吾之榮衛，晝夜之間行陰二十五度，行陽二十五度，凡一萬三十五百息，脉絡之循環運轉，無頃刻止。故爪之生，髮之長，無暫忽停。此微而難見者也，孰能逃之哉。惟聖人不存不變，任彼自化，所以無化。

關尹子曰：室中有常見聞矣，既而之

門之鄰^②，之里之黨，既而之郊之山之川，見聞各異，好惡隨之，和競從之，得失成之，是以聖人動止有戒。

抱一子曰：聖人之聞見，未嘗異於衆人，衆人之聞見，隨處變異而生好惡和競得夫^③之心，使聖人異於衆人，而隨處不生好惡和競得失之心，則有心矣，有我矣，此賢人不動心之學，望聖人而未至者也。若夫聖人則出門同人，隨人好惡，從人和競，成人得失，如老子之人號亦號，人笑亦笑，孔子之耳順縱心，列子從師三年，心不敢念是非，口不敢言利害，從師五年，心更念是非，口更言利害，此皆聖人不異衆人，衆人不異聖人之說也，何嘗以聞見自異哉。聖人之所謹者，不妄出戶庭而無咎，不妄同人于莽而弗克攻，不妄同人于郊而志未得，危邦不入，亂邦不居，特以動止為戒而已矣。

關尹子曰：譬如大海，能變化億萬蛟魚，水一而已。我之與物，蔚然蔚然，在大化中，性一而已。知夫性一者，無

人無我，無死無生。

抱一子曰：昔人有言曰：魚龍不知水為命，猶人在空中不識空，我之與物，林然在大化之中，性一而已，猶蛟魚生於大海之中，水一而已，知大海為一水，則蛟魚相忘矣，知太虛惟一性，則人我相忘矣，何者為死，何者為生。

關尹子曰：天下之理，是或化為非，非或化為是，恩或化為讎，讎或化為恩，是以聖人居常慮變。

抱一子曰：天下無有不變之事，亦無有不變之理，聖狂之相去，奚啻天淵，生死之不齊，奚啻冰炭，而聖罔念則化作狂，狂克念則化作聖，而生極則化為殺，殺極則化為生，而況是非恩讎之間，疑似反復，豈不易變哉。昧者執其自是，如山之不可移，恃其有恩，如海之流不竭，未幾是化為非，恩化為讎，而前日自是之我山，俄化而為衆非之海，恃恩之人海，俄化而為積怨之山，如高岸為谷，深谷為陵，不期變而變也。吁，

可畏哉！惟聖人不執是，不辨非，不恃恩，不念讎，平我山，夷人海，居天下之常，慮事物之變，未嘗先人，而嘗隨人，其要無咎而已矣。

關尹子曰：人之少也，當佩乎父兄之教，人之壯也，當達乎朋友之箴，人之老也，當警乎少壯之說，萬化雖移，不能厄我。

抱一子曰：人之處世，未免有立身行己，應事接物之為，苟有我而自用，則一動之頃，吉凶悔吝隨之，惟有一吉之利，而凶悔吝三者厄我矣。惟聖人捨己從人，當少時即佩父母之教，及其壯也，達乎朋友之箴，至於老也，警其少壯之說，是則自少至老，未嘗有我，萬化雖移，安能厄我哉。

關尹子曰：天下之理，輕者易化，重者難化，譬如風雲，須臾變滅，金玉之性，歷久不渝。人之輕明者，能與造化俱化而不留，殆有未嘗化者存。

抱一子曰：輕者人之魂也，明者人之神也，魂為木，所以輕也，神為火，

所以明也。日出於卯而魂旺，日中於午而神旺，日晡於申而魂絕，日沒於亥而神絕，是則一日之間，而吾之魂神與造化俱化而不留矣。惟精與魄重而且暗，可以歷久，故能胎魂胎神，至於來日，輕明魂神，復自精魄因明因寤而復生復旺矣，是則輕而明者，假重而暗者為之母也，使魂神絕於申亥之間，而精魄壞而不存，則來日之魂神無自而生矣。知道之士知乎此，故鍊精鍊魄為金為玉，使歷久不渝，則吾之魂神，可以永久乘負，得其所託而生長矣。《參同契》曰：吉人相乘負，安穩可長生。是則鍊精魄為金玉，則吾身為大吉之身，而乘負吾之魂神矣。以太乙火符修鍊金丹只念二物者，鍊精與魄也，並土為三物耳。《參同契》謂其三遂不入，火二與之俱者，木三之魂，與火二之神，不須鍛鍊，不入鑪鼎，而在鑪鼎之外，周天運火者，乃神與魂也，魂三神二合之成五，所以能周天運火而不昧。精水之一與魄

金之四，亦合之成五，所以能化金液以成丹，如是四物俱能成五者，實假中宮土五以成變化。張悟真謂只緣彼此懷真土，遂使金丹有返還者此也。又曰：東三南二同成五，北一西方四共之，戊己自居本生位，三家相見結嬰兒。知此理，然後知吾身，殆有未嘗化者存。

關尹子曰：二幼相好，及其壯也，相遇則不相識，二壯相好，及其老也，相遇則不相識，如雀蛤鷹鳩之化，無昔無今。

抱一子曰：人之形體，亦天地間一物耳，無傾刻不與造物俱化者也。幼時顏貌，至壯則異，壯時顏貌，至老則殊。如雀蛤鷹鳩，隨四時陰陽之氣變化形體，不得自如也，安有今昔之同哉。然則吾之形容，與今俱往矣，與物俱化矣，可不覺乎。

文始真經言外旨卷之七

①此句之後，据二校本，尚缺一句經文：「賢人見之於微，而不能任化」。

②据二校本，此處脫一「鄰」字，照補。

③「得夫」，疑為「得失」之誤。

文始真經言外旨卷之八

抱一子陳顯微述

八籌篇

籌者，物也，凡六章。

關尹子曰：古之善揲著灼龜者，能於今中示古，古中示今，高中示下，下中示高，小中示大，大中示小，一中示多，多中示一，人中示物，物中示人，我中示彼，彼中示我。是道也，其來無今，其往無古，其高無蓋，其低無載，其大無外，其小無內^①，其外無物，其內無人，其近無我，其遠無彼。不可析，不可合，不可喻，不可思，惟其混淪，所以為道。

抱一子曰：《易》曰，探賾索隱，鈎深致遠，成天下之亶亶者，莫大乎著龜。如是則著之與龜可以喻道矣。是物也，本枯莖朽骨耳，靈從何來？聖從何起？今焉能於今中卜古，古中卜今？是則其來無今，其往無古，

而彰往察來也。能於高中示下，下中示高，是則其高無蓋，其低無載，而上下無常也。能小中示大，大中示小，是則其大無外，其小無內，而齊小大也。能一中示多，多中示一，是則錯綜其數，而一致百慮也。能人中示物，物中示人，是則其外無物，其內無人，而無有遠近幽深，遂知來物也。能我中示彼，彼中示我，是則其近無我，其遠無彼，而以言乎遠，則不禦以言乎邇，則靜而正也。然則枯莖朽骨，何其神哉，是神也，存乎枯莖朽骨之中，而不可析，不可合，不可喻，不可思，知妙道之存乎人之血肉形體之中，而不可析合不可喻思也。《易》不云乎，著之德圓而神，惟其混淪所以為道。

關尹子曰：水潛，故蘊為五精，火飛，故達為五臭，木茂，故華為五色，金堅，故實為五聲，土和，故滋為五味，其常五，其變不可計，其物五，其雜不可計。然則萬物在天地間，不可執謂之萬，不可執謂之五，不可執謂之一，不可執謂

之非萬，不可執謂之非五，不可執謂之非一。或合之，或離之，以此必形，以此必數，以此必氣，徒自勞耳，物不知我，我不知物。

抱一子曰：五行之在天地間，其常五，其變不可勝計，其物五，其雜不可勝計，總其綱領，則水蘊為五精，火達為五臭，木華為五色，金實為五聲，土滋為五味，然萬物在天地間不可勝計，皆自五行錯雜而生。或合之，或離之，不可執謂之五，不可執謂之萬，不可執謂之一，又不可執謂之非五、非萬、非一，若分別某物必某數必某氣，徒自勞耳，故曰物不知我，我不知物。

關尹子曰：即吾心中可作萬物，蓋心有所之，則愛從之，愛從之，則精從之。蓋心有所結，先凝為水，心慕物涎出，心悲物淚出，心愧物汗出。無暫而不久，無久而不變，水生木，木生火，火生土，土生金，金生水，相攻相尅，不可勝數。嬰兒藥女，寶樓絳宮，青蛟白虎，寶鼎洪鑪，皆此物，有非此物存者。

抱一子曰：《陰符經》曰：天有五賊，見之者昌，五賊在心，施行於天，宇宙在乎手，萬化生乎身。然則五行之妙用，靈哉神哉，人患不知其機耳，知其機而制之，則五賊皆為吾用，而嬰兒藥女，寶樓絳宮，青蛟白虎，寶鼎洪鑪，皆見其形而不能隱，故曰見之者昌。見之者，見吾身之精神魂魄，凝於神水，結而成象，現於黃庭之中也。是物也，猶在腎感愛而為精，在目感悲而為淚，在鼻感風為涕，在身愧物為汗，一同是皆出於心有所之，而神水隨應也。如幼年所見景物，至壯至老，猶能夢見，終身不忘者，印入於心，凝結神水，無暫而不久，無久而不變也。但心有所之，與心無所之不同耳，若夫擒制五賊，鍛鍊五行，惟一心不動，神水自凝，然後五賊見形，千變萬化矣。是道也，雖皆此五行之物所化而成，然自有非此五行之物者存乎其中，而為之主宰耳。

關尹子曰：鳥獸俄呦呦，俄旬旬，俄逃

逃，草木俄茁茁，俄亭亭，俄蕭蕭，天地不能留，聖人不能繫，有運者存焉耳。有之在彼，無之在此，鼓不桴則不鳴，偶之在彼，奇之在此，桴不手則不繫。

抱一子曰：聖人觀化，所以無化化之運於形氣之間也，天地不能留，聖哲不能繫。夫鳥獸呦呦而鳴，旬旬而來，逃逃而去，與夫草木茁茁而芽，亭亭而茂，蕭蕭而枯，皆俄然爾，化可謂速矣。然聖人所以無化者，如鼓不桴則不鳴，有在彼無在我也，桴不手則不擊，偶在彼奇在我也。前篇曰手不觸刃，刃不傷人，與此同旨。

關尹子曰：均一物也，眾人惑其名，見物不見道；賢人析其理，見道不見物，聖人合其天，不見道，不見物，一道皆道。不執之即道，執之即物。

抱一子曰：萬物盈天地間，各具一名，各具一理，見其名而不見其道者，為物所格，眾人也；析其理而不見其物者，能格於物，賢人也；聖人則不然，不見所謂道，不見所謂物，

合其天而已矣。若夫指一物謂之道，則物物皆道也，惟不執之謂之道，則即道也，若執之以為道，即物矣。

關尹子曰：知物之偽者，不必去物，譬如見土牛木馬，雖情存牛馬之名，而心忘牛馬之實。

抱一子曰：物之真偽生於識，聖人遇物真者亦偽之。去識也，真者且偽之，則舉天下之物皆偽矣，知天下之物皆偽，則何必去物哉，如見土木偶形，雖有某物之名，而心忘某物之實。學道之士，當對景之時能如是乎！

文始真經言外旨卷之八

①此句之下，《無上妙道文始真經》尚有二句：「其本無一，其末無多」。

②据二校本，「不繫」當為「不擊」。

文始真經言外旨卷之九

抱一子陳顯微述

九藥篇

藥者，雜治也。凡三十一章。

關尹子曰：勿輕小事，小隙沉舟，勿輕小物，小蟲毒身，勿輕小人，小人賊國。能周小事，然後能成大事，能積小物，然後能成大物，能善小人，然後能契大人。天既無可必者人，人又無能必者事，惟去事離人，則我在我，惟可即可，未有當繁簡可，當戒忍可，當勤惰可。勤惰，一作動靜。

抱一子曰：此一篇皆藥石之言，所以謂之雜治也。蓋人之處世，未能去事離人，則應事接物之際，一動一止，有吉凶悔吝存焉，聖人欲人避凶就吉，免悔吝之虞，故垂藥石之訓，使人服膺而對治之，非大聖大智，其孰能如是哉。且夫天既無可必者人，人又無能必者事，其敢輕小人輕

小物輕小事哉！孔子曰：人心險於山川，難於知天。天猶有春秋冬夏旦暮之期，人者厚貌深情，其就義若渴者，其去義若熱，豈可測哉！世之輕小人易小物忽小事，而至於敗國亡家喪身失命者多矣，故聖人謂能善小人，然後能契大人，能積小物，然後能成大物，能周小事，然後能成大事，無非自小以至大，自微以至著，而不敢以其小人小物小事而輕忽之也。聖人之待小者且加之謹，況其大者乎！天下之理，未有當繁之事以簡能了者，亦未有當戒之事可以強忍為之者，亦未有當勤之事可以慵惰成之者，故聖人於世惟可則可，惟不可則不可，故於事無可無不可，初何固必哉！是知聖人雖日應事物，而不著事不著物，而我在我矣。

關尹子曰：智之極者，知智果不足以周物，故愚，辯之極者，知辯果不足以喻物，故訥，勇之極者，知勇果不足以勝物，故怯。

抱一子曰：天下之理，爭之則不足，遜之則不餘，聖人之大智若愚，大辯若訥，大勇若怯者，豈姑為是偽行哉。蓋知夫智果不足以周物，故愚，辯果不足以喻物，故訥，勇果不足以勝物，故怯耳。傳曰，其愚不可及，則智不如愚。十信九中不如一默，則辯不知訥，柔能制剛，弱能勝強，則勇不如怯。

關尹子曰：天地萬物，無有一物是吾之物，物非我，物不得不應，我非我，我不得不養。雖應物，未嘗有物，雖養我，未嘗有我。勿曰外物然後外我，勿曰外形然後外心，道一而已，不可序進。

抱一子曰：善應物者無物，善養我者無我，有物則不能應物，有我則不能養我，何則？物非我物，我非我我，纔外物便是外我，纔外我便是外心。若作內觀其心，外觀其形，遠觀其物，則分心、我、物為三，未免序進也。道一而已，直下便見，不勞分別，一空總空，何必序進哉。

關尹子曰：諦毫末者，不見天地之大，審小音者，不聞雷霆之聲。見大者亦不見小，見邇者亦不見遠，聞大者亦不聞小，聞邇者亦不聞遠。聖人無所見，故能無不見，無所聞，故能無不聞。

抱一子曰：人有所見，則有所不見，有所聞，則有所不聞，非神有所限，而精有所量也，用吾精神不得其道耳。殊不知凡天地萬物之妙者，皆吾之神，凡天地萬物之有者，皆吾之精，夫如是，則聖人無所見乃能無所不見，無所聞乃能無所不聞，學者知之乎。

關尹子曰：目之所見，不知其幾何，或愛金，或愛玉，是執一色為目也，耳之所聞，不知其幾何，或愛鍾，或愛鼓者，是執一聲為耳也，惟聖人不慕之，不拒之，不處之。

抱一子曰：是章又釋前章之旨，聖人慮學者不知無所見無所聞為大也，姑以所見所聞喻之。如目之所見，不知其幾何色，而視其物者，執某色以拘其見，耳之所聞，不知其幾

何聲，而聽某響者，執其聲以拘其聞。惟聖人則不慕彼之聲色，亦不拒彼之形響，惟不處吾之見聞，則吾之見聞大矣。

關尹子曰：善今者可以行古，善末者可以立本。

抱一子曰：學者欲行古道，必善今俗，欲反本源，須知末務，苟生於今之世，而違今之俗，則害生矣，只知有本源，而不知有末務，則難立矣。故聖人和光同塵以善今，泛應曲當以善末者，乃所以為行古道，立本源之地也歟。

關尹子曰：狡勝賊能捕賊，勇勝虎能捕虎，能克己乃能成己，能勝物乃能利物，能忘道乃能有道。

抱一子曰：賊以狡勝，虎以勇勝，固矣，然則己以何克哉？己者，我身也，克者，能勝也。知我身本何物，則知所以克之之道矣。學者當觀我本無己，因七情六欲緣合而生，欲克我身，先克情欲，前章不云乎，能制一情者，可以成德，能忘一情者，可

以契道，此聖人成己之學也。既能成己矣，然後能利物，苟有一物存乎吾前，則為物勝矣，焉能利物哉？既能成己，又能利物，可以造道矣，然則道可忘乎，道未能忘，焉能有道。

關尹子曰：函堅則物必毀之，剛則折矣^②，刀利則物必摧之，銳則挫矣^③，威鳳以難見為神，是以聖人以深為根，走麝以遺香不捕，是以聖人以約為紀。

抱一子曰：堅則毀矣，銳則挫矣，以深為根，以約為紀，皆《老子》之言也。《關尹子》復以函刀鳳麝以發明老子之旨，使學者盡守柔取虛，韜光無藏之理，以曲全免咎而已，豈非藥石之言乎。

關尹子曰：瓶有二竅，水實之，倒瀉閉一，則水不下，蓋不昇則不降，井雖千仞，汲之水上，蓋不降則不昇，是以聖人不先物。

抱一子曰：聖人不敢為天下先者，乃所以為天地萬物之先也，何則？天下之理，不昇則不降，不後則不先，不下則不高，故《老子》為天下

谿，為天下谷，皆此意也。以管取水，按上竅則水下留，以瓶吸水中置火，則水逆上，皆不昇則不降之理，與閉竅汲井同一理。然則可昇可降者水也，所以閉之汲之火之按之者人也，人之所以能使水之昇降留逆者氣也，雖然天道好還，持而盈之不如其已，況敢先物乎，是尤聖人所大戒也。

關尹子曰：人之有失，雖已受害於已失之後，久之，竊議於未失之前，惟其不恃己聰明，而兼人之聰明，自然無我，而兼天下之我，終身行之，可以不失。

抱一子曰：使睿智聰明如虞舜，猶不自恃其聰明，而捨己從人，況餘人乎！殊不知不恃己聰明，而兼人之聰明易，而能察人之情偽，而擇其為交際難，噫，知人知言之說，堯舜其猶病諸！

關尹子曰：古今之俗不同，東西南北之俗又不同，至於一家一身之善又不同，吾豈執一豫格後世哉。惟隨時同

俗，先機後事，捐忿塞欲，簡物恕人，權其輕重而為之，自然合神不測，契道無方。

抱一子曰：隨時同俗，先機後事，捐忿塞欲，簡物恕人，是數者，與孔子《翼易·隨時》同。人知幾成務，懲忿窒欲，易簡恕忠之言略同。而學者不知，謂道家之學獨尚無為，是則將謂聖人執一豫格後世，聖人何心哉。古今四方，一家一身俗尚雖各不同，而聖人權其輕重而為之制，可從先進則先進，可拜下則拜下，惟其無可無不可，所以合神不測，契道無方也。孔子不云乎，竊比於我老彭，然則孔老之道，其可以異觀哉。

關尹子曰：有道交者，有德交者，有事交者。道交者，父子也，出於是非賢愚之外者^④，故久^⑤；德交^⑥，則有賢愚是非矣^⑦，故或合或離^⑧；事交者，合則離。

抱一子曰：子華子與孔子相遇於途，傾蓋終日，歡如平生，孔子顧弟子取束帛以贈先生，而子路疑之，蓋子華子者，老子之弟子程本也，孔子

一見，傾蓋如故，此道交也。二子邂逅相遇，目擊道存，豈若世俗之德交利交有，賢愚是非利害之分哉，宜乎子路之不識也。噫，安得如程子華、孔仲尼邂逅傾蓋，相忘於形骸之外哉。

關尹子曰：勿以拙陋曰道之質，當樂敏捷，勿以愚暗曰道之晦，當樂輕明，勿以傲易曰道之高，當樂和同，勿以汗漫曰道之廣，當樂要急，勿以幽憂曰道之寂，當樂悅豫，古人之言學之多弊，不可不救。

抱一子曰：古人之言教，不止一端，在當時有禽滑釐、宋鉞、尹文、彭蒙、田鈺、慎到、墨翟諸家之學，今其言不傳，至孟子之時，止有楊墨二家之言，則知禽宋尹彭田慎之言，至關尹仲尼之時，已拒絕之矣。敏捷者，如今之禪學問答，所以尚口捷給也。輕明者，如今之騰身踴躍習觀之類也。和同者，如西域教之六羣和合也，要急者，如今之參一句話頭，以求頓悟也。悅豫者，如今之放逸曠

達，逍遙自在也。是數者，雖非當時古人之教，而其事大率相類，學之多弊，亦不可不救也。

關尹子曰：不可非世是己，不可卑人尊己，不可以輕忽道己，不可以訕謗德己，不可以鄙猥才己。

抱一子曰：非世者，世亦非之，禍也；卑人者，人亦卑之，辱也；遇輕忽而能忍，自以為己有道，淺也；遇訕謗而不辯，自以為己有德，驕也；至於逢鄙猥之人，自以為己有才，繆也。是五者皆學者之病也，宜自藥之。

關尹子曰：困天下之智者，不在智而在愚，窮天下之辯者，不在辯而在訥。

抱一子曰：人之多智多辯者，病也，人之能愚能訥者，藥也，智不能困天下之智，辯不能窮天下之辯，以智攻智，以辯敵辯，如以火止火，以水止水耳，奚益哉！昔南唐選博學辯給之使使本朝，我太祖選不識字至愚至訥武夫對之，使辯博之使拔無所施，即此道也。

關尹子曰：天不能冬蓮春菊，是以聖人不違時，地不能洛橘汶貉，是以聖不違俗。聖人不能使手步足握，是以聖人不違我所長，聖人不能使魚飛禽馳，是以聖人不違人所長。夫如是者，可動可止，可晦可明，惟不可拘，所以為道。

抱一子曰：天下道術，或尚晦，或尚明，或尚動，或尚止，皆自然之理也。聖人觀天之道，以時吾神之晦明，察地之利，以宜吾形之動止，近取諸身如此，則遠示之人，亦莫不然，是則神宜明則明之，神宜晦則晦之，形宜動則動之，形宜靜則止之耳。吾之手不能步，足不能握，猶魚不能飛，禽不能馳也，天猶不可使冬蓮春菊，地猶不可使洛橘汶貉，而況違我所長乎！而況違人所長乎！苟違其形神之所長而強為之，斯害也已，道安在哉。

關尹子曰：少言者，不為人所忌，少行者，不為人所短，少智者，不為人所勞，少能者，不為人所役。

抱一子曰：多言則為人所忌，多行則為人所短，多智則為人所勞，多能則為人所役，皆悔吝也，可不謹哉。

關尹子曰：操之以誠，行之以簡，待之以恕，應之以默，吾道不窮。

抱一子曰：應事接物，不可不誠，不誠喪德，故於誠則操而存之；不可不簡，不簡則勞神，故於簡則行而宜之；不可不恕，不恕則忿不懲；不可不默，不默則機不密。盡是四者，吾道何窮哉。

關尹子曰：謀之于事，斷之于理，作之于人，成之于天，事師于今，理師于古，事同于人，道獨于己。

抱一子曰：謀今之事，當以今之事為師，如善弓者，師弓不師羿，善舟者，師舟不師稟，其則不遠也。斷事之理，當以古人為師，古之聖人揆理曲盡，非今人所及也。事作於人，不得不與人同其好惡也，既謂之事矣，作之於人，成之於天，在我何敢固必哉，若夫道，則在我獨行之而已矣。

關尹子曰：金玉難捐，土石易捨，學道

之士，遇微言妙行，慎勿執之，是可為而不可執，若執之者，腹心之疾，無藥可療。

抱一子曰：學者得一善言，聞一善行，則拳拳服膺而勿失，可謂好學矣，殊不知此可以成德，不可以入道，道則靈臺皎潔，一物不留，庶可晞覲。若遇微言妙行，執之於心，是為腹心之疾，無藥可療。何則？土石易捨，金玉難捐，微言妙行入人心府，終身不忘，昔人謂一句合道語，萬劫繫驢椿，信哉。

關尹子曰：人不明於急務，而從事於多務他務奇務者，窮困災厄及之，殊不知道無不在，不可捨此就彼。

抱一子曰：世之學者信異而不信常，好奇而不好正，故多從事於奇務他務多務，而荒其本業，廢其常產，失其生計，道未見而窮困災厄先及之矣。殊不知日用常行，道無不在，故曰人當明於急務。所謂急務者，為人子以事親為急，為人父以教子為急，為人下以事上為急，為人上以

安下為急，至於為士以行業為急，為農以耕桑為急，為工以材器為急，為商以貨通為急之類。皆急務也，豈可捨此就彼哉！此之急務了辦不志於道則已，苟有餘力而志於道，則道在其中矣。

關尹子曰：天下之理，捨親就疏，捨本就末，捨賢就愚，捨近就遠，可暫而已，久則害生。

抱一子曰：此章又重發明上章之旨，謂學者亦有捨親就疏、捨本就末、捨賢就愚、捨近就遠，而於道有所得者，可暫而已，久則害生。

關尹子曰：昔之論道者，或曰凝寂，或曰邃深，或曰澄徹，或曰空同，或曰晦冥，慎勿遇此而生怖退。天下至理，竟非言意，苟知非言非意，在彼微言妙意之上，乃契吾說。

抱一子曰：自古聖賢立言垂訓，所上不同，同歸於道，有言凝然寂默者，有言澄湛虛徹者，有言空無大同者，有言晦冥息滅者，學者遇此，勿生退怖，道不在言意，言意豈能盡道

耶，在彼微言妙意之上，乃契聖人之說。

關尹子曰：聖人大言金玉，小言桔梗芣苢也，用之當，桔梗芣苢生之，不當，金玉斃之。

抱一子曰：聖人之言，精者如金如玉，粗者如梗如芣，昔人謂細語及麤言，皆歸無上道，有因麤言而悟道者，有研細語而不悟者，如用藥之當，服草木生之，用之不當，服金玉斃之，安取乎藥之貴賤哉，惟其當而已矣。

關尹子曰：言某事者，甲言利，乙言害，丙言或利或害，丁言俱利俱害，必居一于此矣，喻道者不言。

抱一子曰：道與事不同，事則有利有害，故言事，則有某言中利、某言中害之理，至於言道，則終無某言中道，某言不中道之理，故善喻道者不言。

關尹子曰：事有在事言有理，道無在道言無理，知言無理，則言言皆道，不知言無理，雖執至言，為梗為翳。

抱一子曰：道與事相及，如水火晝夜之不侔也，學者言道如言事，則誤矣，言事則事有所在，故事之言有理也，言道則無在無不在，則道之言安有所謂理哉。若知夫道無理可言，則言言皆道，不然，則雖執至言，為梗為翳而已。

關尹子曰：不信愚人易，不信賢人難，不信賢人易，不信聖人難，不信一聖人易，不信千聖人難。夫不信千聖人者，外不見人，內不見我，上不見道，下不見事。

抱一子曰：學道自信門入信，苟不篤道，無由而入矣。然而信聖賢易，信狂愚難，信至狂愚，則吾之信可謂篤矣，然吾之所謂信者，非世人之所謂信也，世人之所謂信者，信之信也，吾之所謂信者，不信之信也。若夫不信狂愚之人，則世人皆能信吾之不信也，至於不信賢人，則世人未必信吾之不信也，況乎至於不信聖人，則豈世人信其不信者乎，又況乎至於不信千萬聖人，此則世人尤所

難信之法也。惟能信吾不信千萬聖人者，其信可謂真信矣，是人也，其亦外不見人，內不見我，上不見道，下不見事者哉。

關尹子曰：聖人言蒙蒙，所以使人聾，聖人言冥冥，所以使人盲，聖人言沉沉，所以使人瘖。惟聾則不聞聲，惟盲則不見色，惟瘖則不音言。不聞聲者，不聞道、不聞事、不聞我，不見色者，不見道、不見事、不見我，不音言者，不言道、不言事、不言我。

抱一子曰：昔有學者問於其師曰：有一人，負盲聾瘖三者之病來見於師，師何以發藥？師曰：汝近前來。學者近前而立，師以掌示之曰：此何物？曰掌。師叱出曰：汝非三種病人矣。噫，是人聞師語而近前，則不聾矣，能見掌，則不盲矣，曰掌，則不瘖矣，然其人始發問端，似知此理，及乎被師一勘，則本情露矣。《參同契》曰：耳目口三寶，固塞勿發通。《陰符經》曰：九竅之邪，在乎三要，可以動靜。與此同旨。嗚

呼，安得不聞聲不見色不音言者，與之意會哉！

關尹子曰：人徒知偽得之中有真失，殊不知真得之中有真失，徒知偽是之中有真非，殊不知真是之中有真非。

抱一子曰：天下學者皆知偽得之中有真失，偽是之中有真非，故求真得以為得，真是以為是也。殊不知道無得失，無是非，纔有得失有是非，則是事也，非道也，若人學道而忽遇異物異景，而橫執以為真得真是者，往往多遭魔攝，而不悟其為真失真非矣。

關尹子曰：言道者如言夢，夫言夢者曰：如此金玉，如此器皿，如此禽獸，言者能言之，不能取而與之，聽者能聞之，不能受而得之，惟善聽者，不泥不辨^⑨。

抱一子曰：此一喻最善，與人說道，誠如說夢。說者曰：吾夢極富貴，聽者曰：吾且不見，吾且不知。說者曰：吾真有是夢，不可不信，聽者曰：吾既不見不知，何以生信？說

者不能取而示之，則曰聽者不智，聽者不能得而見之，則曰說者不實。如是則諒者^⑩言之不如不言，聽者聽之不如不辨。昔人謂知道易不言難，聞道易默會難，故善聽者，不於言下求道，惟默會其言外之旨可也。苟泥其言而辨其實，烏足以為善聽善學者哉，關尹子特於篇末垂此章為訓者，蓋欲學者觀此玄言不泥不辨，惟領悟其言外之旨而已矣。

關尹子曰：圓爾道，方爾德，平爾行，銳爾事。

抱一子曰：道不圓則不神，德不方則不正，行不平則不常，事不銳則不利。關尹子述微言妙義既終，又慮學者或志道而忘德，或立德而遺行，或積行而廢事，是則知務本而不知務末，未有不因末而害本者也。世固有因事之失而虧行者，亦有因行之虧而損德者，亦有因德之損而妨道者，學者豈可只知從事於道，而不資德行以相扶助哉！又豈可只知積德累行，而遇事不加之謹哉！世亦

有志于道，而闡提德行與夫失業廢事者，安知聖人立言垂訓，體用畢備，本末具陳，如此詳盡耶！噫，關尹大聖人慈愍後世之心至矣，盡矣，不可思議失^⑪。

文始真經言外旨卷之九

①「或愛鼓者」，二校本皆作「或愛鼓」，無「者」字。
 ②此句，二校本皆作「剛斯折矣」。
 ③此句，二校本皆作「銳斯挫矣」。
 ④此句，二校本皆作「出于是非賢愚之外」，無「者」字。
 ⑤此句，二校本皆作「德交者」。
 ⑥此句，二校本皆作「則有是非賢愚矣」。
 ⑦据二校本，此句之後，尚缺經文二句「伏天下之勇者，不在勇而在怯」。
 ⑧「睇覷」，疑當作「睇顛」。
 ⑨「不辨」，二校本皆作「不辯」。
 ⑩「諒者」，當為「說者」之誤。
 ⑪「失」，當為「矣」之誤。

葛仙翁後序

丹陽葛稚川曰：洪體存蒿艾之資^①，偶好喬松之壽，知道之士，雖微賤必親也，雖夷狄必貴也。後遇鄭君^②，鄭君多玉笈瓊笥之書，服餌開我以至道之良藥，呼吸洗我以紫清之上味，後屬洪以《關尹子》^③，洪每愛之誦之，藏之拜之。宇者道也，柱者建天地也，極者尊聖人也，符者精神魂魄也，鑑者心也，匕者食也，釜者化也，籌者物也，藥者雜治也。洪每味之，泠泠然若躡飛葉，而游乎天地之混冥，沉沉乎^④若履橫杖，而浮乎大海之沙漠，超若處金碧琳琅之居，森若握鬼魅神姦之印，倏若飄鸞鶴，拏亦作怒若鬥虎兕，清若浴碧，慘若夢紅，擒縱大道，渾淪至理，方士不能到，先儒未嘗言，可仰而不可攀，可玩而不可執，可鑑而不可思，可符而不可言，其忘物遺人者^⑤之所言乎，其絕迹去智者之所言乎，其同陰陽而冥彼此者之所言乎！何如此之尊高，何

如此之廣大，又何如此之簡易也。洪也幸親受之，咸和二年五月朔丹陽葛洪炷薰敬序。

①「資」，《關尹子》作「質」。

②此句，《關尹子》作「後遇鄭君思遠」。

③此句，《關尹子》作「後屬洪以尹真人《文始經》九篇」。

④「沉沉乎」，《關尹子》作「茫茫乎」。

⑤「遺人者」，《關尹子》作「遺世者」。

（曾召南點校）

005 太上老君開天經

經名：太上老君開天經。簡稱《開天經》。原不題撰人，約出於南北朝。唐釋明粲《決對傳奕廢佛僧事表》稱：《開天經》張泮所造。當即指此經。一卷。底本出處：《萬曆續道藏》。參校本：《雲笈七籤》卷二。

蓋聞未有天地之間，太清之外，不可稱計，虛無之裏，寂寞無表，無天無地，無陰無陽，無日無月，無晶無光，無東無西，無青無黃，無南無北，無柔無剛，無覆無載，無壞無藏，無賢無聖，無忠無良，無去無來，無生無亡，無前無後，無圓無方，百億變化，浩浩蕩蕩，無形無象，自然空玄，窮之難極，無量無邊，無高無下，無等無徧，無左無右，高下自然。唯吾老君猶處空玄寂寥之

外，玄虛之中，視之不見，聽之不聞，若言有，不見其形，若言無，萬物從之而生，八表之外，漸漸始分，下成微妙，以爲世界，而有洪元。洪元之時，亦未有天地，虛空未分，清濁未判，玄虛寂寥之裏。洪元一治至於萬劫，洪元既判，而有混元。混元一治萬劫，至于百成，百成亦八十一萬年，而有太初。

太初之時，老君從虛空而下，爲太初之師，口吐《開天經》一部，四十八萬卷，一卷有四十八萬字，一字辟方一百里，以教太初。太初始分別天地，清濁剖判，溟滓洪濛，置立形象，安豎南北，制正東西，開闡顯明，光格四維上下，内外表裏，長短粗細，雌雄白黑，大小尊卑，常如夜行。太初得此老君開天之經，清濁已分，清氣上昇爲天，濁氣下沉爲地，三綱既分，從此始有天地，猶未有日月，天欲化物，無方可變，便乃置生日月在其中，下照闇冥。太初時雖有日月，未有人民，漸始初生，上取天精，下取地精，中間和合，以成一神，名曰人也。天地既空，三分始有，

生生之類，無形之象，各受一氣而生，或有朴氣而生者，山石是也，動氣而生者，飛走是也，精氣而生者，人是也，萬物之中，人最爲貴。太初一治至于萬劫，人民之初，故曰太初，是時唯有天地日月人民，都未有識名。太初既没而有太始。

太始之時，老君下爲師，口吐《太始經》一部，教其太始，置立天下九十一劫，九十一劫者，至于百成，百成者，亦八十一萬年。太始者，萬物之始也，故曰太始，流轉成練素，象於中而見氣，實自變得成陰陽。太始既没，而有太素。

太素之時，老君下降爲師，教示太素，以法天下，八十一劫，至于百成，亦八十一萬年。太素者，萬物之素，故曰太素。太初已下，太素已來，天生甘露，地生醴泉，人民食之，乃得長生，死不知葬埋，棄屍於遠野，名曰上古。太素既没，而有混沌。

混沌之時，始有山川。老君下爲師，教示混沌，以治天下七十二劫，混

沌流行，成其山川，五嶽四瀆，高下尊卑，乃其始起也。混沌已來，始有識名，混沌號生二子，大者胡臣，小者胡靈，胡臣死爲山嶽神，靈^②死爲水神，因即名爲五嶽四瀆，山川高下，混沌既沒，而九宮^③。

九宮之時，老君下爲師，口吐《乾坤經》一部，結其九宮，識名天地，清氣爲天，濁氣爲地，從九宮已來，天是陽，地是陰，陽者剛強，遠視難睹，在天成象，日月星辰是也，在地成形，五嶽四瀆是也，在人成生，心肝五臟是也，分別名之有異，總而名之是一也。^④九宮沒後，而有元皇。

元皇之時，老君下爲師，口吐《元皇經》一部，教元皇治於天下，始有皇化通流後代，以漸成之，元皇之後，次有太上皇。

太上皇之時，老君下爲師，教示太上皇以治天下，太上皇之後，而有地皇，地皇之後，而有人皇，人皇之後，而有尊盧，尊盧之後，而有句婁，句婁之後，而有赫胥，赫胥之後，而有太連，太

連已前，混沌已來，名曰中古。余時天生五炁，地生五味，人民食之，乃得延年。太連之後，而有伏羲，生於一源之始，繼天而生，調習陰陽，以定八卦，自伏羲已前，五經不載，書文不達，唯有老君，從天虛空無億河沙，在太清之外，不可稱計，大道既分，天地已來，開置皇化，轉佐天帝，通流後世，以自記之。

伏羲之時，老君下爲師，號曰無化子，一名鬱華子，教示伏羲，推舊法，演陰陽，正八方，定八卦，作《元陽經》以教。伏羲以前未有姓字，直有其名，余時人民朴直，未有五穀，伏羲乃教以張羅網捕禽獸而食之，皆衣毛茹血，腥臊臭穢，男女無別，不相嫉妬，冬則穴處，夏則巢居。伏羲沒後，而有女媧，女媧〔歿後〕，而有神農。

神農之時，老君下爲師，號曰大成子，作《太微經》教神農晉^⑤百草，得五穀，與人民播植，遂食之，以代禽獸之命也，神農沒後，而有燧人。

燧人時，老君下爲師，教示燧人鑽

木出火，續日之光，變生爲熟，以除腥臊。燧人沒後，而有祝融。

祝融之時，老君下爲師，號廣壽子，教修三綱，齊七政，三皇修道，人皆不病，作《按摩通精經》。次有高原、高陽、高辛三世，次有蒼頡、仲說，教書學文。三皇之後，而有軒轅黃帝。

黃帝之時，老君下爲師，號曰廣成子^⑥，消息陰陽，作《道戒經》道經^⑦。黃帝以來，始有君臣父子，尊卑以別，貴賤有殊。黃帝之後，次有少昊。

少昊之時，老君下爲師，號曰隨應子，作《玄藏經》，余時昇平，嘉禾生，醴泉出，麒麟至，鳳凰來，景星照。少昊之後，次有帝顓頊。

顓頊之時，老君下爲師，號曰赤精子^⑧，作《微言經》。顓頊沒後，而有帝嚳。帝嚳之後，而有帝堯。帝堯之時，老君下爲師，號曰務成子，作《政事經》。帝堯之後，而有帝舜。

帝舜之時，老君下爲師，號曰尹壽子，作《太清經》。帝舜之後，而有夏禹。

夏禹之時，老君下爲師，號曰真行子^⑨，作《德誠經》。夏禹之後而有殷湯，殷湯之後，而至周初。周初時，老君下爲師，號曰燮邑子^⑩，作《赤精經》。

老君曰：秘化之初，吾體虛無，經歷無窮，千變萬化，先下爲師，三皇已前，爲神化之本，吾後化三皇五帝爲師，并及三王，皆勸令修善。天一、地二、人三、時四、音五、律六、星七、風八、州九，合有四十五。子卯酉^⑪。中央各有九筭，戴九履一，左三右七，二四爲肩，六八爲足，中有五龜，體成八卦。水流歸末，分八至丑，葉落歸本，分六至亥，金剛本強，分二至未，土王四季，分四至己，坎怨獨走，離明數四，艮八高慘^⑫，三從坤位，乾當城坤，與一相逐，巽吁天門，從乾貸一，震雷動澤，從兌所減，辰午酉亥，自形^⑬之卦，各內其八，卦以成，餘有九筭成易字。

老君即演行期術曰：行期之法自有術，先舉坎「一」就坤二，西南王母東青龍，習氣發裔地戶間，巽上四期入中宮，筭出中宮昇於乾，西之大澤華山

顛，東北之上寅艮間，南之炎火離霍山，番然變化北入玄。

太上老君開天經

- ①「無偏」，《雲笈七籤》卷二《老子開天經》作「無偏」。是。
- ②「靈」，按前文，當作「胡靈」。
- ③「而九宮」，據《雲笈七籤》本，應爲「而有九宮」。
- ④此句之前，《雲笈七籤》本，尚有「取三剛名也」一句。
- ⑤「晉」，《雲笈七籤》本作「嘗」。
- ⑥「廣成子」，《雲笈七籤》本作「力牧子」。
- ⑦「道經」，《雲笈七籤》本作《道康經》。
- ⑧「赤精子」，《雲笈七籤》本作「元陽子」。
- ⑨「真行子」，《雲笈七籤》本作「直甯子」。
- ⑩「燮邑子」，《雲笈七籤》本作「郭叔子」。
- ⑪「子卯酉」，《雲笈七籤》本作「子午卯酉」。
- ⑫「高慘」，《雲笈七籤》本作「高慘」。
- ⑬「自形」，《雲笈七籤》本作「自刑」。

（曾召南點校）

006 太上老君虛無自然 本起經

經名：太上老君虛無自然本起經。又名《天地本起經》。撰人不詳，約出於南北朝。唐釋法琳《辨正論》已引述此經。一卷。底本出處：《萬曆續道藏》。參校本：《雲笈七籤》卷十。

道者，謂太初也，太初者，道之初也，初時爲精，其炁赤盛，即爲光明，名之太陽，又曰元陽子丹，丹復變化，即爲道君，故曰道之初。藏在太素之中，即爲一也。太素者，人之素也，謂赤氣初變爲黃氣，名曰中和，中和變爲老君，又爲神君，故曰黃神，來入骨肉形中，成爲人也，故曰人之素藏在太始之中，此即爲二也。太始者，氣之始也，謂黃氣復變爲白氣，白氣者，水之精

也，名太陰，變爲太和君，水出白氣，故曰氣之始也，此即爲三氣也。夫三始之相包也，氣包神，神包精，故曰白包黃，黃包赤，赤包三，三包一，三一混合，名曰混沌，故老君曰：一生二，三①生三，三生萬物，又曰混沌若雞子，此之謂也。

夫人形者，主包含此三一，故曰三生，又曰三精，又曰三形，元包含神，神得氣乃生，能使者②其形，安止其氣，如此三事，當相生成。

夫道爲三一者，謂虛無空，空者白也，白包無，無者黃也，黃包赤，赤爲虛，何爲虛？虛者精，光明明而無形質，譬若日月及火，其精明然，而無有形質，故爲虛，何謂無？無者炁也，炁有形可見，無質可得，故爲無。何謂空？空者，未有天地山川，左顧右視，蕩蕩漭漭，無所障礙，無有邊際，但洞白無所見，無以聞，道自然從其中生，譬若琴瑟鼓蕭之說，以其中空，故出聲音，是以聖人作經誠後賢者，欲使守道，空虚其心，關閉其耳目，不復有所

念，若有所念思想者，不能得自然之道也。所以者何？道未變爲神時，無端無緒，無心無意，都無欲澹泊，不動不搖，及變爲神明，神者，外其光明，多所照見，使有心意，諸欲因生，更亂本真。或曰思想不能復還反于道，便入五道，無有休息時。何謂五道？一道者，神上天爲天神，二道者，神入骨肉形爲人神，三道者，神入禽獸爲禽獸神，四道者，神入③薜荔者，餓鬼名也，五道者，神入④泥黎者，地獄名也，神有罪過入泥黎中考。如此五道，各有劫壽歲月，是以賢者學道，當曉知虛無自然，守虛無者，得自然之道，不復上天也，常在世間，變化見死生，爲世人師。守神者，能練骨肉形爲真人，屬天官，當飛上天，此謂自然⑤也。守氣者，能含陰陽之氣，以生毛羽，得飛仙道，名曰小自然，故神有廣狹，知有淺深，明有大小，由是言之，學道讚誦聖文，尋逐明師，開鮮⑥愚冥也。

夫守道之法，當熟讀諸經，還自思惟我身神本從道生，道者清靜，都無所

有，乃變為神明，便見光明，便生心意，出諸智慧。智慧者，謂五欲六情，五欲者，謂耳欲聲，便迷塞不能止，目欲色，便淫亂發狂，鼻欲香，便散其精神，口欲味，便受罪於網羅，心欲愛憎，便偏邪失正平，凡此五欲為惑亂覆蓋。六情者，謂形識知痛痒，欲得細滑，耳聞聲，心樂之，目見色，心欲之，鼻聞香，心逐臭，口得味，心便喜，身得細滑衣被，心便利之，得所愛，心便悅之，坐此六情以喪，故復名六情喪人神，但坐此六情所牽引，迷亂淫邪垢濁闔蔽，使神明不暢達，便有肉人不能識別，聽視不聰明，情志閉塞，皆坐此五欲六情之所惑亂，受罪展轉入五道生死，無有休息時。以是故，當熟自思此意，其神本自清淨，無此情欲，但思念此意，諸欲便自然斷止，斷止便得垢濁盡素^⑦，垢濁盡素^⑧，便為清淨，便明見道與道合，便能聽視無方，變化無常。人若復不解此意，且聽吾說，譬如此類若鏡，其師本作鏡時，極令清明，至於人買鏡持歸，不肯護之，至使令宜^⑨無所光照，乃

復令摩鏡師以藥摩之，乃復正明，以明能見人形影。人神亦如此。神本從道生，道者清淨，故神本自清淨，而使以情欲迷惑，陷於闇冥，其鏡冥者，藥摩之便明，人神以欲自蔽冥者，亦當以經法自摩，諸欲乃得自然斷止，而復清淨，乃有所見。又若天新雨之水皆擾濁，若收此水置一器中，初時水尚渾濁，無所照見，久久稍自澄清便明，明便可於其中照見形影，人神以諸欲亂時如此濁水，人能斷此情欲者，如澄清水，諸欲斷，便自然清淨澄明，明便為得道，當曉知其本者，諸欲便自然斷，其餘外道，不曉知其本清淨，而反常相教斷情欲。

夫情欲非有形質也，來化無時，不效有形之物可得斷截，使不復生，此神情欲思想出生無時，不可見知，不可預防，遏不得斷截，不效懸懸之緒可得寄絕，不效草木可得破碎，不效光明可得障蔽，不效水泉可得壅遏，故神無形，呼吸之間，丹汩萬封，以是故，不可得斷絕。但曉知其本清淨無欲，自然斷

止，而不曉知其本，強欲自斷，情欲終不能斷絕之，譬如斷樹木使不生，當握^⑩出其根本，根本已出，便不復生，癡人不曉之，而但齊地斫之，其根續生如故。人不曉情欲之本，而強斷絕其末，如此，情欲絕不斷也，會復生如故，外道家不曉人神本清淨，而反入室，強塞耳目斷情欲，不知情欲本在於心意，心意者神也，神無形，往來無時，情欲從念中生，生出無時，以無形故，不得斷絕，但當曉知其本，自當斷止其意不復生，為道當熟明此意，若不明之^⑪此，但自勞傷其精神耳。

夫為道既知此情欲，當復解知道德經行之法。夫道者，謂道路也，經者，謂徑路也，行者，謂行步也，德者，謂為善之功德也，法者，謂有成道經可修讀而得道也，謂有成道路之徑可隨而行之。

夫有德之人，念施行諸善行者，謂舉足從徑行，乃得太道^⑫，此欲賢者因經法思念十善，施行功德，功德已行為得道，譬如舉足因成人徑^⑬，行步以前

當得大道，假令人堅坐在家，殊不行步，何時得道，賢者若不思經法，施行功德，何能得道乎！人爲道，但守不一移，而不作功德，譬若人生在家，未嘗出入，不能見道路也，愚者雖守道，不作功德，亦不能得道也。故老君作《道經》，復作《德經》，使忠信者奉行之，假令但守道便可得遂，聖人但作一言之訣，何須並作諸經云耶？

夫道得三乃成，故言三合成德，自不滿三，諸事不成。夫三者，謂道德人也，人爲一，當行功德，功德爲二，功德行，乃爲道，道爲三，如此人入道德，三事合乃可得，若有人但作功德，不曉道，而無功德，亦不得道也，若但有道德而無人，人亦不得道也。譬若重穀^⑤投種土中，不得水潤，何能生乎，譬若人酒^⑥，有麴有米而無水，何猶成酒乎，譬若有君臣而無民，當何宰牧乎，譬若有火有水，而無穀食，人當何以自活乎，譬若有車有馬，而無人御之，何能自隨行乎，如此譬喻，皆得三乃能成道。

夫道者有三三一，爲三一，爲三皇，爲三神，爲三太一。三太一，謂上太一，中太一，下太一。爲三元，其三元各自有三三一，如此三三一之一爲九一。故有九宮，從一始到九終，九陽氣，從十月冬至始，生黃泉之下，到新一年六月更終，從十月到六月，合爲九月，陽氣便終，故陽數九，故言九天子午亦數，爲道當知此九一之變化，始終之上下。

大人^⑦形體爲一，神爲二，炁爲三，此三三一乃成人。又神爲一，炁爲二，精爲三，此三三一乃復成神。又天爲一，地爲二，人爲三，此三三一乃復成道德天地之本。三一者，謂虛爲一，虛中有自然已立身也，亦道君，亦元陽子丹也，亦貴人也。亦神人也，其左方之一者，亦天也，亦日也，亦父也，亦陽也，亦得也，亦師也，亦魂也，爲人主作政也。其右方之一者，亦地也，亦月也，一母也，亦陰也，亦形也，亦司命鬼，爲邪爲魔，主爲人作邪惡，賢者當曉了此三三一，分別善惡邪正，覺知此

者，便能得道。

夫道當曉知此左右之一，善惡之教，中央之一，正自我身神者，即道子也，左右之一，輔相我爲善惡，左方之一，日日關告我爲善，其功德日日盛強，便爲正道，右方之一，不能復持，邪事反戾我也，不能使我爲惡也，右方之一，日日教告我爲惡事，牽引我惡，日日深大，便繫屬邪，右方之一，此爲屬邪，日與惡通，賢者爲道，但曉知其道，而不作功德，便當屬邪，不能自出於邪部界，邪則日月^⑧迷亂，入便暗冥怒作妄語，邪精邪鬼神日來附近人，賢者不曉此邪，而強爲靜閑塞耳目，欲斷情欲，此諸邪鬼便奸亂人，又爲人造作邪念，前念適滅，後念復起，如此之間，無有解已。若有功德之人，至於靜時，便爲左方之一，不能持邪事來干亂人也，以是言之，無功德之人，而強靜^⑨欲斷情欲，則終爲邪所亂，情欲不得定也。夫自然有三，法守太虛，無謂高學功德之人，解道根元，深洞微妙，曉知三元九一之變化，玄中之玄，始祖無中之無

極道，知其所始，見其所終，天地人物，皆各有形，物既有形，故有成散死生，精神無形，展轉變化，故無止，故曰常在，不惑世所聞，不迷世所知，能知之

明覽虛無之自然，故澹泊無憂喜，情欲不能傾。所以者何？此人但曉解其本，故不惑其末，但爲與人並有內形耳，智慧無窮極，此乃爲虛無也。亦從學而知之，非有素自然也，其靜守道時，當少食，正閉耳目，還神光明著絳宮，絕去諸念，不得強有所視思想也，久久喘息，稍微，從是以往，不復自覺喘息，泊然不自知有身無身，從是以往，爲得定道之門。道者虛也，當爾之時，神在天上虛無中，左顧右視，但皓然正白，中無所見，有狀如雨雪時，四向樹亦白，山亦白，地亦白，一切都白，皆無所見，所以者何？神出天上，前向視不復見日月星宿，山川河海，如此爲復命返道，還入虛無也，若得是，當下視，乃見天下諸事，便當迴心念師言，爲道當濟度天下，但見是念故，便止前所見白，更冥神，便來還形中，不如此

者，神便入道中，散形與道合，便爲天下骨肉形，便躋辟^④，故老君曰：知白守黑爲天下式^⑤。謂神還形中，長在天

下爲人道師，是謂大虛無之自然也。夫守中自然之法，不能曉知天地人物所從出，不能知道之根源變化所由緣，不能及不能知空虛之事，其所見聞，心便疑惑怪之，且迴然不知道獨坐無能生於自然，直受師言，告身中道云，言當守神者，亦當除情欲，閉塞耳目，還神絳宮，下視崑崙山，或有教令將神昇崑崙山，視其上，想其見^⑥。中黃道君，始時相見^⑦，久而見之，久久悉見諸神與神語言，講說天上事，無復有世俗之念，身中骨腦血日變成萬神盛強，共舉身而上天受籙署，不得下在人間，此謂真人道也，名曰中虛無之自然也。夫守小虛無自然之法，亦當除去情欲，閉塞耳目，還神絳宮，下視崑崙山，和合天地日月陰陽，雌雄魂魄之精炁，以養真人，以吾身陰陽炁凝，精骨潤光，便生毛羽，飛上五山，時有奉使，按行民間，亦不得久止也，此謂小虛無

自然也。

夫從此太^⑧虛無、中虛無、小虛無以下，便有爲之法，及^⑨虛無也。夫有爲者，謂歷藏導引動作諸氣，飛丹合藥，吞符跪拜，帶印禁忌，隨日時王相，醮祭名號精靈，使人解占候，此謂有爲，不能知道，何所謂也，亦有得仙，亦有住年，亦有得尸解，從此已下，便爲鬼道，非得長生也。

夫得大虛無自然之道者，不屬天，但屬道君耳，便能散形與道合能變化，聽視無方，所在作爲，欲得此道者，當行道教化，作功德，奉行經誡，平等其心，無所貪著，無親無疏，一心等之，如天如地，不得殺生。所以者何？夫蜎飛蠕動之類，道皆形之大虛無象，有曉道而殺生者爲害^⑩，是以禁之。其守中自然者，爲守中神尚，頗有殺生，所以者何？神有虛無，所以有虛形，故有食有殺生祀祭，道無有，故無祭祀，不殺生。

夫得道者，但能已得，夫人耳目，聽有聲之聲，見有形之形，不能聽視無

形無聲也，所以者何？神赤赤者，陽陽者，離離爲日爲目，但能見前，不能見後，亦不能見頭上，日者天目也，但能照天內，不能照天外也，亦不能照覆冥之中，是以得神道上天者，但能以天耳。夫道耳目所聽視，無前無後，無覆冥無障蔽，洞徹見無數天下事，能聽無聲之聲，能見無形之形。

夫作仙道者，當故持天耳目聽視，乃能有所見，假令不故持天耳目聽視，但獨見目前事，所以者何？仙人持骨肉去故。

夫欲知神，何以養象，神赤但有光，^①爲虛形，譬若鏡中水中所見景，是爲無所有，其所治止，常在天上爲生君，其壽有劫數，終不得在人間也，其天上壽續盡，當復入五道，更形生死如故耳，或時壽盡，取道便滅矣。

夫真人者，有形景，屬天爲更^②，壽歲有萬數，治天上，時時有奉使人間，天上壽盡，便或上輔^③神人，則不入五道中，受形生死矣。

夫守大虛無得自然之道，住身天

上，劫有千數，壽盡變化滅神亦盡，神續入五道中，受形生死如故，天神都無死生也，但轉展在五道耳，唯有朕兆，常知智神，譬如火滅，無所復有，故取道夫爲道所已，神有滅盡者何？此皆道人爲不曉，知道本空靜，專心守空便著空，使人空滅盡。

夫守神之人，不能知曉道本空靜，但自信有，不信無，以故自守神爲守有，爲著不還道，何以故？神展轉入五道中，無有滅盡時，唯有善譬，最爲功覺，有曉了知道本空靜，亦不守有，亦不守無，亦不念實，亦不念空，遍在三界中間，有慈哀之心，欲度脫勤苦者，不肯入空取道，因是乃有功德，便自然之道無有壽也，亦不復入五道，生死亦不滅盡常在，久後功滿，當補道君。賢者爲道，當熟解此意，當知優劣各有所致到，賢者學道，若知枝末，自謂深足，不肯復講問，窮究淵深，是不知道，乃獨各自用有所致深淺微妙不齊等，聞仙便呼得道，賢者學道，譬若上山下視，言獨是高徑，住上至頂，乃復前有

高處，住上高頂，直復見前有高高處，學道亦如此，從小師學道，得至中師，見大師乃知道根元，以是言之，學不可呼爲足也，當努力求明師，爲道切苦^④，言尔等何不取大道乎，而於小道止，是闡冥淺近哉。

夫賢者學道，不廣聞深見，更閱衆師者，此人學不足言也。

夫日月不高，所照不遠，江海不廣，不能含納，出名寶學之人，譬若陂中魚，遊到池四塞之下，可謂^⑤窮盡天下之水，終日終夜，不能學大水之魚交會語言，不知外乃有江湖淮濟、河海恒溺之水也。譬若深山中有癡人，從生至老，不行出入，無所見聞，安之外方人士之學問，尊卑差序，車馬衣服鮮綺甘香乎？譬若學經書之人，但聞天下九州共一天子，云言四邊但有夷狄，以謂天地界際，極盡於此，安能知其外復何等有乎？學道亦如此，從師受道，以謂盡於此，安能知其學道修行，書不能記載也。

夫學仙道，目謂^⑥爲足，定得飛仙

上天，乃自知道不及真人也，學真人道，亦自謂為足，定得真人，乃自知道不及神人也，學神人道，亦自謂為足，定得神人，乃自知不及大道也。學得大道之中，當復有尊卑者，謂知不等也，是以言之學，學無有極，天下神尚後行，從君學道，何況內政滅神，光明變化，各有所主，有所入，各有所政。

夫為大虛無之道，得無象無聲，教無思想都無識念之欲，守時亦法教道，不得取景夢候效也，或時神相見，尚不得與神共語言，所以者何，或有邪神來試人，此處無象，自然求道不求神也，略小取大，故可得自然故。

老君曰：有光而不曜，謂欲養其光明，至於徹視，不欲小電曜光精，獨與一神相見也，如此不能悉見天下之事矣。

太上老君虛無自然本起經

①「三」，為「二」之誤。
②「者」字，衍文。

③ 據《雲笈七籤》卷十所載本經，「神入」下脫「薜荔」二字。

④ 據《雲笈七籤》本，「神入」下脫「泥黎」二字。

⑤ 「此謂自然」，《雲笈七籤》本作「此謂中自然」。

⑥ 「開解」，《雲笈七籤》本作「開解」。

⑦ 此二處「盡素」，《雲笈七籤》本皆作「盡索」。

⑧ 「令宜」，《雲笈七籤》本作「令冥」。

⑨ 「當握」，《雲笈七籤》本作「當掘」。

⑩ 「明之」，《雲笈七籤》本作「明知」。

⑪ 「太道」，《雲笈七籤》本作「大道」。

⑫ 「人徑」，《雲笈七籤》本作「之徑」。

⑬ 「但守不一移」，《雲笈七籤》本作「但守一不移」。

⑭ 「重穀」，《雲笈七籤》本作「種穀」。

⑮ 「人酒」，《雲笈七籤》本作「釀酒」。

⑯ 「大人」，據《雲笈七籤》本為「夫人」之誤。

⑰ 「日月」，《雲笈七籤》本作「日日」。

⑱ 「而強靜」，《雲笈七籤》本作「而強為靜」。

⑲ 「便踰辟」，《雲笈七籤》本作「便踰辟」。

⑳ 據《雲笈七籤》本，此句下，脫「見白者為見空，守黑者發心下視，念天下以有之故，便冥，是謂守黑為天下式」等句。

㉑ 「想其見」，《雲笈七籤》本作「想見」。

㉒ 「始時相見」，《雲笈七籤》本作「始時想見」。

㉓ 「太」，《雲笈七籤》本作「大」。

㉔ 「及」，《雲笈七籤》本作「不及」。

㉕ 「為害」，《雲笈七籤》本作「為害道」。

㉖ 據《雲笈七籤》本，「為虛形」前，脫「以光」二字。

㉗ 「為更」，《雲笈七籤》本作「為吏」。

㉘ 「上輔」，《雲笈七籤》本作「上補」。

㉙ 「苦」，《雲笈七籤》本作「若」。

㉚ 「可謂」，《雲笈七籤》本作「自謂」。

㉛ 「目謂」，《雲笈七籤》本作「自謂」。

㉜ 「學得」，《雲笈七籤》本作「學既得」。

㉝ 據《雲笈七籤》本，此句當為「故可得自然」，句末之「故」為衍文。

㉞ 據《雲笈七籤》本，「老君曰」前脫「故」字。

(曾召南點校)

007 太上老君太素經

經名：太上老君太素經。簡稱《太素經》。撰人不詳，約出於漢末魏晉之際。《抱朴子·遐覽篇》已著錄此經。一卷。底本出處：《正統道藏》正一部。

太素皓皓，命之曰道。太素之時，神往營之，道乃生之。生之形之，道乃命之，道乃成之。故天地成形，道德成經。道莫大於自然，德莫大於長生。道生一，一生二，二生三，三生天地。天地充滿，滿則損，損則反其本。故天一無不覆，地一無不載，日月一無不照。故知之一，不知也。不一之一，無一之知。夫道之可奇也，賢者通之，聖人行之，不可不知也。道大而無形，隱而無名，其在天地外者窈冥，其在天地中者充盛。故天地之間盡道焉，非吾

獨也，道不欲也，非吾異也。又云：生可冀也，死可畏也。草木根生，去地而死。魚鼈沉生，去水而死。人以形生，去氣而死。故聖人知氣之所在，以爲身寶。又云：大道張天下之大效，大書陳天下之大略，大人以爲足。人之所好，吾之所患；人之所執，吾之所舍。二者唯聖人能知其故。又云：大德受天下之大惡，大人受天下之大辱。能受天下之大惡，故能食天下之尊祿；能受天下之大辱，故能爲天下之獨貴。又云：心之於人，猶水居器中，停之則平，欹之則傾，撓之則濁，澄之則清。治心其猶水乎？壅之則止，通之則行，決之西則西，東則東。人心不可不杜塞，如水不可不隄防也。又云：故易有太極。太極謂太易。太易者，大曉易，無有先之者，謂皓皓白氣也。乃有太初。初者，氣之始也。有太始。太始者，形之始也。有太素。太素者，質之始也。故謂易。易變爲一，一變爲三，三變爲五，五變爲七，七變爲九。九者，究也。極後變爲一。

一者，謂天也。故輕清者即上爲天，重濁者即下爲地，中和氣者爲人。故天地合精，萬物化生。

太上老君太素經

（尹志華點校）

008 太上妙始經

經名：太上妙始經。撰人不詳，約出於南北朝。一卷。底本出處：《正統道藏》洞神部本文類。

太上老君曰：道出於無形，無名無聲，無色無味。淡然以虛無爲宗，自然爲生，以清微玄元之氣爲本，有無極之功。無表無裏，亦無上下，無有前後，靜爲一體，先天地而生。其要妙廣遠彌漫，不可得名，故字之曰道。合則爲元氣，散則天地。天地三千六百億萬歲一合會。數窮於三五七九，而天地壽盡。壽盡之時，陽精化爲火，陰精化爲水。先以火燒，其上至六天，下至九地。然後以水平之，混而歸一。復三千六百億萬歲一開，方復分別元氣，清者爲天，濁者爲地。天玄而清，地本而黃。太陽之精爲日，太陰之精爲月。

復分日月之精爲星辰二十八宿。天有四時、五行、六甲、十二時。天地之氣交合，然後人民、禽獸、草木、蟪行、蠕動，森然皆生。乃有五嶽、四瀆、三十六山，興雲布雨，置立三皇五帝，胤胄百姓，更相產孺。如此元氣一合一開，無有窮極。從始至終，益已數千百萬歲，開合不可復計。天地終訖之時，萬物形象皆成虛無，惟真人道士功德無量，能千變萬化，鍊易其形，在九天玄元之上，乃解窮天地數千百萬變易，有此無極之氣耳。當此之時，惟有神明元氣。元氣以道爲先，故天下莫大於道。夫天地六合，其外如雞子，又似車輪，元氣繞之，如日之暈。元精之所散也，六合中央廣方各一萬八千里。此山盡黃金、瑠璃、水精爲之上。宮室、草木、禽獸，皆有七寶之形。其上即天帝之所主，主錄天下三萬六千神。萬物死皆屬之崑崙山。上復有九天。九天，都名耳，有數千萬重天。但大域窮於九，九是數之極也。諸天宮室皆懸在空虛中，言天中人皆有空虛之身，能

飛行，目能微視，耳能微聽，變化三天，是無上正真道界。最有功德，乃得生此天中。此天以下各隨功德多少，所生各有重界。崑崙山以下有九地，地下有一重水，水下有風。如是風水之地各各有九重，更相擊持。今之地動者，是風水搖也。王者有大功德，若有冤酷，故天地爲之動，鬼神爲之感。此九地之下各有諸鬼官府及諸地獄。九天中亦有獄。九天之上，仙聖所住。九天之下，鬼神之所住，即是今之邪官邪僞之所統。其中各有君王，更相主錄，無有毫差也。天門在西北，地戶在東南。天門地戶，正相對之神。東名曰鈞天，有八十一國，縱廣八萬一千里，今之土國也。山之南名曰炎天，有六十四國，縱廣六萬四千里。山之西名曰素天，有四十九國，縱廣四萬九千里。山之北名曰玄天，有二十五國，縱廣二萬五千里。如此四天之民，土界各異，別日月星辰、五嶽四瀆、三十六山。彼三天所生不同，在人罪福。故書所不載，自今及古，天生聖人，不使

書說，正在此一國土，君臣、父子、尊卑、善惡，此天之民最苦，耕織賦役，有飢渴、疾病、官府，死生之痛。人生時能備道科，或死七日後，皆生諸天中福舍安穩之處，長在道氣氣中，無復謫罰，福流子孫，能解脫七世重罪。若下生人中，必為豪貴子孫。生時惟惡無善，死時入地獄，考治魂魄，苦痛備至，歸罪謫罪，以力償人。若出為人，必生下賤癡愚之中。崑崙四天以外有鐵圍山，山外有日月所不照，名曰八冥界，則泰山府君之位，統領諸獄。人死歸之，簡錄罪福，然後分遣其人入於諸獄中。獄中有鑊湯、轉輪、銅柱、鐵錐、刀劍諸苦痛，不可具言。過此九天九地、崑崙四方，六合窮此。此外惟有元氣周匝虛無所，復有聖賢所不能辯。地氣黃，黃主中央，故崑崙山者如車轂，六合施之也。今之日月出從湯谷，湯谷中有木名扶桑。日出時上其上半天而行，暮沒時入濛汜。濛汜、湯谷，皆水名耳，與地一重水相通。故今地與日月相逮而行，出入、長短、虧盈、機衡

之數，從此而始，天地死生變化窮。六合之內，一生一死，輾轉相起。誠子：欲離三官憂苦，但當備持法戒，存師念道，道不欺人。道常在世間，世世救度一切衆生。或為帝王，或為下吏，或為凡人，或為躓人，或為乞兒，或為禽獸，或為老物，或為星辰，故人莫能知之。諸賢者若能行善無惡，功德備足者，可得白日昇天。尸解神仙自不能爾，命過壽終，其當歸死。人有宿命，不可怨道也。又諸天中之人，身長丈三。人之形長八尺以還，鬼之形長五尺以還。人與天地正等，有三萬六千神，萬八千宮府，三百六十機關，故十月而生，取天地十方數也。人面有五嶽四瀆之形，有八卦五行六甲十二辰，有四象四象者，風水火土也。合此四氣，然後成人。故人生必受父母陰陽和合，萬神具足，乃得為胎，生胞衣中，謂之羅網。羅網未脫之時，皆識昔日由來。一生能啼之後，入人道則盡忘之也。故能來動搖血脉，骨肉溫暖，此皆四象之所為也。故死時氣絕風去，身冷火

去，血聚水停，堅強土住也。六畜亦受陰陽五行，但不盡備知，以為下賤耳。人生之時有和氣合其形，死之時勁風解其身也，故曰生死也。故諸天道之法自然。是以人生之時施行善惡，而罪福自應如影之隨形，響之應聲也。子當思真念一，可道遇此也。故其法清嚴，不可妄施。道常在人間，不去須臾，但人不知之耳。月朔、十五日、月晦，此三日天帝當遣六部都錄使者，案行天下，主書人之善惡，可不慎之。可不慎之。

老子曰：吾自開闢已來所說諸經，有數百萬卷，或有藏在蘭臺玉函石室之中，祕不出世者，不可計數。至周幽王時衰亂，吾乃至函谷關，教關令尹喜道術。喜得道為真人，將尹喜西入胡國。先至罽賓閭崛山中行道，為國王所燒，不以為困。道見虛空之身，項負日光，體有金剛，七十二相，八十一好。國王服受其道。復為胡作四萬言經，名曰《般若波羅蜜》、《道德五千文》三十品。復與尹喜至舍衛國，四月八

日化生爲王國太子。年十五去國學道，道成曰釋迦佛。佛，胡語，漢言仙也。關令尹喜易名曰阿難，沙門弟子學其法者，千二百五十人，稱菩薩。菩薩者，胡類，今之道民也。教化胡畢，以五月十五日尸解，託入泥丸。泥丸，無爲也。道無常名，無有常形，或稱釋迦文佛，或稱維摩詰，或稱轉輪王，如此分身別氣，輾轉教化，化有萬端。故明法效其形，立浮屠，作泥人，美采木象也。還漢中而號太上。大道無爲，

太上者，言無復過其上者。老君，言先天地而生，有無極之氣，故稱老也。道法無爲，樂生惡殺，以慈心爲大。世人不知，乃殺生禱祀以求生，棄無爲之事，更作有爲之業，故令世人疫癘縱廣，疾病彌起，不時太平。吾當演出正一盟威之道，統領八極四海之內三萬六千神、群仙兵馬、將吏軍士、六丁八史等，威伏群邪，降魔伏鬼，皆上就真一。天上天下無復爲邪，祿惡群魔，一朝罷息。道之教化，以師爲主。故授張鎮南正一之法，令世世子孫執持文

教，化喻萬民，布置男女道士，化領民庶。天地變易之時，道當點持名錄，更相救度。諸賢者明聽：經戒，道之本起，三洞經戒科律甚衆，恐人不能悉備，故出盟威正法，以救凡俗。今以相示，子宜慎之。

太上妙始經

（尹志華點校）

009 太上洞玄寶元上經

經名：太上洞玄寶元上經。撰人不詳，約出於東晉南朝。一卷。底本出處：《正統道藏》洞玄部本文類。

太上寶元上經，一名源一妙訣，又名自然經，玉晨君所修五帝神旨，祕大有之房，傳無上真人也。

太上曰：大道浩浩，其中有寶，其寶甚精，莫侶其榮，其榮鬱鬱，莫儔其貴，其貴甚尊，莫齊其門，其門無雙，其戶獨立，子能尋之，無欲直入，有欲求之，莫或能及。少欲志慕，感有差級，法地則天，守道自然，自然妙炁，應以三位，三位之源，源本同實，實以鎮虛，以文成質，內外相須，混而爲一，一接三才，才人出類，合德二儀，拔乎其萃，由識本源，守貸不失，永保生生。修之

入室，靜篤精思，見妙如日，明來闇去，消除死炁。死炁稍遠，生炁浸長，長生不死，是曰得常。常未即得，恒當存知，知常曰明，不知常，妄作凶，凶資欲起，貪爭相牽，氛氳鬱鬱，罪障日堅，心神亂惑，灾禍相纏。智慧悟此，抑欲鍊心，以清治濁，以正制邪，邪凶既去，正吉惟新，能成能蔽，與道合真也。

自然源一，應乎萬物爲三，萬物作復，由乎四炁、五行，周流六虛，同歸宗一，一爲道子，生二，二生三，三一之中，有數無量，一二三四，爰及五六，學者所修，以寡其欲，欲寡私少，道乃可弘，是以聖真尊一爲主，事二爲師，宗三爲友，親四爲朋，尋五爲侶，遊六爲常。常六者，合通不可離也。侶五者，思帝携之宴也。朋四者，炁序爲體也。友三者，景耀同明也。事二者，法則天地也。尊一者，敬重道君也。君母道源，無爲湛存，是無欲所明，非少欲所習也。少欲之習，如母守子，是以上學敬重道君。敬重道君者，修存禮也。法則天地者，習生施也。同明景耀者，

晝夜照覽也。炁序爲體者，行藏得時也。思帝君携宴者，順王立功也。六合常通者，從道立德也。從道立德者，守靜清虛也。順王立功者，隨時賞罰也。行藏得時者，嘿語有節也。晝夜照覽者，研經內觀也。習生施者，係道種也。修存禮者，續玄位也。續玄位者，積學立功，緣階入序，道德備充，昇玄極也。係道種者，建善相生，子孫傳業，成性存存，祭祀不輟也。研經內觀者，誦詠靈章，解了妙義，臨目思神，與真合也。嘿語有節者，物順則行，人忌則止，固窮潛通，蒙養正也。隨時賞罰者，誅邪輔正，明道救俗，抑揚取中，無固必也。守靜清虛者，運值無爲，無爲無滯，三宮閑寧，五神安靜也。從道立德者，無之與有，適應逍遙，滌除己辯，玄覽備周，去來非我，唯道是從，出入爲物，功德不去也。能明此六，由經有三。三經者，一以明天，二以明地，三以明人。人道、地道、天道，謂之三才。才者裁也，能也，裁制偏邪，同歸中正，能反流末，還至本源。源即道也。道

元尊也。尊爲人首，積善所宗，闔塞得通，總名三道本一。應化分形，上者清暢爲高，下者安順爲貴，中者合二爲尊，尊貴至高，名殊實一。一實者，不死不生，不元不有。殊名者，上覆非載非覆，中瞻雖周，非覆非載，由一切含炁無始中來，自然有三，不可頓一，三者滯有著无，又執不無不有，而才有利鈍平，識有初中末，末者沉以求安，中者浮以祈濟，初者飛以期寧，遂有群分類聚。聚分之中共有利鈍平，大道弗能使之，即一緣其感來，示以應往，飛浮沉等，各從其宗，故示之以乾，引諸飛侶，顯之以坤，接諸沉類，樹之以君，統諸浮徒。聖君與天地合德，善長分爲三元，三元各有所尊，立號各有所議，况天曰帝，地曰皇，人曰王，王者，群生往崇之也。皇者，含炁大仰之也，帝者，一切的尊之也，後感參差，應化致異，沉中有浮，浮中有飛，飛行皇帝，九土王號，總稱徧名，先皇後帝，帝王合舉，隨時損增，出自物情，權化仍用，求其本旨，不可不明。明天道者，由吾

上經，明地道者，由吾下經，明人道者，由吾中經。中經能明，明天明地。明地明天，未能明人。明人者，在中經也。人貌丈尺，所行者仁，縱復禮義，智信備修，則天法地，亦未成人。成人者，洞體中經，中經有真，真神有降，降與己神爲一身。又一身二神，二神一身，混無分析，常存不改，乃成明人耳。真神者，大道妙炁，應感爰臻，與己神合，合無復分，己身素有，無始至今，今功備充，此神會道，道神合同，身亦符一，一則妙絕，非几眼所見，故謂無形，非無妙也，聖則見之，見之即合，合而言見，明洞了也，內視無外，非如在外睹內也，見妙由無欲，無欲今忘言，言既可忘，存戒寡欲，日損之訓，得之者真，寡欲之流，回向正道，仰觀上天，俯察下地，然後內觀，洞曉中也。洞曉中者，存三一也。存三一者，先觀天文，次察地理也。

觀天文者，依吾上經。天文者，三光也。名爲觀者，占三光也。三光者，日月星也。周睇三道，推步璣衡，日往

月來，回旋無極，歲及熒惑，太白辰鎮，行常爲戒，示禍顯福，北斗九星，二隱七章，皎昧相表，斟酌玄津，潤洽含炁，生成無央。觀春之詠，十有六篇也，陽律陰呂，唱和調通，繼朔十二，炁蘇爲端，立春春分，立夏夏至，立秋秋分，立冬冬至，八節克會，屬於八音，相資繼用。觀夏之詠，暢篇二十，而火以扶木爲禮，木以生火爲仁，春以萌育爲德，夏以滋長爲功，律呂既協，八音亦諧，三光無忒，歲序宣明，攝此朔節，謂之爲年，是爲屬天。天於第一章分爲二者，廣生養之前，進引養生也。地於第八章合爲一者，據殺藏之後，退避刑殺也。不得無此進退，是以證明優劣，優者賢哲所習，劣者愚瞽所行，標此感激，發悟迷蒙，能曉覺者，識度日精，殺藏可元，生養可一，一降涉數，示物定名，名不能目，非數所拘，是以在於五九之中，又出四九之外，自古及今，其名不去，是以上經三十七章也。

察地理者，依吾下經。地理者，三色也。名爲察者，候三色也，三色者，

土山水也。歷覽五方干支，位次甲乙、丙丁、戊己、庚辛、壬癸、子丑、寅卯、辰巳、午未、申酉、戌亥，此二十有二以爲秋詠，嚴明分段，不相參雜也。次豫兗青徐揚荆梁雍冀九州也，太山、衡山、華山、恒山、嵩高山五嶽也，江河淮濟四瀆也。四海環迴州土山水，分支干二十二，又二十二章以爲冬詠，崑崙極中鎮四序之際，四十五章是爲屬地，推功歸天，揖歛讓上，則下有四十四章矣。

夫源一分爲二儀天地，名曰兩半，兩半之中，炁序有四，一者正陽，春炁生也，二者陽中之陰，夏炁長也，三者正陰，秋炁殺也，四者陰中之陽，冬炁藏也。四序周而歲功成，三光迴而天德顯，是以上經有春有夏，有仁有禮，有木有火，有和有明，下經有秋有冬，有義有智，有金有水，有順有敦有信，通土周遍，合會二經，二經開位，示明二儀各有上下，以標四序，五千其文，以究五行，生育無窮，合德成功，數極乎九，四序因天，仍以相乘，四九三十

六，是以道經三十六章，五行緣地，相乘法天，五九四十五，是以德經四十五章，天地炁交，兩九相乘，九九八十一，是二篇有八十一章。天有八十一府，地有八十一域，人有八十一部，各有神明，通則得道，得道通神，由法地則天，天無爲而無不爲，陽唱而陰和，地無成功，推德歸天，天分首章，以明獎成之旨，無欲無爲，開常生不死之路也。地合後章，以明謙讓之風，與利不害，弘上德不德之化也。凡不欲而自正，爲善而不爭，不爭則善成，善成由玄獎，獎之以謙，知末守本，玄覽無疵，其術無上，是以學此之儔，皆號無上真人也。

凡學無上之法，仰觀天文，俯察地理。天地之本，本無形也，無形者，是道也。應物成有，有形有名，名天地者，道之孫，一之子也，道生一，元炁也。一生二，內曰陰陽，外曰天地也。二生三，內曰和炁，外曰人也。三生萬物，陰陽交和，三炁分布，隨分貸與，萬物羅陳。人得和炁多，故曰二生三，三

炁廣贍，人不得爲萬物父母，是以同天地爲父母，人之主至貴，號曰天子，一之孫，道之曾孫也。有道德者，堪爲國師，天子尊之，皆稱曾孫也。天形資無，一得生生，形之大莫過乎天，抱一不離，故天字一大也，無形生有形，有形始無形，以始爲父，以養爲母，母父德合，合炁物成，物成昇上，上天歛之，引接弘納，似如天也，音訓曰先，又曰顛，又曰玄。玄則懸空虛映，在物上顛，爲群生之先，故曰天也。土者吐也，縱橫三一，上下現上，生出一切，似如吐也，又曰地也，音訓睹第，又曰隸，又曰齊，廣大配天，與天齊德，接隸仰屬，引物睹尊，人物法之，柔順守靜，和而不唱，謙下成功，功成不居，貴賤前後，次第分明，正而不邪，以治濟亂，緣漸歸天，故曰地也。天文清明，地理寧平，是其常也。不明生妖，不明發怪，非其常也。非常之兆，非天地所爲，爲之欲以戒物，賞善罰惡，顯彰非常，由人失法，法不法地，妄動違天，天地妖怪，戒語之也，仰觀俯察，占怪候妖，妖

怪各有所主，修德立功則消，能知改，惡，唯善是從爾。乃法地守靜篤也。運至應動，動則則天，則天之動，動以入道，入道之由，由於抱一，抱一無忒，三一可明，明三一者，與道合真。真人學之，堅存三一。三一者，天一地一人一是也，又名上中下三元一也，又名玄元始太一也。天一在吾上經，地一在吾下經，人一在吾中經。中經內觀，別自有經。經所以有三者，自然三炁所生也，大道妙炁，一中有三，陰陽和、玄元始、上中下，自然而然，莫能使之然，莫能使之不然，故謂自然三炁也。上下二經，亦別有文，文所以五千者，道生三炁，三炁生萬物，物終爲一道，始又一合此三炁，五數立焉，道之一炁，非是陰陽和，而位居三炁之上，物之一炁，亦非陰陽和，而位在三炁之下，三炁之下有三而麤，三炁之上有三而妙，妙炁無色，衆色稟之而成，麤炁有色，色雜亂而昧，昧者待妙降而得明，明昧輪三炁以運用，運用隱顯，五位遂成，天地二儀運用三炁，一變至極曰十，十

變至極曰百，百變至極曰千，數極則變，變不過三，三精在道，過則在物，萬物變麤，求精還三，三變濟物，五性以成，故五千其文，理周遍也。理有始終，文有次序，所以道可道爲首者，舉源本以攝流末也，無欲有欲與善惡共章分爲二者，無欲則見妙長生，有欲則滯麤致死，死生由人本心，心識優劣永異，此明其大較，故分以爲其次，此明細事，事在善惡，善惡可息，以開有心，有心未能頓息，無欲不即可登，欲無欲者，寡欲少知，知善爲不善，故忘之以息欲，息欲之方，先資省事，省事之要，取實去華，除其虛妄，故次之以不尚賢。去尚救俗，故次之以道冲而用之，凡萬物云云，一生一死，未得長存，恒崇常住，常住之道，無祖無先，應化隨時，無窮無極，初淳則行不言之教，後澆則言象互陳，近情未達遠旨，每滯言象以沉淪，故首章先遣言名，使知常住非名言所盡，得常住由於名言，名言非常住之體，本寂應動，真假有殊，權實衆妙，同出玄門，而衆生無始中來，有

其心識，識神不滅，身有死生，死生之苦，煩惱識神，一混一分，紛綸無極，自非斷結，勇猛超群，增長善因，功德勤積者，莫由免生死之痛。生死之痛，由於出無入有，有欲最深，累罪纏縛，麤欲無欲，微善得生，生樂滯著，愛欲相湊，不能斷割，廣興善場，懈怠狐疑，惡根滋盛，生事不成，死痛又及，年命淺促，憂畏延長，皆從欲來，故先明無欲有欲。有欲之禍，在於善惡，心耽各異，過執成災，捨惡就善，善惡未明，往反倒見，以美亂神，己之所美，未必是善，善善在己，又乖道心，道心去著，抱實任真，不空企尚，杜絕競風，嘿識潛習，不起驚疑，信順三寶，藏智忘功，能如此者，可與適道，故章開三變之後，明道冲而用之，而道無形狀，假言象以爲津，既言冲用，用實無物，無物之物，在帝之先。在帝之後者，宜法後以歸先，故次明天聖可法。天聖法道，凡宜法聖，法聖非形力所造，必須神思精勤日進，然後可登玄峰。神不可擾，故次之以谷神。養神所之，之於不死，不死

之妙，克與道同，同道乃爲天地根，爲天地根，又與天地合，合則救物有方，證不求而自得，故次之以天長地久。長久之果，柔順是因，故次之以上善若水。水加之則盈溢，澄之則清映，故次之以持而盈之。不盈之趣，在功成身退，退之所居，居乎不二，故次之以載營魄抱一。抱一成乎玄德，玄德生而不恃，而物自歸之，故次之以三十輻。物宗一用空，空貴無色。色欲難除，故次之以五色，去外浮華，得內真實，時止則止，時行則行，行藏爲師，又當世位，進退宜明，故次之以寵辱。寵辱皆驚，則昇降無滯，防禍匪懈，萬福惟新，自下之高，天下託之，天下託之，必能體道，道妙無形，故次之以視之不見。知道三一，執古御今，執古御今，在上爲聖王，在中爲聖臣，在下爲聖民，聖是積善所成，故次之以善爲士者。士者事也，上中下共以善爲事也，善士體古，習學在今，今學同古，守靜不殊，故次之以致虛極。知常同道，可左可右，可下可上，可王可公，同天同道，永保

久長，隱身不殆，顯亦不危，失此道者，德有劣優，故次之以太上。太上之章，是春詠之限，分上引下，開數推移，移太上爲夏詠之始，齊至虛爲十六之終。太上之應，出生就養，養之使成，成乎歲標，況節朔符於光景，形神據乎崑崙，崑崙者輪轉化導，長生不死，故在養章之中，崑崙者混合還真，故在生章之內，內隱外安，不危不殆，安隱常存，幽顯所附，世罕能守之，故次之以大道廢。失道爭能，競崇外迹，使還內習，故次之以絕聖。自習存中，光而不耀，師資謙嘿，消患襁凶，故次之以絕學，外競既息，內無爭心，大無不包，故次之以孔德之容，忍辱下流不辭，所存者道，故次之以曲則全，曲而能全，自然之理，可以心得，難以言宣，數窮可避，守嘿可弘，故次之以希言，希言嘿識，杜虛慕之萌，故次之以跂者不立，不自矜伐，則稱有道，有道之道，在天地先，故次之以有物混成。混位爲前，應化爲後，分爲四大，四大有方，相次垂法，貴靜爲基，故次之以重爲輕根，重靜得

中，外迹無轍，接救無棄，師資和同，故次之以善行，師資同道，知剛知柔，柔剛相濟，復歸於朴，朴不常混，運開則散，散又應合，故次之以知其雄守其雌，能雄能雌，濟用官長，得中去奢，泰守無爲，故次之以將欲取天下，朴散稍亂，不獲已而治之，治之不可以兵強，故次之以以道佐人主，不獲已用之，用之有功，功遂則退，不可翫之，故次之以佳兵，深知不祥，捨之合道，道體隱退，退位無疑，疑滯既遣，天下不能臣，在位王侯不矜居上守利，物自賓，故次之以道常無名，能令物自賓者，則與天地合德，甘露既降，天下太平，遇斯之由，由於自知，自知則知足，知足則不亡，故次之以知人死而非亡，託化隱景，神與道同，出沒自在，隨感而應，故次之以大道汎兮，應物無方，所得有在，在乎妙炁，炁妙無形，無形有妙，故次之以執大象物之所宗，能得此妙，引誘蒼生，抑揚有法，故次之以將欲歛之，張歛得中，利器常隱，爲而非爲，終與道合，故次之以道常無爲，無爲而無不

爲，物作則鎮之以朴，朴既無欲，天下自正，正則永與道合，合則言忘，忘言在正，正以正邪，故歲功成熟，節朔周通，四炁五行，乘爲二十，地不分功，拜德在天，一章爲年，故二十有一春，則四炁自乘以明首德得專，專含四炁，故十六在前，包羅秋冬，欲內同生養，外其殺藏，使其謙退，捨陰還陽，兩半歸中，厲剛伏之，羸和柔通之，妙故成歲在上，上含乎下，下德之極，終稱上焉，上德之人，化導殺藏，迴向生施，降躬率下，下羸自殊，能妙則上合矣。

地是天之分形，德是道之出應，物有階漸，現形同人，人能覺悟，習此上德，德上同天，還與道合，故曰德經，以上德爲首，首引後生，今其得道，得道無失，號爲德焉，德有優劣，上中下品，廣明其義，次第相須，超卓緣漸，各有其方，今應法古，故次之以昔之得一，一爲應主，主一應萬，萬有所宗，宗一宜守，守之不動，動與俗反，反俗還道，故次之以反者道之動，反者途遠，中遠既易，故次之以上士聞道，聞道勤行，

必至源本，源本宜知，故次之以道生一，知一本源，保和乃合，故次之以天下之至柔，柔者謙退不競，競功名者，身亡神散，故次之以名與身孰親，茫茫守道，於俗不足，故次之以大成若缺，缺僞全真，除禍納福，故次之以天下有道，道無不在，內觀反求，得之在心，故次之以不出戶，出戶求益，羸而乖妙，督其悟斯，故次之以爲學，學華可捨，損欲念真，順物通礙，不滯恒情，故次之以聖人無常心。心以赴感，感來則應，應非我求，心無此欲，適通無方，動靜唯道，道應之形，號之爲聖，學道積德，亦號聖焉，二聖來殊，同歸一致，致心濟物，接生度死，死者能改，悔則還生，生者能攝，養則不死，死生由九竅四關，故次之以出生入死。死中願生，宜識源本，故次之以道生之。求生得生，生生多事，事有始終，防理用術，開塞有方，故次之以天下有始。始常明終，明終恒開，闡資明濟，故次之以使我介然。能行大道者，光內晦外，深根固蒂，子孫無窮，故次之以善建不拔。

修身至乎天下，懷道以全其真，故次之以含德之厚。嘿識勤遵，守之不失，故次之以知者不言。不言之言，言以救物，除邪定亂，故次之以以正治國。終貴無爲，不顯繁法，故次之以其政悶悶。過去無極，當來無窮，現在無央，過去善者，思存學之，以自救援，其不善者，願念拔度，同登道場，當來無窮，精羸叵測，不得枉之，現在無央，尊卑相涉，善者立善，接之共善，同得昇濟，惡者化之，俱乘法橋，故次之以治人事天。秋詠方殊，殊而非善，不得擅位，會合相通，雖有二章，猶在五九之限，使歸長生久視，不復別立，其乘也能深根固蒂，可以濟之人神，故次之以治大國。德既交歸，靜以安小，故次之以大國下流。流何所歸，歸乎大道，故次之以道者萬物之奧。得知奧妙，以救群羸，不可爲有，故次之以爲無爲。方息有爲，杜漸防萌，故次之以其安易持。令堅修德，驗之先師，故次之以古之善爲道者。爲道多方，要在卑弱，卑以自牧，弱以爲用，久忍不虧，則小能成大，

故次之以江海。守此卑下，俗所不堪。故次之以天下皆謂我大似不肖。能有三寶，却死全生，故次之以善爲士者，不爭之德，德乃配天，天無所害，故次之以用兵有言。慈悲爲本，本立道成，人罕能明，故次之以吾言甚易知。凡闇不守其分，妄以不知爲知，故次之以不知上。愚者失道，不測神靈，不知尊重，觸冒致災，故次之以民不畏威。凡夫執心，不能無爲，爲惡而不爲善，勇其所爲，故次之以勇於敢勇。不得其所勇，故次之以民常不畏死。上以風化下，下過由上風，故次之以民之饑。生以食爲本，本以道爲主，主以柔弱教，故次之以人之生也柔弱。弱中有強，弱能強道，道強者和，和同在中，故次之以天之道其猶張弓。中和柔弱，能勝羸剛，取證明實，故次之以天下柔弱莫過於水。爭強則仇對相牽，羸和不及無爭，故次之以和大怨。無怨常善，天道與之，恒自小自寡，然後保大居多，故次之以小國寡民。世俗美辭，華而無實，道之信言，實而不美，

明者取實捨華，故次之以信言不美。本與聖人不積各章合之，以明與人已愈多，終歸天德，故利而不害，人道之極，爲而不爭，不爭之德，少能全之，是以慤慤，誘引開導，以下昇高，迴卑同尊，捨滯惡以從通善，寔由乎五千文，文千以五，五德備充，闕一字者，理不全焉，是爲道本生乎太空，空而不空，無中之有，有妙無敵，化育群生，生生之根，謂爲混沌無形，無形無狀，無狀之狀，不可以意知，意知由文，文以達意，意不得拘文，文簡不得究意，意在文外，明者研精之，略舉一隅反三，由智德之士矣。

道炁玄妙，無祖無先，無始無初，無極無窮，無心無欲，無事無爲，沖淳澄淡，泊然湛然，不清不濁，不減不增，含容無量，一切有無，炁妙不可得汗，形玄不可得言，強字曰道，號爲無形，無形之中，含一切形，一切形混，稱曰混成，成生一切，無數無缺，大而分之，常用以五，一曰無，二曰有，三曰無中之有，四曰有中之無，五曰非有非無，

非有非無，妙炁也，有中之無，精炁也，無中之有，始炁也，有者，元炁也，無者，玄炁也，玄元始炁，分精共妙，五中之三，三中之五，三五混合，無累無傷，善成無棄，總號道源，源本有五，以應五方，北水東木南火中土西金，天地未張，五方未分，水木火土金，其炁相和，極感而應，應隨次章，一切同感，在闇思明，從混願別，厭死樂生，樂生不能自生，願別不能自別，感極道應，應之以一，一爲道子，元炁先臻，故曰道生一，一生二，陽炁前唱，陰氣後和，二炁相須，由乎元炁，故曰一生二，二生三，陰陽合會，和炁交通，三生萬物，玄元始分，於是天覆其上，地載其下，人列其中，萬物參羅，三才相輔，同歸崇道，道有三官，上有天官，下有地官，中有水官，道委三官，不立別職，物附三才，無復別司，人僚唯三，互相統攝，導末歸本，大略是同，引善抑惡，細法舛異，異終還同。同在聖誥，誥有權實，精者得真，真經要旨，智慧爲先，藏明潛用，聖德乃成，成由學解，解由研尋，尋理

盡性，委之上人，上人之基，識三守五，能知三五，橫行天下，所適必通，無復挂礙，三即陰陽和，玄元始也，五即水木火土金也。三炁未分，謂之爲混，五行未彰，謂之爲沌，混沌之源，其圖如左。

第一內號曰源，外號曰自然，此炁最妙，尊無上也。

第二內號曰混，外號無極。

第三內號曰沌，外號大道。

第四內號曰溟，外號至真。

第五內號曰滓，外號太上。

第六內號曰濛，外號老君。

第七內號曰頌，外號高皇。

第八內號曰始，外號天尊。

第九內號曰元，外號玉帝。

第十內號曰玄，外號陛下。

右十號三十字，十字分應十方，或兼或單，相似而異，皆由感有參差，是以尊號分別，開悟善心，因名達理，知之者不死，解之者長生，遇賢當必口受，非人慎勿宣也。

太上洞玄寶元上經

①不元，當爲「不无」。

（曾召南點校）

010 老子變化經

經名：老子變化經。撰人不詳，疑係東漢末道士所造。一卷。《正統道藏》未收。底本出處：敦煌S.2295號殘抄本，寫於隋大業八年（612）。

（S.2295抄本，前缺）

立大始端。行乎大之原浮熬幽靈空之□□入窈冥之先門親子皆誌之未別和清濁之外仿佛之與功古荒忽之廓然閱托而之容徐同門之先遍匝步宙天門^①。其生無蚤，獨立而無淪；行乎古昔，在天地之前。乍匿還歸，存亡則為先。成則為人，恍忽天濁，化變其神。託形李母，胎中易身，優命腹中，七十二年中見楚國李□，序與肩頰有參午大理，日角月玄，鼻有雙柱，耳有三門，足〔蹈〕^②二年^③，手把天關。其性無欲，其

行無為，翊天輔佐三皇，倚徙觀之，匿見無常，本皆由此，彌歷久長。國將衰，王道崩毀，則去楚國，北之崑崙，以乘白鹿，訖今不還。此皆自然之至精，道之根霸，為〔萬〕乘之父母，為天地之本根，為生梯端，為神明之帝君，為陰陽之祖首，為萬物之魂魄。條暢靈無，造化應因，挨帝八極，載地懸天，遊騁日月，迴走星辰，呵投六甲，〔總〕此乾坤，紀易四時，推移寒溫。手把仙錫玉簡，今字稱以銀人善初鳳頭繩，聖父制物，屋命直父為之生焉。

老子能明能冥，能亡能存，能大能小，能屈能伸，能高能下，能縱能橫，能反能覆，無所不施，無所不能。在火不焦，在水不寒，逢惡不疾，觸禍不患，厭之〔無〕芴，傷之無弊，長生不死，須滅身形。偶而不雙，隻而不倚，附面不離，莫子其無為也，莫能不隨世。此老子之行也，嚴誠眇矣，誠難知矣。

老子元生九重之外，形變化自然。子知吾九人，何憂仙？夫為生道甚易，難子學吾生道，無如中止卅日，共月道

畢滄。

第一姓李名老，字元陽；
第二姓李名聃，字伯陽；
第三姓李名中，字伯光；
第四姓李名石，字子光；
第五姓李名召，字子文；
第六姓李名宅，字子長；
第七姓李名元，字子始；
第八姓李名願，字子生；
第九姓李名德，字伯文。
老子合元，泐元混成，隨世沉浮，退則養精，進則帝王師。

皇苞羲時號曰溫蕪子。
皇神農時號曰春成子，一名陳豫。
皇祝融時號曰廣成子。
帝顓頊時號曰赤精子。
帝嚳^④時號曰真子，一名鉞。
黃帝時號曰天老。
帝堯時號曰茂成子。
帝舜時號曰廓叔子，化形。舜立壇，春秋祭祀之。
夏禹時老子出，號曰李耳，一名禹師。

殷湯時號曰斯宮。

周父皇^⑤時號曰先王國柱下吏。

武王時號曰衛成子。

成王時號曰成子如故。

元康五年^⑥，老子化入婦女腹中，

七十二年乃生，託母姓李，名聃，字伯

陽。為柱下吏七百年，還變楚國，而平

王喬蹇^⑦不從諫，道德不流，則去楚而

西度咸谷關，以《五千文》上下二篇授

關長尹喜。

秦時號曰蹇叔子。

大胡時號曰浮慶君。

漢時號曰王方平。

陽加元年始見城都，為鷓鴣鳴山。

建康元年化於白祿山，託葬澗。

大初元年復出白祿廟中，治崔，號

曰仲伊。

建和二年於崩山卒，出城都^⑧左里

城門，壞身形為真人。漢知之，改為照

陽門，楚國知之，生司馬照。

永壽元年復還白祿山，號曰僕人，

大賢問，閉口不言，變化卅年，建廟白

鹿為天傳。

老子曰：吾敖以清，吾事以明，吾

政以成。吾變易身形，託死更生，周流

四海，時出黃庭，經歷渡，踐履三皇，戴

冒三台，被服無形，愚者不知，死復更

生。儻至為身，僮兒為群，外為亡僕，

內自為真，自屋俱滌，自有精神。晝夜

念我，吾不忽云，味夢想吾，我自見信。

吾發動官漢，令自易身，愚者踊躍，智

者受訓。天地事絕，吾自移運，當世之

時，簡滓良民，不須自去，端質守身，吾

自知之，翁養文鱗。欲知吾處，讀《五

千文》，〔誦〕過萬遍，首自知身，急來詣

我，吾與精神。子當念父，父當念子，

怡忽相忘，去之萬里。所治解台，神不

為使，疾來遂我，吾絕剛紀。青白為

表，黃黑為裏，示為生我，從一而始，中

有黃氣可絕酒。教子為道，先當脩己，

恬泊靜穿^⑨，檢其滿乎，無為無欲不憂

患，谷道來附身可度矣。精思放我，神

為走使，吾衡剛茅更勝負。生氣在左，

原氣在右，中有黃氣，元陽為上，通無

極九宮童子，精之思之，可以成己。一

甯道成，教告諸子：吾六度大白橫流，

疾來逐我，南嶽相求，可以度厄，思子

稽留，立春癸巳，放縱罪囚，吾穀驚起，

民人有憂，疾病欲至，餓者縱橫。吾轉

運衝托漢事，吾民聞之自有志，凡鄙自

凍無姓字，因漢自職，萬民見□，端直

實心，乃知吾事。今知聖者習吾意，耶

心良斥，謂我何人。吾以度數，出有時

節而化。知吾者少，非吾者多。

老子變化經

大業八年八月十四日經生王儔寫

用紙四張

玄都玄壇道士

裝潢人

秘書省寫

① 以上文義不可通讀，疑原文有訛脫。

② 「蹈」字原脫，據文義補。以下方括號中文字，係擬補。

③ 「二年」當作「二午」或作「二五」。

④ 「帝譽」當作「帝譽」。

⑤ 「周父皇」當作「周文王」。

⑥ 「元康五年」當作「康王五年」。

⑦ 「喬蹇」當作「橋蹇」。

⑧ 「城都」當作「成都」。

⑨ 「靜穿」當作「靜寂」。

(王卡點校)

011 老君變化無極經

經名：老君變化無極經。撰人不詳，約出於南北朝。一卷。底本出處：《正統道藏》正一部。

老君變化無極中，出處幽微黃房宮。
鍊形淑淑虛無同，光景布行八極中。
真名一出會九公，道理長遠樂無窮。
驂駕九龍車馬僮，上登八重玉闕中。
金樓之臺望華山，山上真人授我經。
教我學道身當清，慎勿貪淫沒汝形。
清身潔己身長生，老君之道自然並。
不求吾道經教名，那得度灾爲種生。
賢者思之解其情，鍼入縷出氣自明。
施寫有法隨時生，秋收冬藏入黃庭。
窈窈冥冥氣合並。

老君變化易身形，出在胡中作真經。
胡兒反叛無真誠，朝降暮反結罪名。
部落強丁至死傾，叩頭來前索求生。

老君執意欲不聽，謫被赭衣在身形。
沐頭剔鬚爲信盟，絕其妻娶禁殺生。
若能從化過其名，日中一食讀真經。
不得欺殆貪淫情，若有犯法滅汝形。
胡兒弭伏道氣隆，隨時轉運西漢中。
木子爲姓諱口弓，居在蜀郡成都宮。
赤名之域出凌陰，弓長合世建天中。
乘三使六萬神崇，真列三師有姓名。
二十四治氣當成，分符券契律令名。
誅符伐廟有常刑，老君正法道自明。
仙官簿錄隨所請，陰陽中經無人明。
唯有龍胎師度形，白髮翩翩遊天庭。
羽翼開張毛衣成，五色斑斑如列星。
璇璣玉衡正其名。

居東煙浪生海陽，海水不流須風揚。
無有涯岸東西相，不逆細流故深長。
汪汪巨海百谷王，百川傾流水湯湯。
源出崑崙華陰堂，陰氣踴躍難可當。
宜預防之過灾殃，得見太平昇仙房。
乘雲駕龍到南陽，飲食行厨布腹腸。
彈琴鼓弦舉樂觴，要當解音別宮商。
角徵所生同室堂。

吾入幽河止泉元，大道坦坦莫不聞。
養士天下皆稱臣，弟子再拜請所問。
道有微氣生活人，誠非下愚所可陳。
道氣綿綿難可遵，布散流行如浮雲。
浮雲翩翩還入山，亦無孔穴入無間。
細微之事難可言，若解微者飛昇仙。
比遊五嶽弱水邊，弱水不度入殺人。
有知之明預防灾，與世相守樂無期。
玄命太清誰知之，今世之人多愚癡。
七九數盡鬼賊來，何不防閑自修理。
苦言利行不相欺，與己一別會何時。
道俗不同善自思，丘山草穢難可治。
口中安十爲良醫，愷悌君子民所思。
但當披懷來趣之，消除惡逆心無疑。
猶豫之子道不治。

龍變浮雲到南蠻，江水枯竭人民單。
鬼賊遊行在民間，聊亂止氣無人分。
師君一出誅盡群，爾乃太平見真君。
有福過度爲種人，條名上白太上君。
賜與符籙護身形，思如呼之恒隨人。
敬如侍之與相親，真氣來附成萬神。
與天相保昇崑崙，驂駕九龍行如雲。

鬱鬱之童至遼東，時欲從急驛馬通。
千里相逐如飛蜂，毒害之氣難可衝。
道路隔塞絕不通，奈何此世思九公。
母能養子恩意同，無偏無黨可相從。
靈禽辟邪除群凶，姦臣賊子入地衝。
爾乃太平氣清公，真君當出別人容。
三五七九內外同，養生之法氣相從。
和順上下無災衝，人多不解妄說空。
西事未訖折復東，持心猶豫無所從。
大災奄至路不通，汝欲避世華陰東。
遊上高山望海水，日出浩汗不可視。
令人目暗犯過罪，魚藏深淵貪餌死。
南方不但自食尾，肝心獨活舍如死。
金容城中有白雉，世之所希人所視。
禁地之物不可底，貪淫愛色心斷亂。
強尸縱橫令人歎，不能清己呼天怨。
吾道清潔選種民，少有明解應吾文。
南到淮揚經孟津，浮橋翩翩在水巔。
過度萬姓無留難，條牒姓名詣津門。
宜名詐稱送司官，推問情實盡其元。
人心歸情還本根，根深固久物自然。
自然之氣出虛無，魯道蕩蕩合與俱。

賴得赤子相接扶，解脫羅網六翻舒。
唳天高飛詣九都，九都之要誰能舒。
仙人王喬處石廬，師事老子合生符。
歷觀帝世知沉浮，有道君子心不憂。
蕩蕩滌滌如長流，百川之水歸海中。
海水瀾灑志無窮，無窮之東有沃焦。
沃焦所受無不消，變散形身作浮雲。
浮雲翩翩還入山，結氣谷口爲甘泉。
事會之溟家無言，神男玉女侍在邊。
扶助男女成萬神，萬神皆生爲真人。
真人已成飛昇仙，遊於五嶽乘紫雲。
驂駕六龍會天門，門有害氣不敢前。
十往十死初不還，汝欲入門依魯班。
天下名巧吾語言，凌陰之室在中丹。
內外相通無留難，同氣合音舒道元。
道之綿綿誰能遵，十室之邑無中人。
令吾道氣屈不伸，怒吾師鬼咎吾臣。
呼行選種不精勤，太平垂至事當分。
條牒姓名言太清，功勞行狀與集並。
玉曆之中有生名，三氣當備愛子形。
不行三五七九生，那得過度見太平。
陰陽中經事難明，時有開解能思精。

出陽入陰至玄冥，八極之內有九城。
九宮之內應天經，三氣五氣令身生。
七九去災除殃丁，天歷運度隨時清。
三師出教給吏兵，守宅將軍繞舍營。
辟斥故氣却邪精，武夷來福在中庭。
除災去害道日明，名顯遠殊世有榮。
子孫昌隆輔相卿。
赤車使者在門亭，左右使從道門旁。
通事書佐處中央，中元之君攝紀綱。
開通屈滯到故鄉，處所安樂命延長。
歷觀五帝治漢中，大樹蓊蓊布名張。
垂枝布葉陰覆陽，四海來會爲柱梁。
勸化男女善相將，接息八木氣當王。
正法天地立紀綱，乾坤所主正陰陽。
道在其中名布行，凌陰之室色玄黃。
芝草蒙蒙覆宮堂，金樓玉闕俠兩傍。
銅人翁仲坐相望，俠守公門嚴如霜。
赤門赫赫誰能當，賢人君子字道長。
防災除害思元陽，氣流溢布身華光。
身生吾羽飛雲行，上謁老君山中黃。
遊觀南嶽宿閑房，仙人王喬共遨翔。
西到廣漠歷長城，長安城中胡馬鳴。

奮頭銜勒人民驚，民驚奔走空土城。
父子爲虎因時營，觀世浮沉發公名。
時世浩擾氣不寧，溫寒不適在人形。
變發坐逆罰貪夫，威令世畏法禁拘。
有道之士心無憂，蕩蕩滌滌處長流。
水之東流無息休，翩翩揚舟隨風流。
櫓櫂相催行如浮，轉相過度無稽留。
稽滯不去必沉浮，傷子無知益人憂。
南度江海建鄴城，故時大樂子孫榮。
不承權輿至死傾，日南瘴氣草不生。
飛鳥不過没人形，遠嫌避害可長生。
與道相守建功名，莫貪財利色慾情。
貞潔守節志當清，爾乃過度見太平。
太平真君復能明，整理文書應鵠鳴。
二十四治會陽平，主者齋籍戶言名。
除死著生詣太清，文字教案令分明。
遷故迎新給所請，有功增錄護群生。
男官女官有別名，聰明主者鍊人形。
若有明解來求生，開心同化首凝誠。
條名上簿過度生，不得壅過塞人情。
主者明順思書經，若有不法結罪名。
鞭杖在身病殃丁，親民之職心當平。
不得鬲戾媚妬情，貪淫愛色沒汝形。

冗散祭酒新故民，素性閻塞不識真。
論說道元狂惑人，口舌陋露俗人間。
招來禍害三考前，同屬道氣不蒙恩。
不能悔咎上呼怨，勅吾主者精斷彈。
善惡異名列狀言，吾有司官在人間。
當驅治之至死傾，上多煩欲無忠貞。
民困於役不農耕，種植失時花無榮。
胫卵半傷結死名，穀如金玉斷之糧。
人民相視色責黃，心愁意苦劇遭喪。
思亂之世無紀綱，君貪臣濁失法常。
世欲變改無忠良，忠臣孝子深隱藏。
不預世事託佯狂，姦臣賊子志飛揚。
義言自陳俛紀綱，執正立權舒中腸。
群寮困頓失義方，士卒百上困狼當。
負土躡水啼吟行，百川之流奔沼城。
真來之衝難可當，火失其明日無光。
封邑齊土國爲王，齊人感歎身摧傷。
養羊爲虎鼠爲狼，變化姓字易其常。
西度名水歷火行，深林還谷多毒霜。
殺戮百草葉枯黃，孟春正月合天罡。
迴轉斗樞隨朝陽，養育群生壽命長。
與天相保神聖將，韓終范蠡相輔匡。
飲食九藥辟穀糧，名山可處石室堂。

前臨源流道里長，混沌相隨到海陽。
海水不流湛如漿，源流減減無人當。
不甜不苦無臭香，中有赤子過度生。
吾之爲道不人情，正法天地身聰明。
道出微妙入玄宮，綿邈攸長難可窮。
譬如百川入海江，不逆細流致其深。
好學之士慕清忠，謙卑順下志在心。
不共並心精其元，道吾好生愛善人。
和民抱樸守素貞，許由洗耳於河濱。
清潔有素絕不群，枕石漱流靜思真。
採取芝英成萬神，服食三微飲神丹。
壽命無窮與天連，遊戲無極八重間。
八重離樓屈復伸，九重之裏窈無人。
混沌之氣誰能分，演散陰陽舒道元。
養育肢體生華根，根生固久應自然。
自然之氣出崑崙，山北絕苦有溫泉。
療治萬病除殃患，犯罪之人更福原。

老君變化無極經

(曾召南點校)

012 老子化胡經

經名：老子化胡經，簡稱《化胡經》。相傳西晉末道士王浮撰《化胡經》一卷，南北朝至唐代增為十卷。元世祖至元年間敕令焚毀。明《正統道藏》未收。現存唐代敦煌殘抄本五件：魏明帝序及卷一（S.1857、P.2007）；卷二（IX0796 + S.6963）；卷八（P.3404）；卷十（P.2004）。今合校為一書。

老子化胡經序

魏〔明帝製〕^①

渾元^②未始，老君唯先^③，長〔於太初，冥昧之前。無〕師无祖，誕生自然，合真^④〔散樸，乃微乃玄。仰而〕舉之，耀乎霄乾；俯而循〔之^⑤，深乎淵源。

敷二儀〕以布化，燭三光以列天。〔其性無欲，純粹精也〕；體虛抱素，妙難名^⑥也。撓之不〔濁，澄之不清，幽〕之不昧，顯之不榮。誰謂天高，〔懸象可標；誰謂〕地厚，重泉可洮。然夫道也，標〔之不高，洮之不〕浚。物受其形，莫鑒其源；人稟〔其中，莫識其全〕。美哉乎道，追之彌遠，挹之彌沖；□□□□，〔仰〕之彌崇；動之則行，靜之則止；開〔之則約，動靜〕斯否；為万物之宗，天地之始。吾〔欲書之，非筆〕可記；吾欲體之，无形可擬。飄乎无外，〔或沉或〕浮；淪乎九淵^⑦，潛豪翳餘。止如響紀，消若〔雲除〕，入^⑧水出火，探巢捕魚，比之於道，不足稱无。深愍後生^⑨，託下於陳，為周柱史，經九百年。金身玉質，口方齒銀，額有叁午，龍顏犀文，耳高於頂，日角月玄，鼻有雙柱，天中平填，足蹈二五，手把十文。无極之際，言歸崑崙，化彼胡域^⑩，次授厨寶，後及天竺，於是遂遷。文垂後世，永乎弗泯^⑪。

① 按以下序文及卷一錄文，以S.1857抄本為底本，P.2007為參校本。兩抄本卷首序文下端，原有缺損。《正統道藏》所收宋人謝守灝《混元聖紀》卷五，其中有《化胡經讚》，題作「魏明帝製」，其文字可校補抄本缺損。以下方括號中文字，凡據P.2007及《混元聖紀》擬補者，不復詳注。

② 「渾元」，《混元聖記》作「混元」。
 ③ 「唯」字，《混元聖記》作「為」。
 ④ 「合真」，《混元聖記》作「渝真」。
 ⑤ 「循之」，《混元聖記》作「察之」。
 ⑥ 「名」字，《混元聖記》作「明」。
 ⑦ 「淵」字原缺，據上下文義擬補。「九淵」謂深淵也。
 ⑧ 「入」字原缺，據上下文義補。
 ⑨ 「深愍後生」，《混元聖記》作「深愍後世」。
 ⑩ 「彼」字，《混元聖記》作「被」。
 ⑪ 「弗泯」，《混元聖記》卷五作「不泯」。

老子西昇化胡經序說第一

是時太上老君以殷王湯甲之歲建午之月，從常道境駕三氣雲，乘于日精垂芒九耀，入於玉女玄妙口中，寄胎爲人。庚辰之歲二月十五日，誕生于亳。九龍吐水，灌洗其形，化爲九井。尔時老君鬚髮皓白，登即能行，步生蓮花，乃至九。左手指天，右手指地，而告人曰：天上天下，唯我獨尊。我當開揚无上道法，普度一切動植衆生，周遍十方；及幽牢地獄應度未度，咸悉度之。隱顯人間，爲國師範，位登太極无上神仙。時有自然天衣掛體，神香滿室，陽景重輝。九日中身長九尺，衆咸驚議，以爲聖人生有老容，故號爲老子。天神空裏讚十號名。所言十者，太上老君、圓神智、無上尊、帝王師、大丈夫、大仙尊、天人父、無爲上人、大悲仁者、元始天尊。此後老君凝神混迹，教化天人，兼說治身中外法。百有餘載，王道將衰，殺戮賢良，枉害無數，忠

臣切諫，反被誅夷。天降洪災，曾无覺悟。如是數載，爲周所滅。

康王之時，歲在甲子，示同俗官，晦迹藏名，爲柱下史，師輔王者。至于昭王，其歲癸丑，便即西邁。過函谷關，授喜《道德五千章句》，並說《妙真》、《西昇》等經，乃至太清上法、三洞真文、靈寶符圖、太玄等法。使其教授至精仁者，羽化神仙，令无斷絕。便即西度，經歷流沙，至于闐國毗摩城所。尔時老君舉如來節，招諸從人。倏忽之間，有赤松子、中黃丈人、元始天王、太一元君、六丁玉女、八卦神君，及龍虎君、功曹使者、金乘童子、惠光童子、天官地官、水官空官、日官月官、山官海官、陰官陽官、木官火官、金官土官，五岳四瀆諸神等君，天丁力士、遊羅將軍、飛天神王、仙人玉女十萬餘衆，乘雲駕龍，浮空而至。

於是老君處于玉帳，坐七寶座，燄百和香，散衆名花，奏天鈞樂，諸天衆聖，周匝圍遶。復以神力召諸胡王，无問遠近，人士咸集。于闐國王，乃至朱

俱半王、渴叛阨王、護蜜多王、大月氏王、骨咄阨王、俱蜜王、解蘇國王、拔汗那王、久越得犍王、悒怛國王、烏拉喝王、失范延王、護時健王、多勒建王、罽賓國王、訶達羅支王、波斯國王、踈勒國王、碎葉國王、龜茲國王、拂林國王、大食國王、殖賦國王、數漫國王、怛沒國王、俱藥國王、嵯骨國王、曇陵國王、高昌國王、焉耆國王、弓（卷）月國王、石國王、瑟匿國王、康國王、史國王、米國王、似沒盤國王、曹國王、何國王、大小安國王、穆國王、烏那葛國王、尋勿國王、火尋國王、西女國王、大秦國王、舍衛國王、波羅奈國王、帝那忽國王、伽摩路王、軋陀羅王、烏長國王、迦葉彌羅國王、迦羅王、不路羅王、泥婆羅王、熱吒國王、師子國王、拘尸那揭羅王、毗舍離王、劫毗阨王、室羅伐王、瞻波羅國王、三摩咀吒王、烏荼國王、蘇刺吒國王、信度國王、烏刺尸王、扈利國王、狗頭國王、色伽栗王、漫吐慢王、泥拔國王、越底延王、奢弥國王、小人國王、軒渠國王、陀羅伊羅王、狼揭羅

王、五天竺國王。如是等八十餘國王，及其妃后，并其眷屬，周匝圍遶，皆來聽法。

尔時老君告諸國王：汝等心毒，好行煞害，唯食血肉，斷衆生命。我今爲汝說《夜叉經》，令汝斷肉，專食麥粦，勿爲屠煞。不能斷者，以自死肉。胡人狼戾，不識親疎，唯好貪淫，一无恩義，鬚髮拳鞠，疏洗至難，性既羶腥，體多垢穢，使其脩道，煩惱行人。是故普令剔除鬚髮，隨汝本俗而衣氈裘。教汝小道，令漸脩學，兼持禁戒，稍習慈悲，每月十五日，常須懺悔。又以神力爲化佛形，騰空而來，高丈六身，體作金色，面恒東向，示不忘本。以我東來，故顯斯狀，令其見者發慈善心。汝等國王所有朝拜，一像吾面東向政事。

如是不久過葱嶺，山中有深池，毒龍居止。五百商旅宿於池濱，爲龍所害，竟不遺一。我遣^①其國渴叛阇王，傳祝與之，就池行法。龍王恐怖，乃變爲人，謝過向王，請移別住，不復於此更損人民，令後往來絕其傷害。次即

南出，至于烏場。遍歷五天，入摩竭國。我衣素服，手執空壺，置精舍中，立浮屠教，號清淨佛，令彼刹〔帝〕利、婆羅門等而奉事之，以求无上正真之道。

歷年三八，穆王之時，我還中夏，使入東海，至于蓬萊、方丈等洲，到於扶桑，暫過太帝之所，校集仙品稱位高下。又經八王二百餘載，幽深演^②之時，歲次辛酉，三川震蕩，王者將亡，數遭百六，非人可制。我更西度，教化諸國。次入西海，至于聚窟、流麟等洲，忽召十方神仙大士，及初得道地下主者，并未授任遊散仙人、至孝至忠適經歷度者，如是等輩八萬餘人，校量功德行業輕重，授其職位，五等仙官，廿七品仙真上聖，岳瀆三天，咸悉補擬。

如是不久過葱嶺，山中有深池，毒龍居止。五百商旅宿於池濱，爲龍所害，竟不遺一。我遣^①其國渴叛阇王，傳祝與之，就池行法。龍王恐怖，乃變爲人，謝過向王，請移別住，不復於此更損人民，令後往來絕其傷害。次即

誠，求无上法，又破九十六種邪道。歷年七十，示入涅槃。襄王之時，其歲乙酉，我還中國。教化天人，乃授孔丘仁義等法。尔後王誕六十年間，分國從都，王者无德，我即上登崑崙，飛昇紫微，布氣三界，含養一切。

後經四百五十餘年，我乘自然光明道氣，從真寂境飛入西那玉界蘇隣國中，降誕王室，示爲太子，捨家人道，號末摩尼。轉大法輪，說經誡律定慧等法，乃至三際及二宗門；教化天人，令知本際，上至明界，下及幽塗，所有衆生，皆由此度。摩尼之後，年垂五九，金氣將興，我法當盛，西方聖象衣彩，自然來入中洲，是效也。當此之時，黃白氣合，三教混齊，同歸於我。仁祠精舍，接棟連甍，飯演後聖大明尊法。中州道士廣說因緣，爲世舟航，大弘法事，動植含氣普皆救度，是名惣攝一切法門。

老子化胡經卷第一

道士索洞玄〔寫〕經^③

常，言无相智佛性身中，何須外求，當自供養心中真佛。

第十三外道名爲虛空，有三万六千鬼神以爲眷屬。能令入定節節火然，自然讀經，不須世間文字章疏，久生心顛狂癡騃。

第十四外道名不遮護，有□□□千鬼神以爲眷屬。善巧方便，作□□□□□作唱，言无次第，嗔喜不定，食无多少，猶如餓鬼。

第十五外道名爲首羅，有二千八百鬼神以爲眷屬。好習外化諸餘佛道，能作菩薩、帝釋天形，持諸餘食与入定人，七日而死。

第十六外道名空乱音，有二千五百鬼神以爲眷屬。能乱道法，在在處處皆作乱想，□□□□脩定所作福處，皆能惱乱。

第十七外道名梵鉢賒，有三万二千鬼神以爲眷屬。多行邪法，壞正道。若睡若寤，作諸鬼形，或婦女形，妖物或人，令其心退。

第十八外道名爲洪照，有三百鬼

神以爲眷屬。此鬼善作陀羅尼，唱種種歌唄，六時行道，遊行世間，惱乱行者，精神退失，憂惱不樂。

第十九外道名爲普安，有三万一千鬼神以爲眷屬。在天爲天魔，在世間爲外道，使鬼交戰，乃至乾闥婆、阿脩羅、夜叉、鳩槃荼、羅刹鬼等見入定人，漏盡斷或，恐怖失性，忘其正念。

第二十外道名爲張世，有三千七百鬼神以爲眷屬。此鬼著人狀似風狂，作師子吼，令人失氣，手中出香，誦陀羅尼，得那解智，說空三昧、无相三昧，承虛論議，愚謂真佛。此神預知他心之事，却語衆言：欲有惡人壞我正法。

第二十一外道名爲无相，有五千八百鬼神以爲眷屬。此神著人乍哭乍啼，或歌或舞，能作天王帝釋之法，所住之處多有毒虵，又自剋期得道之日，若隨去者，必死不疑。

〔第〕二十二外道名爲真帝，有五万三千鬼神以爲眷屬。此神論議无能當者，著人之時作沙門像，持衣鉢等遊

行世間，亦作神廟諸佛形像，此神化人令入邪道。

第二十三外道名爲梵音，有七万七千鬼神以爲眷屬。能轉人心不信者，信邪覺觀智，脩習禪定亦令布施；能斷他道，壞人善根，敗乱正法，時諸僧尼，入禪三昧，忤入耶網，常墮黑闇，天（无）智之者，呼爲正真。

第二十四外道名曰宗明，有二千鬼神以爲眷屬。此神在世名都部將使，常居山澤，亦號山神，亦名林主，若斬伐者皆不危害。脩道之人，常持四規明鏡自照，以絕妖物。

第二十五外道名爲火袄，有一万鬼神以爲眷屬。著人，之時唯燒甘草，供養火具。

第二十六外道名爲廣學，有二千八百鬼神以爲眷屬。入人身中，猶若風狂，詐稱法師，与人論議。身長丈二，目有三角，爪長一尺，毛如猪鬣。若逢之者，无不喪命。

第二十七外道名爲清脩，有四万三百鬼〔神〕以爲眷屬。所作事業，著

青赤衣，乘金銀車，天女侍衛；或作鬼形、夜叉、虎狼、網兩（魍魎）等形。

第二十八外道名爲講論，有二千一百鬼神以爲眷屬。專行腫節癩狂瘡等。

第二十九外道名爲顯極，有一千二百鬼神以爲眷屬。此神在世行飢渴病，无故諍訟，破和合衆，令人墜落水火深院。

第三十外道名阿脩羅，有四千八百鬼神以爲眷屬。善持兵馬遊行世間，有善心者皆能壞之，令人容色變化不定，狀如脩羅，手足皆動，吹瑟打鼓，唱唄搖鈴。

第三十一外道名爲舍衛，號師子王，有三萬二千鬼神以爲眷屬。入人身中喜樂无常，四支沉重，煩怨濇欠，故不樂。

第三十二外道名爲憇駕女，是象王神，有五萬三千鬼神以爲眷屬。此鬼著人，身形班（斑）色，常皺眉語，或哭或歌，乍嗔乍喜。

第三十三外道名爲慧意，有三千

七百鬼神以爲眷屬。此神在此，卧者皆起，行者即住，目見空中幡盖形像。能轉人心得自然食，善解三昧，一坐三日，每日誦經近逾千卷。

第三十四外道名鳩摩毘那，有三萬七千鬼神以爲眷屬。若脩定時，此鬼即來爲人說法，見男見女，爲禽爲獸，若喪（桑）門、若婆羅門，若摩若梵，若自在天、釋提桓；因見梵音相，誠定慧中，得空三昧、色無想定；若身輕舉，至于他方；若白骨觀，脩五門禪、十二因緣、四念處、四正勤、四如意足、五根五力、七覺分、八聖道、三空、四真諦。是爲神說鬼著，見種種形，狐狸、雞、狗、夜叉、鳩荼、布恒那、畢舍遮、羅刹、阿脩羅、半闍羅鬼。若二眼四眼、六眼八眼、十二眼，乃至百眼千眼；兩頭四頭、百頭千頭；百手千手，執持樂器，萬種音聲。銅頭鐵頭、金頭銀頭、銅嘴鐵嘴、金嘴銀嘴，或長一尺二尺，乃至一丈。手足亦尔，銅爪、鐵爪，或員或方、或尖或岐。神爲說法，鬼爲怖人，脩定見之，戰悚流汗，氣息欲斷。

誦祝去之。

第三十五外道名梵摩闍羅，有五萬八千鬼神以爲眷屬。其神能作種種形狀，禽獸草木、日月參辰、山川河海種種神祇，蟲獸音聲言語等事。

第三十六外道名網旃陀羅，有八萬六千鬼神以爲眷屬。能見種種色像，端正醜陋，乍大乍小，一切禽獸草木等形。

第三十七外道名那羅延，有九萬三千鬼神以爲眷屬。此之鬼神有大力勢，令人心想種種生疑，聞善不信，聞惡多喜，能勸他人人生不善心，无誠定慧，令人狂乱，垂涎吐沫，狀似顛人，久久不持，必當狂死。

第三十八外道名爲千炭，有七萬三千鬼神以爲眷屬。多有方便，多觸惱人，狀如鬼神，或作海神、龍蛇鳥獸、五道之神，發動三毒。脩定之人，見是事已，謂是真佛出法教化，失其定心。世人見之，謂爲化佛，礼此神耳，被其化言，勤行礼懺。當授汝法，他心智、无礙智，漏盡正觀，无師獨悟，斷絕煩

惱；勤行精進，當得无上正真之道。汝行大空，无怨无親，无彼无我，无男无女，一切色无像，无想推空，達觀見空、行空身空，觀一切因像空、諸法皆空；於脩定中不淨觀法，四大觀法，於其中間得自在定。汝以自得解脫，更勤精進，不久成道，出大深泥，度大海水，得到彼岸，无因无果，无繫无縛，无有對治，誰繫此業？業不生果，果不生業，果業不生，以不生故，常樂我淨，唯有空法。是空性因緣中无我故，中道涅槃空故，衆多因緣，一切歸空。

第三十九外道名毬狀摩，有七万五千鬼神以爲眷屬。多諸方便，種種幻化，變女爲男，轉男爲女，二根多根，男面女身，女面男身，或爲畜生。脩定之人得淨之心，或入火光三昧，或入水光三昧，或得如意慈^③三昧，〔或〕得大空三昧，或得如想三昧。如是等種種三昧，皆是外道鬼神之所幻或，非真實也。

第四十外道名爲睽摩，有八万三千鬼神以爲眷屬。能爲女物，不自覺

知，嗔慢嫉妬，不可捺觸，亦善諂諛，似鬼神形，令人邪見，不信罪福。

第四十一外道名摩醯首羅，有一万三千鬼神以爲眷屬。此神能以種種偈，誦諸法空定、无相定、金剛定、自相定；无因无果法、乘空法、誠行法、染法，諸欲法煩惱滋多，五盈纏縛，煩惱識想、无義想觀空、无我想言持者，何所利也。

第四十二外道名折羅神，有三万六千鬼神以爲眷屬。遊行世間，所不作者，皆能爲之。入人身中，乍寒乍熱，或嗔或喜，或笑或歌。

第四十三外道名拔闍羅，有七万七千鬼神以爲眷屬。能往六欲諸天，作諸過患，又作男女形像，入人夢交，能作万類鬼神形像。

第四十四外道名遮文荼，有一千鬼神以爲眷屬。其神黄色、四牙，食諸血祀，能治鬼神病，喜能媚人，持其祀者，死人〔入〕其黨，无有出也。

第四十五外道名爲尼藍，有七百鬼神以爲眷屬。其神青色，能治鬼病，

受其法者，便入邪道，善爲祝咀，敗人善根。

第四十六外道名商羯羅，有七百鬼神以爲眷屬。此神天王，善說因緣，小乘法門能使立破，或乱人心，畢竟不免墮於地獄。

第四十七外道名央俱施，有七百鬼神以爲眷屬。此神善治一切鬼病，持其祝者能縛病人，身滅之後魂屬其部。

第四十八外道名摩利支，有八百鬼神以爲眷屬。是神女身，兼有使者常行目前，無人能見。持其法人，亦能持病，蓋是邪法，非正道也。

第四十九外道名阿吒薄俱，有五百鬼神以爲眷屬。此神著人有大力勢，能除鬼病，善傾倒人。入其法門，爲邪所攝，不見正道。

第五十外道名弥施訶，有一千二百鬼神以爲眷屬。入人身中，若行五欲，說煞生得罪，能治衆邪。久事之者，令入邪道。

第五十一外道名爲摩底，有六百

鬼神以爲眷屬。身作赤色，能治鬼病，獨用威力，不與衆同。持其祝者，轉落邪道。

第五十二外道名那俱跋羅，有一千鬼神以爲眷屬。其神能轉諸天形象，若竹若木，或泥或石，或金或銅，作諸像者，皆能倒之。

第五十三外道名趙神鬼，有六万二千鬼神以爲眷屬。此鬼神說言：十二時齋我，受婆羅門法，槽中一食，衣足盖形，不畜長也。

第五十四外道名鉢健提，有五千三百鬼神以爲眷屬。令人猶豫，捉心不定。

第五十五外道名鳩留伽闍，有二千鬼神以爲眷屬。若脩定者即來惱人，或作天身，或作佛身，或菩薩形，自在天形，或作六親眷屬形，乃至王難官府，說法令人煩惱，失道心定。

第五十六外道名爲光照，有三万鬼神以爲眷屬。遊行世間，與脩定人作諸留難，令人短氣，顏色異常，或復能食，不知飽足。

第五十七外道名爲威嚴，有二万鬼神以爲眷屬。此神嫉妬，見他利養及得財物，寧自眼瞎，不忍見之。

第五十八外道名爲洪廣，有二十七万五千鬼神以爲眷屬。此神欺〔世〕誣詐，諂曲規利，多諸種病；貪鬼、嗔鬼、淫鬼、慢鬼、妬鬼、謗道等鬼，種種不利。

第五十九外道名爲迴向，有二十万六千鬼神以爲眷屬。見人善事，即生誹謗。

第六十外道名毗曇脩多羅，有二十万八千鬼神以爲眷屬。〔能〕脩定慧，真實无二，能去煩惱，无愛无癡，无縛无解，百八塵勞所不能汙。若乞食時從一至七，若過此者无有是處，出家之人二指食飯，亦說罪波逸提等。

〔第〕六十一外道名爲振威，有七万九千鬼神以爲眷屬。隨逐婦女，遊行世間，善行祝術，令人怖畏。

第六十二外道名闡楊白，有七千八百鬼神以爲眷屬。若入定時，喜喚人名，或見低身婦女汚路，或見天人天

女伎樂。

第六十三外道名自在廣博嚴淨，有七万六千鬼神以爲眷屬。常伺世人長短之事，令人多睡，或作野狐，或時耳中聞種種聲。

第六十四外道名伎毬道，有十万九千鬼神以爲眷屬。令人著耶〔邪〕，聞雜香臭，自言得道作上行人，便即犯誡。

第六十五外道名求那拔那，有三十万八千鬼神以爲眷屬。□□□相具足，行步之時唱言阿菟菩薩、觀世音菩薩、虚空藏菩薩，以誑世人，令人〔入〕邪道。

第六十六外道名爲依真，有三十二万鬼神以爲眷屬。著人之時遍身體痒，或痛生瘡，或復頑痺，心腹脹滿，喉塞舌痛，或多惡夢。

第六十七外道名爲得爽，有二十万五千鬼神以爲眷屬。令人多慈，作神作聖，其狀似胡，或如婦女，發言怡悅，或復羸癯，外示精進，實无善心。

第六十八外道名爲明練，有二十

萬四千鬼神以爲眷屬。自稱調御丈夫、天人師，遊行世間，滅人善心。

第六十九外道名葛壞衣，有四十萬鬼神以爲眷屬。亦行禪定，愚者謂佛，大致供養。

第七十外道名爲尼利，有四十二萬鬼神以爲眷屬。詐爲邪善，能令男女種有漏業，生死根茂，日有增長，墜落無窮，未有出期。

第七十一外道名高望提，有二十萬四千鬼神以爲眷屬。能令著者說陰陽界普廣嚴淨，脩定無礙於利養，財物如奪己命，凡所食噉，與猪狗無異。

第七十二外道名阿求那，有四十萬八千鬼神以爲眷屬。威猛各部，遊行世間，號爲禪師，不斷煩惱。所有說議，便說斷見言無，自爲朋黨，四部弟子各教禪，淫瞋多者令不淨。作是觀者，教令勤心。

第七十三外道名騰空道畏，有二十萬三千鬼神以爲眷屬。此鬼毛羽猶如鐵色，縱暴世間。脩定之人神來之時，謂呼得定是善，入空凝然不動；或

從空起，乍歌乍舞，鬼氣遍心，令其戰動；或作諸病，不令入道。

第七十四外道名弗沙莫沙，有二十萬三千鬼神以爲眷屬。令人風冷，或作狂顛，或失音，或身腫。

第七十五外道名那健陀，有二萬三千鬼神以爲眷屬。入人身中，輕舉健行，多愁惱，喜嗔恚，漸漸增長，終能致命。

第七十六外道名婆摩智那，有四十萬鬼神以爲眷屬。脩善之處皆悉能壞，爲菩薩像，若一若二，及至無量，以或世人。

第七十七外道名尼連旃，有四十萬鬼神以爲眷屬。此神專爲菩薩形像，爲人說法，爲魔事所縛，作魔眷屬。

第七十八外道名頗梨頗，有四十萬鬼神以爲眷屬。初行精進，後便懈怠，入人身中，生大誹謗，又復嘿然。

其所論議，或發聲言：我今休息，諸法虛妄，無有一實。於是中作諸猖狂，無有羞恥。

第七十九外道名道利道，有四十

萬鬼神以爲眷屬。雖有道名，不多造惡，獨守一志，清潔梵行，於大道中无所妨也。

第八十外道名阿扇旃帝，有八萬四千鬼神以爲眷屬。其神儒雅，不阻道法，各自脩善，不相侵嬈。

第八十一外道名空解大道，有八萬四千鬼神以爲眷屬。能令衆生爲競訟，所爲念定，皆失無餘，善守境者乃得脫耳。

第八十二外道名爲妬神，有七萬五千鬼神以爲眷屬。入人身中作諸事業，皆言上勝無多造惡，不破壞人所作行業。

第八十三外道名爲道堅，有四十萬鬼神以爲眷屬。不殺生，無嗔怒，於彼於此等無差別，皆是不思議力，非世間也。

第八十四外道名爲到行，有八萬九千鬼神以爲眷屬。有威德神通，變化無量無邊，大度衆生，不思議也。

第八十五外道名爲梵音，有九萬九千鬼神以爲眷屬。處處施化，示見

雜食。

第八十六外道名爲大豐，有七千七百鬼神以爲眷屬。唯逐女婦有善心者。

第八十七外道名爲超空，有九萬二千鬼神以爲眷屬。於黃昏時遍房惱觸坐卧行人，令其驚恐。

第八十八外道名爲善女天，有一萬鬼神以爲眷屬。各自行道，不相參合，其性柔軟，每順大道。

第八十九外道名玄通太虛，有七千鬼神以爲眷屬。此諸鬼神於道中出入行來，不覺不知，與衆和合，常聽說法，飲食節度一如常法。

第九十外道名爲戎角，有七千八百鬼神以爲眷屬。其神質直，不橫侵擾。

第九十一外道名爲曠賢，有一萬九千鬼神以爲眷屬。多諸方便，持齋禮拜，唯能知他，而不自知。

第九十二外道名燈分化，有三萬二千鬼神以爲眷屬。居道法中，染行相似，四衆合和，无能分別，所說空法，

不可信盡。

第九十三外道名阿囉囉吒，有二萬一千鬼神以爲眷屬。其神廣德，常居海邊，大施衆生飲食湯藥，及以床榻供養之具。

第九十四外道名阿盧至，有七萬三千鬼〔神〕以爲眷屬。旃頭首檀，如无差等，次轉五清，諸根惣變，凝然自在，住不退地。

第九十五外道名照明五瞿，有少鬼神以爲眷屬。其神微妙，有大功德不可稱量，盈照无量世界。

第九十六外道名殷阿旃陀利，有九十萬八千鬼神以爲眷屬。四眼白眉，作師子吼，將領世人以作法事，无人能見。此鬼著時，或赤白色，或金黃色，多語妄說，卜度人情。

尔時老君爲諸弟子及衆生故，告〔尹〕喜言：是諸外道鬼神有九十六種，略爲說之。此諸鬼神敗乱正法，於脩道人能爲摩事，作諸變恠種種形像。或復令人墜落〔邪〕道，陷諸衆生便不休息。吾去之後，遍行於世，乃至東

夏，專行邪或，迷乱人心，令其顛倒〔風〕狂。或著者不悟，或令斷髮削鬚，烏衣跣足，種種形狀，求人利養；行淫欲事，貪取錢財，遣人捨男捨女，□□□命，乃至頭目、國城妻子，无所悛惜。云過去未來，得諸果報，人无悟者。復令國王帝主□□信向，破乱政事，不自歸道。著此外道，則生我慢，矯誑百端，或乱大道。我故爲汝說偈，於是即作誦曰：

天地間罔，主諸妖耶，當以正道，除去氛祲；第一思惟，無我無主，諸法如空，不可轉相。一實境界，非魔鬼神，之所住處，實智方便；假空有故，法性理無，湛然常住，無有去來。一智實故，二智摩故，三除相故，四分別空，乾元利貞，邪不干正，臨兵鬪者，皆列陣前行。

老君曰：若初著邪，誦前半偈；若全著者，盡誦此偈；若不去者，惣誦斯偈；亦念十方大道，三世天尊。後一行偈是常道祝，心常念之，勿令退散。恒念正真，相續不絕，如是乃能離

諸邪鬼外道等也。汝等勤行念之。

老子化胡經卷第二

①按此卷抄本首殘尾全，存經文333行。筆迹同上卷S.1857抄本，應出於唐代。原卷下半邊多有殘損，中間多處字迹漫漶。以下錄文，凡方框內文字，均係整理者擬補。

②「鬼神」二字原本脫漏，據上下文例擬補。以下凡方括號中文字，均係整理者擬補。

③「慈」字疑爲衍文。

④「各自」原誤作「各自」。

〔老子〕化胡經受道卷第八

奉 勅對定經本^①

(P.3404 抄本)

老子曰：吾本行道，天柱未立，日月未分，星宿未明，未有參辰，天无南北，地无東西。人有形體，未有六府；心神不能名物，體性專貌；亦无君臣列位，父子之親，夫妻禮義，朋友周旋。吾在其中，騰擲精神，分明日月，整理星辰，修立天道，四氣五行，配當陰陽；列注山川，安人六府，初立精神。精神既定，行禮修文，君臣父子，於茲而行。赫骨啓統，造化之元，心兇頑野，不識至真，統領天地，亦无師人。體性强直，无行諮詢，喜則順理，瞋則煞人。亦无法律，師意所行，違天逆理，災氣流行。或及王身，或及臣身，故不醒悟，守迷意堅。吾爲作變，非玄通所聞。雷出青天，雨沙礫石，旋周柱天，白日晝昏，魚飛翩翩。國王怖怕，仰喚倉天。天玄遼遠，地亦幽深，所喚

空廓，心腹憮然。橫行无道，害煞臣民，朝則五百，夕則五千。生民擾擾，守死万千，行攻墮淚，亡失精神。國王懊惱，寢計不言，布告國內，推覓聖人。吾乃出見，與王相聞。

王曰：君是何人？

老子曰：吾是万歲小童，千歲老人，髮白更黑，齒搖更堅。長生无極，出於自然，腦髓能補，皮膚更鮮。室家眷屬，有一万七千，亦不田力，衣食自然；亦不樂貴，爵祿自天；亦不災衰，尋常靜然。

王曰：君言奇異，非古非今，其至反覆，難可平論。吾聞年多則老，年少則小。如君所論，懷抱有何由緣，白髮更黑，搖齒更堅，轉老作少，皮膚更鮮？異哉異哉，殊古邈今，君是天人之身，上古之神。道事淵深，曰遠曰玄，吾今聞之，不悶不昏，聽說遼遠，附口而甘。願與先生，深室而談，同車而載，遊涉万方。朝聞慕老，不願寧康；先因何業，壽命延長。吐氣勃勃，逆風而香，身體容貌，殊姿異光。家眷大

小，不嬰灾〔殃〕。願得聞之。

老子曰：吾受道耳。

王曰：道名何神，威力超然？何方何習，壽命長古？

老子曰：奉道約身，壽命千年；約身奉道，不逢灾考；練形受道，天地相保；神亦不遠，由王修造。天受道，日月明，雷雨行；地受道，山川生，百物榮；天子受道，民人滋，國土清。天不受道，日月不明；地不受道，草木不生，結菓不成；人不受道，无恩情，灾考。是以有物之類，皆合道而生。

王曰：天地受道，道有何形？

老子曰：道也无形，元氣之精，或散或聚，出幽入冥。或出万方，造化隨形，藏形匿影，太清之間。

王曰：巍巍之神，无復過焉。

老子曰：道能經天序地，置立乾坤，畫出天道，安動山川，配適陰陽，列影星辰。二十八宿，各有名字，身或長九丈，或長一旬；或籠天合地，日月不明；或整理逆順，轉死易生；或呼召甲子，役使衆神；或吹嘘寒暑，呼吸陰

陽。

王曰：蕩蕩大聖，天地之大神。願示法律，吾奉之焉。

老子曰：太上者，万物之所尊，上天爲衆神之所祖宗，在地爲萬國之師君。道是虚无，難名之神，成功不名其效，救死不認其生。或居世界，或居九天，或在宥虛，監視世間，順天者吉，毀聖者亡。或上歷九府，下入黃泉，濤演宥虛，无疋无倫。或嚴莊顯服，受度真賢。或上高疋首，爲說死生。或蔽隱合口，與天地相畢。或坐喚六甲，集諸群仙，〔或〕策使飛龍，布火乾坤。或縮地斷火，天地焦然。

王曰：湛湛〔乎〕幽廓之闊深，巍巍乎滄海之瀾淪。

老子曰：百億之祖宗，萬天之靈根，乾坤之所出，雲雨之所生。王能事之，風雨順之，鄰國不侵，臣忠子孝，國土長全。

王曰：妙哉聖尊，天地之根，開論時俗，說合人心矣。

老子曰：道身長丈六，金色照天，

發言雷電，石劈山崩。或攝奸耶〔邪〕，考煞不仁。

王曰：淵乎，何道之深妙。巖巖乎，真爲大神。

老子曰：牽天挽地，走使星辰，驅馳日月，或東或西。一日六時，節度其間，冬温夏暑，其神序焉。

王曰：慙天之神，一代之君。

王曰：先生内老外少，非今世之人，變形易聖，不示吾真。假道說化，天地投心，說文成行，快不可言。自非玄聖，道不可尊，聽不可厭，披朝尋惟，夕衣不昏。吾雖寡漏，預是國君，今得遭遇，與君相因。經今積載，千有餘年，家口大小，恭奉君身，夙興夜寐，不辭勞勤。望君感悟，屈神哀憐，見示好惡，治國平民。民无惡想，改故就新，民忠子孝，不侵害人。豈非聖人，靈澤之恩？吾聞〔遭〕遇賢聖，前身有緣，福力〔相〕接，得見聖人，勿以寡薄，不爲開明。伏願先生，垂愍哀矜，示以聖旨，可以咨承。

老子曰：王大國君，育養群生，開

通至教，表裏應明。捐弃王服，下問凡人，屈天覆地，何以答恩。

王心遂悟，請問慙，膝行跪起，匍匐而言。王曰：蓋聞聖者，不苦元元。見聖還隱，違地負天。

老子曰：形餘腐朽，枯槁之人，外有枝條，裏无精神，空作元元，不稱來問。

王曰：向者發迹，見聖人遶地匝天，經歷八荒，呼吸之間，預睹成敗，開解自然。吾雖不仁，荷是國君，天迴日運，典知萬乘。向君請問，靜然无言，懷聖置天，亦罔於吾。吾聞天高邈遠，向之元元；亦降靈屈神，雨澤豐沃，恩及群生。體質含耀，外朴〔内〕明，自言終應，響對无窮。秘言不聖，何言而生。吾雖不敏，敬仰先生，伏願體練，爲說道元。

老子遂謂胡王曰：統國領民，无所稟承，瞋則與死，喜則與生。不求天謁地，何用問道之元？

王曰：先生云，道能傾天覆地，輪轉萬方，舉手動足，言合宮商，或深或

淺，不可測量。是以吾今敢不奉望。

老子曰：蓋聞天子非是常人，德廕萬物，行合乾坤，開化天地，大國之君。君之有福，國土長全，寢甲休兵，萬國僉然，歸投王命，濟於人民。於民无福，國土覆淪，多嬰災難，毒及臣民。王宜神筭，奉道求生，身无灾考，國嗣欣然，隣國消服，奸惡不侵。王但叩心迫地，憑神杖靈，壽命永終，與天相傾，月不夜食，日不晝昏，死各以次，不夭天年；父不哭子，臣不謀君。王宜體之，尊道敬天，天能弥覆，地能植生，道能變通，戮倒邪精。

王曰：大道寥廓，造化根元，移天易地，剖利星辰，舒張日月，普照万天，運籌易筭，轉死定生，巍巍蕩蕩，无上正真。朝奉暮老，是吾宿心。中來沉溺，不遇聖人，建國造化，法古唯先；多嬰灾禍，毒氣縱橫，雨少旱多，餓煞万人；星辰青黃，白黑虚盈，五岳阬崖，河海水生。父子之道，骨肉之親，夫婦礼義，朋友周旋。

老子曰：有天有地，乃有民人；

賢愚相對，三才並行。日運天雨，血脉相連，天有南北，地有東西，陰陽相對，男女婚姻。婚姻既立，乃有君臣父子。唯有天地，不可得聞。上有金樓玉殿，鐵城火山；地有二十四獄，主者罪人。傳聞不見，道不至真。王若得知，須吾上聞，謁三十六天道主，百千萬重道君、太上皇老、无極之尊，干忤神顏，與王問焉。

王曰：以吾屈重，遠問聖人。吾是天子，道是天尊，能寒能暑，能死能生。願誓微信，縹緲黃金，爲鄙國長短，委曲至誠。蓋聞言者不易，聽者亦難，天明无雪，日没時寒，嬰龍煞人，候色而言；憂未至死，聖不辭煩，天道遼迴，路難可經，吾有龍飛大馬，黄金作鞍，行不壞影，日涉三千，願与先生，乘此上天。

老子曰：天道茫茫，不知根源，亦无阪蹬、繩索可攀，飛鳥不通，馬安能行。吾才雖不敏，倏忽而還。爲說天地，青黄泓然，吞列日月，歷數虚盈，四時節朔，男女婚姻，五岳阬崖，河海山

川。君臣父子，具釋王情，天王歡喜，咸稱万年。

〔王曰〕不知何幸，遇值聖人，開通至教，表裏俱明。百節關孔，快不可言，盡來承受，慎未自停。

老子曰：擔愚匹聖，豈非逆天。

王曰：舉國臣民，吾鑒之焉，今見相貌，挺智無邊。說微妙理，耳所未聞，開一天之道，九天盡明。金樓玉殿，鐵城火山，地下獄訟，罪人由緣。藏形隱聖，君子所鈞。願乞先生，哀愍元元，留神賜教，示以道元。朝聞夕殞，不願更生。今日拜請，明日復然，棄國逐家，委命先生，示以道形，為居何室，為在何天，身體長短，面目姿顏？威儀幾千？幾年一出，何時見身，左右侍從，斯是何神？

老子曰：威儀相好，不可得論，大王聞之，逐國損身，家國大小，何所稟承？

王曰：棄身求道，亦念於吾，置兵死地，不得更生。火中生花，余時乃至真不離；數終合會，自然國非我國，身

非我身。投湯赴火，不顧身形。伏願垂神，示以道要。

老子曰：以王驕蹇，喜生退心。百陳取實，冰口不言。

左右怪之，舉國愕然，有何不及，不允聖人？請召公臣，八百萬人，七日七夜，修齋湛然。開破獄門，不復煞人，剋肌剋骨，蕩滌心情。一言不至，不敢悔心，五身亦不動，口亦不敢言。國王自咎，感激不言，方便布告國中：有意臣民，各誓信命，縹繒黃金。臣民運集，盡在殿庭，齊執金簡，兩手扶心，手持香火，顛倒吾前，叩頭數百，拜跪萬千，聲淚俱下，歔歔而言。吾知心至，為說道根。

老子曰：道有千二百形影，萬二千精光，七十二相，八十一好。朝入地戶，暮過天門，九龍負水，洗沐身形。九色班錯，金光照天。身長九丈，巨相無邊。面廣一丈二尺，上下齊平。頂有華髮，炎（顏）有光明。額有九千，目有九精，鼻有雙柱，耳有三門，足躡二五，手捉十文。項有圓光，睹徹萬天，

發言雷電，萬種音聲。在地為有古先生，在天為无名之君，周行八極，變化一身，窮神盡聖，唯道為尊。無極世界，五億諸天，論說經誠，開度愚聖，莫不從吾教化，以我為先。開王好道，致此殷勤，吾今去矣，王其奉焉。

胡王再拜，請曰：雲分雨散，重合無期，魚失於水，會未有時。聖人既別，劫載莫知。願得受道，永世奉持矣。

老子曰：吾昔受太上教，吾下戎域，教化諸國。出經說誠，依者幾人，我不為隱，但苦无心。

王曰：伏聞大聖以无上妙道教化，屬寶，八十一國皆依正真。吾今劣弱，未蒙樂意，得遇大道，願示愚冥，使舉國男女，終世奉行。

老子曰：吾中到加夷，其王好煞，淫奢无度，初不信真，反見陵辱。吾以左手把日，右手把月，藏於頭中，天地暝昧，不見光明。國人恐怖，莫知所依。吾又放頭中日光，明照天地，草木焦枯。復使四方上下，一時雷電霹靂

作聲，山飛山裂，人獸震驚，海水逆流，山川空行，白虹貫日，黑雲暗冥。迦夷國王，臣民男女，一時恐懼，遂舉國盟誓。我方爲說法，開度天人，度國人優婆塞五百人作比丘，優婆夷五百人作比丘尼。令持妙誠，若比丘者，受二百五十誠；若比丘尼，受五百誠；若初發心者受三誠，若服心者受五誠，若如王者受十八誠。若優婆塞、優婆夷能受三誠、五誠、十八誠者，誦之萬遍，長齋苦行，練誠持身，得清淨道果。所以名初發心者，謂始有善行之人；服心者，已伏情於法。優婆塞、優婆夷者，

迦夷國大兵衆侵煞隣國，奪人男女財寶，人皆忘之，相率於國，男立塞使強兵防守，女人老弱令在家中。胡名劫奪曰劫叛婆，故女子居家者憂其男子在塞上，爲迦夷所劫奪傷煞，遂呼男爲優婆塞；男子守塞者憂其女子在家，復爲迦夷所劫奪鹵略（擄掠），乃呼女爲優婆夷。比丘、比丘尼者，乞求以行道也。吾又教剔除鬚髮，赭衣偏袒，捧鉢持錫乞食，而居常持六齋之時禮拜，

不得嫉妬慳貪，煞生淫慾。雖未證泥丸，亦得滅罪生天。王今受道，當行此法，亦得保護國內臣民男女，永世休康。

王曰：吾雖蟲物微賤，亦願長生，永爲至極。大聖弘慈，乞垂開悟。復聞有極樂之國，遠在西方，欲彼託生，可得以及不？

老子曰：有天地万物，一切人民，即有死有生。長生之道，最難最貴，皆須累劫種因，今身積行，持齋奉誠，布施慈悲，行道誦經，方始可得。王先業惡，未得見聞。又極樂國者，在三清之上長樂舍中，果成證道之處。忘心忘念，滅相滅神，不住有空，無爲湛寂，常樂我淨，始得託生，常住湛然，不生不滅，無上正真之大道也。王今造次，可得生乎？吾所以言在西方二百六十萬里有極樂國者，欲使諸國胡王伏道繫心於彼故耳，彼實無也。且西方之氣曠惡凶戾，人多煞伐，不信正真，何得遐絕更有聖人？吾特欲諸王歸道，故發此言耳。

王曰：未知何處定可託生，過去捨身，願彼安樂？

老子曰：五方淨土有快樂之處，可生死住持。王恒敬奉正真，即得隨心所願。

王曰：惟乞大聖弘慈，賜見開悟。

老子曰：佛者，是弟子尹喜託身，一時教化。雖未至極，亦是聖人。王能奉事持誠布施，令國民男女可生快樂，死得託生，過去未來見存，皆獲福无量。王今信奉，遂誠言：

第一戒者，先須捨離妻子，一生不妻不娶。

第二戒者，不得畜使僕隸下賤，及生惡心。

第三戒者，唯當剔髮削鬚，偏袒露肩赤脚，毀形易貌。

第四戒者，不得耕種五穀，麻麥黍豆儲畜三斗外施人。

第五戒者，提鉢乞食。若至七家，一家不得必作七日虛齋。

第六戒者，三衣瓶鉢、六物七筴，不得雜於他人，自用而已。

第七戒者，視地振錫，三步一彈指，十步一嚙咳。不得踏蟲螳，損傷物命。

第八戒者，身披偏袒，手貫散袖之衣。

第九戒者，蠶絲皮革不得服也。布葛毛毳而已。若无，可取糞掃中破衣，灰汁九過浣度，然後納成，名曰納衣比丘。

第十戒者，常披壞色赭服之衣，勿著五色華艷之服。

第十一戒者，裙裾向前，不得跨履高床，廣屈容身而已。

第十二戒者，法著鰻袒紗披以爲法衣，散福破袖之衣。

第十三戒者，偏袒右肩，合掌向師，心存太上，晝夜不息，即得仙道。

第十四戒者，不得坐於氈褥之上。

第十五戒者，單景獨宿在於巖穴，莫栖於世。

第十六戒者，頭陁山林禪定獨處，不得在世。

第十七戒者，一月三剔髮，一日三

洗浣，必須香淨。

第十八戒者，比丘、比丘尼不得狡獪於物。

於是，胡王合掌禮拜，曰：能持如戒，不敢有違。

老子又說三戒：一者師教勸化，皆不得違；二者奉道不得中退；三者信行聖言。又五戒者：一慈悲万物，不煞衆生，於諸含識，勿懷損害；二身心清淨，不起邪欲，於諸男女，莫生色想；三廣行施惠，救濟貧乏，於諸財寶，不生貪取；四中平信實，不欺於物，於諸一切，生歸向心；五永斷酒肉，內外香芳，一切世間，尊卑不犯。受此戒者，生死護持，劫劫生生，當盡一心，不退不轉，念念不絕，禮敬歸依，剋證真道。

胡王稽首叩頭：唯唯。願如戒修行，上徹太上，照領丹心，使道備具，永享福祐。

尔時，老子乃說偈言：吾先无先，生於无生，變化恍惚，出入窅冥。在世乘龍，依天御星，或聚或散，一濁一

清；光分萬像，神洞百靈，先天布氣，後天長生。蕩蕩不測，巍巍難名，王期吾道，須盡至誠。吾登九天，上入三清，還歸於世，永念衆生。

尔時，老子偈訖，告諸衆曰：我乘雲御氣，遊於八極之外，履行十方。教化八十餘國，降伏九十五種邪道，或夏或夷，種種變見，或在火上，或在水中，或作小身，或作大身；何種不涉，何種不經，何國不化，何世不生？或儒或道，或仙或凡，傳經說戒，種種教道，示令開悟一切衆生。胡王既伏教戒，吾當遊於九天。時鬼谷等二十四真，隱影復還於周，唯喜待吾矣。

老子化胡經卷第八^②

①按《新唐志》載：武后萬歲通天元年（696），侍郎劉如璿等奉敕議《化胡經》。又《全唐文》卷九六載武后《僧道並重敕》曰：「老君化胡，典誥攸著，當依對定，僉議惟允。」可知本卷當即武周時「奉敕對定」經文抄本。原卷首微殘，以下據文義擬補。

②原卷尾題被截去，粘接佛經抄本。此係整理者擬補。

老子化胡經玄歌卷第十

(P. 2004 抄本)

〔《化胡歌》(擬題)〕

我往化胡時，頭戴通天威。金紫照虛空，焰焰有光暉。胡王心獷戾，不尊我爲師。吾作變通力，要之出神威。麾日使東走，須弥而西頽。足踰乾坤橋，日月左右迴，天地晝闇昏，星辰互差馳，衆灾兢地起，良醫絕不知。胡王心怖怕，叉手向吾啼。作大慈悲教，化之漸微微。落簪去一食，右肩不著衣。男曰憂婆塞，女曰憂婆夷。化胡今賓服，遊神於紫微。

我在舍衛時，約敕瞿曇身。汝共摩訶薩，賚經教東秦。歷落神州界，迫至東海間。廣宣至尊法，教授聾俗人。與子威神法，化道滿千年。年終時當還，慎莫戀中秦。致令天氣怒，太上踏地瞋。寺廟崩倒漸，龍王舐經文。八万四千弟子，一時受大緣。輪轉五道頭，万无一昇仙。吾在三天上，愍子淚

流連。念子出行道，不能却死緣。不能陵虛空，束身入黃泉。天門地戶塞，一去不能還。雖得存裡嗣，使子常塞心。逆天違地理，灾考加子身。神能易生死，由于行不真。三十六天道，終卒歸无終。

我身西化時，登上華岳山。舉目看崑崙，須弥了了懸。矯翼履清虛，倏忽到天西。但見西王母，嚴駕欲東旋。玉女數万千，姿容甚麗妍。□□□□□^①，天姿絕端嚴。齊執皇靈書，誦讀仙聖經。養我同時妹，將我入天庭。皇老東向坐，身體瞭然明。授我仙聖道，接度天下賢。

我昔西化時，登上華岳山。北向視玄冥，秦川蕩然平。漢少雜類多，不信至真言。吾後千餘年，白骨如丘山。尸骸路(露)草野，流血成洪淵。不忍見子苦，故作大秦吟。哀嘆二十^②頭，以示道中賢。見機降時世，不值苦以辛。

我昔化胡時，西登太白山。脩身巖石里，四向集諸仙。玉女擔漿酪，仙

人歌經文。天龍翼從後，白虎口馳斷。玄武負鐘鼓，朱雀持幢幡。化胡成佛道，丈六金剛身。時與決口教，後當存經文。吾昇九天後，剋木作吾身。

我昔離周時，西化向罽賓。路由函關去，會見尹喜身。尹喜通窈冥，候天見紫雲。知吾當西邁^③，沐浴齋戒身。日夜立香火，約敕守門人。執簡迎謁請，延我入皇庭。叩搏亦無數，求欲從我身。道取人誠信，三日口不言。吾知喜心至，遺喜五千文。欲得求長生，讀之易精神。將喜入西域，遷喜爲真人。

我昔化胡時，涉天靡不遙。牽天覆六合，艱難身盡嬰。胡人不識法，放火燒我身。身亦不缺損，乃復沉深淵。龍王折水脉，復流不復行。愚人皆哀嘆，枉此賢人身。吾作騰波烝，起立上著天。日月頭上瞰，光照億万千。胡王心方悟，知我是聖人。叩頭求悔過，今欲奉侍君。伏願降靈烝，怒活國土人。吾視怨家如赤子，不顧仇以嫌。化命一世士，坐卧誦經文。身无榮華

飾，後畢得昇天。吾告時世人，三界里中賢。欲求長生道，莫愛千金身。出身著死地，返更得生緣。火中生蓮花，尔乃是至真。莫有生煞想，得道昇清天。未負既真信，喪子千金身。

我昔學道時，登崖歷長松。盤曲幽谷里，求覓仙聖公。食服泥洹散，漸得不死蹤。九重〔玉〕室中，得見不死童。身體絕華麗，二儀中无雙。遺我元氣藥，忽然天聖聰。

尹喜哀嘆五首

尹喜告世人：欲求長生道，莫求時世榮。我昔得道時，身爲關府君。一日三賞賜，雜綵以金銀。不以爲己有，施與貧窮人。白日沾王事，夜便習靈仙。滄松食苦柏，微命乃得存。精誠神明祐，守真仰蒼天。感得天地道，遇見老君身。難我以父母，却遺五千文。秘室伏讀之，三年易精神。授我仙聖方，都體解自然。

我昔上九天，下向視玄冥。但見飛仙士，列翼影清天。朝宗九天主，太上皇老君。滌蕩六府中，受讀仙聖文。

王喬得聖道，遊行五岳間。服炁食玉英，受命與天并。

昔往學道時，登岳歷高堦。動見百丈谷，赫赤道里長。有无極神炁，何以到西方，无以度赤谷，垂淚數千行。自念宿罪重，五内心摧傷。

我昔求道時，逕歷數千崖。浮遊八荒外，徒跣身无衣。東過日出界，西尋清山累。足底重躡生，手中把少微。道見西王母，問我子何歸？耻身不學道，意欲覓仙師。感我精誠至，乞我鞋以衣，尔乃得學道，仙炁漸微微。父母恠我晚，晝夜悲嗥啼。大道與俗返，一往不復歸。高志日日遠，不覺心肝摧。雖得不死道，氣力甚微微。心精不退轉，今作天人師。

昔往學道時，蹤跡亦難尋。東到日出界，樹木鬱鬱深。南到閻浮提，大火燒我身。西到俱地尼，但見金城門。青龍堯（遶）城腹，白虎守城前。衝天金樓殿，太上居湛然。光影耀虚空，仙人絕端嚴。齊執黃卷書，口誦長生文。北向入玄冥，大水湛湛深。遶天數百

匝，足底重躡生。尔乃得仙道，把攬天地神。子能述吾道，白日得昇天。

太上皇老君哀歌七首

三十六宮主，太上皇老君。哀愍下世士，垂神教世賢。子欲脩冥福，先當體窈冥。生時得尊貴，不如過去榮。仙〔人〕駕龍車，迎子遊清天。上登金樓殿，坐卧虚空間。行則飛仙從，威儀上柱天。朝登天東頭，暮到於天西。戲樂九天外，縱意極周旋。驅使役百鬼，總統於万金。

吾哀世愚民，不信冥中神。恃力害良善，不避賢行人。馳馬騁東西，自謂常无前。善惡畢有報，業緣須臾間。神明在上見，遣使直往牽。從上頭底收，係著天牢門。五毒更互加，惡神來剋侵。口吟不能言，妻子呼倉天。莫怨神不祐，由于行不仁。

吾哀時世人，不信於神明。先人与種福，子孫履上行。衣厚飯得飽，灾考不到門。自謂常終日，口氣頭嘘天。得病叩頭請，看師真遼然。外恭心不敬，神明以知人。三魂係地獄，七魄懸

著天。三魂消散漸，五神不安寧。伺命來執載，丞相踏地暝。左神不削死，右神不著生。生神不衛護，煞神來入身。或患腰背痛，或患頭目疼。百脉不復流，奄忽入黃泉。天門地戶閉，一去不復還。

吾哀世愚人，不信冥中神。生時不恭敬，死便償罪緣。典官逐後驅，牽北走東西。抱沙填江海，負石累高山。白日不得食，夜分不得眠。朝與杖一百，暮與鞭一千。不堪考對苦，賣罪與生人。兩兩共相牽，遂至死滅門。皆由不敬道，神明考擿人。何不敬真神，生死得昇天。生榮死者樂，生死得蒙恩。

吾哀時世人，不信冥中神。一門有十息，縱意行不仁。神明鑒无外，終不濫煞人。或夭華秀子，或夭妙少年。門崩戶以壞，學者如浮雲。死亦不脫歲（穢），悲哭仍相尋。妻子沉埋漸，一身孤獨存。呼天天玄遠，呼地地亦深。不能自怨責，各道怨師尊。雖欲思善道，十子不復還。

吾告時世人，脩道宜懇懃。恩亦不虛生，神明必報人。昔有劉仲伯，精誠於道門。勸惡使從善，歲會集群賢。香火日夜懃，亦能感倉天。命盡應當死，衆神與表天。三魂飛揚漸，七魄入死星。右神削死籍，左神著生名。伺命來拯濟，左（丞）相踏地暝。普告二十獄，拔出仲伯身。三魂還復流，七魄還入身，血脉還運轉，百節方更堅。面目更端嚴，肉骨更鮮明。死卧三七日，復尸還更生。

吾告時世人，髡骨不別真。閑時不共語，急便來求人。死者如流水，去者如浮雲。秦川純（屯）軍馬，中庭生叢榛。百中不留一，到思吾本言。何不學仙道，人身常得存。

老君十六變詞

一變之時，生在南方亦（赤）如火。出胎墮地能獨坐，合口誦經聲璨璨。眼中淚出珠子磔，父母世間驚恠我。復畏寒凍來結果，身著天衣誰知我。

二變之時，生在西岳在漢川，寄生王家練精神。出胎墮地能語言，晃晃

昱昱似金銀，三十六色綺羅文。國王歡喜會群臣，英儒雅士（來）平論。忽然變化作大人，髮眉皓白頭拄天。

三變之時，變形易體在北方。出胎墮地能居牀，合（口）誦經聲琅琅。額上三午十二行，兩手不開把文章。配名天地厚陰陽，從石入金快翱翔。

四變之時，生在東方身青葱。出胎墮地能瞳春，合口誦經聲薤薤。白日母抱夜乘龍，崑崙山上或西東。上天入地登虛空，仙人侍從數萬重，當此之時神炁通。

五變之時，生在中都在洛川，嵩高少室嶺岑顛，中央脩福十萬年，教授仙人數万千。齊得昇天入青雲，降鑒周室八百年。運終數盡向闕賓，化胡成佛還東秦，敷揚道教整天文。

六變之時，生在乾地西北角。圖畫天地立五岳，處置星辰叙四瀆。二十八宿注鄉曲，日月照曜爲下國，走入流水得周局。智者察之知急速，雨澤以時熟五穀，萬人食之大化足。

七變之時，生在北方在海嶼。出

胎墮地聲由由，好喜歌舞无憂愁。造作音樂作筵篔，万帝來請用解憂。黃河爲路行竟頭，一身涉世快遊遊。

八變之時，生在東北在艮地。圖畫天地我次比，白衣居士維摩詰。欲結坐禪須諳炁，通暢經書有舍利。見吾相好須信企，感子單誠不延次，齊得昇天不墮地。

九變之時，下人（入）黃泉正地柱，開闢天地施地戶。四炁非陽立冥所，雖有人民不能語。吾入身中施六府，脇爲傍通心爲主。從此已來能言語，尊卑大小有次緒，萬天稱傳道爲父。

十變之時，生在東南出風門。畫出天道安山川，置立五岳集靈仙，吹噓寒暑生万民，煩炁衆生人得真。置立五藏施心神，動作六神能語言。有生有死須臾間，如水東流何時還。邂逅相代不得停，何不習善求長生。槃散流俗入膠盆，不能免離喪子身。欲求度世於中禪，搦心不堅固仙根，盲聾音（暗）瘖教不倫。由于前身謗經文，論說道士毀聖人。在惡必報受罪緣，

但勤自責莫怨天。

十一變之時，生在南方閻浮地。造作天地作有爲。化生万物由嬰兒，陰陽相對共相隨。衆生稟氣各自爲，番息衆多滿地池。生活自衛田桑靡，劫數滅盡一時虧。洪水滔天到月支，選擢種民留伏羲。思之念之立僧祇，唯有大聖共相知。

十二變之時，生在西南在黃昏。時人厭賤還先身，善權方略更受新。寄胎託俗蟒虵身，胎中誦經不遇人。左脅而出不由關，墮地七步雜穢間。九龍洗浴人不聞，國王歡喜立東宮。与迎新婦字衢夷，八百伎女營樂身。八斛四升不亂禪，破散庫藏施貧人。道十八人詣宮門，賈作大醜婆羅門。借問太子何時還，王心不語動王情。騎王白馬觸王瞋，晃師知意不与言。殞著檀特在丘（山），投身餓虎求道門。變爲白狗數百身，積骨須弥示後人。傳語後學須精勤，莫貪穢辱喪子身。沉累六趣更生難，不信我語至時看。

十三變之時，變形易體在罽賓，從

天而下无根无。號作弥勒金剛身，胡人不識舉邪神。興兵動衆圍聖人，積薪國北燒老君。太上慈愍衆生，漸漸誘進說法輪。剔其鬚髮作道人，橫披无領涅槃僧。蒙頭著領待老君，手捉錫杖驚地蟲。卧便思神起誦經，佛炁錯亂欲東秦。夢應明帝張愆（騫）迎，白馬馱經詣洛城。漢家立子无人情，捨家父母習沙門。亦无至心逃避兵，不翫道法貪治生。搦心不堅還俗纏，八万四千應罪緣。破塔壞廟誅道人，打壞銅像削取金。未榮幾時還造新，雖得存立帝恐心。

十四變之時，變形易像在金剛，沙門圍城說經偈。至著罪人未可濟，胡人聞之心恐恠，將從群黨來朝拜，叩頭悔過求受戒。剋肌剋骨誓不退，燒指練臂自盟誓。男不妻娶坐思禪，死爲尸陀餒鷹鷗，遷神涅槃舍利弗，骨得八斛散諸國。如此遷連雜煩欲，苦身求道立可得。

十五變之時，西向教化到罽賓。胡國相釐還迦夷，侵境暴耗買育人。

易子守塞憂婆夷，吾入國中作善詞。
說化男子受三歸，漸漸誘進說法輪。
剔其鬚髮作道人，陽爲和上陰阿尼。
假作父母度僧尼，師徒相度理无私。
遷神涅槃歸紫微，四鎮安穆和我神。
胡人思念常吁啼，鑄作金像法我形，三
時入礼求長生，寂寂寞寞不應人。低
頭視地仰看天，大聖正真何時還。

十六變之時，生在蒲林號有遮，大
富長者樹提闍。有一手巾像龍蛇，遣
風吹去到王家。國王得之大歎吒，興
兵動衆來向家。離舍百里見蓮花，國
有審看一月夜，王心惡之欲破家。忽
然變化白淨舍，出家求道號釋迦。

五百歲之時，乘龍駕虎道得昌，漢
地廣大歷記長。三十六人計弟兄，超
度北闕雲中翔。新盧酒出俱行嘗，娥
媚山邊作細昌。當此之時樂未央，伊
耶樂生壽命長。

六百歲之時，一世以去二世歸，城
郭如故時人非。觀者衆多知我誰，死
生各異令人悲。何不學道世欲衰，脚
蹠西北長吁誰？伊耶樂生治太微。

老子化胡經卷第十^⑤

- ① 原本此處脫漏五字。
- ② 「二十」原本作「廿」。
- ③ 「西邁」原本誤作「西過」。
- ④ 以上四句原本顛倒作「口氣頭噓天，自謂常終日。看師真遼然，得病叩頭請」。文意不連貫，又不合韻。
- ⑤ 原卷尾題後有「淨土寺藏經」印章。又據逯欽立《跋老子化胡經玄歌》考證，此卷應出於北魏太武帝滅佛之後，孝文遷洛之前。早於前數卷。

（王卡整理點校）

013 太上靈寶老子化胡妙經

經名：太上靈寶老子化胡妙經。
撰人不詳，約出於東晉末北魏初。一卷。《正統道藏》未收。
底本出處：敦煌 P.2360、S.2081 抄本。

(P.2360 抄本，前缺^①)

無極太上，至後天地開闢千六百億年，無世不化。然時人知我者希，在賢知賢，在愚知愚。「吾」汎汎然與俗同狀，世人不知。或謂吾是聖，或謂是凡，或謂日月五星之精，或謂是太宗師，或謂之天人帝王之師。不知吾是天尊，不知吾是虛〔無〕之母也。

道言：天地合會，三千六百億萬歲一小合會也。大合會之時，天下蕩然，無有人民。伏羲之前，大會無數，

吾於其中導引衆生，過度灾厄。伏羲時下爲師，號宛華，稱田野子，作《元陽經》三十卷。神農時出爲師，號曰太成子，作《太一九精經》三百六十卷。祝融時出爲師，號曰傅豫^②子，作《案摩通精經》九十卷。三家共脩無爲之術，而治萬八千歲，以致太平。人民純樸，正直^③無爲，無有餘法，唯有元始自然法耳；不侵不害，道炁歸身。當此之世，可謂三皇之君矣。伏羲之前八萬歲，於玉京山南作《太清經》三百卷，作太宗守道之法，於座定志不起，歷萬餘年，衆生沉淵而復一見，權變導引而子不知。

道言：吾黃帝時出爲師，號曰力默子，作《道成經》七十卷。帝嚳時出爲師，號曰綠圖子，作《黃庭經》五十卷。帝堯時出爲師，號曰務成子，作《政事宣化經》各四十卷。帝舜時出爲師，號曰君壽子，作《通玄真一經》七十卷，《道德經》千二百卷，自稱太宗師。世人能念太宗師者，苦痛自止，所願從心。自三五霸之後，帝王相承，人性有

好惡，壽命有長短，稟之於元炁，遭之於〔以下缺〕

(S.2081 抄本，前缺^①)

地爲大動，人民繞壤〔擾攘〕，无復情計，□□□□。尔時天尊於虛空之中愍念群〔生〕，□□□□此城中放大光明，普照十方，城中國王臣民等百千萬衆，皆大歡喜，悉爲禮拜□□□□。尔時有一大國王，即從坐起，長跪叉手，
[上白]天尊：我等今日有緣，得見天尊，譬如更生。

尔時天尊在坐中語諸群生曰：我今愍汝等前身有福，得爲種民。我今安汝等，悉置布[五]方。在東方者號爲青帝，在南方者號爲赤帝，在西方者號爲白帝，在北方者號爲黑帝，置在中央者號爲黃帝。五方各有日月星辰列布，五穀生於山中，養於万民。從此以來百億國土，共相承習。

尔時群衆言曰：我等今日因緣得見天尊，分別解說開悟，群生爲當何

屬？**我**等能屬道者，无上最真，樂佛者亦是我身。有一長者問曰：天下唯言一生，大聖云何復有二尊？天尊答曰：我觀見天下邊國胡夷越老，一切衆生心意不同，不識真偽，不信罪福，各行惡逆，是故我今分身二乘，教化汝耳^⑤。

天尊尔時在大城中，口說演出經教无数无量，宣付天下，及道士道人、沙門羅漢，各自部典，隨所教化。若信佛者，當以教之，而爲說法；若信道者，當以教之，而爲說法。若善男子、善女人等，愛樂是經，尊奉恭敬，勤行功德，減割身口，月月常能建立齋戒，供養師尊，燒香禮拜，勤身苦行，六時行道，不問男子女人道俗，若能至心聽受此經者，不遭枉橫，所在安隱；命過之者不墮地獄，皆登天堂紫微之宮，衣食自然。若不信經教者，訾毀罵道，不崇念善，欺陵孤寡，劫奪人物，煞害衆生，如此之罪，命終之後當墮地獄，刀山劍樹、爐炭溲湯，隨罪輕重，考而治之，千劫无復人形。善者受福，惡者受

殃。

天尊言：東九夷、南八蠻、西六戎、北五狄、中殃（央）三秦，東西南北十方世界，恒河沙數，皆由天尊威恩降伏，賞善罰惡。若有魔王眷屬、諸神廟祀，天祇地祇、衆耶（邪）魍魎，世間前後死喪升加、蜚尸惡注，疾病人民。又諸道士宣威救急，行道教化，降伏諸魔惡鬼，皆由天尊威振神耳。

天尊言：吾遊行万國之地，以道教化，皆悉歸向，唯有胡國不伏。天尊乃變形作凡夫，入其國土。胡人男男女婦皆共驚恠。天尊言：汝等有何驚恠？我來化妝也。胡人聞之，舉國大小无不驚笑。天尊言：汝莫笑我等二老公，今大飢渴，汝一國爲吾作食，乃可飽耳。胡人一國即爲作食，種種无数。二尊共食不飽，胡人大小皆大驚恠。天尊言：汝等一國飼我不飽，我今復爲汝設食。

天尊以金槌打地，五方飲食種種无数，一時來下。胡國大小食此，百方不遺。一胡人心由凶強，乃以天尊囚

縛，宣敕一國。聚柴積如丘山，以二尊著於柴上，持火從下燒之。烟火熾盛，七日七夜。柴消火滅，胡人往看。但見天尊顏色豐悅，光耀照天，誦經振動四方。胡人惶怖馳告，胡王聞之，皆大惶恠。便自出將領千軍万乘，以金銀輦輦剛取二老公，著於殿上。舉國大小千重万匝，叩頭禮拜，乞存生命。天尊言：汝等胡人雖尔，心由凶惡，爲汝等除落鬚髮，偏肩露膊。不令妻娶，斷其種族。使立塔寺，徒衆朝暮禮拜，奉侍天尊丈六金剛形像，常如今日。起立華香幢幡，真珠瓔珞，供養形像，燃燈續明，轉誦經文。六時行道，如似原物。

天尊言：吾化伏胡國，安立形像寺塔，正定天下万國之主。天尊宮殿在於虚空之中，諸音伎樂自然有之。世間愚癡人輩，謂言天尊无像。天尊生出以來，經歷數劫，恒河沙等，不可窮盡。變形世間，或大或小，或老或少。天地大聖，以道爲尊。

天尊言：我在宮中觀万民，作善

者少，興惡者多。大劫欲末，天尊遣八

部監察，以甲申年正月十五日詣太山主簿，共算世間名籍。有脩福建齋者，三陽地男女八百人得道，北方魏都地千三百人得道，秦川漢地三百五十人得道，長安晉地男女二百八十七人得道。自餘邊國人非人等，或人頭鳥身，一人兩頭，似人非一人，恒河沙爲數，不知人事，不識真僞，如此人輩，死墮六畜之中，從一劫乃至千劫，輪轉周而復始。有此得道男女，由其前身脩福，奉持經戒，常念三寶。今悉登天堂宮殿樓閣，悉用七寶流泉涌池，池中蓮華皆如車輪，諸音伎樂在於前。後世之難有此，皆福賴巍巍如是。

天尊言：上有卅三天，周迴十方，無窮無極，恒河沙數。造立天地以來，有大須弥山，有大鐵圍山，大海，是名三千大千國土，人民滿中。天下亦有百億日月，一日月傍照四天下，輪轉周而復始。地下有大水，風在其上；地下有樹，枝葉四布八万九千里。無邊無畔，不可窮盡，亦不可思議，莫能知

者。

天尊言：天地開闢以來，三皇五帝。余時吾經百劫，身滅更生，受命八万七千歲。人民俱余，共相率生，慈心相向，不賊不害，不偷不盜。四方亦無兵革，國土通同，人民歡樂，受命極長；滿一劫人民死，盡皆生天堂，無有受苦。從來至今，以經九万年，人民衆多，世亡沒墮，「不」復更生，人心轉惡。國王帝主，君弱臣強，共相攻罰（伐），或父子自相魚肉，兵刀水火更相煞。人民多作惡，无一善者，貪財愛色，六親相賤，無尊無卑，無大無小。或父煞子，或子煞父，顛倒上下，無常根本。一切衆生競爲作惡，不可教化。以是天遣百部使者，行九十種病，頭痛寒熱疫疾，及霍亂轉筋，腹痛赤下，癰腫惡瘡，及官（司）刀兵，惡賊所煞，水火燒溺水，死罪繫獄，自煞滅盡。哀哉痛哉。我念汝等崩山瓦解，唯善得度，不遭橫死，與聖俱出耳。

天尊言：我今愍念群生，可宣吾經教，不問佛道魔俗，男子女人，若能

尊奉明法，勤脩功德，建立福田，轉經行道，一日一夜燒香禮拜，步虛詠誦，懸繒幡蓋。監察直事，月月來下檢察，脩福表上，善者上昇天堂，衣食自然，快樂無極。世間愚癡輩，謂呼無是，笑人作善，不作福德，作罪得罪，不信人死神明更生。愚癡迷或（惑），信耶到（邪倒）見，死入地獄，陸犁十八地獄、玄沙北獄、太山廿四獄，及在中都大獄。日月所不加，三掠之考，万痛交行，求生不得，求死不得，考楚万端。如此衆罪，百劫不復。所以者何？譬如王法牢獄，亦復如是。

天尊余時在廣域中，與諸國王大臣、人民百千萬人，及諸道士共會說法。汝等從今以去，廣宣吾教。大劫將終，示化人民勤作功德，起立寺塔精舍，遼理福業，廣救衆生，及一切螻蛄蠕動，有形之類，過度惡世，得見太平，與真君相值。末劫之後，山河石壁無有高下，香水洗身，然後真君來下。及彌勒衆聖治化，更生日月星辰，列布在空中，普照十方諸天，善神皆共來下。

人民長大，无痛苦〔煩〕惱，五穀豐熟，一種三收，米長五寸，食之香美。金銀寶藏悉皆露形，亦无虎狼毒蟲，國土交通，人民歡樂，世之希有^⑦。男子女人，勤脧功德，普救貧窮孤老，師尊道士愍念群生，得見太平。

尔時天尊在大城中教化時，坐中有國王從坐而起，馳到天尊前，長跪叉手，白言：我等今日遇蒙天尊說法教化，安置十方，聞悟群生，不勝巍巍布囑。此經何名之也？

天尊言：此經凡有三名，一名元始大聖、二名老子、三名天尊。於是國王大臣，又諸人民，一時作礼奉行。

太上靈寶老子化胡妙經

① 按此抄本首尾殘缺，存經文一紙28行。內言太上天尊劫末降為帝師，傳經布道之事，近似《老君開天經》。部分經文見合《三洞珠囊》卷九引述《化胡經》佚文。今考此件經文與十卷本《化胡經》不同，筆迹近似S.2081，疑係同一經書。姑置於此。

② 『傳豫』原本誤作『傳豫』。

③ 『正直』原本誤作『正有』。

④ 此抄本首尾殘全，存經文138行。部分文字見於《三洞珠囊》卷九引述《化胡經》佚文。原卷下邊文字有缺損，以下方框中文字，均係整理者擬補。

⑤ 『汝耳』原本誤作『汝取』。

⑥ 按此段經文稱：『三陽地男女八百人得道，北方魏都地千二百人得道，秦川漢地二百五十人得道，長安晉地男女二百八十七人得道。』可知此經應出於東晉末北魏初，即416年晉將劉裕北伐，滅關中姚秦政權，北魏定都平城之時。作者疑即嵩山道士寇謙之。418年晉軍奔守長安，423年魏軍南下嵩洛，寇謙之託神降授《錄圖真經》，輔佐北方太平真君。其經中稱：『佛者昔於西胡得道，在三十二天為延真宮主，勇猛苦教，故其弟子皆髡形染衣，斷絕人道。』（見《魏書釋老志》）其說與此經略同。故此經當出於416至423年間，早於十卷本《化胡經》。是研究《化胡經》的歷史重要資料。

⑦ 按此段經文宣稱：劫末真君降世，彌勒衆聖治化，天下得見太平，『人民長大，无痛苦煩惱，五穀豐熟，一種三收』。此與《洞淵神咒經》所說：『李弘真君降世治天下，天下大樂，一種九收，人更益壽三千歲』云云，大致相同。《洞淵經》出於東晉末，此經亦當為同時所出。

（王卡整理點校）

014 太上老君中經

經名：太上老君中經。又名《珠宮玉曆》。撰人不詳。約出於魏晉。據稱老子傳《道德經》上下篇，而此經為中篇。原本一卷，後分為二卷。底本出處：《正統道藏》太清部。參校本：《雲笈七籤》卷十七至十八。

太上老君中經卷上

第一神仙

上上太一者，道之父也，天地之先也，乃在九天之上，太清之中，八冥之外，細微之內。吾不知其名也，元炁是耳。其神人頭鳥身，狀如雄鷄，鳳凰五色，珠衣玄黃。正在兆頭上，去兆身九尺，常在紫雲之中，華蓋之下住。兆見之，言曰：上上太一道君，曾孫小兆王

甲潔志好道，願得長生。

第二神仙

無極太上元君者，道君也，一身九頭，或化為九人，皆衣五色珠衣，冠九德之冠，上上太一之子也。非其子也，元炁自然耳。正在兆頭上紫雲之中，華蓋之下住。兆見之，言曰：皇天上帝，太上道君，曾孫小兆王甲好道，願得長生。養我育我，保我護我，毒蟲猛獸，見我皆蟄伏，令某所為之成，所求之得。太清鄉，虛無里，姓朱愚，名光，字帝卿，乃在太微勾陳之內一星是也，號曰天皇大帝耀魄寶。兆常念之，勿忘也。人亦有之，常存之眉間，通於泥丸，炁上與天連。

第三神仙

東王父者，青陽之元炁也，萬神之先也。衣五色珠衣，冠三縫，一云三縫之冠。上有太清雲曜五色，治於東方，下在蓬萊山。姓無為，字君鮮，一云君解。人亦有之，在頭上頂巔，左有王子喬，右有赤松子，治在左目中，戲在頭上。其精氣上為日，名曰伏羲。太清

鄉，東明里。西王母，字偃昌，在目為日月，左目為日，右目為月。目中童子字英明，王父在左目，王母在右目，童子中央，兩目等也。兆欲修真，當念東王父、西王母正在頭上，有三人並立，乃合日月精光，下念紫房、太一、絳宮、黃庭、太淵、丹田，行其真氣五周，施于腹中，復行氣十二周，施于一身中。道畢，即止朱雀闕門。闕門，兩乳是也。左乳曰君阿，右乳曰翁仲。當兩乳下有玉闕，天狗、天鷄在其上，主晨夜鳴吠。

第四神仙

西王母者，太陰之元氣也，姓自然，字君思。下治崑崙之山，金城九重，雲氣五色，萬丈之巔。上治北斗，華蓋紫房，北辰之下。人亦有之，在人右目之中，姓太陰，名玄光，字偃玉。人須得王父王母護之兩目，乃能行步，瞻視聰明，別知好醜，下流諸神，如母念子，子亦念母也。精氣相得，萬世長存。夫人兩乳者，萬神之精氣，陰陽之津洩也。左乳下有日，右乳下有月，王

父王母之宅也。上治目中，戲於頭上，止於乳下，宿於絳宮、紫房，此陰陽之氣也。

第五神仙

道君者，一也，皇天上帝，中極北辰，中央星是也。乃在九天之上，萬丈之巔，太淵紫房宮中，衣五色之衣，冠九德之冠。上有太清元氣，雲曜五色，華蓋九重之下。老子、太和侍之左右。姓制皇氏，名上皇德，字漢昌。人亦有之，在紫房宮中，華蓋之下，元貴鄉，平樂里，姓陵陽，字子明，身黃色，長九分，衣五色珠衣，冠九德之冠。思之長三寸，正在紫房宮中，華蓋之下。其妻太陰玄光玉女，衣玄黃五色珠衣，長九分，思之亦長三寸，在太素宮中，養真人子丹。稍稍盛大，自與己身等也。子能存之，與之語言，即呼子上謁道君。道君者，一也。乘雲氣珠玉之車，驂駕九極之馬，時乘六龍以御天下。子常思之，以八節之日及晦朔日，日暮夜半時祝曰：

天靈節榮，真人王甲願得長生，太玄之

一，守某甲身形，五藏君侯，願長安寧。

第六神仙

老君者，天之魂也，自然之君也，常侍道君在左方。故吾等九人九頭君也，吾爲上首，作王父，餘人無所作也。人亦有之，金樓鄉，小廬里，姓皮，名子明，字藍藍，衣青衣，長九分，把芝草，持青幡，侍道君在左方，從仙人仲成子。思之長三寸，常在己左方，正與己身等也。其妻素女，衣黃衣，長九分，思之亦長三寸。

第七神仙

太和者，天之魄也，自然之君也，常侍道君在右方。人亦有之，烏臺鄉，姓角里先生，字澗澗，衣白衣，長九分，持金劍，捧白幡，侍道君在右方，從仙人曲文子。思之亦長三寸，起坐行止，常在己右。其妻青腰玉女，衣青衣，長九分，思之亦長三寸。

第八神仙

泥丸君者，腦神也，乃生於腦，腎根心精之元也。華蓋鄉，蓬萊里，南極老人泥丸君也。字元先，衣五色珠衣，

長九分，正在兆頭上腦中，出見於腦戶目前。思之長九分，亦長三寸。兆見之，言曰：南極老人，使某甲長生，東西南北，入地上天，終不死壞、迷惑。上某甲生籍，侍於道君，與天地無極。

第九神仙

南極者，一也，仙人之首出也，上太一也，天之侯王太尉公也。主諸災變，國祚吉凶之期。上爲熒惑星，下治霍山。人亦有之，在長吳鄉，絳宮中元里，姓李，名尚，一名常，字曾子。衣絳衣，長九分，思之亦長三寸，在心中。其妻，玉女也，衣白衣，長九分，思之亦長三寸。常思心中有華蓋，下有人，赤幘大冠，絳章單衣，名曰天侯，玉帶紫綬，金印玄黃。子能見之，徹視八方，千日登仙。時候視腦中小童子，見之是也。

第十神仙

日月者，天之司徒、司空公也。主司天子人君之罪過，使太白辰星下治華陰、恒山。人亦有之，兩腎是也。左腎男，衣皂衣，右腎女，衣白衣，長九

分，思之亦長三寸，爲日月之精，虛無之炁，人之根也。在目中，故人之目，左爲司徒公，右爲司空公。兩腎各有三人，凡有六人，左爲司命，右爲司錄，左爲司隸校尉，右爲廷尉卿。主記人罪過，上奏皇天上帝太上道君。兆常存之，令削去死籍，著某長生。屬太初鄉，玄冥里。司錄六丁玉女，字道明，皆在神龜上，乘紫雲炁之車，驂駕雙鯉魚，字太成子。玄母，道母也，在中央，身之師也。主生養身中諸神，在五色雲炁華蓋之下，坐戴太白明星明月之珠，光曜照一身中。常存以八節之夜，卧祝曰：

司命司錄，六丁玉女，削去某甲死籍，更著某甲長生玉曆。

第十一神仙

中極黃老者，真人之府中斗君也，天之侯王，主皇后素女宮也。人亦有之。黃庭真人，道之父母也，赤子之所生也，已吾身也。皇后者，太陰玄光玉女，道之母也，正在脾上中斗中也。衣五色珠衣，黃雲炁華蓋之下坐，主哺養

赤子。常思兩乳下有日月，日月中有黃精赤炁，來入絳宮，復來入黃庭紫房中。黃精赤炁填滿太倉中。赤子當胃管中，正南面坐，飲食黃精赤氣，即飽矣。百病除去，萬災不干。兆常思存之，上爲真人。故曰同出而異名也。有注云：日月同出異名。太素鄉，中元里，中黃真人，字黃裳子，主辟穀，令人神明乍小乍大。常以鷄鳴，食時祝曰：

黃裳子，黃裳子，黃庭真人在于己。爲我致藥酒、松脯、粳糧、黍臠，諸可食飲者，令立至。祝訖，瞑目有頃，閉口咽之二七過，即飽矣。

第十二神仙

吾者，道子之也。人亦有之，非獨吾也。正在太倉胃管中，正南面坐珠玉床上，黃雲華蓋覆之，衣五綵珠衣。母在其右上，抱而養之，父在其左上，教而護之。故父曰陵陽，字子明，母曰太陰，字玄光玉女。己身爲元陽，字子丹。真人字仲黃，真吾之師也。常教吾神仙長生之道，常侍吾左右，休舍太

倉，在脾中與黃裳子共宿衛吾，給事神所當得，主致行厨。故常思真人子丹正在太倉胃管中，正南面坐，食黃精赤氣，飲服醴泉。元陽子丹長九分，思之令與己身等也。父母養之，乃得仙仙。常自念己身在胃管中童子，服五色綵衣，坐珠玉之床，黃雲赤氣爲帳，食黃金玉餌，服神丹芝草，飲醴泉，乘黃雲氣五色珠玉之車，駕十二飛龍，二十四白虎，三十六朱鳥，思之九年，乘雲去世，上謁道君。五方從官，凡三萬六千神，舉吾宗族，皆得仙道，白日昇天。常以四時祠吾祖先，正月亥日鷄鳴時祠郊廟，二月亥日祠社稷、風伯、雨師，四月五月申卯日，七月八月巳午日，十月十一月卯戌日，四季月不祠。但解洿土公，逐去伏尸耳。郊在頭上腦戶中，廟在頂後骨之上，社在脾左端，稷在大腸窮，風伯在八門。八門者，在臍旁五城十二樓也。雨師在小腸窮，四瀆雲氣出崑崙，弱水在胞中，諸神食厨在於太倉中。以次呼神名召之，勿忘也。

第十三神仙

璇璣者，北斗君也，天之侯王也。主制萬二千神，持人命籍。人亦有之，在臍中，太一君，人之侯王也。柱天大將軍，特進侯也。主身中萬二千神。中極鄉，璇璣里，姓王名陽，字靈子。冠三縫之冠，衣絳章單衣，長九分，思之亦長三寸，其大與自身等也。太一君有八使者，八卦神也。太一在中央，主總閱諸神，案比定錄，不得逋亡。八使者以八節之日上對太一，故臍中名爲太淵都鄉之府也。常以秋分之日案此^①筭之。齋戒沐浴，瑞^②卧三日勿出，日三呼之，三日九呼之。常如此，諸神不得逋亡，名上仙錄，定爲真人。故太一不得妄上白事，不吉則凶，但八使者耳。故以八節之日、晦朔弦望日，右手拊臍二七，左手拊心三七，祝曰：天靈節榮真人，某甲願得長生，太玄真一守某甲身形，五藏諸君侯願且安寧，公兆七遍，庶兆二十。明日平旦，復祝曰：太一北極君，敬守告諸神，常令魂魄安

寧，無離某甲身形。此所謂拘魂制魄者也。常以十二月晦日人定時，向月建太一於空室中，再拜正坐，瞑目祝曰：五藏之君，魂魄諸神，某乞長生，無得離身，常與形合，同成爲一身。男女各三通，常以八節日於室中，向其王池^③再拜，瞑目祝曰：

大道鴻滓鴻滓，天節之日，萬兆魂魄皆上諸天，真人身與神合，某甲欲得長生，獨在空室之中，不豫死籍數。男女各三遍。常以十二月晦日宿夜晝朝至平旦，於室中向寅地再拜，祝曰：鴻滓鴻滓，某受大道之恩，太清玄巔，願還某甲去歲之年，魂魄保身。男女各三通。

第十四神仙

臍者，人之命也，一名中極，一名太淵，一名崑崙，一名特樞，一名五城。五城中有五真人。五城者，五帝也。五城之外有八吏者，八卦神也。并太一爲九卿。八卦之外有十二樓者，十二太子，十二大夫也。并三焦神合爲

二十七大夫。四支神爲八十一元士。故五城真人主四時上計，八神主八節日上計，十二大夫主十二月，以晦日上計。月月不得懈怠，即免計上事。常當存念留之，即長生矣。故太一常以晦朔、八節日夜半時，五城擊鼓，集召諸神，校定功德，謀議善惡，有錄者延命，衆神共舉，無錄者終亡，司命絕去生籍。故常以晦朔、八節之日夜欲卧時，念上太一、中太一、下太一、五城、十二樓真人，祝曰：

天帝太一君，天帝太一君，敬存諸神，與之相親，司錄司命，六丁玉女，削去某死籍，著某生文，皆當言長生。

第十五神仙

五城真人者，五方五帝之神名也。東方之神名曰句芒子，號曰文始洪崖先生，東方蒼帝東海君也。南方之神名曰祝融子，號曰赤精成子，南方赤帝南海君也。西方之神名曰蓐收子，號曰夏里黃公，西方白帝西海君也。北方之神名曰禺強子，號曰玄冥子昌，北方黑帝北海君也。此皆后神也，天地

人神等耳。風伯神名吒君，號曰長育。雨師神名馮修，號曰樹德。諸神常當存念之，令與司命君、司錄君共削去某死籍，即爲真人長生矣。不與相知存念之，即爲疾風暴雨、雷電霹靂持子遠去，殺子之身，埋子深山，投子深淵，或爲毒氣所中，衆鬼害人。子欲爲道，宜致敬之。此神能害人，王者之治，不可不知也。中央之神名曰黃裳子，號曰黃神彭組^①，中央黃帝君也。與中太一並治度人命，愛養善人，成就人，常侍黃天真人。人亦有之，常侍真人，名曰子丹，給神所得。兆欲志道，常思念之，即不飢渴，長生久視，上爲真人，能致行厨，役使鬼神。社稷、河伯之神，名曰馮夷，號曰元梁使者。

第十六神仙

八卦天神下遊於人間，宿衛太一，爲八方使者，主八節日上計，校定吉凶。乾神字仲尼，號曰伏羲。坎神字大曾子。艮神字照光玉。震神字小曾子。巽神字大夏侯。離神字文昌。坤神字楊翟王，號曰女媧。兌神字一世。注：一云字

八世。常以八節之日存念之，其神皆在臍中，令人延年。

第十七神仙

丹田者，人之根也，精神之所藏也，五炁之元也，赤子之府，男子以藏精，女子以藏月水。主生子，合和陰陽之門戶也。在臍下三寸，附著脊膂，兩腎根也。丹田之中，中赤，左青，右黃，上白，下黑，方圓四寸之中。所以在臍下三寸者，言法天地人。天一、地二、人三、時四，故曰四寸。法五行，故有五色。清水鄉，敖丘里。丹田名藏精宮，神姓孔，名丘，字仲尼，傳之爲師也。兆常以夜半存心之，赤炁上行至絳宮、華蓋，各右繞之。太一入黃庭，滿太倉，養赤子，復入太淵，忽忽不知所在。復念太一，炁還入丹田中止。常念太一玄光道母養真人子丹，正吾身也，自兆名也，勿忘之。

第十八神仙

大腸、小腸爲元梁使者，主逐捕邪氣。三焦關元爲左社右稷，主捕奸賊。上焦元氣上入頭中爲宗廟，兆身與天

地等也。天地萬物不可犯觸也，天地之神則知之矣，而人身體四支亦不可傷也。有痛癢者，神亦知之。由是言之，昭然明矣。天不可欺，地不可負，修身慎行，勿令懈怠也。兆欲除邪氣、治百病，啄齒三七過，祝曰：

左社右稷，元梁使者，逐捕灾殃，急急如律令。五咽一呪，三十咽止。一日一夜三百^⑤六十咽。三十日邪氣去，六十日小病愈，百日大病愈，三蟲皆死，三尸走出，面目生光，與神爲友。六祝一止，十二爲之一周。

第十九神仙

兩腎間名曰大海，一名弱水，中有神龜，呼吸元炁，流行作爲風雨，通氣四支，無不知者。上有九人，三三爲位，左有韓衆，右有范蠡，中有大城子；左爲司徒公，右爲司空公，中有太一君；左有青腰玉女，右有白水素女，中有玄光玉女。玄光玉女者，道元氣之母也。左有司錄，右有司命，風伯雨師，雷電送迎，仙人玉女，宿衛門戶，故名曰太淵之宮。先正紫房宮太一玄女

赤子，故玄女常戴太白明星，耳著太明之珠，光照一身中，即延年而不死也。

第二十神仙

胃爲太倉，三皇五帝之厨府也。房心爲天子之宮，諸神皆就太倉中飲食，故胃爲太倉，日月三道之所行也。又爲大海，中有神龜。神龜上有七星北斗，正在中央。其龜黃色，狀如黃金盤，左右日月照之。故臍下爲地中，中有五嶽四瀆，水泉交通，崑崙弱水，沈沈滉滉，玄冥之淵也。日月之行，故天晝日照於地下，萬神皆得其明。人亦法之，晝日下在臍中，照於丹田，臍中萬神皆得其明也。夜日在胃中，上照於胸中，萬神行遊嬉戲，相與言語，故令人有夢也。天不掩人不備，故召其神問善惡吉凶之事，令賢者自慎也。夜月在臍中，下照於萬神。晝月在胃中，上照胸中。萬神更相上下，無有休息。故胃中神十二人，諫議大夫名曰黃裳子、黃騰子、中黃子，主傅相太子。玄光玉女主取金液、神丹、芝草、玉液、松脯，諸可飲食者立至矣。

第二十一神仙

兆審欲得神仙，當知天地、父母、赤子處。兆汝爲道，不可不知此五神名也，當自苦耳。知之行之，堅守之，常念之，即神仙矣。經中俱有，但當心解耳。既知其神，當須得太一神丹金液，乃得神仙耳。諸神元炁，虛無無爲，自然爲聖人耳，不爲俗人所施也。兆不能服神丹金液，勞精思念，當自苦耳。故謂兆汝晝日常念臍中有日，赤黃精炁光明照于臍中。胃中有月，白光赤黃精炁填滿胃中。暮卧念日在胃中，赤黃精炁光明照於胸中。月在臍中，赤黃白光精炁照於臍中。以此爲常，萬世無止。

第二十二神仙

頭髮神七人，七星精也。神字祿之。兩目神六人，日月精也。左目字英明，右目字玄光。頭上神三人，東王父也。腦戶中神三人，泥丸君也。眉間神三人，南極老人元光天靈君也。兩耳神四人，陰陽之精也，字嬌女。鼻人中神一人，名太一，字通盧，本天靈

也。口旁神二人，厨宰守神也。口中神一人，太一君也，字丹朱。頤下神三人，太陰神也。頸外神二人，玉女君也。兩手中神二人，太陽之精也，字魂陰。項中神二人，字上間也。肩背神二人，少陰少陽之精也，字女爵。胸中神二人，虎賁神也。兩乳下，日月也。日月中有大神各一人，王父母也。兩腋下神二人，魂魄兆神也。小腹中神二人，玉女也。兩脛內神二人，亦玉女也，字陰隱。兩脛神二人，金木神也，字隨孔子。兩足神二人，太陰之精也，字柱天力士。頭髮神，字祿之。兩耳神，字嬌女。兩目神，字英明玄光。鼻孔中神，字通盧。口神，字丹朱。肩背神，字朱雀，一云字女爵。兩手神，字魄陰。上元神，字威成子。中元神，字中黃子。下元神，字明光子，一云字命光。陰神，字窮英。兩脛神，字陰隱。兩膝神，字樞公。兆欲卧，瞑目，從上次三呼之，竟，乃止。其有病痛處，即九呼其神，令治之。百病悉去，即爲神仙矣。

第二十三神仙

肺神八人，太和君也，名曰玉真宮，尚書府也。其從官三千六百人，乘白雲炁之車，驂駕白虎，或乘白龍。心神九人，太尉公也，名曰絳宮，太始南極老人元光也。其從官三千六百人，乘赤雲炁之車，朱雀爲蓋，丹蛇爲柄，驂駕朱雀，或乘赤龍。肝神七人，老子君也，名曰明堂宮，蘭臺府也。其從官三千六百人，乘青雲炁之車，驂駕青龍，或乘白鹿。膽神五人，太一道君也，居紫房宮，乘五彩玄黃紫蓋珠玉雲炁之車，驂駕六飛龍。從官三千六百人。脾神五人，玄光玉女，子丹母也。乘黃金珠玉雲炁之車，驂駕鳳凰，或乘黃龍。從官三千六百人。真人子丹在上，卧胃管中，黃雲炁爲帳，珠玉爲牀，食黃金玉餌，飲醴泉玉液，服太一神丹，嗽玉李芝草，存而養之，九年成真矣。千乘萬騎，上謁太上黃道君，東謁王父，西謁王母，南謁老人元光之前，真人得道，與天地合。元陽子丹者，吾也。吾道成乃去，白日昇天，或乘黃金

雲炁珠玉之車，驂駕六飛龍，轡無極之馬，從官凡萬八千人。天師大神使萬八千人來下著吾身，合三萬六千人，故能白日昇天也。胃神十二人，五元之炁，諫議大夫也。臍中神五人，太一人，凡十三人。合二十五人，五行陰陽之神也。神龜之上神三人，玄女、虛無、道母也。腎神六人，司徒、司空、司命、司錄、司隸、校尉廷尉卿也。乘神龜之車，駕六鯉魚，一云白魚，玄白雲炁之蓋。丹田神三人，人之根也，三合成德，以應道數也。三焦神六人，左社右稷，風伯雨師，雷電霹靂也。大腸、小腸神二人，爲元梁使者。虎賁神二人，爲力士，在朱雀闕門，延年益筭爲齡，下侍真人鳳凰閣。玄谷神五人，大將軍司馬也。陰神三人，上將軍也，萬神之精也。男子字窮英，女子字丹城。天之神萬八千人，人之神萬八千人，都合三萬六千人，共舉一身昇天，即神仙矣。

第二十四神仙

東方之神女名曰青腰玉女，南方

之神女名曰赤圭玉女，中央之神女名曰黃素玉女，西方之神女名曰白素玉女，北方之神女名曰玄光玉女。左爲常陽，右爲承翼，此皆玉女之名也。五行之道，常以所勝好者爲妻。假令今日甲乙木，木勝土，則甲以己爲妻。故言甲己、乙庚、丙辛、丁壬、戊癸，此皆夫妻合會之日也。言肝膽木也，木帝以中宮戊己素玉^⑥爲妻。他皆效此。此二神玉女之來，敬而侍之，慎無妻也。妻之殺人，終不得道也。兆欲爲道，慎勿淫，淫即死矣。此玉女可使取玉漿，致行厨也。

第二十五神仙

太上神字元光太一君。其欲得太一之神也，非心神也，乃天神南極老人元光也，下在人心中心中。常以平旦、日中、甲午日、丙午日、呼之曰：南極老人元光太一君，某甲欲願得太一神丹長生之道。因瞑目念心中太一童子衣絳章單衣，其色正赤黃如日，九十息頓止。心中神字光堅，中太一中極君也。在脾中，主養兆身。常以鷄鳴、食時、

日西黃昏時、辰戌丑未日呼之曰：中極光堅太一君，某甲欲得真人神仙黃庭之道。因瞑目默念黃炁滿太倉胃管中，脾上有一黃人，五十息頓止。心下神字玄谷，北極君也，玄光道母也。常以夜半時、甲子、丙子、戊子、庚子、壬子日，呼之曰：北極君玄谷道母，某甲願欲得金液醴泉可飲食者。因瞑目念腎間有白炁，中有神龜，龜上有玄女，女右有司命，左有司錄，見之呼曰：司命司錄，六丁玉女，削去某甲死籍，著玉曆生錄，皆當言長生。故曰：能知三神字，可以還命延年。此三神者，乃天地神道君三元君字也，人之先也。常念勿忘也。三元，天之貴神是也。

第二十六神仙

子欲爲道，當先歷藏，皆見其神，乃有信。有信之積，神自告之也。先念天靈君。天靈君青身白頭，正在眉間，思之三日，即見其神。念玄膺，狀正赤生光，念咽喉中正白如銀，環十二重。凡三日，念遍。乃念肺色正白，名曰鴻鴻，七日。念心色正赤，名曰响

响，九日。念肝色正青，名曰藍藍，三日。念膽色正青，名曰護護，三日。念脾色正黃，名曰俾俾，五日。念胃色正黃，名曰旦旦，五日。念腎色正黑，名曰灑灑，三日。念臍中太一色赤，名曰玉靈子，三日。念大腸正白色，名曰胴胴，一作洞洞，七日。念小腸色正赤，名曰契契，九日。念丹田色正赤，中有赤人，名曰藏精，三日。念玄丈方丈，其中有人到住，七日。念金玉印乾燥完堅，三日。念玄英正黑，潤澤有光，三日。念兩脾，一作脞，左右脾內各有一玉女，衣絳帔襦、青裙，正立兩脞上，三日。念兩足下各有一人，正白，三日。念爲道竟矣，不出靜室，辭庶俗，赴清虛，先齋戒，節飲食，乃依道而思之。

第二十七神仙

子審欲爲道，神仙不死，當先去三蟲，下伏尸。三日百六十息，食氣三十通一止，九十通一休息，日四爲之。常夜半鷄鳴時祝曰：東方青牙，紫雲流霞，飲食青牙，服食

朝華。三咽之。南方朱丹，煥耀徘徊，服食朱丹，飲以丹池。三咽之。中央黃炁，黃庭高仙，服食黃炁，飲之醴泉。三咽之。西方明石，皓靈金質，服食明石，飲以金液。三咽之。北方玄滋，玄珠潤滋，服食玄滋，飲以玉飴。三咽之。如此三十日，三蟲皆死，伏尸走去，而三神正炁自安定，伏尸不敢復還兆身中，即神仙不死，玉字金名，乘雲而上昇。

太上老君中經卷上

- ①「此」，《雲笈七籤》卷十八《老子中經》作「比」。
- ②「瑞」，《雲笈七籤》本作「靜」。
- ③「池」，《雲笈七籤》本作「地」。
- ④「組」，《雲笈七籤》本作「祖」。
- ⑤「百」，原作「日」，據《雲笈七籤》本改。
- ⑥「玉」，《雲笈七籤》本作「女」。

太上老君中經卷下

第二十八神仙

常以六甲之日平旦時拊心祝曰：蒼林玄龜，流水如何^①，炎火周身，身一作宮。安能知他，道來歸己，道來歸己。因念肝色正青，潤澤生光，其上高危，在左方。次念膽色正青圓，中黃外青，潤澤清洌，傍生拊心，著肝，肝覆其巔，此道之始也。念之既畢，乃呼其神曰：肉一本作皮。子藍藍，與己爲友，留爲己使。某欲得太一神丹服食之，令某甲長生，勿去某身，常在紫房宮中，與道合同也。因瞑目念日精青炁來下著身，入鼻孔中，念肝色青炁與之合於目前，來入口中，咽之三七而止。思行青炁周徧一身中，九十息止。至乙日復存其神，呼曰：太一紫宮一作紫房素女，與己爲友，留爲己使。某甲欲得太一華符服之。至甲寅、乙卯之日，復存之。

第二十九神仙

常以六丙之日禺中時，拊心祝曰：朱雀丹液，天海地河，願求不死，服食天和。天和，一作至和。因瞑目念心色正赤如日，在肺葉間，乃止。念日精赤黃炁來在目前，入口中，咽之三九而止。思行赤炁周徧一身中，百八十息止。呼其神曰：李尚、李尚，一作李常。曾子，與己爲友，留爲己使。某甲願求太一神丹，如金鈞可飲食者，常在絳宮中，與己合同。至丁日復存其神，呼曰：天皇絳宮玉女，與己爲友，留爲己使。某甲欲得天皇長生之道。至丙午、丁巳之日，復存之。

第三十神仙

常以六戊之日鷄鳴時，日西黃昏時，拊心祝曰^②：天道天道，願得不老。壽比中皇，昇天常早。願延某命，與道長久。因螟目念脾中黃炁來上至口中，上念天精黃炁來在目前，入口中咽之，三五而止。思行黃炁周徧一身中，百五十息止。

呼其神曰：玄光玉女，養子赤子，真人子丹，服食元炁，飲宴醴泉。故言一身神有父母凡三人。至己日復存之，呼其神曰：真人黃庭玉女，與己爲友，留爲己使。某甲欲求真人黃庭神仙之道。至戊辰、己未、戊戌、己丑之日，復存之。

第三十一神仙

常以六庚之日日晡時，拊心祝曰：本子本子，白雲卒起，霧合萬里，願雲來歸己，常爲我使，反復仙命，終而復始。因瞑目念肺色正白，令白炁來上至口中，念曰：天精白炁，來下在目前，入口中咽之，三七而止。思行白炁周徧一身中，百四十息止。呼其神曰：先生灑灑，與己爲友，留爲己使，奉持華蓋，金液玉英，常在勿出，侍我道君，共合爲一身。至辛日復存其神曰：光黃玉堂，青腰玉女，與己爲友，留爲己使。某甲欲得彭祖長生不死之藥服之。至庚申、辛酉之日，復存之。

第三十二神仙

常以六壬之日夜半時，拊心祝曰：

願睹天鏡，玄滋玉池，還白使黑，常爲嬰兒。神來歸己，五藏相隨。因瞑目念兩腎間白炁周行一身中十二徧，翕然布散，流行四肢。乃復念兩腎魏隗，狀如雙鯉魚，右黑左赤，俠脊而居，炫耀光明，相照一身中。乃念青天太清元炁下在目前，入口中，咽之，一九而止。思行太清白元炁周徧一身，還藏丹田中，呼其神曰：司錄六丁玉女，削去某死籍，使某甲長生，上爲真人，十二太一皆當言生。至壬子、癸亥之日，復存之。

第三十三神仙

所存念五臟神皆畢，乃更念玄釐、玉英、金液，恒勿忘也。更念玄釐，欲其潤澤而起行列也。別念玉英，其中有一人，大面倒豎，小童子服飾也。存之欲令堅強，長大自倍也。念金液，欲令其乾燥而緩也，如紫殼盛水銀也。念此盡徧，而復存之，法十二周，精神

處之，和炁自來，百病去除，壽命與天地期，長生無極，安知死時？

第三十四神仙

食日之精，可以長生。緣茲上天，上謁道君。其法常以月一日、二日、五日、七日、九日、十一日、十三日、十五日，日初出時，披髮向日，瞑目念心中有一小童子，衣絳衣，文彩五色，灼灼正赤，兩手掌中亦正赤，以兩手掌摩面，下至心止，十二反爲之。念天日精正赤黃炁來下在目前，存入口中咽之一九。以手摩送之，拊心祝曰：

景君元陽，與我合德，俱養絳宮中小童子。須臾復念心下至丹田中止，以手摩送之，以日託心，心得日精，已乃神仙矣。

第三十五神仙

食月之精，以養腎根，白髮復黑，齒落更生，已乃得神仙。常以夜半時思腎間白炁周行一身中，上至腦戶，下至足心。自然之道，易至難行。常以月十五日，向月祝曰：月君子光，與我合德，養我丹田中小童

子。因瞑目念月白黃精氣來下在目前，入口中咽之，三七而止。以手摩送之，下至丹田之中。丹田中氣正赤，氣中有一人，長九分，小童子也。衣朱衣，故丹田中赤外黑，左青右黃，上白，五色氣已俱。但以其月託腎，腎得月精，乃得陞沉。丹田中赤者，太陽之精也，心火之炁也。其外黑者，太陰之精也，腎水之氣也。其左青者，少陽之精也，肝木之氣也。其右黃者，中和之精也，脾土之氣也。其上白者，如銀盤而照覆之者，少陰之精也，肺金之炁也。其中有五人，即五臟之太子也，五行之精神也。人須得丹田成，乃爲真人。故生子仁者，肝之精也。禮容者，心之精也。義慧者，肺之精也。和樂者，腎之精也。忠信篤厚者，脾之精也。辯勇者，膽之精也。緩和者，膽之炁衰也。盲者，肝之炁衰也。懦者，肺之炁衰也。癩者，心之氣衰也。濡者，腎之氣衰也。不肖暗聾者，脾之氣衰也。其五臟衰者，皆自見於己也。憂悲不樂則傷肝，傷肝則目暝頭白，當思腎心

以養之。淫樂過度即傷腎，傷腎則腰疼痛，身沉重，大小便膿血，思肝肺^③以養之。恚怒則傷心，傷心則病強^④。吐血，思肝脾以養之。遭患憂難則傷肺，傷肺則思脾腎以養之。飲食絕飽，酒醉過度則傷脾，傷脾則思心肺以養之。令其子母相養之，即病愈疾除。求神仙之人，惡傷五藏，學士明照之。

第三十六神仙

食太極之精，乃得長生。常以六戊之日，時加其辰，辰一作神。道士於室中冠帶，北向再拜，曰：皇天上帝，太上道君，曾孫小兆王甲好道，願得長生。暮夜卧，上念北斗太極中央大明星精，正黃炁來下在兆目前，入口中咽之，三五而止。黃精炁填滿太倉黃庭中，下至丹田中。乃念絳宮中有一赤人，紫房宮中有五人，太一君在其中，老子、仙人仲成子在左，太和、曲文子在右，明堂宮中有玄光玉女，左有黃裳子，右有中黃真人，俱宿衛真人子丹也。乃復下念玉堂三公，呼曰：司錄六丁玉女，削去某甲死籍，令某甲長

生。炁定，乃復念真人子丹在胃管中，祝曰：

玄光玉女，養我真童子丹，服食元炁，飲嚙醴泉。以北斗中極託脾，脾得斗極之精，乃為真人。

第三十七神仙

肺為尚書，肝為蘭臺，心為太尉公，左腎為司徒公，右腎為司空公，脾為皇后、貴人、夫人，膽為天子、大道君，胃為太倉，太子之府也，吾之舍也，大腸小腸為元梁使者，下元氣為大鴻臚，中元氣為八十一元士，上元炁為高車使者，通神於上皇。故肺為玉堂宮，心為絳宮朱雀闕門，腎為北極幽闕玄武掖門，脾為明堂侍中省閣也。胃為上海，日月之所宿也。臍為下海，日月更相上下至胃中。故太初者，元炁之始也，道也，一也。心上為天。太始者，為萬物之始也，山川也，地也，為腎。太素者，人之始也，精也，脾也，土也。上亦有三宮，兩目為絳宮，兩耳為玉堂宮，鼻口為明堂宮。眉間為郊山，能合三元炁以養其真人小童子，則列

然徹視矣。

老君曰：萬道衆多，但存一念子丹耳。一，道也。在紫房宮中者，膽也。子丹者，吾也。吾者，正己身也。道畢此矣。

第三十八神仙

道士鍊水銀，消沙液、珠玉、八石，以作神丹，服一刀圭，飛昇天宮。身常食氣，乃得長生神仙。存神食丹，乃為真人。真人得道，上佐上皇治。故真人以水土溟溟浩浩，天地潰潰濛濛，不知所存藏，萬八千歲，乃成天地人。故真人以土作人，呼吸飲食，從騎伏使，令土不得獨處，人不得獨存，故言黃土本人之先也。真人去之，上昇九天。世人無道，下入黃泉。益土三升，子一作了。無骨筋。一本作助。故九天丈人有言曰：食於天者，以身報天，上為真人。神仙戲游。食於地者，以身報地，下為尸鬼。食於人者，以身報人，骨毛棄捐。兆欲為道，勿食飛鳥，天之所生，殺之數數，減子壽年。人畜食之，可以為厨宰六畜也。避六丁神，獸類也，勿

食。丁卯兔也，丁丑牛也，丁亥猪也，丁酉鷄也，丁未羊也，丁巳蛇也，此大禁之，六丁神之諱也。乘炁服丹入室之時，無食生物，禁食五畜肉。五畜肉者，馬牛羊猪狗也。但得食鷄子、魚耳。禁食五辛，臭惡自死之物，慎勿食。服丹尚可，乘躋禁之。

第三十九神仙

道者，吾也，上上中極君也。兆常以日出時、日中時、酉時、夜半時，一云日申酉。上念太極中央太黃星，其精氣來下在兆額上眉間止，正赤黃白如日狀，以意致之下入口中，咽之，令其氣下入絳宮紫房黃庭中，咽之三五而止。祝曰：皇天上帝，太上道君，曾孫小兆某甲好道，願得長生。此吾之氣也，吾從此氣生。念之萬遍，無止也。令兆長生，上爲真人，雲車下迎，飛昇天宮，上謁上帝南極老人元光之前。

老君曰：聖人銷珠，賢人水玉。

銷珠、水玉，其道同法。銷珠者，服日之精。左目，日也。水玉者，食月之精。右目，月也。被髮正偃卧，瞑目，

常念兩目中黃精赤氣來下入口中，咽之，三九而止。令人神明，徹視八方。食肺之精，常念肺中白氣來上出至咽喉，入口中，咽之，三七而止。令人神明，身生光澤，辟邪致神，玉女侍之，即長生，辟百鬼矣。常念身中小童子衣絳衣，在中央。中央即神明也。時念心中有紫華蓋，下有一人，著赤幘大冠，絳單衣，銜箭引弩，憤然而噴，即能辟兵，役使鬼神矣。

第四十神仙

常思頂中紫雲出如車蓋，狀如火氣，文彩五色，上與天連，以意極布之，與天相率下。念胃中黃氣如橘，忽長稍大，身形如日。念目下元氣赤人、黃人，道氣行布四肢，登高入日中，登高一作登臺。上至絳宮紫房太一。祝曰：太一北極，敬告諸神，常令魂魄安寧，無離某甲身。是謂自然無形者也。

第四十一神仙

鬼箭十二，可以辟兵。常思心中十二芝莖，上與肺連。以意挹之，名曰鬼箭。兆常行之，五兵自辟，凶惡自

亡。以擊四夷，捐擄電光。但間兵楯、刀戟、金銀，天神皆助真也，雷公擊鼓也。太白揚光，白帝持弩，蚩尤辟兵，青龍守門，武夷在庭，騰蛇玄武，主辟凶殃，白兔擣藥，蟾蜍在傍，太一和劑，彭祖先常^⑤。服一刀圭，面日生光。身出毛羽，上謁上皇。此道也，使諸神氣與子合同，慎之，勿解殆也。

第四十二神仙

常以庚申之日申時，被髮，西南首，申地偃卧，縱體，瞑目，念肺正白，潤澤光明，中有芝草，莖大如小指，其中空而明，下與心相連。其中有青赤氣上下交通，出心入肺之中。念之至下，晡時止。肺者，人之天也。心者，人之日也。日氣上出如赤丹之精，未嘗有之時，人須得此氣以生耳。失此氣者，則死矣。名曰自然之道。道通神靈矣。

第四十三神仙

常念心中赤氣如日，內青外黑，三合成德，以應道數。師曰：常以平旦，念心中正赤如日。日中有人，著大冠

赤幘，衣絳單衣。兆見之，呼曰：天皇太一君，使某甲長生爲真人。

第四十四神仙

還精絳宮之中法：常以月一日、十五日、晦日，以日初出時，被髮，東首向日卧，以兩手摩兩乳間，下至心，九反而止。柑心言曰：神首神還絳宮，無離己身。神乎安，居靜處，與己言語。如此三，乃止。師曰：每摩兩乳間者，使氣上下通也。拊摩其心，存小童子，此名虛無。還精絳宮者，月三日爲之也，神仙之道也。

第四十五神仙

元陽赤人，太一也。元陽道君，中太一也。元陽子丹，己吾身也。元陽玄光玉女，道之母也。元陽皇人，太一王也。元陽丹田，藏精宮也。師曰：元者，氣也。陽者，日也。當思心中有日，日有赤人，著赤幘大冠，衣絳單衣。次思膽中有太白明星，三光耀而相照。星上各有一人，衣絳朱衣，冠九德之冠。道君在中央，左有老子、仲成子，右有太和、曲文子，凡五人，是一也。

次念脾上正黃，中有日，日中有三人，道母玄光玉女在中央，左有黃裳子，右有中黃直。次念胃管中有真人子丹，坐珠玉之牀上，黃金色雲氣爲帳，玉女小童子侍之。次念臍中太一，衣五綵朱衣，冠三絳之冠，左青人，右有白人，前有赤人，後有黑人。次念丹田中有赤氣，赤氣中有三人，赤人在中央，左有青人，右有黃人，赤氣繞之，內青外黑，上白中黃。念此畢，卧有所見，神氣來語人也。

第四十六神仙

常念脾中有黃氣，升上至口中，咽之，三五而止，即飽矣。可以辟穀，坐在立亡。師曰：常思脾中有日，日中有黃金匱，匱中有書，封之以黃玉印，印廣三寸，字曰威喜。精而思之，則邪自出。兆能見而讀之，心開目明，即時神仙矣。

第四十七神仙

常思念胃中正白如凝脂，中有黃氣，填滿太倉，上至口中，咽之即飽。師曰：胃者，太倉也。諸神皆就太倉

中飲食。中黃金釜，金甌，玉女小童，主給使之。故呼曰黃裳子，致行厨矣。

第四十八神仙

腎者，元氣之根也。常思腎間白氣，上升至頭中，下至足心十指之端，周行一身中十二遍而止。手足皆熱，可以不飢、不渴、不寒，令人不老，白髮復黑。兆常念行之。

第四十九神仙

常以月朔、望日，思兩腎間白氣，上頂中，下至足心。神龜五彩爲甲，文若總系。上有玄光玉女，二公相對坐，前有太一，後有玄冥司錄、司命，共議死生人。精念之，三十息止。呪曰：司錄君，司命君，六丁玉女，削去某死籍，著上生文，此當言長生。神龜呼吸，吐故納新，恣意所爲。白龜之神，元氣布行，四肢皆溫。人須得腎氣，神龜呼吸乃生耳。常以甲子日及壬子日存行之，即長生矣。

第五十神仙

常以甲午之日日中時，被髮，南首，偃卧，瞑目，念臍下三寸丹田中黃，

其氣正赤，大如手掌，其外黑，次其外青。臍上有白氣覆之，肺氣也。左有青，右有黃，各大如手掌。此三者，肝氣、脾氣、肺氣。師曰：丹田中赤者，太陽氣。其外黑者，太陰氣。次外青者，少陽氣。三合成德，三氣守之，即長生矣。

第五十一神仙

心爲虛，腎爲元。虛氣以清上爲天，元氣以寧下爲地，入於太淵。故虛氣生爲呼，元氣生爲噏。心爲日，腎爲月，脾爲斗。心氣下，腎氣上，合即爲一，布行四肢，不休息。故心爲血，腎爲氣，合即流行，名曰脉。脉者，魂魄，人之容也。魂魄以去，主人寂寂。故百脉盡，即氣絕，氣絕即死矣。是以爲道者，不可不存其神，養其根，益其氣。兆汝努力努力，將去矣。真人得道，萬八千歲一會。道士得道，千歲一會。故作《中經》，以遺後世。本上皇藏之金匱，道人得，千金勿傳出也。

第五十二神仙

三元之日會合於己亥。三元者，

太一、太陰、宮氣是也。三元俱起己亥。太一左行，歲一辰。害氣右行，四孟，歲行一孟。太陰右行，三歲一辰，九年行方，四九三十六年。三元俱合於亥。三合之歲，水旱兵飢，災害並起。三合之歲，陰陽隔并，感天動地，

害氣流行，晝行則傷穀，中有人即疾疫，中穀即飢貴。兆汝居其間，不能自生也。可不努力勉時學道哉！當期之世，水旱蝗蟲，五穀飢貴，兵革並起，人民疾疫，道路不通，負老提幼，散流他方，其父母妻子兄弟，哀氣內發，摧肝絕腸，略爲奴婢，不知縣鄉。於期乃欲學道，豈不晚哉，豈不晚哉。吾深戒子，存神作丹，早自防，即遭亂世，遠去深藏。聖主明世，道可照而行也。故天地之會，四十五歲一小貴，九十歲一小飢，一百八十歲一大貴，三百六十歲一大飢。五百歲，賢者一小聚^⑥，千歲，聖人一小聚，三千六百歲，聖大會。萬八千歲，真人一小出治。三萬六千歲，至極仙人一出治，三百六十萬歲，天地一大合。元氣溟滓，濛鴻元形，人爲萬

物，不知東西南北。人化爲禽獸，禽獸化爲人。真人乃在元氣之上，仙人乃在絕域無崖之際，道人隱居，可以貴重也。

第五十三神仙

天都京兆，合在勾陳之左端，號曰安德君，主與天太一北君共算計說諸神，主人魂魄，會於南極。有錄者延壽，衆神共舉之。無錄者終矣，司命絕去^⑦之人，魂魄會於北極。有功德於人、天地、萬物者，子孫富貴、壽考、鮮明，身得封侯，復出爲人。無德者有三：一曰殘賊酷虐，害逆天地四時；二曰呪詛、嫉妬、淫泆，慢易天地神靈；三曰不孝不忠，盜竊陰賊，推埋殺人。犯此三者，子孫絕滅。人生自有三命，至聚^⑧婦嫁女，復定其一命。移徙葬埋，復定其一命。得吉身者，壽考，子孫富貴。得凶者死，子孫貧困屯。汝居世間，當何著于天地？神可畏也。故天置日月、北斗、二十八宿，五星主之，六甲六丁諸神主行民間。兆汝不知，汝甚可畏之。常復有邪鬼

精魅，至於家鬼，不祥里社，水土公司命門戶、井竈、清溷、太陰水瀆，皆能殺人者。兆汝欲却邪辟鬼，當被符，次服神藥。符者，天地之信也。藥者，人之丹也，益其氣力，身輕堅強，即邪氣官鬼不能中人也，即成神仙矣。鬼者，神之使也。鬼見天信，即去矣。人亦有之，京兆舍中極鄉璇璣里，夏里黃公，字德皇，正在臍中央，太一是也。一名玉靈子，衣五彩朱衣，總閱黃神。常以八月秋分之日，案比計筭。常先之一日，後之一日，正節之日，凡三日，入室勿出。常以鷄鳴時思之，平旦召說之，至日禺中時止。爲之三日。被髮，西北向，偃臥，縱體，無令他人見之，豫敕家中人無得有聲。先齋戒沐浴，至其日，入靜室中，安心自定，先祝之曰：

曾孫小兆某甲好道，願得長生。今日秋分之日，天帝使者夏里黃公來下入吾身中，案比總閱，諸神不得逋亡，皆當來會。從上三呼之，比爲之，日三呼之，三日九呼之，日中乃止。即言曰：司錄六丁玉女，削去某死籍，更著某長

生神仙玉曆，急急如律令。即日有天帝無極君，教自應曰：諾。下牀回向再拜，謝天神。一身道畢此矣。

第五十四神仙

子欲知真人、仙人何類，仙人衣摺衣，生毛羽，真人無影，衣五彩朱衣。其居無常處，東春，南夏，西秋，北冬，浮游名山崑崙、蓬萊、大郢、九域之上，時上謁上皇。故真人得道，八千萬歲。乘珠玉雲氣之車，駕無極之馬，時乘六飛龍，佐上皇治。中仙之士，中天而上，乘雲往來，歷越海江。下仙之士，法當尸解，晦日朝會拜禮，不得懈怠，當爲神使。道非有所異也，但有尊卑之故耳。故百歲之人黃頭髮，三百歲之人兩權起，三百歲之人，萬物耳。四百歲之人，面縱理，五百歲之人，方瞳子，六百歲之人，脅助胼，七百歲之人，骨體填，八百歲之人，腸爲筋，九百歲之人，延耳生，千歲之人，飛上天，上謁上皇太一爲仙。真人重瞳子，故能徹視八方。食芝服丹，即不老。人萬八千歲更爲童子，男八女七，從此始。

第五十五神仙

子欲制百邪百鬼及老精魅，常持符、利劍、亭水瓮上，於中視其形影。凡行出入，卒逢非常怪物，於日月光中視其形影，皆可知也。以丹書制百邪符，置于瓮水上，邪鬼見之，皆自然消去矣。諸邪鬼魅，龍蛇、虎豹、六畜、狐狸、魚鼈、龜、飛鳥、麋鹿、老木，皆能爲精物。犯人者，符刻之，斬之，付河伯、社令。當召今日直符使，六丁神守之宿衛。左文字，在八十一首玄圖六甲宮四十九真中。亦有珠胎七機，華蓋清觀，皆能制百邪。此四符者，惡穢人不可服也。當被服威喜、巨勝、左契、右射、太極、太清、太玄、陽章、參天、包元氣、太虛，此太道也。可常被服，無所不防，亦無禁忌也。上制文曰：皇天上帝，太上道君、曾孫小兆王甲好道，願得長生，所願從心來，自在心也，不多言。上封文曰：皇天上帝、太上道君、天一、太一、北千君、日月陰陽君、司命君、司錄君，曾孫小兆王甲好道，願得長生，唯司命司錄君削去死

籍，更著長生玉曆仙籍，定爲真人。臣某即日除爲太一使者，再拜受命上皇

道君、中黃門子，再拜著契封符傳。當

清潔先解過。常以歲四時除日及八節

之日，以酒脯於東流水上解過，南流亦

可。神仙玄圖曰：玉曆五十五章，姓

名符信本在上皇金匱玉笈玉笥中，封

之力重。兆得之，慎勿妄傳。子慎之，

勿受錢之，得其人即傳之，可得神仙。

吾時時自案行此二篇上下《中經》也。

吾常使司命教鬼守汝，勿妄增減吾文。

一字不具，吾即知之，兆汝慎之，慎之。

如吾言符與下字，以丹青之，此吾之信

也。兆汝審欲神仙，當先服還丹金液，

存神，即時仙矣，上爲真人。兆汝不服

神丹金液，當自苦耳，爲寒溫風鬼所

繫，司命不救汝也，道神無奈汝何。兆

爲道，溫衣適食，守虛無，爲自然，鬼亦

不能救殺也。年壽終竟，自死矣。何

以言之？以其不堅守神故也。譬猶萬

物之生，非欲求死，但自然老枯槁腐

死，其人亦如此矣。吾以喻汝，弩力求

師，吾教八十一弟皆仙，其十人布在民

間，遊遨穀仙。吾越度秦項不出，爲漢出，合於黃世，見吾大吉。

太上老君中經卷下

①「何」，《雲笈七籤》本作「河」。

②「日」，原缺，據《雲笈七籤》本補。

③「肺」，原作「肝」，據《雲笈七籤》本改。

④「强」，《雲笈七籤》本作「狂」。

⑤「常」，《雲笈七籤》本作「當」。

⑥「聚」，原缺，據文義補。

⑦「去」，原作「云」，據《雲笈七籤》本改。

⑧「聚」，《雲笈七籤》本作「娶」。

⑨「千」，《雲笈七籤》本作「斗」。

（李剛點校）

015 老子西昇經〔御注〕

經名：老子西昇經（宋徽宗御注本）。原題作《西昇經》。其經文約出於魏晉以後，假託老子告關令尹喜。宋徽宗御注出於北宋政和年間（1111—1117）。三卷。底本出處：《正統道藏》洞神部本文類。參校本：陳景元《西昇經集註》。

西昇經序

萬物莫不由之之謂道，道之在我之謂德，道德，人所固有也，昧者常失之。周衰之末，民迷日久，世道交喪，爰有博大真人，以本為精，以物為粗，著書二篇，言道德之意，以覺天下。後世之學者，復見天地之純，古人之大體，寔混元之力也，聖人之愛人終無

已，猶慮未足以盡妙，又為關尹言道之要，列為三十九章，目曰《西昇經》。觀其辭旨激切，勸戒諄複，以得一為要妙，以飛昇為餘事，其意蓋使天下後世徑趨妙本，逍遙自得之場故也。善救之功，於此可見。朕萬機之暇，遊神太清，於道德之旨，每著意焉，既取二篇為之訓解，於是書不可無述也，以意逆志，聊為之說。昔吳筠嘗云：深於道者，無如五千言，其餘徒費紙札爾。是書蓋與五千言相為表裏，不得不盡心焉。政和御制序。

西昇經卷上

西昇章第一

老君西昇，開道竺乾。

道無乎不在，雖蠻貊之邦，殊方異域，何莫由斯道也。以先覺覺後覺，惟聖人為可以開明，故雖竺乾遠夷，亦善救之而不棄也，昔仲尼欲居九夷，亦是意爾。

號古先生，

聖人無名，應時顯號，混元在伏羲時，號鬱華子，在神農時，號大成子，在黃帝時，號廣成子，至唐虞成周，代為帝師，雖名聲異號，皆時出而應之。故西入流沙，號古先生，其曰古，以見信而妙古，執古道以御今有也。一本作有古，非是。

善入無為，不終不始，永存綿綿。

道常無為而無不為，聖人體道，夫何為哉？我無為而民自化，示無為者，道之體也，道體混成，無為端倪，迎之不見其首，孰原其所始？隨之不

見其後，孰要其所終？故自古以固存，亘萬世而不絕。綿綿者，不絕之謂。

是以升就，道經歷關。關令尹喜見氣，齋待遇賓。為說道德，列以二篇。

聖人之至，必有休祥，故自東徂西，道由函谷，望氣得以見之，禮恭然後可與言道之方，非虚心致一以尊事之，道將不傳。關尹先之以齋戒，又致恭盡禮以待遇焉，於是混元為著書上下二篇，言道德之意五千餘言，且告以道之要也。

告以道要^①，云道自然。行者能得，聞者能言。知者不言，言者不知。所以言者，以音相聞，是故談以言相然^②。

逆要不煩，一言該之曰，自然而已，《道經》曰：道法自然。自然之道，行之為上，不行則不至也，道不可聞，聞之不若行之，聞之徒能言爾，可以言論者，物之粗也，道無問，問無應，則弗知乃知，知乃不知也，故齧缺問於王倪，四問而四不知，道雖不可以言傳，然道非音聲可求，得之

不離音聲，聖人不得已而言者，以物固有所然，非言無自而顯，必因言以求理，則各然於然矣。一本作告子道要，非是。

不知道者，以言相煩。不聞不言，不知所由然。

公孫龍詭辭數萬，惠施其書五車，多言數窮，離道遠矣。茲無他，以不聞所謂終身不言之道，不知所謂天下有常然之理。一本作不問，非是。

譬如知音者，識音以絃。心知其音，口不能傳。道深微妙，知者不言。

子期善聽，志在高山流水，必得之師文之鼓琴，內不得於心，不敢發手而動絃。故知音者，口不能言，有數存焉於其間，至道之精，微妙玄通，深不可識，豈聲音之粗歟，默而識之斯可矣，奚以夫饒饒為哉。

識音聲悲，抑音內惟。心令口言，言者不知。

樂之音聲，安樂悲怨，其出不同，審音者必外抑其音，內思其理，然後能造音聲之妙，識其所以為悲，所以為

樂，奚所事言。矧夫道深微妙，音之所不能該識無與者，焉可以容聲哉！夫言，心聲也，口之所言，心之所令也，心與道冥，湛然常寂，雖欲言之，有不可得，或動出一發於言，其分於道遠矣。

道深章第二

老君曰：道深甚奧，虛無之淵。

道者萬物之奧，其藏深矣，既曰深，又曰甚奧，以見至道之精，深之又深，不可測究者也。唯深也，故至虛，足以受羣實，至無，足以該衆有，淵乎其不可測，豈言之所能論哉！

《道經》曰：淵兮似萬物之宗。子雖聞道^③，心不微丹。所以然者，何書不盡言。

道不可聞，聞而非也，至道之精，學者不可以耳聽，教者不可以言傳，雖勉聞道，達耳而已，其能造微盡誠契之以心耶？蓋世之所貴道者書，書不過語，而語之所貴者意，自非忘言而會以意，未見其有得也。一本作聞說，非是。

著經處文，學以相然。子當寶之，內念思惟。自然之道，不與子期。喜則稽首再拜，敢問學之奈何？

聖人著書立言，豈好辯哉，開明道妙，以待後之學者，使各審其是而已。誠能寶之珍之，思索以通之，殆見超然頓悟，一息而神，道將為汝居矣，夫何久近之期。

善為章第三

老君曰：善為書術者，必綏其文。善論達其事者，必通其言。勉而勤之，得道矣。

書之作也，所以明道，唯屬辭不悖於理，道術於是乎明。誦其書者，欲達於理，非通其言，理何自而顯哉。二者在強勉而已，強勉學問，則聞見博而智益明，強勉行道，則德日起而大有功。《德經》曰：上士聞道，勤而行之。

為正無處，正自歸之^①。不受於邪，邪氣自去。所謂無為，道自然助。

道二，正與邪而已，邪正不相入，如薰蕕不同器也，或正或邪，在為與不

為，受與不受之間爾。道之至正，無有齊限，非方所之可拘，一或執方泥迹，不該不遍，則正復為奇，欲邪氣不能襲難矣，豈無為之道哉。《傳》曰：唯無為幾存。

不善於祠，鬼自避之^②。

至德之世，絕地天通，罔有降格，故其鬼不神，而無出靈響，豈淫祀以徼福哉！後世典祀無禁，非其鬼而祭之者有之，欲各守其幽，不可得也。孔子曰：丘之禱久矣。

不勞於神，受命無期。

形全者神全，神全者，聖人之道也，善攝生者，體性抱神，其心閑而無事，故神將守形，形乃長生。《傳》曰：神太勞則竭，形太勞則敝。神形騷動，欲與天地長久，非所聞也。一本作壽。

無進無退，誰與為謀。

出於道而不謀，故無出而陽，無入而藏，傑立乎其中央。

為是致是，非自然哉。喜則稽首，今聞命矣。

榮辱之來，各象其德，無毫釐之差，有影響之應，豈人為或使之偽哉。《孟子》所謂出乎爾者，反乎爾者也。

慎行章第四

老君曰：慎而行之，寶而懷之。吾將遠逝，不期自會。

知之非艱，行之惟艱，故行道不可不慎，聖人懷之，眾人辯之，其懷之也，在於寶之珍之焉。苟能此道，雖與聖人居之，相去異天壤，而共處曾何交臂失哉。

尹喜受言誠深，則於關稱疾棄位，獨處空閑之室。

弈，小數也，不專心致志，則不得之，況進道者哉，宜乎棄位而獨處也。蓋棄位則不為緒，使獨處則不與物交，以是為道，可謂知所先務矣。恬淡思道，歸志^③守一。極虛本無，剖析乙密。

思作睿，思則得之，不思則不得也，惟以恬養智，而不與物交，則出於不思，道積于厥躬矣。然其要在於葆神蓄精。蓋志者，心之所之，而神之

所寓也，一者，腎水之數，而精之所藏也，於斯二者，能歸而守之，故致虛以要其極，造無而守其本，道之玄微深妙，殆將迎刃而解矣。《素問》所謂虛無恬淡，精神內守，正與此合。

觀縷妙言，內意不出。誦文萬過，精誠思徹。行真歸身，能通其玄。論無極之原，故能致神仙。

有妙道斯有妙言，言之妙者，曲而中，微而顯，惟極深研，幾用志不分，則言之要可得而知。然其始在於誦，數以貫之，思索以通之，故能謹修其身，真在於內，蓋致一之謂精，自成之謂誠，真者精誠之至也。夫日可見之行不離於真，則受於天者，物不能易，天下之至妙，將無不通也，茲無他，知道大原出於無極，不特體之，又能論之，故入於不死不生，與天地相為長久，視羽化飛昇蓋餘事爾。

道象章第五

老君曰：道象無形端，恍惚亡若存。

《易》曰：見乃謂之象。道不可見，豈形象端倪之能窮哉！經所謂大象無形是已。恍者有光而無象，意其有而非有，惚者有一而未形，意其無而非無，惛然若亡而存，不可以有無求也，經所謂無物之象是已。

譬如種木未生，不見枝葉根。合會地水火風，四時氣往緣。

草木有生而無知，其無知與人異，其有生與人同。方其未生，猶人之胚胎未兆，在太易時也，不見枝葉根，猶人之氣形質具未相離也，及其萌蘖之生，散為枝葉，旁達為根，猶人會四者之氣，以時而往，循緣以成其身也。雖然生者生矣，而生生者果何物哉，故曰道象無形端，恍惚亡若存。

氣為生者地，聚合凝稍堅。

氣來入身謂之生，人之生，氣之聚也，其始則氣化而凝，既久則形立而堅，陰陽之運，其理則然。

味異行不等，甘苦辛鹹酸。

道判而為陰陽，散而為五行，別而為

五味。五味之所以異，以五行之不等故也。潤下作鹹，炎上作苦，曲直作酸，從革作辛，稼穡作甘，此味之所以異也。火燠水潤，木撓金堅，土均而布，稼穡出焉，此五行之不等也。味則五行也，而味味者道也。

氣行有多少，強弱果不均。同出異名色，各自生意因。

通天下一氣，萬物化作萌區，有狀盛衰之殺，變化之流也，氣之多寡，隨量而受，故物之強弱，因受而稟，猶之大塊。噫，氣而萬竅怒號，吹萬不同，而使之自己。聲雖異，同出於風，形雖異，同出於道。

從是異性行，而有受形身。含養陰陽道，隨所倚為親。生道非一類，一人非人。

性有剛柔緩急不同，故形有羽毛鱗介之異，稟偏于陽者，本乎天而親上，毗于陰者，本乎地而親下。雖類聚羣分之殊情，飛走動植之異狀，自有情以至於無情，自有形以至於無形，塗雖殊而歸則同，慮雖百而致則

一也。

本出於虛無，感激生精神。譬如起音者，掇絃手動傳。宮商角徵羽，口氣呼喻元。

天下之實，自虛而有，天下之有，自無而出。道則虛無也，道生一，一者天下之至精，一生二，二者神之所應也，天地氤氳，萬物資精神以生。而精神生於道，猶之金石有聲，不考不鳴，及其發手動絃，則鼓官官動，鼓角角應，而五音彰矣。

身口意爲本，道出上首元。本淨在虛靜，故曰道自然。五音所動搖，遂與樂色連。

域於有生，百骸九竅，五臟六腑，體而存焉，是三者，有生之本也。然身之總括百骸，口之呼吸語默，意之善惡是非，孰使之者？道爲之本而已。形而上者謂之道，萬物莫不首之者也。道體至虛，而實不能礙，至靜而動不能搖，以即染而淨，物莫得而先之爾，豈矯拂使之然哉！去道既遠，湛於人偽，五色令人目盲，五聲令人

耳聾，與物相轉徙而不能自解，以非自然之真也，於動搖言音不言色，於連^①不言音而言色，蓋互見也。

散陽以爲明，布氣成六根。從是有生死，道遂散布分。去本而就末，散樸以澆淳。道變示非常，欲使歸其真。

道判而爲陰陽，陰陽氣之大者也，萬物負陰抱陽，皆道之所布也。形質既具，六鑿相攘，莫之能止，是以生於土而反於土，出乎隱而入乎隱，流轉死生之域，萬化而未始有極也。此無他，逐末忘本，離道愈遠，散樸以爲器，澆淳^②而不原故爾。夫真常之道，無古無今，入於不死不生，然而物有生滅，未可以爲常者，道之變也。《列子》曰：精神離形，各歸其真。

生道章第六

老君曰：告子生道本，示子之自然。至於萬物生，情行相結連。如壞復成，如滅復生。以成五行，陰與陽並。輾轉變化，遂爲物精。

生生之謂易，生之所生者死矣，而生

生者未嘗終，則生生者道也，生道之本，豈人爲或使之偽哉，自然而已。《列子》曰：自生自化。萬物雖本於自然，其情之所發，行之所行，隨量而受，因施而得，物有結之，不能自解，道則偶而應之爾，成於此者虧於彼，死於此者生於彼，如環之無端，道常自若也。別而爲五行，相生相勝，散而爲陰陽，一往一來，俄然而離，形頓革，倏爾而因，形移易，運轉無已，以成變化，物由是以生焉。《莊子》曰：精神生於道，形本生於精。

吾思是道，本出窈冥。愚不別知，自謂適生。子無道眼，安知生靈。

《經》曰：窈兮冥兮，其中有精。《莊子》曰：至道之精，窈窈冥冥。蓋窈者幽之極，冥者明之藏，窈冥之中，至陰之原，天一所兆，精實生焉。大愚者終身不靈，迷道之本原，謂適爾而自生，蓋不能目徹而獨見，安知天下之至精，物得是以生，神得是以靈。

天地人物，虛無囊盈。一從無生，同出異名。

一者，形變之始也，清輕者，上為天，濁重者，下為地，沖和氣者為人，天地含精，萬物化生，而盈天地之間者，唯萬物。物有萬殊，皆本於一，一之所起，蓋生於無，天地與我並生，萬物與我為一，未可以差殊觀也，天高地下，萬物散殊，特名之異耳。

是亦本非，在所用正。所字非字，乃知其誠。當與明議，勿與愚爭。

昔之所是，今或非之，前之所棄，後或用之，彼亦一是非，此亦一是非，天下是非果未可定也，已用則賤，當時為是，顧所用為正爾。道常無名，字之曰道，道之為名，所假而行，唯知所字非字，則不見彼而自見，不得彼而自得，反身而誠，道之至真，知之如視矣。雖然此可為智者道，難與俗人言也，《傳》曰：智者之言，固非愚者之所曉。

子取正教，勿信邪聽。何以知邪？子

為物傾。何以知愚？不察言情。為道問道，為經問經。問不本末，知愚冥冥。但知求福，不知罪嬰。但知養身，不知戮形。

道有正有邪，孰為正？中立不倚，旁行不流，道之正也。孰為邪？以偽勝真，逐物忘返，外正道者，皆邪說也。夫道者，萬物之奧，故為本，經者載道之言，故為末，愚者暗於大理，冥行翳路，非特不知本之為問，而未亦不知也，以是求福，適得戮形爾。《莊子》曰：人皆求福，已獨曲全。又曰：養形必先之以物，物有餘而形不養者有之。

嬰兒之姿，貴養厚敦。忽無就形，知非常生。無履大白，可令永存。

嬰兒氣專志一，動不知所為，行不知所之，故福亦不至，禍亦不來，其姿悅澤而美好。所貴乎養形者，在於含德之厚，敦兮若樸，故有嬰兒之色，而無罪嬰戮形之禍，觀諸嬰兒，忽爾自無以成形，又因以知生道之無常也。至道之極，昏昏默默，聖人體

道雖明白四達，而我獨若昏，故能全身遠害，而無人道之患。《道經》於知其雄篇言：復歸於嬰兒，而繼之以知其白，守其黑，意與此合。有何妙意，乃欲相傾。父子恩深，不是相聽。

道深微妙，與神為一，自道以降，粗而非妙。世俗之人，不知百順之本，而妄求福，不知衛生之經，而厚養身，相與傾心，為之而莫之止，曾何妙意之有，而欲為之？夫父子主恩也，苟以是詔其子，為人子者，亦未可以是以聽從，況他人乎。

勿復噉嘅，遠近笑人。掩惡揚善，君子所宗。

噉，呼也。記曰：無噉應，嘅，嘆也，詩曰：嘅其嘆矣。夫以先知覺後知，貴在循循善誘，優而柔之，使自求之，不在於噉嘅以強教也，非特無益於學者，殆將貽笑於遠近，矧夫惡稱人之惡，樂道人之善，固君子之所尊而行之者歟。

邪正章第七

老君曰：邪教正言，悉應自然，故有凶吉，應行種根，如有所受，種核見分。

邪正不相入，猶方圓之異用也，雖設教不倫，其吉凶緣類，而應若影響，然各隨所栽植而受之，譬諸草木，區以別矣。

道別於是，言有偽真。偽道養形，真道養神。真神通道，能亡能存。神能飛形，並能移山。形爲灰土，其何識焉。

道惡乎隱，而有真偽，真偽既分，道之所以判也。自券之外，皆所謂偽，聲色臭味之類是已，徒能養形爾；自券之內，皆所謂真道德，性命是已，神賴以養焉。《孟子》曰：體有小大，養其小者爲小人，養其大者爲大人。真道養神，養其大者也，唯知所養，則鍊神合道，與道合真，惛然若亡而存，油然不形而神，飛昇冲舉，蓋餘事爾至於挾宇宙，施天地，固所優爲，豈特移山哉！傳曰：失吾道者，上見光而下爲土。養其小者既失真道，將反於土而化臭腐，孰

能致飛形之妙。

耳目聲色，爲子留愆。鼻口所喜，香味是怨。身爲惱本，痛癢寒溫。意爲形思，愁毒憂煩。吾拘於身，知爲大患。觀古視今，誰存形完。吾尚白首，衰老孰年。

耳欲綦聲，五聲令人耳聾，目欲綦色，五色令人目盲，香味鼻口之所欲納嘗也，甘肥爲腐腸之藥，芳馨爲燻喉之煙，外則一身未免陰陽之寇，內則志意莫逃人道之患，則以有身爲大患故也。蓋有則有，盡無則無，窮神獨存，而常全形，有生而有滅，以混元之聖，猶示人以衰老之相，況囿於大化者哉。

吾本棄俗，厭離世間。抱元守一，過度神仙。

元者棄之本，一者形變之始也，抱而不脫，守而勿失，殆將遺物離人，而立於獨，豈同乎流俗，合乎汙世。

子未能守，但坐榮官。

至貴足以並國爵，苟知所守，視儻來之寄，如陰影集身，曾何以是爲榮。

關尹所以稱疾而棄位也。

子能不動，神靈得安。子能捐欲，舉事能全。子能無爲，知子志堅。

吉凶悔吝生乎動，罪莫大於可欲，誠能寂然不動，洒心去欲，則神將守形，而事無不通，惟淡而無爲，至誠不息者，可以及此。

今爲子說，露見敷陳。散析剖判，真偽別分。子當諦受，重道因勤。

道不可以言傳，非言不顯，必辯疑解惑，斯而析之，道於是乎明。仲尼曰：吾無隱乎爾。

道爲明出，經爲學先。

道遇明者而後出，苟非其人，道不虛行，經所以載道也，學者捨經，欲濟乎道，猶捨舟，欲濟乎瀆也。

授與能行，不擇富貧。教化與樂，非有疏親。取與能行，文與其人。學爾教爾，不失道真。

有教無類，初非決擇也，要在得人而付之，則學者不失己，教者不失人。

天地章第八

老君曰：天地與人物，本皆道之元。

俱出於太素，虛无之始端。髣髴之精光，微妙之上玄。

道生一，一生二，二生三，三生萬物。渾淪既判，清輕者為天，道生一也，濁重者為地，一生二也，沖和氣者為人，二生三也。以至萬物，盈於兩間，皆自道而生，出於太素無質之先，恍惚之中有象，窈冥之中有精，玄之又玄，衆妙之門，傳所謂萬物職職，皆從無為殖是已。

譬如萬里坑，下有淡流泉。視之甚濁微，徹見底沙難。窈窈而冥冥，不知所由然。亦如終逝者，不見其靈魂。淳陰共和合，陽不能顯分。

《列子》曰：氣形質具而未相離，故曰渾淪。渾淪者，言萬物相渾淪而未相離也，視之不見，聽之不聞，搏之不得，道之玄妙難識，不特若深谷之泉，逝者之魂也。一本作終者去。

過往與甫來，視譬以見前。尚不能了理，安能知亡存。譬如瘖瘡者，不能傳人言。為聾彈宮商，其人豈能聞。才辯有其智，受教如語傳。自謂通其情，

情衷不能丹。是故失生本，安能知道元。

道之不行，我知之矣，智者過之，愚者不及也，已往之事不及知，方來之事未可知，適今之事不能知，愚者每如此，況知死生之說乎！語以道妙，猶使瘖者能言，聾者審音也，至於才能辯博之士，智足以及之，然作聰明矜思慮，得其言而未得其所以言，求道於形色名聲，不足以得，彼之情，生之本，道之元，惡足以識之。

行道章第九

老君曰：子若行吾道，當知上慧源。智亦不獨生，皆須對因緣。

慧以智為體，智以慧為用，大智閑閑小智間間，上慧大智也，大知觀於遠近，因感而生，遇緣而應，行其所無事未嘗鑿也，豈蔽於一曲而自私哉。各有行宿本，命祿之所聞，同道道得之，同德有德根。宿世不問學，今復與失鄰，是以故得失，不樂於道文。

命之立也，其稱人事乎，命雖莫之致而至，然其死生貴賤，禍福壽夭，皆

本於宿昔之所行，積善積惡，殃慶各以其類至，無毫釐之差，有影響之應。道者同於道，德者同於德，失者同於失，顧所行何如爾。貪欲利榮寵，受施念恩勤。更以財相厚，不哀下窶貧。必復多瞋恚，無所處定原。學不得明師，安能解疑難。

貪夫徇財，故以富為，是累於厚利，烈士徇名，故以顯為，是累於名高。夜以繼日，思慮善否，滿心戚醮，求益不止，苦身疾作，積而不用，貫朽粟腐，未嘗貸人，而又快一朝之忿，肆少頃之怒，與物相刃相靡，莫之能止，尚知以大定持之耶！殊不悟名與身孰親，身與貸孰多，忿憾為仁之騰，纖恪為義之蠹也，自非明師，孰能祛其蔽解其惑。安或作焉字。

吾道如毫毛，誰當能明分。上世始以來，所更如沙塵。

道不可見，見而非也，道不可聞，聞而非也，道無形端，豈特毫毛之微哉！自古及今，天下之治方術者多矣，雖小道必有可觀，致遠則泥，寡

聞則無約也，寡見則無卓也，必多聞見而述乎正道，則更事為多，無一物之不知，而聖益聖，傳曰：事無不通之謂聖。

動則有載劫，自惟甚苦勤。吾學無所學，乃能明自然。

美成在久，非一日之積也，日往月來，勤而行之，則善積成聖矣，荀卿曰：積善成德，神明自得。聖心循焉，終乎為聖，雖由學以成，豈蔽於俗學以博溺心哉，學在於不學而已，此絕學所以無憂而樂。

華要歸其實，莖葉如本根，為道歸祖首，以知元始端，子當無相啓，勿以有相關。

萬物出乎震，相見乎離，則芸芸並作，英華發外，說乎兌，勞乎坎，則去華就實，歸其性宅，經所謂夫物芸芸各歸其根是已，混元之教，以深為根，以約為紀，以辨物為德，以復命為常，落其華而實之，斂其散而一之，猶四時之有秋冬也。無形之祖，天下之始，萬物莫不首之者在是焉。

此豈有迹之可求哉。

西昇經卷上

- ①「告以道要」，《西昇經集註》作「告子道要」。
- ②「是故談以言相然」，《西昇經集註》作「是以故談以言相然」。
- ③「子雖聞道」，《西昇經集註》作「子雖聞說」。
- ④「正自歸之」，《西昇經集註》作「正自居之」。
- ⑤「鬼自避之」，《西昇經集註》作「鬼神避之」。
- ⑥「歸志」，《西昇經集註》作「臻志」。
- ⑦「歸身」，《西昇經集註》作「臻身」。
- ⑧「味異行不等」，《西昇經集註》作「味異形不等」。
- ⑨「隨所倚為親」，《西昇經集註》作「隨倚以為親」。
- ⑩「一切人非人」，《西昇經集註》作「一切人非一」。
- ⑪「於連」，疑為「於道」之誤。
- ⑫「澆淳」，疑為「澆淳」之誤。
- ⑬「誰存」，《西昇經集註》作「誰能」。
- ⑭「因勤」，《西昇經集註》作「殷勤」。
- ⑮「亦如終逝者」，《西昇經集註》作「亦如終者」。
- ⑯「所聞」，《西昇經集註》作「所關」。
- ⑰「失鄰」，《西昇經集註》作「世鄰」。

西昇經卷中

重告章第十

老君曰：吾重告子，子當諦受。道以無為上，

常無欲以觀其妙，常有欲以觀其微而已。

德以仁為主。

德無不容，仁也。

禮以義為謙，

稱物平施，適時之宜。

施以恩為友。

因惻隱之心，推以及物，非求報也，故其施博。

惠以利為先，

惠者仁之施，以利物為功，口惠而實不至，怨蓄及其身。

信以效為首。

信將以復其言，必有效見焉。

偽世亦有之，雖有以相誘是以知世薄，華飾以相拊。

至德之世，是七者皆本於自然，逮德

下衰，是七者皆出於或使故道隱於小成，德傷於小識，禮以偽為，施而求報，惠不由心，信非中出，類皆矯情，性以沽名，飾智以驚愚，豈自然哉。

言出飛龍前，行在跛鱉後。仁義禮信廢，道德荒亡腐。

飛龍為速矣，言猶在其前，跛鱉為鈍矣，行猶在其後，則以言之非艱，而行之惟艱故也。失道而後德，失德而後仁，禮尤在其後，禮信且廢，道德可知。

不以道相稽，反以財相輔。譬如鑑中影，可見不可取。言如響中應，風聲豈可聚，偽世教如此，如是迷來久。

君子徇道，小人徇財。古之人以稽為決，蓋相稽以道也，周衰之末，不知與道相輔而行，而以財相輔，是猶搏風捕影而求其實，豈可得哉！此無他，道無以興乎世，世無以興乎道，小惑易方，大惑易性，矯偽之俗勝，而不明乎自然之真故也。經曰：民之迷，其日固已久矣。

天下之人物，誰獨為常主。迷迷以相傳，輾轉相授與。邪偽來入真，虛無象如有。

吹萬不同，而使其自己怒者其誰耶，蓋妙體無偶，真常不幸，可得矣而不可言傳，可傳矣而不可相授，一曲之士，指末流為大源，認陳迹為至妙，以迷傳迷，猶醉者之負醉也。殊不知誠正可以入真，而邪偽終莫之能以邪偽入真，是以虛无之象為有而實非有也。

自偽不別真，為貪利往守。非常正復亡，癡盲持自咎。如木自出火，還復自燒腐。

定已然後議人，主中可以正外，己自為偽矣，其能辯真偽之歸哉，己之為偽，以往守於利而為貪也，以利往則遠於道，以利守則失於道，既非真常，正亦隨亡，此無他，於道見疑而冒昧，故違人而自遺其咎也，何異木生火而還尅木哉，《陰符》曰：火生於木，禍發必尅。

聖人之辭章第十一
老君曰：聖人之辭云。

混元博大真人也，吐辭為經，自我作古，猶不自矜，而曰聖人之辭，則以述而不作故也。

道當以法觀。如有所生者，故曰為自然。

一而不可不易者道也，麤而不可不陳者法也，道不可見，即法而顯，道之與法，初無二致，入則為道，出則為法爾。天下之物生生不窮，而不知所以生生者誰耶，本諸自然而已，道以法顯，法以道立，豈人為哉。

眼見心為動。

賊莫大於德有心，而心有眼，坎為耳，離為目，耳目者，精神之戶牖也，一有所睹，心斯動出矣。《陰符》曰：機在目，聖人為腹不為目者以此。

口則為心言。

言，心聲也，心之所欲，非言不宣，口實司之。

鼻為通風氣，鼻口風氣門，喘息為宅

命，身壽立息端，譬如穀草木，四時氣往緣，氣別生者死，增減羸病勤。

人之所恃者息，而息之出入，鼻其所自也一呼一吸，陰陽寓焉，聚則為生，散則為死，故命之所宅在是，真人息之以踵，衆人息之以喉，息之本有所立，而根深蒂固焉，故與天地齊其長久。譬之百穀草木，資四氣以生植，盛則榮，衰則悴，氣散則生者死矣。

以是生死有，不如無為安。無為無所行，何緣有咎愆。子不貪身形，不與有為怨。

命亘古今而常存，性更萬形而不易，初無死生也，物之所以有死生者，以失性命之情故也。唯無為然後能安性命之情，為則有成虧，成虧分而是非立矣，無為故無敗，曾何咎愆之有？世之人未免有為者，以有我故也，苟能墮肢體而皆忘，外形骸而無有，雖無為而無不為矣。五行不相尅，萬物悉可全。萬物無有常，成者不久完。

成變化，行鬼神，往來天地之間而不窮者，五行也，一往一來，更旺更廢，相生所以相繼，相尅所以相治，此囿於大化者，有生必有死，而莫能逃也。聖人役造化，命萬物，把握陰陽，顛倒五行而不相沴，故能存亡自在，而入於不死不生。彼既以為物矣，成壞相因，欲久而不亡，何可得也，惟道則萬世而無弊，經曰：道乃久。

三光無明冥，天地常昭然。

天積氣爾，地積形爾，日月星宿則積氣中之光耀者，人徒見其一往一來，一伏一見，一晦一明，不知昏晝之變，明暗自異，三光二儀，常自若也。

觀諸章第十二

老君曰：觀諸次為道，存神於想思。道氣和三光，念身中所治。髣髴象夢寤，神明忽往來，

虛無恬淡，不思而得上道也，閑邪存誠，思則得之其次也，蓋神妙物而無方，存之則守形而不離，神全斯精全，精全斯氣全，三者和而不乖矣。

天之三光，日月星是也，人之三光，神氣精是也，和三光之道無他，返照內觀，取足於身而已。蓋人一身，真君內存，五官咸備，百骸六藏，固有相治者，念之不忘，則友神明於恍惚之際，此其效也，髣髴象夢寤，則恍惚若有無之際也。

淡泊志無為，念思有想意。自謂定無欲，不知持念異。

淡言不與物交，泊言靜止不流，志於大道者，無思無為，不逐於物，不流于動，曾何有思想之意。蓋有想則相生，有思，則未免有心也，謂是為定，已涉于動矣。謂是為無欲，已墮於欲矣，天下之治方術者，皆以其所為不可有加，故自以為是，以不知持念之各異，故道有小大之不同也。夫念有正有妄，過而不留感，而後應正念也，既往而不擇，未至而逆焉者妄也，此存神於想思，所以為之次。或氣尚羸盛，自知尚多事。事興則形動，動則外通謀。謀思危之首，危者將不久。不久將欲衰，衰者將不壽。

夫志，氣之帥也，心勞於謀，智盡於事，則氣有蹶，趨之不正而暴盛，蓋棄事則形不勞，形休則謀不用。一有所謀，則機變之巧作，擾擾萬緒自此起矣，茶然疲役不知其所歸，欲終其天年，而不中道夭，不亦難乎。至人不從事於務，不相與為謀，滌除外慕，玄覽至理，故專氣致柔，能如嬰兒也。

以身觀聲名，物事難可聚。以名聲稱號，必為是所誘。皆坐於貪欲，貪欲為殃咎。貪者為大病，習貪來已久。合會微漸滋，非鍼艾所愈。

一節重於一國，兩臂重於天下，則名與身孰親？物無常是，事無常宜，去而不守，未嘗暫止，況儻來之寄哉！儻來之寄，其來不可圍，其去不可止，而累於名高者，趨名不已，殘生傷性，以身為殉，正坐於貪欲故也。咎莫大於欲得，則貪者身之大病，沉迷日久，積習既深，始微而終盛，猶病在膏肓，非鍼艾能愈也。

還身意所欲，清靜而自守。大聖之所

行，不慕人所主。有常可使無，無常可使有。

形之疾，其甚者鍼艾不能及，性之疾，其甚者小道不能化，貪欲，性之疾為甚者也，將以反其性情而復其初，必損之又損，以至於無為，則清不能汙，靜不能染，而不知所守矣。蓋無為者，聖人之所行，貪欲者，衆人之所主，行大道之無為，不慕衆人之貪欲，則事物形名，天下所謂有者，可使之無，恬淡寂寞，天下所謂無者，可使之有也。

經誡章第十三

老君曰：經誡所言，法義所推。赫赫興盛，不如微妙。

經以載道，無非教誡之言，法以顯道，有義可以推考，類皆以本為精，以物為粗。赫赫興盛，物之勢也，勢有時而盡，深妙元微，道之本也，道無時而窮，以是較其精粗，則道之與物，相去遠矣。

實不如虛。

實則有礙，虛則無間。

數不如希。

事君數斯辱矣，朋友數斯疏矣。邪多卒驗^③，疾不如遲。

欲速則不達，大器晚成，美成在久。興者必廢，盛者必衰。

日中則昃，月滿則虧，天地尚爾，況於人乎。

聖人絕智，而為無所為^①，言無所言，行無所施。孰能知此。

道之要妙，雖智大迷非可以智索也，離形去智，然後同於大通，去智與故，然後循天之理，聖人於言為之際，以絕智為先，蓋以此爾，世豈識哉！為無為，所謂處無為之事也，言無言，所謂終身言未嘗言也，行無所施，所謂事無事也。

偶不如奇。

獨立不改者，道也，自道而降，有對有待，聖人不與物偶而立於獨，體道故也。

多不如寡。

通於一而萬事畢，少則得，多則惑。

孰賢難隨。孰仁難可，其義少依。

世之所謂賢者，孰為賢哉，賢者過之於道，或不能隨也，世之所謂仁者，孰為仁哉，仁者失之於道，未見其可也，仁賢且猶如此，道之奧妙，依之者鮮，蓋可知已。

能知無知，道之樞機。

知之淺矣，不知深矣，能知無知之知，是乃真知也，道之本宗，蓋在於此，

空虛滅無^⑤，何用仙飛。大道曠蕩，無不制圍。

虛非無也，無實而已，空其虛則致虛極矣，無者有之對，因有而著，未離於有也，滅其無，則無無亦無矣。夫然，故出入六合，遊乎九州，獨往獨來，行乎萬物之上，其視仙飛不足多也。蓋道廣大悉備，未始有封，包裹六極，無有端倪，天地之大，秋毫之小，皆在範圍之內，豈止仙飛之一端乎。一本作空滅成無，可用仙飛。

子能明之^⑥，所是反非。經言審諦，孰之能追^⑦。

彼亦一是非，此亦一是非，天下是非

特未定也，雖然有真是非存焉。欲是其所非，莫若以明，蓋自知者明，苟能自知，則昔之所是，卒而非之，所謂真是非者見焉。經之所言，蓋明是非也，夫豈妄哉，大惑者終身不解，大愚者終身不靈，非審諦不妄之言，孰能追愚惑之非歟。

深妙章第十四

老君曰：道言深妙，經誠乙密。

道深而難測，妙而難名，經以載道，故其勸戒之言，亦玄微而隱密也。

天地物類，生皆從一。子能明之，為知虛實。子若不照，顯之不別。

太初有無，無有無名，一之所起，有一而未形，物得以生，謂之德。一者形變之始也，自天地至于萬物，皆從此生，則天下本在是焉，為道者，當明其本而已。蓋通於一而萬事畢，能知一，則無一之不知，不能知一，則無一之能知，苟非照之于天而自見，雖顯告之而不悟，況微言哉。

子志於有，無為所疾。為有所嬰，億載無畢。

無為故無敗，為則有成虧，無為者，道之本，有為者，道之病也。蓋俗之所為，皆墮於有，不能損實以為通，至於外內並獲而不可解者，以積習之久故也，惟聖人然後為能達綢繆。道言微深，子未能別。撮取於略，戒慎勿失。

悟道以頓，行道以漸，迷悟出於自性，非人力可致，行道以積習而成，在於謹守而勿失焉。蓋道之至妙，以悟而後得，行道之要，以多聞然後可守也。

先捐諸欲，勿令意逸。

罪莫大於可欲，遣其欲則心自靜矣。意則心有所感而生焉，無以持之，縱或至於敗。禮故正其心者，先誠其意。

閑居靜處，精思齋室。

棄事則形不勞，思則得之，不思則不得也。

丹書萬卷，不如守一。

夫道不欲雜，雜則多故，通於一而萬事畢。

經非不達，中有虛實。言有必無，子未能別。言無必有，子未能決。但當按行，次來次滅。

寓言十九，重言十七，寓言為廣，重言為真，則書之所言，虛實有無，特未定也。惟得其所以言者，為能知之，借曰未知，姑取正於書而按行焉，則損之又損，亦可以致無為矣。《傳》曰：世之所貴，道者書也。

道有真偽，福有凶吉。

有為則偽，無為則真，以偽獲福者凶，以真致福者吉。

罪有公私，明有纖密。

為不善於顯明之中，人得而誅之，為不善於幽暗之中，鬼得而誅之，天網恢恢，疏而不失，曾何纖密之遺哉。

占往知來，不如樸質。

前識者，道之華，而愚之始也，俗人昭昭，我獨若昏，俗人察察，我獨悶悶，雖有不假卜筮而知吉凶之明，不如樸質者欲復歸於樸故也。《道經》於終篇言鎮之以無名之樸，正此意也。

虛無章第十五

老君曰：虛無生自然，自然生道。

《道深章》曰：道深甚奧，虛無之淵。言道為虛無之本也。《道經》曰：道法自然。言道降而下，法自然也。於此言虛無生自然，自然生道，何也？蓋言虛無，則自然在其中矣，言自然，則道在其中矣。別而言之，裂一為三，合而言之，貫三為一，自其無所有，則曰虛無，無所因則曰自然，偶而應之，則曰道，烏有先後之殊哉。

道生一，一生天地，天地生萬物。

易變而為一，一者形變之始也，清輕者上為天，濁重者下為地，天地含精，萬物化生。

萬物抱一而成。

萬物以精化形，一者精之數也，原其始，則得一以生，要其終，則抱一而成。

得微妙氣化。

通天下一氣爾，自有形以至無形，自有情以至無情，神奇臭腐，與時更

化，皆氣使之然也。聚則生，散則死，盛則榮，衰則悴，搏之不得，幽而難測，可謂微妙矣。

人有長久之寶，不能守也，而益欲尊榮者，是謂去本，生天地之道也。

金玉滿堂，莫之能守，物有時而盡，何可長也。性命之真，與生俱生，至富國財並焉，豈特隋珠之重哉，昧者喪其不貲之樸，而矜覽外慕，其去本遠矣。生天生地，道之本也。《莊子》曰：道自本自根，自古以固存，生天生地。

恍惚章第十六

老君曰：虛無恍惚，道之根。

虛則無實，無則非有，恍者有光而無象，惚者有一而未形，虛無恍惚而在其中矣。《莊子》曰：惛然若亡而存，油然不形而神。此之謂本根。

萬物共本，道之元。

大哉乾元，萬物資始，至哉坤元，萬物資生。元者氣之始，道之用也，天之生物，使之一本，豈二致哉，萬物一府，同出於道爾。《莊子》曰：萬

物與我為一。
在己不亡^①，我默焉。

聖人著書立言，用意深而勸戒切，蓋欲倒置之民，返其性情，復其初也，使天下之人，皆能內觀取足，不失其在我之真，聖人將密爾忘言，不可以容聲矣。《孟子》曰：予豈好辯哉，予不得已也。

生置章第十七

老君曰：生我於虛，置我於無。

虛化神，神化氣，氣化形，物所以生也。魂炁歸於天，形魄歸於地，骨骸返其根，我尚何存，則亦復歸於無爾。生我於虛，原始而言之也，置我於無，要終而言之也。

生我者神，殺我者心。

神守其形故生，神去於形則死。人心惟危，僨矯^②而不可係，宵人之離形者，心則使之，此致道者所以忘心。

夫心意者，我之所患也。我即無心，我何知乎！

賊莫大於德有心，有心斯有意，意者

謬心也，人以有身為大患者，以有意存焉爾。誠能心無所知，內靜其意，吾又何患，是以至人於羊棄意，《莊子》曰：兵莫憚於志，鏖鄒為下。

念我未生時，無有身也，直以積氣聚血成我身爾。我身乃神之車也，神之舍也，神之主也，主人安靜，神即居之，躁動，神即去之。

察其始而本無生，非徒無生也，而本無形，氣變而有形，形變而有生。一受人之形，若運轉而不能自止者，孰居無事推而行是哉，神實妙之，子輿曰：以神為馬，予因而乘之，豈更駕哉，故曰我身乃神之車。不特為神之車，又為其舍焉，蓋身者神之宇，所以形生而不敝者，以其保神也，全其形而不虧，神將來舍矣。傳曰：七竅者，精神之戶牖，神以身為舍可知矣。身不特為神舍，又為其主人焉，蓋感之者為主，應之者為客，神未嘗先物也，應物而有所麗，猶客為主所覆，而受命於主也，身為神之主，人可知矣。主人安靜則居之，形完

則神全也，躁動則去之，質朽則神喪也。

是以聖人無常心者，欲歸初始，返未生也。

內觀其心，心無其心，故能返其性情而復其初。《莊子》曰：既已為物矣，欲復歸根，不亦難乎，其易也，其惟大人乎。

人未生時，豈有身乎？無身當何憂乎？當何欲哉！故外其身，存其神者，精耀留也。道德一合，與道通也。

吾有大患為吾有身，及吾無身吾有何患？蓋身非我有，是天地之委形，生非我有，是天地之委和，認而有之，皆惑也。睹道之人，不以利累形，不以形累心，四肢百骸，將為塵垢，故外其身而身存，神未嘗有所困也。夫然，故形全精復，與天為一通乎，道合乎德矣，蓋失道而後德，失德而後仁，道德一合，則德總乎道之所一，而無成與毀也，唯達者可以語此。

為道章第十八

老君曰：古之為道者，莫不由自然。故其道常然矣，強然之即不然矣。夫何故？以其有思念，故與道反矣。

曲者不以鈎，直者不以繩，圓者不以規，方者不以矩，天下之常然也。為道者，居無思，行無慮，順其自然，無容心焉，夫豈益生勸成，而有斷鶴續鳧之患哉，故其道亘萬世而無弊。

是以橐籥之器，在其用者。虛實有無，方圓大小，長短廣狹，聽人所為，不與人爭。善人在於天下，譬如橐籥乎，非與萬物交爭，其德常歸焉。以其空虛無欲故也。

橐籥虛而能受，受而能應，道幾似之。善人之在天下，順而不逆，應而不藏，常處於不爭之地，而天下莫能與之爭，其猶橐籥也，處重而人不輕，處前而人不害，其德常歸焉。《莊子》曰：行賢而去其自賢之行，安往而不愛哉。

欲者凶害之根，無者天地之原。莫知其根，莫知其原。聖人者去欲而入無，

以輔其身也。

罪莫大於可欲，故為凶害之根。天地者，形之大也，而有形生於無形，故為天地之原，人之有欲，決性命之情以爭之，莫知其根也，不見天地之純，莫知其原也。聖人則不然，灑心去欲，而遊於無人之野，則以貴愛其身，與道相輔而行故也。

色身章第十九

老君曰：人皆以聲色滋味為上樂，不知聲色滋味，禍之太樸，故聖人不欲以歸無欲也。

好色音聲厚味，世俗之所樂也，目不得好色，耳不得音聲，口不得厚味，則大憂以懼。殊不知五色令人目盲，五音令人耳聾，五味令人口爽，是三者，身之大患也。然目之慕色，耳之慕聲，口之慕味，皆生於有欲，罪莫大於可欲，而欲者德之累，是以聖人欲不欲，而復乎素樸也。

道虛章第二十

老君曰：道者虛無之物，若虛而為實，無而為有也。

道之為物，惟恍惟惚，恍兮惚言，若無而非無，若有而非有也，既曰虛無，而謂之物者，即不物之物也。道深章言虛無之淵，此言虛無之物，淵言其體，物言其用，故繼之曰：若虛而為實，無而為有，虛而為實。《莊子》所謂虛則實是也。無而為有，《道經》所謂兩者同出而異名是也。天者受一氣，蕩蕩而致清，氣下化生於萬物，而形各異焉。

大易既判，天得一以清，萬物化作萌區有狀，皆其所資始，《列子》曰：天地氤氳，萬物化生。

是以聖人知道德混沌玄同也，亦知天地清靜皆守一也，故與天地同心而無知，與道同身而無體，而後天道盛矣。

德總乎道之所一，渾渾沌沌，終身不離，玄之又玄，衆妙之門也，天得是，故無為以之清，地得是，故無為以之寧，聖人誠能兩間，天道雖遠，見之以心，故明於天而同乎無知，通乎道而合乎無體，與天為徒，與道為一，而道與乎世矣。

以制志意而還思慮者也，去而不可逐，留而不可遣。

夫志，氣之帥也，氣，體之充也，持其志，無暴其氣，將返其性情而復其初，則出思不思，而思出於不思矣，來者勿禁，往者勿止，不將不迎，應而不藏，雖覆却萬物方陳乎前，而不得入其舍。《易》曰：天下何思何慮。

遠者出於無極之外，不能窮也，近在於己，人不見之。

四海雖遠，治之在心，反求諸己，萬物咸備，然道在邇，而求諸遠，是猶目之明，能見百步之外，而不能自見其睫也。

是以君子終日不視不聽，不言不食，內知而抱玄。

《傳》曰：內視之謂明，反聽之謂聰。不視不聽，則目無所見，見曉於冥冥，耳無所聞，聞和於無聲也。《易》曰：君子以慎言語，節飲食。不言不食，則默而識之，終身不言，未嘗不言，無饑渴之害，味人之所不味

也。凡此無他，復以自知抱一而不離故爾。

夫欲視亦無所見。

聖人見道不見物，而視人所不視。《莊子》曰：賊莫大於德有心，而心有眼。《經》曰：聖人為腹不為目。

欲聽亦無所聞。

聞者非謂其聞，彼也自聞而已，豈聽之以耳哉，仲尼所以六十而耳順。

欲言亦無所道。

縱口之所言，更無利害，故有謂無謂無謂有，而遊乎塵垢之外。

欲食亦無所味。淡泊寂哉，不可得而味也，復歸於無物。

味之所味者嘗矣，而味味者未嘗呈味，味者道也，真人其食不甘，以道之出口，淡乎其無味也，惟返其性情而復其初者能之。《道經》言視之不見，聽之不聞，繼之以復歸於無物，與此同意。

若常能清靜無為，氣自復也。返於未生，而無身也，無為養身，形體全也，天地充實，長保年也。

虛化神，神化氣，道之委也，氣化神，神化虛，道之用也。蓋志一則動氣，氣一則動志，惟持其志，無暴其氣，則虛而物不能汙，靜而物不能雜，淡而無為，將見氣合於神，神合於無，遊乎物之初，外形體而不有矣。以其不自生，故能長生，所以全其形骸，與天地齊其長久。《莊子》曰：無為則俞俞。俞俞者，憂患不能入，年壽長久矣。

哀人章第二十一

老君曰：人哀人不如哀身，哀身不如愛神，愛神不如含神，含神不如守身。守身長久長存也。

守孰為大。守身為大，身之所以存者在養神，神之所以全者在守身。謹修其身，抱神以靜，則人與物化，而我獨存，長生久視之道，殆不出此。

西昇經卷中

- ①「言出」，《西昇經集註》作「言處」。
- ②「風聲豈可聚」，《西昇經集註》作「風聲豈緒」。
- ③此句，《西昇經集註》作「茂多卒天」。
- ④此句，《西昇經集註》作「而為無為」。
- ⑤此句，《西昇經集註》作「空滅成无」。
- ⑥此句，《西昇經集註》作「若能明之」。
- ⑦此句，《西昇經集註》作「孰知能追」。
- ⑧決，《西昇經集註》作「決」。
- ⑨此句，《西昇經集註》作「在己不忘」。
- ⑩「債矯」，據《莊子·在宥》當作「債驕」。
- ⑪此句，《西昇經集註》作「人皆以聲色滋味為樂」。
- ⑫疑此句字有舛誤。
- ⑬此句，《西昇經集註》作「无自復也」。

西昇經卷下

神生章第二十二

老君曰：神生形，形成神。形不得神，不能自生，神不得形，不能自成。形神合同，更相生，更相成。

神妙萬物而為言，神生形也，身乃神之車，神之舍形成神也，蓋神去於形謂之死，而形非道不生，形資神以生故也。有生必先無離形，而形全者神全，神資形以成故也。形神之相須，猶有無之相為利用，而不可偏廢，惟形神俱妙，故與道合真。

神常愛人，人不愛神^①。

攝汝知一汝度，神將來舍，目無所見，耳無所聞，心無所知，神將守形，神之愛人也如此。然神好清而心擾之，神好靜而欲牽之，矜覽外慕，逐物忘返，無一息之頃，内存乎神，欲抱神以靜難矣。聖人復命之常同乎無知，雖聖智亦在所擯，故能神全不虧，異乎衆人也。

常安章第二十三

老君曰：聖人常安，與天地俱安，而鬼神通。衆人皆安其所不安，即不安矣。

聖人安其所安，不安其所不安，衆人不安其所安，安其所不安。安其所安，同於道也，故與天地齊其長久，而可與祐神，所以常安。不安其所安，蔽於物也，不亡以待盡，其行盡如馳，而莫之能止，何安之有。

蓋天道減盈滿，補虛空，毀強盛，益衰弱，損思慮，歸童蒙，塞邪知，聖人之樸也。

盛極則衰，升極則降，堅則毀，銳則挫，自然之理也。天之道，高者抑之，下者舉之，有餘者損之，不足者補之，蓋順其自然無容私故也。聖人法天，損之又損，無思無慮，蒙以養正，復歸嬰兒，閑邪存誠，智巧不作，則以安其所安，復乎素樸故也。是以天下尚孝，可謂養母，常能愛母，身乃長久。

天下有始，以為天下母，道者萬物之母，而物其子也。孝子之養親，一舉

足一言動，不敢忘焉。聖人體道，猶事親也，豈須臾可離哉。

身心章第二十四

老君曰：身之虛也，而萬物至，心之無也，而和氣歸。

· 養志者忘形，致道者忘心，離形去智，同於大通，則身無形累之患，而物自賓。內觀其心，心無其心，則心無使氣之強，而氣自復。

故善養身者，藏身於身而不出也，藏人於人而不見也。

惟藏天下於天下者，可以語此。

故君子之治，必先死於國，既死不亡，其國盛也。民不敢散，更復充也。

士見危致命，忠義許國，殺身成仁，雖死而不亡。得賢則能為邦家立太平之基，國之所以盛，天下之父歸之其子焉，往民之所以充也。

若能知常，施行反也，衆人歡樂，用生也。動而失之，壽命竭也。

復命曰常，知常曰明，真常之道誠能知之，其所施設則異衆人矣。蓋君子樂得其道，小人樂得其欲，其所施

行，若東西之相反也。以欲為樂，將以生生，適以喪生，樂未畢，而哀繼之，以道為樂，樂則生矣，其為樂可勝計耶！《莊子》曰：俗之所樂，果有樂無有哉！無為誠樂矣，又俗之所大苦也。

夫天下大物哉，甚綿綿也，冥冥混沌不可知也。知之者去之，欲之者離之，近之者遠之。

有物混成，字之曰道，強為之名曰大，自古固存，幽深微妙，不可以智知也。跂而望之在乎前，棄而忘之在乎後，非有心者所得遠，無心者所得近，渾渾沌沌，終身不離，若彼知之，乃是離之。

是以聖人非託於天下，亦非託於鬼神，亦非託於萬物。常以虛為身，亦以無為心。此兩者，同謂之無身之身，無心之心，可謂守神。守神玄通，是謂道同。

有大物者，不可以物，物而不物，故能物物，明乎物物者之非物，豈獨治天下而已哉！以虛為身，以無為心，

而一無所託，所謂不物也。身心兩忘，唯神是守，守而勿失，與神為一，則道將與汝居，而合乎大同矣。

無思章第二十五

老君曰：智士無思慮之變，常空虛無為恬靜，修其形體，而萬物育焉。

天下何思何慮，大智觀於遠近，以天下觀天下，虛靜恬淡，寂寞無為，以全其形生，故精神四達，並流上際下，蟠化育萬物，不可為象。

變者貪天下之珍，以快其情。然後兵革四起，禍生於內。國動亂者，而民勞疲也。

《道經》曰：不貴難得之貨，使民不為盜。《莊子》曰：擿玉毀珠，小盜不起。

夫國以民為本，民勞去者，國立廢矣。所謂出其無極之寶，入賊利斧戟也。是以聖人無為無事，欲安其國民也。

民為邦本，本固邦寧，不知以其所愛及其所不愛。爭地以戰，殺人盈野，爭城以戰，殺人盈城，是猶出無極之寶，而入賊之利斧戟也。聖人無為

而民自化，無事而民自富，豈務殺人之士民兼人之土地哉。

故曰：子能知一，萬事畢。無心德留，而鬼神伏矣。

能知一則無一之不知，不能知一則無一之知。德者得也，通於一而得之者，以無心故也。萬事皆出於一，鬼神之所以靈，亦出乎吾心而已，無心之心，可與祐神，故兩不相傷，而德交歸焉。

我命章第二十六

老君曰：我命在我，不屬天地。

禍福無不自己求之者。

我不視不聽不知，神不出身，與道同久。

目無所見，耳無所聞，心無所知，汝神將守形，形乃長生。

吾與天地分一氣而治，自守根本也。

通天下一氣爾，自本自根，自古以固存，能知守之則無不治矣。《列子》

曰：天地與我並生類也。

非效衆人行善，非行仁義，非行忠信，非行恭敬，非行愛欲，萬物即利來。

為善無近名，故端正而不知以為義，相愛而不知以為仁，實而不知以為忠，當而不知以為信，欽中達彼，兼愛無私，利萬物而無所不利，非有心也。

常淡泊無為，大道歸也。故神人無光，聖人無名。

虛靜恬淡，寂寞無為，道德之至也，故聖人休焉。古之人葆其光而不露，晦其名而不彰，入於神，通於聖，蓋體諸此。

兵者章第二十七

老君曰：兵者天下之凶事也，非國之寶。寶之者，而不用也，用之者，動有亡國失民之患也。

兵者不祥之器，非國之寶。然天生五材，闕一不可，雖存所寶，豈得已而用之。不知出此，而樂殺人好攻戰，豈為民父母之道哉！《傳》曰：黷武無烈。

是以聖人懷微妙，抱樸質，而不敢為，與天下交爭焉。雖有猛獸不能據也，雖有蜂蠆蟲蛇不能螫也，雖有兵刃弗

能害也。以其積德玄通故也，是以天下莫能害焉。

道常無為而無不為，聖人體道夫何為哉？不與物爭，而天下莫能爭焉。此無他，積善成德，而神明自得。故忤物而不懼，兇無所投其角，虎無所措其爪，兵無所容其刃，而物莫之能傷也。《莊子》曰：人能虛己以遊世，其孰能害之。

柔弱章第二十八

老君曰：天下柔弱莫過於氣，氣莫柔弱於道。道之所以柔弱者，包裹天地，貫穿萬物。夫柔之生剛，弱之生強，而天下莫能知其根本所從生者乎。

氣也者，虛而待物者也，氣始於太初，而道在太極之先，則氣本於道也。弱者道之用，自天地以至萬物，皆本於是，有乎生而莫見其根，有乎出而莫見其門。

是故有以無為母，無以虛為母，虛以道為母。自然者，道之根本也。

無動不生無而生有，有不離無，無因有著，有無異用，皆同於虛，虛非無

也，無實而已。虛無之宗，道實妙之，三者名雖異，而皆本於自然，為母之言，亦筌蹄爾。

民之章第二十九

老君曰：民之所以輕命早終者，民自令之爾。非天地毀，鬼神害，以其有知，以其形動故也。

禍福無門，唯人自召。宵人之離形者動與過也，然則不終其天年而中道夭，非天地鬼神毀而害之也，人自取之爾。《書》曰：天作孽，猶可違，自作孽，不可逭，此之謂也。

是故無有生有，無形生形，何況於成事而敗之乎。

天地者，萬物之父母，天施地生，其蓋無方，曲成萬物而不遺，夫豈容心以敗其成事哉！然則民之輕命早終，非陰陽賊之，心則使之也。

人欲長久，斷情去欲，心意以索，命為反歸之，形神合同，固能長久。

天地能長且久，而人不能者，以其任情肆欲，放心縱意，自遺其咎故也。誠能忘其所不忘，而反求諸己，則形

生而不敝，神全而不虧，形神合而不離，與天地齊其長久，斯無難矣。

天下章第三十

老君曰：人雖在天下，令意莫在天下；人雖在國，令意莫在國；人雖在鄉，令意莫在鄉；人雖在家，令意莫在家；神雖在身，令神莫在身，是謂道人。

人之生也，形不盈仞而心侔造化，豈滯於形體，拘於方隅哉！兼忘天下，一宅而寓於不得已爾，以國觀國，以鄉觀鄉，以家觀家，亦莫不然。古之人所以處其家，如逆旅之舍，觀其鄉如戎蠻之國，蓋體此也。至於神之在人，經太山而無介，入淵泉而不濡，處卑細而不憊，充滿天地，揮斥八極，妙萬物而無方，初不累於七尺之軀也。昧者橫私於己，仞而有之，將以盡神，何異守唐肆之遺蹤，而望其得焉哉。

意微章第三十一

老君曰：患生不意，禍生絲微。禍患多臧於隱微，而發於人之所忽，

聖人防微慎始，用智於未奔沉之前，蓋以此也。

善生於惡，利生於害，

有善而惡為之亞，有利而害為之對，物莫不然，惟去善而自善，則善惡一致，蓋將簡之而不得以美利，利天下不言所利，則無所不利，而未始有害。

大生於小，難生於易，

其作始也簡，其將異也必巨，大生於小也，苟以為易，難將至矣，難生於易也。《德經》曰：天下之大事必作於細，天下之難事必作於易。

高生於下，遠生於近，

高必基於下，遠必自於近，故九層之臺起於纍土，千里之行始於足下。

外生於內，

有諸中者，必形諸外。

貴生於賤，動生於安，

貴以賤為本，靜者動之基。

盛生於衰，

無冬之閉藏，則無春之蕃鮮。

陰生於陽，

陽不極，則陰不生。是故有無之相生，虛實之相成。是以有歸有，無歸無也。

自無出有，有極歸無，相生故也，由虛為實，實復為虛，相成故也，自善惡以至陰陽，莫逃乎此。然有無迭用，以類而應，有善則有惡，有則歸有，無利則無害，無則歸無，各象其德，若影響然。此為道者，不蔽於有，不溺於無，而桀立乎中央。

在道章第三十二

老君曰：人在道中，道在人中。魚在水中，水在魚中。道去人死，水乾魚終。

道無乎不在，萬物職職，何莫由斯道也，況於人乎！《莊子》曰：行於萬物者道，道不遠人，人自遠道爾。其猶魚之在水也，魚失水則死，人失道豈存哉。

故聖人自知返歸未生，捐棄驕奢，絕除憂思。是故形隱神留，天下歸焉。

聖人復以自知遊乎物之初，外觀無物，內觀無心，驕奢憂思，內外兩忘，

故鍊氣成形，鍊神合道，不期民之歸而自歸。《道經》曰：執大象，天下往。

無為無事，國實民富，保道蓄常，是謂玄同。

我無為而民自化，我無事而民自富，則復乎至幽，得其所一而同焉故也，道之真常，無異於此。

有國章第三十三

老君曰：有國者，其根深也。

莫知其極，可以有國，有國之母，可以長久。

天地覆載，萬物蓄養，金玉重寶，不積留也。

天無私覆，地無私載，故天不愛其道，地不愛其寶。

夫外天地者，有天地。

道之大全，生天生地，則天地之表，蓋有大天地者，誠能知天地與我並生而外之，則天地雖大，不出吾之度內矣。

外其身者，而壽命存也。

外死生，遺禍福，而神未嘗有所困，

故與天地並，而莫知其極。《道經》

曰：外其身而身存。

是以君子善人之所不善。

不善者吾亦善之。

喜人之所不喜。

得之則喜，失之則憂，人之常情也。

君子於失得勿恤，而所喜者在道，何

憂哉！故其可喜也，終無已。

樂人之所不樂。

天樂天，聖樂聖，《莊子》曰：吾以無

為誠樂矣，又俗之所大苦也。

為人之所不為。

欲得人所不得，修人所不為。

信人之所不信。

至信之人可以感物，商丘開信，偽物

猶不逆，況彼我皆誠哉。

行人之所不行，是以道德備矣。

行者行其所不能行也，如上數者，皆

人之所不能行，而君子能行之，故積

善成德，德兼於道，而道德咸備。

皆有章第三十四

老君曰：道非獨在我，萬物皆有之。萬物不自知，道自居之。

道無乎不在，萬物之所共由也，豈獨智者有之，瓦礫稊稗咸與有焉。道行於萬物，而物不自知也，道不違物，物自違道爾。

衆人皆得神而生，不自知神自生也。君有德施於百姓，百姓不自知受君之德也。

神妙萬物而為言，物得是以生焉，百姓日用而不知，猶受君之德而不知，皆曰我自然，謂帝力何有於我也。

是故聖人藏神於內，魄不出也。守其母，其子全，民熾盛，保其國也。玄虛積充，受命長也。

《道經》曰：載營魄。蓋魂陽而動，魄陰而止，聖人以神御氣，以魂制魄，故神常載魄而不滯於魄，尚何動出之有。神為氣母，氣為神子，守其母而子全，自然之理也。猶之民焉，民為邦本，本固邦寧，氣為命之元。氣全則命永存也，《經》曰：得微妙氣化。《莊子》曰：氣也者，虛而待物者也。元虛之氣配義與道，充塞四體，無是餒也，元虛厥躬，則壽敝

天地，無有終時，不難致矣。人能圖知^①天地萬物，而不自知其所由生，反命歸本，是大不知也。

自券之內無適非本，自券之外皆其末也。世之人逐末忘本，敝精神於蹇淺，雖天地之大，萬物之多，皆能役思慮以知之，不能反求諸己復以自知，道在邇而求諸遠，人皆曰予知，是大不知也。

治身章第三十五

老君曰：治身之道，先隱天地，靜居萬物之始。

玄牝之門，是謂天地根。所謂隱天地者，非伏其身而不見也，深根寧極隱於是焉。萬物之始，即天地之始也，無名天地之始，能歸其根以居之，其於治身也何有。混元謂仲尼曰：吾遊於物之初，正此意也。夫聖人通玄元，混氣思以守其身。

天一在藏，資元氣以立始，天五在府，資沖氣以成終，或清而快，或濁而遲，周流於一身，而為有生之本者，是氣也。妙而難名，混而不離，

唯聖人然後能通之，通之然後能守之，不知善持養，則昔之充者今或餒，昔之純者今或散，欲守而勿失不可得矣。關尹謂至人潛行不窒，蹈火不熱，行乎萬物之上而不慄。為純氣之守，其有得於此乎！

俗人以情愛貪欲以守其身。此兩者同有物而守其身，其道德各異焉。

孰不為守，守身守之本也，然所守之道，則守而不失，所守以妄，則莫之能守。抱元專氣，通於道也，道無時而盡，情愛貪欲逐於妄也，豈可長保哉，此兩者同有物以守其身，則物與物何足以相遠。蓋氣虛而待物者也，而合乎混冥，則物物而非物矣，物物而非物，即不物之物也，不物之物，唯獨智者能明之。由於獨智入自聖門，由於情欲入自禽門，其守身則同，其所以守身則異。

道德章第三十六

老君曰：道德天地，水火萬物，高山深淵，各有所歸。

自道而降，墮於域中，天高地下，萬

物散殊，自有形以至無形，自有情以至無情，芸芸職職，各從其類，自然之理也。

夫道非欲爲虛，虛自歸之；

唯道集虛。

德非欲於神，神自歸之；

積善成德，而神明自得《易》曰：顯道神德行。

天非欲於清，清自歸之；地非欲於濁，濁自歸之；

清輕者上爲天，濁重者下爲地。

濕非欲於水，水自歸之；燥非欲於火，火自歸之；

水流濕，火就燥。

萬物非欲見於形，形自見之。

留動而生物，物成生理謂之形，既已爲物矣，未免乎有形之累也。

高山大澤非欲於飛鳥虎狼，飛鳥虎狼自來歸之；深淵河海非欲於魚鼈蛟龍，魚鼈蛟龍自來歸之。

積土成山，禽獸群焉，積水成淵，魚鼈生焉。《莊子》曰：長於水而安於水，生於陵而安於陵。

人能虛空無爲，非欲於道，道自歸之。由此觀之，物性豈非自然哉。

道常無爲，損之又損，以至於無爲，道將爲汝居矣。《素問》曰：虛無恬淡，真氣從之。

善惡章第三十七

老君曰：百姓行善者，我不知也；行惡者，我不知也；行忠信者，我不知也。是以積善善氣至，積惡惡氣至。

聖人無常心，以百姓心爲心，善惡兩忘，付之自爾，不善者亦善之，不信者亦信之，善惡誕信冥於一致，將擇焉而不得，夫豈譎譎然分別而務求知哉！然視履考祥，積善積惡，殃慶各以其類，至若影響，然顧人所行何如爾。

是故聖人言，我懷天下之始，復守天下之母，而萬物益宗，以活其身。

天下之始，所謂無名天地之始也，天下之母，所謂有名萬物之母也，兩者異名，同謂之道。道之所在，萬物宗之，可以保身蓋優爲矣，莊子所謂至樂活身，唯無爲幾存是已。夫以混

元之聖，猶不自居，取聖人之言以爲證，此其所以聖益聖也。

吾意常不知，安能知彼行善惡焉。

知之淺矣，不知深矣，知之外矣，不知內矣，則不知乃真知，而知乃不知也。然則不知彼而自知，茲其所以爲大知歟。

積善神明輔成，天道猶祐於善人。

積善無已，則神之聽之，介爾景福，自天祐之，吉無不利。《德經》曰：天道無親，常與善人。

寂意章第三十八

老君曰：吾道淡泊寂，意死者生，靜而復命也。

淡則不與物交，泊則靜止不流，道之真也。體道者在於形如槁木，心若死灰，內靜其意，歸於寂定，而無以生爲，故爾以其不自生，故形生而不敝，皆復命之常也。

生生積浸潤，滋洳留滯，玄冒沾洽，元氣包之，其根蓋深。乃四固，中無心，故能致萬物精華。無極之物，自然來歸之，以其空虛無欲故也。

生之所生者死矣，而生生者未嘗終，生生者道也，悟道以頓，一息而神，行道以漸，在於真積力久焉。誠能積而不已，浸潤以成，則精全神王，腎水澤而兩氣滋，廉泉玉英，周流無礙，孰有壅闕之患哉！夫然，故天一玄妙之氣覆冒形軀，靈液流暢，灌溉五官四肢百體，元氣包括，根深而蒂固，心虛而腹實也，萬物之精華，不期至而自至矣。古之人能腹天氣傳精神者，蓋得於此。

戒示章第三十九

老君曰：喜，吾重告爾，古先生者，吾之身也。今將返神，還乎無名。

無名天地之始，還乎無名，所謂遊乎太初也。

絕身滅有，綿綿常存。

外其身而身存。

吾今逝矣，亦返一原。

太初有無，無有無名，一之所起一之原，太初之先是也。太初之先，則亦不可得矣，返乎此，則體盡無窮而遊無眛，所謂主之以太一也，太一則一

之原也。仲尼謂混元曰：向者先生形體掘於槁木，似遺物離人而立於獨也，其有見於此乎。

忽焉不見，斯須，館舍光炎，五色玄黃。喜出中庭叩頭曰：願神人復一見，授以一要，得以守元。即仰睹懸身坐空中，去地數十丈。其狀金人，存亡恍惚，老少無常。

聖人周盡一體，形充空虛，故神妙不測，存亡自在，超忽變化，不可名狀。

〔老君〕曰：吾重誠爾，爾其守焉。除垢止念，靜心守一。衆垢除，萬事畢，吾道之要也。誠竟復隱。喜不知所之，泣涕追慕，退官託疾，棄念守一，萬事畢矣。

《傳》曰：通於一而萬事畢。一者何也？精之數也，天得是以清，地得是以寧，物得是以生，誠能守而勿失，則復乎天下之至精矣。然而垢念未忘，雖欲守之，有不可得必也。遺息衆累，一毫莫嬰，妄念不起，靈臺有持，如鑑之明，而塵垢不止，以是抱而不脫，天下之能事畢矣，此聖人所

以貴精也。昔廣成子修身千二百歲，而形未嘗衰，蓋得乎此。混元謂南榮越曰：衛生之經，能抱一乎？能勿失乎？正與此同。

西昇經卷下

①此句之下，《西昇經集註》尚有二句：「故絕聖棄智，歸無知也。」

②「而不敢爲」，《西昇經集註》作「而不敢有爲」。

③「受命」，《西昇經集註》作「壽命」。

④「人能圖知」，《西昇經集註》作「人能徒知」。

（曾召南點校）

016 西昇經集註

經名：西昇經集註。北宋道士碧虛子（陳景元）纂集。六卷。底本出處：《正統道藏》洞神部玉訣類。參校本：宋徽宗政和御注本。

西昇經集註序

夫世道交喪，慰愍沉純，聖人雖不處山林之中，其德隱矣。周之衰也，老氏非伏其身而弗見也，非閉其言而不出也，非藏其智而不發也，時命大謬也。已而厭世去官，將反以无迹，且天地閉，賢人隱，其來久矣。當是時也，關尹望氣，知有博大真人西遊，乃齊莊遮道邀迎至舍，請問乙密。於是復為著言若干，其微言奧旨，出入五千文之間，紀而成書，名

曰《西昇記》云。道自然，行者能得，聞者能言，能得者庸詎曉焉，能言者庸詎知焉，故藏身於身而不出也，藏人於人而不見也。至若虚无恍惚，是有物之根，萬物共本，是有物之元，知之者去之，欲之者離之，近之者遠之，唯得之者在己不忘，故藏其狂言而默然，故今之傳者，非已陳之芻狗乎，今之味者，非古之糟粕乎。然則為道日損，非忘行乎，為學日益，非貴言乎，故有得一萬事畢，無心留德而鬼神服者，是知一與言為二，二與一為三，自此已往，密行至言曼衍而无窮極也，是故莊子多稱其言有在於是者。碧虛子聞其風而悅之，搜遺編於藏室，得注解者凡五家，先校取經之是者，後竄去注經之非者，集成二篇，今作六卷依舊號曰《老子西昇經》。將示同學，使昭昭乎見古人之大體，非徒因是因非，蔽精神於蹇淺，而忘太清寥廓者也。

西昇經集註卷之一

華陽韋處玄 句曲徐道邈 冲玄子 任真子李榮 劉仁會註 碧虛子集

西昇章第一

老子西昇。

冲曰：首標尹公記事之由，用明老君行化之意也。

開道竺乾。號古先生，善入无為。

李曰：西昇者，自東祖而也。開道者，老君迹處東周，道行西極，將開道彼土，故云開導。竺乾者，西極之國名也。號古先生者，謂元。上大，道，先天而生，故曰古先生，即老君之別號也，夫聖德廣被，无所不適，知能照境，雖明常昧，體能起用，雖動而常靜，故妙契於名理，善入於獨立，凝湛於无為，所謂道常无為而无不為，有物皆在，在物皆无也。

不終不始，永存綿綿。

李曰：有生故有始，有死故有終。道既无死无生，故云不終不始也。

真常不動，自古固存也。

是以昇就，道經歷關。關令尹喜見炁。

李曰：自茲春境，適彼秋方，演暢古先生之道，成就長存之德，經途所履，由函谷關。冲曰：關即古桃林也，關令尹喜見炁者，蓋尹喜著此經之首，述相遇之由。是時尹公於終南山下結草為樓，瞻星望炁，見天理東行，紫雲西邁，浮關之炁，狀若龍蛇之形，西戾天漢，一月之內，融風三至，知有聖人度關之象，求出為關令以伺之，故云見炁。

齋待遇賓。

徐曰：積感玄應，紫炁先浮，清齋候待，果遇聖賓。

為說道德，列以二篇。

李曰：知機請長存之祕寶，虛應疏靈妙之玄宗，欲使理物歸，真人皆得道。列，分也，篇，編也，謂簡編寫之，分為兩卷。

告子道要^③。

冲曰：告者，老君發言之初^④。子者，謂尹公也。將告至道修真之要，

用明登真度世之因。要者，至妙之總言也。

云道自然。

李曰：自然者，內无自性，外絕因待，清虛玄寂，莫測所由，名曰自然。不可以自他分其內外，不可以有无定其形質，不可以陰陽定其氣象，不可以因緣究其根葉，所謂虛无自然之大道也。

行者能得，聞者能言。

李曰：代有封執曲士，滯俗常流，聞云道自然，謂无修學，致令行者入道无由，故以此言勸令遵奉，若能順理而習，依教而行，可以成真，故云能得令聞道而行，行皆得法，以道而言，言皆合理，始曰能言。

知者不言，言者不知。

冲曰：既知妙道非形聲法，不可以言理，名之以形聲言道，去道遠矣。李曰：理本无言，借言詮理，理既玄悟，自合忘言，故曰知者不言，滯教生迷，執言為是，既不達理，故云言者不知。

所以言者，以音相聞。

李曰：相聞是通達也，既其知者不言，言者不知，云何聖人而作玄言，本欲借言以通達於理，而道本无言也。

是以故談以言相然^⑤。

劉曰：啓悟未聞故須言，告此言彼解，是曰相然也。

不知道者，以言相煩。

劉曰：不會玄宗，徒爭名理。

不聞不言，不知所由然。

冲曰：了達之人，无言无說，自契真常，世俗之徒，无說无聞，不能悟道，故不知大道修習之因由也。李曰：所由然者，本迹理教真偽善惡也，若也聖人不言，凡人不聞，豈知善惡之罪福，真偽之邪正。教化開不言之機緣，始知未聞之至理，方可達其所以，知其所由，言之所說，利在於此。

譬如知音者，識音以絃。

李曰：音非虛發，必自絃來，理不獨明，終因言顯。

心知其言^⑥，口不能傳。

冲曰：知音之者，因絃以辯其宮商，習道之人，因言以辯其旨趣，二者无形无色，微妙玄深，心則了之，口不能述。李曰：心知音妙，利口不足以宣傳，智體理微，高辯焉能以窮究也。

道深微妙，知者不言。

劉曰：絲竹有聲音，解者尚不能說，況道无形相，知者豈復能言也。徐曰：微妙之道，絕于言說，故知者不言也。

識音聲悲，抑音內惟。

劉曰：失親得親，猶懷喜躍，迷道悟道，得不聲悲？抑音內惟者，棄言思理也。

心令口言，言者不知。

徐曰：心能明道，欲令口言，言則成妄，故曰不知也。冲曰：喻道難狀，如彼樂音，唯心了知，非口能述，述而言之，已乖道矣。劉曰：言猶心發也，口不知心，固忘言以求意也。

道深章第二

老子曰：道深甚奧，虛无之淵。

韋曰：奧者藏也，深者極也。夫道體虛无，而包含萬象，故復謂之淵奧也。徐曰：其深也，居宇宙之中，其奧也，為萬物府藏，其虛也，能包容天地，其无也，為大有生无矣。

子雖聞說，心不微丹。

冲曰：恐尹公雖有問道之心，而無精修之實，欲為顯述，故復戒之。李曰：此戒，勸也，微，細也，丹，赤也。言深奧之道，虛无之理，赤心微細，猶尚難知，浮意羸情，如何可了，必須行之以深，信之以篤，可以證也。

所以然者，何書不盡言。

徐曰：所以不能窮微盡妙，如此者何邪？由乎書不盡言，言不盡意故也。劉曰：言以宣理，書以寫言，理既无窮，書何盡也。

著經處文，學以相然。

徐曰：著經處文，書其旨略，而不具曲細，是故不易明究，欲令學者研精耽味，原始要終，覩縷微妙，以相解悟如此也。劉曰：著經以宣理，得理故相然。

子當寶之，內念思惟。

劉曰：保其教也，思其理也。自然之道，不與子期。

劉曰：道无今古，勤修者得，得者暗會，不可預期。

喜則稽首再拜，敢問學之奈何。

冲曰：老君戒勅慙懃，方將開演，喜則恭敬拜受，永冀宗修，敢問為學之方，何門契道。

善為章第三

老子曰：善為書術者，必綏其文。

徐曰：為，猶修也，緩，安也。學人若欲修靈書仙術，存真觀妙為於无為者，必須安心定志，求其文意，意得而後善修，善修而後業成也。冲曰：夫文優則事順，事順則理博，文簡則事當，事當則理精。既博而精，可謂善其文矣。

善論達其事者，必通其言。

冲曰：文既精博，言又該通，著經之義，於斯備矣。

勉而勤之，得道矣。

冲曰：文精言通，勉勵勤學，得道之

階也。劉曰：學文者善書，通言者能論，勉勤者得道，以此而言，故知道可學矣。

為正無處，正自居之⁸。

李曰：夫修正道，學无所學，為无所為，尚無正可正，有何處可處，故言為正無處，雖无心欲處，於正而正，自然歸之，

不受於邪，邪烝自去。

李曰：邪者有為之外事，不作非道之事，不作非為之累，故云邪烝自去。

所謂無為，道自然助。

冲曰：舉念皆正，孰敢為邪，正存邪亡，真道為助，可謂為無為矣。李曰：無處於正，正自臻之，不受於邪，邪自去之，此是自然之道而為福助。不善於祠，鬼神避之⁹。

劉曰：邪者求福，淫祀鬼神，鬼神惡奸嫉之梗甚，正者無求，敬而遠之，謙虛以居，而鬼神避之。

不勞於神，受命無期。

李曰：養生者其身清，修心者其神靜。靜則不勞，清則無染，不勞不染。與道同身，身與道同，命無期盡。劉曰：勞神養形，出生入死，不勞不養，壽命自長。

無進無退，誰與為謀。

徐曰：建德若偷，進無進也，進道若退，退無退也，和光不耀，同塵無染，與物同波，人莫知識，故邪魔不能干試，利欲不能傾動，虛空无心，誰能為謀害哉！劉曰：利害不懷，何進何退，推理任運，何所慮謀。

為是致是，非自然哉。

徐曰：是，此也，為此無為，事此無事，致此正道，豈非自然哉。李曰：此結正也，為正正歸，遠邪邪去，此為是致是也。非自然哉者，言是自然也。劉曰：金玉之質，非有時而美，至人之是，非有時而為。

喜則稽首，今聞命矣。

劉曰：重道尊師，致敬受誨。

慎行章第四

老子曰：慎而行之，寶而懷之。

徐曰：慎違科戒，勤行梵行，寶道貴德，懷真抱一也。劉曰：誠約使修行也。

吾將遠逝，不期自會。

劉曰：欲往竺乾也，同聲相應，豈待期乎。

尹喜受言誠深，則於關稱疾棄位，獨處空閑之室。

劉曰：靜亂殊途，事不兩濟，非棄名利，求道良難。

恬淡思道，臻志¹⁰守一。

李曰：清淨無欲，恬淡也，疑想存真，思道也。情不流蕩，故曰臻志。心無分別，故曰守一。劉曰：全無為也。

極虛本無，剖析乙密。

李曰：虛無者，道體也，言尹生思極虛無之體，窮本際之源也。乙密者，妙理也，乙之言一，密乃語也，妙理惟一，道心惟微，曉了分判，窮理盡性，故云剖析乙密也。

翫縷妙言，內意不出。

韋曰：雖翫縷妙言，以應羣生，而心

中寂然，未始有言，故曰內意不出也。李曰：妙言，玄教也，覩者，大無不包，縷者，細無不入。研尋大道，窮究幽微，暢此玄宗，通斯教本，唯法是務，無復外想，故云內意不出也。劉曰：乙密，猶微密也，探蹟微言，內以澄照，不役神思，向外追求也。

誦文萬過，精誠思徹。

徐曰：精，妙之極也，誠，真之篤也，徹，通也。言關尹誦經萬過，極精妙之理，篤真實之誠，洞暢玄虛，思通希微也。按《真誥》太極真人云：讀《道德五千文》萬過，則雲駕來迎。以斯而論，豈唯經道遠妙，亦由精誠思徹，故能致雲車羽蓋也。李曰：積功於教，玄悟於理，非由散漫，必在精誠。理教鑒無，不通境智，照之皆洞，故曰精誠思徹。

行真臻身^①，能通其玄。

徐曰：修行真素歸身，精耀留居，故能通玄達妙也。

論無極之源^②，故能致神仙。

冲曰：此關尹自述老君傳道之後，精誠修道之因。託疾退身，棄榮辭祿，冥心虛室，極志歸真，以恬淡為道樞，以虛無為道室，陰修密鍊，窮玄造微，研誦二經，精逾萬遍，遂得通源達要，長生神仙，證文始先生之階，登无上真人之位也。

道象章第五

老子曰：道象無形端，恍惚亡若存。

韋曰：視之不見，故無形，尋之不得，故無端。恍惚者，變化無兆之謂也。欲言其無，萬象以之而列，欲言其有，寂漠不可得而睹，故曰亡若存者也。徐曰：象，法也，似也，道以精神氣為體，雖有法象，似形而無形，但有光景炁象，端正題首，是無狀之狀，無物之象，恍有而無，惚無而有，故曰恍惚若亡若存者也。

譬如種木未生，不見枝葉根。

徐曰：木未生時，不見枝葉根莖，猶如道象未見，則窈冥空無也。劉曰：木雖復不見枝葉，不可言無，道雖無象，不得不有也。

合會地水火風，四時炁往緣。

徐曰：合會四大以成窠木，四炁時往時來，故有生成凋枯，因緣聚散也。譬如合會精神炁，結化而為道象，若玄一未復，周遍不成，則有去來離合也。

炁為生者地，聚合凝稍堅。

冲曰：天地山川，萬靈品物，稟道柔和之炁，成其堅大之質，漸積聚合，非百之功也。李曰：生必由炁，故炁為生，地初凝尚脆，久聚始堅，謂形已大也。

味異形不等^③，甘苦辛鹹酸。

冲曰：因於五炁而生五味，因於五行而生五神，神以內資，味以外養，五行有衰盛，故不齊等，五炁有遷革，故不並興，人能體而運之，資而養之，即上人生矣。

炁行有多少，強弱果不均。

韋曰：群生初受炁時，有醇薄不等，性行不同，故強弱多少不均一也。劉曰：動植之類，皆以炁始生之本，至乎光大，質性各異，炁行亦偏，所

稟自別。

同出異名色，各自生意因。

冲曰：炁之相生，同資於道，隨所稟受，名色有異，善惡強弱亦猶此也，心之所生，謂之意，識之所受，謂之因也。李曰：俱資於道，成受於炁，故言同出，名氏既別，色類亦殊，故言異名色。其心清者正而善，其識濁者邪而惡，立行既異，志性不同，故各自生意因。劉曰：凡有生者，同出於道，名號既別，章綵又殊，類聚羣分，意因名異也。

從是異性行，而有受形身。

李曰：本性既殊，為行亦異，為善為惡，受福隨形，六道流轉死生。

含養陰陽道，隨倚以為親。倚亦作寄。

韋曰：既為陰陽所含，寄胎和合而有其身，物情迷惑，不知同出於道，故隨所因寄，各親其親也。劉曰：中智之下，爰至昆蟲，但受其形倚而親也。故《莊子》云：一受其形，不忘以待盡。

生道非一類，一切人非一。

李曰：生化之道，其數甚多，人曰是人，物曰非人，萬品不同，故非一類也。徐曰：陰陽變通，謂生之道，二炁交和，謂生之德。德之所生，道之所化，萬物萬形，種類非一，一切種植，人與非人，皆稟道德而後生成也。

本出於虛无，感激生精神。

徐曰：虛无者，道也，言人物生化，本出於道，精炁和合，更相感激，遂生精神，精神結化為人身神，以言虛能生實，无能生有也。冲曰：天地之廣，萬類之殷，動植殊形，飛沉異趣，皆因无而化有，自道而受生，積炁為神，共宗化本也。

譬如起音者，掇絃手動傳。

劉曰：絃本无聲，鼓之乃成樂，由虚无本寂，感激乃生精神。

宮商角徵羽，口氣呼吸元。

李曰：掇，拾也。傳手拾於絃，而音始發，以口呼吸於炁，而聲始鳴，非口无以出聲，因絃方能振響，故知口為聲本，手為音元。况之於物，非道

不生也。絃謂琴瑟箏筑，口謂簫笛歌謠，以此舉喻也。

身口意為本，道出上首元。本靜在虛靜，故曰道自然。

李曰：有生即具身口意，身口意生，從何而得，必由於道，以為元首，故曰道出上首元，此合喻也。冲曰：口之所呼吸，身之所運行，皆起於意運。意者，神也，生神者，道也。意澄淨无為，即神安而契道，意躁競有欲，即神喪而傷生，虛靜凝心，乃合自然之道。劉曰：謂身口意本淨，无諸垢累，窮其所以，乃是道性自然。

五音所動搖，遂與樂色連。

冲曰：五音隱於玄默，則體道恬愉，五音流於律呂，則感物哀樂，此喻樸散而為器，淳散而為澆也。李曰：前明自然之道本來清靜，无視无聽，非色非聲，斯乃至至洪源玄玄妙本。今言受生之後，逐欲縱情，失虛靜之理，喪自然之道，聞五音之搖動，耳遂注焉，見五色之青黃，目便滯焉，

為有為之迷惑，乃聲色之所留連也。散陽以為明，布炁成六根。

劉曰：樂與色連，生生不絕，於是散陽和之炁，為情欲之明，以成六根，資身役用。

從是有生死，道遂散布分。

李曰：三業為因，六塵構染，緣善惡之行，受罪福之身，流轉三界，往還五道，一生一死，或苦或樂，無處不知，故言布分。劉曰：六根資身，翻為身害，嗜欲不節，故生死相連，神去形留，自然分散也。

去本以就末，散樸以澆淳。

徐曰：去其本源，就茲流末，散素樸以為仁義，澆淳真而為偽薄，離道以善，險德以行也。李曰：散朴，故言去本就末，故曰澆淳，失彼真源，淪茲俗境，喪敦厚之行，競澆薄之風也。

道變示非常，欲使歸其真。

冲曰：內明者，虛白其心，外明者，煩勞其慮，因成妄想，遂溺死生，道炁散而不淳，皆忘本而趣末，役役流

浪，舉世為常。大道之源，无名之本，革此常性，使返樸還真，人能修之，可證非常之道也。劉曰：示生死非常，令歸根復命。

西昇經集註卷之一

- ①「自東祖而也」，疑「祖而」為「往西」之誤。
- ②「元」，疑為「无」之誤。
- ③「告子道要」，政和御制注本作「告以道要」。
- ④「老君發言之初」，「初」字疑誤。
- ⑤此句，政和御制注本作「是故談以言相然」。
- ⑥此句，政和御制注本作「心知其音」。
- ⑦此句，政和御制注本作「子雖聞道」。
- ⑧此句，政和御制注本作「正自歸之」。
- ⑨此句，政和御制注本作「鬼自避之」。
- ⑩「臻志」，政和御制注本作「歸志」。
- ⑪「臻身」，政和御制注本作「歸身」。
- ⑫「无極之源」，政和御制注本作「論无極之源」，據補。
- ⑬此句，政和御制注本作「味異行不等」。
- ⑭此句，政和御制注本作「隨所倚為親」。
- ⑮此句，政和御制注本作「一切人非人」。

西昇經集註卷之二

華陽韋處玄 句曲徐道邈 冲玄子 任真子李榮 劉仁會註 碧虛子集

道生章第六

老子曰：告子生道本，示子之自然。

李曰：一炁之動，萬類羅生，咸以自然為宗，至道為本。而逐末者衆，歸根者希，告而示之，令其敦本，去茲有累，入彼自然也。

至於萬物生，情行相結連。

冲曰：生化妙本自然之道，為萬物之父母，天地之宗元，欲令關尹敬而尊之，重發此告也。劉曰：情發於內，行之於外，羈鎖相纏絆，何止相連。

如壞復成，如滅復生。

李曰：因緣輪轉，往還不絕，如壞復成，死此生彼，如滅復生，出幽入明。劉曰：此壞彼成，彼滅此生。

以成五行，陰與陽並。

徐曰：四炁分王，以成五行，五行相

生相殺，相壞相成，陰並則滅壞，陽並則生成。冲曰：五行有殊，道炁惟一，陰陽有異，道炁无偏。五行有滅有生，即春秋代謝，陰陽有成有壞，則歷劫推移。道在五行二炁之間，一而不變，故能為五行二炁之主，綿綿常存也。

輾轉變化，遂為物精。

韋曰：五行一廢一起，陰陽一往一來，亦猶人道一死一生，變化輾轉，物精不絕也。

吾思是道，本出窈冥。

李曰：是道者，是生死變化之道也，物既有礙，用實有窮，資道得通，始能无滯既本於道，故曰本出窈冥，道既不可思議，有无難測，不可分別，寄曰窈冥，非窈冥也。劉曰：皆自无形中來。

愚不別知，自謂適生。

冲曰：道之元生，始於元始，窈冥綿邈，為萬物之根。萬物之生，皆受道炁，炁本精一，物得而生，愚者不知，謂不由於道耳。李曰：愚者無知，

言適爾自生，不由於道，迷本也。子无道眼，安知生靈。

韋曰：此明生死變化之道，本出窈冥之中，深不可識。而愚人竊然自戀一生，以為適樂，既非體道之人，亦安知人得一以生，鬼神得一以靈者哉！李曰：道眼者，洞視无外，照幽微也。人者，有生之靈也。言迷者遠不能知道，近不能知身，故言子无道眼，安知生靈，至如知人者智，自知者明，始是智慧明了之人，無所不知也。

天地人物，虚无囊盈。

徐曰：二儀人物，皆生虚无大囊之中，盈滿宇宙之内也。冲曰：天地萬物，道炁乃冲滿其中。

一從无生，同出異名。

李曰：高天厚地，人倫物類，大小愚智，无有自爾獨化，一切皆本虚无，俱從道生，故言同；別性殊名，故言異。橐籥者，舉喻也。橐中出氣，籥中有聲，虚无中有萬象。劉曰：吹萬不同，其名亦異。

是亦本非，在所用正。

劉曰：事有逆順，理有變通，是非無常，執之者，或時止則止，時行則行，在所用正，勿窮其本也。

所字非字，乃知其識^①。

冲曰：是非有異，道用無差，不可以名字詮，不可以是非辯，至哉妙道，唯一而已矣。劉曰：得意忘言，信道斯篤。

當與明義^②，勿與愚爭。

李曰：就明師，依善友，議得失，知是非，徒爭外事之可否，不明修身之損益，勿取之羣小，鬥以無明，虛勞辭費，終無利益，故言莫與愚爭。

子取正教，勿信邪聽。

李曰：忘言得理，無為契真，正教也；有為累真，逐欲傷性，邪聽也。勿信者，當收視反聽，勿邪見邪聽也。劉曰：當機者，正理僻者邪。

何以知邪？子為物傾。

徐曰：情奔色欲之境，身馳名利之途，邪魔鬼物亂其神，榮華富貴惑其志也。劉曰：不會真趣，為物傾動。

何以知愚？不察言情。

韋曰：不知大道之自然，而外物之所傾者，皆邪人也，不察道言之情實，而大笑之者，皆愚人。劉曰：抱惑守愚，幾微不照。

爲道問道，爲經問經。

韋曰：知道爲真，問而行之，是不邪也，知經爲實，問而思之，是不愚也。劉曰：爲道者，應用無方，爲經者，議其陳迹。

問不本末，知愚冥冥。

李曰：道，理也，經，教也。冥冥無明之徒，暗而更暗也，爲道問道，訪理須達理也，爲經問經者，請教須解教也。今下士外不識教，內不達理，不知本也，不識教，不知末也。本末理教，俱悉不識，如盲人暗行，故曰冥冥。劉曰：本者，道也，經者，末也，擬議不知其本末者，真是愚冥者也。但知求福，不知罪嬰。

李曰：不知行正以立功，而反信邪以求福，斯須之福未來，究竟之禍已

至，此是爲罪之所嬰纏也。

但知養身，不知戮形。

李曰：以有爲滋味，愛養此身，生生之厚，動之死地，不自外來，正由六根遇此刑害也。劉曰：愚者爲善以求福，而復作惡以招罪，方資衣食以養身，而益侈美以喪命，故斷惡者福會，棄欲者身存。《莊子》云：人皆求福，已獨曲全。

嬰兒之姿，貴養厚敦。

劉曰：求福養身者，當如嬰之厚敦。忽無就形，知非常生。

韋曰：厚，醇也，敦，樸也，就，成也，學道者當知嬰兒之貌所貴，養其醇朴之性，忽然而自形，而無心成其形也，類然而自生，而未始知其生也。

無履太白，可令永存。

韋曰：履，行也，太者，存生之過厚也，白者，知見明了也。無行此二事，則同嬰兒之醇樸，近長存之道也。

有何妙意？乃欲相傾。

李曰：人皆去黑之白，出暗入明，今

言無履太白，有何妙意，太白異俗，爲俗所冤，勸令混濁，始得長久意之妙也，其在茲乎。

父子恩深，不足相聽^③。

李曰：師資義重，父子恩深，子有不和之事，必須從父之是，弟有不善之行，必須從師之善，是故貴之以師父，重之以訓誨，聽復之者也。

勿復噉音叫嘅音慨。遠近笑人。

李曰：噉嘅謂強梁誼諫也。無義之弟，不孝之子，不從父之命，不受師之令，悖惡於上，失子弟之禮，故爲人笑也。今言勿者，戒令莫如此也。

掩惡揚善，君子所宗。

徐曰：宗，尊也，揚惡則惡匿，揚善則善聞，故君子所宗。

邪正章第七

老子曰：邪正教言^④，悉應自然。故有凶吉，應行種根。

韋曰：種根正者，自然而正，種根邪者，自然而邪。邪者行自凶，正者行自吉，豈非自然乎。李曰：言人心既有逆有順，爲行亦有善有惡。行

已乃爾，教人亦然，坦蕩君子教人以正，故曰正言，嫉惡小人，教人為邪，故云邪教，為邪，雖不欲邪而邪自來，為正，雖欲正而正自來。報之如此，故曰悉應自然。而報邪者以凶，應正者以吉，應善惡無濫，報對不差，猶如種稟，隨根各別，必然異也。如有如受^⑤種核見分。

韋曰：既受此生，即受此形，善惡吉凶，各隨所行，如草木之生，各從其種核而區分不同也。劉曰：正邪之行，立之於前，吉凶之報，應之於後，至於兆見，賭^⑥效方知，故如曰^⑦如有如受，種核見分。

道別於是，言有偽真。

韋曰：道體弘通，本無真偽，真偽之起，由於言教。

偽道養形，真道養神。

李曰：動皆合理，為之正，舉必乖真，請之邪。邪是虛假，故言偽，正是究竟，故言真。真能入妙，所以養神，偽乃是羸，所以養形。養形者，謂以滋味充身，養神者，謂以清淨修

心。劉曰：有為有欲者養形，無為無欲者養神，養形者為灰為土，養神者能亡能存矣。

真神通道，能亡能存。

韋曰：形不可留，因欲養而留之，故曰偽也，無為養神，則寂然感通，故曰真也。若然者，死生齊度，存亡等貫，故不存其存，是能亡也，不亡其亡，是能存也。徐曰：神與道通，千變萬化，能死能生，能亡能存也。劉曰：寂然不動，感而遂通，係累都盡，出處無滯。

神能飛形，並能移山。

韋曰：唯神也，不疾而速，不行而至，何所不能哉！故能飛形而移山也。

形為灰土，其何識焉。

李曰：形者，生為質礙，本自無知，死為灰土，復何所識。劉曰：養之雖厚，終為灰土，事既不虛，何用過泰。

耳目聲色，為子留愆。鼻口所喜，香味是怨。身為惱本，痛養寒溫。

李曰：有身有患，非為困聲色，苦於香味痛癢寒溫，皆為惱本也。劉曰：喪命者聲色，為疾者滋味，有待之身，無時而適也。

意為形思，愁毒憂惱，吾拘於身，知為大患。

李曰：身為寒熱所惱，心為憂愁所毒，唯心與身，內外俱患。其致云何？必須外忘於身，內灰於心，身心尚忘，何患之有！此勸捨有為也。劉曰：能外其身，則無憂也，亦同於有累也。

觀古視今，誰能形完。

李曰：遠觀往古，近視當今，為變化之所流逐，陰陽之所代謝，誰得完存者耳。劉曰：彭祖、殤子，皆同滅亡，況庸庸之夫哉。

吾尚白首，衰老孰年。

李曰：老君託神降迹，尚見衰老，猶自白首，沉俗徒萬境涼燠盛衰，變化遷移，詎得長久？孰年亦老也。

吾本棄俗，厭離世間。

李曰：有為紛雜，人間穢漏，不足可

保，厭而棄之。

抱元守一，過度神仙。

李曰：元一者道也，懷道抱德，存三字一，位參上聖，果曰高仙矣。

子未能守，但坐榮官。

劉曰：未能守一也，夫關令在任，尚稱榮官，明世祿赫奕之夫，固無時得道真也。

子能不動，神靈得安。

劉曰：不為物之所動，則神炁安也。

子能捐欲，舉事能全。

劉曰：無欲者，百事皆當也。

子能無為，知子志堅。

劉曰：若守志無為，非堅操不可得而成也。

今為子說，露見敷陳。散解剖判，真偽別分。

李曰：露見，顯示也，敷陳，演說也，散解，開釋也，剖判，決斷也。縱情為偽，去欲為真，慮彼迷方，未能玄悟，是故分明開說，令知善惡。

子當諦受，重道殷勤。

劉曰：道尊德貴，不可輕也，信不

足，有不信，故須殷勤也。

道為明出，經為學先。

李曰：暗者不解，求真明人，始能修道。道非孤得，必自由經，故知入道之理，經為學先也。劉曰：非明無以見道，非經無以可依。

授與能行，不擇富貧。教化與樂，非有疏親。

韋曰：心能行道者，則道亦出而授之，心樂學經者，則經亦示而化之，豈擇貧富親疏哉。李曰：道無分別，不以貧富隔絕，不以親疏阻教，務在行而聞化也。

取與能行，文與其人。

李曰：聖人虛應，理在合機，不信不行，何教何授？要在堅心奉法，然後授與靈文。劉曰：無私之至。

學爾教爾，不失道真。

李曰：爾，汝也。我教於汝，汝宜學之，必得成也，不失道也。

天地章第八

老子曰：天地與人物，本皆道之元。

冲曰：言二儀人物，本皆道之元炁

也。

俱出於太素，虛无之始端。

李曰：元，根本也，太素，清淨潔白之道也，虛无，玄妙非有也。三才雖大，萬物雖多，莫不同以清淨之道為根元，玄妙之理為本始，若非道為端緒，物不得生，同皆如此，故言俱出。彷彿之精光，微妙之上玄。

劉曰：太素者，氣之始質也，謂天地萬物以道為元，出於太素之始，入於虛無之端也。萬物既見其質，彷彿乃有精光，即微妙之玄體也。

譬如萬里坑，下有淡流泉。視之甚濁

微，徹見底沙難。

劉曰：道惟幽微，難以聞見，指事為喻，開悟有情也。坑深萬里，目睹數尋，水尚不窺，孰云見底，水有形質，明白尚不能見，道無體狀，暗默如何得知。

窈窈而冥冥，不知所由然。亦如終者去，不見其靈魂。

劉曰：精義入神以致用，利用安身以崇德，過此以往，未之或知，斯言

信矣！且魂氣無所不之，尚不能見往，而況窈冥難測，豈知所由然。

淳陰共和合，陽不能顯分。

劉曰：陽，生也，陰，死也。死者無陽，故云淳陰。和合者雖有陽用之德，不復分曉而能知也。

過往與甫來，視譬以見前。尚不能了理，安能知亡存。

韋曰：甫，始也，過去之與始來，譬如視見前之事耳。而愚者尚不能曉了，見其理趣，而況窈窕精微之道，若存若亡者，豈識之哉。李曰：過往，過去也，甫來，未來也，見前，見在也。以天眼智見未來事，以宿命通知過去法，以漏盡故知見在相。今昏迷之士，蒙蔽之徒，不體三界之皆空，未謝一身之俱寂，至於吉凶禍福，生死存亡，都不能知此因緣，如何可了真道之妙趣也。

譬如瘖瘡者，不能傳人言。

徐曰：言道機妙不可言宣，心知其意，口不能言，如瘖瘡病人，言尚不能傳，何能談說妙道耳。劉曰：啞

者不能傳言，猶盲者不能見道也。為聾彈宮商，其人豈能聞。

劉曰：愚者之聞至道，猶聾者之聽官商。

才辯有其智，受教如語傳。自謂通道情，情衷不能丹。

才李劉本作自謂通其辭，情猥不能宣。李曰：才辯始可傳言，聰慧方能宣法，訥士自謂能傳其言，猥情鄙見未能宣叙，下愚自謂玄教已傳，而心暗昧至理不明也。

是故失生本，焉能知道元。

李曰：明道事資於法，識本理由於智，無智故失生本，心暗豈達道元，是以滯俗者多，歸道者少。劉曰：對教傳言，自謂通理，不知猥昧，失彼玄宗，既失玄宗，生本亦喪，生本尚喪，安知道元。

行道章第九

老子曰：子若行吾道，當知上慧原。智亦不獨生，皆須對因緣。

李曰：慧以鑒空，智以照有，空有雙照，理無不洞，故名智慧。然慧原頗

徹，智本難窮，窮之者，必因於明師，因緣不會，智慧不起。劉曰：解道者名為上慧也，智無善惡，非緣不起。

各有行宿本，命祿之所關。

劉曰：賢愚貴賤，貧富壽夭，皆宿植行本於前，命祿關之於後。

同道道得之，同德有德根。

李曰：愚智明暗之殊，貴賤善惡之異，皆由本行，並藉宿命，命有短長，祿有豐儉，必聞著於往昔，始受報於當今。是以善人同道故得道，同德得德根，惡人不同道故失道，不同德失德根。劉曰：應報無差。

宿世不學問，今復與世鄰。是以故得失，不樂於道文。

李曰：前生之時，不好經法，此宿代不學問也，今身已來，又無良師善友，親仁善鄰，類彼面墻猶斯觸壁，信其愚夫不樂經文，故言是以故得失，不樂於道文。劉曰：同於失者，失亦樂得之，夫絲無常染，決習成性，有教無類，積習生常，宿不學真，

今何慕道，終身役役，常與失鄰。

貪欲利榮寵，受施念恩勤。更以財相厚，不衰^①下窶貧。

李曰：同於上德，本自虛無，失於至道，多生穢濁。以榮華貴寵為利，遂則貪名，以錢財施惠為恩，交相往還，減貧與富，故言相厚，曾無少慈，愍念窶貧，寧有忠歸真向道也。劉曰：矜孤憫窮，凡人所輕，聖人所重也。

必復多瞋恚，無所處定原。

徐曰：處，安也，原，本也，謂心也。夫心繫榮利，情存名實，寵辱驚懼，冰炭傷和，瞋恚既多，情性奔蕩，志操靡常，無所安定其心也。

學不得明師，焉能解疑難。

李曰：狐疑未暢，玄妙不通，要在明師，方能開悟，守愚至死，懸解良難。劉曰：迷道者尋岐，莫之知返，悟者難遇，識者復希，師既自迷，焉能解惑，惑若不解，雖博非明。故《禮記》云：記問之學，不足以為人師也。

吾道如毫毛，誰當能明分。

李曰：內無自然之智，外闕善誘之師，毫毛小物不分，不知大道之原，不講那解也。劉曰：言其細微難解。

上世始以來，所更妙如沙塵^②。

徐曰：更，經也。老君開闢以來，混茫之中，眇眇莽莽，年劫遐廣，典籍不載，所經劫數，如沙塵之多，實非算數譬喻所能知也。

動則有載劫，自惟甚苦勤。

徐曰：載，年也。言自開闢以來，經歷死生變動，則有年劫，不可算數紀載，自惟周遊八冥，登山宅海，履兵火，涉風塵，教化衆生，難卒備至，甚苦甚勤也。

吾學無所學，乃能明自然。

李曰：為俗，學者日益，則學有所學，為道，學者日損，則學無所學。學有所學，則暗於至理，學無所學，則明於自然。故知自然者，非為而自然，不為而自然也。前曰勸勤修，此文戒志學也。

華要歸其實，莖葉如木根。

劉曰：復命歸根，方明其實。為歸道祖首^③，以知始元端。

徐曰：祖、首，皆始也，為道之體，從流末及源。本與太始合精，終能會於常道，以是方知無為首上，玄之又玄也。劉曰：為俗，處於有為，為道，趣無為，有者生死遊魂，無者湛然常存也。

子當無相啓，勿以有相關。

李曰：若能行於無相，則衆妙自開必也，封在有為，則玄關斯閉。劉曰：無，謂道也，有，謂俗也，以道相關，帝之懸解，以俗相關，生死繫纏也。

西昇經集註卷之二

① 此句，政和御制注本作「乃知其誠」。

② 此句，政和御制注本作「當與明議」。

③ 此句，政和御制注本作「不是相聽」。

④ 此句，政和御制注本作「邪教正言」。

⑤ 此句，政和御制注本作「如有所受」。

⑥ 「賭」，當為「賭」之誤。

⑦ 「故如曰」，疑當為「故曰」。

- ⑧ 此句，政和御制注本作「亦如終逝者」。
 ⑨ 此句，政和御制注本作「自謂通其情」。
 ⑩ 此句，政和御制注本作「今復與失鄰」。
 ⑪ 「不衰」，政和御制注本作「不衰」。
 ⑫ 此句，政和御制注本作「所更如沙塵」。
 ⑬ 此句，政和御制注本作「為道歸祖首」。

西昇經集註卷之三

華陽韋處玄 句曲徐道邈 冲玄子
 任真子李榮 劉仁會註 碧虛子集

重告章第十

老子曰：吾重告子，子當諦受。

李曰：真道難明，故以重告，必宜詳審而奉受之。

道以無為上，德以仁為主。

冲曰：以太無為上道，以上仁為五德主。韋曰：道無體，無為而無不為，故最為天地人物之上首。物有顯然則不通，得道以通之，故德迹顯，物有不得，因施之令得，故仁迹章上仁稟德以為主也。劉曰：宥物於無者道也，仁物之性者德也。

禮以義為謙，施以恩為友。惠以利為先，信以傲為首。

李曰：子欲行道者，以無為為上，有為非道也。子欲立德者，以仁慈為主，殺害非德也。修折旋之禮者，必須在於分義，行之謙退，無義無謙非

禮也。為施之博者，宜隆之於恩，以恩為親友也，不友於恩非施也。存之於惠先，在利人不利於人非惠也。履之於信，定有傲驗，為先有名無實，虛而不傲，非謂信也。能行此者，可成道矣。

偽世亦有之，雖有以相誘。

李曰：道德之風，無乎不仁義之化，是處可行，然則化有澆淳，政有得失，行之者，六德皆具，喪之者，一道不成。澆偽之時，亦言有其道德，備於仁義，而不能實用，假以虛行妄相誘引，並非真信也。劉曰：如上六事，偽世亦行者，為有希求以相誘也，非為行道以利物也。

是以知世薄，華飾以相拊。

李曰：不存道德之實，亦失仁義之真，唯有虛薄華辭，更相拊拂。劉曰：視其所以，觀其所由，華薄之情，孰能隱蔽。

言處^①飛龍前，行在跛鼈後。

韋曰：偽世浮薄，矯仁義以求利，詐禮信以求名，徒有其名而無其實，故

言在飛龍之前，而行在跛鼈之後，徒有空言而行之，不可及也。徐曰：古之君子，訥言敏行，今之小人，言疾行遲也。李曰：輕諾急言，言在飛龍前也，無實寡信，行在跛鼈後也。

仁義禮信廢，道德荒亡腐。不以道相稽，反以財相輔。

韋曰：徒詐稱仁義禮信之名，而無其實，故曰廢也。世道交喪，為日久矣，故曰荒亡腐也。稽，致也。然不能以道相招致，而才辯相輔助也。徐曰：稽，啓也，啓開悟也，輔，佐助也。忽無就形，背真向偽，華薄之甚，以至於斯也。李曰：稽，至也，不能矣，德往德來，以道相至，翻乃以財以貨，更相輔益，志在有為也。譬如鏡中影，可見不可取。言如響中應，風聲豈可緒^②。偽世教若此，如是迷來久。

緒，李劉、李本並作聚。韋曰：先聖之教，如鏡中之影，聲中之響，隨隱去來，鏡自常靜，隨聲大小，響自常

元，而偽世迷執聖迹應物之影響，矯以治物，何由可取而緒用哉，則知迷來久矣。李曰：鏡中之形，取之實難，風裏之聲，聚之非易，聲之與形，取必不得。輕諾薄行，有為事業，實知無益，澆俗昏迷，是以自遠，故云迷來久矣。

天下之人物，誰獨為常主。迷迷以相傳，輾轉相受與。

韋曰：凡物云云皆自然，而無有其主使其然者也，而迷惑之徒，謂道可以授人，自然可以與人因相傳授，豈不大惑哉！劉曰：聖人夷俗，與物同波，神無死生，形隨變化，教貽於後，迷者相傳，以迷授迷，故展轉不絕也。

邪偽來入真，虛無象如有。

劉曰：昧者不明，為邪所入，巧偽亂真，像如有道。

自偽不別真，為貪利往守。

徐曰：迷師自偽，不辯真邪，為貪欲所纏，殉俗逐利，往而不返。以此守身，誰云長久哉！李曰：邪偽，有為

也。入真，無為也，迷者將欲邪道以求正真，有為而入無為，必竟不得也。以此為得，是虛空有像，而非真有。自著有為之偽，不識無為之真，何以得然，止為貪欲財利，以此相守，遂失無為真道也。

非常正復亡，癡盲持自咎。

劉曰：守偽失真，正復亡滅，癡盲所致，欲咎何人！

如木自出火，還復自燒腐。

劉曰：火自木生，還自燒木，邪自身作，還自滅身。

聖辭章第十一

老子曰：聖人之辭云，道當以法觀。如有所生者，故曰為自然。

韋曰：道法當何所觀哉？直以無法無觀，自然自冥耳。《道經》曰：常無欲以觀其妙，此之謂也。如今所生者，何以而生哉，不為生而自生耳，故知道自然也。劉曰：凡是有生，皆從於道。

眼見心為動，口則為心言。鼻為通風氣，鼻口風氣門。

李曰：眼則視見外色，心則動緣前境，口既能宣言語，鼻乃通傳風氣，此則誰使之然耶？皆不知所以然而然也。氣從鼻口，為風氣之門。劉曰：引聲色者，耳目也，通風氣者，鼻口也。

喘息為宅命，身壽立息端。

徐曰：喘息，促急貌也，宅，人所居託也，立，住也，端，首也。人生迅速，若白駒之過隙，氣息促急，在於呼吸，氣聚則生，氣散則死，故氣為生命之所居託也。七尺之身，百年之壽，生死之去住，以氣息為也。劉曰：命依氣，氣依身，氣絕命亡，身謝氣散。

譬如穀草木，四氣時往緣^③。

劉曰：草木資四氣以生成，形骸藉喘息為宅命。

氣別生者死，增減羸病勤。

韋曰：別，離也，人全離氣則死，若氣有增減，則有羸病之勤苦也。徐曰：四氣有盛衰，四時有代謝，故百穀草木，有生成凋枯，緣往則死，緣

來則生，譬如人假四大而生，四緣離別則死，四緣和合則生，陽並則增旺，陰並則衰減，故羸疾勤苦生老病死也。

以是生死有，不如無為安。

劉曰：有為有欲，生死遷流，無為無欲，常安不動。

無為無所行，何緣有咎愆。

韋曰：夫無為者，無行無止，無去無來，無生無死，變化倏然，安之於命，咎愆何緣而有哉！

子不貪身形，不與有為怨。

徐曰：貪樂身形，厚其生養，恣六情所欲，任三業所為，有為有事，致成生死怨仇也。若知身非我有，生是委和，無生養過患，又何怨賊之有哉。

五行不相尅，萬物悉可全。

劉曰：夫七尺之身，五行畢備，有為過當，逆順相攻。若外智遺形，付之自治，各司其分，陰陽順序，不相侵尅，則百體俱全也。

萬物無有常，成者不久完。三光無明

冥，天地常照然^④。

韋曰：有成必有毀，無成則無毀，自然之常道也，是以聖人雖成不成，故能無時而不成也。夫天地無心，故能常照，三光無心，故無明冥，聖人無心，故能常成也。

觀諸章第十二

老子曰：觀諸次為道，存神於想思。

李曰：為行之道多方，修身之途非一，前雖陳化道，乃恐迷者未回，今觀為學之徒，修道之次第，欲得長生不死，唯有存神思道，則智將道合，存神則神與形同。神與形同，自入清虛之境，智得道合，默歸智慧之源，妙果斯成，方為道也。劉曰：觀心次第，令亂想不生，以思要道也。

道氣與三光，念身中所治。

李曰：道氣者，導引也，三光者，身中之三一神也。修身之道，必須導引和氣，令得致柔，存三守一，一不離身，自當得道。三一之神，化在人身三宮之內，念念不散，其神自降，神降則真道成也。劉曰：內明外

照，天地氣通，澄神淨慮，綱維不散，彷彿象夢寤，神明忽往來。

李曰：人能念道，道自來歸之，若解存神，其神自降，忘情忘識，如夢如寤，彷彿神降，罔象得真，神則出入無方，故知往來不滯。

淡泊志無爲，念思有想意。

徐曰：恬當作憺，恬憺無味，虛靜無爲，志在思玄念真，逍遙無事，而未

能灰心槁形，情忘愛染，猶有思情念慮，追緣之想，貪欲之意也。

自謂定無欲，不知持念異。

韋曰：次當遣存神之心，淡泊志於無爲，此存神之思，猶有相有意，故當又遣之以定于無欲，亦乃忘其思念，故不知我之持心念神之異也。

徐曰：言存神之人，自謂安心定意，無愛染之情，而不知神有慮欲，雖持戒閉空，而邪念思想不覺已生也。

或氣尚麤盛，自知尚多事。

徐曰：麤作粗。學者未能弱志精行，虛和保神，或意氣剛強，好尚粗盛，粗盛，有爲之法，事乖淡泊，故自

知所尚，多事多患也。李曰：有想新生異念，初起由細微也，積念為大，增想成多，紛綸有為，昏惑斯甚，此惑尚粗盛也。人間之代，有為萬境，六情繫者，觸途皆染，故曰多事。事興則形動，動則外通謀。

徐曰：物事滋興，則動用身形，身形噪動，則心智外通，謀慮得失。李曰：外事既興，內心亦動，心與事合，共圖有為，故曰通謀。

謀思危之首，危者將不久。不久將欲衰，衰者將不壽。

徐曰：不能靜神內念，而役智外謀，謀慮既繁，神勞志失，此乃傷性之由緣，危殆之端。首危者，不久將致衰損也，形弊于外，神勞於內，內外俱傷，將恐不久，衰煞則神忘氣散，亦將不能享壽存生也。李曰：無思無慮則安，有圖有謀則危，安則長存，危則不久，不久則傷夭，故曰不壽。

以身觀聲名，物事難可聚。

李曰：身是內也，名是外也，內身猶為空假，外名故是虛花，以此而觀，

身尚不可久存，物亦不可久聚。何故？以此一身拔緣萬境，並欲聚前，有為聲色名利可欲皆聚一身。戒有累，勿令貪染也。徐曰：物事者，財貨之事也，身為道器，名為身賊，故名成則身敗，身安則道隆，以斯而觀，名聲財貨難可聚積也。劉曰：身為名亡，孰為聚物。

以名聲僞號，必為是所誘。

劉曰：夫嗜欲肆情，徇名貪利，志重聲色，高尚侈靡者，曷嘗以為非哉！故曰必為足所誘也。徐曰：言以高名令譽稱號尊榮而為是者，以此貨利為心也，既貨利為心，是必為名利之所誘引也。

皆坐於貪欲，貪欲為殃咎。

徐曰：坐者，罪之所由，殃，禍也，咎，罪也。言重名譽者，坐由貪欲無厭，則為三世之禍罪也。李曰：饕餮之徒，貪婪之輩，亡不以道自為殃咎。劉曰：五刑之屬三千條例，唯坐貪欲被刑，未有廉貞致辟，貪欲既為大禍，人人何不戒之。

貪者為大病，習貪來已久。合會微漸漬⁶，非鍼艾所可愈⁷。

徐曰：貪為三毒之首，為生死大病，由其前身積習慳貪至於今世，故云已久也。滋，益也。愈當作瘡，病瘡也。積習貪心，其來久遠，合會微細，漸漸益多，譬膏肓之病，非鍼艾所瘳瘡也。李曰：貪可煞身，故為大病。積習生常，故云來久。微微而長，漸漸而進，自微至著，從小至大，患生於內，病至膏肓，難可救除，故非鍼灸所瘳。劉曰：久植根栽，觸類斯長，病非形質，豈鍼艾所可治也。

還身意所欲，清淨而自守。
李曰：貪為至病，救所不除，今欲除之，其用何道？但能無欲，而貪自除，若能忘身，而害斯遣，唯清唯靜，守道守真，端坐無為，條然絕累也。劉曰：芸芸者歸根，復命者自守。大聖之所行，不慕人所主。

徐曰：慕，猶尚也，聖人尚虛靜無欲，凡人尚名利有欲，真與俗反，去

取不同，故不尚凡人之所主也。李曰：小人所履，耳目注於聲色，心意住於貪欲，反以此為病，不得成道，大聖所以行清虛無欲，心不主於有為，故無人間之累也。劉曰：彼我尚喪，豈求主哉。

有常可使無，無常可使有。

韋曰：我本無身，忽然而有，常忘其有身同於未生之時，此有常可使無常也，不以生為生，故常生而不朽，此無常可使有常也。徐曰：失道者有常使無，得道者無常使有，故《莊子》曰：庸詎知吾所謂天之非人乎？人之非天乎？斯之謂矣。李曰：俗人之所慕，但貪名利，唯求情欲，志在於有，不肯於無。今聖人內遺心識，外絕名聲，非有非無，能無能有，不有能有，可使有歸於無，無而無，可使無歸於有。無歸於有，無有不成，有歸於無，有無不滅，或隱或顯，變化自在也。

經誡章第十三

老子曰：經誡所言，法義所推。赫赫

興盛，不如妙微。

李曰：尋經誡所言，依法義推究，濟濟貴盛，赫赫高門，寵極則辱來，樂往則哀集，常嬰得失而患興衰。不如懷道自安，含真善見，退不枯槁，進不榮華，逍遙木鴈之間，放廣市朝之際，存妙微質樸也。劉曰：赫赫者亡，妙微者常，以義推窮，必至於此。

實不如虛，數不如希。

劉曰：心實無妄，故致虛妙，事煩多弊，故不如希。

茂多卒天⁸，疾不如遲。

徐曰：卒，急也。邪教、正言，悉應自然，故修習科法，應急而易成，禱鬼神，多有卒驗，修為正道，應遲而難成，難成而無敗，入於不死不生，習學邪文，易成而易敗，不免輪轉生死，故邪不如正，疾不如遲也。興者必廢，盛者必衰。

劉曰：萬物皆然，非止人事。

聖人絕智，而為無為。

徐曰：絕邪智，去有為，明正智，為

無為也。劉曰：絕智故無興盛，無為必無廢衰也。

言無所言，行無所施。

徐曰：言於無言之理，終何所言，行於無事之事，又奚所施乎。劉曰：冥然順物，與道同遊，喪偶亡懷，行安將寄。

孰能知此，偶不如奇。

韋曰：道本無言，應物而言，故言無所言也；道本無行，應物而行，故行無所施也。偶者，二也，奇者，一也。能知無言無行者，故當損二歸一以趨道也。劉曰：身以偶神，欲以偶身，勞形者為贍形骸，喪身者為多愛欲，故遺形者神靜，棄欲者身安。《莊子》云：養志者忘形，養形者忘利，致道者忘心焉。

多不如寡，孰賢難隨。

徐曰：寡，少也，隨，從也，多方博學，泛觀衆流，不如專精味道，抱一守玄。故曰多則惑，少則得。誰謂仁義貞廉以為賢善，然徇名蕩德，易生偽薄，難以從德反道。故曰仁可

為也，義可虧也，禮相偽也。

孰仁難可，其義少依。

李曰：無為之行難行，不二之心少悟，誰有賢名之士，仁善之人，能以可於心而隨其行，仁賢尚為難可，蒙昧故非易行，是故知幽玄妙義少能依者也。

能知無知，道之樞機。

李曰：若能隨不言之教，依無為之理，自然悟道。智無不知，雖無所不知，而即無知，能忘於知，得道樞機，今言得者，得道要妙。劉曰：道以無知為宗，體之者，得其樞要。

空滅成無，何用仙飛。

徐李劉本作空虛滅無，何用仙飛。韋曰：遣大賢仁義之名，歸大賢仁義之實，則漸階於道也。樞者，要也，機者，動之微，吉之先見者也。既漸近於道，故能知道無知也，此是道之機要也，則知道體不可以有心期，故復損機以至空，損空以至無，然後能飛仙矣。仙者，無生無死之名也。夫真人者，通古今，等變化，

與萬物同體，與造化同生，故能無時而不生，無往而非可，乘虛履空，貫金穿石，何足為難矣。徐曰：神人守精反真，空虛滅無，仙人養神長生，舉形昇天，有形不如無形，故曰何用仙飛也。劉曰：去留離形，隨變任化，曠然無時，待飛仙何為。

大道曠蕩，無不制圍。

徐曰：大道高遠，曠蕩無邊，陶育萬物，制御於神，範圍天地，無為而無不為者也。李曰：玄而遠，故言曠，平而夷，故言蕩。制御一切，故言制也，包羅萬有，故言圍也。

若能明之，是所反非。

李曰：若能明之於大道，至理無不通悟之，於曠蕩塵累無不淨，則知從來小見，舊日俗情所善者非善，所是者非是也。

經言審諦，孰知能追。

李曰：審諦，真實也。夷心則照之於寂路，虛已則達之於道原，滅聞見於樞機，絕是非於曠蕩，此為玄妙之教，真實之言。而迷俗逐欲者多，忘

情者少，誰能隨之。劉曰：道絕情慮，理超言象，隱顯殊致，固非淺識者所知也。

深妙章第十四

老子曰：道言深妙，經戒乙密。天地物類，生皆從一。

徐曰：天得一以清，地得一以寧，萬物得一以生，故曰生皆從一也。李曰：絕慮為深，不測為妙，一者，玄也，密者，微也。經法深遠，誠律玄微，所說之言，極為幽奧，皆云天地人物，俱從道生，信而有徵也。子能明之，為知虛實。

李曰：明之，體解一為物本，知物從一生者為實也，言不從一生者為虛也。

子若不照，顯之不別。

李曰：我非汝說，若不能照了，我雖顯示，汝亦不能分別。劉曰：心若暗昧，縱顯現亦不別。

子志於有，無為所疾。

徐曰：疾，猶病也，有是無為之病，勸去有歸無也，劉曰：靜以憎亂，簡

以惡煩，有為多是無為者疾。為有所嬰，億載無畢。

李曰：若能志在無為，則脩然^⑫證道，恕存有欲^⑬，以此嬰繞千億萬載，為有為繫縛，無由了畢。劉曰：得彼逐此，羈鎖相連，愛心流注，何時可畢。

道言微深，子未能別。撮取於略，誠慎勿失。

韋曰：子既未能別了道言微深妙遠之旨，且可撮略其粗淺之誠言，勿令心有放逸也。徐曰：衆妙難明，撮略要訣，保德守真，順戒勿失。李曰：玄章秘典，未可具明，采取要略，唯當順從經戒，捨惡從善，出入無，終始常行，莫令差失，謂達經也。

先損諸欲，勿令意逸。

徐曰：持戒制情，先損諸欲塞兌，則塵境不入，閉門則心意無逸也。

閑居靜處，精思齋室。

李曰：無事即是閑居，安心便為靜處，專情乃曰精思，洗心名為齋室。

丹書萬卷，不如守一。

徐曰：飛鍊八石，鑪轉九丹，刀圭一奏，上昇清天。雖曰神妙，猶是方術，豈若正性真根元一內法，守而不失，與天相畢，故曰丹書萬卷，不如守一。劉曰：為道日損，不假繁文，但能守一，道自得之。

經非不達，終有^⑭虛實。言有必無，子未能別。言無必有，子未能決。

徐曰：經雖簡略，理非不達，世教虛偽，道文真實，實中有實，是以有不定有，還歸於無，無不定無，還復生有，有無相生，未始有定，尹子始學，未能辨決。李曰：上言虛實，其在此乎，言無必有，此乃虛為實也，言有必無，此乃實為虛也，實而為虛，子當未能分別，虛而為實，子亦未能決了，能決能了，知實知虛，既達於經，自保於道。劉曰：理有通變，言有抑揚，達文者喪其真，執教者乖其趣，微言隱奧，剖其良難，體解內明，方可玄會也。

但當按行，次來次滅。

李曰：但可依按經法，奉而行之。先捨於惡，次忘於善，先破有欲，次滅無為，有為無為並忘，若善若惡皆泯，念念欲起，次次蕩除。劉曰：既不能決明幽旨，但當依教，次第修行，耳目聞見，不便尋思而生分別也。

道有真偽，福有吉凶¹⁵。

劉曰：乖宗者偽，會理者真，無為所致者吉，有為所致者凶，故《德經》曰：福兮禍所伏也。

罪有公私，明者纖密。

劉曰：為道者公也，為俗者私也。夫修道者，不契玄宗，情行尚起，應物失當，事或有違，審審匪躬，志在濟物，篤誠於道，理異私懷，義屬中孚，難過可亮也。纖密猶羸細也。

占往知來，不如朴質。

李曰：達於過去，占往也，明於未來，知來也。雖有智慧，終始皆知而多敗，必有顛蹶，唯當存之朴素，敦之質真，可以立身，可以事君，可以養親，可以成道勤修也。劉曰：逆

慮多憂，知來近辱，絕聖棄智，純素以居。

西昇經集註卷之三

- ①「言處」，政和御制注本作「言出」。
- ②此句，政和御制注本作「風聲豈可聚」。
- ③此句，政和御制注本作「四時氣往緣」。
- ④此句，政和御制注本作「天地常昭然」。
- ⑤此句，當為「故曰必為是所誘也」，「足」為「是」之誤。
- ⑥此句，政和御制注本作「合會微漸滋」。
- ⑦此句，政和御制注本作「非鍼艾所愈」。
- ⑧此句，政和御制注本作「邪多卒驗」。
- ⑨此句，政和御制注本作「空虛滅無」。
- ⑩此句，政和御制注本作「所是反非」。
- ⑪此句，政和御制注本作「孰之能追」。
- ⑫「脩然」，疑為「儻然」之誤。
- ⑬此句，疑當作「如存有欲」，「恕」為「如」之誤。
- ⑭「終有」，政和御制注本作「中有」。
- ⑮此句，政和御制注本作「福有凶吉」。

西昇經集註卷之四

華陽韋處玄 句曲徐道邈 沖玄子 任真子李榮 劉仁會註 碧虛子集

虛無章第十五

老子曰：虛無生自然，自然生道。道生一，一生萬物¹。

徐李劉本並作道生天，天生地，地生萬物。韋曰：虛無者，無物也。自然者，亦無物也，寄虛無生自然，寄自然以生道，皆明其自然耳。一者，即道之用也，天地萬物皆從道生，莫有能離道者。復謂之一，一之布氣，二儀由之而分，故曰一生二也，萬物莫不由天地氤氳之氣而生，故曰天地生萬物也。李曰：此謂有像之物也，自上生下，次第相生也。劉曰：推窮生本，以致虛無，此乃名理相階，其實不知所以也。

萬物抱一而成，得微妙氣化。

李本作化生。韋曰：天地萬物皆微妙一氣而化生也。徐曰：二儀、萬

物皆一而成，人獨得微妙之氣，故能精靈變化也。李曰：天地、人物，並皆抱真一之道。受微妙之氣，所以方得化生，是知一氣者萬物之本也。人有長久之寶，不能守也，而欲益^②。尊榮者，是謂去本，生天地之道也。

徐曰：長久之寶，一也，人不能懷微妙之氣，守一以長生，不保其所寶也。而保人所寶，增益情欲，慕樂尊榮，是謂去其本也。生真寶二儀之正道也。劉曰：長久之寶，謂真性也。夫貪益尊榮者，喪其本生之性也。

恍惚章第十六

老子曰：虛無恍惚，道之根。萬物共本，道之元。

李曰：至本空寂，名曰虛無，虛無即非空寂，有無不定，稱之恍惚。云虛無生自然，自然生道，故知虛無者，此即道之根本，萬物得生，皆由於道，是知道為物之本元也。
在己不忘^③，我默焉。

默，韋本作異。韋曰：言一切萬物，

莫不共道同其本源，而羣生流蕩，不能自同於道，是以輪迴生死之波，若能存道於我，則其命不滅不亡矣，衆人皆不能存道，唯我獨能存之，故我異於衆人。李曰：道者物之元，氣者生之本，失道則死，喪氣則亡。若也不亡，聖人默然不說，今之廣說至言，大敷妙教，而教其養氣抱道，復本歸根。人若能納氣於內，抱道於懷，水火之所不能災，生死之所不能害，長存入道，端坐成真，得意忘言，故云默焉，知而不默，乃失之也。

生置章第十七

老子曰生我於虛，置我於無。

徐曰：置者，立也。虛氣和合，變生我形，精妙無物，化立我神也。劉曰：實不生實，生實者虛也，有不容有，容有者無也。

生我者神，殺我者心。

韋曰：生者，存也。我所以長生者，心同於虛也，我所以長存者，形同於無也。神無形兆，故生我也，心有所存，故殺我也。李曰：形不自生，得

神始生，身不自殺，由心故殺，心不為惡，足可長存也。
夫心意者，我之所患也。我即無心，我何知乎！

韋曰：夫有心有意，則有所存，故患害生焉；若我無心，則無所知，又何患哉！李曰：心有分別之知，能造有為之過，過成患我，是實由心，若也忘心無知，自當無患。

念我未生時，無有身也，直以積氣聚血成我身耳。

韋曰：此遺形存神之方也。徐曰：厭我有身大患，思念未生無身無累也，及氣血積聚成此肉身，假借不足為有，而人貴重，益成患累也。

我身乃神之車也，神之舍也，神之主人也^④。

徐曰：夫馬之運車，如神之載形也，神處人身，若人居室舍，舍全則人安，身康則神樂，故智士保身以養神，運形而昇仙也。李曰：身能載神，神能乘人，故曰車也。身能容神，神以身為屋，故云舍也。自外來

寄於身，故云主人也。

主人安靜，神即居之，躁動，神即去之。

徐曰：身形靜，神即止其官府也，躁動有為，神即去其居館。即者，言應用急也。李曰：車牢始能載物，舍靜方可安人，為主既也。誼譁，作客何能久住？必須堅守於身，而神自乘之，淨洗於心，神自正之，內外安靜，神自居之。若身有染穢，心腹躁動，神即離人，故云去之。劉曰：神住曰生，神去曰死，生由靜載，死由躁危。

是以聖人無常心者，欲歸初始，反未生也。

李曰：愛染罪垢，躁競有為，是常人流俗之心也。聖人清淨捐欲，無常俗之心也，有心者逐末，入於生死，無心者反本，歸於真道，無復生死也。劉曰：寂然無物。

人未生時，豈有身乎？無身當何憂乎？當何欲哉。

韋曰：夫有欲有憂，皆由存身生生之厚也，若反未生，則惡有身矣，何

憂患之有也！李曰：已生之後，方可有形，未生之前，理無身也。有身則百憂競起，五欲爭興，無身則萬累都捐，千愁並盡，尚無有身之患，豈有身外之災！

故外其身，存其神者，精耀留也。道德一合，與道通也。

韋曰：精耀，神明也。夫外其身者，則精耀不去其形也，精常留，則其道德自然與一合體，與一合體，則其道通同也。徐曰：疏外逆旅之形，親愛生我之神，故虚心靜形，存神守素，則玄精光耀，留止宮室，與道通一，是謂無身之身也。李曰：營生之士，學道之人，必須外忘於身，不得多養於味，先宜內存於神，志之於道，恍惚精微，智慧自歸，精彩光明，無不照了，故言精耀留。若得智慧止，乃將道德一合，均之無德，契以虛通，故言與道通也。

為道章第十八

老子曰：古之為道者，莫不由自然。

李曰：古昔修道之士，皆由有自然，

道德清虛無欲，未待師教，而自然修道，無有不由自然也，若強為之，則不然矣。

故其道常然矣，強然之即不然矣。

劉曰：非有心而作之，強為之則有心也，是故不然矣。李曰：凝情合道，無欲全真，行之有常，常得自然之道。若外不立行，內不修心，強令為之，道終不得。

夫何故哉？以其有思念，故與道反矣。

劉曰：何故即不然，蓋道無思念，有心者違。

是以橐籥之器，在其用者。

徐曰：籥有六孔，如箎，樂器也，言器空虛，在人所用，喻聖人空虛無心，有感必應，在緣所用，應物處方也。

虛實有無，方圓大小，長短廣狹，聽人所為，不與人爭。

李曰：橐，排橐，籥，管籥也，橐能出氣，籥能出聲，皆悉無心，任人所動。氣之大小，聲之長短，若方若圓，或廣或狹，從人所為造，不與人爭。此

舉喻也。劉曰：無心求用，故不爭也。

善人在於天下，譬如橐籥乎，非與萬物交爭，其德常歸焉。

劉曰：應物而已，聲氣之美，常歸橐籥，無為之德，常歸聖人。

以其虛空無欲故也。

韋曰：天無心順物者，使萬物各得其性，天下莫不歸之以為主也。李曰：此合喻也。善行君子立德淑人，外則與物無競，內則無欲謙虛，德自歸身，道當在己也。

欲者凶害之根，無者天地之原。莫知其根，莫知其原。

李曰：有欲則傷身，故云凶害之根，無欲則會道，故云天地之原。而凡情迷亂，蒙昧無知，不知有欲是凶害之根，不知無欲為福善之原，故曉示也。

聖人者去欲入無，以輔其身也。

李曰：外去貪欲，自守無為，唯有聖人方能，以道輔翼此身，可以長存。若同流俗，未免凶害，然則大聖豈有

安危，亦無穢淨。今言去欲入無者，亦教凡流以為行也，能依聖行可以成道矣。劉曰：不去欲者，非輔身之道也。

聲色章第十九

老子曰：人皆以聲色滋味為樂⁵，不知聲色滋味，禍之大朴。

李曰：常俗之人，愛之以聲色，悅之以滋味，暢情適意，故為上樂。然欲是害根，聲是聾原，口以味爽，眼為色昏，不由外來，皆因內起。劉曰：桀紂以之喪國，非禍朴之如何。

故聖人不欲以歸於無欲也。

李曰：唯有聖人能虛心無欲，清靜無為，災害不生，禍亂不作，化致太平，正當歸道。劉曰：棄禍本，歸福原。

道虛章第二十

老子曰：道者虛無之物也，若虛而為實，無而為有也。

徐曰：兩而，皆如也。無體若虛，如為有實，精妙無物，如為有狀，故有無體之體，無狀之狀也。

天者受一氣蕩蕩而致清也，氣下化生於萬物，而形各異焉。

徐曰：天氣下降，地氣上騰，二氣交和，化生萬物。萬物萬形，萬形各異，未如有同也。李曰：虛而為實，無而為有，即是虛無之中，能判三才而生萬物三才有象，故言實，萬物有形，故言有，舉大明小，即言天受一氣，是知物稟元和天既蕩蕩清高，無心分別，不失於一，人亦須勤勤強志，清淨無為，不失於道也。氣雖是一，形乃不同，故言各異也。

是以聖人者知道德混沌玄妙同也⁶，

徐曰：混沌，無分別貌，聖人體元一未分，道德混沌玄一太妙，本同一也。

亦知天地清靜皆守一也。

徐曰：天得玄玄之氣，故清高在上，地得混黃之氣，故濁靜在下，二儀雖異，守一同也。

故與天⁷同心而無知。

徐曰：心同玄無，無知無欲也。劉曰：四時運行，非有知也。

與道同身而無體。

徐曰：身同虛無，無身為體也。劉曰：混同方妙，故無體也。而後天道盛矣。

劉曰：弘道在人。

以制志意而還思慮者也。

李曰：與人同心，心無分別，與道同身，身無形假，將天合德，共道齊真，是名天道盛矣。何以得同天道之盛？制心意，無意深，還思慮，去繁想，始可得矣。劉曰：群品云謂無心者制。

去而不可逐，留而不可遣。

劉曰：應物之遠留者，其體長存。徐曰：隨之後無，故去不可逐，無體之體，故留不可遣也。

遠者出於無極之外，不能窮之。

劉曰：曠然無際。

近在於已，人不見之。

劉曰：杳然無象。

是以君子終日不視不聽，不言不食，內知而抱玄。

李曰：懷道君子，絀聰明，絕視聽，

慎言語，不華綺，節飲食，斷滋味，虛心玄覽，故曰內知，不失微妙，稱之抱玄。

夫欲視亦無所見，欲聽亦無所聞，欲言亦無所道，欲食亦無所味。

徐曰：體空達妄，即色非有，情忘塵境，又何所言未聞見乎。李曰：悟萬境皆空，心即俱靜。

惓惓寂哉，不可得而味也，復歸於無物。

韋曰：外忘聞見，則視聽之欲絕，內忘心口，則言食之欲滅。內外絕滅，然後能惓惓寂然，復歸於無物也。

李曰：躁競浮動，輪轉有為之內，惓惓寂哉，復歸無物之道。若常能清靜無為，無自復也。

劉曰：明得真之者，非云為所致。

反於未生，而無身也。

李曰：內外無染，故曰清淨，恬神息慮，是曰無為，合氣於漠，反於未生，體同自然，而無其身。

無為養身，形骸全也。

徐曰：清淨無為，抱德養身，和氣已

復，故形骸保全也。

天地充實，長保年也。

韋曰：道氣復歸其身則忘身，忘身則德合天地矣。夫天地不自生，故能長生，若然者，身不保而自全，年不保而自生也。徐曰：天地精氣，充實我身，壽同二儀，故曰長保年也。李曰：無為養身，無事安人，功格四表，道溢六虛，此謂充實也。修身者年命長，理國者鼎祚遠，此長保年也。

哀人章第二十一

老子曰：人哀人不如哀身。

徐曰：哀，悲愍也，學人哀愍眾人淪俗忘反，不如自悲己身不能養神守身也。

哀身不如愛神。

徐曰：愛，惜也，神勞則去身，去身則生亡，若耽嗜六欲，傷神損性也。愛神不如含神。

李曰：雖愛於神，而未免勞役，猶嬰患害，不及含神。含神者，外則不執不染，內則無思無慮，內外清淨，神

自歸之，不出於身，故曰含神。

含神不如守身。

李曰：神雖至妙，仍不自立，要託於身，方能運用，今但含神，不守於身，身敗形離，神無所寄，欲神長存，先須守身。守身者，必淨必清，同道同德，通幽洞微，則與虛極不二，存三守一，乃共真神合契也。

守身長久，長存也。

劉曰：情欲所為者，人也，若無情欲，直是身耳，人將安寄？哀，謂哀憐也。愛神者，為愛子重母也。含神者，謂既貴矣，而又深之，含育光輝不令散失也。守身者，謂屋靜人安，主誼客散，身為神之舍，故守身以安神也。身不躁動，神明靜泰，形神兩全，故得久存。夫客必不孤，遊不依主，神不獨化，必藉於身，故客非主不依，神非身不立。然則身為神本，主為客基，故愛神者，先須守身，存客者，必須愛主，故曰含神不如守身也。

神生章第二十二

老子曰：神生形，形成神。

沖曰：神為生形之用，無用則形不生，形為養神之利，無利則神不成也。劉曰：形非神不生也，神非形不成也。

形不得神，不能自生，神不得形，不能自成。

沖曰：形假神以得生，神含形以得成，形神不合，無由生成也。劉曰：隨其神化以生形類，故曰形不能自生，隨其形類以成神功，故曰神不能自成。

形神合同，更相生，更相成。

沖曰：利用相須，更相生成。劉曰：形神雖異，相藉生成，生成之道，不合不得，故曰形神合同。夫神由形用，形為神生，形用既彰，神功所致，則神生形也，形由神生，神由形用，神功既著，著乃由形，則形生神也，故曰更相生。形不自興，必資神化，神動形作，功用乃成，成由神生，則神成形也，神不獨化，動必資

形，形作神隨，神功乃見，見由神用，則形成神也，故曰更相成，神常愛人，人不愛神。

李曰：神既託人，亦欲人不死，人乃資神，亦須神不離，不離必須修身清心，能修之者，始是愛神。今人多穢濁，不肯修身，身既不修，是不愛神也。劉曰：神常愛人，欲使安靜，人不愛神，役用無涯。

故絕聖棄智，歸無知也。

李曰：聖人無名，名既無矣，復何所絕？大智若愚，智乃如愚，即是無知，復何所棄？今言棄絕，謂聖有功名之累，智有分別之機。分別者，勞心。徇名者，損身。身心若損，形離神散，此是不愛於神，不守於身，有為失道也。勸令棄名絕慮，以歸無知，此是愛神也。

常安章第二十三

老子曰：聖人常安。與天地俱安，而鬼神通。

李曰：聖人內遣心識，外喪形骸，與冥寂合其真，虛玄同其體，陰陽之所

不能變，盛衰之所不能移，玄德常靜，故曰常安，共天地均其覆載，鬼神齊其正真，包大納細，通幽洞微，無屯否之期，絕困窮之日，故曰與天地合其德，鬼神將來舍也。劉曰：無事無為，幽冥通暢。

衆人皆安其所不安，即不安矣。

韋曰：得生以為安者，得死即不安矣。得富貴以為安者，得貧賤即不安矣。劉曰：安於有為，有為非常，失待則困。

蓋天道減盈滿，補虛空，毀強盛，益衰弱。

劉曰：虧盈益謙，其猶張弓也。冲曰：日中則昃，月滿則虧，陽盛則衰，陰強則弱，此天之道也。聖人則天理物，行平等之法，損有餘，補不足，抑高強，舉下弱也。

損思慮，歸童蒙，塞邪智，聖人之朴也。

冲曰：蒙，本作朦，不明也。思繁則巧制盛，慮多則謀賊生，奇物來於寇盜，矯誣長於誑術，故令損之，歸於童蒙。童蒙不明，無為膏火自煎，不

飾智以驚物，閉塞斜智，開明正慧，則偽法不行，真道流布，去邪取正，聖化之本也。劉曰：懲忿窒欲，養蒙以正分，正外智都去者，是聖人之質朴也。

是以天下尚存^⑨，可謂養母，常能愛母，身乃久長。

劉曰：生身者神也，無欲安神，可以養母也，無欲故神安，神安則長久。李曰：事親者以孝為先，修身者以道為本，孝子善養，揚名於後代，學者能修，成真而不死。養神存道，故曰愛母，身與道同，故曰長久。

西昇經集註卷之四

- ①「一生萬物」，政和御制注本作「一生天地，天地生萬物」。
- ②「而欲益」，政和御制注本作「而益欲」。
- ③此句，政和御制注本作「在己不亡」。
- ④此句，政和御制注本作「神之主也」。
- ⑤「為樂」，政和御制注本作「為上樂」。
- ⑥此句，政和御制注本作「是以聖人知道德混沌玄同也」。
- ⑦「故與天」，政和御制注本作「故與天地」。

⑧此句，政和御制注本作「氣自復也」。
⑨此句，政和御制注本作「是以天下尚孝」。

西昇經集註卷之五

華陽韋處玄 句曲徐道邈 沖玄子
任真子李榮 劉仁會註 碧虛子集

身心章第二十四

老子曰：身之虛也，而萬物至，心之無也，而和氣歸。

沖曰：體與道合，是身之虛也，心與天同，是心之無也。身虛而萬物自至，心無而和氣自歸，故虛無者，無為之至妙也。

故善養身者，藏身於身而不出也，藏人於人而不見也能。

沖曰：藏身，謂陸沉晦迹，而不出其才能也。藏人，謂混俗同塵，而不見其智德也。

故君子之治，必死於國。

劉曰：死猶遺忘也。夫遺忘其國者，雖居物首，不為貴也，富有四海，不為利也，不為利，侈靡皆捐，不為貴，則僑逸斯棄。棄僑逸，則力役不勞，捐侈靡，則財用不竭，夫財用不

竭，則儲積充，力役不勞，則蒼生靜。

蒼生靜，則國安，儲積充，則國實，國實者，則理之基也，國安者，則理之本也。保夫至理之基本者，其由遺忘國乎。如違此道，敗忘立至，稽諸故實，詎俟斷焉。

既死不亡，其國盛也。民不敢散，更復充也。

劉曰：遺而有之，故不亡，無為而理，故國盛矣，及群生遂性，樂俗安居，甘食美服，不相往來。李曰：死猶忘也。修身之者，體即身無身，即人無人，忘身而身存，理國之者，體同虛寂，德並太空，兼忘天下，故云必先死於國。既亡於國，在宥天下，薄賦輕徭，兆人安樂，故云既死不亡，其國盛也。政化太平，人不流亡，故曰不散國實，人富積粟足兵，故曰復充。

若能知常，施行反也。

沖曰：人能知素真常，存玄德大道，凡所施行，與俗皆反也。劉曰：能知常道者，凡所施為行事，皆令歸反

其真性也。

衆人歡樂，用生生也。動而失之，壽命竭也。

韋曰：死而不亡者，壽之常也，而行與俗殊，故曰反也。衆人以生生之厚，故動而失生而命盡也。沖曰：衆人以百年為常，安身厚味為樂，用聲色六欲以生生，動則傷生失性，致壽命竭盡也。李曰：衆人用有生之命，持以生身，放情極欲，以為歡樂，而有害命傷身，上既失道，下亦失身，故云動而失之，壽命竭也。

夫天下大物哉，甚綿綿也，冥冥混沌不可知也。

徐曰：夫大物者，太極大道，太極者，天地之父母也，道之奧也。綿綿常存，不斷不絕，冥冥幽深，混沌無分別，不可以智知，難可以言論也。知之者去之，欲之者離之，近之者遠之。

李曰：使智求之而不得，故曰去之，以欲取之而不得，故曰離之，不可以為親，故曰遠之。

是以聖人非託於天下，亦非託於鬼神，亦非託於萬物。常以虛為身，亦以無為心。

李曰：託，謂因假也，聖人所以得道者，顯不因於天下，幽不假於鬼神，外無賴於萬物，常以虛為身，亦以無為心，而自然成道。人若心忘有事，志在虛無，雖不欲成道，而道自成也。

此兩者，同謂之無身之身，無心之心，可謂守神。

李曰：兩者，虛無也，以虛為身，此乃無身之身，以無為心，此乃無心之心，無心之心則無心，無身之身則無身，至無身心，是謂守神，雖曰守神，可以虛無，故神自歸之，故曰守神。劉曰：係累外絕，神明內安，守神之道也。

守神玄通，是謂道同。

韋曰：神不離形，故曰守也，神形相保，則通玄而合道也。李曰：能以虛無守神，神通虛無之妙，身同於大道之體，故曰玄通也。

無思章第二十五

老子曰：智士無思無慮之變①。

韋曰：大智之士，以百姓心為心，故曰無思無慮之變也。

常空虛無為恬靜，修其形體，而萬物育焉。

李曰：無智之者，必貪有欲，有智之士，未肯無為，是以滯凡庸，少能歸道。聖人勸戒，意在虛空，故曰有智之士勿多生思慮，好為變詐，常須空彼我，端寂無為，身不躁競為恬，心無浮動為靜，內外清靜，是修其形體，於物無害，為物所養，故曰育焉。變者貪天下之珍，以快其情。

李曰：積思慮，好詭詐，逐欲不止，萬境遷改為變也。夫難得之貨，是天下之珍，懷貪無已，縱欲暢心，禽色荒亂，此快其情也。情快於前，政敗於後，必然之理，的如可見，故舉下文以示之也。

然後革兵四起，禍生於內。

劉曰：舟中之人，皆為敵國。國動亂者，而民勞疲也。

李曰：以道濟物，以文柔遠，百姓日用而不知，萬國自然而歡泰，少私寡欲，貴粟賤金，俗樂家安，樂和禮洽，此無為之化也。若肆情極欲，奢淫好勝，四郊多事，五兵動作疊起，蕭牆禍生於內也，君既昏亂，臣不忠正，國動亂也，征役不止，困於轉輸，人勞疲也。

夫國以民為本，民勞去者，國立廢矣。

冲曰：身以神氣為本，神守氣聚，則長生也；若有為有事，勞損神氣，神去氣散，則形廢矣。李曰：為國之本，要在安人，人安則逸，人危則勞，逸則人居，勞則人去。國之興也，寔在於人，人既去焉，是知國廢，理亂由道，興廢在人，以道愛人，天長地久矣。劉曰：民惟邦本，本散國亡。所謂出其無極之寶，入賊利斧戟也。

冲曰：斧戟，兵器也，生命貴重於萬金，神存氣聚，則生命無窮，神亡氣散，則身殞命盡，故曰出其無極之寶也。六賊外入，三毒內興，攻伐甚於六軍，殺傷利於斧戟也。李曰：寶

者，無為之道也，賊者，有為之兵也。我無為而人自化，此用無為之道也。若不用無為之道，是出其無極之寶，如用有為之兵也，兵能害物，日費千金，甚於鋒刃，故云入賊利斧戟也。是以聖人無為無事，欲安其國民也。

李曰：不貪欲，故無為，不好兵，故無事，貪欲則人損，戰伐則人勞，無為無事，不損不勞，百姓安寧，聖人之化也。

故曰：子能知一。萬事畢。

李曰：無為用道，知一也，功成事遂，事畢也，內明達於至道，知一也，行成德就，從因證果，得於真道，事畢也。

無心德留，而鬼神伏矣。

徐曰：一者，真一也，德，常德也，知一者，無一而不知，故萬事畢矣。虛空無心，常德留止，故能官天地，府萬物，威振千靈，鬼神畏伏矣。內解鬼者精也，真一，一之至極，常德，德之至貴，乃精神之根本，道氣之元先，故精神臣伏，萬氣歸宗也。李

曰：聖人無心，不起貪欲，道在於己，德止於身，故曰留也。用道則道流遐邇，懷德則德被幽明，既為人之所歸依，亦為鬼神之所伏從也。劉曰：有心為德，德斯去矣。故經云：上德不德，是以有德。其鬼不神，故曰伏之矣。

我命章第二十六

老子曰：我命在我，不屬天地。

李曰：天地無私，任物自化，壽之長短，豈使之哉。但由人行有善有惡，故命有窮通，若能存之以道，納之以氣，氣續則命不絕，道在則壽自長，故云不屬天地。

我不視不聽不知，神不出身，與道同久。

李曰：不視，故不為色所盲，不聽，故不為聲所聾，不知，故不為智所困。絕聲色而清淨，去分別而無為，神不離人，故云不出於身。身將神合，命與道同，故云長久。所言不屬天地，其行如是，遂與道同。劉曰：耳目之用，廢心智之慮，忘心神不出

身，契乎常道矣。

吾與天地分一氣而治，自守根本也。

韋曰：天地與我俱稟自然一氣之所生，各是一物耳，焉能生我命乎，我但去心知，絕耳目，各守本根之一氣，則與道同久矣。《莊子》曰：天地與我並生，萬物與我為一，此之謂也。李曰：萬物俱資於大道，三才同稟於一氣，而人皆逐末，遂至傷生。老君守本，故能成道，若能法聖人而為行，虛極自然可致也。非效衆人行善。非行仁義，非行忠信，非行恭敬，非行愛欲，萬物即利來。

李曰：為善必近名，為惡必近刑，聖人遠之刑名，故不學衆人行善，仁者殺身以成人，義者裁非而正己，聖人修生故不殺，亡邪故無正，非行仁義也。忠信者道之華，聖人棄華取實，不行忠信也，孝非天性，禮異至誠，心狠貌恭，故非妙行，所以不行。欲為兇禍之根，愛是煩惱之源，愛欲在己身尚不安，如何得道，聖人清靜，非行愛欲也。於物無害，物利自來。

常惓怕無為，大道歸也。

李曰：上文行善及至愛欲，皆是有為之事也。老君懷道抱德，恬靜無為，常行此行，遂得成真，故云大道歸也。劉曰：有益者物赴，無為者道歸。

故神人無光，聖人無名。

劉曰：內明無光，德隱群遊。李曰：大道若歸，用無不可，變化不測謂之神，智無不通謂之聖，人非有事，神實無為，智照凝寂故無光，隱形藏用故無名矣。

兵者章第二十七

老子曰：夫兵者天下之大凶事也，非國之寶。

劉曰：兵動害物，喪國亡家，禍莫大焉，豈曰國寶。

寶之者，而不用也。

韋曰：守道無為，則天下各安其所安，而兵不用矣，此之謂大寶也。安用此不祥之凶器哉！劉曰：國寶者，不用兵。

用之者，動有亡國失民之患也。

李曰：克定禍亂，義實由兵，以慈用之，其戰自勝。然兵既主殺，殺為凶事，非國寶也，好生惡殺，重粟愛人，無為戰兵，為國寶也。故云寶之者不用，用之者，動有亡國失人之患，此是凶之大也。劉曰：若用兵，必至於此也。夫安天下者，當以無事，況用兵乎，不得以用之，非樂然也。是以聖人懷微妙，抱質朴，而不敢有為與天下交爭焉。

冲曰：聖人空虛無為，懷道守德，不敢趨競有為，與天下之人交爭名利也。李曰：存之要道，懷微妙也，無失淳風，抱質朴也，無為去兵，息於機戰伐，不與天下交爭矣。劉曰：有為有欲，爭者奪之，無事無為，樂推不去。

雖有猛獸不能據也，雖有蜂蠆蟲蛇不能螫也，雖有兵刃不能害也。

李曰：心存正道，行移質朴，恕己及物，內無害心，雖有外毒不能加也。劉曰：子雖凶頑，不能害於慈父，獸雖猛厲，不能害於聖人。

以其積德玄通故也，是以天下莫能害焉。

韋曰：德冲六合，玄通宇宙，宇宙者，將與萬物為一體，與天地為一心，然則猛獸兵刃，乃是我體之塵垢耳，安能傷我哉。

柔弱章第二十八

老子曰：天下柔弱莫過於一氣，氣莫柔弱於道。

劉曰：氣雖柔弱，聚散有時，道之為物，無時而積，

道之所以柔弱者，包裹天地，貫穿萬物。

韋曰：天地在空玄之內，夫空玄之空，不能空道，故包裹天地焉。金石堅剛，不能障道，故貫穿萬物焉。劉曰：若非柔弱，豈能包裹貫穿哉。

夫柔之生剛，弱之生強，而天下莫能知其根本所以從生者乎。

韋曰：柔弱者，道與氣也，剛強者，天地與萬物也。根本，即自然之道也。劉曰：剛強之質，從柔弱而生之，物各有之，不知其本，所謂性與

天道不可得而聞也。

是故有以無爲母，無以虛爲母，虛以道爲母。自然者，道之根本也。

李曰：凡物有形，必自無生，故以無爲母。元無所有，以有有故，遂乃有無，無本空虛，起無見者，從虛而來，故以虛爲母。虛既空矣，何能運行通而不壅，必由於道，故以道爲母。道者，非無非有，非實非虛，不來不去，不始不終，非物使之，非人所造，不知所以，號曰自然。道既自然而來，自然即是道之根本。此名無能生有，次第互生，欲結前能行柔弱，則以生剛強也。劉曰：階淺以至深至妙，莫知所由，故曰自然者也。

民之章第二十九

老子曰：民之所以輕命早終者，民自令之耳。非天地毀，鬼神害。

韋曰：天地之大者，生也，豈無故毀人命哉？以道莅天下，其鬼不神，亦安得害我命哉！

以其有知，以其形動故也。

韋曰：用智逐欲，勞動其身，形廢神

竭，故中道夭而不終也。劉曰：智生形動，逐欲取敗，自貽伊歲，鬼神何為。

是故無有生有，無形生形，何況於成事而敗之乎！

徐曰：人未生時，本無有身，雜於恍惚之間，變而有氣，氣變而有形，形變而有生。不能清淨無為，養神守身，使長生久視，况復生養失理，動爲罪咎，敗其成身善事，致喪命早終乎。劉曰：心本無為，情欲斯起，神體無象，形色乃生，無象無為，尚生形欲，成事取敗，詎足怪哉。

人欲長久，斷情去欲，心意以索，命爲反歸之。

李曰：縱欲傷身，斷情益壽，絕有為之想，內外都盡，心意以索也，年非外情，命在己身，故曰反歸之。

形神合同，固能長久。

劉曰：夫欲保命長久，不令早終者，當須除情去欲，心意都盡，命自歸之，更無他術。索，盡也，謂俱無欲也。李曰：魂離於人則身死，神將

形合則命長也。

天下章第三十

老子曰：人雖在天下，令意莫在天下；人雖在國，令意莫在國；人雖在鄉，令意莫在鄉；人雖在家，令意莫在家；神雖在身，令神莫在身，是謂道人。

韋曰：所在皆忘，故能所在皆存。劉曰：涉遠之賓，誰留迎旅，趣真之士，孰顧形體，形骸尚忘，况乎家國，猶棄人天何為。

意微章第三十一

老子曰：患生不意。

冲曰：夫富貴之人，自謂歡樂無憂，不意二字者，反為我身累患也。

禍生絲微。

絲，李劉本作私。李曰：患以累身，禍為破滅，意不以為患，而患已來，私不以為禍，而禍自至。人知在生實畏禍患，終日戒懼，仍慮橫來，况公然行惡，如何可免，是以君子慎微，為之於未有也。冲曰：絲，別本作私，誤也。不畏絲微之惡，致生綸

著之禍，故曰小罪不積，則大罪不成。是以經言：民不畏威，則大畏至矣。

善生於惡。

劉曰：喪命之由，為貪善名。

利生於害。

劉曰：吞鉤者，為貪芳餌也。

大生於小。

劉曰：合抱之木，生於毫末。

難生於易。

李曰：天下難事，必作於易。劉

曰：始乎履霜，至於堅冰。

高生於下。

李曰：九重之臺，起於壘土。

遠生於近。

李曰：千里之行，始於足下。

外生於內。

李曰：由內故有外也。劉曰：言出

乎外，行加乎民。

貴生於賤。

李曰：因卑以至尊也。劉曰：貴以

賤為本。

動生於安。

李曰：因靜而有動也。劉曰：安其身而後動。

盛生於衰。

李曰：熱極則寒。劉曰：日中則

昃。

陰生於陽。

韋曰：陰陽，猶死生也，夫天下同善

而無惡，同利而無害者，則善之名無

因而生，然則善名由有惡而生，利名

由有害而生，凡此上事，皆是有欲有

私之患也。李曰：靜極則熱。劉

曰：命呂則律。

是故有無之相生，虛實之相成。

李曰：有生於無，無生於有，故曰相

生，虛者，陰也，實者，陽也。熱極

寒，實成虛也，靜極躁，虛成實也，故

曰相成。劉曰：有之以為利，無之

以為用。

是以有歸有，無歸無也。

韋曰：有善則有惡，是有歸有也，無

利則無害，是無歸無也。劉曰：本

乎天者親上，本乎地者親下。

西昇經集註卷之五

① 此句，政和御制注本作「智士无思慮之變」。

② 此句，政和御制注本作「天下柔弱莫過于氣」。

西昇經集註卷之六

華陽韋處玄 句曲徐道邈 冲玄子
任真子李榮 劉仁會註 碧虛子集

在道章第三十二

老子曰：人在道中，道在人中。

李曰：道則大無不包，人則非道不生，故知人在道中也。道有細無不入，物無不在，是知道在人中也。

魚在水中，水在魚中。

劉曰：人之神氣，天地交通也，方彼遊魚，內外資水。

道去人死，水乾魚終。

李曰：此舉喻也。魚之於水，猶人之於道，道在則人存，道去則人亡，水有則魚生，水無則魚死。人必須歸道，魚定當歸水，故曰人相造乎道，魚相造乎水，水之與道，人之與魚，不可暫失矣。

故聖人自知反歸未生，捐棄僥奢，絕除憂思。

韋曰：捐棄僥奢，然後絕除憂思，憂

思既除，然後能反未生，未生既反，則道留而長存也。李曰：自知者不可思須失道也，反歸未生，抱守於本，捐棄僥奢，去泰去甚，絕除憂思，無欲無愁，以道賞心，何憂之有。

是故形隱神留。

劉曰：寂然不動。

天下歸焉。

韋曰：隱，安也，形能安神，故神亦留止於形也。冲曰：同世之形，託死隱變，精神之身，留世化物，天下慕德，皆來從歸也。李曰：凝神九重，故言形隱，道在聖德，故曰神留，颯風而至，慕道而來，萬方朝覲，天下歸焉。劉曰：歸其靜也。

無為無事，國實民富，保道畜常，是謂玄同。

李曰：法令滋彰，盜賊多有。不用奸智，名曰無為。不飾兵戈，名曰無事。不以有為撓物，常以無事安仁，任用賢哲，百姓繁昌國實。却被走馬，以事桑田，財足穀多，故云民富。守於真正，故云保道。因循日新，是

曰畜常。保道得道，畜常得常，達於常道，故曰冥同也。劉曰：主上無為，群生安業，儲積充實，而民富貴，至理之道如此。

有國章第三十三

老子曰：有國者，其根深也。

韋曰：王叅四大，繼天理物，當與道同根無為也。李曰以道為根，所得深矣。

天地覆載，萬物畜養，金玉重寶不積留也。

韋曰：天地無為於覆載，故常覆載，是以藏金於山，藏珠於淵，則重寶無所逃其域矣，奚假積留於府藏哉。李曰：夫有國者，宜以道為根，德為本，德無不被，道無不通，為天地之所覆載，保其清寧，萬物之所養育，獲其長久，不須積聚金玉，而金玉自然留止也。劉曰：天地自覆載，萬物自畜養，聖人根深寧極，金玉重寶一氣所須，是棄而不用也。夫外天地者，有天地。外其身者，而壽命存也。

李曰：外，遺忘也。用之有為而天下失，行道之德而天下存，故言有也。以生為有，愛養傷生，故其身亡也。能忘於身，身將道合，壽命無極，故其身存也。劉曰：夫遺天地者無事，無事者則物歸之，遺形骸者無欲，無欲者則命存矣。夫天地形骸，尚自外之，金玉重寶，何足留意也。

是以君子善人之所不善，喜人之所不喜，樂人之所不樂，為人之所不為，信人之所不信，行人之所不行，是以道德備矣。

李曰：至學之士，學人之所不能學，立行之者，為人之所不能為，為與不為皆為，學與不學皆學，教無不達，理無不通，故曰道德備矣。細而言之，常俗小人所好者有為，懷道君子所好者無為，此善人之所不善也。人皆悅於聲色，我獨悅於無聲無色，此喜人之所不喜也。人皆愛於名利，我獨忘於名利，此樂人之所不樂也。人皆作憎愛，我獨作不憎不愛，

此為人之所不為也。人皆信邪，我獨信正，此信人之所不信也。人皆行惡，我獨行善，此行人之所不行也。道與俗反，志遠功高，事無不圓，故云備矣。劉曰：善者，善無情也，喜者，喜無事也，樂者，樂無味也，為者，為無為也，信者，信無心也，行者，行道德也。夫此六句亦有義焉，解行不然也，道德不備也。

皆有章第三十四

老子曰：道非獨在我，萬物皆有之。

韋曰：道無不在，豈聖人獨有，而萬物皆無哉！《莊子》云：道在屎溺。屎溺猶有其道，而况萬物者乎。劉曰：所明道無不在，修者得之。萬物不自知，道自居之。

冲曰：萬物無知，情均芻狗，不知聖匠剖大混一朴，散為無窮之物，不能自知生本，由道氣合生物，道自居之。劉曰：藏諸用也。

衆人皆得神而生，不自知神自生也。

韋曰：但不自知，又不知物，則神道自然冥會也，冲曰：神為生形之本，

衆皆得而生，不自知生我者神，神自生我也，劉曰：近在諸身而不能知。君有德施於百姓，百姓不自知受君之德也。

冲曰：君有無為之德施於百姓，百姓得其自為日用不知，謂我自然，不知受君之德也。韋曰：上不知下，下不知上，上下相忘，乃為道治也。劉曰：功成事遂，百姓皆為我自然也。

是故聖人藏神於內，魄不出也。

冲曰：聖人知生我者神，故養神守身，藏神形內，煉形化魄，合於真神，混而為一，不役魂魄，又何出焉。李曰：魄，寂也，輕躁之徒，其神自離，聖人法道，安靜無為，神不離身，寂然在內，故云不出也。劉曰：靜之至也。

守其母，其子全。

李曰：保道存神，守其母也，於身無害，其子全也。

而民熾盛，保其國也。

劉曰：本固邦寧。

玄虛積充，壽命長也。

冲曰：玄虛者道也，真積妙氣，積充我身，故能飛行空虛，壽命長久也。

人能徒知天地萬物，而不自知其所由生，反命歸本，是大不知也。

韋曰：命者，自然也，本者，道也。

我都無知，故能歸一反於自然也。

李曰：有靈之中，人最為智，測之於景，親之於天，察之於地，通之物理，無有不知，是稱為智。而不知身由

道生，歸根反本，而守愚至死，信命

將終，是大不知也。劉曰：謂假學

之流，雖復窮教盡藝，辯智多能，奇

伎異端，規模聖軌，而不悟生之所

由，反命歸本之道，而逐於外者，於

世雖得其美名，於身是謂愚焉。

治身章第三十五

老子曰：治身之道，先隱天地，靜居萬物之始。

韋曰：隱，安也。先安其身形，如天

地之無為，然後能心居萬物之始。

始也者，道也。李曰：修身之理，必

先忘於形，形有既忘，都無所見，此

隱於天地也。然後息心歸本，居於萬物之始也。劉曰：天地尚隱，何所見焉，居物之始，何所有焉。

夫聖人通玄元，混氣思以守其身。

徐曰：聖人常清靜無為，故能通玄

元之道，混合神氣，思念真神，以此

守真，故能長存久視也。劉曰：開

元通而不壅，氣思混而不亂，以此守

真，是聖人之道也。

俗人以情愛貪欲以守其身。

劉曰：情愛深於溟渤，貪欲重於丘

山，如此守身，愚人之趣也。

此兩者同有物而守其身，其道德各異

焉。

劉曰：聖智愚情，兩行相反，俱專事

業，為用不同，美惡二途，功滿則方

效也。

道德章第三十六

老子曰：道德天地，水火萬物，高山深淵，各有所歸之。

李曰：道德是幽微之理，天地已下，

是有形之事，有象之物，猶各有所

歸，喻無形之道，若能無心去欲，道

亦當自然而至。

夫道非欲於虛，虛自歸之；德非欲於神，神自歸之；

李曰：道既虛無，德亦神妙，虛無神

妙，必竟清靜，而人若能虛心無身，

自然歸道，抱神守妙，自然歸德也。

劉曰：虛歸於道，神歸於德，道以虛

往，德亦神歸。

天非欲於清，清自歸之；

劉曰：輕清者，上昇也。

地非欲於濁，濁自歸之；

劉曰：重濁者，下沉也。

濕非欲於水，水自歸之；

劉曰：水流濕也。

燥非欲於火，火自歸之；

劉曰：火就燥也。

萬物非欲見於形，形自見之；

劉曰：無相者，不能見也，有形者，

不能隱也。

高山大澤非欲於飛鳥虎狼，飛鳥虎狼

自來歸之；

劉曰：羽族毛羣，必歸林藪。

深淵河海非欲於魚鼈蛟龍，魚鼈蛟龍

自來歸之；

劉曰：類聚羣分，各有遊處。

人能虛空無爲，非欲於道，道自歸之；

劉曰：有用者事竄，無爲者道歸。

由此觀之，物性豈非自然哉。

劉曰：物類相感，非由情割。

善惡章第三十七

老子曰：百姓行善者，我不知也；行惡者，我不知也；行忠信者，我不知也。

徐曰：四民皆有自然之性，苟無根性，難可化諭，猶如烏黔鶴白，非染浴之功也。李曰：聖人運慈悲之意，開化導之方，咸令捨惡業而建善因，去虛妄而行忠信。而迷途難曉，失路不歸，各隨生業，任其顛倒，不能虛忘罪福，競生善惡。行善者致賞，行惡者被刑，忠信者則是賢臣，譎詭者便為狂賊，並由行有善惡，而名有是非。本是衆生所為，非聖人所知者也，此為權教，事至自悟，故言不知耳。

是以積善善氣至，積惡惡氣至。

李曰：前以權法，語曰不知，任被愚情，恐惡根未絕，故將此實教勤勤曉示。善不積，不足以成名，惡不積，不足以滅身，故知積善善至，積惡惡來，皎然非虛，信之影響。明言此者，心欲捨惡歸善也。劉曰：明聖人無心應物而已，善惡自積，孰知之哉。

是故聖人言，我懷天下之始，復守天下之母，而萬物益宗，以活其身。

李曰：我懷天下之始，抱道也，復守天下之母，含德也。道德在內，為人所尊，故曰益宗。物能歸道，道能濟物，人物得存，故云以活其身。劉曰：潔源者流清，守母者子贍。吾意常不知。

劉曰：知即非守母之道也。

安能知彼行善惡焉。

李曰：聖人內忘於身，則無人無我，故云吾意常不知。外忘於物，亦無善無惡，彼此並皆都忘，何能知彼之行善惡也。劉曰：守母尚自不知，安更知子所作。

積善神明輔成。

韋曰：積善以感神明，神明自然成輔，亦我不知也。

天道猶祐於善人。

韋曰：天道無親，常與善人，天亦不知者也。

寂意章第三十八

老子曰：吾道惔怕寂。

韋曰：死灰枯木之謂也。意死者生，靜而復命也。

韋曰：雖不失其生，意同死人也，故能無時不生，以其意死，寂然，故能復其自然之命也。冲曰：意死，猶灰心也。

生生積浸潤，滋酌留滯。

李曰：靜心息意，以道生生，故曰生生。道流不絕，久潤於身，故云積浸。玄津法水，是謂滋灼。流注已身有礙，故名滯。為道所止，故云留也。劉曰：積聚氣血，將以為身，生之義如此。

玄冒沾洽。

劉曰：玄冒，謂覆被形骸也。沾洽，

謂津洑通流，開諸關脉也。

元氣包之。

李曰：息意有為而生自存，靜心歸道而命自復，以能歸道，為道所覆，故曰玄冒。靈液流潤，故曰沾洽。人之受生，本緣元氣，愛精保氣，氣不離人，人得氣生，為氣所裹，故曰包之。劉曰：生者雖曰神功，非氣無以化育。

其根益深。

韋曰：冒，覆也，言萬物之生，積浸和氣之滋洑，留結玄冒而沾洽也。又有元氣裹之，故其根益深，與道同本。冲曰：洑，如人手足液也，冒，覆也。學人抱元守一，以其神氣積充，浸潤一身，滋液津洑，留滯百骸，玄道覆燾，沾洽內外，元始道氣，包裹我形，萬氣長存，真神栖鎮，所以生根益深，長生久視也。

乃四固。

劉曰：真性綿邈，形骸不虧。中無心。

韋曰：得地水大風^②，故能堅固以成

其身。冲曰：塞兌閉門，耳目口鼻四情堅固，塵境不得入，中心空無也。

故能致萬物精華。

韋曰：雖四物成其身，而其中寂然，同於無心，是以萬物精華莫不歸之。李曰：玄道所覆，元氣所包，道遠氣長，故曰其根益深。深根寧極，身外則存，四大不毀，乃云四固。忘情虛已，內外清淨，湛然空寂，名曰無心。身心既忘，絕諸羣有，契虛無之境，得杳冥之精，故曰致萬物精華也。

無極之物，自然來歸之。

冲曰：學道之人，精修行氣，故萬物齊仙，霞精光華，玄景希夷微妙，無極道無自來歸也。

以其空虛無欲固也^③。

李曰：有形之物，並為羸惡，無極之物，是曰精華，無極精華，是為真道來歸已。何以致然？皆由清靜空虛，所以自然而生矣。

戒示章第三十九

老子曰：喜，吾重告爾，古先生者，吾

之身也。

冲曰：老子十號，一號古先生。又《應號記》及《顯迹記》並云：上三皇時，號古先生，此即明老君之身，歷代行化，當過關之時，寓記此言以誠尹公，故稱開導竺乾，指言昇就。及尹公師稟受道，傳授五千文，付以九丹訣，又授九室之要，將化西土，昇入太微，欲重訣言以解其惑，故却告言，古先生者，吾之身也，所以祛尹公之疑，示西化之兆矣。後人妄改云，古先生者，吾之師也，一何謬乎！且《帝王年代記》所推老君文王受命之年太歲丁卯，下為周師，昭王時宅關，二十五年癸丑，與尹公說經，二十六年四月，昇入太微，二十九年，尹公會蜀青羊肆，重見老君，遂化西國。後人妄云平、敬、幽、厲、定王之時西入流沙，亦皆謬耳！何者？尹公是周康王大夫，至昭王時，請出為關令，以候老君，非平敬之時明矣。

今將返神，還乎無名。

李曰：無名者，是寂境之常道也。隨機導物，從真起應，名為降德，化緣既息，攝迹歸本，故曰返神。來則於無象而示有象，還則自有名而返無名，故曰還於無名。

絕身滅有，綿綿長存。

冲曰：神者，靈妙之稱也。返靈妙之神，還於玄虛，歸於空寂，無名無形，絕同世之身，滅有形之體，成無上道，綿綿若存也。李曰：息化去應，名曰絕身滅有。法身不動，真道凝然，是曰綿綿若存。

吾今逝矣，亦返一原。

李曰：逝，往也，老君從東往西，故云逝矣。真法無一，正道唯一，從東而來，還歸於道，是亦返一原矣。

忽焉不見。

劉曰：存亡自在，非常情所測。

斯須，館舍光炎，五色玄黃。

冲曰：館舍，莅事所歸也。老君在周，和光世俗，微迹微藏，觀化風塵，藏人於人，人莫之識，欲息迹返原，解形遷化，是以忽焉不見。斯須之

間，館舍光明，照耀內外，五色玄黃，驚駭視聽也。李曰：斯須，俄頃也。老君神妙不測，道力自然，於有能不可有，則忽焉不見，不有而能有，則放光五色，映照十方，示以神變者，令以戒受也。

喜出中庭叩頭曰：願神人復一見，授以一要，得以守元。

冲曰：既睹神變，方知大聖，是以出於庭中，叩頭頓顙，唯願神人重復一見。雖蒙教誨，旨遠途多，莫知所從，故重一要，得以抱一守元也。

即仰視睹，懸身坐空中，去地數十丈，其狀金人，存亡恍惚，老少無常。

李曰：良願既發，玄聖非遠，仰視天上，即睹老君端坐虛空，去地高邈，容儀非彼皓首，形狀純是金身。或無或有，故云存亡恍惚。非大非小，故曰老少無常。

曰：吾重誠爾，爾其守焉。

榮曰：再數妙法觀令保道。

除垢止念，靜心守一。

李曰：有為紛累，人間穢濁，浪生分

別，妄起愛憎，皆染汙，人咸稱曰垢。制情忍色，達有通無，並悉蕩之，故言除也。意無所繫，故云止念。內外弗著，故為靜心。凝神於道，用志不分，故名守一。劉曰：凡非真性者，皆是垢，夫止念慮，衆垢方除，守一不動，真心乃靜也。

衆垢除，萬事畢。

李曰：百惡銷曰除，萬善具曰畢。

吾道之要，誠警竟即隱。

李曰：前請抱元守一，誠以除垢止念，邪念息，正業興，可以成真，可以得道，可以理家，可以化國，事無不可，故云畢。玄元應物，本在救人，人依教行，理無不濟，物濟人度，德克化給，遷形入寂，故云隱。

喜不知所之，泣涕追慕，退官託疾。

李曰：聖師入妙，莫測所之，仰德故流涕，思慕去於有事，歸以無為，故寄僞託疾也。

棄念守一。萬事畢矣。

李曰：奉戒在心，依經立行，更不外緣，是名守一，有累之塵既盡，無為

真道自成，智滿德充，萬行皆備，故云畢矣。

西昇經集註卷之六

①『水之與道，人之與魚』，疑當作『人之與道，水之與魚』。

②『得地水大風』，當作『得地水火風』。

③此句，政和御制注本作『以其空虛无欲故也』。

④『吾道之要，誠警竟即隱』，政和御制注本作『吾道之要也。誠竟復隱』。

（曾召南點校）

017 太上老君大存思圖

注訣

經名：太上老君大存思圖注訣。
 撰人不詳，約出於南北朝。原本一卷，分十八篇。現存後十篇。
 底本出處：《正統道藏》洞神部方法類。參考：《雲笈七籤》卷四十三。

存五藏五嶽五星五帝金映五色圓光

存三師竟，次思見五藏、五嶽、五星、五帝。

右四條備衛身中，身中變化，無所不容，至於畫圖，無由備受，象之於外，標明方位，得之言前，勿拘迹致云耳^①。

金映蓋一體，體作五色，從肺後出，項有圓光如日象。

右三條在身中，照明十方，共右七條，其形如左：



凡存思之時，皆閉目內視。人體多神，必以五藏為主，主各料其事，事各得其成，成正則一而不一，不二則隱顯無邪，無邪則衆妙可見，見妙則與聖符同，同聖則即可弘積學，自然感會。是以朝夕存思，不可懈怠。存者何也？敦也，輪也，思者何也？司也，嗣也。勿以輕躁失本學，學以重厚得宗，得宗則輪轉無滯，無滯則存而不亡。不亡由於司察善惡，善惡在乎嗜慾偏頗，偏者嗜慾^②愛憎徊惶，往反生死勞苦未停，未停之停，停善不著善，著善之善，

歸宗未能至，至宗無者資於念，念念相續，繼念嗣存，無有入於無間，無為而無不為，號曰微妙玄通，和光挫銳，濟度無窮。是故為學之基，以存思為首，存思之功，以五藏為盛。藏者，何也？藏也，成也，潛神隱智不炫耀也。智顯欲動，動慾日耀，耀之則敗，隱之則成，光而不耀，智靜神凝，除欲中淨，如玉內明，得斯勝理，久視長生也。第一見肺，紅白色，七葉，四長三短，接喉嚨下。

肺者何也？肫也，伐也。善惡之初，兆而未明，明善則伐惡，惡明則伐善，善廢惡興，伐人命根，根斷不斷，由於此藏。此藏魄，藏魄者何也？粕也，著也。人之炫耀莫不關慾，慾著曰惡，惡如糟粕，愚俗滯之，不識情本，今願標著，存而見之，魄則肅然不得為惡，惡急宜棄，故先存之。火與金合，成敗未分^③，其色紅白，葉數納言，取其和成德，德始於肺，終於脾，脾一又二兼齊也，兼齊者，有信也^④。

第二見心，如芙蓉未開，又似縣赤油囊，長三寸，在肺前。

心者何也？深也，斟也。是非未辯，斟酌優量，敗則滅身，成則得道，禍福之深，由於此藏。此藏藏神，神者何也？申也，真也，智慧之王^⑤，使屈能申，存而見之，神則凝然，識定入真，不可深累也。

第三見肝，蒼紫色，五葉，三長二短，長九寸，在心下。

肝者何也？幹也，還也。悟惡能改，決定無疑，行善建功，幹事不怠，審正還宗，由於此藏。此藏藏魂，魂者何也？紘也，回也，紛紘俗海，回向道門，存而見之，魂則欣然勸進立功，克隆善業也。

第四見腎，蒼縹色^⑥，如覆雙漆杯，長五寸，夾背兩腎，著脊。

腎者何也？緊也，津也。習善緊，不敢慢，津潤無窮，濟度無極，通道祛俗，由於此藏。此藏藏精，精者何也？清也，靈也，動以徐清，變化無礙，神靈往還，提携空極，存而見之，

精則澄然，不散泄也。

第五見脾，黃蒼色，長一尺二寸，中有一尺曲檢太倉，胃上。

脾者何也？裨也，移也。清凝潛潤，補益一切，安而能移，移而不匱，既成曲於此藏^⑦。此藏藏志，志者何也？至也，異也，潛潤密化頑鄙異人，存而見之，信驗治俗，志則湛然，至乎道也哉。

次思五嶽：

嶽者何也？巖也，覺也。巖然安鎮，不可傾動，動化順道，使迷夢覺悟。學士象之，故次思也。思嶽正方在於藏者，鍊此肉姿為金剛也。

第一見東嶽泰山，正在東方。

東者何也？童也，動也。動修正道，澄源清淨，故其方氣清。物色多青，青春主仁，蠢息宜愛，存見在肝。肝無災患，保長生也。生為元首，故先存之也。

第二見南嶽霍山，正在南方。

南者何也？任也，納也。運至此時，才行堪任，廣能容納，故其方氣盛。

物色多赤，赤夏主禮，大事宜明，存見在心。心無災患，保常安也耳。

第三見中嶽嵩高山，正在中央。

中者何也？工也，沖也。央者何也？常也，量也。輪轉無窮，體空詣極，其方氣和。物色多黃，中正無邪，周行不殆，觸感能應，故黃季主信，總括要密，存見在脾。脾無災患，保永立也。

第四見西嶽華山，正在西方。

西者何也？淒也，齊也。淒切貞白，內外齊潔，故其方氣烈。物色多素，素秋主義，德行宜總，存見在肺。肺無災患，保通成也。

第五見北嶽恒山，正在北方。

北者何也？伏也，福也。動極歸靜，調伏無窮，窮則能變，萬福惟新，新如不新，微妙幽玄，故其方氣柔。物色多黑，黑冬主智，智周必濟，存見在腎。腎無災患，保常樂也。

次存五星：

星者何也？精也，生也。精由窈冥，應現成形，祛諸羸滯，濟長生也，金

剛極精，與神合也。

第一見熒惑星，在南嶽上。

其色赤，其精朱。熒者何也？灼也，炫也。惑者何也？忒也，賊也。欲動炫耀，致差錯賊害，名以為主亂，亂宜急治，先存見之。謂亂則定，定亂既著，信顯義明，明義入智，智通長存。

第二見鎮星，在中嶽上。

其色黃，其精煌。鎮者何也？信也，定也。煌煌之盛，內外安寧，四方無違，信有徵也。

第三見太白星，在西嶽上。

其色白，其精素。太者何也？大之大也。白者何也？的也，灼也。灼然明白，能受衆彩，衆彩得之，的然顯發，用之隨宜，無能大此，故曰太白，殊諸名也哉。

第四見辰星，在北嶽上。

其色黑，其精玄。辰者何也？淳也，真也，潛也。潛通顯達，始終無虧，雜污不染，智慧靜也。

第五見歲星，在東嶽上。

其色青，其精蒼。歲者何也？際也，遂也。去故就新，窮而能通，因際又會，遂成功也。

次存五帝：

帝者何也？諦也，詣也。精真之信，有此神形，形神俱妙，妙應無窮，審至宗極，無退轉也。

第一見黃帝。

在鎮星之中，下遊中嶽之上。宣理脾氣，通人志願。巖間宮殿，七寶堂室，衣服羽儀，侍從旛蓋，文武伎樂，物色多黃，果願貴徵，變化須驗，故先存之，信為主也。

第二見白帝。

在太白星中，下遊西嶽之上。宣理肺氣，遣人滯著。巖間宮殿，七寶堂室，衣服羽儀，侍從旛蓋，文武伎樂，物色多素也。

第三見黑帝。

在辰星之中，下遊北嶽。宣理腎氣，潤人精液。巖間宮殿，七寶堂室，衣服羽儀，侍從旛蓋，文武伎樂，物色多玄也。

第四見青帝。

在歲星中，下遊東嶽，宣理肝氣，獎人善事。巖間宮殿，七寶宮室，衣服羽儀，侍從旛蓋，文武伎樂，物色多蒼也。

第五見赤帝。

在熒惑星中，下遊南嶽，宣理心氣，定人神智。巖間宮殿，七寶宮室，衣服羽儀，侍從旛蓋，文武伎樂，物色多朱也。

次存金映蓋體：

見五帝光儀，備衛身中，飛五星色相，出覆體外。熒惑在頭上，鎮在心前，辰在膝間，歲在左肘，太白在右肘，光色往還，混成金映。映者何也，決也，鏡也。金者何也？堪也，欽也。身金紫色，神氣清和，決決深靜，朗鏡無味，堪幹堅剛，斷決邪疑，捨凡成聖也。

次存體作五色：

色者何也？測也，識也。妙氣應感，以反衆迷，迷復識真，以測邪偽，偽色既捨，真色自形，形妙鍊麤，麤消

成聖耳。

第一見白氣從肺出，第二見赤氣從心出，第三見青氣從肝出，第四見黃氣從脾出，第五見黑氣從腎出。

向見帝光星色，合成金映，今見五藏五氣從藏又出，以次相隨，上昇至頭，五色輪回，冠覆身體，翦鬱氛氳，如在濃煙中也。

次存項有圓光：

身已化為紫金之色，又得五氣周旋，明嚴相好，項生圓光，匝繞上下，通洞晃炎，照明十方。消却萬惡，內外洞徹，無鄙之疵。

光神不二，道同一矣。

存竟，禮十方，次禮真經真人曰：禮經時，心注太上老君，三拜，次念尹先生，河上真人，玄中法師，復三拜。常三萬六千仙童玉女侍經燒香，為兆求白日昇天之道者也。

坐朝存思

坐朝者，端坐而修禮也。凡有公事私礙，或在非類之間，不得束躬上堂展敬，但自安坐，不使人知，香火非嫌，乃

可然之，人見致笑，亦即可闕，將護彼意，勿增他愆，初夕向曉，依時修之。白日啓請，亦宜平坐，坐則如常，勿革形色，唯令異人，不能覺知，人覺而喜，乃可化之，覺而嗤鄙，訾毀正真，誤其招殃，又壞子業。古之學道為己，今之學道為人，為人苟以悅人，不顧心非，為己者存心是不顧亦違，違亦由心，致感彌速，強欲伏眾，有迹無心，非唯徒勞，乃更獲罪。學真之士，各加思真，真貴會時，時貴善合，合而非善，此時勿會，會必兼濟，濟物及身，善善相得，捨惡昇仙。捨惡昇仙，乃謂為會，會惡致敗，名濫實殊，若出處所遭，遭時二病，一者滯心，二者執迹。執迹者，宜以心法化之，滯心者，宜以迹法引導，心迹弗偏，化執導滯，二病豁除，上聖之道就矣。

凡行經山水，積日舟車，舟車之中，山水之際，步涉登陟，舍住相須，疲倦止息，皆依時存禮。隱顯隨宜，存思精審，自然忘勞，魔邪惡人，不敢撓近。當誦經行戒，以善興居，興居

無善，破戒違經，雖復存禮，終不睹真。嫉鬼妬神，凶人惡物，更相衝突，煩惱生災，卧坐無寧。急存九行，行之檢身，心存口誦，解了無疑，以定三業，三業既定，眾災自消，人鬼敬伏，擁護去來，出入動靜，必保貞吉。九行在《想爾注》前，三業在《明威經》後，存思者急宜憶之，故標出如左：

行無為，行柔弱，行守雌，勿先動。

此上最三行。

行無名，行清淨，行諸善。

此中最三行。

行無欲，行知止足，行推讓。

此下最三行。

一者不殺，二者不盜，三者不淫。

此三事，屬身業。

一者不妄言，二者不綺語，三者不兩舌，四者不惡口。

此四事，屬口業。

一者不嫉妬，二者不瞋恚，三者不邪疑。

此三事，屬心業。

右九行三業十事，常當存念，驚恐之際，急難之時，皆速思之，危即安也。

碧冠青帔黃服，取宜裝。



臥朝存思

卧之為法，勿正仰如尸，當側傍檢體，莫恣縱四肢，不可高枕，三寸許耳，香藥為枕，無用惡木，泠潔穢臭，衝犯泥丸。雖行途權假，恒宜防之。卧起，呪願，善念在心，心存朝禮，時不可闕，闕礙公私，後皆懺悔也。



朝出戶，存玉女。

玉女者，是自然妙氣，應感成形，形質明淨，清皎如玉，隱而有潤，顯又無邪。學者存真，階漸昇進，進退在形，出入在道，道氣微妙，纖毫必應，應引以次，從卑至尊。故白日則玉女守宮，夕夜則少女通事，濟度危難，登道果也。

碧冠綠帔淺服，餘並取宜裝。



夕出戶，存少女。

夕出戶，呪曰：少女通靈。

學未昇玄，不得無業，業有優劣，皆必須因，因精果妙，乃一其神，神而未一，由學未精，精之以漸，引陰濟陽，人生陽境，動靜歸陰，陰為道幾，應感最妙，妙應之初，有茲少女，秉正治邪，和釋高戾⁸，罰惡祐善，陰德

濟陽，顯稱玉明，其可堅貞，呪而存之，成真則速矣哉。


行道時，存雲氣兵馬。

清旦，先思青雲之氣匝滿齋堂中，青龍獅子，備守前後。

次思青氣從師肝中出，知雲之昇⁹，青龍獅子在青氣中，往覆弟子家合宅大小之身。仙童玉女，天仙地仙飛仙，日月星宿五帝，兵馬九億萬騎，監齋直事，三界官屬，羅列左右耳。

正中，思赤雲之氣匝滿齋堂，朱雀鳳凰，悲鳴左右。

次思赤氣從師心中出，如雲之昇，鳳凰朱雀在赤氣中，往覆弟子家合宅



大小之身。仙童玉女，天仙地仙飛仙，日月星宿五帝，兵馬九億萬騎，監齋直事，三界官屬，羅列左右。

日入，思黃雲之氣匝滿齋堂，黃龍黃麟，備守四方。

次思黃氣從師脾中出，如雲之昇，黃龍黃麟在黃氣中，往覆弟子家合宅大小之身。仙童玉女，天仙地仙飛仙，日月星宿五帝，兵馬九億萬騎，監齋直事，三界官屬，羅列左右耳，三時行道，六時依如後科。

人定，思白雲之氣匝滿齋堂，白虎麒麟備守內外。

次思白氣從師肺中出，不須存麒麟，宜存白虎，若存麟，思白麟在白氣中，往覆弟子家合宅大小之身。仙童玉女，日月兵馬，悉如前法。黃籙大齋三時行道，宜用日入，常齋三時，可取人定，人定而用，日入存思。又六時更從青始，次赤，周白，此皆失法，青赤白別有，皆非五藏六府之儀也。

夜半，思玄雲之氣匝滿齋堂，靈龜騰蛇


備守上下。

次思黑氣從師腎中出，如雲之昇，靈龜騰蛇在黑氣中，仙童玉女，日月兵馬，悉如前法也。

向曉，思紫雲之氣匝滿齋堂，辟邪獅子備守隱顯，其形如左。

次思紫氣從膽中出，餘如前法。

凡存雲氣，各從方來，青雲出東，赤雲出南，黃雲出中，白雲出西，黑雲出北，紫雲出上。見從其方，稍出漸盛，翳鬱氤氳，充溢堂宇。然後思己身中藏氣，又出與雲色乎合，氣同明淨香潔，覆庇家門，宮城山水，小大畢周，神官靈獸，齊整參羅前後左右，四方內外，上下隱顯，六時轉隆神靈普遍也。



真人冠綠帔，餘人物雲氣各取宜。

上講，坐存三色，三一魂魄。

上講時，先存三色，次存三一。行道有

六時，上講常三時：食後，上晡，人定。三時入齋堂捻香，禮三拜，巡回依座，坐竟，有衆者法師以拂擊席①，仍放板膝前，同臨目握固，存頭氣青，兩乎氣赤②，兩足氣白，三氣繞身，其形如左：



碧冠青帳淺服，餘取宜裝。

存三一魂魄。三一者，三處之神同一道也。其道本一，應感成三，三界內外，無乎不在，統化主物，號三天太上，宣教侍經，號三素左君，降人成德，號曰三一。三一在人，人有三宮：頭腦名爲上元宮，其神曰夷；心內名爲中元宮，其神曰希；臍下名爲下元宮，其神曰微。皆如嬰兒，俱長一寸。靜坐

正拱，無欲無爲，體無應有，學仙所存。久習堅固，神通洞達，然後變化無滯，群動咸依，細無不入，大無不包，或爲無窮，或爲無極，觀妙之初，先由寸起，其形如左：

真人曰：齋時，皆心注玄真，永無外想。想念在經師，先思三一在宮室，安居分明，具三魂七魄，太一鎮泥丸中，如回風帝一法。然後與兆俱齋聽經，口授心存，則三尸亡走，邪氣滅去，內外受真，如此近仙矣。傍吐納導引和液，行上諸妙道，天真必降子。上士得道於室內，雖處巖穴，而外想一毫不絕，亦徒勞損力耳。學道唯心盡志，仙人當下觀試之也，子善詳察之焉。



碧冠青帳淺黃服，餘取宜裝。

初登高座，先存禮三尊。

講義及讀經，先靜竟，登起向太上座，三過上香，却後數尺，禮三尊三拜，又仍存，經師、籍師、度師，各禮一拜，合六拜，乃登高座，其形如左：

三尊者，道尊，經尊，真人尊。三一之尊，通乎人身，人身欲與三尊同者，清齋精思，禮拜存之，日一過如此，初下禮六拜，後重上，不須禮，下則二拜，叩搏願念如法，羸者心拜也。



碧冠綠帳黃服，餘並取宜裝。

登高座，存侍衛。

登高座，安坐，斂簡當心，鳴鼓三十六通，嚥液三十六過，臨目見左青龍，右白虎，前朱雀，後玄武，足下八卦神龜，

三十六獅子伏前，頭巾七星，五藏生五氣，羅文覆身上，三一侍經，各千乘萬騎，仙童玉女衛之，其形如左：




萬遍竟，雲駕至。

能讀《五千文》萬遍，太上雲龍下迎，萬遍畢未去者，一月三讀之，須雲駕至，便昇仙，其形如左：

修行萬遍之道，又存五雲之星。轉經之後，夜半至生氣之時，飽服五牙之氣，坐向月建之方，叩齒九通，嚥液三十六過，臨目存五星，辰在頭上，歲星在左肘，太白在右肘，熒惑在兩膝間，鎮心在心中，久久乃止。行坐出入，常思不忘，千災自然絕，萬禍不能干，後當身上出水，身下出火，智慧六通，奄見五老。五老是五星之精，見之，則變化自在，同昇乎天也。

真人碧冠綠帔黃服，車輦人物雲彩並取宜。



受經之後，長齋存真，捨俗習道，精思誦文。日轉十遍，涉歷三年，千日之

中，數充萬遍。解了究悉，具足修行，鍊易備弘，身神相一，雲龍來迎，上昇三清。遍畢未去，其事有二：一者功成德就，赴感濟時，運未隱景，故續獎後生；二者未究竟，行未備周，鍊未能精，思未招應，雖訖未昇。方須研進，遣欲觀妙，損己度人，勇猛立功，精嚴存念，或多或少，一月三修，物我咸通，積勳成德，念念不斷，善善相聯，恒見三尊，雲駕自至，久必神通。躁促則塞，塞而億遍，亦弗能超。超然行周，身神俱騰矣。

行周者，能仁義禮智信救度天人也。有此五德，雖具而微，不周濟物，濟物功少，皆非行周，無望得道。得道之由，由行五德，行五德者，三業則定，十善事成，太一必降，五老相携，得道無疑也。

太上老君大存思圖注訣

③ 此句，《雲笈七籤》本作「成則未分」。
④ 此句，《雲笈七籤》本作「脾一又二兼濟也，兼濟者，信也」。

⑤ 此句，《雲笈七籤》本作「智慧之主」。

⑥ 此句，《雲笈七籤》本作「蒼色」。

⑦ 此句，《雲笈七籤》本作「既成由於此藏」。

⑧ 此句，《雲笈七籤》本作「和釋隔戾」。

⑨ 此句，《雲笈七籤》本作「如雲之昇」。

⑩ 此句，《雲笈七籤》本作「又出與雲色采合」。

⑪ 此句，《雲笈七籤》本作「……以板擊席」。

⑫ 此句，《雲笈七籤》本作「兩手氣赤」。

⑬ 此句，《雲笈七籤》本作「鎮在心中」，故文中「鎮心」當作「鎮星」。

（曾召南點校）

① 此句，《雲笈七籤》卷四十三作「功拘迹致謬耳」。

② 「偏者嗜慾」，《雲笈七籤》本作「嗜慾偏頗者」。

018 傳授經戒儀注訣

經名：傳授經戒儀注訣。全名《太玄部第八老君傳授經戒儀注訣》。撰人不詳，約出於南北朝。一卷。底本出處：《正統道藏》正一部。

師曰：老君者，得道之大聖，幽顯所共師者也。應感則變化隨方，功成則隱淪常住，住無所住，常無不在，不在之在，在乎無極，無極之極，極乎太玄。太玄者，大宗極主之所都也，小宗未極之主，相導歸乎此都。此都無際，包羅畢周，最大無比，故謂為太。有而難見，故謂為玄。凡眼雖不能睹，慧目迺能覲之，研習經文，施行善事，存念宗主，不忘須臾。主本無名，標曰太上，應感爰臻，得斯目慧。慧目之果，由於良因，因由明師，師道不二，經又

一同，同乎道德。道德之極，主三合之所成，成一之尊，住太玄之都，化應十方，敷有無之妙。妙極在老，老為宗師，師體同匝，道成特高，故曰太玄高上老君。積學輪轉，位登聖真，應接無窮，不可稱述。近世出化，生乎商時，降迹和光，誕於庶類，示明胎育，可以學真，雖居下界，無累得道，厥母逍遙李樹之間，思聞清風，以祛塵迹，玉姿輝然，儵爾挺質，無坼無副，二體一和，遂因李為姓，以耳為名，居於楚國苦縣瀨鄉曲仁里中。周流六虛，教化三界，出世間法，在世間法，有為無為，莫不畢究。文王之時，仕為守藏史，或出或處，二百餘載。至昭王二十四年，太歲癸丑十二月二十八日，為關令尹先生說《五千文》。文出無始，說亦無窮，藏明隱晦，智反流源，慈旨應感，或顯或幽，宣行一切，傳者不同，各從緣解，慎勿相非。但勤精思，謹憶所知，久習神降，授以要言，自然玄鏡洞達，智慧之源也。經戒儀法者，凡二十四條，輔成三乘，上中下品，共所宜用。中人已

下，末略多違，中人已上，勤行無替，無替由於志堅，勇猛遂能兼濟，此大乘之才，智士之所慕者也。識淺情弱，弗辨興功，所進寡薄，墜則難歸，中小之乘，其業已劣，況于凡下，寧可為儔。高慮達人，務弘妙法，超三界之外，與上聖為倫矣。

序次經法第一

淳古事少，法或不多，轉久稍澆，科戒遞出，隨病與藥，輕重不同，方術彌積，條律漸繁，世運使然，不可頓革。至德聖師，隨宜宣行，既道忌滋章，理貴簡要，要略非凡，所明繁滋，非愚所瞻，愚智可得相關，繁簡必須折衷，衷在得正，正在無邪，邪正了解，解在兼通，通則得道，道則無滯，滯少謂多，執多譏少，皆非通人，悉事道體，務思此意，必感神明，神明開道，必登勝域。今撰正文，傳授十卷，並見真經，同出聖口，見善勤行，無所致惑。昔尹子初受大字三篇，中經在太清部中，所以付上下兩卷漢文，精感真人降迹，得此章句，所滯即通，登於金華，友諸天人。

隱注云：讀《河上》一章，則徹太上玉京，諸天仙人又手稱善，傳聲三界，魔王禮於空中，酆都執敬，稽首於法師。人生多滯，章句能通，故次於大字。係師得道，化道西蜀，蜀風淺末，未曉深言，託遺《想爾》，以訓初迴，初迴之倫，多同蜀淺，辭說切近，因物賦通，三品要戒，濟衆大航，故次於《河上》。《河上》、《想爾》，注解已自有殊，大字文體，意況亦復有異，皆緣時所須，轉訓成義，舛文同歸，隨分所及，值兼則兼通，值偏則偏解。偏解終還，於兼未還，慎莫譏誚，譏誚招愆，生死受苦，離苦昇樂，由於周通，周通路遠，未即了然，直能修此，不訶於彼，便爲上善。善之上者，華素兩弘，虛實備解，乃會真源。若乃時綺則言華，世素則辭質，或激素以華，或勵華以素，或前約後繁，先與後奪，或初多終少，始往未歸，大巧若拙，未易可蚩，正言若反，豈伊可詰，但勇猛思惟，以期兼解，志徹玉京，不患不通。通乎大道，此爲其最，存思有法，授受有科，朝禮齋請，悉有

儀制。究此十卷，自足兼通，未暢之間，精求悉備，求未能精，方須因盛，但篤盛因，必獲妙果，妙果有期，不假他尋，果期未至，且覽衆篇，至於首引內解，別次在後，餘力觀之，幸亦無妨。要所留心，其目如左：

太玄部卷第一

老君大字本道經上

太玄部卷第二

老君大字本德經下

太玄部卷第三

老君道經上道經下河上公章句

太玄部卷第四

老君德經上德經下河上公章句

太玄部卷第五

老君道經上想爾訓

太玄部卷第六

老君德經下想爾訓

太玄部卷第七

老君思神圖注訣

太玄部卷第八

老君傳授經戒儀注訣

太玄部卷第九

老君自然朝儀注訣
太玄部卷第十

老君自然齋儀

右十卷，授經之日，師料付之。受經之時，勿妄請問。于時天地水官，十方職局，三界內外，一切神司，並共監臨，察人善惡，舉止云為，唯盡恭肅，慎勿推遷，更相詰却。有所窒礙，事竟諮審，師為解說，分明語之，脫有忘漏，即尋經科，依按本文，勿妄增損。不可改易參差，前後謬濫，甲非護短，迷誤衆生，彼此相牽，淪陷荼毒，一失福路，求還諒難，巨石墜海，望出豈易，罪苦可畏，務宜防之。精加詳謹，幽顯取知，無相欺罔，違負人神，能如是者，必俱成真。但妙義要訣，多在口中，口中所說，經之所包，文苑事深，須口辯覈，覈實副經，不得越典，一時所須，或出他部，墳籍難遭，搜尋叵得。此儀總略，綱紀宗源，智者思之，過不啻半矣。

傳授齋法第二

傳授之重，聖賢所崇，吉人君子，尊之必齋，齋供豐儉，隨時施設，大法清虛，簡素爲上。長齋者，愚賢應傳，啓告而付。若服餌，已同心齊久立，服勤師門，並不須別更建齋，齊同志保證相成，多賢起發。功德易就，獨學孤陋，階道難昇，緣未備會，良無其人，師資對齋，宜加精思，深勝傍贊也。若在世間，行教習學，授受之人，先共對齋，乃是共修，精解入神，非指二人對靜而已，當延請師之朋友門徒眷屬男女，多少隨所能供，多乃至無數，法限三十八人，少不可減六人。六人爲通齋，官備足一人爲師，五人爲保。保者何也？寶也，荷也，次日曰明也，證也，度也，成也，相重如寶，任荷可教，明其誠丹，證其業善，度其試難，成其至真。若山居澗處，則對景斷金，窮地單寡，二三隨時，必是同志，不可異人，或生參差，破壞善事，師與弟子，精共詳宜。齋法九日七日五日三日，勿啓一日，啓一日者，會而非齋，散財飯賢，謂之爲會。文書啓告，請監會官，凡一日齋，拘涉三日也。

請師保法第三

受道營齋，用王相之日，本命甲子朔望皆佳。事辦須速，亦得弗擇。然延請師保，其應充者，善會難諧，乘闌易致，彌須注心，祈賢降德，指日投疏，依如常儀。所請之人，次第如左：

第一曰三師，以三人爲之。其一入爲正師，一人爲監度師，一人爲證盟師。第二曰五保，以五人爲都講。第三曰六明，以六人爲監齋。第四曰七證，以七人爲侍經。第五曰八度，以八人爲侍香。第六曰九成，以九人爲侍燈。

右六品三十八人，不能備者，多少隨緣。皆是師之同學，高德親知，或神智滿足，俊彥英才，同爲署辭，更相獎勸，敬之如師，號曰尊人。奉獻巾刀，以期拂拭塵垢，斷割纏縛，解釋煩惱之羅，破除障滯之網，義存解脫，逍遙淨明。淺識末學，勿叨此次，可得預齋，暫兼保證，不得署辭，勿受巾刀之獻，自依齋官當常流之職耳。

書經法第四

凡一齋之限，三日之中，繕寫經書，未悉備得，先起戒文，朝儀爲次，在師門者，亦得逆書，積漸取辦，不必齋時。齋時力少，可得借人，借人難得，不齋之時，受法之後，徐覓能書，清嚴道士，敬信之人，別住靜密，觸物精新，自就師請經卷，卷皆拜受，竟又拜送。恭肅兢兢，所受部屬，悉應寫之，皆用縑素抄之，則紙充乃應，師手書一通，以授弟子，弟子手書一通，以奉師宗。功既難就，或拙乘毫，許得僱借，精校分明，慎勿漏誤，誤則奪年筭，遭災禍，其罰深重，五校十校，講習相符，玄神祐人，延壽成聖，恩濟一切，非特己身。受是經戒，各治二通，一通常鎮，柏函盛之，架以局案，置高座近前，亦可別臺封之，不可妄開。若應暴曬，齋淨出之，竟又密藏，慎勿泄露。一通常隨，齋請思議誦習。簡素及紙潢染裝嚴首目帶軸袂蘊巾箱，皆令貞潔，不得雜他，自非同志，慎勿假借。竊寫盜取，其罪尤深。朽故更起，弊者沈淵，或納

幽洞，不則淨之，去失首悔，立功受寫，後師異法，使焚勿從，即得道，亦不可也，有不解了，且存供養，先師盟誓，不可負違，萬師一心，超三界也。

書表法第五

黃素二尺五寸，言辭多少，隨時取足，朱界朱書，書如章法，能四分二十四則益善，言三清玉皇天尊。夫上此四號，皆懸一字，餘號悉不須懸，重字不得點，死罪不得露，重名不得乖，又不得露，量度上下，使疏概相容，言尊極處，去下二寸皆上，上去下三寸，依法隔一字，拜字下一寸，猶容奏字，奏字懸之，逼下則上，上三分九行，一如章法，亦名為章。三師行紙章，悉以素為表，無表亦可用紙，章表可手言也。

書三師諱法第六

某年太歲某月朔日，某子某郡縣鄉里，男女弟子姓名，年若干歲，某於某州郡縣鄉里，某山館宅舍，受道德五千文三品要戒，三師姓諱如左：

度師，某州郡縣鄉里，男女官道士先生，姓某諱某，年若干歲，字某。

籍師，某州郡縣鄉里，男女官道士先生，姓某諱某，年若干歲，字某。

經師，某州郡縣鄉里，男女官道士先生，姓某諱某，年若干歲，字某。

右墨書黃素五寸。

辦信物法第七

白紋五丈，太極真人曰：《五千文》仙人傳授之科，素與《靈寶》同限，高才至士好諷誦求自然飛仙之道者，具法信紋縉五十尺，與《靈寶》一時於名山齋受。若緣運未遇《靈寶》，自可直受《道德經》文，於家清齋，不必山林。辦信證心，其有三：一者捨財就道，漸染勝風，二者因物取訓，涉解入宗，三者校有練無，棄礙取通。所以用紋，崇象玄迹，五十其尺，理數依分，分明正理，窮數盡玄，有無既暢，勝境斯登，逍遙長存，道俗成濟矣。

凡門內門外弟子不同，不同而同，同而又異，或有在外而勤，或有在內而惰，惰則雖數而疏，勤則雖疏而親，親仁育德，異同在茲。勤者不假物以明心，惰者宜因信以督志，惰而不滯乎財，勤而未能遺物。或有緣而貧，或富須獎勵，師友親朋，幸有代出，依法施散，廣勸立功，贊揚成義，斯德益深。若窮地無紋，他物準當，當時窘闕，從

隨補充，淡然追道，安貧從師，重賢忘物亦可，都無所須，直啓告而授，明匠自詳衷焉。

授度所須物法第八

青絲一繩，八條合之，整長九尺。

金鈕一枚，徑一寸，無一寸者，可用常銀，大小無定科，但令是真金耳。刀子，碓槌，各一杖，碓槌，檀柘金荆堅木作之，刀子，中適足以破鈕。紙筆線，紙以裹銀鈕，線以纏縛之，筆題外記年月日姓名，云五千文鈕，朱墨隨人。丹水具，朱一兩，先磨研一坩椀中，令熟相和，乃度一勝椀中，厚薄調適，過半盛之。手巾，刀子，隨師保多少，人各一巾一刀也。

右六件，皆令新淨，不侵公私，悉當預備。不得臨時更相煎切，稽廢天儀，賓主招咎，悔謝無及，先勞後逸，無憚初煩。朋友相成，更相贊助，共思詳量，務充法用。

衣服法第九

衣者，身之章也。道俗不可混雜，若出家超世，一通而已。至於陸通散髮，徒跣裸形，有之與無，弗拘限制。其涉世居家，又不得過三通。通過三

者，急以施人。積而能散，轉偽成真，真人建學，修身率衆，應須兩通。常令新淨，故隨布施，施與法人，人非法者，不得充用，穢辱真正，深宜防之。良無其人，火淨如法。非唯衣服，爰及屋宇，牀席幃帳、屐履被氈褥，食器書疏，觸物堪施則施人，不堪則淨。巾帽服飾，袴衫裙襦，行滕臂衣，事事各一。其一分別異室安處，法事則著，事竟脫之。別箱各篋，內外不參，每使香潔，齊整副稱，大小厚薄，布絹隨時，富不得奢靡，貧不得穢陋，調和中適，依按師儀。受法之初，便應令備。貧未悉具，浣濯中延要服所須，大略如左：

葛巾，單衣，被，履，手板。
右五件皆應新淨，勿用故敗。老君去周，左慈在魏，並葛巾單衣，不著褐也。故自天子至于庶人，同用此儀。披褐懷玉，隨人所辦。女子桂襪，黃裳烏履，不得金玉錦繡裝嚴。

詣師投辭法第十

凡受妙法，皆詣師門，不得屈尊曲從鄙舍。若遊行法師，延請隨時，來學則志篤，往教則業輕，得心忘迹者稀，所以深宜防慎。齋必經日者，師徒相

許，論序科儀，供辦法物，足以申意，未齋之前，久得研詳，師徒脫有緩急，齋日或少或多，三時六時，隨人所辦，初集之夕，依法投辭，書治禮拜，具在自然儀中。辭之消息，增損隨時，准擬舊文，古本如左。此本是四皓所傳，與自然訣所載不同，樂先生用之，宜與自然訣相參取衷。

三洞法師某岳先生，某治某氣某道士，如干籙生，某州郡縣鄉里，奉道男女民生弟子，臣妾小兆姓名，如干歲，某歲生某月某日時建生，今住居某州郡縣鄉里，某宮第府廨館舍山鎮中，歸命死罪乞道辭：積善之因，世崇玄化，得見三寶，踊躍歡欣，不揆下愚，遠慕上學，竊聞《道德五千文》淵奧遐邇，仰希稟受，以遂至心，謹依法齋信，清齋奉辭，伏願法師賜垂成就，謹辭，詣太上高玄大法師某先生門下。

太歲某某月日時，於某州郡縣鄉里山奉辭。

齋儀增損法第十一

受道法，齋雖依自然儀。宿啓及三上香，十方及大懺文，當隨事增損。

師若未嘗受籙，治氣不參，齋不出官，竟不言功，言功之體，首謝不及。又云受往事竟，還臣身中，此則操復，在事竟之後，齋初不得即復而出官，末云功曹使者，飛龍騎吏，列啓事竟，各還臣身，此是宣傳營齋之意，事竟即還，不關白衛齋所諸官。齋所諸官侍齋畢，度事都竟，乃言功而復，若不出官，止出入密祝，發復香爐，關啓請願，餘儀悉同。

齋竟奏表法第十二

授經之時，當取齋限之後，平旦朝禮，行道竟，未可言功，復爐。三時則其朝應朝，六時則其朝行道。初齋出官，後則未可言功，不出官者則未可復爐也。師仍向北，更三捻香，捻香竟，還東伏，仍小坐，齋官五保，猶向西，同小坐，受經之身，就師之南，向北而伏，女伏亦同師鳴鼓三十六通，讀表如左：此是堂中之法，若出壇壇，師應向北，男弟子伏左向東，女弟子伏右向西，不得與師同例。壇去堂遠百步以來。出官齋者，皆於堂中言功復爐，至於登壇重復出官，師無治籙亦不出官，不出官者入祝發爐，直捻香，仍向北小坐，鳴鼓讀表。壇在百步內者，朝及行道皆可登壇。如在齋堂之儀，唯讀表向北。若解壇之日，朝行道竟，即出。更

有他事，或缺少未解公私迴換，可待日中朝竟，依如具法入堂或壇，悉依朝行事。或朝遇風雨，先於堂中朝及行道如法，出後時晴或晚，須靜登壇入祝發爐，仍出官奏表。自非正者，皆不須朝，只發爐出官，操如章法。付受都竟，然後復官，不出官者則無操復。既對齋啓告，自不假出官，須事都竟，復爐而出。若平旦登壇，未得朝禮，行道未竟而風雨驚災害，告退之後，守靜行事如此，則朝亦脯行道，朝畢，讀表文也。

表本法第十三

三洞法師某岳先生，奉行《道德五千文》事，臣姓名。三皇號洞神，靈寶號洞玄，

玉清號洞真。受此者稱三洞，未受者直云太上道德法師。受道之後爲師，度弟子數滿，則師表奏申言功德，乃得爲師，如此則稱法師，未如此者不得爲人師。若爲齋主，則只云三寶弟子，不得云法師。三洞偏也有受，則云弟子奉行五千文事，未受，不得輒稱。若受老君及一洞二洞至於三洞之時，云太上道德法師，奉行三洞某事，男稱臣，女稱妾。女子在家，有計算之期，及其出嫁，有婦妾之異，至於自稱，皆同云妾。妾者何也？接也，捷也，勤事尊人，供奉使命，扶接捷速，不得淹留，優游怠惰，則乖正道。若在家學法未經嫁聘，皆稱女生，不受籙者，皆云弟子。並稱本父姓，嫁爲妻者，皆稱夫姓。夫捨之者，還取本姓，妾不得禮君，是以不取主姓，夫亡之後婦方受道，不得自絕於夫猶稱夫姓，或有重嫁以後爲正，若未參受，及已有所參後脫改姓，及君上賜族，皆啓奏

大道，然後稱之，前諸文書不須追改，正後所受三官，自知已經啓奏，且諸事源，頒下三官，不患妄誤，後治文書，不須重陳年息夾注之煩，以申專一之志。女子受法，堪爲人師，所稱法師先生略與男同。至於元君，夫人，諸號各異，但先生之號，以標高勝德在人先，長在不滅，故曰先生，不可自目，依如五嶽，參染積年，德潤於時，幽顯所貴，師友共奏加號先生，生年所屬治嶽相遠，若神通妙達，教化諸方，不必附嶽殊號，特隆遊玄、玄暢、遠遊、遊嶽、弘道、道德、通真、真隱、高上、無爲、無上、正一。此十二號，號中之高，諸迹功行，隨時立名億萬稱號，不可具陳，自非師友所薦，不得妄自稱也。稽首再拜上言拜畢起，又長跪，讀上啓太上，至讀辭可小坐，訖後起拜也。上言太上無極至真，無上無爲大道，高聖玄靈九天明王，玉皇上帝三十九真上靈，三十二天玄神，八十一君，三十六天帝，三十六土皇，萬仙道君，監靈使者，侍仙玉郎，領真監聖，侍經真官，大羅妙主，應感真精，十方已得道無量大聖衆，三界內外一切神明：臣以有幸生值是真，稟受經戒，夙夜遵行，讚揚妙化，濟度天人，才輕任重，慙懼但深，仰怙大道，慈獎必周，竭心盡力，誓弘匪懈，因緣所見，敢不申騰，今有取辭，詞言懇款，志願翹勤，臣

不勝見其元元之至。謹以表啓聞，臣昔之從師某先生姓名，以某年月日時，於某處，稟受道德尊經戒律科儀，某遇賢則付，某今迴向，庶允玄期，奉受之後，約如盟文，誓身九天，必能遵脩。檢慎閉口，存神念真，少私寡欲，以今神仙，按法年限，六四之間，五八大數，逢有賢人，依科上啓，通遠九天，誠信備法，然後而傳，不得輕泄，妄示俗人。上告萬靈，下告五嶽，三河九源，啓使知聞，普爲明證，成就功業，違盟愆信，七世同淪，某受經者名長充下鬼，左右官之考，循履刀山，流曳鋒劍之樹，食火啖炭，抱鐵入湯，往反二十四獄，塗苦億萬劫年，甘分煩惱，不敢有怨。如法積善，九玄俱升，某受經者名智慧通達，壽命延長，昇仙成聖，爲天人師，眷屬受慶，一切荷恩，謹以表啓聞，伏須告報，臣某誠惶誠恐，稽首再拜以聞奏，仍再拜竟，長跪讀後文：

臣姓名某，屬某州郡縣，太上無形無名，虛無至真，大道無上元尊金闕七寶玉陛下。

太歲某年某月朔某日某時，於某州某縣某鄉某里中上奏。

傳授經戒儀注訣

①『惰則雖數而疏』，據下文，當作『惰則雖親而疏』。

（曾召南點校）

019 太上三洞傳授道德經紫虛錄拜表儀

廣成先生杜光庭集

經名：太上三洞傳授道德經紫虛錄拜表儀。唐末杜光庭編集。言傳授太玄部經戒法錄之儀式。一卷。底本出處：《正統道藏》洞神部威儀類。

弟子聽師戒約，起謝訖。

次起左旋行，誦通玄讚八首：

至道常虛寂，玄化應真精。分神通一切，凝景在三清。恍惚生有象，冲寬見無形。逐運開緣會，因機說妙經。修之登景漢，慢之墮幽囚。天女散金華，神童唱玉聲。十華迴寶蓋，九鳳遏雲營。若能弘至蹟，家國悉安寧。

五億諸天界，三千道境中。是非更有待，生死互無窮。妄起貪瞋獄，虛

成殺害宮。謬言人我異，安知彼此同。六骸俱不實，萬法悉歸空。體隨煩惱盡，心與色塵終。未能求解脫，常只處樊籠。若欲常自在，稽首至道宗。

天堂與地獄，凡夫及聖人。悉從方寸起，非復有餘因。悟則聰明友，迷為愚瞽鄰。苦魂猶有識，罪魄亦含神。何為沈惱難，良由不信真。棄此身上寶，染彼世間塵。既依流浪海，還沒死生津。若欲度此苦，安坐自觀身。

善哉元始尊，慈悲度一切。德出虛空表，功滿塵沙界。廣說大乘經，發生無上慧。輪迴周億劫，教化通三世。精貫有形中，妙窮無色際。迹遍方方域，道應天天帝。權實度天人，機緣隨巨細。神用難可窮。方圓無不制。

罪福猶鏡象，生死若輪迴。但觀明裏去，誰識暗中來。未慕三天闕，唯愁五苦臺。罪魂隨運盡，幽魄應緣開。精氣空浮爽，形骸久化灰。且甘為鬼質，誰念入仙胎。徒願青書錄，終悲黑簿催。法輪難再睹，長夜足堪哀。

我身良可惜，宜各修生道。孰云

白玉芝，多蒔黃金草。結志行六度，專心樂三寶。白元來降接，赤子常携抱。朽年慙晚學，壯歲須及早。知足自逍遙，貪榮更憂惱。坐觀環堵大，靜覺乾坤小。守一若無移，終天豈云老。

三千分世界，五億化諸天。一一開淨域，方方有勝緣。九光生院草，七寶滿池蓮。行館排朱日，飛臺映紫泉。燒香皆玉女，說法盡神仙。梵引九嘯鳳，鑪飄五色烟。稽首虛皇闕，歌詠太上前。慎莫忽宿命，當須信福田。

道化三元布，神凝萬象分。龍漢開玄錄，天書下赤渾。應期鏗法鼓，隨方啓妙門。太上垂至蹟，威德被乾坤。神經三一侍，妙理五千文。字列金華府，名傳玉帝君。心中生寶日，身上起羅雲。十仙何足友，載劫乃長存。

次吟授經讚

或不遍通玄讚，八符，即以此讚續第二首

飄飄太虛嶺，流景在上玄。經始無終劫，常保天地人。國主學理世，道士誦得仙。賢者今奉受，依法以相傳。時無至德子，保祕不妄宣。宗之昇太

清，棄之墮九泉。我說無爲道，沖寂得自然。

次師還本位，弟子就南方面北各跪，降五靈衛官，一一稱名受。

臣今爲弟子某官某授度《道德尊經紫虛寶錄》，告事訖，請下東方九炁天中天真官屬，九夷蒼老君，青腰玉女，青華玉童，東極諸靈官從甲乙官，將歲星真炁東嶽仙官神仙兵馬九萬人，入弟子某身中紫微宮，營衛真經，永昇道果，某受。

請下南方三炁天中天真官屬，八蠻越老君，絳宮玉女，丹靈玉童，南極諸靈官從丙丁官，將熒惑真炁南嶽仙官神仙兵馬三萬人，入弟子某身中太一絳宮，營侍寶經，永昇道果，某受。

請下中央一炁天中天真官屬，三秦僉老君黃庭玉女，戊己真人九靈黃童，中極諸靈官從戊己官，將鎮星真氣中岳仙官神仙兵馬一十二億萬人，入弟子某身中玉堂宮，侍衛尊經，永昇道果，某受。

請下西方七炁天中天真官屬，六戎氏老君官將，太素玉女，素靈玉童，西極諸靈官從庚辛官，將太白真炁西嶽仙官神仙兵馬七億萬衆，入弟子某身華蓋宮中，侍衛真經，永昇道果，某受。

請下北方五炁天中天真官屬，五狄羌老君官將，太玄玉女，太玄玉童，北極諸靈官從壬癸官，將辰星真炁北嶽仙官神仙兵馬五億萬衆，入弟子某身太倉宮中，侍衛寶經，永昇道果，某受。

請下太極典經仙官，太玄道德侍衛，與天地玉童玉女，三一侍經官屬，入弟子某身三元宮中，營侍尊經，永昇道果，某受。

唱訖弟子再禮 次唱十方

至心歸命東方無極太上道德天尊一禮。
至心歸命南方無極太上道德天尊一禮。
至心歸命西方無極太上道德天尊一禮。
至心歸命北方無極太上道德天尊一禮。
至心歸命東北方無極太上道德天尊一禮。
至心歸命東南方無極太上道德天尊一禮。
至心歸命西南方無極太上道德天尊一禮。

至心歸命西北方無極太上道德天尊一禮。
至心歸命上方無極太上道德天尊一禮。
至心歸命下方無極太上道德天尊一禮。

次懺悔

上清玄都大洞三景弟子，奉行道德傳授法事某嶽某帝先生，小兆真人臣某，上啓太上無形無名虛無自然至真大道無上天尊，太上太道君，太上老君，無極大道道德衆聖至極天尊，三十六部尊經玄中大法師高上老君，無上真人文始先生，河上真人，太極真人，太極左仙公，玄一三真人，天師嗣師系師三師君，三界十方一切衆聖，隨機宣化，應感真靈：臣以至愚，叨承妙化，弘持大法，轉贊三尊，而志在立功，廣加開度，使棲心慕教之士，咸入法門。既佩靈文，不敢閉絕，凡有祈向，難以抑違。弟子某等慊切明誠，翹慕修奉，唯進忘退，勇猛精勤，心神並丹詞色俱懇，輒以依科付授，盟告上玄三界真靈，克賜監證。伏惟至真上聖道德天尊，五帝四司三官衆聖，垂祐護之福，降感應之慈，原赦弟子某九世七玄億曾萬祖，三

師眷屬，爰及己身，積劫以來，未悟真道，陰罪陽過，生死愆瑕，後債前冤，宿新孽業，無邊無量，並賜蕩除。賜令九祖生天，六親同福，三途長夜，普及冤親，乘此勝緣，盡蒙開度，削落地簡，刊紀仙名，道行超昇，學業速就，門戶隆盛，灾厄銷平，國祚延洪，道風遐扇。臣等傳經授道，動靜乖科，萬罪千尤，咸乞原赦。預聞大法，凡厥有心，惠力所覃，幽明俱泰，稽首禮謝十方歸命正真三寶。

次起旋行，誦光明讚一首，真人

讚六首

立功須及早，學道亦當時。晝夜宜勤苦，發意莫狐疑。燒香常禮拜，誦經恒奉師。勇猛加精進，專誠無想思。四等將六度，三奔與五雌。洗塵入空寂，虛心將自持。唯期不轉退，豈爲人所嗤。若能如是者，朝夕自仙飛。

大道雖無心，可以有情求。佇駕空洞中，迴眄翳滄流。淨明三界外，蕭蕭玉京遊。自無玄挺運，誰能悟冥趣。落落天漢澄，俯仰即虛柔。七玄散幽

夜，返胎順沈浮。冥期苟潛凝，陽九無虞憂。睹此去來會，時復爲淹留。外身而身存，真仙會良儔。

靈靈玄中趣，湛湛清漢波。代謝

若旋環，椿木不改柯。靜心念至真，隨運順離羅。感應理常通，神適逮自徂。澹遊初無際，繁想洞九遐。飛根散玄葉，理返非有他。常能誦玉章，玄音徹霄霞。甲申洪灾至，控翮王母家。

永享無終紀，豈知年劫多。玄都七寶林，十華並彌羅。紫烟冠靈暉，雲京秀玉阿。上有福德堂，宮室互參差。皆是清信士，真仙飛天家。三界通玄路，五道清不邪。善緣應根生，累功享福多。牽對相尋續，大法諒不虛。無有萬年人，皆與劫同徂。依依歡樂世，發言成詠歌。此世歡無極，當奈來運何。

八觀因緣門，罪福從中生。時見有心者，思悟感天靈。吾今爲是故，開說真妙經。如從經中言，憶劫皆受榮。習道行勸戒，以經度我形。思念宿命根，洗拔先身嬰。超越過三羅，八難於

是冥。

魂返入定質，神操從是榮。滅度如蛻胞，曠朗睹八清。轉輪得神仙，由我改心精。受報無窮量，志定入福庭。七十二相好，皆從身中明。項負七寶光，照耀諸天形。雲迅八景輿，風迴匡綠駟。昇入玄玄門，期樂樂未央。

妙通轉我神，弘普無量功。道成天地初，輪化發九重。滅度歷生死，緣對各有宗。孰悟去來苦，形魂無始終。積善隆福基，身拔五難鋒。脫離三惡道，蕭蕭入閑堂。念度無邊境，思定感神通。法輪三度迴，輔我高仙功。迴我大椿步，飄昇太極宮。

右每章讚畢，衆官唱善禮一拜，

次師復位謝恩口啓言功謝過章
上清玄都大洞三景弟子無上三洞法師，奉行道德，紫虛傳授法事某嶽某帝先生，小兆真人臣某，稽首再禮，上啓太上無極至真無上無爲大道道德天尊，三十六部尊經玄中大法師高上老君，河上真人，文始先生，十方已得道大聖衆至真，三界內外一切諸天真君：臣以

福善所鍾，遭值明運，三洞垂化，濟度天人，叨荷師真，授傳祕妙，救人佐國，行教立功，常懼任重，力微，弗克負荷，思傳後學，弘紹法門。弟子某等信向

翹勤，情旨丹切，列詞奉信，志在稟修，謙懇之誠，理難抑絕，即以某日，依三洞科典，敷啓壇場，露表告真，對齋祈請，真靈降鑒，障難不生，既合天儀，似可傳度，以今某時傳授事訖。自始及末，勞歷仙官、內外吏兵，一切官屬，關達奏御，營衛有功，各依太真之科，校功酬賞。臣以愚昧，玄理難明，進正犯違，千愆萬罪，特乞赦宥，許以自新，衆官門人，咸賜福祐，善稱三界，福滅九陰，道氣扶持，真靈接助，學道成就，克獲神仙，七祖生天，存亡蒙澤，若居世上，福祿日增，爲天人師，弘道利物。臣及弟子某等身中所佩三五真官，受功事竟，各還官府，恩惟太上道德衆尊省納，臣口啓即時上御，廣加闡宥，侯須告報，臣某誠惶誠恐，稽首再拜以聞。

次納吏兵

臣傳度經法事訖，前後所出身中仙官、

吏兵，功曹使者，主領檢押，還復宮室，無令錯互，須召又到，一如故事。畢，叩齒咽液各三止。

次復鑪

香官使者，左右龍虎君，侍香諸靈官，當令臣傳授之所，自然生金液丹碧芝英，百靈衆真交會，在此香火御前，十方仙童玉女，侍衛香烟，傳臣向來所啓，徑達至真無極玉皇尊帝御前。各三禮

次吟奉戒讚

奉戒爲身寶，永劫享靈期。虛心會虛寂，精感在精思。九鸞陪玉軼，八鳳薦金芝。青童歌妙曲，玄女唱清詞。神尊示光景，太上湛希夷。天華雜香起，法雨散靈滋。勤苦修生道，翹想作仙基。精誠如不怠，鶴駕自當之。

次十二願

次學仙讚

次出戶呪

次辭三師

次讚引至玄師前，散如常儀。

衆官弟子各禮謝復位。

弟子受道三日外，相率自拜謝

恩表。

弟子未慣法事科式，監保師一人代爲行之如左：

具法服，陳香火，澡漱，讚引至地戶。

次入戶呪，向戶左叩齒三通，呪曰：

四明功曹通真使者，傳言玉童，侍靖玉女，爲我通達道室正神，上元生氣入我身中，畢，便以左足前進，右足隨之昇壇。

次上御案香，呪曰：

香乃玉華散景，九炁凝烟，香雲密羅，徑冲九天，真靈下盼，仙佩臨軒，侍香金童，傳言玉女，傳此信香，上聞帝前，令臣所啓，咸賜如言。

次各就本位立，存神。

弟子衆官各瞑目，存見玄都十山三尊，太上十方真人，十方天尊，三十六部尊經居天尊座左，玄中大法師居座之右，老君，河上真人，尹先生居虛無之中，左青龍，右白虎，前朱雀，後玄武，衛壇四方，三十六師子在壇前羅列，已身頭

巾七星，五藏生五氣羅文覆身上，三一侍經各千乘萬騎，天地各有萬八千玉童玉女衛身，分明羅列訖。

次鳴法鼓三十六

次發鑪

太上玄元五老神真，太玄玉童，太玄玉女，左右侍香，龍虎衆官，關啓無上至真大羅天中太玄都玉京玄司，臣今以佩受《道德尊經紫虛寶籙》，三日限滿，拜表謝恩，願得自然正真之氣，浹降臣等身中，所啓上達徑御無極大道玉皇尊帝御前。各禮三拜。

次長跪，鳴法鼓三十六通，出官如法。

謹出臣身中，五體真官功曹吏出臣身中，三天執法開化陰陽功曹，度道消灾散禍解厄君吏各十二人，出臣身中，治職君吏某治建節監功大將軍，前部效功，後部效殺，驛亭令、驛亭丞，四部監功謁者。臣身中，上仙上靈直使正一功曹，左右官使者，陰陽神決吏，科車直符吏，剛風騎置吏，驛馬上章吏官各二人出。出者嚴裝顯服，冠帶垂纓，整其

威儀。直使功曹戴通天之冠，衣皂紬單衣，正一功曹冠朱陽之幘，絳章單衣，使者冠九德之冠，五色壽命單衣，腰帶虎符，齊執玉版。直使功曹住立上方，正一功曹住立中央，理病功曹營衛臣身，左官使者建節在前，右官使者持幢在後，陽神決吏立左，陰神決吏立右，上部功曹住立上方，中部功曹住立臣身中，促氣功曹催促十方，上部使者遠望上天，中部使者遠瞻八方，都官使者匝繞臣身，中郎吏虎賁察奸鉤騎都官僕射，天鄒甲卒，天丁力士，收氣食氣吏，收神食神吏，收鬼食鬼吏，收邪食邪吏，收精食精吏，收毒食毒吏，誅符破廟吏，科車赤符吏，剛風騎置吏，驛馬上章吏，飛龍騎吏等，屯住臣前後左右。功曹使者嚴裝事竟，羅列鹵簿，關啓太玄。道德五千文官屬領仙監齋君吏，天師所布下二十四治，三十六靖廬，七十二福地，三百六十名山，崑崙等上宮三萬六千神，日月星宿，璇璣玉衡，天地五帝，三界官屬君將吏兵，及道上二玄三元四始，四面方位風炁注

炁甲子諸官君，將吏考召君，東九夷南八蠻西六戎北五狄中三秦胡越氏羌僉等君，五嶽四瀆丘沼君，諸廟神祇所在高山，山川溪谷山林孟長，十二溪女，根原本始土地之主，社稷將吏，一時嚴裝，與臣等身中功曹使者飛龍騎吏等，上啓太上無極至真無上無爲大道道德天尊，三十六部尊經玄中大法師，高上老君，河上真人，文始先生，三界十方一切已得道大聖衆，天地表裏無量正神：臣等億劫福緣，生值道化，真經御運，正法度人，惟善是從，不陋微賤，而臣等已參初法，修奉護持，今年某月某日，蒙師某君於某宮觀，傳授道德青絲金紐、《紫虛寶籙》，及《真經》上下、《河上公章句》、《想爾要戒》、《存圖》、《傳訣》、《朝儀》、《齋法》，三日限畢，拜謝恩朱表一通，上聞九天，功曹使者，飛龍騎吏，以時騰奏，請省表文。

次開函取表

新授太上道德高玄高上紫虛弟子臣某等，稽首再禮，上言太上玄元老君，高上老子，玄中大法師，河上真人，文始

先生，無上真人玉案下：臣等下土至愚，塵微冗賤，億劫緣會，猶奉法門，而妙道度人，太上垂化，唯善是與，無棄於人，頃歲已來，參受正法，今蒙真師某嶽先生某，授以青絲金紐、《道德尊經》、《高上紫虛天書秘錄》、《河上公章句》、《想爾要戒》、《存圖》、《傳訣》、《西昇上品妙真玄經》、《六甲存圖》、《歷藏玉歷》、《朝儀》、《齋法》，畢盡付授。自惟糞土凡穢，非天挺之才，實懼修奉未精，弗任負荷，拊心省己，戰汗交襟，唯勵丹誠，永期尊奉。伏惟至真衆聖，道德高尊，三洞威神，三寶官屬，降以真氣，賜以光靈，使存注感通，功行圓備，魔精摧伏，道化隆昌，佐國立功，濟人度物，真靈覆祐，存歿沾榮，九祖七玄，三途六趣，神功所被，咸享福緣。謹以三日限畢，拜謝恩朱表一通，上詣太上曹，伏須告報，臣某等誠惶誠恐，死罪死罪，稽首再拜以聞。

次叩齒三通遣表

臣重因衆真上官，功曹使者，飛龍騎吏，分別關奏，操臣新受經法，三日限滿，依

法拜謝恩黃繒朱表一通，上聞天曹：臣謬參治錄，耳目閉塞，檢校不聰，所上表文，恐有錯誤，行列不端，文字不整，脫漏顛倒，音句不屬，將前作後，以左爲右，事任陰陽神決吏傳言，書佐習字小吏隨表進對，龍頭書刀尋文削治，長毫利筆依儀證定，毋令上官典者有所遺却，閉炁昇表，逕達太上太清金闕玉陛御前，左歷歷關右吏歷啓諸官君歷第以次分別關啓^③，當令臣所請者下，所召者到，所濟者度，所奏者達，若有下官故炁邪精鬼賊，在雲路之中遏截表文，使不上達者，錄付近獄，依律治罪，以明天憲，臣伏在案左，恭俟玄恩報應。

騰章進表仙官 此呪默念：

靈寶大帝，勅下九天。玉帝命令，勅震乾罡。統攝北部，掌執鬼仙。千千萬萬，隊仗擁前。旌旗閉目，烈火衝天。敢有午酉，擲視吾前。收斬見帝，永送羅酆。官一小吏，五體神仙。各隨章表，直造帝前。違吾之命，當奏三天。逼遏鬼羣，束送魔遷。四靈衛護，不許離前。掃蕩魔賊，功果周圓。齋事告

畢，言功紫顏。急急如律令！

靈炁混太極，大道以無窮。神兵受詞語，飛攝入太空。

操伏 焚表訖 起身 納官

臣上表事竟，所出臣身中功曹使者，一切靈童官吏，各從衆妙門而入，在左還左，在右還右，直使功曹主領檢押復於宮室，毋令差互，後召復到，一如故事。

十二願

復鑪

香宮使者，左右龍虎君，侍香諸靈官，當令臣傳授之所，自然生金液丹碧芝英，百靈衆真交會在此香火御前，十方仙童玉女侍衛香烟，傳臣向來所啓，徑達至真無極玉皇尊帝御前。

出堂

太上三洞傳授道德經紫虛錄拜表儀

①「實」，當爲「實」之誤。

②據前後文，此處當脫「出」字。

③此句文字，疑有舛脫。

(曾召南點校)

020 太上正一法文經

經名：太上正一法文經。撰人不詳，約出於南北朝。係早期天師道經典《正一法文》殘本之一。一卷。底本出處：《正統道藏》正一部。

天師稽首問太上曰：道陵常見世間人民，困於疲病牢獄，桎械枷鎖，水火刀兵，虎狼蟲蛇，衆苦危難，不能自免，痛惱辛酸，死亡夭折，枉橫非一，不知從何緣來而值斯毒，不知修何功德可得度脫，惟願天尊大慈開宥，令知所犯，得出憂悲。

太上告道陵曰：皆由人民不信宿命，罪福因緣，輕師慢道，破齋犯戒，違負天地日月星辰，攻根伐本，背正入邪，欺凌貧賤，呪詛鬼神，穢辱三尊，不忠不孝，兄弟不睦，父子不慈，夫婦不

和，男女不順，更相殘害，矯詐百端，殺生偷盜，邪淫嫉妬，慳貪愚癡，惡口兩舌，綺妄不真，飲酒食肉，穢污天真，恃

強凌弱，倚官狹勢，爲君無道，爲臣不忠，罔上欺下，損傷百姓，枉害忠良，縱放無度，致遭病苦，厄難相逢，是故天

有九醜殺鬼，各將徒衆九千萬人，乘雲馭氣，因風傍雨，栖泊林木，依附人家，伺其衰怯，隨託衣服流精，飲食入人臟腑，或居宅舍，行九種厄難，布在世間，治此惡人，令歸善道，若持齋禮拜行

道，誦經燒香散花，受誠懺悔布施，發願救濟貧窮，放贖生命，修營靈觀，建立精舍，玄壇法宇，廣造福田，作諸功德，即得免其灾厄，度脫危苦，若不信罪福，殺生偷盜，飲食酒肉，訾毀三寶，輕慢出家，破壞形像，行諸惡業，則衆厄加身，遇其輻輳，田蠹虛耗，畜養死亡，仕宦黜退，人口夭傷，所求不利，所願不成。九厄者：

一者疾病，謂風寒暑濕，疫氣瘟行，痲癩癰疽，霍亂下痢，邪精鬼痊，一切病惱苦痛纏身，不能飲食，形容消

瘦，求生不得，求死不得，晝夜困楚，坐卧不寧。

二者牢獄，謂官家口舌，文書枉橫，桎械枷鎖，鞭棒楚撻，考掠身形，痛苦難忍，連及父母兄弟妻兒眷屬，累歲終年，莫能自出。

三者刀兵，謂遭逢無道，殺戮賢良，或枉加寇害，劫賊緣對，逢其斷割，手足分張，或爲國征討，遭其斫射，破裂尸形，骨肉離散，飼諸禽獸，魂飛異域，永無依託。

四者水漂，謂洪水洋溢，彌天流蕩，川谷波騰，遇其淹沒，父子同淪，骨肉消散，填於溝壑，飼其魚鱉，或行江海及諸川谷，即逢沈溺，形消水府。

五者火燒，謂行山澤逢諸野火，及以居家，值其焚灼，形體焦然。六者毒傷，謂虎狼蟲蛇蜂蠆衆毒，及草木花葉傷損皮膚，或惡氣毒物中身入腹，痛苦難堪。

七者壓迫，謂山石崖岸屋宇，瓦木崩壞，摧折壓迫，損傷手足，頭目痛楚難忍，坐卧不安。

八者驚恐，謂官家威勢，水火刀兵，風雷震擊，惡禽猛獸，魍魎邪精，奄來迫迨，恐怖不寧，魂神號喪，便至亡殞。

九者饑寒，謂公私使役，遠出他方，遭遇險巖水火兵寇，以相凌迫，衣糧乏絕。或居家貧窶，常受饑寒，皆是九醜殺鬼主之。

九醜鬼者，一曰狄星，二曰狂雲，三曰衆妖，四曰天乖，五曰驕驟，六曰甘篤，七曰蟲狂，八曰警乎昌，九曰值。俱各司一厄，常行人間。

復有五帝神官，各行五厄，以伺惡人。

一者青帝神官，行青瘟、青疫、青毒、青蠱、青鼈、青吹，逢之者頭痛壯熱，傷寒時氣，霍亂下痢，手足煩疼，肩背強直，不能飲食，身體痛楚，骨肉辛酸、言語恍惚，不自覺知。

二者赤帝神官，行赤瘟、赤疫、赤毒、赤蠱、赤鼈、赤吹，遇之者官家牢獄、桎械枷鎖、文書口舌，刑徒繫閉、鞭笞考楚、痛惱百端。

三者白帝神官，行白瘟、白疫、白毒、白蠱、白鼈、白吹，遭之者刀兵劫賊，虎狼蟲蛇，蜂蠆毒物，以相中害，傷損身形。

四者黑帝神官，行黑瘟、黑疫、黑蠱、黑毒、黑鼈、黑吹，值之者江河山谷，水泉沈溺，漂流淹沒，淪蕩死亡。

五者黃帝神官，行黃瘟、黃疫、黃蠱、黃毒、黃鼈、黃吹，當之者山石頽毀，屋宇崩壞、車破馬亡，草木壓迨，衆毒加身。

此等神官，各將殺鬼三百萬人，手持五刀，行於人間。

一曰木刀，着人之時身體寒熱，皮膚痛痒，起動不安、手足酸楚、風狂恍惚、坐卧不寧。

二曰火刀，中人之時、頭痛壯熱、遍身疼煩、言語謬誤、面目變赤。

三曰金刀，中人之時咳嗽上氣，骨節痛楚，或身上生瘡。

四曰水刀，中人之時霍亂下痢，面目青黑，身體浮腫，手足煩疼。

五曰土刀，中人之時腹內脹滿，飲

食不消。從此五者，轉生百病，使人形容消瘦，魂魄飛揚，常夢與死人同遊，滅其筭命，名書黑簿、或年命沒在黑星赤宿，天羅地網。一切灾厄之者，皆當先以身中上服，造救苦天尊，寫此寶經，作度厄神幡，皆以九爲數，彌多爲佳，然長明燈，晝夜不絕，并誦經行道，懺悔受戒，燒香散花，設齋念道，救濟危苦，捨放囚徒，布施窮乏，放贖生命，立其高座，廣召有德，講說大乘，立觀度人，行諸善願，晝夜不怠，克得脫離灾厄，年命長延。

太上又曰：若人常能預造十方天尊，一軀十軀百軀千軀萬軀，隨力所堪。復寫三洞衆經，一部十部百部千部萬部，流通讀誦。又請道士轉讀三洞一切衆經，行道啓願，請福禳灾，度人立觀，最爲第一，不可思議。若不能如此，但清静宅舍，沐浴身心，晝夜讀誦此經，禮拜十方天尊，燒香解厄，散花陳願，自得免諸灾難，獲福無窮。

太上曰：若欲解厄消灾，當取青絲左紐作九子繩，令長九尺，金環九

枚，或銀銅等，先結一環於繩頭，燒香然燈，多少之限，皆以九數之，東向安坐，讀誦此經，每一遍一卷，則就環一，結滿九結後，又結一環，如此竟九環，即設齋解結，名曰解天九厄，開天九結，度名九天，延生九真，解竟復依前結之，若有多人，各結各解，若滿九萬遍，則終身無厄，名上東華，若能至解結之時，造像燈幡，各九諸天，稱讚福祚，巍巍其結，或於三尊御前，若法師衣帶而誦詠結之，若自讚誦結，已衣帶矣。

禮十方天尊法

面東方九十拜，東南方百二十拜，南方三十拜，西南方一百二十拜，西方七十拜，西北方一百二十拜，北方五十拜，東北方一百二十拜，向西北禮上方三百六十拜，向東南禮下方一百二十拜，各一千二百拜，皆須拜拜念當方天尊名號云。

至心歸命東方玉寶皇天尊，
至心歸命東南方好生度命天尊，
至心歸命南方玄真萬福天尊，

至心歸命西南方太靈虛皇天尊，
至心歸命西方太妙至極天尊，
至心歸命西北方无量太華天尊，
至心歸命北方玄上玉晨天尊，
至心歸命東北方度仙上聖天尊，
至心歸命上方玉虛明皇天尊，
至心歸命下方真皇洞神天尊。

每禮一方竟，皆長跪，三上香，懺曰：弟子某甲，肉人凡夫，生在世間，從年七歲以來，違天犯地，呵風罵雨，裸露星辰，輕慢三寶，穢污十方，不依科禁，訾毀正真，不忠不孝，殺生偷盜，邪淫顛倒，綺言妄語，惡口呪詛，罪條無量，不可記錄，不自覺知，今日首謝，歸命天尊，特願天尊大慈開宥，原赦某甲無量罪愆，乞度灾厄，名書神仙長生簿中，更三上香、叩頭搏頰。

太上曰：於本命行年太歲，大小墓上，然燈誦經，解厄消灾，十二時二十八宿上，然燈延年益筭，門戶上，然燈益口來財，庭中然七星燈，解牢獄禁閉，皆當燒香誦經。又曰：常以月朔望晦、清齋燒香，然二十八宿燈，晝夜

不懈，諸天爲子却死上生，益筭延年，若能誦三洞大經，福降無窮矣。天師稽首稱善而退。

太上正一法文經

（錢安靖點校）

021 正一法文天師教戒 科經

經名：正一法文天師教戒科經。
撰人不詳，約出於南北朝。係早期天師道經典《正一法文》殘本之一。一卷。底本出處：《正統道藏》正一部。

道以沖和爲德，以不知相尅。是以天地合和，萬物萌生，華英熟成。國家合和，天下太平，萬姓安寧。室家合和，父慈子孝，天垂福慶。賢者深思念焉，豈可不和！天地不和，陰陽失度，冬雷夏霜，水旱不調，萬物乾陸，華葉焦枯。國家不和，君臣相詐，強弱相陵，夷狄侵境，兵鋒交錯，天下擾攘，民不安居。室家不和，父不慈愛，子無孝心，大小忿錯，更相怨望，積怨含毒，鬼亂神錯，家致敗傷。此三事之怨，皆由

不和。天地不和，陰陽錯謬，災害萬物。國家不和，豪傑爭權，禁令不行，害及萬民。室家不和，禍起貪欲財利者，忿怒相加，以致災殃。諸賢者所以反覆相解，恐人說習非法來久，躬行犯惡，然後得罪，不能發悟，或懷怨望，其過益深，故重丁寧，皆宜用心，轉相勸進，除去已往之惡，修今來之善。善積合道，神定體安，喜怒不忿於心，惡言不發於口，醜聲不聞於耳，邪色不視於目，貪欲不專於意。修行正身，真氣來附，邪惡皆去，故過悉除，新善自著。諸欲奉道，不可不勤；事師，不可不敬；事親，不可不孝；事君，不可不忠；己身，不可不寶；教戒，不可不從；同志，不可不親；外行，不可不愚；內實，不可不明；語言，不可不慎；禍患，不可不防；明者，不可不請，愚者，不可不教；仁義，不可不行；施惠，不可不作；孤弱，不可不卹；貧賤，不可不濟；厄人，不可不度；生物，不可不殺；惡事，不可不避；色欲，不可不絕；貪利，不可不

遠；酒肉，不可不節；善人，不可不敬；惡人，不可不勸也。賢者深念之焉。爲人若不能與法戒相應，身心又無功德，欲求天福，難矣。修善得福，爲惡得罪。罪至，不自責先日過，反呼奉道無益，怨咎皇天，猶豫前却，移心他念，群輩翕習，妖惑萬端，結黨連群，導趣邪僞，陷入姦非，愚人無知，爲行如此，去道遠矣。道之弘大，方圓無外。天網恢羅，人處其中，如大網捕魚，魚爲遊行網中，豈知表有網也。牽網便得，放網乃脫。人不知真道大神，如魚之不知網也。而愚人或欲捨真就僞，僞伎卒效，登時或能有利，利不久也。叛道者，所以不即受罰，大道含弘，愛惜人命，聽恣其意，隨其所欲，雖初快心，後自當悔之深遠，非愚俗所能明知。道之視人，如人之視蟲蟻；道能殺人，如人能殺蟲也。道之好生惡殺，終不殺也。惡人爲惡不止，自有司神記其惡事，過積罪滿，執殺者自罰之，道終不殺也。諸賢者欲除害止惡，當勤奉教戒，戒不可違。道以無爲爲

上，人過積，但坐有爲，貪利百端。道然無爲，故能長存。天地法道無爲，與道相混。真人法天無爲，故致神仙。道之無所不爲，人能修行執守教戒，善積行者，功德自輔，身與天通，福流子孫。賢者所樂，愚者所不聞，學者勉自殷勤。天師設教施戒，奉道明訣，上德者神仙，中德者倍壽，下德者增年，不橫夭也。按戒：爲惡者，乃不盡壽而橫夭也。惡人痛哉！賢者何不修善，久視長生乎！雖不能及中德，修下德，治身世間，斷絕愛欲，反俗所爲，則與道合。

一不得淫泆不止，志意邪念，勞神損精，魂魄不守，則痛害人。

二不得情性暴怒，心忿口泄，揚聲罵詈，誓盟呪詛，呼天震地，驚神駭鬼，數犯不改，積怨在內，傷損五藏。五藏以傷，病不可治。又奉道者身中有天曹吏兵，數犯瞋恚，其神不守，吏兵上詣天曹，白人罪過，過積罪成，左契除生，右契著死，禍小者罪身，罪多者殃及子孫。

三不得佞毒含害，始賴於人，專懷惡心。心神，五藏之主，而專念惡事，此一神不安，諸神皆怒，怒則刻壽，最不可犯之。不止，其灾害已。

四不得穢身荒濁，飲酒迷亂，變易常性，狂悖無防，不知官禁爲忌，不知君父爲尊，罵詈溢口，自詛索死，發露陰私，反迷不順，淫于骨肉，罵天詈地，無底無對，舉刃自守，故天遂其殃，自受其患。

五不得貪利財貨。財貨糞壤，隨時而與。下古世薄，以財爲寶，專念求利，買賤賣貴，伺候便宜，欺誣百姓。得所欲者，心懷喜悅，不得所欲者，怨恨毒心。或忿爭多少，刀兵相賊，違犯天禁，不從教戒，貪欲愛財，財者害身之讎，身沒名滅，何用財爲？

聞戒者翕然稱之言善，謂不可犯。背戒向利不自專者，忽然復動，輒有履險導刃之厄，大命傾矣。臨敗而欲悔，罪定而稱善，事失以過，天道不救。財寶色欲，陷目之錐，害身之灾，賢者遠之，愚者樂之。賢者坐起寐卧，舉動行

止，深用自戒。自戒，身無變動，其福明矣。觀今奉道精專者，萬無一人。何以言之？下古世薄，時俗使然，競相高上，貪榮富貴，仁義不行，權詐爲智，父子相欺，君臣相給，轉相屬託，貨賂賣官，黜退忠直，任用佞邪，厚姦結黨，阿諛所親，富貴相追，貧賤棄損，服飾車馬，浮華順俗，君子小人，皆共同然，所以欣欣世間，豈念道乎。此輩愚人，雖先休休，不足願也。所以者何？愚人淺薄，適有榮顯，便驕奢盈溢，施行過度，恣心快意，不慎法節，道之清虛，不受此輩，神明遠之，邪鬼侵之。或有協僞背真，禱鬼求請，天網恢恢，其罰未行耳。譬如炊熟，火下以滅，甑中餘氣未盡，勢安得久。惡人雖未遇禍，譬如餘氣耳。諸賢者，人之所大願，以生年爲貴；人之所大惡，以死終爲賤，豈不然乎！天道平正，以生賞善，以死罰惡。此吉凶禍福，從窈冥中來，禍灾，非富貴者求請而可避，非貧賤者守窮而故罰。修善者福至，爲惡者禍來。國君雖有無極之寶，臨危惜命，傾城量

金，求生乞活，豈復可得！賢者貧賤，不須強求富貴，勞人精思，廢人所存，傲慢亂志，使人不壽。而人見富貴者，心欲願之，志欲存之，勞心苦志，得之不弘。若欲所求乞，修身念道，室家大小，和同心意，掃除燒香，清淨嚴潔，然具白開啓，說其所欲，道之降伏，何所不消。若願欲者，實不用金帛貨賂，不用人事求請，不用酒肉祭禱，直歸心於道，無爲而自得。得之隨意，則信爲鬼立功贖物而已，亦不用多。而欲習效俗人，背道求請，事事反矣。欲得福願，要當勤身精進，晨暮清淨燒香，坐起念之，不廢所願，福無不應。好樂者得福無量，不樂者自隨本心。道至寬弘，恣隨人耳。唯賢者明焉，念念精進，追之恐不及。愚者忽忽退然，去之恐不遠。此賢愚不同也。學者勉自勤請。奉道之家，或遇災異、疾病、死喪、官符、口舌，以致不利，何以然也？皆由人愚，奉法不勤，雖知道尊而欲奉之，其情性施行，與俗不別，邪僞不除，欲以邪僞干亂真正，終不可也。邪與

正，如賊盜惡人見監伺吏，藏竄無住立處，豈可犯尊，其氣自然不通。如何欲與邪相通也！諸此人輩，雖係名奉道，冀道當祐，道不受也。而自謂屬道，遇災急厄，病痛著身，雖望道擁護，道不救也。精邪惡鬼卒所侵害，道不爲攝却。而惡人懂愚，殊不能尅心改悔，歸誠於道，方更背戾，呼道不神。雖不口言，心內怨望。此輩不莊事，變易心腸，巽濡日月，冀脫災免害，萬不一脫。執性了戾，心腸不改，沒命之後，悔復何及。愚人痛哉！

賢者正心守道，不可懈惰，當以勤確愚者。自戒莊事，勤修大道，至尊高而無上，周圓無表裏，囊括天地，制御衆神，生育萬物，蜎飛蠕動含氣之類，皆道所成所生。道之威神，何所不集，何所不消，何所不伏。把持樞機，驅使百鬼，先天而生，長守無窮。人處其間，年命奄忽，如眼目視瞬間耳。而大道含弘，乃愍人命短促，故教人修善。上備者神仙，中備者地仙，下備者增年。道尊巍巍，何求於人。人不能感

存道恩，精勤修善，雖不能及中德之行，下德當備也。而復不及下德，違背真正，不從教戒，但念愛欲、富貴榮祿、色利財寶、飲酒食肉，恣心快意，驕奢盈溢，豈復念道乎。人不念道，道不念人。人之若魚，道之若水。魚得水而生，失水而死，道去人虛，何望久生也。要在精進存念。諸賢者欲得保身念修後善。若見人有違失之行，轉相勸戒，相教改悔，其功報效，應受福無量。勿謂道之無形，不可見爲，欲傲慢輕易耳。然欲得恩福，當事精勤，晨夜清靜。若有同義遇難，疾病相救，緩急相卹，不得以智欺愚，乘威詐稱，假託鬼神，恐嚇厄人。不得纔有小智，稱名自大，輕忽愚人，更相毀訾，背向妄論，指摘賢者。不得私情貪狠，敬貴恥賤，樂富棄貧，託望僞氣，愛憎二心，欲隨情請福，以爲惠施，道終不從，鬼不爲使，毀敗正法耳，反受咎。當同志相求，同法相好。若男女不曉書疏者，專心好道，可請明者，聽誦經戒，會在靜舍，若

堂上掃除，燒香，澡沆潔清，男女別坐，儼然正體安神，精思明聽，勿妄華言，傾邪不端，遊心他念，玩墮睡寐，勞體自疲，虛苦無益。若能如戒精進不倦，室家受福，天曹吏兵，自來護人，終已無有灾患病痛也。

萬物之中以人爲貴。人處天地間，皆知生之日而不知死來之日。善人惡人，富貴貧賤，各自謂壽命終年，誰欲先窮者，人人所不樂也。然惡人過積結罪，罪滿作病，病成至死，不自知。唯修善者得福。人生受命，制之在天。天實不言，故在聖人。聖人隨世惻隱，不以常存，故遺教戒。教戒者，欲令人勸進，長生全身，保命無窮。人皆能奉法不倦，何但保命，乃有延年無窮之福。此非富貴者貨賂求請所能得通也，亦非酒肉祭禱鬼神所降致也。道人賢者，奉敬教戒，精專勤身，先苦後報，其福應也。賢愚貴賤皆同，亦願其所欲耳。唯道人執志，故能以戒自檢，行止舉動，愛欲之間，守戒不違，心無邪傾。若見色利，以戒掩目；若聞

好惡之言，以戒塞耳；若食甘香之美，以戒杜口；若願想財寶，放情愛欲，以戒挫心；若趣向姦非，意欲惡事，以戒折足。守之不廢，可謂明矣。當勸進愚冥者。愚冥者不能承用，無如之何。以道人常欲有好心，善施惠故也，天道授福。

奉道精進，要當勤身，守之當久，治志當堅，精進專念，莫有不先勞後報，度身神仙。故有楊公十五奉道，六十未報，修身不倦，至年八十，功滿行著，福報無量。諸賢者奉道，莊事勤身，當如飢渴，欲得飲食；如遇寒暑，欲得易處；如作極，欲得休息；如疲勞，欲眠寐；如願想，欲有所得。念道奉真，欲得度身，如念此諸所欲，勉身如法不倦，獲無灾殃、禍害、病痛、憂患，何願不得，何福不應也。道出自然，先天地生，號無上玄老太上。三炁混一，爲無上正真之道也。道弘大，包含天地，變化萬神，微布散在八極之外，內潛毫毛之中，成生萬物，制御三天，統三萬六千神，大無不覆，小無不

入，清虛無爲，故能長存，含濁而不穢，故爲萬物母。天道無親，惟與善人。善人保之，以致神仙。非富貴者求而能得，貧賤者鄙而無與。能專心好樂，精誠思念，修身行善，則與道合。然世人多愚，好尚浮僞，遊身恣欲於群俗之間，須臾之樂，以快腹目，終不能苦身勤念奉道。奉道但當積修功德，謙讓行仁義，柔弱行諸善，清正無爲，初雖勤苦，終以受福，不與俗同。如人但貪須臾之利，命沒之後，身爲糞土，魂神同朽。道人與俗相去遠矣。何以言之？道人清正，名上屬天；俗人穢濁，死屬地官，豈不遠乎。愚人守俗，不念奉道，可謂大迷也。夫人各有眼目鼻口心意兩足，其賢愚之行各異者，目專視利色，耳聽言之好惡，鼻悅於甘香之氣，口貪五味之美，心專縱恣所欲，兩足隨意導身趣向姦非。賢者不然，目不視所好，耳不外聽邪惡之言，鼻不通臭香之氣，口不樂滋味之美，心不想可欲之快，足不趨惡事爲非，此道人所行。道人亦知諸所欲爲快，以戒制情，

故不犯惡。善積行著，與道法相應，受福無極。愚人所知惡速禍，不能專戒，與道相反，何望得福。若欲得福，何不效道人乎！奉道清正無爲，惟當精進，修行積善耳。亦無間爲限，亦無水火爲難，亦無貧賤見逆，亦無豪強相奪，亦無富貴爭進，亦無作役負擔之苦，何不壯事專精，奉道勤身乎！道人百行當備，千善當著，雖有九百九十九善，一善未滿，中爲利動，皆棄前功。治身關念，守戒不廢，乃得度世。道人賢者，可勤行焉。

大道家令戒

大道者，包囊天地，係養群生，制御萬機者也。無形無像，混混沌沌，自然生百千萬種，非人所能名。自天地以下，皆道所生殺也。道授以微氣，其色有三，玄元始氣是也。玄青爲天，始黃爲地，元白爲道也。三氣之中，制上下，爲萬物父母，故爲至尊至神，自天地以下，無不受此氣而生者也。諸長

久之物，皆能守道含氣，有精神，乃能呼吸陰陽。道生天，天生地，地生人，皆三氣而生。三三如九，故人有九孔九氣。九氣通則五藏安，五藏安則六府定，六府定則神明，神明則親道。是故人行善守道，慎無失生道，生道無失德。三三者不離，故能與天地變易。《易》稱，有天地，然後有萬物；有萬物，然後有男女；有男女，然後有夫婦；有夫婦，然後有父子。父子者，欲係百世，使種姓不絕耳。下古世薄，多愚淺，但愛色之樂，淫於邪僞，以成耳目，淫溢女色，精神勃亂，貪惜貨賂，沴氣發上，自生百病。至於黃帝以來，民多機巧，服牛乘馬，貨賂爲官，稍稍欲薄，盡于五帝。夏商周三代，轉見世利。秦始五霸，更相尅害。有賊死者，萬億不可勝數。皆由不信其道。道乃世世爲帝王師，而王者不能尊奉，至傾移顛殞之患，臨危濟厄，萬無一存。道重人命，以周之末世始出，奉道於瑯琊，以授干吉。太平之道起於東方，東方始欲濟民於塗炭，民往往欲信道。

初化氣微，聽得飲食。陰陽化寬，至於父母兄弟酌祭之神。後道氣當布四海，轉生西關，由以太平不備，悉當須明師口訣，指謫爲符命。道復作《五千文》，由神仙之要，其禁轉切急，指勅治身養生之要，神仙之說，付關令尹喜略至，而世多愚，心復悶悶，死者如崩，萬無有全。西入胡授以道法，其禁至重，無陰陽之施，不殺生飲食。胡人不能信道，遂乃變爲真仙，仙人交與天人，浮遊青雲之間，故翔弱水之濱。胡人叩頭數萬，真鏡照天，髡頭剔鬚，願信真人，於是真道興焉。非但爲胡不爲秦，秦人不得真道。五霸世衰，赤漢承天，道佐代亂，出黃石之書以授張良。道亦形變，誰能識真。漢世既定，末嗣縱橫，民人趣利，強弱忿爭，道傷民命，一去難還，故使天授氣治民，曰新出老君。言鬼者何？人但畏鬼不信道，故老君授與張道陵爲天師，至尊至神，而乃爲人之師。汝曹輩足可知之，爲尊於天地也，而故悶悶，日一日，月一月，歲一歲，貪縱口腹，放恣耳目，不信道，

死者萬數，可不痛哉！道以漢安元年五月一日，於蜀郡臨邛縣渠停赤石城造出正一盟威之道，與天地券要，立二十四治，分布玄元始氣治民。汝曹輩復不知道之根本，真偽所出，但競貪高世，更相貴賤，違道叛德，欲隨人意。人意樂亂，使張角黃巾作亂。汝曹知角何人？自是以來，死者為幾千萬人邪。道使末嗣分氣治民，漢中四十餘年，道禁真正之元，神仙之說，道所施行，何以《想爾》、《妙真》、三靈七言，復不真正，而故謂道欺人，哀哉可傷。至義國殞顛，流移死者以萬為數，傷人心志。自從流徙以來，分布天下，道乃往往救汝曹之命。或決氣相語，或有故臣令相端正，而復不信，甚可哀哉。欲朝當先暮，欲太平當先亂。人惡不能除，當先兵病水旱死。汝曹薄命，正當與此相遇。雖然，吉人無咎。昔時為道，以備今來耳。未至太平而死，子孫當蒙天恩。下世浮薄，持心不堅，新故民戶，見世知變，便能改心為善，行仁義，則善矣。可見太平，度脫厄難之

中，為後世種民。雖有兵病水害之災，臨危無咎，故曰道也。子念道，道念子；子不念道，道不念子也。故民諸職男女，汝曹輩莊事修身潔己，念師奉道，世薄乃爾，夫婦父子室家相守，當能久。而不能相承事清、貞孝、順道、敬師、禮鬼、從神乎！今已去天下之擾擾如羊，四方兵病惡氣流行，念今日之善，尊天敬神，愛生行道，念為真正，道即愛子，子不念道，道即遠子，卒近灾害，慎無復悔，悔當苦在後身。吾晨夜周流四海之內，行於八極之外，欲令君仁、臣忠、父慈、子孝、夫信、婦貞、兄敬、弟順，天下安靜。故民渾濁日久，雖聞神仙之語、長生之言，心迷惑，更懷不信。或行善未知真正，愚愚相教，邪邪相傳，不自屏惡，更相謗訕，君臣爭勢，父子不親，夫婦相妬，兄弟生分，因公行私，男女輕淫，違失天地，敗亂五常，外是內非，亂道紀綱，至今三天恚怒，殺氣縱橫，五星失度，太白揚光，變風冬雷，彗孛低昂。天垂懸像以示人，人不信道，道恚，死者當氣在幽

谷。《妙真》自吾所作，《黃庭》三靈七言，皆訓喻本經，為《道德》之光華。道不欲指形而名之，賢者見一知萬，譬如識音者。道在一身之中，豈在他人乎。汝曹學善，夫根本不承經言，邪邪相教，就偽棄真。吾昔皆錄短紙，雜說邪文，悉令消之。祭酒無狀，故俾挾深藏，于今常存，使今世末學之人，好尚浮說，指偽名真，此皆犯天禁，必當中傷，終不致福也，但勞汝耳。無事自勤苦，不如任心恣意以快。汝不須為天考，不須輕易官法也。化以太平，人當助天為太平之行。天聰明，自我民聰明。中五正則二五定，亦從人為嚮應耳。諸新故民戶，男女老壯，自今正元二年正月七日已去，其能壯事守善，能如要言，臣忠子孝，夫信婦貞，兄敬弟順，內無二心，便可為善，得種民矣。種民難中亦當助其力，若好生樂道，無老壯端心正意，助國扶命，善惡神明具自知之，不可復為妄想，或以邪偽之人言，言我知道，以道教人。

諸職男女官，昔所拜署，今在無

幾。自從太和五年以來，諸職各各自置，置不復由吾氣，真氣領神選舉。或聽決氣，信內人影夢，或以所奏，或迫不得已，不按舊儀，承信特說。或一治重官，或職治空決。受職者皆濫對天地氣候，理三官文書，事身厚食。○奉及諸閑官無文書之職，皆當隨時坐起，名荷天官，常處神明之坐，以僑世俗非。忠臣孝子之道，曾不知悉，語聞災責，已如逢災遇害，如反怨，妄言奉道無益，此乃有罪三千，從爾如己也。吾昔勤勤憂濟汝曹之命，欲令見太平耳，而復求太平耶？昔漢嗣末世，豪傑縱橫，強弱相陵，人民詭黠，男女輕淫，政不能濟，家不相禁，抄盜城市，冤枉小人，更相僕役，蠶食萬民，民怨思亂，逆氣干天，故令五星失度，彗孛上掃，火星失輔，強臣分爭，群姦相將，百有餘年。魏氏承天驅除，歷使其然，載在河雒，懸象垂天，是吾順天奉時，以國師命武帝行天下，死者填坑。既得吾國之光，赤子不傷身，重金累紫，得壽遐亡。七子五侯爲國之光，將相掾屬，侯

封不少，銀銅數千，父死子係，弟亡兄榮，沐浴聖恩。汝輩豈誌德知真所從來乎？昔日開門教之爲善，而反不相聽，從今吾避世，以汝付魏，清政道治，千里獨行，虎狼伏匿，卧不閉門。姦臣小豎，不知天命逆順，強爲妖妄，造者輒凶，及于子孫。汝輩豈知其原耶？從比年以來，四方疾病，掃除群凶，但殺惡人耳。其守道樂善，天自護之。如赤子臨危度脫，如舌之避齒，汝曹豈復知之耶？諸職自今以後，不得妄自署置爲職也。復違吾，中傷勿怨。祭酒治病，病來復差，既差復病，此爲惡人，勿復醫治之。但當戶戶自相化以忠孝，父慈子孝，夫信婦貞，兄敬弟順，朝暮清淨，斷絕貪心，棄利去欲，改更惡腸，憐貧愛老，好施出讓，除去淫妬，喜怒情念，常和同腹目，助國壯命，棄往日之惡，從今日之善行，災消無病，得爲後世種民。民勿怨貧苦，貪富樂尊貴。汝耳目聞見，從古以來，富貴者久乎？財棄於地，身死於市。以此觀之，故諺言：死人不生鼠。得之在

命，求之以道。道隱無名，名者伐身之斧。善行無轍迹，欲令人不見其蹤迹。爲道當治身養生求福耳，而教人以縱己，縱己則人見其迹，伐身之斧利矣。伐身之斧利，則福去而禍來，可不慎歟。可不畏歟。天地所以長久者，以其無爲。無爲者，無不爲也，但使人不見其有迹，乃能爲奇耳。俗人輩，汝曹狀可笑也。纔有小善，欲使人知之；纔有粉米之異，欲使人賢之。此皆非道之益，已皆犯禁矣。今傳吾教令，新故民皆明吾心，勿相負也。

天師教

今故下教作七言，謝諸祭酒男女民。天地混籍氣如烟，四時五行轉相因。天地合會無人民，星辰倒錯爲人先。二十八宿畢參辰，熒惑太白出其間。若有改變垂象先，太平之基不能眠。是令軼軻不可言，發言出教心意煩。走氣八極周復還，觀視百姓夷胡秦。不見人種但尸民，從心恣意勞精神。

五藏虛空爲尸人，命不可贖屬地官。身爲鬼伍入黃泉，思而改悔從吾言。可得升度爲仙人，節慎陰陽保愛神。五藏六府有君臣，積在微微爲真人。神思愁慘不能眠，遊戲百姓五藏間。還與真人共語言，心中真人來上天。絳黃單衣三縫冠，佩天玉符跪吾前。陳說百姓道萬民，功過進退有明文。

陽平治

教謝二十四治、五氣中氣、領神四部行氣、左右監神、治頭祭酒、別治主者、男女老壯散治民：吾以漢安元年五月一日，從漢始皇帝王神氣受道，以五斗米爲信，欲令可仙之士皆得升度。汝曹輩乃至爾難教，叵與共語，反是爲非，以曲爲直，千載之會，當奈汝曹何。吾從太上老君周行八極，按行民間，選索種民，了不可得。百姓，汝曹無有應人種者也。但貪榮富、錢財、穀帛、錦綺、絲綿，以養妻子爲務。掠取他民戶賦，斂索其錢物，掠使百姓，專作民戶，

修農鍛私，以養妻奴，自是非他，欲得功名，榮身富己，苟貪錢財，室家不和，妬媚爲先，男女老壯更相說道，轉相誹謗，溢口盈路，背向異辭，言語不同，轉相說媚，不恤鬼神，以憂天道，令氣錯亂，罪坐在阿誰？各言祕教，推論舊事，吾不能復忍汝輩也。欲持汝輩應文書，頗知與不？祭酒主者、男女老壯，各爾憤憤，與俗無別，口是心非，人頭蟲心，房室不節，縱恣淫情，男女老壯不相呵整。爲爾憤憤，群行混濁，委託師道，老君太上，推論舊事，攝綱舉網，前欲推治，諸受任主者、職治祭酒，十人之中誅其三四，名還天曹，考掠治罪，汝輩慎之。氣將欲急，遠不過一年、二年、三年之中，當令汝曹聞知，當令汝輩眼見，可不慎之。諸祭酒主者中，頗有舊人以不？從建安、黃初元年以来，諸主者祭酒，人人稱教，各作一治，不復按舊道法爲得爾。不令汝輩按吾陽平、鹿堂、鶴鳴教行之。汝輩所行，舉舊事相應與？不吉，吾有何急？急轉著治民，決氣下教，語汝曹輩，老

君太上轉相督，欲令汝曹人人用意，勤心努力，復自一勸，爲道盡節，勸化百姓。

天師五言牽三詩

牽三復牽一，披雲朗白日。三灾蕩穢累，約當被中出。

牽三復牽二，榮華不足利。若欲入五難，必令精誠至。

牽三復牽三，酒肉不足甘。洗濯素絲質，昇苦就朱藍。

牽三復牽四，妙法冥中秘。希仰神靈降，一心莫有二。

牽三復牽五，道士出蓬戶。脫落形骸中，淵玄誰能睹。

牽三復牽六，年往不可逐。雖無骨間分，訓之故宜勗。

牽三復牽七，希仰入九室。披衿就靈訓，諠然萬事畢。

大道妙不遠，弘之當由人。忠信成一氣，可得脫度身。

三灾運已促，宜早去利欲。中情

漸堅固，灾厄便得度。

心罪宜詳除，勉力可爲則。既得
過五難，衆願咸可得。

恨無自然分，纏綿流俗間。仰意
歸長生，庶得厠群賢。

正一法文天師教戒科經

（尹志華點校）

022 正一法文經章官品

經名：正一法文經章官品。又名《千二百官章經》。撰人不詳，約出於南北朝。係早期天師道經典《正一法文》殘本之一。四卷。底本出處：《正統道藏》正一部。

目錄

卷一

- 收土公
- 軍兵收怪
- 主利宅舍
- 收官事
- 主解首過
- 誹謗呪詛
- 主縣官口舌
- 保六畜

卷二

- 逐賊盜
- 壽命度厄
- 錄魂長生
- 玉女醫疾
- 治風毒癩疾
- 收先祖病子孫
- 收死人耗害
- 錄祭酒求錄
- 護蚕滋好
- 田作瓜瓠
- 遠行萬里
- 市買欺詐
- 叛道求還
- 祭酒開心
- 入山不渴飲
- 五瘟傷寒
- 已上共二十四條
- 收萬精魅
- 收顛癇
- 收目病
- 諸毒立差
- 主收耳聾

卷三

- 主收齒頰頭痛
- 治解社竈
- 治蟲鼠精怪
- 治劫殺注
- 解牢獄
- 治蛇蝮五毒
- 治腫癰鼠漏
- 治風痺痿
- 治久病淋露
- 治瘡疾
- 治男女百病
- 治嘔逆咳嗽
- 治雲中閑客鬼
- 治產生胎妊
- 治雜病
- 治衆疾
- 收邪師
- 治收糶鬼
- 治瘖瘂
- 男女解罪
- 解呪詛
- 已上二十六條

主斬草

收葬送塚墓鬼

主塚墓

主土公鬼

主土氣鬼

主井竈鬼

收竈鬼

主徙宅舍

利居宅

主嫁娶

主田種

已上十一條

卷四

主蚕桑

主六畜

主魚捕

主賈市

主百禍治生

主行來出入

解囚繫牢獄

解官事

縣官口舌

縣官怨仇

口舌誹謗

劫掠人夫妻

收盜賊逃亡人今自來還

主利征戰攻伐

請雨

請晴

已上十六條

正一法文經章官品卷之一

收土公

若病肌內消盡，性命垂困，當請天官揚秩君官一百二十人，君吏一百二十人合治之。若久病著家，請須臾君官將二十人令治之，赤天食炁君官將一百二十人，主收家惡鬼為崇害者。

若家故殮不寧，夢惡錯亂，魂魄不守，請收神土明君官將一百二十人治之，三炁慰愈君五人，官將一百二十人，都星君官將一百二十人斷家鬼伏連。

石安君都星君誅殃君各一人，官將一百二十人，斷外家亡人，復連高都君朔平君官將一百二十人。

青龍源水君九水丈人水帝君，又請水平政君兵士十人，又請安官置官官將一百二十人分解水君。

又請諫議大夫十二人經隱真君談君主和諭先亡。

東海大陸塗君官將一百二十人

主收勾星狐貉之精，並收瘡陽方君將一百二十人治青龍宮，安上君官將一百二十人治玄黃室、石都侯君官將一百二十人治陰陽室，安石君官將一百二十人治玄真室，安和君官將一百二十人治丙午室，考召考官吏收解宅內四面土公。

軍兵收怪

天昌君黃衣兵士十萬人，主收捕某宅中一百二十人殃怪，中外強祥十二刑殺來作病者消除之，兵星太白君十萬人，主收捕精魁崇災害之家，恐作文字不可知，召窮奇使噉怪鬼消除之。

又請天綱君官將一百二十人。

主利宅舍

安炁君官將一百二十人治安丹宮，主隱治宅中鬼炁逆亂，分別功賞令神還，令道明太玄君一人官將一百二十人，治逆室主民宅不可居，主利收諸殃殺灾怪。

赤沙君官將一百二十人治靈昌室，主收自禰五蠱六魁之鬼，一鬼二吹，耗害宅舍，上利之道。

元炁君官將一百二十人治室舍，主收天下萬民宅舍，及吹解諸橫禍之鬼。

天玄君一人官將一百二十人，治安邦室，主收萬民不可居，收殺鬼灾怪主利宅舍。

青龍君官將一百二十人治匱室，主萬民虚耗不宜六畜，主利宅舍。

收官事

冠帶君官將一百二十人治五門室，主民人犯官事繫牢獄易了，四顧君官將一百二十人治青蓋室，主壓伏官怒仇刑害止之，令甚不到口舌消滅之。

清倉君官將一百二十人治巨門室，主壓伏官事怨仇刑害止之，八門君一人官將一百二十人治太皇室，主壓收制官事怨仇刑害止之。

角周趙女三千七人，披髮能制官事怨刑禍止之。

官席君官將一百二十人治巨門室，主爲某解除官事囚繫牢獄，令解散出。

北一官左童君官將二百二十人，

又請收刑檢刑逆吏一百一十人，主爲某斷絕縣官惡人，謀議口舌牢獄，當爲平集消滅之。

察惡君官將一百二十人，治高平室，收捕郡府某姘妬讒人毀傷不止者，破諸謀議，衆心休息，捶天動地君九天兵士五十萬人衆，主收地上逆盜賊主之。

營星君官將一百二十人，治越宮，主爲天下萬民追逐安穩塚墓。

都侯君將吏一百二十人。治太清宮。主收墓鬼。

文意君官將一百二十人，治內渌宮，主收塚訟鬼。

九玄察炁君官將一百二十人，治西釋宮，主收葬埋土公鬼。

九地君官將一百二十人，治平治宮，主收葬埋之鬼。

地甲君一人官將一百二十人，治壞宮，主天下萬民開塚戶，啼哭言害。

解首過

三公節日月九考即候龍使者，六甲父母官將一百二十人。主解天下千

二百考吏，手書自澄者形。

和炁君官將一百二十人，治具寄宮，主收諸祭酒譴考相及伐者正炁君殺之。

天還君白衣兵士千一萬衆，主收諸考吏察之，天西辰君一人赤衣裳兵士十萬人，主收考召正炁所主天宮，時頓治功曹左右。

功曹五人官將一百二十人，主治田宅解考之，察炁君治名宮，主收諸祭酒食肉淫泆者主察殺之。

太清天營兵士百萬衆，主收三千六考察止之。

四明君官將吏一百二十人，主勅祭酒治舍炁不安穩，主禁考訟鬼之不正逆炁解訟者，考炁分別清濁。

國三老白兔君官將一百二十人，治駱城宮，主治中鬼亂考召帥罪過不正神，爲帥督下曹，分別官吏兵，解帥罪禍。

畢女君一人官將一百二十人，治仙宮室，主解諸祭酒犯錄止禁飲酒食肉，行輕重於民間姦好淫通之罪，皆使

無他。

國三老白巽君一人官將一百二十人，治駱威室，主治中惡犯考召吏罪功過，分別斷主解，考召察姦君一人官將一百二十人治仙名山室，主祭酒食肉，民子淫盜解之。

誹謗呪詛

主行君將一百二十人，治平地室，主有功之吏誅惡養善、常令神還令道明。

五徑君官將一百二十人，治北上室，爲祭酒某絕斷萬民口舌，不行令逢殃禍主之。

察惡君官將一百二十人，治高平室，主收地上道俗人萬民，狂語泄道，非非真毀賢主之。剋冠惡君將一百二十人，治高平室，收天下出狂語他炁非真傷賢之清靈。六鐘太皇君五人官將一百二十人，治石仙室，主制百姓口舌變門，正收其炁，令萬民同心相見，喜悅善之。

炁上清玄君兵士十萬人，主收天下道俗萬民，爲人作口舌，誹謗呪詛罵

者收考之。

南鐘六星君五人官將一百二十人，治仙合君，主收百姓口舌一百二十人變尅，令民人同心笑喜。

南鐘六星君五人官將一百二十人，治仙石室，主收百姓逆吏口舌，使萬民同意合心。

五衡君官將一百二十人，治玉女室，主有功之吏誅惡養善主之。左慧右喜君官將一百二十人，主

爲某斷絕屯里中道俗百姓口舌、無令近我身。

仙官玉女千二百人，主喚天生炁吐精，能制殃禍，口舌灾禍不生。

縣官口舌

天曹省念，分別願請東方青帝丈人君吏五十人。

又請南方赤帝大夫君吏五十人。

又請西方白帝大夫君吏五十人。

又請北方黑帝大夫君吏五十人。

又請中央黃帝大夫君吏五十人。

又請斬斧湯父官將千二百人。

又請破市大將軍千二百人。

又請破獄大將軍千二百人。

又請脫擊大將軍千二百人。

又請解患大將軍千二百人。

又請散事大將軍千二百人。

又請鎮承大將軍千二百人。

五部大夫君吏七部天官將一合來下，主爲回化官事，若有逆吏夢人縣官口舌，所見增疾者，啓所在監察考召三師二十四君將吏，某奉道行身，修真種德，而爲惡人甲遂吏某等所見增疾，某受道宣化，得當助國治民，佐天行化，扶命養善伐惡等，長短欲見傷善，願請東方大領神父、西方大領神母、南方大領神父、北方大領神母、中央大領神君、主領惡人逆使某口舌不語，從此絕若某欲見口說者，又請太陰君吏十二人，爲某收捕魂、令文墨不舉，口舌不起、四方縣官衆崇伏恩主治。

保六畜

凡畜養牛馬驢騾等列毛色頭數，啓百蟲畜收王相君將吏一合來下主者。

養畜七六營，肥健蕃息，無有折

傷，天儀君官將一百二十人，治休官，主爲民某養六畜，息無死主之。

吳水期官將一百二十人，治赤雲室主及天下六畜疾病之精崇，收之。

天陽君一人官將一百二十人，治夫君肉室，主萬民宅中不利牛馬保護之，令好盛不死。

逐盜賊

天位君五人官將一百二十人，治扶宗君，主人家宅不盜賊劫抄。

東西太白君官將一百二十人，治天乾室，主爲天下郡鄉亭里域萬民劫抄盜賊，殺之者察之。

萬姓君官將一百二十人，治和仙室，主萬民心腸不正，盜賊掠取，劫抄主收之。

日男千二百人赤衣，主收天下盜賊怨仇主之。

月女千二百人白衣，主收天下女子爲人盜賊劫收之。

貶君官將一百二十人，治百角室，主天下陰陽，十二種官將，行列返逆老之，承天大兵十萬人，赤幘丹衣，主及

百姓更相劫掠，男女陰陽悖亂却滅之，上曆逆清玄君百萬人，收地上盜賊，逐捕逃亡，全不得脫，日月大兵十萬人絳衣，主陰陽爲漢國辟捕千賊萬盜，主收之。

壽命度厄

南上君官將一百二十人，治倉果室，開天門益人壽命，病者得愈，殃禍者消滅之。

壽命君官將一百二十人，治安昌室，主爲天下萬民致壽命延此度厄不衰。

南昌君官將一百二十人，治列庫室、歷犯周旋八紀之中，脫下死籍，還著本命，消滅三蟲，伏長生不老，八十歲更爲十五童。

明堂絳室君官將一百二十人，治城官室，主祭酒心傷萬端，還壽延年，管度世神仙，逆人不行。

天公君一人衛即三萬九千人刑生，可以此世過厄千歲。

解厄君官將一百二十人，主爲解除年命之上刑厄始星妬鬼，精鬼崇殺，

害過度衰厄。

錄魂長生

玉女素曆千二百人，衣赤衣，主致長生承差，具錄某身三魂七魄，不得遠離某，主長生疾病，差除素女千二百人，主致長生延命疾病，具錄魂魄，無令遠人身精人安。

周玉君將一百二十人，治地理宮，主致一百二十生炁，神衣赤幘，節禁人三魂七魄、不棄人身，保命延年，長八百歲。

玉女醫疾

若命在水中，當各轉出之。若命在棺中，當為破出之。若在獄中，當多掘出之。若命在樹，當為下之。若命在獄中，當多開而出之。若命在墓塚中，當為開而遣之。若祿命盡者，當為增之。若文書拘攝，當為決放之。若事天官，時見省理之。兆民有急，以時差愈。

大龍君一人官將一百二十人，治七星室，主罷天下卜問醫藥灸刺血，令無不行主之。

東明大夫君五人官將一百二十人，治天帝宮，主操持煉藥治男女當使服之。

山周君一人官將一百二十人，治始生室、玉女素女五童，致仙藥神方，為小兒黃衣，即命玉女月玄玉女千二百人，白衣持神方典治男女被病人差愈。

上清太仙明堂玉女千二百人，主致神藥，一合下典治某身中所苦消滅，天醫官醫太醫、五官治病醫吏各十二人，一合下詣某處，入某身中五臟六腑十二宮室，布流一百二十關節、行神布炁，典治痛處，重勅某身治病功曹，為所請官將醫吏，共案行某身、從頭至足、治肺察炁，六脉浮沉，沉處為安，浮處為散，滌除五臟、安穩六腑、辟斥故炁，飲食鬼賊，精妖疾疫，使殺兵寒灾散，與人相遠離，得蒙恩祈，苦除愈以為效信。

治風毒癩病

玉女君官將一百二十人，治長命室，主二十四炁，主典治某身癩病毒蟲、

浮風取苦、灾患除赤，丙子仁君官將一百二十人，治又傷室，主天下玉女布行丹田之炁，主治萬蟲癩病毒蠱消除之。

收先祖病子孫

無上方蒼君兵士十萬人，主收却先祖五墓之鬼未病子孫者，分別生死之炁，斷絕耗害主之，無上方官君兵士十萬人，主收先祖病子孫，語者主收斷之。

收死人耗害

都星君一人官將一百二十人，治青蓋室，主解星死斷絕復連制三，殺灾滅咎殃，不得復連生人，素車白馬君兵士十萬人，主收十二墓鬼，未病生人者斷絕之。

無上天君兵士十萬人，收某家中水火湯注乙石二十刑殺之鬼、却死未生復連殃注之炁消滅之。

都官君官將一百二十人，治太陰室，主收某家中星死血親之鬼，耗亂人者斷絕之。

天玄君官將一百二十人，治少陽室，主收却塚墓鬼祟病主人者。

石安君官將一百二十人，治始室，主收死人未爲精崇者，斷絕耗害之。

石仙君將一百二十人，治天下萬民家中外亡強狎之鬼，厭絕注鬼爲人精崇者，轉相注易後生人疾病者，死主斷絕之。

誅殃君官將一百二十人，治倉明堂，主爲某收斷死次還流，逆殺殃咎復連生人者，斷絕之。

若故婦致來注病生人，請大皓大典者吏收攝故婦，致魂魄檢押死人某，不得令還賊病生人，又請太白兵星熒惑吏一合下，收死時煞炁消滅絕，復連葬死送收塚訟。

九地君官將一百二十人，治地理宮，爲萬民出喪葬埋，收正月至十二月建墓鬼，葬埋以續疾病呪訟鬼法所爲主之鄉，大神官將百二十人治其宮，主萬民移徙，繕治作塚月食禁忌之鬼主之。

右郡候君官將吏一百二十人，治泰玄室，生收丘墓之鬼絕墓神兵墓伯塚中。

二千石爲民作精崇大言官君將一百二十人，治安渠室，主收天下萬民葬埋之後，死人不安，疾病生人者，墓塚之鬼。

九玄察炁君一人，官將一百二十人，治四澤室，主自禰葬埋土公之炁除滅消散之。

九地君一人，官將一百二十人，治宮室，主萬葬埋勅堤收萬鬼解過，主葬埋之。

地申君一人，官將一百二十人，治隧宮，主天下萬民開塚戶，啼哭言窖，令厭有歲病。

錄祭酒求錄

三元節月九候龍使者，六甲父母官將各一百二十人，解天千二百考吏等書自證者，形和氣君官將一百二十人，治旦寄室，收諸祭酒譴考相及代者，正典直殺之。

天還室白衣兵十萬，衆生諸考吏察正之。天西辰君一人，赤衣裳兵士十萬人，主收考召正炁所主大宮時。

頓治功曹左右功曹五人，官將一

百二十人，主治田宅吏解考主之。

察炁君治名山宮主，收考諸祭酒飲食肉淫佚者主祭殺之。

四明君五人，官將一百二十人，勅祭酒治舍炁不安穩，主禁不正炁解法考，分別清濁正炁。

國三考白兔君官將一百二十人，治駱城室，治中鬼亂考召師罪過下，此神爲師馬天下切，分別官吏兵解罪師過。

畢女君一人，官將一百二十人，治仙室，主解祭酒犯錄上禁，忌飲酒食肉，行輕重於民間姦淫通之罪，皆使無它。

國三考白巽君一人，官將一百二十人，治駱城室，主治中惡犯考吏罪過，分別釋玉解考君。

察姦君一人，官將一百二十人，治名山室，主祭酒犯錄飲酒食肉，民子淫盜解之犯。

錄可用移徙，吏主管護某家男女釜竈，六畜移徙出宅，開通無它却十二辰禁忌。

護蚕滋好

恭食君官將一百二十人，治明系室，主萬民養蚕卧起齊光澤滋，出以系如意。供食君將一百二十人，治天禄宮，主為萬民蚕健食解，好中神男神女，玉男玉女，素男素女，玄男玄女養蚕。

滋母温室新婦等各二十四人合下，誥詣某蚕室中温暖之保護，令滋好同收絲萬倍，無有傷之。

田作瓜瓠

田作種種，當啓所部署官，四野五野七野都平君城，山川祇稷社召僂亢。

白蚕君，主保五穀，苗莖滋好，結子成實，收入萬倍。九野君官將一百二十人，治地盡宮，主萬民田作求利，蟲兒不害，鹿走得百倍。

五穀君官將一百二十人，治大水宮，主萬民五穀。

草易理，苗莖滋好，收深猪熊疾蟲蝗，群精消之，收穀百倍。天田君官將一百二十人，治地房宮，主萬民種禾，令收大得之。

五田外田九野都平君自營，歲終田作五穀，今為俗有異詭，馬谷一斛，以為勅信。

五千王君官將一百二十人，治九水室，主萬民田作手法。

六畜君官將一百二十人，治明堂，主萬民主瓜瓠，收子倍得，無有死傷。

遠行萬里

萬里君官將一百二十人宣祖諱治炁室，主萬民遠行萬里，道里四通，不逢禍殃。

北馬君一人，官將一百二十人，治室房室，主將帥遠行，不為惡吏所得，令輕身自行千里。明堂玉女千二百人，衣白衣，主遠民遠行萬里，不逢殃痾難主之。

萬福君官將一百二十人，主保萬民遠行萬里，道路滑利，却死來生，轉禍為福，收除殃殺，往還無它，思所意所所從心。

市買欺詐

驛駱門監市君官將一百二十人，治天市室，主收天下害鬼，考治生殃屠

沽酒，開店賣與百姓貧民，私行輕秤少升，詐誕欺人主之。

無上萬福君吏二十八人，求五利金銀布帛綿絹穀米錢物，所思者至，所索者皆得，主治招財求利。北面昌盲君一人，官將一百二十人，治北水室，主水船人賦，買重量大斛，賣利詐誕都市不中考之。

無上萬福君官將一百二十人，主求五利金銀布帛，所思者得，所願者成。天河君官將吏一百二十人，治九江室，主記錄河伯勅水更生為休，莫加月三輔之張、三鈎三荀卿得。

叛道求還

化炁君官將一百二十人，治赤免赤，收叛民某從使還，得化屬道，不得稽遲主之。

九會君官將一百二十人，治還宅主，從九天召吏下方民，令且化之屬道主來之。

九會君官將一百二十人，治還宅主，從九天考召吏，收叛民戶主來。

祭酒開心

夫子君官將一百二十人，治紫微蓋室，主男女官祭酒心腹童蒙，令之化聖，使知鬼女。玉仙君官將一百二十人，治太素主女官祭酒心腹童蒙，令之化聖，使知鬼女。五經化炁君將一百二十人，治九奇室，主祭酒童蒙，令自受教使。

□□民若開心思明，衆與有異，請五星二人官將一百二十人，下注某身。

請周天八極君，左右陰陽明決吏十二人下并某身，隱意定志。

入山不渴

蓋天君官將一百二十人，治道門室，主請山神師入名山，道却神可在致山道玉女素女主之。

青城壽曆十二人赤綺衣，主爲師長生一百二十年，方入名山。

泰謂飽吏左右五人，官將一百二十人，主制三尸，令人不飢渴長生。

王域行厨君官將一百二十人、治王門室、主令師制炁不食不飢，可入名山，不用糧精廣神也童子。

金倉君官將一百二十人，治神皇室，主致谷食炁，可入名山，不飢渴同炁至仙官。

制天君官將二十人，治丈人室，主祭天官，道鬼號不別，炁曆師祭酒得道，下屯神分別主之。

天倚邦君五人，治五辰室，主師守中神，願美色好老，更丁一日。

天倚國君五人，治五辰室，主籍師五精守中神，還精美色丁莊。

華景君官將一百二十人，治白玄室，主師入山，精思，面七日念面色土水上無還，年不老陰陽炁備之。

五瘟傷寒

計天君官將一百二十人，治六丁室，主收連藉傷寒，思炁歷亂。

地官督炁君五人，官將一百二十人，治上文室，市中五瘟傷寒男子疾病。

地城伐吏五人，官將一百二十人，治難室，主收治某里五瘟傷寒，女子復連疾病。

運炁解厄君兵士十萬，辟斥五瘟

傷寒，功時破殺之鬼。五瘟都炁兵士四十萬人，主收惡炁五瘟傷寒鬼殺之炁。

北闕九夷君五人，官將一百二十人，治大苗室，主收里中傷寒狼藉，吏民被狂惑。

北里太皇君五人，官將一百二十人，治行室，主收里中傷寒披髮。

咽喉翁天市大夫君一人，官將一百二十人，治成室，太祖諱臣胤生主治萬民復連傷寒絕音不能語。

振夫大兵十萬人，赤幘天冠，主收天下自稱五色瘟病之鬼。

百神炁君一人，官將一百二十人，治難室，主收天下五瘟傷寒，鬼病人者。

北闕九夷君官將一百二十人，治天戴寶，主收市里傷寒病疾，吏民披髮，狂足忌罵言錯亂。

討天君官將一百二十人，治六丁室，主收疾病時瘟毒之鬼，若在船上得屬者傷寒，連病相易五瘟之鬼。

北域賊君五人，官將一百二十人，

主治熱病亡言語之鬼。

北城九夷君官將一百二十人，治滿室，主收船車傷寒相連，歷疾病狂忽，喉壅身災。

北黑大機君五人，官將一百二十人，治大行室，主收五瘟傷寒時熱之病。

正一法文經章官品卷之一

正一法文經章官品卷之二

收萬精鬼

破逆君將一百二十人，治漢仙室，主百姓男女病精魅中刑犯易，披髮狂走還格，因稱神鬼語稱和言皆主之。

天樂君五人，官將一百二十人，治五水室，主收治女子狂易披髮。

奔走天地精君官將一百二十人，苗林宮收治男女披髮狂易之病主之。

大角獄君官將一百二十人，治五大行宮，主收天下有物萬精來着人者，除滅之。

高脊君官將一百二十人，治寄明宮，主收天下龍蛇災害人者。

實地君一人，官將一百二十人，治文宮，主收考地上獸之精，諸道行逆劫真強病之。

九天前司馬千二百人，絳衣赤幘，主收天下木石之精魅。

胡將軍千二百人，各將胡兵士十萬人，主能收天地身稱爲道五龍之精

考之。

九諫君一人，官將一百二十人，治成信宮，主收天下自稱河伯水龍蛇之精，病人者主之。

北玄君一人，官將一百二十人，治皇宮，主收龍蛇精老虎精主之。

三炁賜功君一人，官將一百二十人，治黃雲室，主收天下老鼠之精魅，病人者主之。

山秦皇老君一人，官將一百二十人，治地室，主天下崖石之精主之。

旌明中徹君一人，官將一百二十人，治俗室，收天下萬物之精魅主之。

明郎君一人，官將一百二十人，治安莊室，主收天下自稱妖精爲毒害諸精。

天封大兵士十萬人，黃衣，收龍蛇之精，狂歌自爲之神主者。

澤明都君一人，官將一百二十人，主治天五平室，主天下自稱考神蛇雀石草木精魅。

廣老君一人，官將一百二十人，治倉室，主收天下鋒蟬蚱召之鬼，主治百

精。

主治顛癩

地黄君官將一百二十人，治女顛狂病，狂言之脆絹穀。

天門大營君官將一百二十人，治太上室，治男女顛狂癩病主之。

土陽君一人，官將一百二十人，治閻空，主收捐天殺馬癩病之鬼主治之。

非門君一人，官將一百二十人，治安樂室，收捕天下八節十二辰，能治顛病之鬼。

地門君天營五人，官將一百二十人，主治女子雉癩顛病。

地星營星官將一百二十人，治上靈室，主治驚狂之鬼。

天玄關閉君一人，官將一百二十人，治星機官，主男女狂易之論。

天樂君官將一百二十人，治五九室，主治女子狂易被髮呼走之病。

治目病

左右青田君一人，主典治目痛，目痛令三日除差鬼消滅。

陽天君主治男女徽日之痛，主治

之除差，舟明君一人，官將一百二十人，治孔次室，主治目寶海出督十歲之病可治之。

百玄玉女二百人，持神方良藥，主治男子目寶之病。

大明君一人，官將一百二十人，治明堂，治男子目海生督十歲之病治之。

注變君官將一百二十人，治高夏室，主治目病，主治之逆注君，治右室目病令人除差。

明鏡君官將一百二十人，治關陽室，主兩目睡子精，視萬里，目見形影，知吉凶。

日月君官將一百二十人，治欣室，主治吏民目海生篤病十成治之。

天厭君黑衣兵士十萬人，主收一百二十人並竈鬼，令人生目之目今立差。

天明君五人，官將一百二十人，治男室，主治男子左目，生日之目，今差

面目上諸毒立差。地明君五人，官將一百二十人，治北室，生男女子左目之目今差。

天癡君黑衣兵士十萬人，主收一百二十人竈鬼病人，目生日主治差。

明君五人官將一百二十人治北室，主治男女目痛今差。

治耳聾

天壽君一人，官將一百二十人，治仙貢室，主治男子聾十歲主治之。

天鼓君官將一百二十人，治大素室，主治男女子暗聾主治之。

天尊君官將一百二十人，治仙真，主治男子女耳聾十歲不聞言語治之。

治齒頰喉痛

元計君左右二十四人，主治男女齒今差。元和君官將一百二十人，主治男女口齒頰腫，口中生惡瘡主治之。

百吉君官將一百二十人，治項安君主治之齒瘡，勅咽中癢治之。

九焦君五人，官將一百二十人，治九節官，主治男女口齒，勅嚙中痛今差。

天九候君官將一百二十人，主治男子咽喉腫痛，舌強烝結主之。

地八節君官將一百二十人，主治

女子咽喉腫痛，舌強，炁結主之。

治解社竈

太上剪板兵十萬人，主爲萬民收解天下一百二十人并竈鬼，爲人作精崇斷之。

周天玉女千二百人，赤衣三環角結，主男女百病竈鬼所爲。

平神君官將一百二十人，治陽照宮，主收解社竈，未害人者分別之。

無上太衡兵士十萬人，主解星社來作崇病者，捉勅社神解放生魂還附之身中，不得拘攝，永相去離，分別鬼崇，絕斷耗害除劫，須散之。

主法君五人，官將一百二十人，治五姓宮，主治男子面身體生瘡癰，犯十二訾。

竈火玉女千二百人，赤衣，收一百二十人竈崇病人者。

主解蟲鼠精怪

三炁陽無元君官將一百二十人，治黃靈室，主收精怪之精。

南山白虎將吏，主收除宅內群鼠犯害驅離，無令留停。

治劫殺注

無上化不君兵士十萬人，收一百二斗注鬼殺炁，却死來生主之。

無上萬官君兵士十萬人，收地上逆淫注炁消滅。

無上平天君兵士十萬人，主收天下一百二十人殃注鬼殺，在人身中者消滅之。

部吏赤天道室考騎老逆將軍二人，太君一人，都官從事老對殺君，各有種數千人，不營守某家保護男女，若牙身中除去死籍，更迎生名捕死者，某死生注清濁之炁，破殺尸殃之恩，得老稚正法髡答五百，斬殺有罪，死合平復連更相牽引。

治解牢獄

尊神斬斧疾湯部君，又請顛倒將軍，絕斷將軍，出囚出魂將軍，收炁出炁將軍，出徙囚繫將軍，收符拾傳將軍，合下速爲解脫牢獄效。

治蛇虺五毒

山夷君官將一百二十人，治令倉室，主收蛇虺毒蠱，山中萬獸虎狼精毒

炁，殺消滅之。

先生君一人，官將一百二十人，治神水室，主爲萬民醫治蛇虺五毒精殺不得行，主收某身中五毒之鬼，蟲蛇嚙人，毒入腹中，毒炁不行，今差之。

天上白蛇君三十九人，收萬民爲蛇毒之鬼所中，使得炁不行。

治腫癰鼠漏

地八節君官將一百二十人，治大丹室，主治女身爛喉腫各強炁之病。

白玄解激君一人，官將一百二十人，治陰明室，主治女晨夜音喉翁惡赤治之。

地天冢君官將一百二十人，治九漢室，主治女子得瘤疽下血主治之。

天覆君五人，官將一百二十人，治周星室，主治男子頸翁血主治之。

九天九病君官將一百二十人，治下塚室，主治男子喉翁舌強主治之。

省炁君官將一百二十人，治七靈，治萬民翁癱脆水病主之。

天覆君官將一百二十人，治周星，主治男子頸癱夜下血鼠主治之。

九天候君官將一百二十人，治下塚室，治男子喉翁舌強繫絕主治之。

地覆君官將一百二十人，治九候室，主治男子頸瘤癰顙下血鼠漏主治之。

侯君一人，官將一百二十人，治井室，主治女子翁舌病主之。

地八節君一人，官將一百二十人，治五星室，主治男子手足癰疽，久病不差，魂魄拘繫者。

治風痺痿

赤舌君官將一百二十人，治上俗室，主治女子大風治死飢令差。

黑炁溫水君官將一百二十人，主治女子大風死飢病主治之。

起炁君五人，官將一百二十人，治安平安，主治人痿跛偏枯主治之。

天水君五人，官將一百二十人，治上俗室，主治女子大風病邪主之。

起地君五人，官將一百二十人，治上三千室，主治女子四肢偏枯痿黃令差。

交路君五人，官將一百二十人，主

男女苦雨胼上炁風痺，兩脚上不隨，疼痛不能行步。

治久病淋露

五佞君官將一百二十人，治久病淋露。當骨消定痛水邪、滅百病痛。

七政君官將一百二十人，治陽室，主天下陰陽官吏病稽留，令差主治之。

白玄宅炁君五人，官將一百二十人，治太真室，主治女子十歲落病，連漆收骨治之差。

主君官將一百二十人，治玄胎星，主收捕某身中携病之鬼，着床卧來為精屯稽留不差者。

主治瘧病

倉母君五人，官將一百二十人，主治男子瘧病之鬼作沉重主令消滅之。

中室玄武瘧吏嬰兒一合下并力主治男子瘧病鬼令差。

治男女百病

地戾營君五人，官將一百二十人，治上室主治男女百病之鬼令差。

經官素女千二百人，同還結忌主固，治男女百病令差。

天地強亂君一人，官將一百二十人，治正室，主為師復連痛炁曆禁錮之鬼。

按摩君一人，官將一百二十人，治陽明室，主治男女四肢疼痛主治之。

犯天正亂君一人，官將一百二十人，治端正室，主師治人之久病不差，炁錯不同主之。

魄天君五人，官將一百二十人，主治男女病關節令差。

頸無禮君功曹五人，官將一百二十人，主治男女腰膝病治之。

蓋化司侯君三祖九和，主人吐病令差。

蓋地司侯君三祖九和、主解治之吐病之鬼。

八風周害君吏一百二十人，主治君病一目，治男子百脉病。

天君陰陽林君官將吏左右一百二十人，治男子黃疸病。

九向北海君主治男子病水之鬼令立差。

太陰君一人，官將一百二十人，治

蘭室，主治男女驚病之鬼。

九河北海君官將一百二十人，治河元室，主治男女病，小腹之痛令立差，主水能前醫所不治者。

天官五行君官將一百二十人，治大比丘平室，主男女吸咄不能匡義，腹中痛令立差。

地官五行君官將一百二十人，治太室，主吸咄不能飲食匡義，腹中痛令立差。

天官五行三五七九君官將一百二十人，主治男女陰陽閉塞不通，利腫痛生瘡主治之。

九河君官將一百二十人，主治男女大小便不通主治之。

封離君十二人，主男女心腹痛，臍下便拘急激，滿帶下十二之鬼主之也。

省玉君官將一百二十人，治七令室，主治男女頭脊腫痛生瘡令差。

跪巨炭紙筆等官君五人，官將一百二十人，主治男肩臂手腫令差。

天傾君官將一百二十人，治五炁室，主治女子下赤白晝夜不止，十二病

絕嗣。

言生君官將一百二十人，治安樂室，主天下雲中一百二十神三十六主病，某心腹背脊四肢骨節戴眼吐沫，口禁驚掣之鬼，收除之。赤選君五人，主攝四面八方之鬼。

嬰向君二十人，主收食雲中閉一切消滅。

剛強吏兵主典治雲中所病之鬼，主為某身收掠除十二時鬼消除之地灰，榮感五人官將一百二十人，治太上中室，主治某身所苦雲中病滅之。

石明君官將一百二十人，治執治室，主誅除符病飲食精魅之鬼，為某收捐邪鬼主立解除之。

朱都主官將一百二十人治蘆陽室，主天下萬魅百精灾某身者，收邪鬼等病者為某摧滅之。

保產生胎妊

陽炁君官將一百二十人，治經室，主保女子產解易兒時出，母子無它留難。

聽敵君官將一百二十人，治平害

室，主為郎差女性受命、令懷妊無它主之。

嬰兒乳母吏主乳某胎兒，使調暢交好。

護胎吏主護某胎成，日月成滿，堅固受炁，萬產醫吏輔易某身，使差速易，母子端正，度脫無他。

考召考官吏主收解宅內四面土炁，破射防害殺炁，消滅身無宅胎妊安穩。

期文君官將一百二十人，治小仙室，主女子產乳難，子橫胎中，病風面以時下之。

主治雜病

白玄炁君一人，官將一百二十人，治父王室，主治大子落病生治之。

四明君一人，官將一百二十人，治下食室，主治男女死飢病主治之。

夫玄君瑩官將一百二十人，治含威室，生渴男女消渴羸格治之。

男陽君一人，官將一百二十人，治河倉室，主小兒厭赤陽黃常淋露三年主治之。

嬰兒君一人，官將一百二十人，治河倉室，主小兒厭赤陽常淋露三年主治之。

天靈天童君一人，官將一百二十人，治高平中室，主扶凍。

東王陵君五人，官將一百二十人，主治逆炁令差。

太衡君五人，官將一百二十人，治凶至室，治男女過地星路，吸咄主治之。

督金君官將一百二十人，治盧黃室，治男女憤微露之踵主治之。

救欺君一人，官將一百二十人，治倉明室，主治百姓破墮不利救護之。

解患君官將一百二十人，治下倉室，主爲民解宅破墮不正者主之。

南上君官將一百二十人，治食果室，主開主門，蓋人壽長令短三日差去，非痊不得病人，胸脅天昌君黃衣兵十萬人，主爲收除宅中一百二十人殃怪，中外殄殃十二刑殺之鬼來作惡夢怪病者除之。

東明大夫君治天帝室，道來宣諱上

字三風隨惡精痊留病主治之。

治衆疾病

老毒君官將一百二十人，治赤白室，主收千一邪因及逆不正之祟鬼。

中央天兵士十萬人，赤幘君主收捕緒帥行刑，及返逆不正者。

九天九丈人兵士各十萬人，主治地留室，主男女十歲淋露病下，此神收察中牢獄。

地五行君官將一百二十人，治木室，主治女子同帶下癩淋露咄吸並主治之。

天五行平君官將一百二十人，治丘平室，主治男過下淺癩淋露吸吐主治之。

三祖君天翁祠母五人，官將一百二十人，治消各祖山室，主父隨所在。

天功君左右王侯各二十四吏，治男女色美，主治之天官陰陽狄君官將一百二十人速炁吏左右七十一人主治羸病。

右續令天三人即千船治急病攻心，欲絕主治之。

扶清太一公華蓋君二十四官將一百二十人，治三候室九狂心膈。

扶清後部司馬和夏君八十四人，官將一百二十人主心府。

扶清太一公華蓋君二十四官將一百二十人，治三候室九狂心膈。

扶清後部司馬和夏君八十四人，官將一百二十人主心府。

赤師君一人，官將一百二十人，主治逆氣令差。

扶清東主麴君官將一百二十人，主治逆氣令差。

赤師君一人，官將一百二十人，主治女子陰門中下血絕子帶下十一時病主治之。

太主星君一人，官將一百二十人，主治逆氣令差。

天中國大兵四百萬人，主收捕送炁瘴炁。

天上東海赤天內君百萬人，主收一百二十符即飲食之鬼。

赤天萬靈君一人，官將一百二十人，治陽水室，主收天下大逆不正之鬼考治之。

蓋天大考將軍十萬人，主收捕天下飲食橫行鬼賊，爲人作精祟病人者，收治之。

收治之。

高麾大鼓五湖將軍及甲逆鱗兵士四十萬衆生，收捕故炁逆鬼行凶者。

無上黃周君兵一百萬人，主收此時司命強殺人之鬼收之。

無上中國大兵士四百萬人，主收除邪氣妖鬼。

北都君官將一百二十人，主收太歲將軍飲食之鬼。

無上四開君兵士十萬人，主收破萬炁十二逆之鬼。

太上督天兵四十萬人，主收自稱皇天上帝之鬼。

北上君官將一百二十人，治天留室北斗七星精，共時十二殺。

大傅君官將一百二十人，治西平室，主收某家符廣鬼賊上頓人家作狀，主責求飲食作害者。

太平君官將一百二十人，治北朔室。

中官君將一百二十人，治陽春室，主收天下六丁六甲之鬼，責民血食之鬼。

北平五門君官將一百二十人，治

朱陽室，收自稱天地父母，從民責飲食之鬼。

北曹五千君官將一百二十人，治朱陽室，主收天地父母從民責飲食之鬼。

玄天君官將一百二十人，治北都室，主收大歲將軍從民求飲食者。

赤王君官將一百二十人，治天北室，主收北時司命從民取食鬼者。

北天君官將一百二十人，治主室，收天下自稱五帝飲食之鬼。

九炁君官將一百二十人，治七徹室，主收天下身稱天翁，從民求飲食之鬼。

靈官官將一百二十人，治戒室忌，主收自稱皇天上帝飲食之鬼。

天願白候將軍兵士十萬人，主收自稱天地水三官，萬道逆殺鬼，考問人不得，從民求飲食。

收考天地破惡大炁兵百衆生，主收天下萬民二千道千鬼。

百靈君官將一百二十人，治平天室，主收天下五色蟲毒之鬼。

無上九天丈人中堅大兵百，主收自稱千二道鬼。

天罡大五丁君兵百萬人，主收符破廟，多怨坐席血食逆鬼，考責藏不得令脫。

玄老大將軍十二人，官將一百二十人，主收三官逆炁稱神道也。

無上無土君五人，官將一百二十人，主捕收天下衆老之精糴神兵稱官誤號者，又請上千師萬龔聖鬼殺消除之。

治暗啞

百舌君一人，官將一百二十人，主治暗啞不能言語，領炁吏平定身中治舌痛。

九炁蜚舌君一人，官將一百二十人，主治男女久病咳嗽。

主治男女解罪

辭曹君官將一百二十人，治仙里室，主責疾者辭語，男女大小心化自欺，過手罪差。

素赤君五人，官將一百二十人，治赤虛室，主治男女百病，所苦造逆，思

過改愆復差。

白素君五人，官將一百二十人，治和陽室，主治女子百病，所苦告道，思道更改心腹差。

天渴者萬二千金為祭酒，男女吏兵，文世其罪過，即受此神。

陽先君一人，官將一百二十人，治陽食室，治天下男女百病，取在苦心，神思道即差。

陰先君一人，官將一百二十人，治陽食室，主治天下女子百病，取在苦心，神思道即差。

天倉君一人，官將一百二十人，治天溜室，主天師連曆當下此神，兆民病不欲者醫治之。

主治解呪詛

述炁君官將一百二十人，治素室，主病者中罪犯萬國被禱閉固犯易主刑禱。

八卦玄天君官將一百二十人，主收一百二十刑固之鬼全被呪詛病積日不差羸嬰着狀思道者復不差，請魁魍吏一合下，主收某身中之呪詛盟要惡逆

之鬼，強絕之魂魄道不理者，鐵鈞其分，持天丁甲六千鐵杖打殺，無令得脫，晨被刑禱病呪詛，與人相憎戾相妬有二心，分居異處，校計不同，首以除差詳破殍君一人，官將一百二十人，治在山室，主天下男女解此鬼，令人病者愈起，若為百姓取厭固不利人者。

天田君官將一百二十人，下收捕陰差了跪市二十隨輕重。

正一法文經章官品卷之二

正一法文經章官品卷之三

主斬草

二部君官將吏，主為辟斥歲殺、月殺、日殺、時殺，葬送斬草。

收葬送塚墓鬼

太陰君官將九地君將某君將等各二人，官將一百二十人，請舉工監作一合下，主監臨葬送。

葬送君將吏兵一合下，主營護道士所發起居葬送之鬼。

九玄察炁君官將一百二十人，主治西驛室，主收天下葬埋之鬼為精崇者。

太白中陣明皇君官將一百二十人，主收捕禁塚一切之鬼，各令伏匿，葬埋後請復還治也。

左都侯君官將一百二十人治太清元室，主收天下兵塚鬼，絕墓丘，丞墓相塚中二千石為祟病人者。

漢明玄君官將一百二十人，治五俗室，主收室墓鬼。

九甲君官將一百二十人，治九坎室，主收天下民間石開葬埋，上啼哭哀麻合客，令無禍事疾病。

大言君官將一百二十人，治母渠室，主收天下萬民葬埋後有疾塚訟之鬼主之。

地畜靈官將一百二十人，治廣靈室，主收塚塚墓卿石祆鬼。

太玄君官將一百二十人，治母渠室，恍惚妄走下治之不差，收塚葬送逆順鬼塚訟之鬼造功吏，一合來下營護發喪處，道路不得阻遏。

九天君官將一百二十人，治地里室，收天下萬民葬埋，收勅十二月建墓鬼解土謫。

九地君官將一百二十人，治茂里室，主收天下萬民葬埋，收勅十二月建十二月墓鬼，解求適主葬埋已訖，續得疾病，塚中有訟，連禍鄉邑者。

大神人君官將一百二十人，治其室，主收移徙繕治作塚日食禁忌之鬼。

章驛君官將一百二十人，治泰請室，主收主墓絕墓神丘丞墓伯塚中千

二石爲民作精崇者。

九德君官將一百二十人，治越性室，牢帥塚五害不利，不到墓養命之鬼。

赤玄君官將一百二十人，治少陽室，主收天下諸墓耗鬼。

秦關得明君官將一百一十人，治少室，主收天下自稱刑謫之鬼。

素車白馬君兵士十萬人，主收十墓鬼將軍比考之。

破逆君官將一百二十人，治漢仙室，主收萬民淵墓狂殍之鬼精。

陽方君官將一百二十人，治天門室，主收天下諸墓功太歲大將軍太玄真符，攝下女青詔書主之。

塚墓之鬼

演豹君五人官將一百二十人，治五諾室，主收天下墓鬼。

河伯河水使者十二人，從事小郵驛馬故行，主收捕塚墓男女之殃殍。

太黃太極君符下女青詔書，地下二千石，泰山二十四獄主收塚墓之鬼。

太素太始君五人，官將一百二十

人一合下符攝地，二千石女青詔書丘丞墓伯十二塚鬼。

無上高蒼君兵十萬，主收先祖五墓之鬼來着子孫者主之。

主土公鬼

制地君五人，官將一百二十人，治宜泉室，主收天下高卑太歲行年本命上土公之鬼。

制地君官將一百二十人，治地里室，主收天下土公之鬼。

九德君官將一百二十人，治水室，主收天下土公之鬼。

安石君官將一百二十人，治玄黃室，主收天下諸山獵精土公之鬼。

主土炁鬼

剛武敢健君吏一合下部將軍吏，主收捕天下土炁之鬼。

天匠君官將一百二十人，治垂室，主作營鎮，收十二時，役使主四百功禁忌之鬼。

仙官激炁君官將一百二十人，治四川室，主收百功禁忌之鬼，治起土方

丈舍東西傍主之。

揚方君官將一百二十人，治天龍門室，主收太歲大將軍十二月建土炁。

安玄君官將一百二十人，治丙午室，主收捕天下水土公之鬼。

平石君官將一百二十人，治南犯室，主收天下高卑土公一百二十人，禁忌土公逆鬼。

主井竈鬼

太上前校大兵四十九萬人，主收一百二十井竈鬼。

主治竈鬼

無上監炁君兵十萬衆，主收竈伏龍形德殃注竈祭耗虛鬼。

鑪火玉女千二百人赤衣，主收一百二十竈鬼中伏炁。

漢明地黄皇君官將一百二十人，治理室黃門，主收天下自稱溫竈靈之鬼。

主移徙宅舍

都邑大神君官將一百二十人，治其却室，主收天下萬姓娶移徙架起宅舍，繕治蓋屋，制正月食禁忌之鬼。

縣邑君官將一百二十人，治其却

食室，主收移徙宅舍。

仙官昌息一人，官將一百二十人，治食逆室，主收天下萬民移徙繕治作舍治墓，令人福利。

土地里域君官將一百二十人，主移徙舍官，將軍主天下萬民作舍移徙。

昌落君一人，官將一百二十人，治城昌室，主收移徙太歲大將軍。

玄都君一人，官將一百二十人，治北都室，主收天下解五部將移徙故炁。

主吏居宅

救吹君官將一百二十人，治倉明室，主收百姓破隳居宅，不利奴婢六畜主收護之。

天玄君官將一百二十人，治安關室，主萬民舍不可居利宅，收諸鬼灾炁怪主之利宅。

天陽君一人，天休君五人，官將一百二十人，治扶君泉室，主收宅中衰耗，不利牛馬六畜下此神保護，令盛好不復死亡。

頻元君吏功曹左右官各五人，官將一百二十人，主解諸考謫，令室宅安

穩。

解患君官將一百二十人，治倉室，令主爲人民解宅滴破不止者，安利家居。

赤沙君官將一百二十人，治南昌室，主收天下五蠱六魍之鬼、百二十凶吹入宅舍利之。

天官君官將一百二十人，治安洋室，主民人宅舍不可居，收攝殺炁百怪之鬼。

仙官計平君官將一百二十人，治赤水室，主收宅殺，自稱刑宅破鬼，諸繕治君將吏兵各一合下，在鄉里中監察，助某起治事訖，三日一時無他言舉遷。

始陽平君官將一百二十人，治七俗室，主收河龍七獄吏宅殺鬼。

青帝君官將一百二十人治，靈明絳匱宅，主收天下萬民舍虛耗。

北始道元君官將一百二十人，治靈明室，主治萬民破貴亡賤有不利者主之。

主嫁娶

釀泉君官將一百二十人，治白玉室，主飲食賀慶和合神炁之主。

左右宜春君官將各一百二十人，治正陽室，主收天下嫁娶時鬼，為人作精符命相尅之。

左右宜春君官將一百二十人，治陰陽室，主收天下人民嫁娶時鬼，為人作精崇者，稱符命相尅主之。

日月君一人，官將一百二十人，治陰陽室，主天下男女嫁娶舍客，主利合男女竟年壽。

天處君官將一百二十人，治五衛室，主萬民嫁娶娉合尅制四時鬼，合符命令有貴子。

玄來君一人，官將一百二十人，治富女室，主天下男女嫁娶，令妻夫致二萬歲，延年嫁娶吏一合下，主萬民嫁娶，監臨營衛，使其安穩。

歌樂君一人，官將一百二十人，治陰陽室，主收天下萬民嫁娶飲食，合會賓客，成生和合，男女皆令喜笑符命益傳。

九炁玄機君官將一百二十人，治中庭室，主收移徙嫁娶時鬼病人者主之。

赤靈君官將一百二十人，治激室，主治天下萬民嫁娶時鬼主之。

歌唱君一人，官將一百二十人，治衡室，主萬民嫁娶會合得宜，令有男女。

左右宣奉君官將一百二十人，治陽歸室，主天下萬民嫁娶時鬼主之。

天陵君官將一百二十人，治五衡室，主萬民嫁娶娉合時，合有貴子主之。

仙官昌樂君一人，官將一百二十人，治地威室，主收天下百姓作厨食護之。

天貴黑衣兵士十萬衆生，立收一百二十人時鬼嫁娶迴狂言語。

請素白玄明官將一百二十人，治部城室，主解天下女子嫁娶，生命在天，年歲星逆鬼之中，有若姘鬼妬神，醜宿惡星，拘刑鬼天懸尸，六害肌骨，刑禍不宜翁姑夫子者，主收之。

中室敢健吏，左右陰陽嫁娶吏千二百人，主收捕九室炁主嫁娶。

九倉君官將一百二十人，治目還室，主收天下嫁娶飲食，合會生成，和合男女符命年壽。

玉曆君官將一百二十人，治九天室，主解天下男女嫁娶，年命在天，年歲星之中，不宜夫妻少子孫者，下此神保護之，使年長相宜。

北平君官將一百二十人，治群城室，主解天下嫁娶不宜姑翁，生命在天，年歲星逆鬼之中，各有姘鬼妬神，醜宿惡星，懸尸六害，胞形骨消，不宜子孫者，下此神保護之，使命長相宜。

天大夫君官將一百二十人，治五行室，主收萬民嫁娶聘令制，使得倍收。

五穀君官將一百二十人，治大水室，主令田五色禾苗秀好，令少草，一畝得百斛，辟蟲鼠熊兔猪鹿，令不犯害水旱和適主之。

地畜君官將一百二十人，治四明室，主民人種瓜瓠茂好倍得。

天甲君一人，官將一百二十人，治地戶室，主民禾谷，令無蟲鼠主之。

無野君官將一百二十人，治地盡室，主萬民佃求利無蟲鼠耗不害，收得百倍。

正一法文經章官品卷之三

正一法文經章官品卷之四

主蚕桑

附時鬼符命有貴子。

山澤君官將一百二十人，治陰陽室，主天下崖蚕自天父母蚕。

供養君官將一百二十人，治天系宮，萬民男女喜生蚕，令解耗有倍得。

仙官玄女玄男，神女神男，玉女玉男，素女素男等吏，養蚕絲綿吏合下，主為萬民將養蚕，辟斥蟲鼠，皆解好。

仙官玄女、神女、玉女、素女、玄男、神女及諸君丈人官將，各一百二十人，蚕室主蚕吏營衛，令去蟲鼠，令蚕伐耗神男玄女，主採桑，饒玄女主簿素女主繭黃白分明。

玉竟君五人，官將一百二十人，治倉室，主男女犯天年歲君逆炁不宜妻子者。

天竟君五人，官將一百二十人，治洛臺室，主解男女違犯天年歲星不宜夫妻者。

地竟君五人，官將一百二十人，治洛臺室，主解男女違天年歲星不宜子者。

開天元君五人，官將一百二十人，治食室，主解男女犯歲星，使宜妻子安穩。

清廉考召征伐君吏，主收嫁娶時之禁忌媚固娼妬之鬼。

主田種

天林君五人，官將五人，各一百二十人，治民人田種五谷，令倍收。

地林君五人，官將一百二十人，治四相室，主治民人田種，下谷倍得。

天田君官將一百二十人，治北門室，主民人種作苗稼，辟却蟲鼠，令好有倍利。

三炁陽元君官將一百二十人，治黃雲室，主收蟲鼠犯暴之傷，田種所部置田四野七野九野，都平君城神，山川社稷神君，護某稻禾穀令熟美好，無令損害，辟斥蟲鼠，歲冬入增倍以為效信。

五千玉君一人，官將一百二十人，

治九水室，主民人田作，令苗秀好。

主六畜

秦皇太元君官將一百二十人，治地玄宮，主民人六畜令增息。

天僕君官將一百二十人，治休行宮，主萬民養六畜，今日熾盛，不死亡傷主人。

秦皇定炁君官將一百二十人，治九地室，主民人養六畜不成不茂，令使增息。

赤玄天北水井君五人，官將一百二十人，主治天下六畜牛馬，皆使類蕃息。

黑小騏君官將一百二十人，赤靈君主天下牛馬六畜疫病之鬼，收三十六精崇，欲畜養生馬猪牛，烈色數啓百蟲畜收王相官將一合來下，令其蕃息。

主漁捕

太治官請主厚君吏一合下，收捕故炁飲食之鬼，漁捕射獵，各各慈心，不相侵害。

太河君官將一百二十人，治九江室，主絕錄河伯，勅水吏主爲捕獵人主

慈愍心，棄釣焚網。

別求宅利天河君官將一百二十人，治九地室，主民人汙池藕葦芰蕉，求得萬倍。

主人九河大漁君官將一百二十人，治玄谷室，主萬民汙池，使四面魚鱉各得其性，不爲精害人。

水却君一人，官將一百二十人，治河龍室，主天下萬民汙池沼渚，一切水族，捕十二日精鬼怪，營護部界。

主賈市

天市君官將一百二十人，治珮室，主治天下諸市召考官，稱詐小秤小斗，不正入勅市長致理民主之。

地面昌上君官將一百二十人，治百水室，主天民乘舟車販賣，賤交貴貨，重金小斗固不利人，詐誕都市不中之人。

無上萬福君吏二十八人，主來宜五利，金銀錢絹布帛絲綿谷米，所思皆黃生主之。

驛騎門監市君官將一百二十人，治天市室，主天下諸部惡鬼，考治生坐

列屠沽開廬作酒者，百姓貪民侈利，輕秤小斗，詐誑欺人，從民飲食者考之。

朱廬君官將一百二十人，治太元堂，主天下金銀鋼鐵錢物不變化，欲求金銀銅鐵下此神。

主百禍治生

田蚕吏兵營護，收得百業盡成都市，監察考召君官將吏兵，一合主天下萬民百估治生，令得主之。

求利百福君，並合屬將吏生王道炁一合下，主民人百病求欲皆得。

主行來出入

明星玉女千二百人，白衣主將正一遠行萬里，不逢禍害灾厄難主之。

受南奉君官將一百二十人，治天倉室，主令師出來不用衣糧，萬民自來溉食之。

萬里君五人，官將各一百二十人，治九紀室，主將帥正一遠行，令無獲難禍害，道里四通千里外，營護無它主之。

萬里君五人，官將一百二十人，治引炁室，主止一及萬民遠行不逢禍害，

以自營護乃行。

天奉君官將一百二十人，治天倉室，主師行不持精用萬民未溉。

道上三玄四玄四始甲子諸官君、三十六官君、亭傳客舍瑩署，注鬼主行來出入有取，至諸天馬君一人，官將一百二十人，治石房室，主將帥遠行，不為吏兵所呵，令人身體輕便，日行千里不用糧。

主遠千里君里將一合下，主將送天下萬民遠行營護，無令它憂。

千里君官將一百二十人，及佑護將君萬福丈人等一合下，主營護遠行者。

主解囚繫牢獄

青倉君一人，官將一百二十人，治豆行室，主罷厭官怨仇刑禍，令各解散消亡不作。

天諸室主天獄精君執事吏諸獄君屬之。

文書監察君官將一百二十人，治九天諸室，主天下獄注吏諸獄屬之。

冠帶君官將一百二十人，治五明

室，主解萬民犯事繫在牢獄下屯神，令繫者易得解去。

魚國玉女三千六百人，被髮持蠱趁解官事，上千二百刑禍却止之。

尊神斬斧或陽部君，主解囚繫牢獄，令得解散，顛倒將軍，破木將軍，絕繫將軍，收符檢傳將軍，主脫厄難，囚繫牢獄，令得解散。

主解官事

都星君一人，官將一百二十人，治青蓋室，主解官事。

仙官玉女千二百人，主喚天生炁吐精，能制解官事。

主縣官口舌

大小熒星戰鬥兵龐咄律君，反君，逆解兵衣鐵復刃下，營護民人縣官口舌。

南鐘天星君五人，官將各一百二十人，治石仙室，主收攝百姓縣官口舌吏民惡逆之者，令心玄同。

主官事怨仇

天願君官將一百二十人，治青蓋室，主官事怨仇主人八關君。

地君五人，官將一百二十人，治西宮，主逐捕女子劫掠人夫痛心，令自還本主。

主收盜賊令還

星君一人，官將一百二十人，治各逆宮，主逐捕天下萬民盜賊不亡主之。

日月大兵十萬人，赤幘紅衣，主陰陽為漢困追捕千賊惡逆主之。

日男千二百人，衣赤衣，主捕天下盜賊怨仇，萬民為惡逆者主之。

百姓君一人，官將一百二十人，治和山宮，主天下民人心腹正戾盜取劫抄奸好主之。

東西太白君官將一百二十人，治九天乾宮，主天下郡縣鄉亭里域萬民，劫掠奸好謀殺戾便罪考察之。

五陽君官將一百二十人，治門宮，主男子不翼祖諱，劫盜萬物罪不正收之。

三哭君官將一百二十人，治玄都宮，主捕天下逆人。

西方大將軍一合下，為天下萬民逐盜。

搖天動地君九炁君兵五十萬衆生收地人逆人盜賊相掠亂者。

承天大兵十萬人，赤幘天冠朱履，主收百姓男女更相劫掠一人，官將一百二十人，治蜀下室，主解吏民制官事仇怨，刑禍口舌却召之。

四願君官將一百二十人，治陽蓋室，主解官事怨仇主之。

主口舌誹謗

無上清玄君兵百萬衆，主收萬民爲人作口舌呪詛罵詈蠱人荼毒之鬼。

無上百福君兵千二百人，主收諸人思作諸福，變口舌炁人精主之。

地官玉女千二百人，衣五彩衣，戴通天冠，主收地炁吐精沐，制刑禍口舌清靈六種。

五經君一人，官將一百二十人，治北上宮，主絕口舌，師正一民，子不行口舌，誹謗大道，不令人逢過害主絕口舌。

天皇君五人，官將各一百二十人，治萬仙室，主制百姓口變門收正其炁，令萬民同心相見。

喜笑朱雀君官將一百二十人，治浴平室，主護萬人，令客飲食營陣，聚衆久令無怨惡者，制止口舌。

南鎮六星官將一百二十人，治含光先官，主收利百姓口舌萬二十禍變合萬人同心笑喜。

河北紀浴水周開逆吏送人役屯還正，主收口舌誹謗。

城周越女兵三十億萬人，主收口舌誹謗。

天越女三十億萬，主收口舌惡逆誹謗。

越上君官將一百二十人，治陽明宮，收吏民返逆誹謗道法，欲令鬥者主收之。

主劫掠夫妻

天林天君五人，官將一百二十人，治百宮，收捕亡夫痛人，必令自得。

林杜君五人，官將各一百二十人，治男主劫掠人夫妻，痛必收子。

自得姤里官一人，官將一百二十人，治左劉宮，主天下女子不謹輕遙逐夫即得之。

歲星君五人，官將各一百二十人，治耗宅宮，主天下男子不謹掠人妻，求逐人亡，逐則得之。

始星君官將一百二十人，治左列宮，主天下女子不謹翼祖輕淫逐人亡，逐則得之。

禁天君五人，官將一百二十人，治南昌室，主逐捕男子劫掠人夫妻痛人，必令得之。

禁地君五人，官將一百二十人，治先宮，逐女子不謹殺夫痛人，必不收之即得。

上逐亡人君官將一百二十人，治綱紀宮，主萬民奴婢逃亡，追之令自得。

天官五人，官將各一百二十人，治南宮，主逐捕男子劫掠人妻痛，必令自還本主。

措亂者無上督逆君兵十萬人，主逐盜賊逃亡，令自來還。

主利征戰攻伐

啓將軍戰故遣吏請人庫二十萬人衆，及搖天動地無上九炁君兵馬協輔

十方衆，及四面真官注炁君與同心兵士，所同如意，無令毀傷。

主請雨

九江北玄君官將一百二十人，治河天宮，主天下炁出風雷，令符興雲日中下雨。

天公明正炁君官將一百二十人，治中天宮，主炁水風雷合符迅雲下日大雨。

海日玉女千二百人衣赤衣，持雲炁雨泉，下風雨制宴。

河上真人君官將一百二十人，治北大理宮，主爲天下吏民縣官致晏雨。

四洲九江君五人，官將一百二十人，治太山宮，主起雲雨水炁。

九江九海玄君官將各一百二十人，河宮，主水炁風雨，合符雲日中下雨，以爲效信，雲下雨主風雨靈臺宮中。

漢明君官將一百二十人，主攝天雷炁名主人宮中。

小玄明君官將一百二十人，主攝河伯呂公子三十六水帝，十二溪女，九江河平，侯作掾吏，部水鬼興雲下雨。

天河宮中九江北玄君官將一百二十人，主下水炁風雷，合符沉雲，日中下雨。

太山宮中四水九谷君官將一百二十人，收水炁諸河伯水帝子三十六人下雨。

太山宮中四水九谷君官將一百二十人，主起炁水炁。

湖中玉女千二百人，衣赤衣，持雲炁水泉，下風雨制宴。

主晴

九江北玄君官將一百二十人，治中丙宮，青節霖雨請晏主之。

天翁正炁君官將一百二十人，治內中宮，主月節上霖雨晏三日，爲始效信主之。

江上玉女千二百人，衣白衣，持天炁主捕九雷精霖雨致晏。

天公正炁君一人，官將一百二十人，治食明宮，主月節霖露雨水清晏，黃昏白日請天皇。

正一法文經章官品卷之四
(錢安靖點校)

023 正一法文經護國醮

海品

經名：正一法文經護國醮海品。
撰人不詳，約出於南北朝。係早期天師道經典《正一法文》殘本之一。一卷。底本出處：《正統道藏》正一部。

太上告仙人豆子明曰：將來國主帝王有國土不安，星宿錯度，日月失昏，陰陽不調，兵革四起，疫毒流行，兆民死傷，汝等徒衆宜加救護禳災，請福滅障消殃，宜設河圖普告大醮，以謝三十二天，三十二帝，日月星宿，璇璣玉衡，三十六地，名山大川，仙宮洞府，土地真官。可用飲食餅果千二百盤，金龍環璧，本命紋繒，五方鎮綵，金錢鎮絹，幡香燈燭，仙官神座，章信紙筆書刀事事潔淨，罄竭丹誠，奏上章表，悔

謝愆負，祈請福恩鎮信之物。天子用疋，諸侯用丈，庶人用尺，亦可三百六十盤，亦可二百四十盤，可令精勤道士一十二人，亦可九人，亦可三人，沐浴清淨燒香潔服齋戒，吉日登壇，啓告遍謝事訖，即以醮座金龍環璧青紙青絲銀板籌筭散詣名山大川，章醮投告，可用飲食餅果三十六盤，亦可二十四盤，其本命紋繒五方鎮綵金錢繒絹香油燈燭紙筆神座之具，事事降減元數，羅列敷陳，以告洞府仙官，具陳丹款，請福禳災，投於清冷之淵，山洞之所，保延國祚，記上仙名，其銀板題文當如靈寶簡式，藏投深山深水，勿使漏泄密則福降，泄則禍臻，長淪幽夜，終不蒙祐。太上重告子明曰，夫學仙道士宜篤志勤苦，爲國立功，救護蒼生，先物後己，章醮錢絲座席散造功德，捨施貧窮，營建靜舍，燒香然燈，念濟一切，放生度死，功滿三千，白日昇天。是時豆子明等首體投地，同聲稱善，作禮而退。天師君曰，自淳風漸薄，澆偽競生，道德不行，百災俱起，能令國土不安，居家

虛耗，妖怪互出，疫疾流行，生事輻輳，動遭凶禍，或彈官黜職，祿位不進，貴賤怨憎，謗毀凌辱。或偷盜劫掠，驚動內外，國失土境，民喪錢財，恐放縱橫民人死叛，或兒孫反亂，門戶不昌，所作違心，舉動不利，若有此災，皆宜醮祀龍神或海龍江龍河水宅龍，任意祀之。

醮法須清淨，諸果實隨時所珍，每令芳香，當用吉日，三年爲之，國安民豐，家內富溢，米穀盈倉，九年爲之，金帛自積，所向果從此法神驗，道不欺人。其鎮座用金銀珍寶；繒綵錦衣，著座上龍神衣之；金龍五枚，各重一兩；本命紋繒，天子用疋紫紋，王公用命紋；五方鎮綵隨方色，東九、南三、西七、北五、中十二座；絳紋三丈五尺，天子三百五十尺，此物以爲法信。

東海水帝神王頭建大晨寶明之冠，衣青文翠羽飛裙，帶青靈九色獅子虎頭鞞囊，以立春春分日乘碧輦飛龍，上詣高皇玉帝削罪簡注仙錄，列奏上清玉皇帝前。

南海水帝神王頭建大晨寶明之冠，衣赤錦文裙，帶丹靈紫綬三色鞞囊，常以立夏夏至之日乘蛟龍飛行雲輿，上詣高皇玉帝削罪簡注仙錄，列奏上清玉皇帝前。

西海水帝神王頭建大晨寶明之冠，衣素錦飛裙，帶素靈命神之章，九色獅子虎頭鞞囊，常以立秋秋分之日乘素霞飛輿，上詣高皇玉帝削罪簡注仙錄，列奏上清玉皇帝前。

北海水帝神王頭建大晨寶明之冠，衣黑錦飛裙，帶豁落七元五色獅子虎頭鞞囊，常以立冬冬至之日乘黑霞飛輿，上詣高皇玉帝削罪簡注仙錄，列奏上清玉皇帝前。

凡醮海神法，常隨四時上天日醮之，又以正月十五日、七月十五日、十月十五日，率言上天三宮功過罪福生死簡簿，應生者言左宮，應仙者言中宮，應死者言右宮，謫役長徒大小劫會水中萬靈之事，隨所由列言，上下相應，若有考炁未正者，皆申三會考正，又言天地水三官。

次存神

次鳴天鼓

次發鑪

太上玄元五靈老君當召功曹使者，左右龍虎君，捧香使者，三氣正神，急上關啓三天太上玄元道君，臣等正爾燒香設醮速達逕御帝前。再拜

次稱法位

泰仙都正一平炁，係天師某治炁道士，小兆男官臣某甲稽首再拜。

謹奉請東方高上九玄玉虛帝皇泰清玄元。上三天無極大道太上老君，諸君丈人，湯谷玉女，扶桑大帝君，天帝君，中央黃老君，九老仙都君，九炁丈人，太清玉陛下，上清太真玉寶王，上相東海玉門東華小童君，高仙萬聖玄極天尊。再拜

謹奉請東海神阿明何歸君，再拜

謹奉請南海神祝食劉囂君，再拜

謹奉請西海神乘李口瀨君，再拜

謹奉請北海神禺强吳禽强君，再拜

謹奉請湯谷青華方諸宮水帝神仙靈官諸龍王，

謹奉請青靈南水會宮水帝神仙靈官諸龍王，

謹奉請北都羅艷宮神仙諸靈官諸龍王，

謹奉請碧海三神仙蓬萊方丈瀛洲水帝諸宮神仙靈官諸龍王，

謹奉請五方龍神君，

謹奉請五方龍王，

謹奉請五方龍王丈人，

謹奉請東方青帝青龍神王君，

謹奉請南方赤帝赤龍神王君，

謹奉請西方白帝白龍神王君，

謹奉請北方黑帝黑龍神王君，

謹奉請中央黃帝黃龍神王君，

謹奉請天上飛龍神君，

謹奉請地下伏龍神君，

謹奉請日月神龍神君，

謹奉請星宿神龍神君，

謹奉請雲龍雨龍神君，

謹奉請五嶽靈山丘阜一切神龍君，

謹奉請守護國土宮殿府庫龍神君，

謹奉請三河九江四海四瀆洞源洞淵清冷千川萬谷十二淮津河伯河侯，四方

八極水帝水府一切龍神君，並各嚴裝具冠降席臨饗。再拜。

臣某謹上啓東海小童君，海內諸宮神仙靈官水帝，水府一切官屬諸龍王神君等，臣幸藉宿慶運生，人品忝染道流，情希拯濟，思欲佐國扶命，救度蒼生，不勝戰越，今有詞誠謹當宣奏。

次讀詞

謹按詞文深誠丹禱，既承憑仰，不敢寢默，伏惟

皇上寸心所寄，志在卑宮薄食，子育黎民，荷天重任，願行道德，思欲誕敷皇化，治合無爲，三省九思，保安

宗社，大同天下，以副朕懷，憑仰海神龍王，曲就醮禮，垂慈臨饗，集福邦家，謹具啓聞，臣某再拜。

次上香

臣某謹重上啓海神龍王水帝水府一切官屬，乞降神明之大慈，感應蒼生之請，願恩流有識，澤及無心，哀祐丹誠，冥福加助，使皇帝神威被遠，謀謨日明，洞察幽玄，

曉知前事，凡有祈願莫不遂情，乞天下安寧，兆庶平泰，六合歸化，似星迴之仰辰極，萬國來王，若川流之赴滄海，休兵偃甲，放馬息牛，子育黎民，不嚴而治，修行道德，以答洪恩，乞天灾雲銷，地禍霧散，臣忠子孝，君惠父慈。

皇帝永保乾尊，如天不變，皇后長居坤重，似地不移，皇太子諸王兄弟等並各盤根，帝本繁茂，皇枝萬歲千秋，榮華不絕，普天率土，灾害不生，地獄停苦，囹圄息訟，含靈沾慶一切蒙福神明慈力，所願稱心，萬善嘉會，荷恩罔極，臣某再拜。

次上香

臣某等上啓東海小童君，海內諸宮神仙靈官水帝、水府一切官屬諸龍王神君等。

皇帝今請福禳灾，奉請衆官，獻此微醮，伏願大聖玄鑒，有如影響，辭不再陳，言無鄭重，禮謝既周，行香已畢，雲車玉輿，羽蓋上昇，晷漏易移，不敢稽滯，下土荒穢，不可久停，願垂哀憫，曲加洪澤，臣某稽首再拜奉送。

次吟送神讚

次上香

次復鑪

香官使者，左右龍虎君，侍香諸靈官，當令此間醮所自然生金液丹精芝英，百靈衆真，交會在此香火案前，願臣等學道克獲上仙。

皇帝受福天下，蒙恩十方，仙童玉女，侍衛香煙，傳奏所言，逕御神前。

元始靈寶告水帝削除罪簡上法

靈寶某帝先生某甲，年若干歲，某月生，願神願仙長生不死，三元同存九府水帝十二河源江海淮濟冥靈大神，乞削罪名，上聞九天，請詣水府金龍驛傳。

太歲某年某月朔如干日子，於某國告下。

右朱書銀簡上，以青紙裹簡，青絲纏之，金龍負簡，以投三河之淵。

次叩齒三通

次發鑪

无上三天云云

次讀簡置案上祝曰

元始五帝，上帝高尊，十方至真，太華靈仙，赤文告命，無幽不關，上御九天，請下玉文，日月五星，北斗七元，中告五嶽四方靈山，下告河海十二水源，九府水帝，冥靈大神，今日上告，萬願開陳，請投玉簡，乞削罪名，千曾萬祖，九族種親罪相連，染及得某身，並蒙削除絕滅種根，記名水府，言上帝前七祖，父母去離八難，上登九天，衣飡自然，某罪釋散，萬神咸聞，請以金龍關盟水官，請如所陳金龍驛傳。

次上香

次復鑪

香官使者云云

元始靈寶告山簡求仙上法

靈寶某帝先生某甲，年如千歲某月生，命屬某帝，名係某山，願神願仙，長生度世，飛行上清五嶽真人，至神至靈，乞削罪籍，上名九天，請詣靈山金龍驛傳。

太歲某年某月朔如干日子，於某嶽告下。

右朱書銀簡上，以青紙裹簡，青絲纏

之，金龍負簡以投名山。

次上香

次發鑪

无上三天云云

次叩齒九通，讀竟，祝曰

玄上開明元始監真上帝五老赤書丹文，天地本始總領三元攝炁君會催促舉仙高上符命，普告十天日月星宿，五嶽靈山，天下地上冥靈大神，監生主錄南上三門關領玉簡勒名丹篇，削除罪書上輔帝臣千曾萬祖，九族種親，皆蒙解脫五道八難，去離三惡，魂升九天，生死開度，萬劫長存，今日上告萬神啓聞，請以金龍關盟真官請如所告金龍驛傳。

次上香

次復鑪

香官使者云云云云

元始靈寶告宅簡文

靈寶某帝，先生某甲年如千歲，某月生，命係九天北斗，領籍願神願仙，長生度世，飛行上清中皇九地戊己黃神土府五帝削除罪錄，勒名太玄，請詣中宮投

簡記名金鈕，自信金龍驛傳。

太歲某年月朔日子，於某齋壇中告下。

右朱書銀簡，青紙裹之，青絲纏鈕九隻金龍，一枚埋住中宮，悉如上法。

次於中庭向王叩齒十二通，讀簡竟，祝曰

天開地張，九炁分靈，三元洞府，十方朗清，五老上帝，開真鎮生，丹書赤文，元始上精，普告天下，九土皇靈，今日上告，萬仙定名，我願神仙，請投玉名，上府太皇，勒除罪刑，奏簡上宮，列簿華清，早得飛騰，天地同靈，九祖種親，腐骸更榮，魂升南宮，受化仙庭，吉日告命，萬神咸聽，請以金龍，表盟至情，請如所告，金龍驛傳。

次捻香

次復鑪

香官使者云云

正一法文經護國醮海品

024 正一法文修真旨要

經名：正一法文修真旨要。撰人不詳，約出於南北朝。係早期天師道經典《正一法文》殘本之一。一卷。底本出處：《正統道藏》正一部。

服日月光芒法

大方諸宮青童君常治處，其上人皆天真高仙、太極仙公，上卿司命之所在也，有服日月光芒法，雖已得道爲真，猶故服之，直存心中，有日象大如錢，在心中赤色，有九芒從心中上，出喉至齒間，即迴還胃中，如此良久，臨目存見，心中胃中分明訖，乃吐氣，吐氣畢，漱液，三十九過止，一日三爲之，日出時食時午時行之，一年疾病除，五年身有光彩，十八年得道成真，日中行無影，辟百邪千灾之氣，常存日在心，

月在泥丸中，晝服日芒。夜服月芒，服月芒法如服日法，存月有十芒，白色從腦中下入喉，芒亦至齒，而咽入胃，一云日芒，常服月芒，從月一日至十五日已前服，十五日已後不服，謂十五日已後月減光芒損天氣，故言止也。又云月一日至十五日已前服日，十六日至月終服月也。

右此法方諸真人，法出《大智慧經》中篇，常能用之，保見太平。南極夫人所告，行此法日在心，月在泥丸之道，爲省易得，旨須勤行，無令廢怠，除身三尸百疾，千惡萬邪，是鍊魂制魄之道也，日月常照形中，則邪鬼無得藏形，昔東海青童君傳授，今故行之，吾即其人也，今以告子，子服，可密示有心者耳，行此道亦不妨行寶書，所以服日月法兼行有益也，仙人一日一夕行千事不覺勞倦，勤道之至，重生不可失矣。西城王君告楊君，今以示諸許。已上出《真誥》第三卷。

孟先生暮卧法

山世遠受孟先生法暮卧，先讀黃

庭內景玉經一遍乃眠，使人魂魄自然制鍊，常行此法，二十八年亦仙矣，是合萬遍也，夕得三四遍乃佳，北嶽蔣夫人云，讀此經年限未滿，亦且使人無病，是不死之道也。出《真誥》第五。

惡夢吉夢祝

太素真人教始學道者辟惡夢法，若數遇惡夢者，一曰魄袄，二曰心試，三曰尸賊，此則厭消之方也，若夢覺，以左手掐人中，二七過叩齒，二七通開口以前，齒啄之微呪曰：

大洞真玄長鍊三魂，第一魂速守七魄，第二魂速守泥丸，第三魂守心節度，速啓太素三元君，某向遇不祥之夢，是七魄遊尸來協萬邪之源，急召桃康護命，上告帝君五老九真，各守體門黃闕神帥紫戶將軍，把鉞握鈴，消滅惡津，反凶成吉，生死無緣畢，又卧必獲吉應，而造爲惡夢之氣，即受閉於三關之下也，三年之後，唯神感應，乃有夢也，夢皆如見將來之明審也，無復惡夢不祥之想矣，若遇吉應好夢，而心中自以爲佳，則吉感也，卧覺當摩目二七

遍，急閉目以手兩掌從內向外摩之，叩齒二七而微呪曰：

太上高精三帝，丹靈絳宮，明徹吉感，告情三元，柔魄，天皇授經，所向諧合飛仙上清，常與玉真俱會紫庭畢，此大洞祕訣以傳於世，始涉津流者矣。右出《大丹隱書》。

山源者，是鼻下人中之左側，鼻下尖谷中也，旦日中暮常咽液三九過，急以左手第二第三指按之三九下，急按爲痛按，非急速之急也。按了密呪曰：

開通天庭，使我長生，徹視萬里，魂魄反嬰，滅鬼却魔，來致千靈，上昇太上，與日合并，得補真人，列象玄名，一日三遍，行之此法，常爲人致靈徹視，杜遏萬邪之道也。

明耳目訣

真誥曰，求道之要，先令耳聰目明，爲事主也，且耳目是尋真之梯級，綜靈之門戶，得失繫之，而立存亡須之而辯也，今抄經相示，可施用也。

道曰，常以手按兩眉後小穴中三九過，又以手心及指摩兩目額上，以手

旋耳行三十過，唯令數無時節也，畢輒以手逆乘額三九過，從眉中爲始，乃入髮際中，口嚙液，多少無數也，如此常行，耳目聰明，二年可夜書，眉後小穴爲上元六合之府，主化生眼暉，和瑩精光，長珠徹瞳，保鍊目神，是真人坐起之上道也，一名曰真人，常居內經，真諺曰子欲夜書，常修起居，真人所以能旁觀四達，使人遐照朗者，實常居之數明也。

青牛道士存日月訣

青牛道士口訣曰，暮卧時存日，在額上，月在臍上，辟千鬼萬邪，致玉童玉女來降萬禍，伏走祕驗。青牛道士即封君達也。出《神仙傳》《五嶽序》。

沈義口訣曰，服神藥勿向北方，大忌也，亥子日不可睡正北方，亡精失氣，減損年命，藥力如土，深可忌之。

樂巴口訣

行經山野及諸靈廟惡神祠宇，存口中有真人，字赤靈丈人，侍以玉女二人，一女名華正，一女名攝精，丈人著赤羅袍，玉女二人，上下黃衣，所存畢，

乃叱咤曰，廟中鬼神速來，使百邪詣赤靈丈人，受斬死衆邪，却走千里，此是三天前驅使者捕鬼之法也。

服食忌并治病法

女仙程偉妻口訣曰，勿食血物，食血物使不得去三尸，乾肉猶可耳。

鳳剛口訣曰，道士有疾當閉目內視，心使生火，以燒身及疾處，存之使精，如髣髴病即愈，於痛處存，加其火祕驗。出《神仙傳》。

序元氣

真人曰，服胎息內氣者，長生之術也。陰符曰，人無術，命不長。又曰經冬之草，覆之即不傷，故知攝生之道，莫過乎元氣，所以禽蟲蟄藏，不食而全者，蓋息得其氣也，天生萬物，唯人最靈，百穀所以飴焉，元氣所以播焉，人能將正性而合元氣，少思寡欲，去智離形，然後可以示之熊經鳥申，龜息鶴舞，非其人切祕之，故序其法，列之於後。

服氣訣

凡服氣先偃卧閉口鼓頤腹，令氣

滿口即嚙，嚙時作意蹙向後吞之，如食入喉，喉有三道：一道氣從藏中出，至

口微出鼻，令滿口，於其出息蹙斷便嚙，嚙分爲二道，津液存入兩腎，氣存入腸胃也，若上熱下冷，即先服暖氣，若下熱上冷，即先服冷氣。暖氣者從五藏中出，鼓於口，久令氣在口暖極熱，嚙此謂暖氣也。若氣液滿於口便蹙嚙下者，此名爲冷氣也，亦云秋冬宜服暖氣。春夏宜服冷氣，亦云於人體自候臟腑冷熱而服也，初則仰卧得便之後，無問行住坐卧並得也，鼓氣之時，牙齒須開嚙時，牙齒須閉，令相著，若不相著，嚙液及氣不入，久服之後合口，即氣自然下入腸胃，嚙亦不費功夫，若不得法，元氣不下，所覺嚙入者，但少津液，若蹙氣時，合牙齒相著，復不須起顛，口中既不開通氣反從鼻出，雖嚙無益，須精審之。

凡服氣候五更，食消盡則服之，至食時乃忘饑忘饑得力，得力之後覺饑則服氣，腹中或鳴，若腹中氣相續則不鳴，若腹中空氣入，即鳴亦無苦也，服

氣得力，則決定勿食。不斷食亦隨人所樂也。

凡服日月精華者，即須皆早朝，及夜半生氣時，仍須天氣清明，只如內氣但覺腹空，即服，不限時節，及行住坐卧也，亦不論日服幾度也，初服氣至一七日，或五日有三兩行痢，痢中或沫無沫，小便赤色亦不須怪，其中初服以臍下澁悶，不須疑怪，悶時熾和香於靜室，暫絕人喧，寬衣帶從容，四體仰卧，小小閉氣，想氣從五藏中對兩腎下貼著脊有二穴，氣色白分爲二道，從穴夾脊上至頭，想氣至髮，熠熠良久，想氣迴至面下入五藏，又下至三星，三星人陰也然後下至脚湧泉了，即以兩手心摩腹三二十轉，及臍下百轉了，從容四大，卧少時自然舒暢，向來之悶都除也，洞微昔受訣於師，其用心之中，更自調適，無不效也，人之使手，不如使意，意者與氣合一，意之所至，氣無不應，洞微少小多疾，或淋或瘡，勞病之候至，多自得氣術，疾都覺愈，七日已前少有變動，如前說十日已後勤爲自然通流，

方得安穩，亦須時時量事一兩服，導引服氣，常莫使欠，似不相續，即服之，服多或時噫氣下泄，亦非異事耳。

凡服氣後至七日，或二七日，或久遠逢食，及酒並喫無妨，酒不得過度亂正氣，若食飽不須服氣，食盡則服，若不解服氣，唯學存思，及以藥絕穀，則未能久免，饑渴後忽食便死，所以然者，腸胃乾澁及九竅不通，所以至死，若服氣之人，食無妨者，以腹中腸胃先開，故能受食，如渴飲湯水，用津液潤之，並得取津液以舌拄上齶，及舌下左右轉，則津液悉集，凡服氣之人，先須內無攀緣，心與道契，然後服之，諸病易愈，如覺四體不調，存想病處，以氣攻之即愈，道成之後，永無疾病，日覺輕健，可涉遠行，如經歷腥穢葷辛之處，雖不耐亦無損，能閉坐焚香，清淨避外穢尤佳，若以氣斷穀，見食心欲者，此乃執心不一，以致猶豫，如一向決定唯服元氣，爲事久後見食，亦無欲相。

凡服氣道成，亦勝用藥絕穀，畢竟

體虛，服氣至妙，久竟湯酒之類，亦自不須大小便並絕，若志士有公務，未能專一在道，服元和正氣，餘暇每一二時服三五十嚙，令腹中常有元氣在氣海中，忽有疾，須用導引引出攻疾，立效自驗可知。

凡服氣雖服內氣，亦須外氣，外氣者日月之精華也，早朝室中服青氣也，黃庭云日月之光救老殘，此之謂也。

服元氣者非用時節，不論朝暮，得服則服，日月精華者，候天氣晴和，日初出一丈已上高，並可服，向日拱手四揖，閉目存日中一道，光芒紫色，如線來至鼻口，想令滿口中赤光色，嚙三九，嚙止，又四揖，若唯只服內氣不佳，能兼服生氣，生氣者則此也，生氣既服，與元氣合一也，攻病速愈，若唯服內氣，攻病者稍遲差也，若然兼日月精華，久服令人身靈，及有光彩也，閉氣攻病，易行而速愈，其法於靜室中正卧，有和香即燒尤佳無亦得也，寬衣帶、放身縱體，握固，徐徐長吐，細氣出口兩三度，以鼻引氣入口，密閉口，用心念所患

處，如漏漏相續，注之滿十，又從一起，如是十十為百，小縮氣，若身彊無力，還閉目吐細氣，五息然後起。

夫閉氣攻病，令體中極熱，汗出通流，即差都無患者，但放氣通行，開其關節肢體，皮毛孔中悉令氣出，如似煙霧，或似甌中氣也，久久自見，若頭中有疾，以手捻塞鼻孔，以氣攻之即愈，但知人服內元氣，不知服生氣，生氣者日月精華，及早朝東青氣也，故元氣在脾中，藉生氣以相生也。

導引法

凡覺身體昏沈不通暢，即導引十九法：

第一兩手更相扭揆，如洗手狀。第二兩手淺叉翻覆向胸。第三兩手相捉，共按脛上左右同。第四兩手相叉，又重按左右脛，徐徐拔身左右同。第五如挽一石弓，餘力左右同。第六作拳向前築，左右同。第七如拓千斤之石，左右同。第八以拳却頓，此名開胸，左右同。第九大坐斜身偏倚，如排山，左右同。第十兩手抱頭，宛轉腦

上，此名開脅，左右同。第十一兩手據地，縮身曲脊，向上三舉之。第十二兩手反槌背上，左右同。第十三大坐伸脚，用手相叉反掣。第十四兩手據地，左右顧盼，此名虎視左右。第十五立地反拗，身向後三舉之。第十六兩手急相叉，以脚踏手中左右搖，左右脚更為之。第十七起立，以脚前後踏，左右同。第十八正坐伸脚當心，兩手勾脚，上著膝上，以手按左右。第十九手直上指天，直下指地，左右同。

右十九勢每日為之，補益延年無病，若不能盡為之，於中取好者常效一兩般，則血液通流無病，當為之時勿當風，仍須閉氣，每一服了，須吐故氣，不令耳聞也。

察候四大

四大和調生之徒，不調病之徒，當以唇口察之，冷為風增，熱為火增，澁為地增，滑為水增，聲為風增，動為喘增，痒為氣增，不聲不喘為調和，或從外起，或從內起，由寒熱勞逸飽實饑虛為外起，由名利喜怒聲色思營為內起，

宜以口吐氣，以鼻納氣，其吐納不急不速，自然綿綿而已，其出氣有六種，所療各異。

若冷以吹吐之，若熱以呵吐之，若風痛以嘻吐之，若上氣以呼吐之，若痰稍滿以噓吐之，若熱勞倦以呬吐之。

心藏中病，若冷則吹氣，若熱則呼氣出之，候夜夢見赤衣人，持刀杖或持火來怖人也。

肺藏病，遍身胸臆四肢煩疼，宜噓氣出之，候夢見美男女詐來親附，或云兄弟妻子也。

肝藏病者憂愁不樂，悲思嗔喜，頭目煩疼，宜呼氣出之，候夢見青衣人，持青刀杖來怖人，或作獅子虎狼，種種怖人也。

脾藏病，面上遊風，習習遍身，痒悶疼痛，宜嘻氣出之，候夢見小兒擊礫惱人，擲物打人，或作旋風繞人也。

腎藏病，咽喉駐塞，腹滿耳聾，宜呬氣出之，候夢見有物黧黯無頭面，噎覆人也。

右諸所攝養，皆須調和氣息，每以人

定靜時，寬衣大坐，背倚軟物，緩衣解帶，放縱身體，應念性情，平等死生，無二欲，使心平，心平則氣調，無損，故曰能不以生為生者，是乃真於養生也。

察候形色

夫置鏡者，所以自鑒形色也，形色若變，則退居靜室，治黃庭經，集身神，拘三魂，制七魄，步七元，服元氣也。夫人形之所存者氣也，氣之所依者形也，氣全則形全，氣竭則形斃，鍊形保氣，可以保其生也，未有有形而無氣也，未有有氣而無形也，形之與氣，相須而成，豈非自然乎。

凡人赤欲如帛裹朱，不欲如赭。白欲如鵝羽，不欲如鹽。黃欲如羅裏雄黃，不欲如黃土。黑欲如重漆色，不欲如地。蒼青欲如蒼璧之澤，不欲如藍。

凡青色如草滋，黑如灸，黃如枳實，赤如衄血，白如枯骨，此五者並為死人之狀也。若青如翠羽，黑如鳥羽，赤如雞冠，黃如蟹腹，白如豚膏，此五

者並為生人之狀也。病人易差，可醫也，凡病人兩目黃色，起者立愈，病人面目俱赤者愈，病人面赤目青者死，面黑目青者不死，面黑目赤者不死，病人兩頰顴赤團而不散者死，病人及健人色變如馬肝，望之如青，近之如黑者死。病人口如不能開，而氣出者死。病人足腫，兩膝頭大如斗者死。病人妄語錯亂者死，熱病不死。病人背青，人中反者死。病人面黃目青者死。病人面青，目無精光，齒黑者死。髮乾如麻，耳聾者死。病人絕不言喉中作聲者死。舌卷縮者死。髮直多怒者死，鬚眉衝起者死。面白目白者死。面青唇黑者死。陰囊腫者死。又目匡陷者死。

病人有五絕，肝絕者目直視而脫光，目無所見；心絕者不欲見人，言語錯亂，舌卷不能言；脾絕者食肉脞，破鼻虛張，而唇寒；肺絕者面白而聲嘶，皮急毛焦鼻柱開；腎絕者髮直耳焦，無所聞也。

五藏相乘

肝病皮黑目白，肺之乘肝，死於秋日入時。心病目黑舌黑，腎之乘心，死於冬夜半時。脾病唇青，肝之乘脾，死於春平旦時。肺病兩頰顴赤目腫，心之乘肺，死於夏日午時。腎病面腫唇黃，脾之乘腎，死於四季月午後時。

察候日肝絕者目脫光無所見，八日死。心絕者一日死。汗出如珠，滯而不流，一日死。脾絕者食肉脬破唇寒，十二日死。肺絕者失聲三日死。腎絕者耳焦髮直，無所聞，四日死。

行禁治病

夫道法救人疾厄，至於察候，不可不知。欲行禁治病，預令病人家早期天氣晴和，盛潔室宇，絕喧靜寂，道士到病人邊焚香，子細察病人神氣，若形候惡不堪治，亦須爲存神行氣加治，下三下印。至日中又往察神氣微變吉否，若未迴，又須一下禁。夜間又須候變否，若未變又須下禁。至明日早朝，往候神色不變，此命盡不可治也。

夫治病且須輕財，道有拯救之心，

神靈必祐，真氣必應，若動則心冀於財，無拯救之心，所行無效，禍反剋身，道法符禁，救人疾苦，須頻令道士講論三十六部尊經，敷揚玄聖符禁等法，並量性分習學洞微，今謹依正一神仙三五祕訣，修行符禁之術，具列如後，十二辰三五大會顯幽冥，禁訣者，道家呪術妙法多端，萬流淵隱，難悉兼通，若拯救危命，莫先於印，昔範蠡行之，乃使山嶽崩頽，河海遏流，神威所懾，雷霆戢響，可以鑠金磨玉，還氣復魂，況於療病者乎，但凡夫淺蔽玄術，難精所以，今世修人，多有不效，良由學不研審，或心不專至也，李道化曰，余不以疏惰，少習此法，印之難明，在於存思，若能精其呼吸，明其度數，則存思了然，神明備矣，爾乃冠蓋帶五神，步乾元亨利貞，必能爾者罕有不愈也，今聊將管識略圖其次序以示同學，未能窮其要契者也。

七行氣法，先須噴水解穢，左手執水碗，右手執劍，劍水相向，背建向破存面前，有一真官朱衣，身長一丈九

尺，頭戴籙中九鳳冠，口含水向前噴病人，室宇煥赫如朝霞，了以劍水相向，存七星斗在我頭上，罡在水碗中，呪曰謹請北斗七星之精降此水中，百殄之鬼速去萬里，不去斬死，付西方白童子，急急如律令。五方各噴，次噴病人，行印去病人一丈，左手捻都監目，右手執印，當心向王立，第一先存我神，頭戴天，足拄地，五色雲氣，覆我身。第二思五星在頭上，各在方位，去頭一尺。第三存面前，左日右月，去面九寸。第四存頭上朱雀，左青龍，右白虎，足下八卦，神龜行印，玉童玉女侍衛左右。第五存思五色真氣，大如絲，從五藏中出口，去頭高一丈八尺，迴繞頭三匝。次思肝中三人，青衣青幘，出立左心中，三人赤衣赤幘立前。肺中三人，白衣白幘立右。腎中三人，黑衣黑幘，立後。脾中三人，黃衣黃幘，在丙地立，並左手持劍鑲，右手持鉞斧，次存見我頭上七星罡頭，指病人痛處，次存向來，頭戴九鳳冠，真官乘太陽赤氣，禹步持印，印病人心一下，次印腹


一下，次印痛處一下，想見毒氣奔散而出了，然次存我身極閉氣，禹步九跡，到病人所立，未印先口吸病人，三吸三咤三叱，次鳴天鐘六下，叩天磬六下，召則用鐘，伏則用磬，次呪印曰：

天帝神印，印山成湖，印石成塗，印樹樹枯，印地地裂，印木木折，印火火滅，印水水絕，印上徹下，印表徹裏，印前徹後，印左徹右，印邪邪亡，印痛痛止，印病病散，印鬼鬼走，破除癥結，流殃咎注，急自走去，正神安汝處，急急如太上老君律令，便下印須閉氣良久，了然後舉印退後，又祝曰：

男女生某乙，年若干歲，某月日時生，今身患某疾病，請臣救治，臣謹上請三部大將軍，行印將軍，治病將軍，破邪將軍，收魔將軍，並請隨印治病，救某人身中疾病，急急出叱，吾今以黃神越章之印，印心從心出，印腹從腹出，印肝從肝出，印肺從肺出，印腎從腎出，印脾從脾出，印頭從頭出，印背從背出，印胸從胸出，印腰從腰出，印手從手出，印足從足出，速出速出，急急

如律令。印下又誦一遍，然後舉印，又把印當心，呪曰：

南方之鬼，北方之鬼，東方之鬼，西方之鬼，中央之鬼，天鬼、地鬼、神鬼、男鬼、女鬼，沈尸毒注之鬼，當印者死，值印者亡，速出速出，下印又誦兩遍，然後舉印印，令病人吞三二道符，男服三符女服二符。夫行禁治病存想，皆存十方真氣，行禁欲行，先約束病人三日斷五辛，十二辰肉，但一切蟹肉酒魚腥之屬，並禁唯通些些乾鹿脯，能如此方可為下印，若不能如此，反損無益，用印了以香湯浴印，用新帛乾拭入匣中盛之。



此印不得將入喪家，產婦家，及血腥六畜胎乳穢穢之處，並不得將往也，若卒有夜夢驚怖，音聲震響，動不如常者，即起大呼曰：

宅中七神司命竈君，何以令非常

之鬼干犯黃帝子孫，收捕之付獄吏治罪，言訖，將印掛戶上，還卧須臾，自聞鞭罰之聲，若人卒中蜚惡尸鬼疰，悶絕不止，心痛印心上立止，若人鬼語不止，印之如法即止，若人路行或入山野，過江渡湖，或見狼虎熊羆之屬，及侵害六畜，以印印其跡，虎走三十里乃止，逆印即來趣人，若水中蛟龍魚龜蟲獸蛇毒之類害人者，以淨黃土為泥，印封之投入水中，即死，若奴婢逃走，即印其跡則還，若人卒中惡氣，或死不知者，或行肢體中如錐刀刺者，以印閉氣，按其痛上及心上，呪曰邪氣去正氣住。

正一法文修真旨要

(錢安靖點校)

025 正一法文十籙召儀

經名：正一法文十籙召儀。撰人不詳，約出於南北朝。係早期天師道經典《正一法文》殘本之一。一卷。底本出處：《正統道藏》正一部。

- 一元命赤籙召
- 二青甲籙仙官召
- 三青甲籙靈官召
- 四赤甲籙仙官召
- 五赤甲籙靈官召
- 六武甲籙仙官召
- 七武甲籙靈官召
- 八文甲籙仙官召
- 九文甲籙靈官召
- 十聖真神籙召
- 十一黃圖中綱籙召
- 十二兼官籙召

十三男女上仙九十部將軍籙召
十四男女上仙九十部將軍籙召

子生，玄元始炁君召。

丑生，太始元炁君召。

寅生，太玄始炁君召。

卯生，太清玄炁君召。

辰生，太玄上一炁君召。

巳生，太元真炁君召。

午生，太陽上元炁君召。

未生，元陽始炁君召。

申生，玄陰陰炁君召。

酉生，玄一上炁君召。

戌生，太玄元三炁君召。

亥生，元一生炁君召。

右元命赤籙召。

甲子乙丑丙寅丁卯戊辰生，清微天太

清太陽君召。

己巳庚午辛未壬申癸酉生，清微天太

清太陽君召。

甲寅乙卯丙辰丁巳戊午生，清微天太

清通陽君召。

己未庚申辛酉壬戌癸亥生，清微天太

玄微陽君召。

甲辰乙巳丙午丁未戊申生，禹餘天太

玄微陽君召。

己酉庚戌辛亥壬子癸丑生，禹餘天太

玄通陽君召。

甲午乙未丙申丁酉戊戌生，禹餘天太

元太陰君召。

己亥庚子辛丑壬寅癸卯生，禹餘天太

元太陰君召。

甲申乙酉丙戌丁亥戊子生，太赤天太

元通陰君召。

己丑庚寅辛卯壬辰癸巳生，太赤天太

始微陰君召。

甲戌乙亥丙子丁丑戊寅生，太赤天太

始微陰君召。

己卯庚辰辛巳壬午癸未生，太赤天太

始逆陰君召。

右青甲籙仙官召。

寅卯辰生，言被上三天無極大道太上，

東方玄武歲星青帝勾芒，神仙海童河

歸九夷重華君召。女云玄光君召。

巳午未生，言被上三天無極大道太上，

南極熒惑太陰，神仙海童炎帝太昊君

召。女云玄光君召。

申酉戌生，言被上三天無極大道太上，西上太白子留金城君白帝少昊，神仙玉童玄華君召。女云玄光君召。

亥子丑生，言被上三天無極大道太上，北極晨星北斗太陰黑帝，顓頊，神仙玉童禹強君召。女云玄光君召。

不知生年，言被上三天無極大道太上中玄三天都錄司命文昌君召。女云玄光君召。

右青甲錄靈官召。

子生，北大辰重明君召。

丑生，北大辰中黃化明君召。

寅生，東重華顯陽君召。

卯生，東重華耀陽君召。

辰生，東重華中黃明化君召。

巳生，南大熒惑陽明君召。

午生，南大熒惑太陽耀光君召。

未生，南大熒惑中黃靈化君召。

申生，西太白子留金城耀陰君召。

酉生，西太白子留金城重陰炁君召。

戌生，西太白子留金城中黃化炁君召。

亥生，北大辰太陰耀輝君召。

右赤甲錄靈官召。

子生，左太玄中狄君召。

丑生，左元七寶玉理君召。

寅生，左玄道炁上夷君召。

卯生，左玄通明中夷君召。

辰生，中黃三秦始皇炁九元真君召。

巳生，左元洞明上蠻君召。

午生，右元大帝中蠻君召。

未生，中黃三秦太始君召。

申生，右驛道真上戎君召。

酉生，右太素中戎君召。

戌生，中秦五炁無原君召。

亥生，右始洞真上狄君召。

右赤甲錄靈官召。

正月生，被上夷將軍召。

二月生，被中夷將軍召。

三月生，被下夷將軍召。

四月生，被上蠻將軍召。

五月生，被中蠻將軍召。

六月生，被下蠻將軍召。

七月生，被上戎將軍召。

八月生，被中戎將軍召。

九月生，被下戎將軍召。

十月生，被上狄將軍召。

十一月生，被中狄將軍召。

十二月生，被下狄將軍召。

右武甲錄靈官召。

正月生，被太始將軍召。

二月生，被上始將軍召。

三月生，被中始將軍召。

四月生，被下始將軍召。

五月生，被太元將軍召。

六月生，被上元將軍召。

七月生，被中元將軍召。

八月生，被下元將軍召。

九月生，被太玄將軍召。

十月生，被上玄將軍召。

十一月，生被中玄將軍召。

十二月，生被下玄將軍召。

右武甲錄靈官用此召，以赤甲召配之。

正月生，被上夷五經君召。

二月生，被中夷五經君召。

三月生，被下夷五經君召。

四月生，被上蠻五經君召。

五月生，被中蠻五經君召。

六月生，被下蠻五經君召。
 七月生，被上戎五經君召。
 八月生，被中戎五經君召。
 九月生，被下戎五經君召。
 十月生，被上狄五經君召。
 十一月生，被中狄五經君召。
 十二月生，被下狄五經君召。

右文甲靈官召。

正月生，太始五經君召。
 二月生，上始五經君召。
 三月生，中始五經君召。
 四月生，下始五經君召。
 五月生，太元五經君召。
 六月生，上元五經君召。
 七月生，中元五經君召。
 八月生，下元五經君召。
 九月生，太玄五經君召。
 十月生，上玄五經君召。
 十一月生，中玄五經君召。
 十二月生，下玄五經君召。

右文甲仙官召，以赤甲召配之。

正月生，無下九老東上夷君召。
 二月生，無下九老東中夷君召。

三月生，無下九老東下夷君召。
 四月生，無下九老南上蠻君召。
 五月生，無下九老南中蠻君召。
 六月生，無下九老南下蠻君召。
 七月生，無下九老西上戎君召。
 八月生，無下九老西中戎君召。
 九月生，無下九老西下戎君召。
 十月生，無下九老北上狄君召。
 十一月生，無下九老北中狄君召。
 十二月生，無下九老北下狄君召。

右受聖真神錄，十二月生用此召。

被大頂神童歷炁君召

右受黃圖上仙都赤天中綱消災內

錄，都用此一召。

九月上旬生，太玄清微中耀君召。
 九月中旬生，中官左機平炁君召。
 九月下旬生，陽炁中神五化君召。
 十月上旬生，上玄玉機道炁君召。
 十月中旬生，中官玉成君召。
 十月下旬生，左官通神道炁君召。
 十一月上旬生，中官玄耀炁右官重光君召。
 十一月中旬生，左官通神昌紀君召。

十一月下旬生，右官通神寫炁君召。
 十二月上旬生，通玄微明化炁君召。
 十二月中旬生，通氣中神玉機君召。
 十二月下旬生，陽炁通炁君召。
 五月上旬生，太元中官微明歷炁君召。
 五月中旬生，中左官都平輔炁君召。
 五月下旬生，中官通陽炁君召。
 六月上旬生，上元左官歷炁君召。
 六月中旬生，中官陰仙道炁君召。
 六月下旬生，左歷炁執法君召。
 七月上旬生，中元右官歷炁君召。
 七月中旬生，都天執正攝炁君召。
 七月下旬生，陽官左歸君召。
 八月上旬生，下元重光耀機化炁君召。
 八月中旬生，中璣左執炁君召。
 八月下旬生，中官陽炁君召。
 正月上旬生，太始中辟萬導神炁君召。
 正月中旬生，中官中神玉明君召。
 正月下旬生，中官中神玉成君召。
 二月上旬生，上始始明中官君召。
 二月中旬生，左官昌明君召。
 二月下旬生，中官玉明導官君召。
 三月上旬生，中始始明導炁君召。

三月中旬生，右官通明君召。

三月下旬生，中官左機君召。

四月上旬生，下始始明導驛君召。

四月中旬生，中官五驛君召。

四月下旬生，中官陰理君召。

右上旬生取上行，中旬主取中行，下旬生取下行，不知生月者，取九月頭召也。

寅生太玄，午生太元，戌生太始。

卯生上玄，未生上元，亥生上始。

巳生下玄，酉生下元，丑生下始。

辰生中玄，申生中元，子生中始。

太玄欲受兼官，當以無下九炁九老東

大夷中官君對之。

上玄欲受兼官，當以無下九炁九老東

上夷左官君對之。

中玄欲受兼官，當以無下九炁九老東

中夷重靈君對之。

下玄欲受兼官，當以無下九炁九老東

下夷右官君對之。

太元欲受兼官，當以無下九炁九老西

大戎中官君對之。

上元欲受兼官，當以無下九炁九老西

上戎左官君對之。

中元欲受兼官，當以無下九炁九老西

中戎化炁神君對之。

下元欲受兼官，當以無下九炁九老西

下戎左官君對之。

太始欲受兼官，當以無下九炁九老南

大蠻中官君對之。

上始欲受兼官，當以無下九炁九老南

上蠻中陣君對之。

中始欲受兼官，當以無下九炁九老南

中蠻左化靈君對之。

下始欲受兼官，當以無下九炁九老南

下蠻右化靈君對之。

右受兼官用此召。

被大頂神童歷炁君召。亦參取百五十錄召

足之。

右受黃圖赤錄用此一召。

正月生，東上夷君召。

二月生，東中夷君召。

三月生，東下夷君召。

四月生，南上蠻君召。

五月生，南中蠻君召。

六月生，南下蠻君召。

七月生，西上戎君召。

八月生，西中戎君召。

九月生，西下戎君召。

十月生，北上狄君召。

十一月生，北中狄君召。

十二月生，北下狄君召。

右男女受上靈九十部將軍召。

正月生，右青帝君召。

二月生，左青帝君召。

三月生，中黃太元君召。

四月生，右赤帝君召。

五月生，左赤帝君召。

六月生，中黃上元君召。

七月生，右白帝君召。

八月生，左白帝君召。

九月生，中黃中元君召。

十月生，右黑帝君召。

十一月生，左黑帝君召。

十二月生，中黃下元君召。

右男女受上仙九十部將軍錄用此

召。

赤錄卷


某年某太歲某月朔某日子某州縣鄉里某位男女
大赤天 姓名年若干歲今詣某洞法師某人齋信奉受

太上赤錄若干階某要以七祖為盟今依法授受師
禹餘天 不得隱真出偽欺調弟子弟子不得違盟負約背叛

清微天 於師若師隱真出偽欺調弟子身謝天地水三官弟
子若違盟犯約背叛於師身披風刀萬劫不原上與

七祖同受不敢怨道答師今與某甲分金破券質誓

盟約對日月星辰為證一如太上真科玄都律令



盟約對日月星辰為證一如太上真科玄都律令

七祖同受不敢怨道答師今與某甲分金破券質誓盟

子若違盟犯約背叛於師身披風刀萬劫不原上與

於師若師隱真出偽欺調弟子身謝天地水三官弟

不得隱真出偽欺調弟子弟子不得違盟負約背叛

太上赤錄若干階某要以七祖為盟今依法授受師

禹餘天 姓名年若干歲今詣某洞法師某人齋信奉受

太赤天 某年某太歲某月朔某日子某州縣鄉里某位男女

右赤錄大壇施簡盟

先度太歲前簡

太歲在某子，隨太歲所在書之，如其神姓名鄉
里從官，仍安簡置所書簡左邊。

次度今月，次度今日，次度今時，次
度本命，次度行年，次度五方聖人，
次度五方將軍，次度五方三炁，次十

二父母，次二十四神人，次二十四賢
者。

六甲六十真諱訣

東方聖人名頭崔，字劉公，九人長
九寸，青幘衣，青衣裳，治在肝中，元方
渠之炁，屬絳臺宮，陰生府，青陽鄉，丹
陰里，姓銜玄。

南方聖人名高崔，字劉英，八人長
八寸，赤幘衣，赤衣裳，治在心中，元太
清之炁，屬蘭臺宮，司空府，太清鄉，玄
冥里，姓即默。

中央聖人名黃寫，字麻黃，三人長
三寸，黃幘衣，黃衣裳，治在脾中，元九
規之炁，屬中黃宮，長命府，無極鄉，圭
明里，姓神甕。

西方聖人名胡汝，字劉度，六人長
六寸，白幘衣，素紬單衣，治在肺中，元
八綱之炁，屬綠房宮，司命府，黃庭鄉，
長樂里，姓玄纛。

北方聖人名朱角，字劉起，五人長
五寸，黑幘衣，玄衣裳，治在兩腎中，元
中元之炁，屬黃賞宮，黃乾府，太初鄉，
虛無里，姓班氏。

東方將軍姓唐名臣，治在肝，屬黃
臺宮，無形府，天紫鄉，神和里。

南方將軍姓朱名丹，治在心，屬五
城宮，定生府，神武鄉，天生里。
中央將軍姓黃名忠，治在脾，屬丹
田宮，樂陽府，玄黃鄉，真告里。

西方將軍姓鄒名尚，治在肺，屬紫
臺宮，太清府，元元鄉，神成里。
北方將軍姓石名玄，治在腎，屬幽
闕宮，天篤府，金堂鄉，交山里。

東方三炁君姓顏名立，字順遷，止
平宮，好生府，司命鄉，陰丹里。
南方三炁君姓過名奉，字敬鄉，澆
蕩宮，昊陽府，玄生鄉，中金里。

中央三炁君姓陽名次，字玄都，紫
極宮，四鎮府，九炁鄉，太一里。
西方三炁君姓趙名鍾，字子照，正
陽宮，白童府，左玉鄉，三魂里。

北方三炁君姓葛名賢，字照明，混
成宮，朱凝府，玄金鄉，崑崙里。
甲寅明文章，通父八十一，長七
寸，青色神明君，姓嬴名釋字玄明，從
官十六人，治在紫宮，長樂鄉，蓬萊里。

甲申扈文長道母闔禮尤切，長七寸，白色神明君，姓嬴名恒字元龍，從官十六人，治在華蓋宮，太清鄉，東明里。

甲子王文卿師父康，長九寸，黑色神明君，姓嬴名鏡，字昌明，從官十八人，治在腎，絳宮鄉中元里。

甲午衛上卿師母姐乃丑切，長九寸，赤色神明君，姓嬴名嵩字始丘，從官十八人，治在腎絳宮，太初鄉，苞元里。

乙亥龐明心神父橐託音，長四寸，其色黑神明君，姓姬名弈字玄成，從官十二人，治在腎宮，清水鄉，含命里。

乙巳唐文卿神母閻，長四寸，色赤神明君，姓姬名靈字初風，從官十二人，治在絳宮，清凌鄉，丹丘里。

乙卯戴公陽真父契，長六寸，青色神明君，姓姬名權，字虛玄，從官十四人，治在紫宮，丹陽鄉，丹陰里。

乙酉孔利公真母嫫慈律切，長六寸，白色神明君，姓姬名衡字元，從官十四人，治在華蓋宮，青陽鄉，黃庭里。

甲辰孟非卿天父杵，長五寸，黃色神明君，姓嬴名貢字初元，從官十四

人，治在脾宮，雲降鄉，炎昊里。

甲戌展子江天母姓知御切，長五寸，色黃神明君，姓嬴名統字玄昇，從官十四人，治在明堂宮，北極鄉，玄武里。

乙丑龍季卿聖父拿，長八寸，黃色神明君，姓姬名瑛字昌精，從官十六人，治在明堂宮，紫微鄉，三相里。

乙未杜仲陽聖母嫫從鳩切，長八寸，黃色神明君，姓姬名宮字始臺，從官十六人，治在明堂宮，原混鄉，混沌里。

右十二真父母，六甲六乙主之。丙寅張仲卿腦神，道元道字道都，神名靈，長一寸一分，色白如雪，神明君姓倉名嚮字昌隆，從官十四人，從官各千乘萬騎，治在泥丸宮，天淵鄉紫生里。

丙申朱伯衆，左無上道父道道字道衡，神名閻方羅切，長二寸二分，色如白雪，神明君姓崧名鍾字始麟，從官十四人，從官各千乘萬騎，治在太清左嶽宮，三生鄉，自生里。

丙子邢孫卿，右大道仲道，道字道連，神名橐證嗟切，長一寸五分，其色黃，

神明君姓孫名瑀字玄龍，從官十六人，從官各千乘萬騎，治在太清右嶽宮，長存鄉，萬全里。

丙午魏文公，兩目神清，道寧道道字道童，神名闕紫離切，長三寸一分五色衣，兩目各一人，神明君姓須名居字初言，從官十六人，從官各千乘萬騎，治在洞房下宮，神童鄉，明鏡里。

丁亥張文通，須髓神，髓道蓋道，道字道周，神名闕落惟切，長五寸三分，色純白如絹，神明君姓禹名素字元足，從官十人，從官各千乘萬騎，治在玄元天下宮，神水鄉，元明里。

丁巳崔巨卿，髓神，髓道益道，字道柱，神名闕東夫切，長六寸五分，純白如玉，神明君姓崔名理字虛無，從官十人，從官各千乘萬騎，治太清上宮，天命鄉，元氣里。

丁卯司馬卿，鼻口神，鼻道玉道，道字道微，神名韋並皮切，長二寸五分，青白黃三色，神明君姓蘭名嚮字昌遵，從官十二人，從官各千乘萬騎，治在洞房宮，法天鄉，神道里。

丁酉臧文公，舌中神，舌道始齒道，字道岐，神名闐星梵切，長七寸，神其色，赤神明君姓林名颯字始瑛，從官十人，從官各千乘萬騎，治在太清口喉宮，太上鄉，下智里。

丙辰霍叔英，喉中神，喉道伯道，道字道通，神名闐飴平切，長八寸，其色純白，神明君姓文名志字靈靜，從官十人，從官各千乘萬騎，治在崑崙下宮，定庭鄉，長保里。

丙戌車元升，腓神，腓道靈道，道字道平，神名闐公肅切，長八寸一分，其色純白，神明君姓臨名叵字元通，從官十一人，從官各千乘萬騎，治在華蓋宮，神龜鄉，中升里。

丁丑趙子玉，心神，心道陽道，道字道明，神名闐同勃切，長九寸，朱陽之幘，絳章單衣，其色似有大日之光，神明君姓昊名櫨字玄聲，從官十四人，從官各千乘萬騎，治在絳宮天寶鄉，司錄里。

丁未石叔通，肝神、肝道君道，道字道清，神名闐公富切，長六寸，純衣青

衣青幘，神明君姓魯名聲字初烝，從官十四人，從官各千乘萬騎，治在玄妙宮，撥生鄉，長命里。

戊寅虞子張，膽神，膽道德道，道字道放，神名闐形樓切，長三寸六分，其色如青如黃如綠，神明君姓豐名鏗字玄生，從官十二人，從官各千乘萬騎，治在長命玄宮，大炎鄉，含宿里。

戊申范伯陽，左腎神，腎道春道，道字道鄉，神名闐乎梵切，長二寸七分，玄冠幘被服純黑，神明君姓言名重字初恭，從官十二人，從官各千乘萬騎，治在玉堂宮，五星鄉，轉宿里。

戊子樂石陽，右腎神，腎道真道，道字道主，神名橐通勃切，長三寸五分，色帶白黑，神明君姓袁名壽字元陽從官十四人，從官各千乘萬騎，治在倉龍宮，太陰鄉，三童里。

戊午從元光，脾神，脾道寶道，道字道騫，神名孃定走切，長七寸二分，色如金精，狀如黃金，神明君姓木名龍字虛連，從官十四人，從官各千乘萬騎，治在太倉上宮，丹朱鄉，純精里。

己亥鄧都卿，胃神，胃道來道，道字道展，神名闐究總切，長七寸，其色純黃，神明君姓釋名珪字始翺，從官十三人，從官各千乘萬騎，治在丹田宮，炎火鄉，清明里。

己巳何文昌，窮腸神，焦道康道，道字道還，神名孃總卑切，長二寸四分，其色黃赤，神明君姓牋名臺字昌倫，從官十三人，從官各千乘萬騎，治在玄谷宮，中真鄉，彖像里。

己卯石文陽，大小腸神，進送道字道厨，神名闐奴圍切，長二寸一分，其色赤，神明君姓兒名濯字玄盛，從官十五人，從官各千乘萬騎，治在明房宮，枚靈鄉，遊樂里。

己酉成文長，髓中神，髓道厚道，道字道靈，神名納膿勃切，長九寸一分，其色白，四雜糅，神明君姓霍名令字初仁，從官十五人，從官各千乘萬騎，治在洞房宮，長行鄉，往來里。

戊辰李楚卿，胸膈神，膈道英道，道字道冲，神名闐並夭切，長五寸，其色白，神明君姓恒名曇字昌頽，從官十人，從

官各千乘萬騎，治在絳彭宮，合和鄉，恬甘里。

戊戌范少卿，兩脅神，辟道馬道，道字道成，神名姪芒高切，長四寸一分，色赤相雜糅，神明君姓真棘字始囊，從官十人，從官各千乘萬騎，治在華蓋彭宮，長生鄉，延壽里。

己丑范仲陽，左卯神，卯道起道，道字道生，神名婁膿彼切，長二寸三分，色黃白，神明君姓陽名聿字元憚，從官十七人，從官各千乘萬騎，治在玄泉宮，升仙鄉，度命里。

己未時通卿右卯，袁道明道，道字生，神名姦膿霑切，長七寸三分，青黃白三色，神明君姓武名赫字虛胃，從官十七人，從官各千乘萬騎，治在太清下宮，天中鄉，丹黃里。

右二十四神人，六丙六丁六戊六己主之。

庚寅楮進卿，大道賢者，神名闕，長二寸七分，色如白雪，神明君姓雷名訪字元精，從官十五人，從官各千乘萬騎，治在左嶽宮，天義鄉，淵明里。

庚申華文陽，清道賢者，神名嫫，長一寸一分，其色純白如雪，神明君姓鼻名充字虛正，從官十五人，從官各千乘萬騎，治在泥丸宮，天井鄉，昌明里。

庚子陽仲叔，玄道賢者，神名闕公勃切，長三寸一分，五色衣，兩目各一人，神明君姓端名稱字治沖，從官十七人，從官各千乘萬騎，治在無高洞房下宮，圭成鄉，雲明里。

庚午馮仲卿，元道賢者，神名闕，許丹切，長一寸五分，其色純黃，神明君姓梁名曾字昌昊，從官十七人，從官各千乘萬騎，治在右嶽宮，圭英鄉，神明里。

辛亥左子行，初道賢者，神名杆通發切，長六寸，其色白如雪，神明君姓蘆名生字初封，從官十一人，從官各千乘萬騎，治在太清上宮，圭盈鄉，生明里。

辛巳陽仲公，始道賢者，神名闕，長五寸三分，色純白如練，神明君姓鼻名龔字玄流，從官十一人，從官各千乘萬騎，治在玄元下宮，圭生鄉，成明里。

辛卯郭子良，正道賢者，神名梓容過切，長七寸，其色赤，神明君姓藥名憐

字元明，從官十三人，從官各千乘萬騎，治在太清口喉宮，存命鄉，明星里。

辛酉邴元玉，明道賢者，神名闕形叛切，長二寸五分，青白黃三色，神明君姓岑名崔字虛意，從官十三人，從官各千乘萬騎，治在洞房丹田宮，命生鄉，存明里。

庚辰尹佳卿，昌道賢者，神名闕高洞切，長八寸一分，其色正白，神明君姓祖名晃字玄明，從官十三人，從官各千乘萬騎，治在華金宮，延年鄉，水明里。

庚戌史子仁，光道賢者，神名姤停元切，長八寸一分，其色正白，神明君姓賈名及字初仁，從官十三人，從官各千乘萬騎，治在崑崙下宮，正平鄉，夷明里。

辛丑林衛卿，虛道賢者，神名闕膿音，長六寸，純衣青衣幘，神明君姓常名戴字始公，從官十五人，從官各千乘萬騎，治在玄妙宮，金堂鄉，上明里。

辛未王文章，詳道賢者，神名媼肯俱切，長九寸，其色似有火日之光，神明君姓皇名琅字昌宣，從官十五人，從官

各千乘萬騎，治在絳宮，青仁鄉，憇明里。

壬寅丘孟卿，皇道賢者，神名晝洪本切，長三寸七分，玄冠幘，被服純黑，神明君姓宣名齊字始平，從官十三人，從官各千乘萬騎，治在玉堂宮，天陽鄉，臺明里。

壬申侯博卿，鮮道賢者，名闔誅方切，長三寸六分，其色如青如黃如綠，神明君姓童名瑞字昌榮，從官十三人，從官各千乘萬騎，治在長命宮，玄陰鄉，玄明里。

壬子宿上卿，綜道賢者，神名橫姑猛切，長七寸三分，色如金精，狀如黃金，神名君姓元名達字初延，從官十五人，從官各千乘萬騎，治在太倉上宮，精凝鄉，丹明里。

壬午馬子明，方道賢者，神名闔同博切，長三寸五分，色或白赤，神明君姓項名鏘字玄鎗，從官十五人，從官各千乘萬騎，治在倉龍宮，威陽鄉，黃明里。

癸亥左石松，景道賢者，神名闔來手切，長二寸四分，黃赤色，神明君姓籛

名青字虛公，從官九人，從官各千乘萬騎，治在玄谷宮，還本鄉，月明里。

癸巳史公來，隆道賢者，神名嫺亭府切，長七寸，其色純黃，神明君姓劉名輅字元風，從官九人，從官各千乘萬騎，治在太倉宮，以生鄉，昌明里。

癸卯蘇他家，顯道賢者，神名摠嫺音，長九寸一分，其色黃白相雜，神明君姓衛名猷字始言，從官十一人，從官各千乘萬騎，治在洞房宮，常保鄉，護明里。

癸酉孫仲房，耀道賢者，神名嫺胡佳切，長二寸一分，其色赤黃，神明君姓龍名鑄字昌元，從官十一人，從官各千乘萬騎，治在玄谷宮，冥靈鄉，天明里。

壬辰武稚卿，良道賢者，神名闔初誅切，長四寸一分，其色赤白相雜，神明君姓光名勢字元音，從官十一人，從官各千乘萬騎，治在華蓋彭宮，靈和鄉，陰明里。

壬戌樂進卿，晞道賢者，神名闔補鷄切，長五寸，色正白，神明君姓尤名大字虛分，從官十一人，從官各千乘萬

騎，治在絳彭宮，靈氣鄉，流明里。

癸丑江漢卿，觀道賢者，神名驥初奸切，長三寸三分，青黃白三色，神明君姓刀名璜字初進，從官十三人，從官各千乘萬騎，治在玄谷下宮，靈生鄉，暴明里。

癸未呂威明，極道賢者，神名闔以恒切，長二寸三分，青黃白三色，神明君姓龍名綜字玄都，從官十三人，從官各千乘萬騎，治在玄泉宮，楊道鄉，文明里。

右二十四賢者六庚六辛六壬六癸主之

正一法文十錄召儀

(錢安靖點校)

026 正一法文傳都功

版儀^①

經名：正一法文傳都功版儀。
撰人不詳，約出於南北朝。係早期天師道經典《正一法文》殘本之一。一卷。底本出處：《正統道藏》正一部。

天師曰：正一道士奉道有功，應補治職，隨功舉遷，不得叨妄，極於陽平，德業漸昇，教化逾博，奉佩符籙，晝夜勤修，驅役吏兵，拯救驗效，直心守法，終始匪逾，正念師尊，歲寒無替，而鬼神畏敬，人天信用，堪為化首，永世作師，可署都功，宜傳道要。

都功版文

某郡縣鄉里，正一弟子王甲，年若干歲，若在道即云某觀。宿命合道，玄名契真，稟性謙和，心通妙理，遂能幼勤道業，遐

暢玄風，教化有功，信誠無替，實人神共許，遠近咸聞，德濟群生，功高衆首，宜補陽平治門下大都功，即須親職，千日之後，世有忠良，可宣化者，自雲臺治以下任便補受，如法奉行。

某國號某年太歲，某月日，於某郡縣鄉里，觀中白版係天師如千世孫某乙。陸修靜曰：陽平治都功版，非天師之胤不受，所以云係天師若干世孫，異姓當言係天師王甲此師名。

右版用銀木，長九寸、廣五寸，分作七行，朱書，黃紋袋盛，與治籙同處。無銀木，槐梓亦得。

某郡縣鄉里，正一弟子王甲，年若干歲，墨辭，列稱積世奉道，枯骨子孫佩帶治籙，修行供養，相承不絕，至于今日，自蒙師真授道以來，晝夕勤勞，專心一意，實非怠慢，宣揚救度，亦無替闕，雖未能感徹幽明，而功效薄彰，退邇夙夜翹仰，唯在於法，願見成就，賜授都功，察某心迹，堪為師範，宜補天師門下大都功，板署厥職，自陽平治以下任意傳授後學賢良，如法施行。

某國號某年太歲，某月日，於某郡縣鄉里，觀中白板係天師若干世孫某乙，非天師子孫云某治某乙。

受都功辭文

某郡縣鄉里，正一弟子王甲，年若干歲，叩頭稽首，具乞恩辭，某入道多年，佩法已久，仰蒙師老賜授要言，修奉勤行，不敢虧替，敷揚道化，救濟男女，雖未廣周薄立，功效陽平已下，並預受持，思度後昆，流通道教，都功厥職，總統諸治，不參此版，便絕傳流，則後學求真，因循路斷，法在招引道貴圓通，恩惟法師賜見成就，謹辭。

某國號某年太歲，某月朔日子，王

甲稽首奉辭，詣

某姓法師門下刺側。

某郡縣鄉里王甲年若干歲

右據王甲墨辭及某洞男女官保舉，詣臣求受都功版署職，某既奉道勤誠，有心於法，請依科給授，謹狀。

白刺

今有某洞男女官保舉某郡縣鄉里

王甲，年若干歲，詣臣求受都功版署職，某既奉道勤誠，有心於法，請依科給受者

右具，所受如前，伏乞治中靈官，吏兵，考召，君吏，一合考正，某合法以不如未合法者，即為考正，要令合法，臣須特拜署，臣某誠惶誠恐，死罪死罪，稽首再拜，詣考召。

太歲某年某月朔日子，臣姓某，屬某州縣宮觀，今於某郡縣鄉里中白刺

四君

泰玄都正一平炁，係天師陽平治，臣某甲稽首，再拜

上言，謹按文書，某郡縣鄉里，王甲年若干歲，列狀詣臣求受都功版署，臣昨日子時白刺，今日今時當授，輒為拜章上聞，恩惟

太上三天門下奉行文書事，以時省理，原赦臣及甲千罪萬過，乞下二十四治治中君將吏兵士，及天地日月，山川河海，里域神靈真官，一時鑒知，某今日於臣處奉受

天師門下大都功版署，主統二十四治治中仙官，為後世作師，某行道得道，求仙得仙，遊行天下，度人濟物，輔助帝王，救療百姓，皆令效驗，恩惟

太上云云，操臣，謹為王甲拜上仙官君將吏兵士，授都功版署紙章一通，上詣三天曹，伏須告報，臣某誠惶誠恐，死罪死罪，稽首再拜以聞。

臣姓

太清云云依

太玄都律令

次弟子再拜，迴禮十方，方各一拜，次師復鑪畢。

經云不受都功版，不得傳治與人，如違七祖，被考於艷山，充填河之役，九年見世，有水火之災，慎之。

正一法文傳都功版儀

①本篇原附在《正一法文十籙召儀》之後，今分出單行。

（錢安靖點校）


027 正一法文法錄部儀

經名：正一法文法錄部儀。撰人不詳，約出於南北朝。係早期天師道經典《正一法文》殘本之一。一卷。底本出處：《正統道藏》正一部。

黃素三盟登壇儀

某國號某年太歲某月朔日子，某時係天師某治炁太一道士三洞法師五嶽遊行先生，某郡某縣某鄉某里真人，男官某昔從三洞法師太一道士，男官某受老君元義天地日月五星，上三天真一太一普督五億五萬五千五百五十五億萬重諸天，諸日月星辰，諸仙府諸世間請地山嶽，天神地祇，五嶽四瀆，三河九江，四海八極，山神水靈，千鬼萬靈，一切皆屬上三天真一太一，今謹以

某歲月朔日子某時，傳付某郡縣鄉里真人某甲，年如千歲，稟炁清淳，好道樂生，陰陽中和，五炁治身，先受黃圖契令真天赤籙，真天三一真一太一素券，從來積年未能飛仙，今求進受上三天真一太一三十二天帝位符信，受持金剛，分真形投金魚，稱與諸天地水三官結盟，對共分金破契，刻臂喻血飲丹，結髮身命為誓，與某甲共為一身，同心合契，奉行天真，修行神仙志同齊舉，飛昇上天，不得耽染色慾，不專正一，一旦受道之後，三十六年遇賢聽傳可授之人，不得妄傳，不得自欲高位不崇根本，背向異辭，二心兩舌，誹謗師道，攻伐師主，一旦違負契，令身謝三官，長為下鬼，削除生名，不得怨恨，甲自好樂神仙，時不拘迫，手共畫一為信。





右太一真盟上契左右書之

國號某年太歲某月朔日子，某時某郡


縣鄉里男女官太一道士真人某，甲年如千歲詣臣某度受太一登壇盟約，真一口訣結盟，拔度生死，不得負違，一如老君律令。

右太一中盟契



係天師某治炁五嶽遊行先生，臣姓某乙，以去某年太歲某月某日某時，從三洞法師陽平治功平五炁左平炁某嶽先生，真人姓某乙，受太一真契三盟之法，拔度生死，上遷九幽之中，七祖名籍，下度己身三男之庭，保成上仙太一同轅，太一道士，某郡縣鄉里男女，生某乙於某郡縣鄉里中結盟，奉受拔髮結髮，生死為誓，不負太一帝君神仙大盟律

令，五帝魔王過度，太一道士甲，生死三界，名上仙品。



右太一下盟左右書之

夫受三盟者，應須五人七人九人同共結盟，減此不合法也，上拔度百曾之罪，下過度三界宮真妙之事，極於三盟，生死成仙，無有差違，受者結人爲盟，未至五日逆上盟刺條，郡縣治位告下二十四獄，拔出甲等，七祖父母遷達沐浴竟五日，然後而授此祕之師口，萬金不傳，傳之後賢，非賢勿泄。

某郡縣鄉里，男女官某甲，年如千歲。右如千人，先受黃圖赤籙，三一真一太一一言之訣，從來積年，未能幽究宿緣，今齋信詣臣，求受太一真一契，三盟都券請授。謹狀係天師某治炁某嶽先生，臣姓某乙

上言，謹按文書，臣以人微，肌腥骨臭，謬蒙明時，師老布化之際，過泰負荷，

教化無效，宣勸逋替，夙夜戰慄，如履冰谷，有男女官太一道士某甲等，如千人，年如千歲，先受訣言，未受太一三盟祕法，今各齋法信，詣臣乞結盟，元元丹赤，感於神明求乞之至微於影像，臣輒受法信，教以訣言，道重人輕，不敢便授，共登黃壇，授以盟言，要誓天地，日月爲盟，刻臂飲丹，誓告神明，不敢妄傳，甲受盟之後，不得輕傳，泄露真要，自當奉承師法，皆如今約，一旦負違今誓，甲當以身謝天地水三官，萬歿之後，不敢有怨，乞原甲未受訣之前所犯，一切赦貸，恩惟太上太一帝君，慈父聖母，則蒙省理。

右操臣度太一登壇三盟付授訣言。

黃素中章

某郡縣鄉里，男官某甲，年如千歲等乞恩辭，某素以胎生肉人，千載有幸，得在道門，戶屬師主某甲治，以係天命，昔蒙明時，得參中祕黃圖赤籙、三一真一，太一迴車畢券之訣，從積年而善功未立，譴闕非一，夙夜憂懼，若履冰谷，

雖復導生養炁，蒙恩無他，未得奉修九誠百二十事，仰謝三十二天，請度宿命之法，無上三天真一太一登壇大盟，實所未聞，不惟六蔽，知進忘退，謹齋法物三十二種，奉操詣治，乞丐成就，如蒙教授，不敢泄露，攻根伐本，負違契令，某等以身謝天地水三官，歿命敢恨，謹辭

太歲云云。

某郡縣鄉里男女官某甲等，謹條法信如左。生米一斛，緋繒六十四尺，柳薪一束，筆一雙，鐵二百五十斤，墨一丸，玄繒二百五十尺，書刀一口，黃金十二兩，大席一領，黃素二百四十尺，真珠一兩，法巾一枚，褐一領，金環一雙，法案五枚，明鏡一面，盛戒五綵法囊一枚，法信盟錢三萬二千，盛經集文錦囊一枚，命絲三十二兩，清淨罍盤匕各一枚，青銅劍一枚，和香五奩，生口男女替代各一人，明光錦百二十尺，銅八十斤，青繒八十一尺，生硃砂六十四兩，白銀十二兩，大紙一百張，白絹三百六十疋。

右三十二種，奉操詣治，受登壇三盟。

上言：謹按文書，臣以人微，忝佩太一尊任搜授賢能，應補仙品者有牒，男女官某乙等，稟炁清淳，好道樂生，今奉受五炁，陰陽治身，鍊炁積年，材堪進補，上三天真一太一極品，上統五億五萬五千五百五十五億，諸天諸日諸月諸星宿，諸仙府諸仙聖諸仙闕諸山嶽，天神地祇，五嶽四瀆，三河九江，四海八極，九宮八卦，神室山神水靈，一切千鬼萬神，普攝衆神三萬六千，普統衆靈，總御衆官，侍從衆仙，及家國三魂七魄，三鬼五神，千二百形影，萬二千精光，一時並來更仙鍊，某等今一旦受上三天真一太一之後，不得背違上三天盟誓，攻伐師主，輕泄妄傳，必須擇賢三十三年一傳，不得違約，違約之日，某等身神沈翳，長爲下鬼，命爲土塵，削除仙名，不得廁預仙品，長歿三官考召君吏所考，事立所召者，詣肉人元元須待拜署，謹爲拜章一通，上詣上三天無上太上一君太上，上三天太

上上帝君，上三天太上元君，三天太元一君，上三天大道萬道，根宗天地本始，上至無上，下洞無窮，遠至無邊無極，幽微衆官萬靈，上三天之上，五億五萬五千五百五十五億，諸天君將吏功曹使者，謁者僕射書佐小吏將軍吏兵馬騎乘各從官，五億五萬五千五百五十五億萬衆，一合從上，上上無上，上三天之上，蓋天來下，入甲等身中，從頭至足，布帛骨節，五藏六府，九宮十二神室，四肢五體，百八十關機，三百六十骨節，孔竅營衛，筋骨血脉，安某等三魂，定某等七魄，仙某等三魂，正五神生五藏，應五星，召還三萬六千餘神署生官，各安宮室，使仙道畢成，舉形飛昇，上爲真人，更定仙壽萬八千歲，願上三天太一天尊，萬道之主，萬神之宗，將從天仙鎮某等身中，檢錄萬神，願上三天之上，飛仙君將，神仙君將，度世君將，神人君將，真人君將，元陽君將，萬生君將，萬炁君將，導仙君將，胎息君將，元精君將，延壽君將，太極君將，太一君將，清微天禹餘天大赤天君

將，吏兵馬騎乘一合來下，入某身中，營生養性，還年補腦，行生布炁，金丹神漿玉液，入某等身神玉女，侍衛左右，九天丞相，削除死籍，上名三天生錄，與天地無窮，周旋天下，六合載名山嶽，出入人間，延年益壽，辟斥五兵水火災疢，縣官口舌疾病喪禍，虎狼猛獸，毒蟲冤家，盜賊伏匿黃淵，埋頭萬丈，不得妄宣，若有符師道士支散雜靈六天故炁，飲食鬼神，一切進匿，登山履嶮，萬神扶將，周旋天下，地上神明，交降所在，立驗仙道，必成胎息，服御導引神炁，內外光明，雲行身中，上昇清天，黃老立宥，神仙結友，交遊真人，飛騰高舉，上補天仙，乘雲駕龍，拜謁道君，壽終不老，與日月齊明，飛行超越，隱顯浮輪，并遷某家七世父母，上至億曾萬祖皆昇三天，列補仙官，恩惟太上無極太一君垂恩省納，分別求哀。

右破三盟契後付授赤章

太一黃素三盟儀

謹啓黃素丹盟，告諸弟子，某甲等應諾太清太一無量清法門下，真一五炁，太一九宮成具滿足，便得仙度，太上於崑崙進登天首大治七寶觀上，召天師張道陵而告之曰，吾道出於無先，太初之前，無所從生，靡所不成，吾昔於此觀上，啓受妙法，吾以聰明智慧，攝意奉行，便得微妙，玄通求道，上仙莫有疏忽之名，奉行黃老之道，生死之訣，當畏法慎戒，生門之中生道有一，死道有九，驗於大度，常當戰戰，如履冰劍，把毒常懼，害及其身，謙謙曲躬，卑辭下物，勤心苦行，無虧孝敬，受訣之後，奉行法戒，無違分數九一之法，生道之極耶，天師再拜，承盟奉修，位登天師，後授王長趙昇三夫人洛下三公，皆得白日昇天，登壇如左。

謹請盟誓，列啓三官，甲等受盟，誓天地爲信，指日月爲盟，引三曾五祖，七世父母，自身證約，不輕傳泄，登壇之訣，

九年聽傳三人，若世無可傳者，啓宣三官，發先盟書，封諸事訣，藏之深山石室，不違盟約，甲等七祖父母上昇玄宮，受福天官，身得仙度，福流萬世，世蒙榮寵，若妄傳非其人，甲等七祖父母下受風刀之考，身沒積夜之河，殃流萬世，世世受考，喻血飲丹，披靈赤心，啓封三官，日月所照，天地所聞，結盟之後，司命削某等死籍，度著生錄，使天官注仙名，地官除死籍，水官絕殃考壇，上三官考召君吏，并甲等所佩將軍吏，兵保護肉人，必使仙度，若甲等先世因緣，宿對未應即仙，要須尸解斃，經太陰者，甲等以得登壇，大度結盟三官罪滅，福生應昇，神室福堂二十四神，自守衛甲等形骸，不使魂魄離散，骨肉鼻腐，二十四年舉形化出，宿緣應死，超然復生，枯腐之骸，枯骨受仙，沈淪隱見，無所拘閉，此是登壇結盟三官之力，超登殊劫，過死度生之福，明自修慎，不敢違負今約。

謹宣盟約，告諸弟子，同壇共視，師某父母若有危難，當衆共濟，若橫罹縲紲，

當審明極窮濟之趣，急度疾危，不得輕師負盟，親相捐棄，若如此而不救告，而不赴者，有危之身，發盟告神，求乞免度，違盟者受考，告靈者得福，若在危難之中，不測之地，向師存亡所在，靜夜披露丹心，啓求度脫，若未蒙濟免，自當神告景，應知其罪福盟誓君吏，壇上三官自應侍衛營護，必得無他，但當敬承盟約，不違信誓，自得仙度，衛護君吏，考功記過，壇上三官，主償罪福，明白證慎。

某國號太歲某月朔日，於某州郡縣鄉里中，係天師某治炁，臣某甲從某治道士某，奉受傳某郡縣鄉里某甲。

太上黃素丹盟三條，登壇者各朱書黃素，佩隨身，生則受仙之券，死則拔逮之根，三官證拔，生生受福，無復罪緣。

太一登壇黃素三盟逆刺付授儀

東向叩齒二十四通。

謹出臣身中五體真官神仙五炁功曹吏，

出太一金剛元炁直使功曹，通神功曹，五元功曹，和合功曹，運炁功曹，統仙功曹，各二十四人，出王炁左官使者，平炁右官使者，陰陽神決吏仙化吏，科車赤符吏，剛風騎置驛馬上章吏，官各二十四人。出某郡縣鄉里中真正之官監察注炁，考召四君逮召諸君將吏等，左右平炁君，左右都候君，左右執平君，左右執法君，東方九天九炁君，南方三極三炁君，西方七合七炁君，北方五元五炁君，中央一炁君，陽平鹿堂等二十四治炁，三十六靜虛，天師門下君將吏兵所布下，道上二玄三元四始五德六合甲子諸官君，周天八極飛仙君，養性長生青龍騰蛇君等，奉行文書事，謹操臣爲男女生民，太一道士某乙度金剛畢券，或登壇黃素三盟，拜露刺一通，刺今露在中庭玉案上，請省功曹使者將軍吏兵，須考正甲等合炁連名保負須所召者，詣所下者至功成事，立臣拜章報授畢，各還臣宮室中，伏須效應，匍匐當刺。

右授金剛畢券上刺出官

授太一三盟大券口刺

某郡縣鄉里男女生官某甲等，年如干歲，字某乙戶屬師主，某乙治男女官某乙等，稟性慈仁，素體溫良，鍊炁積年，廁身祕門，參染真要，階緣上道，奉受太一金剛契，令曉知三炁飛仙之訣，雖備衆契，未遂登壇，生死大盟，今齋信儀，連名誓身束骸，告臣求受太一三盟登壇大券，明真大諱，三百六十圖號，千二百口訣，依先師本法告傳謹狀。

具位係天師某治炁，臣某甲稽首再拜，上啓太上無極大道太上老君，太上丈人，太一帝君，皇天上帝，無極元君，道德衆尊，三天法師正一真人門下，典者施行飛仙君吏，臣運逢天通，係命玄教，銜宣法化，搜索有道，遊行世界，拔度天人，今有宿命因緣，從虛無中來，某郡縣鄉里男女官某甲，年如干歲，甲等素染玄教，練備真文，奉受衆契，修行真祕，雖備上法，未破玄誓，今相携率操，齋法儀束骸，詣臣求受太一登壇三盟生死處仙大券黃素證誓，臣昔從大洞真人某奉受約，當傳授後賢，察甲等專誠樂道，在

可成就輒剋，某月某日時於某嶽山之中，共立黃壇證誓五帝，分符破契，告盟天地，付授祕局，施行口訣，謹先於此某郡縣鄉里中，露白刺奏上

天曹，特願

太一帝君皇上大道留神照察，若甲等有骨法，合便依法付授玄都，無骨法願爲考正，從上玉籙，名備天仙，到某日某時良日吉辰，靈嶽之中，黃壇之上，稽首告盟，誓天證地，付授玄一高上之道，生死大盟，存亡成仙，謹以啓聞，立須報應，臣甲誠惶誠恐，稽首再拜以聞。

臣姓

太上大道无上三天太一帝君太清玉陛下，太歲。

右口刺

謹重勅五體仙官騎乘將吏騰臣所上某刺，上詣

太上左君玉閣下，付與侍香青腰玉女等，所言倒錯越失，不得舊法者，願爲考正，依本法文，若有干截公文者，將吏神仙騎乘收付所在獄中，依事治罪，令臣所啓上達，伏須告報，臣所上事訖，

向出仙官吏兵，各還宮室，彌綸五宮六府，安官復職，至日呼召復出。鳴鼓十三通，三咽炁，畢。

太一三盟付授儀

東向叩齒二十四通

謹出臣身中神仙，直使正一神官功曹，陰陽運炁明光使者，左右官使者，陰陽神決吏科車赤符吏，剛風騎置驛馬上章吏，飛龍騎吏，左右龍虎君，赤飛仙童官各二十四人出，出者嚴裝顯服，具列威儀，謹關某郡縣鄉里中真官注炁，監察考召四君將吏，社里邑君土地靈祇，八方監察神仙衆官，並備真位係天師太一炁無極金剛畢券，某嶽先生，臣某稽首再拜，上啓

太上無極大道太上老君，諸君丈人太一帝君天帝君，皇上大道天師三師君，太一神仙玉曆真科付授威儀使者，典行飛仙事，臣萬劫因緣，謬聞大法，運值有幸，遇大洞法師真人某甲授臣登壇大盟，生死證誓，飛昇至道，玄元要訣，衆

真之券，萬幸宿生悟性，臣受法以來，積有年載，雖未能察幽睹冥，坐在立亡，重希玄降，於身有科，承科傳授，以付後賢，某郡縣鄉里某甲年如干歲，前蒙黃籙契，令奉受五金剛契，令被炁積年，練悉紀綱，今操齋信儀，詣臣求受登壇三盟大訣，目承先師本法，與甲等對共立壇，證誓五帝，分金破券，喻丹告盟，甲等受道之後，永爲身寶，不得攻根伐本，指師謗道，唱露要訣傳非其人中泄靈文，施布世間一旦有違生死父母沈淪罪由萬劫無原，謹以啓聞，須可奉行，臣甲誠惶誠恐，稽首再拜。

次讀券 讀黃盟

次畫一

畫一，左手指天，右手畫地，以左手指中央，師便言：係天師某治陳昔，從大洞弟子某受太一登壇盟券，今依法傳授弟子，某甲受此證約，當依真師盟壇大盟，不得攻根伐本，指師謗道，泄露靈盟，一旦有違，萬歿謝罪，生死沈淪，上告天靈，下示地祇，中誓賢人，三證靈盟，義不相負，謹共畫一爲信。

次下髮

作結一結，言清微天，泓二結言禹餘天，澄三結言大赤天，明上三天之帝真重爲誓，結髮盟壇，不負靈約。次刻錄，言玄老大一闌闕。刻中言太上太一門石門也

次弟子盟丹水

某郡縣鄉里男女生太一道士某甲，敢告丹水，甲好仙樂聖，詣太一無極道士某甲，受太一三盟登壇大券明真大諱，三百六十圖號，千二百口訣，甲爲弟子，不得背叛師道，妄傳世人，違盟族傾，背誓不生，共喻丹水爲盟，指天畫地以生神靈，急急如律令。

次師命丹法

太一無極道士姓某乙，敢告丹水，有某郡縣鄉里某甲，求受臣太一三盟登壇大券明真大諱之訣，萬道之神，甲爲弟子，不得背違券契，上監三天老君所明，急急如律令。

次師左手弟子右手共持丹水更喻之，各三止，弟子先喻師後喻。

醮壇法，用醮具五盤，香五鑪，用棗五

杓，東向祭五帝，醮具九盤，香九鑪，用棗九杓。東向祭太一九君。

係天師太一無極某治真人，臣甲謹上詣東方青帝，南方赤帝，西方白帝，北方黑帝，中央黃帝，太一帝君，皇天大道，太清玉陛下，從官九億萬騎，搖天動地，降此靈嶽皇壇之上，臨饗微醮，屈靈暫臨，謹有男女官某乙等，受黃素太盟長生拔仙大券，施設微心，上請天尊，伏願神顏曲眄世界，眷愍蒼生愆闕不及，以唯乞願原赦，便再拜。

次受契者先五拜次，師左手授契與弟子，弟子左手取之，三繞身畢，東向三迴九拜，次又北向九拜，太一君三迴三拜，又向師九拜，次俱起，於地戶指天畫地，左行三迴，右轉召弟子七祖證明如具。

次重勅法

謹出臣身中五體真官功曹吏，出太一金剛長壽功曹二百四十人，太一度世功曹二百四十人，太一度命功曹二百四十人，出太一青腰玉女二百四十人，出

太一娥皇玉女二百四十人，出五老君將吏二百四十人，出長生永終吏二百四十人，出東九夷，南八蠻，西六戎，北五狄，中央三秦君將吏，各二百四十人，出千乘億騎蓋天來下，剛風騎置驛馬上章吏官，各二百四十人，出今授甲等

太一三盟登壇大券明真大諱之訣，或金剛一言之訣當令甲等受道之後，長生久視，同襟仙聖，齊肩保器，神耀不求，而前祐令神丹金液，靈芝衆藥，服練身形，千道萬神，爲甲驅使坐起行住，太陽在左，太陰在右，青龍白虎，朱雀玄武，俠從前後，天神當下，地神並出，五老神君，除甲死籍，青書黃簡上，甲生名七玄，父母返胎南宮，合家大小，皆享永延，甲一旦違盟，考甲百曾捷蒙山之石，填塞三河，長充下鬼，永爲土囚，一如契令，依如

太上老君，太上衆尊無極大道，無上玄老，五炁道德，萬生萬度萬福君丈人，新出老君太清玄元上三天無極大道太上老君，太上丈人，太上三炁君天帝

君，太上五炁律令。泰玄都正一平炁係天師某治太一道士太上曾孫小兆，臣甲稽首再拜

上言：謹按文書，臣等素自蟲蟻枯骨，子孫千載有幸，得在道門，被蒙大恩，不以頑愚竊好生法，並蒙師老賜佩太一契令，不唯功少，希慕上真，以今月某日，率同學某甲等，詣無極太一中宮道士某治，郡縣鄉里某乙，進受無上太一證誓三天登壇死生三盟，上拔七世父母幽魂苦爽，次以昇度，某乙等生死之愆，腐骨臭肉，未有微勤，荷施山嶽，非臣甲等輕愚所享，不勝重沓，謹伏地拜章謝聞，願上官典者哀矜臣等，乞上生名，太清仙都玉曆，得在神仙種民輩中，謹遣臣等身中三官考召君將吏，天官考地官考水官考，清微天考，禹餘天考，大赤天考，此里中四面真官注炁，監察考召諸官將吏，臣等投身託命，生炁一節，奉承元老，臣等所備宜畢真妙中玄皇壇，山岑之上，太陽之下，伏地拜赤中章一通，上奏至極太一几前，臣等從臣某乙，共上告皇靈，下指地祇，冒黷

以傳，受恩惟玄極映明真君，蠲明注炁，謹請無極自然神仙，先天帝太元君姓字，率將騎乘日月，五星五帝，九宮五嶽四海，璇璣玉衡，三河九江，神仙兵馬，太一騎乘獨轅之車駕，無極之馬前，導至真精神後，從五帝陛下，神仙騎乘，俠從左右，前無不祥，後無殃咎，頭上璇璣，足步北斗，日月五星導前從後，震天動地，一合來下，各按次第左右，從臣某乙等三元會宮中，一爲神主仙

帝之皇，當爲臣等延上三天生炁，太一神丹，金液玉漿，入臣等身中八十一宮，十二神室，太玄四注，臣等五神太一神精，五炁纓珞，九元練命三丹，度生却死，昇上晨極，注入玄宮，翱翔五嶽，高舉飄騰，耀影金闕，鳳舉紫庭，仙道早成，毛羽時生，遨遊八表，戲翫八臺，交關華霍，賜與丹精，九靈合華，七祖昇遷，魂入道鄉，閑樂之堂，衣食自然，臣等同盟之人，有庀之日，當更相救濟，拔度爲先，上存法師，次存同盟人名，自今以後，不敢負三盟約言，宗崇法師，唯善爲先，既往之罪，負盟之愆，唯

乞原赦。恩惟

太上無極大道無上玄老太上三炁天帝君分別求哀，臣等謹因二官直使正一功曹，上右官使者，陰陽神決吏，科車赤符吏，剛風騎置驛馬上章吏官各二人，出操臣等受太一三盟拜上三日，謝恩紙章一通，上詣天曹，伏須告報，臣甲誠惶誠恐，稽首再拜。

右三日謝恩章。

四極明科開度文訣

葛仙公撰

夫受靈寶三十六部尊經，不受迴案，即萬劫之中不得傳受，既受迴案，不破太一登壇三盟金真妙契，則七玄不離於酆都，那可便爲人師，三盟既竟，即七玄超度，生死同仙，便拜迴案，授爲洞玄法師，若七祖未拔，三盟不破，輕授迴案，則師受泄經之罪，賤寶之愆，依四極明科，荷風刀之考，依三盟解釋，則存亡超拔，標名諸天，故拜爲靈寶法師，夫受靈寶開度，不顯於師，則死籍不解，瓊文無名，徒受寶經，永無傳付，閉塞大法，於身爲損，受經既竟，便爲開度，上顯諸天，下標諸地，

名徹諸真爲師，上盟五帝爲洞玄師，若無此之功，師輕度迴案，師則受輕泄違誤之罪，身受風刀，萬劫無原，後世爲明識此言，勿作輕說，考及汝身，沈淪罪網，萬劫無原，考屬四極曹，有急庀灾疾，呼太一名，以左手執道父，便仰頭三呼無極太一君諱，我今有某急庀，君當過我湯火之中，白刃之下，過度九庀之中，知道爲神，知道爲真，左迴還兩顧。

子狩士徐名他二名上，鼠頭人身，黑衣持鑲，丑狩士秦何，牛頭人身，黑衣持鑲，寅狩士徐方，虎頭人身，青衣持鑲；卯狩士徐澤，兔頭人身，青衣持鑲；辰狩士徐皇，龍頭人身，青衣持鑲；巳狩士徐千，蛇頭人身，赤衣持戟；午狩士司馬籍，馬頭人身，赤衣持戟；未狩士公孫昔，羊頭人身，赤衣持戟；申狩士石勝，猴頭人身，白衣持弩；酉狩士石衰，雞頭人身，白衣持弩；戌狩士徐阿，狗頭人身，白衣持弩；亥狩士公孫昔，猪頭人身，黑衣持鑲。

右十二時狩士真名，服符存呼之，不得傳非其人，祕之慎之。戴先生授謝穎川，謝穎川授道士陳藝，道士陳藝授母仲度，度授劉散騎道符，符授道士丁玄真。

九和香法，燒之香聞九里，感徹神明。

沉木香一斤，青木香三兩，

甲香三兩，薰陸香一斤，

詹唐香三兩，燮香一斤，

青漸香一斤，雀頭香一斤，

大乾棗二十枚。

凡九種各異，擣下筵以白蜜和，令相著密器中，封其口三宿，三日香成，聞九里，其法祕不妄傳，欲致神明，合諸丹者燒之，稍稍分著別器中，令炁不泄。此古九和也。

正一法文法錄部儀

（錢安靖點校）

028 正一法文太上外

錄儀

經名：正一法文太上外錄儀。
撰人不詳，約出於南北朝。係早期天師道經典《正一法文》殘本之一。一卷。底本出處：《正統道藏》正一部。

凡男女師皆立治所，貴賤拜敬進止，依科自往，教之輕道，明來學之重真，其間小師未能立治，履歷民間，行化自效，因緣暫爾，不拘大儀，若術法求利，不明正典，傳非習謬，迷誤後生，後生緣薄，率爾逐易，不尋高德，苟貪受名，名而無實，望福得禍，禍加考深，宜慎之焉。

五種女人受要錄

第一處女

凡處女在家隨父母，教之從師受

法，父母為辭，稱鄉居男女民生官。姓名息女某年歲某月日時生，某父母名也。荷道重恩，得生子息，息女某年某歲，至心樂道，雖是愚蒙，庶有豪進，今歸師門，乞賜成就，依法操信，奉辭以聞，請受某錄，修行如法，伏願明師，特垂允許，謹辭。疾厄有代皆依前儀。

凡在家受法，臨嫁啓師，師不在者，同道高德，章書奏聞，須至夫某氏別更上聞。

凡入夫家，告夫所受，夫啓父母，就師騰言，改姓而已，不須易文，在家稱父姓，適人稱夫姓。

第二出家女

凡女挺命，不願適人，啓告父母，出家學道，或別立靖舍，或投師門，男師獨立，不得受女弟子，師若婦即號師母，女弟子來，得依師母，無師母者，別憑女師，女師出家，志業和念，從師受錄，辭信依科，貧無信物，師代出之，辭稱父鄉居男民，生官姓名，息女某年歲某月日時生。父亡稱母，母取父姓。母亡稱父，歿故男生某息女字某。先緣罪重，生受女

身，尫弱愚頑，不願出嫁，在父母家，無由得學，今誓歸命，仰憑師門，盡力竭誠，灑掃自效畢生，續明朝夕香火，不敢中悔，無有退心，依科辦信，奉辭以聞，唯願明師賜垂成就，謹辭。後悔有考無悔進法，得嫁別有科。

第三嫁婦

凡為人婦，事勢多端，或不欲嫁，尊上逼之，或為貴勢，俗家迫取，或侍奉法，或無所奉，先所受者，悉即還師，師即申啓。若夫奉道，捐改本姓，若未有受，隨夫受之，夫妻同師，師脫遠隔，得就高德，投辭如科。夫鄉居男生姓名，妻某歲某月日時生，幸藉宿緣，得奉大道，雖稟女弱，得依道民。若高德甲乙之家，皆得云道門法門。方竭丹誠，陪執箕箒，仰道延生，讚揚妙化，剋荷玄祐，永充種人，謹依法賫信，奉辭以聞，請受某錄。如說修行即云唯願明師特賜垂允，謹辭。

第四寡婦

凡寡婦多種，有結帶便寡，誓不重嫁，或有男胤，年高不出，或年大無兒，

富不肯行，或貧無人娶，或病不能去，尚有產業，不還本家，如此投師。辭稱鄉居歿故男生姓名，妻某歲某月日時生，疊穢既深，生受女弱，出嫁夫某，涉歷某年日月，年數隨實言之，宿新罪重，凶罰奄臻，某夫壻以某年月日時，捐背疾病某故，暴殞喪亡，銜哀自咎，不敢有怨，追恐亡者多愆，殃延後人，自慮咎積，不保推遷，雀鼠樂活，憑道乞生，希附師門，濟度身命，依法賫信，奉辭以聞，請受某錄，果心如志，唯願明師賜副饑渴，謹辭。

第五歸居女

凡嫁喪夫，或犯七出，或年命相剋，致使離居，不自存立，還依本家，憂患相纏，歸命師門，投辭稱父鄉居如處女，若夫妻和美，大義不絕，特以婿亡，單寡而歸，後命過者，還婿合葬，如此依前寡婦儀，但辭中異同，隨宜消息。凡出嫁、寡婦、〔歸〕居三者，後皆准婦儀，其中辭狀，陳前說後，吉凶備述，不得全用。

下人四夷受要錄

太平經云，奴婢順從君主，學善能賢，免為善人良民，良民善人學不止成聖人，聖人學不止成道人，道人學不止成仙人，仙人學不止成真人，真人學不止成大神人，大神人學不止成委炁神人，此九品人上極入道，道教愚下下人得學，學依善人受錄如法，稱君主鄉居，男女民生官姓名，私人某賜姓者得言姓，年歲某月日時生，家生蠻貊狄獠，隨實言之，叩搏奉辭，先緣罪深，今生底下，甘苦在心，不敢有怨，蟲草有幸，得奉道門，聞見善事，誠欣誠躍，某雖卑頑，謬知謹慎，夙夜盡勤，小心敢懈，貪生願活，伏事君郎，承順大家，仰希道祐，乞以休息，時治灑掃，君上賜與之物，豪分撰持，換易香油，給治淨舍，今賫法信，請受符錄，伏願明師賜垂哀遂，謹辭。四夷云，某東西南北四方荒外，或某州郡縣山川界內，夷狄羌戎姓名，今居某處，改姓某，易名某，年歲某月日時生，叩搏奉辭，先因醜惡，生出邊荒，不識禮

法，不知義方，疊穢之中，善根未絕，某年月日時，為某事隨某事得來中國，聞見道科，彌增喜躍，含炁願活，憑真乞生，依法賫信，奉辭以聞，伏願明師特垂矜副，謹辭。

凡下人受錄之後，別立白籍，師為緘封，三告上言，皆得預會觀聽，申令有功德者，善人放之，依良民也。

受錄後三日謝恩章

受錄之後，涉前三日，假令十日，受至十二，是三日也，詣師再拜，三叩搏止，又再拜跪，信起請章，章應自書之，若未能者，假手同法，亦自拜奏，又未能者，師友代之，代之者願呪發鑪，出官操章，復鑪出呪，願悉依別儀，受錄者於靖外，隨師拜伏，師出官，稱此錄生名，教其叩齒咽炁，若朋友奏者，隨朋友同就位，叩齒拜伏，咽炁依朋友。朋友示語言之。

七十五進百五十錄謝恩章

具法位臣某，誠惶誠恐，稽首頓首，再拜上言，謹案文書，某年歲，昔以樂化，制

屬諸君丈人道炁，某好道樂神，前詣天師某官祭酒姓名，受某官七十五將軍錄，積有年載，某未有微功以報所受，猥以今月某日，係天師某治炁某考召，賚錄賜某官七十五將軍錄，并前百五十將軍錄，某被蒙大恩，喜懼交集，玄施洪深，誠自勸進，謹拜章一通，上詣

天曹，願垂矜省，某蒙考召君吏，逮召君吏，并某先所受某官七十五將軍錄，吏兵營護有勤，今謁為言功舉遷，各加其秩，如天曹常科，皆依錄謁署，便曹隱職，無令失意，事訖各還宮室如故，某晚生後長，希遭大化，未知逆順，宿新愆多，今誓改往修來，漸自精勤，乞丐前後所犯罪過，一切昇舉原赦，當令某自今以後所向，金石為開，水火為滅，千鬼萬神，盡為伏諾，所化者化，所治者差，被蒙大恩，以勸未悟，恩惟太上，分別哀臣愚劣，謹因二官直使正一功曹，左右官使者，陰陽神決吏，科車赤符吏，剛風騎置吏，驛馬上章吏官各二人出操，臣謹為某等拜上某章一通，上詣

三天某曹，伏須告報，臣某誠惶誠恐，稽首頓首，再拜以聞。

空三行

臣某屬

某宮焚修

空三行

年號歲次某某月某朔某日某時章於某處黃錄齋壇拜上

空三行

可漏用金紙一幅為之。

大清玄元無上三天無極大道太清金闕七寶玉陛下

具章奏法位臣姓某上奏謹封

內方函

謹上詣

具章奏法位姓某謹重封

太上虛無丈人宮都司曹治北辰宮

外方函

謹謹上詣

具章奏法位姓某謹重封

三天門下請進

童子超受十誠及七十五將軍錄謝

恩章

上言：謹案文書，某年某歲月日時生，幸藉餘慶，世崇大道，遇荷玄祐，聞見正法，奇方異術，志願修行，齡齒蒙稚，未能受習，曲奉師愍，賜以超擢之榮，開晦導昧，引入日燭之路，今月某日男

女師姓名，依科考召，授某某官某將軍錄，洪慈特被，祇仰屏營，驚欣踊躍，謹拜章謝聞，伏願

太上三天曹上官典者，省覽所陳，某蒙考召，逮召某將軍吏兵真神正炁來某身中，同心并力，建德立功，善業昇進，剋成種人，天官有功，謁為舉遷，各加其秩，如天曹常科比署便曹隱職，無令失意，受功事訖，各還本宮，一如故事，當令某心明意解，動靜合真，幽顯歸附，以為效信，恩惟太上。云云

成人超受百五十將軍錄言功章

上言：謹案文書，某年某歲月日時生，宿有善緣，世奉大道，若新化云，宿罪深重，久事六天，或達真信俗，或無所事，未絕善緣，得歸正一也。好道樂神，至誠無已，實希稍進，敢願超階，不悟先因福厚，今師恩深，捨濁污之類，班清雲之儔，開以拔群之方，處以不次之位，某月某日男女師姓名，依科考召，授某百五十將軍錄吏兵，光顯天宮，威嚴輔正滅邪，幽顯敬伏，豈某草蟲所可剋當，不勝感荷屏

營，謹拜章謝聞。伏願

三天曹，特降垂省某考召君，并所受將軍錄吏兵，營護有功，今謁爲言功舉遷，各加其秩，如天曹常科比署便曹隱職，無令失意，事訖各還宮室，一如故事，某未受錄之前，億罪兆過，即日乞丐一切赦貫，令某自今以後，所向金石爲開，水火爲滅，千鬼萬神，盡爲伏諾，所化者化，所治者差，被受大恩，以勸未悟，恩惟太上云云。

進錄刺章

某州郡縣鄉里男女生姓名年歲，被某官召，戶屬男女主者姓名，治男女姓名。

保舉

右牒男女生某，前受禁官若干將軍吏兵錄，奉法修真，堪任進授，今求遷署，請某官若干將軍吏兵錄，如法請給，係天師某治炁祭酒，臣某稽首再拜，謹刺。

上言如牒，男女生某，前受某官若干將軍吏兵錄，奉法精修，堪任進授，今求遷署，請某官若干將軍吏兵錄，謹條行狀，州郡縣鄉里姓名年紀，所遷請將軍種數，所屬天師主者，并保舉人姓名如

牒，謹遣功曹使者，考召君吏，考覈肉人，審知情實，某應良選，及時當下，肉人元元，須待拜署，謁言上官，謹以刺言。臣某誠惶誠恐，稽首再拜，詣考召。

臣姓某。

四君

上言謹案文書，男女生姓名年歲，前授某官若干將軍吏兵錄，今遷署若干將軍錄所請吏兵種數，昨入刺如牒，須待拜署，諸應下者及時所遷某官將軍吏兵，營護肉人有功，一切還中宮，言功舉遷，加秩等數，如天曹常科比考召君吏所考事，立下將軍吏兵，付授肉人隨逐覆蓋，恩惟太上云云。

右進錄章刺章，出官操復，悉依前儀，約勅授受，亦如初法。

凡先受後受同一師者，後不須米薪，唯紙筆等如舊，異師各信不可虧。

凡受更令，五年得進一將軍，四年十將軍，三年七十五將軍，二年百五十將軍，一年若志行庸愚無長進者，悉又

倍年，三倍無功，不知建德直置而已，都不合遷，其中聰明才智秀異，功德超群，不計年限。

事錄行戒

事錄之法，恒存其官，憶識位次，人數少多，文武所主，有急呼之文常佩身，唯欲躉脫，若兼參染，自可脫之，秘錄淨處，勿令去失，去失有罰，依案科儀，穿壞改易，淨之如法，夫妻同道，非爲淫穢，帶之存之，彌不可脫，脫之爲淫，更增重考，若入餘處凶喪之間，危險鬼賊，恒佩勿脫，神入體中，不存素上，錄符在身，存師在心，帶之不捨，以堅忠信，若有喪產，及行出觸穢，皆即解除，依太上祕教。

凡爲道民，便受護身符，及三戒進五戒八戒，然後受錄，受錄之前未受者受錄之後，依次受之，誦習通利，恒存思行，諸識不謬，忘則犯科，未受錄時，無所呼召，受錄之後，動靜呼神，不行戒者，呼之不至，破戒之人，吏兵遠身，還上天曹考官便逮，致諸厄疾，公私災橫，輒軻衰否，所作不成，成功立德，捨

闇入明，施善禳惡，以吉除凶，要在行戒，神即祐之，戒有別文，精詳修習，或有不解，或有遺忘，或有謬誤，或冒禁故爲，或尊上逼迫，或畏死犯之，皆是愆招，悉名破戒，即應懺悔，首謝自新，大略如後，消息施行。

凡違戒者背負鞫言，協道信邪，雜事信俗，此爲不專，中心懷二，愚迷猶豫，惑障纏深，師三誨之，必能改革，守一不惑，召神有效，三誨不悛，是爲叛道，乖逆師尊，法應奪錄，違真奉俗，及無所事，師慈愍之，不追咎責，怨對事他，棄本逐末，雖名奉道，實犯正科，師移諸官，不得容受，積久知悔，更立殊功，乞還聽許，依德昇遷，若瞋恚委遁，不輸錄符，師勿苦求，但移而已，又外犯陽官，死罪從刑，即是負道，皆應奪錄鞭，答贖罰，章奏解之，刑而枉者，啓告勿奪，又內犯陰官，師友諫喻，苟作不從，皆宜格奪，輕重詳量，師朋評議，令法取允，幽顯貴知，破戒謬濫，師資格同罪，奪之後首悔立功，隨宜進署依科遵行，去失錄者，輸罰更受。

凡失更令，罰薪五束，朱三兩，飯賢三人。皆中厨也。失一將軍，薪半車，朱四兩，飯賢五人。失十將軍，薪一車，朱五兩，飯賢十人。失七十五將軍，薪二車，朱七兩，飯賢五十人。失百五十將軍，薪三車，朱九兩，飯賢百人。失三官至百五十將軍皆輸。罰畢得受更令，隨功進，若有殊功異德，超復由師。

凡輸罰後操辭送信皆如初。

立功求進

凡能志學，皆應從師，如戒修行，立功建德，德者五德也，功者九功也。

一曰仁，好生惡殺；二曰禮，敬慎和柔；三曰信，忠直不妄；四曰義，明斷無邪；五曰智，清正通達。一曰理

元炁，願念無形；二曰理上天，志存大神；三曰理下地，守靜思真；四曰理四時，隨順仙化；五曰理五行，宣揚大道；六曰理陰陽，係續聖種；七曰理文書，讚弘道法；八曰理草穀，攝延凡命；九曰理財貨，利下通上。此九與五具在經中諳識文字諮受口訣，依案

施行，堅固精進，誓無退轉，是爲立功，功被於外，德充於內，內外雖殊，功德合也，有德立功，聽求進業，辭隨時宜，大略如左。某州郡縣鄉里，男女生姓名年歲，叩搏乞恩辭，幸藉善緣，崇奉大法，某年月日時，蒙師若先以他師云，蒙男女師，某州郡縣鄉里姓名，賜授某官錄，奉法以來，積如千年月，依案旨訣，遵行鞫言，伏從戒律，不敢違負，愚短未達，犯或不知，才力未深，修行未究，思此慙忸，寔忘寢食，自揆庸品，簡悟未弘，某年某月日起習某事，從來至今，粗有效驗，功微業淺，不敢閑寧，仰希寸進，以獎愚蔽，謹賫科信，冒辭以聞，伏願明師賜垂成就，塵黷玄鑒，追紙驚惶，謹辭。

太歲某某月日奉辭

五德九功，各有經法，法有內外，學者兼行，仁禮信義智及諸理，內祕在心，外現在迹，迹及心術，更互受名，金木火水土穀，謂爲六府正德，利用厚生，謂爲三事，三事六府，又號九功，道德仁義禮，文武辯法，此即九經，九經

之中，備有功德，功德之名，爲善總稱，總稱之中，三術爲要，隱形藏名，遺榮是也，內以心知，外以迹辯，辯迹有事，事卽爲業，業在有爲，心存無爲，爲簡爲素，棄捐繁華，期至無爲也，簡素之迹，始於身口，終以檢心，起修五德九功。

五德

一者長齋乾蔬，不食肥鮮，放生救死，平等一心。

二者供養三寶，禮拜盡節，承奉和順，不生怠慢。

三者言語真實，無有虛詐，方便依法，不損物益己。

四者辯是明非，諮師問友，布施平正，斷決邪疑。

五者智慧精審，所說依經，經通無礙，動靜會道不自作一法，違負幽明。

九功

一者勸諸同志，念身無爲，思身洞白，委絜無形。

二者守形虛白，若玉無瑕。

三者積精內視，數髮至足。

四者思五藏神，見與言語。

五者念召體神，使四時五行。

六者醮六甲八吏，符刺地神。

七者役使社稷山川衆神。

八者習延精炁，占說是非。

九者呼鬼，問以吉凶。

右五德九功，隨人所能，能行之

者，總名爲功，功者工也，工者能也，能救世者助國扶命，益物濟身，幽顯有賞，自六功至九其事多邪，不精持戒，必陷魔群，道之下品，有此三階法甚危險，慎之乃佳，佳者求進，辭略言之。

選賢薦德

師量弟子，計功補過，小愆可恕，

大德宜嘉，凡立功德，五九相和，九經

三術，各有所長，修此業者，又有洪纖，

小弱卑微，擬門驅使，負薪汲水，隨力

效勤，中人侍衛，拂拭左右，灑掃庭內，

端正香燈，摩研點筆，傳譯語言，大者

富貴勢力，讚揚聖化，化惡爲善，導歸

師門，必此功勤，感動幽顯，未敢求進，

師當薦之，遷籙不依，年限隨次，或超

受兼自案前儀，消息刺語，若必賢能，

堪執刀筆，薦爲書吏，其文如左。

某州郡縣鄉里男女生姓名，年歲字某某月日生。

右一人某年月日時，從臣或師男女官祭酒道士姓名，受某官籙，在治效勤，涉如千年月，太玄都正一平炁，係天師某治絜祭酒，臣某叩頭死罪，再拜

上言：謹案文書，前狀某奉法精修，弘道進德立功勤款，宜蒙顯署，已被仙官吏兵，以自防衛某，不以微賤貪生，樂活願慕清化，習學方術，書畫並精，才識朗達，求爲書吏，助時理絜，某自誓三年洗心，試效臣案，師法領戶十以上，署書吏一人，五十戶以上署二人，三百戶以上署四人，五百戶以上署八人，千戶以上署十二人，二千戶以上，依此爲率，臣某今領戶若干，依科應署書吏若干人，識真者稀，堪事者少，今搜索忠賢，隨能署置前舉，某鄉里男女生姓名，補任所闕，未充或未有所舉，於事是須，今請以某爲一時有好道欲，樂補者來復續上，願

太上諸君丈人天師君，以道絜覆蓋臣某

及某身，令在事日覺聰明，心開意悟，不使凡俗，所見仙訣，臣某當與某併心盡力，爲太上驅馳，不致逋懈，省某情行，自誓年滿，堪爲民主，當別騰言署，爲祭酒拜授之日，自更刺章，肉人元元，誠可哀愍，願道炁歸流，赦降愆咎，臣某不勝受恩，謹拜章上聞，願天曹典者，科省聽許，恩惟太上云云。

右署書吏章，書吏對奏，奏竟九拜而已，前禮請謝師如常書吏，拜後三月，言功准錄生儀。

褒賞謙讓

書吏錄生，慧解易悟，骨炁合真，自然有分，先習散炁，散炁者童男童女，諮問生炁不死之方，粗知終始，便進散化，散化一將軍錄，稱散炁童男童女，祭酒十將軍錄，稱散官保炁祭酒七十錄，稱散官持炁祭酒百五十錄，稱晞炁祭酒，皆行符勅水，教訓萬民，章表奏聞，濟生救死，化得三人爲一功，三功爲一勤，三勤爲一勳，勳者有德，仍得署治内外星宿，隨次受之，有勳德者

師友褒賞，其文如左。

國號如千年太歲某某月朔日，子孫天師某治炁祭酒姓名，叩頭死罪，敢言之天師門下，伏聞

大道應感化，導善人，先亦妙法，秉法須才，才者執法幹事功成，恩濟蒼生，澤潤幽顯，竊見某州郡縣鄉里，男女生姓名年歲字某，稟性淵深，少明經術，持戒精嚴，處事平允，剛而能柔，通而能斷，風炁高朗，人鬼所憚，實宣化之良才，救時之俊士，毀至不戚，譽來不欣，幽既獨善，顯必兼通，宜進真化，以獎後賢，且其在任，已經年所，書局應遷，親臨正化，仰惟明師，善於信受，冒獻丹誠，言不人廢，所貢翹勤，伏待嘉旨，某叩頭叩頭，死罪死罪，師教所舉，唯賢實允時務，即命門下，頃刻施行，此教出後，謙讓如左。

某錄男女生姓名，惶恐言伏，見男女生官姓名，褒文謬舉，聖旨曲章，祇奉驚慙，心形飛越，某幸遭妙化，恩溢生涯，方思竭誠專修，所忝懼於負殿，實敢希遷，教許守分，法開濟時，謹冒披丹，理

乖飾讓，伏願尊慈，特迴成命，賜遂愚款，息叨非據，免忘寵之咎，全保寡之真，蒙斯載躍，不敢塵嚴，某誠惶誠恐，叩頭叩頭，死罪死罪。

太歲某某月日

師教敷化，須賢待才甚渴，衆議勿違，宜寢謙讓，師之所命，友之所推，勞不敢憚，逸不敢欣，苟有不堪，志有所慕，具得自陳。辭一至三，不得多。

過度散化章

某州郡縣鄉里男女姓名年歲，若童男女父母啓師爲奏之若夫妻應同受師不得偏坐狀某稟性質直，志合忠樸，心好長生，行應端慤，清虛真實，宜稟中真依科漸昇，請受散炁。

某年月日男女生官姓名

右五人保舉。

上言：謹案文書，臣以頑昧，宣化無方，雖思精誠，補益師老，而愆多功薄，恒懼危墜，大慈含弘，賜全首領，誓立微勤，仰訓

皇極，依法搜賢，宣和正炁。右牒男女生官姓名，生長流浪之俗，而能潔己守

真，願樂清玄，屬素通詣，進問師法延生之方，元元之情，著於丹赤，求乞之勤，感於影像，臣以玄中至妙，道法所重，愚俗守迷，修奉者少，某今專信，情在不移，伏想

皇極，當所思聞，輒具告真言陰陽之施，夫妻二儀，種民之要，三五七九，更相過度，同出三界，逍遙三清，謹為請陰陽生炁度道君吏，九炁丈人逮召君吏，消灾散禍解厄君將吏，天地水三官考召君將吏等，一合下入某身中，經營內外，辟除患害，安魂定魄，斷滅三蟲，養育玄根，又遣臣所佩左右官使者，陰陽神決吏二人，上詣

泰清仙都玉曆，著某生錄，削某死籍，當令某長生久視，永為種民，某以單衣一要為信，乞未奉道之前千罪萬過，令悉赦貫，恩惟

太上。如常中，言操臣為男女生姓名拜上，請官度散化章也。度散化章用中法出官儀，在別卷中。

凡受散化，具得治寫二十四卷，習讀存思，預中章驅使，未備真炁，不得為師。

有愆悔謝

凡有愆罪招奪符籙或去失，皆投辭悔謝，大體如左：

某州郡縣鄉里男女姓名年歲，匍匐頓頰，謝罪乞恩辭，某以草苗，謬遭大化，乞垂慈育，賜以生津，某年月日蒙署某錄，施行越科，致招考謫，某年月日時，某事觸忤公私，犯負

三尊，師命門人，招奪所佩某錄，或某年月日時於某處某事，去失所佩某錄，從實言之，責躬自咎，殺身無補雀鼠願活，冒乞更造之恩，誓浣心腹，希重蘇之澤，改往修來，不敢以前為比，伏願玄慈特垂，一開大宥，賜使朽骨，更肉獎勗，已枯還萑，謹冒依科，輸罰如法，曲蒙愍恕，萬沒猶生，仰塵清嚴，伏增汗悚，謹辭。

太歲某某月日時奉辭

師受辭後，詳量輕重，依科奏聞，隨宜授署，三失三愆，不得重受，殊功異德，二十五年，乃得受耳，凡殊功異德，不可勝言，譽其大較，觸類準用，其才智濟世，文武匡時，建立治舍，宣揚

玄風，化惡還善，執正除邪，傾國倒家，供養三寶，遠略權謀，誅鬼滅賊，平定四方，安寧社稷，救死濟生，興隆道教，盡力竭財，積無退悔，能如斯者，是殊功異德也。

受謫後無功

凡有過即謝，不得逾時，寅時有過，不得過卯，若事趣逾時，不得間日，三日不謝，罰又倍之，九日不謝，謝不得原，原在九日之內，原後三日，便應立功，九日之內，不能立功，惑愚頑卑，猥不知自效，或衰老貧病，財力不充，或童蒙未悟，父母又凡，不能代兒立續輪勤，遂乃歷年直置勿署，久久之後，忽有殊功，隨德次進，明師量也。

受謫後有功

凡受謫之後，三日九日，或悔謝有期，期限畢訖，輸罰如科，依例得署，不問小大皆從，更令始有殊功者趣集隨宜。

凡有罪奪錄，後原更受，同去失之科，輸罰飯賢，不得致闕，師取其先錄，依法淨之，去失格奪，首謝日周，師為

奏考章。

失錄首謝，乞恩遷考章，未受治，不得自遷，考已受出，官得自奏章也。

上言：謹案文書，某州郡縣鄉里男女生姓名，年歲某月日時生，叩搏首罪乞恩辭，素下官子孫，千載運會，得隸道門，奉屬

太上諸君丈人道法垂護，以自保持，蒙恩端正，誠自勸進，某昔以某年月日時詣師，或天師某官姓名，謝受某官將軍錄，吏兵營衛，積年安隱，某施行多違，罪過山疊，招延考罰，非意去失，某年月日時，於家或在某處，遭公私逼迫，水火盜賊，依實言之，不知所佩錄何在，尋檢不得，或恐燒沒，凶人將去，隨事言之，依法自譴，輸薪如千車，設厨如干人，以贖除罪過，得受更令，臣妾不勝，見肉人元元，謹爲拜章以聞，願上官典者分別省理，乞丐原赦某身千罪萬過，宿新愆障，一切蕩除，依案科制，輸失伏罪，首過乞恩，得署九官，別當刺請，今先陳言。

勅某自誓，改往修來，原罪除咎，功行日

新，與之更始，保其慎終，所失將軍吏兵，致有考召謁還，天曹各安官府，無有恚恨，恩惟太上。云云

有治者失錄自遷考章

上言：謹案文書，某以凡微，千載之會，得在道化，效勤無績，愆闕屢修，彰上師家，以自保持，蒙賜如干將軍錄，內以治身，外以治病，得有今日，誠自歡慰，豈是肉人所能負荷，而奉修不謹，無狀多違，招延考譴，忽以某月日，零失所佩，推尋追求，不知所在，某思過自責，爰從受錄以來，實無功賞，獎助之勤，吏兵坐某，致有罪負，繫在三官，至今削奪，零失所佩，伏自剋責，追謝前愆，歸命

大道，乞一切之恩，謹冒罪拜章，謝聞上官典者，通行文曹，赦千罪萬過，某雖憑請高，在化日淺，不知逆順，今剋心蕩腸，改惡修善，乞原往日之釁，更錄將來之誠，所求錄上將軍吏兵，遷還本職，今依科輸譴，布德道門，恩惟

太上裁垂省察，分別求哀。此失錄解考謝罪章事訖輸解吏罰自改也。

輸罰未備遷考章

上言謹案文書，某州郡縣鄉里，男女生姓名年歲，妻息年歲，叩頭自搏，首罪乞恩辭，列素肉人，頑愚無知，貪生樂活，以某年月日，詣某官祭酒姓名，受某錄吏兵，以自保持，從來受恩，身體強健，肉人奉法懈怠，防險不固，以某年月日，行於某處，忽然失去符錄，思過責躬，累自首謝，從道求哀，比加賞慕，四出尋博，遂失所在。有罪云頑愚觸壁，致招深尤，某年月日時，爲某事犯違師法，所佩某錄被奪，悔謝剋躬，誓自改勵，叩頭向臣求乞平省，伏案師法，去失有罰，罰後更署，立功依科，某失如干將軍錄，罰薪如干車，飯賢如干人，制罰責者，以肅其違，值今灾厄，私門困苦，敢緣大道慈仁含弘，每愍凡愚，法有申延，某失某錄，即應被罰，但某童蒙，加且女弱，或又老年，不任樵伐，未辦飯賢，誓志爲計，展其立功，求乞哀恕，臣輒愚情，量儀準法，使行送罰，薪如干車，飯賢如干人，以爲微漸，懼不上合，伏用悚息，如蒙矜允，所送薪及飯賢如干

人，共值如干，又詣治請受，更令九官錄，謹爲上聞，尋願白刺，其飯賢如干人，別剋良日，於治施設，所餘薪及飯賢未具，須賚詣治，解了解了，之後進受仙靈二官，某自申明

太上天師洪澤大恩，臣草苗小子，不明大度，謹冒湯火，拜章上聞，願上官典者特垂矜省，原某愆失，千罪萬過，若有考召君吏爲言功舉遷，加官益秩，無令患恨，恩惟

太上云云。

送罰遷考後受九官刺

某州郡縣鄉里，男女姓名年歲子某，戶屬男女主者姓名，治男女生姓名保舉。右牒男女生某某年月日時，從臣或男女官祭酒姓名天師如干世男子孫張某，受如干將軍錄，奉法違科，致招考罰，某年月日時，於某處爲某事，或無故不覺去失，水火盜賊逼奪，隨事言之尋覓積日，盡心竭力，遂不能得，未測所在，甘罪吞音，不敢怨訴，但蟲蟻願活，草苗貪生，恐值年世，百毒流行，罪穢肉身，無所佩帶，深懼遭罪，命若晷刻，仰緣

大道慈父聖母，含弘曲濟，開許自新，某今改往修來，依科輸罰，洗心款到，遷考乞恩請署，更令九官吏兵如法請給，係天師某治炁祭酒，臣某稽首再拜，謹刺上言如牒，男女生某，前受某官錄，罪考去失，今輸罰乞署謹條，州郡縣鄉里姓名年紀，所屬主者保舉人名，謹遣功曹使者考召君等，署正肉人，審知誠狀，某應蒙原恕，宜署九官及時當下，肉人元元，須待拜署，謁言上官，謹以刺言，臣某誠惶誠恐，稽首再拜，詣如前。

送署遷考後受九官章

上言謹案文書，某州郡縣鄉里，男女生姓名年歲，某年月日時生，今住某處，即日叩頭自搏，首罪乞恩辭，某實凡微，蟲草之末，謬藉先善，叨廁人流，良緣增長，聞見正真，前以慕化制屬大法，好道樂神，願得久視，某年月日時，詣天師某官祭酒姓名，受仙靈若干將軍錄，積若干年無功罪，積爲考所逮，某年月日，失所佩錄，無狀所招，比過自責，推求不得，某從來實，不自關啓，諸有負坐，跪君跪吏，閉繫三官，願爲原赦，刑

罪功賞，時達還官，復職各如故事，某以晚生，遭化日淺，未解逆順，今當自責，出若干某物以自拔，贖備錄科格，某改往修來，乞丐原赦前後刑謫，與之更始，特蒙矜愍，即日署更，令九官昨向某時入刺如牒，須待報應拜授諸應下者，及時營護肉人有功，遷序依天曹科，比所考事，立九官吏兵，隨逐覆祐，滅罪興福，道德日昇，功業成就，恩惟太上云云。

輸罰受錄後三日謝恩言功章

上言謹案文書，某以無狀，罪過委積，以某月日時，忘失所佩，如干將軍錄，思愆自責，推求不得，從實關啓，被蒙恩覆，男女師姓名，某月日更賜拜署，非肉人所可重招，不勝喜悅，拜章以聞，先跪君跪吏，閉繫在三官者乞，一切之恩，願爲赦貸，刑罪還官復職，各如故事，某遭化日淺，未知逆順，今誓改往修來，不敢以先爲比違負之愆，特丐更始，願從今以去，金石爲開，水火爲滅，所治者差，所化者化，以明師道，有信之效，輒當勸示，愚民不敢懈怠，恩

惟
太上云云。

正一法文太上外籙儀

(錢安靖點校)

029 太上三五正一盟

威籙

經名：太上三五正一盟威籙。
撰人不詳，約出於南北朝，係早期天師道法籙。其注文中出現宋代地名，當係後人所加。六卷。底本出處：《正統道藏》正一部。

太上三五正一盟威籙卷之一

太上正一童子一將軍籙品第一
 炁應正月節，其日在虛，鎮陽平治，冬至後四十五日立春。
 太上正一童子十將軍籙品第二
 炁應正月中，其日在危，鎮鹿堂治，冬至後六十日雨水。
 太上正一一百五十將軍籙品第三
 炁應二月節，其日在室壁，鎮鶴鳴

治，冬至後七十五日驚蟄。

太上正一三將軍籙品第四

炁應二月中，其日在奎，鎮漓沅治，冬至後九十日春分。

三太上正一童子一將軍籙品第一


鎮陽平治左平炁祭酒，屬金，在彭州九隴縣，惠虛，宿立春正月節。

維某年某歲月朔日辰，某州郡縣鄉里某乙，本命某某月日時生，上屬北斗某星君，言被五炁神童君召，某乙素以胎生肉人，宿緣有韋，得遇大道，謹齋法信，詣某名山某宮觀，投某法師門下，拜受太上正一童子一將軍籙，籙中真吏受佩之後，一如科法修行，請給謹狀。

上仙都直使功曹一人，
 上仙都正一功曹一人，
 上仙都治病功曹一人，
 上仙都左官使者一人，
 上仙都陽神決吏一人，
 上仙都狼吏虎賁各十二人，

上仙都察奸鉤騎各十二人，
 上仙都三官僕射各十二人，
 上仙都天騶甲卒各十二人，
 上仙都天丁力士各十二人，
 上仙都收炁食炁吏各十二人。


卷內符圖並朱書。
 神將金甲青帶



上靈官直使功曹一人，
 上靈官正一功曹一人，
 上靈官治病功曹一人，
 上靈官左官使者一人，
 上靈官陽神決吏一人，
 上靈官狼吏虎賁各十二人，

上靈官察奸鉤騎十二人，
上靈官三官僕射十二人，
上靈官天騶甲卒十二人，
上靈官天丁力士十二人，
上靈官收炁食炁吏十二人。

金甲綠帶



三太上正一童子十將軍錄品第二


鎮鹿堂治右平炁祭酒，屬水，在漢州
綿竹縣，應危宿，雨水正月中。

某法錄弟子某乙命屬北斗某星君，
夙被五炁神童君召，謹齋香信，詣某法


師門下，拜受太上正一童子十將軍錄，
一如科約，律令。

上仙都直使功曹一人，
上仙都正一功曹一人，
上仙都治病功曹一人，
上仙都左官使者一人，
上仙都陽神決吏一人，
上仙都治病陽官太醫吏二人，
赤天曆旗剛風騎將軍二人，
赤天曆旗剛風左騎將軍二人，
赤天曆旗剛風右騎將軍二人，
赤天曆旗剛風將軍二人，
赤天曆旗剛風左將軍二人，
赤天曆旗剛風右將軍二人，
上仙都狼吏虎賁二百四十人，
上仙都察奸鉤騎二百四十人，
上仙都三官僕射二百四十人，
上仙都天騶甲卒二百四十人，
上仙都天丁力士二百四十人，
上仙都收炁食炁吏二百四十人，
上仙都科車赤符吏二百四十人，
上仙都剛風騎置驛馬上章吏各二人。

上靈官直使功曹二人，
上靈官正一功曹二人，
上靈官治病功曹二人，
上靈官左官使者二人，
上靈官陽神決吏二人，
上靈官治病陽官太醫二人，
上靈官中都騎將軍二人，
上靈官中都左騎將軍二人，
上靈官中都右騎將軍二人，
上靈官中都將軍二人，
上靈官中都左將軍二人，
上靈官中都右將軍二人，
上靈官狼吏虎賁二百四十人，
上靈官察奸鉤騎二百四十人，
上靈官三官僕射二百四十人，
上靈官天騶甲卒二百四十人，
上靈官天丁力士二百四十人，
上靈官收炁食炁吏二百四十人，



上靈官科車赤符吏二百四十人，
上靈官剛風騎置驛馬上章吏二人。



三太上正一上仙百五十將軍錄品

第三


鎮鶴鳴治左長炁祭酒，屬金，在邛州
大邑縣，應室壁二宿，驚蟄二月節。

某法錄弟子某乙，命屬北斗某星
君，奉法以來，專勤不替，在道日新，領
太上高皇帝王神炁不能自分別，詣臣自
實悉言，被无下九老北中狄君召，即日
聽署修行有功，求受太上正一上仙百
五十將軍錄，要當扶助，一依科約，不
敢有違，請給，謹詞。

上仙都直使功曹十五人，
上仙都正一功曹十五人，

- 上仙都治病功曹十五人，
- 上仙都左官功曹十五人，
- 上仙都右官功曹十五人，
- 上仙都陽神決吏十五人，
- 上仙都陽神治病功曹十五人，
- 上仙都陰神決吏十五人，
- 上仙都陰神治病功曹十五人，
- 上仙都治病陽官太醫吏十五人，
- 上仙都治病陰官太醫吏十五人，
- 赤天曆旗剛風將軍五人，
- 赤天曆旗剛風左將軍五人，
- 赤天曆旗剛風右將軍五人，
- 赤天曆旗剛風中宮大將軍五人，
- 赤天曆旗剛風中宮左將軍五人，
- 赤天曆旗剛風中宮右將軍五人，
- 赤天曆旗剛風大驛將軍五人，
- 赤天曆旗剛風都驛將軍五人，
- 赤天曆旗剛風左驛將軍五人，
- 赤天曆旗剛風右驛將軍五人，
- 赤天曆旗左剛風官騎將軍五人，
- 赤天曆旗右剛風官騎將軍五人，
- 赤天曆旗剛風左騎將軍五人，
- 赤天曆旗剛風右騎將軍五人，



- 上仙都郎吏虎賁千二百人，
- 上仙都察奸鉤騎千二百人，
- 上仙都三官僕射千二百人，
- 上仙都天騶甲卒千二百人，
- 上仙都天丁力士千二百人，
- 上仙都收炁食炁吏六十人，
- 上仙都收神食神吏六十人，
- 上仙都收鬼食鬼吏六十人，
- 上仙都收邪食邪吏六十人，
- 上仙都收毒食毒吏六十人，
- 上仙都收兇食兇吏六十人，
- 上仙都收精食精吏六十人，
- 上仙都收瘟食瘟吏六十人，
- 上仙都科車赤符吏六十人，
- 上仙都剛風騎置驛馬上章吏二人。



- 上靈官直使功曹十五人，
- 上靈官正一功曹十五人，
- 上靈官治病功曹十五人，
- 上靈官左官使者十五人，

上靈官右官使者十五人，
 上靈官陽神決吏十五人，
 上靈官陰神決吏十五人，
 上靈官陽官治病功曹十五人，
 上靈官陰官治病功曹十五人，
 上靈官治病陽官太醫吏十五人，
 上靈官治病陰官太醫吏十五人，
 上靈官驛騎將軍五人，
 上靈官左驛騎將軍五人，
 上靈官右驛騎將軍五人，
 上靈官都官驛騎將軍五人，
 上靈官左都官驛騎將軍五人，
 上靈官右都官驛騎將軍五人，
 上靈官都官將軍五人，
 上靈官左都官將軍五人，
 上靈官右都官將軍五人，
 上靈官都督將軍五人，
 上靈官左都督將軍五人，
 上靈官右都督將軍五人，
 上靈官中騎將軍五人，
 上靈官中騎左將軍五人，
 上靈官中騎右將軍五人，
 上靈官狼吏虎賁千二百人，

上靈官察奸鉤騎千二百人，
 上靈官都官僕射千二百人，
 上靈官天騶甲卒千二百人，
 上靈官天丁力士千二百人，
 上靈官收炁食炁吏六十人，
 上靈官收神食神吏六十人，
 上靈官收鬼食鬼吏六十人，
 上靈官收邪食邪吏六十人，
 上靈官收毒食毒吏六十人，
 上靈官科車赤符吏六十人，
 上靈官剛風騎置驛馬上章吏二人。



三太上正一三將軍錄品第四


鎮漓沅治，右長炁祭酒，屬土，在彭州九隴縣，應奎宿，春分二月中。

某法錄弟子某乙，命屬北斗某星君，奉道勤修，勸化有功，精誠不懈，在道日新，素被太元三炁君召某乙，即日聽署，依天師舊儀，齋信拜受太上老君左右中三將軍兵士都九千萬眾附身律令。

左上仙蔽身大將軍一人，姓唐名宏，字文明，身長七十二丈，赤幘大冠單衣，手執金符，帶劍，從兵三十萬眾，從五炁浮雲中，下入某左腎中，生百脉進益某身。


赤幘黃袍皂緣朱履





右上靈隱影大將軍一人，姓葛名雍，字文度，身長七十二丈，赤幘大冠單衣，手執金剛玉戟，帶劍，從兵三萬眾，乘赤炁浮雲，下入某右腎中，生百脉進益某身。


赤幘紅袍阜緣紅帶朱履



中上仙藏形大將軍一人，姓周名武，字文剛，身長九十二丈，赤幘大冠

單衣，手執朱陽之節，帶劍，從兵三萬眾，乘三五赤炁浮雲，下入某身中進益某身。

赤幘黃袍阜緣朱履



太上三五正一盟威錄卷之一

太上三五正一盟威錄卷之二

太上正一上靈百鬼召錄品第五

炁應三月節，其日在婁，鎮葛瓚治，冬至後一百五日清明。

太上正一元命混沌赤錄品第六

炁應三月中，其日在胃，鎮庚除治，冬至後一百二十日穀雨。

三 太上正一上靈百鬼召錄品第五

鎮葛瓚治左都領炁祭酒，屬火，在彭州九隴縣，應婁宿，清明三月節。

某法錄弟子某乙，命屬北斗某星君，今齋香信，詣某法師門下，求受太上正一上靈百鬼召錄，內以治身，外以救人，誅邪滅惡，昇度七祖，召喚諸神，應口即至，不召不得妄想干犯，某身受召之後，一如科約奉行，不得違背，違背之日，甘當冥考，急急如律令。

上靈官直使功曹十二人，
上靈官左玄功曹十二人，

上靈官右玄功曹十二人，
上靈官左官使者十二人，
上靈官右官使者十二人，
上靈官治病功曹十二人，
上靈官左腋使者十二人，
上靈官右腋使者十二人，
上靈官左陽神決吏十二人，
上靈官右陽神決吏十二人，
上靈官左陰神決吏十二人，
上靈官右陰神決吏十二人，
上靈官左上使者十二人，
上靈官右上使者十二人，
上靈官左醫治十二人，
上靈官右醫治十二人，
上靈官左上炁十二人，
上靈官右上炁十二人，
上靈官左承炁吏十二人，
上靈官右承炁吏十二人，
上靈官左都使者十二人，
上靈官右都使者十二人，
上靈官左收炁使者十二人，
上靈官右收炁使者十二人，
上靈官左扶身使者十二人，


上靈官右扶身使者十二人，
上靈官左元收炁食炁吏十二人，
上靈官右元收炁食炁吏十二人，
上靈官左收邪食邪吏十二人，
上靈官右收邪食邪吏十二人，
上靈官左收鬼食鬼吏十二人，
上靈官右收鬼食鬼吏十二人，
上靈官左曆旗將軍十二人，
上靈官右曆旗將軍十二人，
上靈官左曆旗將軍十二人，
上靈官右曆旗將軍十二人，
上靈官左上曆旗將軍十二人，
上靈官右上曆旗將軍十二人，
上靈官左太元將軍十二人，
上靈官右太元將軍十二人，
上靈官左元曆旗將軍十二人，
上靈官右元曆旗將軍十二人，
上靈官左元曆旗將軍十二人，
上靈官右元曆旗將軍十二人，
上靈官左陽神將軍十二人，
上靈官右陽神將軍十二人，
上靈官左陰神將軍十二人，
上靈官右陰神將軍十二人，
上靈官左上都騎將軍十二人，
上靈官右上都騎將軍十二人，

上靈官左太一都騎將軍十二人，
上靈官右太一都騎將軍十二人，
上靈官左天曆旗將軍十二人，
上靈官右天曆旗將軍十二人，
上靈官左上三天九府將軍十二人，
上靈官右上三天九府將軍十二人，
上靈官左上風騎將軍十二人，
上靈官右上風騎將軍十二人，
上靈官左玄一曆旗將軍十二人，
上靈官右玄一曆旗將軍十二人，
上靈官左三元玄皇將軍十二人，
上靈官右三元玄皇將軍十二人，
上靈官左上殺符將軍十二人，
上靈官右上殺符將軍十二人，
上靈官左上皇護身將軍十二人，
上靈官右上皇護身將軍十二人，
上靈官赤天剛騎使者十二人，
上靈官紫宮度世使者十二人，
上靈官清妙度世使者十二人，
上靈官玄元度世使者十二人，
上靈官天丁力士十二人，

上靈官天騶甲卒十二人，
 上靈官天醫玄都使者十二人，
 上靈官九宮八極使者十二人，
 上靈官左天騎吏十二人，
 上靈官右天騎吏十二人，
 上靈官左天上使者十二人，
 上靈官右天上使者十二人，
 上靈官左上玄元使者十二人，
 上靈官右上玄元使者十二人，
 上靈官左官赤狼使者十二人，
 上靈官右官赤狼使者十二人，
 上靈官左清風護騎使者十二人，
 上靈官右清風護騎使者十二人，
 上靈官左玄朱雀使者十二人，
 上靈官右玄朱雀使者十二人，
 上靈官左科車赤符吏十二人，
 上靈官右科車赤符吏十二人，
 上靈官左正一使者十二人，
 上靈官右正一使者十二人，
 上靈官左元玄武使者十二人，
 上靈官右元玄武使者十二人，
 上靈官左上九元使者十二人，
 上靈官右上九元使者十二人，

上靈官左三元四始使者十二人，
 上靈官右三元四始使者十二人，
 上靈官左上走虎賁吏十二人，
 上靈官右上走虎賁吏十二人，

二神取宜裝



三 太上正一元命混沌赤籙品第六

鎮庚陰沾右都領炁祭酒，屬水，在漢州綿竹縣，應胃宿，穀雨三月節。

某法籙弟子某乙，命屬北斗某星君下生，素被君中狄召，某乙今謹齋香信，

詣某法師門下，求受太上正一元命赤天三五混沌赤籙，籙中真官嚴裝顯服，度人身中，某佩受之後，一如科約，不得有違，有違之日，甘當冥考，急急如律令。
 上三天三五元命直使功曹一十五人，
 上三天三五元命形神正一功曹一十五人，
 上三天三五元命生形治病功曹一十五人，
 上三天三五元命左官形神使者一十五人，
 上三天三五元命右官形神使者一十五人，
 上三天三五元命內陽神決吏一十五人，
 上三天三五元命內陰神決吏一十五人，
 上三天三五元命生炁陽官治病功曹一十五人，
 上三天三五元命生炁陰官治病功曹一十五人，
 上三天三五元命日陽官生炁治病太醫一十五人，

上三天三五元命月陰官生炁治病太醫一十五人，

上三天三五元命星官攻伐却敵功曹一十五人，

上三天三五元命司命吏一十五人，

上三天三五元命司錄吏一十五人，

上三天三五元命司危吏一十五人，

上三天三五元命司伐吏一十五人，

上三天三五元命司誠吏一十五人，

上三天三五元命司奸吏一十五人，

上三天三五元命司政吏一十五人，

上三天三五元命司察吏一十五人，

上三天三五元命文昌中官中黃九道司

命一十五人，治官

赤天三五混沌生身蔽神斗剛大將軍九

人，治右腎，三五定生。

赤天三五混沌生身蔽神斗剛左將軍九

人，治左腎，三五定生。

赤天三五混沌生身蔽神斗剛右將軍九

人，治右腎，三五定生。

赤天三五混沌生身蔽神斗魁大將軍九

人，治右腎生肝。

赤天三五混沌生身蔽神斗魁左將軍九

人，治左腎生肝。

赤天三五混沌生身蔽神斗魁右將軍九

人，治右腎生肝。

赤天三五混沌生身蔽神斗魁大將軍九

人，治右腎生魂。

赤天三五混沌生身蔽神斗魁左將軍九

人，治左腎生魂。

赤天三五混沌生身蔽神斗魁右將軍九

人，治右腎生魂。

赤天三五混沌生身蔽神斗魁大將軍九

人，治右腎生形。

赤天三五混沌生身蔽神斗魁左將軍九

人，治左腎生形。

赤天三五混沌生身蔽神斗魁右將軍九

人，治右腎生形。

赤天三五混沌生身蔽神斗魁大將軍九

人，治右腎生肺。

赤天三五混沌生身蔽影斗魁左將軍九

人，治左腎生肺。

赤天三五混沌生身蔽影斗魁右將軍九

人，治右腎生肺。

赤天三五混沌生身蔽影斗魁大將軍九

人，治右腎生脾。

赤天三五混沌生形蔽影斗魁左將軍九

人，治左腎生脾。

赤天三五混沌生形蔽影斗魁右將軍九

人，治右腎生脾。

赤天三五混沌生形蔽影斗魁大將軍九

人，治心生魄。

赤天三五混沌生形蔽影斗魁左將軍九

人，治心生魄。

赤天三五混沌生形蔽影斗魁右將軍九

人，治心生魄。

赤天三五混沌生軀蔽身斗魁大將軍九

人，治心生人。

赤天三五混沌生軀蔽身斗魁左將軍九

人，治心生人。

赤天三五混沌生軀蔽身斗魁右將軍九

人，治心生人。

赤天三五混沌生軀蔽身斗擊大將軍九

人，治心生筋。

赤天三五混沌生軀蔽身斗擊左將軍九

人，治心生筋。

赤天三五混沌生軀蔽身斗擊右將軍九

人，治心生筋。

赤天三五混沌生軀蔽身斗敵大將軍九

人，治心生神。

赤天三五混沌生軀蔽身斗敵左將軍九人，治心生神。

赤天三五混沌生軀蔽身斗敵右將軍九人，治心生神。

赤天三五混沌生軀輔體斗伐大將軍九人，治肝安魂。

赤天三五混沌生軀輔體斗伐左將軍九人，治肝安魂。

赤天三五混沌生軀輔體斗伐右將軍九人，治肝安魂。

赤天三五混沌生軀輔體斗煞大將軍九人，治肝清魂。

赤天三五混沌生軀輔體斗煞左將軍九人，治肝清魂。

赤天三五混沌生軀輔體斗煞右將軍九人，治肝清魂。

赤天三五混沌璇璣却敵大將軍九人，治肝仙魂。

赤天三五混沌璇璣却敵左將軍九人，治肝仙魂。

赤天三五混沌璇璣却敵右將軍九人，治肝仙魂。

赤天三五混沌玉衡破敵大將軍九人，治肺靜魄。

赤天三五混沌玉衡破敵左將軍九人，治肺靜魄。

赤天三五混沌玉衡破敵右將軍九人，治肺靜魄。

赤天三五混沌攻擊大將軍九人，治肺仙魄。

赤天三五混沌攻擊左將軍九人，治肺仙魄。

赤天三五混沌攻擊右將軍九人，治肺仙魄。

赤天三五中黃司命定生大將軍九人，治脾安神。

赤天三五中黃司命定生左將軍九人，治脾安神。

赤天三五中黃司命定生右將軍九人，治脾安神。

赤天三五中黃司命定壽大將軍九人，治脾清神。

赤天三五中黃司命定壽左將軍九人，治脾清神。

赤天三五中黃司命定壽右將軍九人，治脾清神。

赤天三五中黃司命定仙大將軍九人，治脾留神。

赤天三五中黃司命定仙左將軍九人，治脾留神。

赤天三五中黃司命定仙右將軍九人，治脾留神。

上仙都中官執凶狼吏虎賁二百四十萬人。

上仙都中官破敵察奸鈎騎力士二百四十萬人。

上仙都中官斬斷都官僕射力士二百四十萬人。

上仙都中官斬斷三官僕射力士二百四十萬人。

上仙都收炁天丁力士二百四十萬人。

上仙都中官乘魁收炁食炁吏二百四十萬人。

上仙都中官乘斗收神食神吏二百四十萬人。

上仙都中官乘星收鬼食鬼吏二百四十萬人。

上仙都中官乘璇璣收精食精吏二百四十萬人。

十萬人。

上仙都中官乘玉衡收邪食邪吏二百四十萬人。

上仙都中官乘日三五科車赤符吏二百四十萬人。

上仙都中官乘月三五捕鬼使者一百二十萬人。

上仙都中官剛風騎置驛馬上章三五除死籍定生九十萬人。

上仙都中官中黃九道定意吏十二萬人。

上仙都中官中黃九道定志吏十二萬人。

上仙都中官中黃九道定聰智吏十二萬人。

上仙都中官中黃九道定膽智吏十二萬人。

上仙都中官中黃九道六陽六陰成身吏十二萬人。

上仙都中官水神力士七千二百人。

上仙都中官八殺金剛力士七千二百人。

人。

上仙都中官科車赤符使者七千二百人。

上仙都中官科車檢捕使者七千二百人。

上仙都中官執凶狼吏虎賁二百四十萬人。

上仙都中官破敵察奸鉤騎二百四十萬人。

上仙都中官斷斬三官僕射二百四十萬人。

上仙都中官斬截都官僕射二百四十萬人。

上仙都中官擊刺天驪甲卒二百四十萬人。

太仙神明中官收炁食炁天丁力士二百四十萬人。

太仙神明中官乘魁收炁食炁吏二百四十萬人。

太上神明中官乘斗收神食神吏二百四十萬人。

太上神明中官乘璇璣收精食精吏二百四十萬人。

太上神明中官乘玉衡收邪食邪吏二百四十萬人。

太上神明中官乘日三五科車赤符吏二百二十萬人。

太上神明中官乘月科車捕鬼使者一百二十萬人。

太上神明中官剛風騎置驛馬上章吏三五除死籍定生吏一十二萬人。

太上神明中官中黃九道定志吏一十二萬人。

太上神明中官中黃九道定意吏一十二萬人。

太上神明中官中黃九道定聰智吏一十二萬人。

太上神明中官中黃九道定膽智吏一十二萬人。

太上神明中官六陽六陰成身吏一十二萬人。

太上神明中官八煞金剛力士七千二百人。

太上神明中官八神金剛力士七千二百人。



太上神明中官高車使者七千二百人。


太上神明中官科車赤符使者七千二百人。
 太上神明中官科車交擊力士七千二百人。
 上靈官執凶狼吏虎賁力士二百四十萬人。
 上靈官破敵察奸鈎騎力士二百四十萬人。
 上靈官斷斬三官僕射力士二百四十萬人。
 上靈官斬截都官僕射力士二百四十萬人。
 上靈官擊刺天騶甲卒一百二十萬人。
 上靈官乘魁收炁食炁吏一百二十萬人。
 上靈官乘斗收神食神吏一百二十萬人。
 上靈官乘星收鬼食鬼吏一百二十萬人。
 上靈官乘璇璣收精食精吏一百二十萬人。
 上靈官乘日科車赤符吏一百二十萬人。

上靈官乘月科車捕鬼吏一百二十萬人。
 上靈官剛風騎置驛馬上章吏三五除死籍定生吏九十萬人。
 上靈官中黃九道定志吏一十二萬人。
 上靈官中黃九道定意吏一十二萬人。
 上靈官中黃九道定聰智吏一十二萬人。
 上靈官中黃九道定膽智吏一十二萬人。
 上靈官中黃六陽六陰成身吏一十二萬人。
 上靈官科車交擊力士七千二百人。
 天靈官科車赤符使者七千二百人。
 天靈官直使功曹七十二人。
 天靈赤官收神攝神都護二人。
 天靈赤官攝獄吏兵二人。
 天靈赤官斬邪使者二人。
 天靈赤官檢邪直符二人。
 天靈赤官仙人道士玉女百二十人。
 天靈赤官護身不離身將軍一十四人。
 天靈赤官治病功曹使者二人。
 天靈赤官兵曹兵馬吏各九人。

天靈赤官護身將軍各九人。

皇天大道神符令錄契，與某周行八極，神童赤契備衛某身形，千二百官侍衛四方，日月星辰，三五將軍臨廬，四道大丘公天靈赤官，斬邪刺奸二人，八侯君三十六仙童，黃帝君左右都侯墓門丞，江河橋梁山川，仙神社稷即日聽署，若是某所使莫不賓伏衛，送崑崙上昇天極，今齋香信素一百二十尺，五色緣各一端，以置法信，輒依拜受，要明教約，不得截真，若違之日，身謝天地水三官，一如太上老君律令。






童子淺清袍深青緣白帶朱履



天尊綠雲帔深青緣



太上三五正一盟威錄卷之二

太上三五正一盟威錄卷之三

太上正一上仙百鬼召錄品第七

炁應四月節。其日在昴，鎮秦中治，冬至後一百三十五日立夏。

太上正一九州社令錄品第八

炁應四月中，其日在畢，鎮真多治，冬至後一百五十日小滿。

三 太上正一上仙百鬼召錄品第七

鎮秦中治左領神炁祭酒，屬水，在漢州德陽縣，應昴宿，立夏四月節。

某法錄弟子某乙命屬北斗某星君，素被无下九老北中狄君召某乙謹齋香信，詣某法師門下，求受太上正一上仙官百鬼召錄，受佩之後，應有召問立至，不得妄有干犯，急急如律令。

仙靈官直使功曹十二人，

仙靈官正一功曹十二人，

仙靈官左玄功曹十二人，

仙靈官右玄功曹十二人，


仙靈官治病功曹十二人，
仙靈官左官使者十二人，
仙靈官右官使者十二人，
仙靈官左依使者十二人，
仙靈官右依使者十二人，
仙靈官左陽神決吏十二人，
仙靈官右陽神決吏十二人，
仙靈官左陰神決吏十二人，
仙靈官右陰神決吏十二人，
仙靈官左天使者十二人，
仙靈官右天使者十二人，
仙靈官左天醫吏十二人，
仙靈官右天醫吏十二人，
仙靈官左上玄使者十二人，
仙靈官右上玄使者十二人，
仙靈官左承炁使者十二人，
仙靈官右承炁使者十二人，
仙靈官左都使者十二人，
仙靈官右都使者十二人，
仙靈官左收炁使者十二人，
仙靈官右收炁使者十二人，
仙靈官左扶身吏十二人，
仙靈官右扶身吏十二人，

仙靈官左收炁直符吏十二人，
仙靈官右收炁直符吏十二人，
仙靈官左收邪食邪吏十二人，
仙靈官右收邪食邪吏十二人，
仙靈官曆旗將軍十二人，
仙靈官左曆旗將軍十二人，
仙靈官右曆旗將軍十二人，
仙靈官天曆旗將軍十二人，
仙靈官左天曆旗將軍十二人，
仙靈官右天曆旗將軍十二人，
仙靈官左加元曆旗將軍十二人，
仙靈官右加元曆旗將軍十二人，
仙靈官左天騎將軍十二人，
仙靈官右天騎將軍十二人，
仙靈官左太上都騎將軍十二人，
仙靈官右太上都騎將軍十二人，
仙靈官左玄上元將軍十二人，
仙靈官右玄上元將軍十二人，
仙靈官太一都將軍十二人，
仙靈官左天醫將軍十二人，
仙靈官右天醫將軍十二人，
仙靈官左三天九府將軍十二人，
仙靈官右三天九府將軍十二人，

仙靈官左上皇護騎將軍十二人，
仙靈官右上皇護騎將軍十二人，
仙靈官左剛風騎將軍十二人，
仙靈官右剛風騎將軍十二人，
仙靈官左玄曆旗將軍十二人，
仙靈官右玄曆旗將軍十二人，
仙靈官左上煞將軍十二人，
仙靈官右上煞將軍十二人，
仙靈官左陽神將軍十二人，
仙靈官右陽神將軍十二人，
仙靈官左陰神將軍十二人，
仙靈官右陰神將軍十二人，
仙靈官赤天罔收炁使者十二人，
仙靈官紫宮度世使者十二人，
仙靈官清妙度世使者十二人，
仙靈官玄元度世使者十二人，
仙靈官天丁力士使者十二人，
仙靈官天騶甲卒十二人，
仙靈官天醫玄都使者十二人，
仙靈官九宮八極使者十二人，
仙靈官左天騎使者十二人，
仙靈官右天騎使者十二人，

仙靈官九宮玄上使者十二人，
 仙靈官左玄上元使者十二人，
 仙靈官右玄上元使者十二人，
 仙靈官左赤狼使者十二人，
 仙靈官右赤狼使者十二人，
 仙靈官左清風使者十二人，
 仙靈官右清風使者十二人，
 仙靈官左朱雀使者十二人，
 仙靈官右朱雀使者十二人，
 仙靈官科車赤符使者十二人，
 仙靈官科車赤符吏十二人，
 仙靈官正一使者十二人，
 仙靈官左天玄武使者十二人，
 仙靈官右天玄武使者十二人，
 仙靈官左上九天使者十二人，
 仙靈官右上九天使者十二人，
 仙靈官左三元四始使者十二人，
 仙靈官右三元四始使者十二人，
 仙靈官左走虎賁吏十二人，
 仙靈官右走虎賁吏十二人。

綠冠黃服綠
 雲帔青緣



綠冠紅服綠緣青
 披深青緣朱履




三 太上正一九州社令錄品第八


鎮真多治右領神炁祭酒，屬水，在漢州金堂縣，應畢宿，小滿四月中。

某法錄弟子某乙，命屬北斗某星君，今謹齋法信，詣某法師門下，奉受太上正一九州社令錄，遣察行九州名


山川澤，五嶽四瀆，五湖四海，三十六國，萬二千鄉亭里域，周遍上下无極，東西南北，限召衆邪故炁萬鬼立到，不得遷歷，救治萬民，千二百鬼注依法收錄，萬神常在，左右侍從，延年益壽，除凶度厄，某乙受佩之後，一如科約，不得違背，有違之日，甘當冥考，不敢有恨，修行精誠，即日聽署，前部吏兵，素被中治明道神君召，詣臣拜受請給，謹詞。




符召天帝
 兵馬急急
 如律令




符召中央
 兵馬急急
 如律令




符召中庭
 大神獄拯
 吏兵馬急
 急如律令




符召南方
兵馬急急
如律令




符召河伯
君急急如
律令




符召太山
二千石急
急如律令




符召山川
黑神急急
如律令




符召社
君急急
如律令




符召當路
墓伯急急
如律令




符召當路
君急急如
律令




符召中庭
傷亡鬼急
急如律令




符召口舌
鬼急急如
律令




符召社
長急急
如律令




符召社
令急急
如律令




符召太山真
符召主斬急
急如律令




符召太山
直符急急
如律令




符召尸
鬼急急
如律令




符召社君收
捕邪精鬼賊
急急如律令




符召斬
鬼急急
如律令




符召井卿以
行置井急急
如律令




符召門鬼以
符置門急急
如律令




符召社公以
符置社庭中
急急如律令




符召翟公
里社急急
如律令




符召厭故無
乙酉日水噴四
角以封依領急
急急如律令




符召河
伯急急
如律令




符召東海
神急急如
律令




符召東方
兵馬急急
如律令




符召左右將
軍都尉急急
如律令




符召社封虎
穴以符封之
急急如律令




符召北方
兵馬急急
如律令




- 度火厄 度牢獄厄
- 度落水厄 度大厄
- 度病厄 度小厄
- 度歲厄 度月厄
- 度日厄 度時厄
- 度男子厄 度生死厄
- 度危亡厄 度犯星厄
- 度宅上厄 度黃病厄
- 度九宮厄 度一切厄
- 度本命厄 度行年厄
- 度考責厄 度刀兵厄
- 度魂魄厄 度婦厄
- 度禿厄 度男女厄
- 度枷鎖厄 度產厄
- 度湯火厄 度自縊厄




符召八風
使者急急
如律令




符召南方
兵馬急急
如律令




符召太山
君急急如
律令




符召太山
二千石急
急如律令




符召白虎
斬鬼急急
如律令




符召廣漢
神急急如
律令




符召東方
兵馬急急
如律令




符召河
神急急
如律令




符召先祖
鬼急急如
律令




符召左右
將軍急急
如律令



符召河伯
鬼急急如
律令




符召太山
兵馬急急
如律令




符召左將
軍兵馬急
急如律令




符召右將
軍兵馬急
急如律令




符召東方
軍吏急急
如律令




符召社
左急急
如律令




符召北海
神急急如
律令




符召當路
神急急如
律令




符召社封
吏兵急急
如律令




符召吳
神急急
如律令




符召墓封
伯急急如
律令



符召左右
符斬鬼急
急如律令




符召河
侯急急
如律令




符召諸神
王斬鬼急
急如律令




符召神君捕
強精鬼急急
如律令




符召道士
行符急急
如律令




符召鬼日
左急急如
律令




符召南海
神急急如
律令




符召社
右急急
如律令




符召河
丞急急
如律令




符召太山
神急急如
律令




符召溪
女急急
如律令




符召西海
神急急如
律令



符召道士
行印急急
如律令



符召社公
置社急急
如律令



符召南邊
神急急如
律令

上皇諸君符，朱書桃刺，一尺六寸，刺頭當中封天帝使者，印板玉吏兵，芒繩大張，繒綵封題，隨以意所言召問，勿傳泄吾真寶符，未有所治勿召，自帶符籙，百鬼即自知之，叉手擎杖，當於泰清下稽首受之，鬼不從者斬而戮之，急急如律令。臣初受符之時，誓上謂皇天大道君洞達太上无極九宮，神童玉女皆來侍從，乘送迎上遊九天，人間出入，舉言所召即至，不敢致違律令。

王延陵知之存念，令人不病，入水不畏風浪，入軍不被甲兵，一如科法律令。

東方青帝姓吳名曉，
南方赤帝姓劉名鬻，
西方白帝姓哀名敖，
北方黑帝姓夏名禹，
京師社天之心神，姓黃名崇，
冀州社天之頭神，姓馮名遷，
荊州社天之腹神，姓張名賤，
徐州社天之胸神，姓夏名意，一名符一名前。

梁州社天之喉神，姓範名扎，一名禮。
雍州社天之背神，姓楊名謙，
兗州社天之膊神，姓費名前，
揚州社天之足神，姓鄒名混，
青州社天之頸神，姓韓名育，
益州社天之眉神，姓顏名理，
幽州社天之手神，姓戚名季，
伍子胥主廟祇，
獄丞姓名下令除，主諸社神，有坐不召，

符吏即天上主錄，姓賈名衍主捕鬼，
都官從事姓陳名松，主諸司馬，
天司馬空極姓日名巳，主地神，
表道使者姓呂名應，主走道路，
太極令姓朱名雒，主(缺文)
天侯門將軍姓鄧名訓，主武庫錢，
日君姓都名神，主天清地濁，帶六甲符，
月君姓桂名華，主天下順逆，
千害殺君姓魏名玄，主諸符吏太歲，
明主公姓樊名貪，主收捕鬼部中百怪，
中都獄丞姓韓名貴，主領天下不法符吏，

天社君姓伍名庫，主天下社君。

夫欲召萬物神符，丹書桃刺長一尺六寸，封以天帝使者印約，以左索召鬼，其神立至，佩帶符百鬼皆畏，人知大鬼姓名，則悉不為害也，凡諸州神名，主其州中所部縣鄉里域，社君不得令邪精鬼魅血食，大小山神其有不伏者案法召之，鬼應響立至，急急依事召問元由也。

度符法當隨生年所屬依色寸尺，刀一口鑲一雙，度符師取一鑲並物，一者付主使存師符信，能者可署明許慎之，不得傳非其人也，主者審詳之，豈不慎哉。

徹視鬼方

白石英，與鬼將一名鬼督郵、茯苓、三物等，治下篩，服寸圭，見鬼。

又視鬼方

白石英、茯苓、知母，三物分等，治下篩，服刀圭，即見鬼。又方：鵲子、赤石英及曾青夜光散，葱實、烏藥、白石英知母散，皆令人見鬼，即畏生人。

保舉

監度
度師

太上三五正一盟威錄卷之三

太上三五正一盟威錄卷之四

太上正一星綱五斗錄品第九

炁應五月節，其日觜參，鎮昌利治，冬至後一百六十五日芒種。

太上正一河圖保命錄品第十

炁應五月中，其日井，鎮隸上治，冬至後一百八日夏至。

太上正一解六害神虎錄品第十一

炁應六月節，其日鬼，鎮湧泉治，夏至後一十五日小暑。

太上正一九鳳破穢錄品第十二

炁應六月中，其日柳，鎮稠稷治，夏至後三十日大暑。

三太上正一星綱五斗錄品第九

鎮呂利治左都監炁祭酒，屬土，在懷安軍金堂縣，應觜，參二宿，芒種五月節。

維某年某歲月朔日辰某州郡縣鄉里，某法錄弟子，某乙本命某某月日時


生，上屬北斗某星君，言被元始三炁君
召，今謹齋法信詣某山宮觀太上御
前，投某法師門下，求受太上正一星綱
五斗籙，即日聽署校五百里步綱拜受，
一如赤籙律令。

上元將軍姓唐名掠，長九十萬丈，
中元將軍姓李名昌，長七十萬丈，
下元將軍姓徐名宗，長五十萬丈，
上元三五伐神功曹姓華名宏，領兵千
萬人，

中元三五伐神功曹姓田名同福，領兵
千萬人，
下元三五伐神功曹姓溫名仲舒，領兵
千萬人，

東斗功曹一十五人，
南斗功曹一十五人，
西斗功曹一十五人，
北斗功曹一十五人，
中斗功曹一十五人，
歲星功曹一十五人，
熒惑功曹一十五人，
辰星功曹一十五人，
鎮星功曹一十五人，

太白功曹一十五人，
生炁功曹一十五人，
三五九星功曹一十五人，
真人先生功曹一十五人，
三五九姓功曹一十五人，
九天七星功曹一十五人，
九炁中元功曹一十五人，
金伐童子一千二百人，
開綱童子一千二百人，
僮天僮地一千二百人，
三五童子一千二百人，
平元力士一千二百人，
五斗小吏一千二百人。
卷內符圖並朱書。






三太上正一河圖保命籙品第十

鎮隸上治右都監炁祭酒，屬土，在漢


州德陽縣，應井宿，夏至五月中。

某法錄弟子某乙，命屬北斗某星君，即日謹齋法信奉詣某法師門下，拜受太上正一河圖保命錄中宮八海三河要訣，河圖祕篆錄中將軍三百二十萬人，營護某乙身形，保身護命，長生延年，消災解厄，涉歷河海龍王，保守風波靜息，急急如太上老君律令。




幾二始門天地萬物
生焉奉受亡真妙法
元始君急急如律令

- 玄老玄留大將軍十萬人，
- 玄老通天大將軍十萬人，
- 玄老周天大將軍十萬人，
- 玄老建天大將軍十萬人，
- 玄老中玄大將軍十萬人，
- 玄老中誠大將軍十萬人，
- 玄老中魄大將軍十萬人，
- 玄老前效大將軍十萬人，
- 玄老蓋天大將軍十萬人，
- 玄老五桑大將軍十萬人，
- 玄老車中大將軍十萬人，
- 玄老越天大將軍十萬人，
- 玄老五蓋大將軍十萬人，
- 玄老靈天大將軍十萬人，
- 太上九開大將軍十萬人，
- 太上中邪大將軍十萬人，
- 太上黃蓋大將軍十萬人，



- 太上校虎大將軍十萬人，
- 太上五誅大將軍十萬人，
- 太上修天大將軍十萬人，
- 太上北部大將軍十萬人，
- 太上中越大將軍十萬人，
- 太上太營大將軍十萬人，
- 太上九炁大將軍十萬人，
- 太上南方赤鎮大將軍十萬人，
- 太上北方黑鎮大將軍十萬人，
- 太上東方青鎮大將軍十萬人，
- 太上中央黃鎮大將軍十萬人，
- 太上西方白鎮大將軍十萬人，
- 太上中建大將軍十萬人，
- 太上青蓋大將軍十萬人，
- 太上左右二將軍十萬人。

右合三十二部大將軍天兵，隨逐某乙，身中扶護，急急如律令。





三太上正一解六害神符錄品第十一

鎮涌泉治左監神炁祭酒，屬水，在漢州德陽縣，應鬼宿，小暑六月節。

某法錄弟子某乙，命屬北斗某星君，今謹齋法信詣某法師門下，拜受太上太一君无極太上元一君无極解六害祕錄，天帝所生，皇天養我，皇地載我，日月照我，北斗輔我，山川通我，萬靈祐我，百神侍我，陰陽扶我，風伯送我，紫雲蓋我，神藥治我，往來無極，入海出天，門入河出，地戶司命，與我天厨，飴我何求，不得何指，不測一食，千歲連命，日月與天，无窮與地，无極登昇，天機駕魁，乘罔所向者，伏所指者，亡我受太上天帝教令，誰敢有當，龍虎扶我，朱雀導我，玄武從我，左陽青龍，右陰白虎，頭戴七星，法應天斗司命留我，司錄護我，疾病離我，盜賊避我，所求皆得，所厭皆伏，踰河渡海，風浪不起，虎狼見我，摧牙折齒，丹書為符，凶咎滅亡，禹為除道，蚩尤避兵，天符地


節，前開後閉，延年无極，與天同畢，急急如律令。






三太上正一九鳳破穢錄品第十二

鎮稠稷治右監神炁祭酒，屬水，在蜀州新津縣，應柳宿，大暑六月中。

某法錄弟子某乙，命屬北斗某星君，今謹齋法信詣某法師門下，請受太上正一九鳳破穢錄受佩，一如律令。



謹請東西南北解穢神君，主消淹穢之厄，延年益命，辟邪除凶，保定魄魂，聰明耳目，禳灾度厄，安附身神，急急如律令。



謹請破穢君五人官將百二十人，
謹請却穢君五人官將百二十人，
謹請滅穢君五人官將百二十人，
謹請蕩穢君五人官將百二十人，
謹請除穢君五人官將百二十人，
謹請收穢君五人官將百二十人，
謹請運穢君五人官將百二十人，
謹請解穢君五人官將百二十人，
謹請洗穢君五人官將百二十人，
謹請斬穢君五人官將百二十人，

太上三五正一盟威錄卷之四

太上三五正一盟威錄卷之五

太上正一都章畢印錄品第十三
炁應七月節，其日星，鎮北平治，夏至後四十五日立秋。

太上正一斬邪華蓋錄品第十四
炁應七月中，其日張，鎮本竹治，夏至後六十日處暑。

太上正一天兵符錄品第十五
炁應八月節，其日翼，鎮蒙秦治，夏至後七十五日白露。


太上正一九宮捍厄錄品第十六
炁應八月中，其日軫，鎮平蓋治，夏至後九十日秋分。

太上正一都章畢印錄品第十三

鎮北平治左監察炁祭酒，屬金，在眉州彭山縣，應星宿，立秋七月節。

某法錄弟子某乙，命屬北斗某星君，今謹齋法信詣某法師門下，奉受太上正一都章畢印錄千二百印章，真言

要語，長生之術，二十四玉女等，內以治身，外以救人，宣揚道教，助國扶命，醫治百姓，拯救蒼生，某受法之後，誓不違科，一旦背向異辭，欺師妄道誹謗之愆，某身謝天地水三官，皆被風刀之考，七祖引對，急急如律令。



華蓋玉女二十四人，
摩鏡玉女二十四人，
清靈玉女二十四人，
治病玉女二十四人，
按摩玉女二十四人，
周城玉女二十四人，
揮印玉女二十四人，
印中玉女二十四人，


守印玉女二十四人，
著印玉女二十四人，
昇印玉女二十四人，
星藥玉女二十四人，
感藥玉女二十四人，
放藥玉女二十四人，
蓋藥玉女二十四人，
將藥玉女二十四人，
捉藥玉女二十四人，
行印玉女二十四人。

右一十八部用印玉女，合四百三十二人，度某乙身中

上仙都促炁功曹十二人北斗君，
上仙都治病功曹十二人太一君，
上仙都天真使者十二人天一君，
上仙都中部使者十二人三炁君，
上仙都正一功曹十二人南斗君，
上仙都直事使者功曹十二人華蓋君。
右六部功曹，合七十二人，度某乙身中。

甲子神將符木板從官百二十人，
甲戌神將呪丘明從官百二十人，
甲申神將鄧西嶽從官百二十人，

甲午神將扶天嶽從官百二十人，
甲辰神將孟非卿從官百二十人，
甲寅神將享于始從官百二十人，
甲戌玉女飛廉，
甲子玉女華翼，
甲午玉女素精，
甲申玉女素石，
甲寅玉女惠精，
甲辰玉女開朝藉，
丁丑玉女趙子玉，
丁卯玉女司馬卿，
丁酉玉女臧文公，
丁亥玉女張文通，
丁巳玉女崔巨卿，
丁未玉女石叔卿，
癸未玉女呂威明，
癸酉玉女孫仲房，
癸卯玉女蘇他家，
癸巳玉女史公來，
癸亥玉女左石松，
癸丑玉女江漢卿。
右六甲六丁六癸玉女，度某乙身中。






太上正一斬邪華蓋錄品第十四

鎮本竹治右監察炁祭酒，屬水，在蜀州新津縣，應張宿，處暑七月中。

某法錄弟子某乙，命屬北斗某星君，言被中皇直使司命无形君召，本意志仙安魂定魄，義在不死，心和體正，五官六府，道一所處，元一飛神，三五華蓋，斬邪仙錄，某以未佩，有負先約，科行有功，今齋法信，詣某法師門下，請受太上正一斬邪華蓋錄，錄中考邪鬼吏，隨逐某身佩受之後，不敢泄露要文，一如前約律令。直使功曹二人，

正一功曹二人，治病功曹二人，促炁功曹二人，斬邪功曹二人，收邪功曹二人，錄邪功曹二人，捉邪功曹二人，縛邪吏二人，鞭邪吏二人，科東赤符吏二人，剛鳳騎置吏二人，驛馬上章吏二人，左將軍滅亡吏二人，右將軍滅亡吏二人，烏衣捕邪吏二人，東方青雲收邪吏二人，南方赤雲收邪吏二人，西方白雲收邪吏二人，北方黑雲收邪吏二人，中央黃雲收邪吏二人，誅邪吏二人，破邪吏二人，考邪吏二人。






東方甲乙青始車騎十萬人，衣青衣服
來屯某乙身中始生門，
南方丙丁赤玄車騎十萬人，衣赤衣服
來屯某乙身中防生門，
西方庚辛白玄車騎十萬人，衣白衣服
來屯某乙身中九生門，
北方壬癸黑玄車騎十萬人，衣黑衣服
來屯某乙身中養生門，
中央黃始司玄車騎十萬人，衣黃衣服
來屯某乙身中司命門。

三三 太上正一天兵符籙品第十五

鎮蒙秦治左領功炁祭酒，屬金，在夔
州臺登縣，應翼宿，白露八月節。
某法籙弟子某乙命屬北斗某星君，
今謹齋法信詣某法師門下，求受太上
正一天兵符籙受佩一如律令。



謹給道門領理文書救治百姓，專
勤不易，行合天中，堪任加署，謹齋五
色綵詣臣求受九天兵符，臣昔於某法師
門下受符之日，誓傳忠良，今輒於太上
御前加署九天兵主，領太上天師千二
百官君，五方官屬，輔助道門，誅除凶
逆，血食符廟，奸神偽鬼，衆精故炁，因
及九年，有功注名陽官，請左神丞相，
號九天九地，萬鬼中王，昔出之時，天
光地赫，萬神震動，身長七十二丈，廣
七十二圍，百二十印綬，前後百二十鼓
吹，日夜十二時，衛天帝君，伺斬五方
鬼衆精故炁，以符召萬神千鬼俱滅，急
急如皇天大帝太上老君律令。
左滅亡君一十二人，
右滅亡君一十二人，
東方青領將軍九人，青衣兵士八十一
萬衆來屯左，
左滅亡君一十二人，

右滅亡君一十二人，
西方白領將軍七人，白衣兵士四十九
萬衆來屯右，
左滅亡君一十二人，
右滅亡君一十二人，
南方赤領將軍八人，赤衣兵士六十四
萬衆來屯前，
左滅亡君一十二人，
右滅亡君一十二人，
北方黑領將軍五人，黑衣兵士二十五
萬衆來屯後，
東方青始甲乙君車騎千人衣青，各持
泰始青炁來屯某乙始生門，
南方赤玄丙丁君車騎千人衣赤，各持
太初赤炁來屯某乙防生門，
西方白玄庚辛君車騎千人衣白，各持
太素白炁來屯某乙九生門，
北方黑玄壬癸君車騎千人衣黑，各持
太玄黑炁來屯某乙養生門，
中央司玄戊己君車騎千人衣黃，各持
太始黃炁來屯某乙司命門，
東方夷老君除逆部伏衛兵，
南方越老君扁鵲伏衛兵，

西方氏老君官死伏衛兵，

北方羌老君及甲錯鱗兵，

中央秦老君將領黃兵，

千二百官中央將軍身長二十四丈，廣

十二圍，頭戴金幘冠，百二十印綬，天

帝元始召九天符，新出老君傳領民祭

酒，召九天五方鬼神一切降伏。

太上施虎賁兵三十萬衆，主收天下熒

惑逆鬼邪炁，

太上施天兵三十萬衆，主收九天亂道

逆鬼故炁，

太上發地兵四十萬衆，主收破地上妄

稱帝王不正逆鬼，

太上九天丈人兵四十萬衆，主收散作

无端百惡橫行鬼，

太上營兵四十萬衆，主收地上破壞治

化五方不正鬼，

太上柱天兵四十萬衆，主收食俗時糧

血食爲灾鬼，



太上青蓋兵四十萬人，

太上赤蓋兵四十萬人，

太上白蓋兵四十萬人，

太上黑蓋兵四十萬人，

太上黃蓋兵四十萬人。



東方青炁君兵百千萬重來屯某乙左邊，
南方赤炁君兵百千萬重來屯某乙右邊，
西方白炁君兵百千萬重來屯某乙前，

北方黑炁君兵百千萬重來屯某乙後，中央黃炁君兵百千萬重來屯某乙身中，以時傳度付某乙身中，各保五方炁侯，如所列下九兵符辟五方惡逆之鬼賊不正鬼炁，所在里域，速令一切伏滅急急如太上老君律令。

左无上柱天兵四十萬人，主收大惑鬼，右无上五種三十萬人，主收新來鬼，左无上中宮五營兵三十萬人，主收大

逆鬼，

右无上域門兵三十萬人，主收不道鬼，左无上中大兵三十萬人，主收精邪鬼，右无上九元中野兵三十萬人，主收千

正鬼，

左无上領天兵三十萬人，主收北元逆鬼，

右无上七部官將，主收天地水三官五方不正神姦詐恐動治民者，

玄老玄留大將軍十萬人，玄老周天大將軍十萬人，玄老中玄大將軍十萬人，玄老五元大將軍十萬人，玄老蓋天大將軍十萬人，

玄老九天大將軍十萬人，

玄老中律大將軍十萬人，

玄老建玄大將軍十萬人，

玄老還天大將軍十萬人，

玄老中域大將軍十萬人，

玄老中微大將軍十萬人，

玄老中庭大將軍十萬人，

玄老九天丈人兵十萬人，主收亡女稱

師教者治之，

太上西域兵四十萬人，主收新出逆鬼，

太上宮門大兵四十萬人，主收新斬大

逆鬼，

太上南溪兵四十萬人，主收百二十作

城天皇鬼，

太上營門兵四十萬人，主收角抵鬼，

太上發地兵四十萬人，主收天皇鬼，

太上督天兵四十萬人，主收自稱帝鬼，

太上前受大兵四十萬人，主收社竈鬼，

太上北方三秦兵四十萬人，主收客死

鬼，

太上越天大將軍四十萬人，

太上正天大將軍四十萬人，

太上九道大將軍四十萬人，

太上九誅大將軍四十萬人，

太上九剛大將軍四十萬人，

太上營門大將軍四十萬人，

太上玉蓋大將軍四十萬人，

太上青蓋大將軍四十萬人，

太上赤蓋大將軍四十萬人，

太上白蓋大將軍四十萬人，

太上黑蓋大將軍四十萬人，

太上黃蓋大將軍四十萬人，

太上宮門大將軍四十萬人，

太上二十三部官將，主收小官，自

稱威神制却治官及將軍，民妄設風波，

傷殺百姓人民，俗不得別署收捕考校，

此左无上有玄老太上三五官將度內官

一百二十人，所用水官度治。


三太上正一九宮捍厄籙品第十六

鎮平蓋治右領功炁祭酒，屬土，在蜀州新津縣，應軫宿，秋分八月中。

某法籙弟子某乙，好道樂法，太上子孫，命屬神仙玉曆，北斗七星君，今謹齋法信，詣某法師門下，拜受太上正

一九宮捍厄錄，願某住世，身得保度九厄，解脫萬惡消亡，周行天下，早遇神仙，延年益壽，諸灾伏匿，如臣之願，佩受一如玄科律令。

圖內天尊並取宜裝



太上三五正一盟威錄卷之五

太上三五正一盟威錄卷之六

八卦護身錄品第十七

炁應九月節，其日角亢，鎮雲臺治，

夏至後一百五日寒露。

考召錄品第十八

炁應九月中，其日氏鎮澁口治，夏至後一百二十日霜降。

斬邪赤錄品錄第十九

炁應十月節，其日房，鎮後城治，夏至後一百三十五日立冬。

辟邪神錄品第二十

炁應十月中，其日心尾，鎮公墓治，夏至後一百五十日小雪。

四部禁炁錄品第二十一

炁應十一月節，其日箕，鎮平岡治，夏至後一百六十五日大雪。

斬河邪錄品第二十二

炁應十一月中，其日斗，鎮主簿治，夏至後一百八十日冬至。

功曹錄品第二十三

炁應十二月節，其日牛，鎮玉局治，

冬至後一十五日小寒。

保命長生錄品第二十四

炁應十二月中，其日女，鎮北邙治，冬至後三十日大寒。


三太上正一八卦護身錄第十七

鎮雲臺治左監貢炁祭酒，屬火，在閬州蒼溪縣，應角亢宿，寒露九月節。

維某年某歲月朔日辰，某州郡縣鄉里，某法錄弟子某乙，本命某甲子某月日時生，上屬北斗某星君，今謹齋法信，詣某法師門下奉受太上太一君皇天上帝□□太上元君太一元君玄元始炁八卦，捍厄保命護身祕錄，天帝生我，皇天養我，日月照我，北斗輔我，山川導我，百神侍我，陰陽通我，風伯送我，天厨供我，紫雲蓋我，神藥治我，往來無窮，入海則出天門，入河即出地戶，司命舉我，何求不得，何指不測，一食千歲，連命日月，與天地無窮，登昇天機，駕魁乘剛，所指者亡，身受太上帝君神符，受者敢當，皇天覆我，龍虎

使我，朱雀導我，玄武從我，左陽從青龍，右陰據白虎，頭戴七星，法應天斗，司命留我年，司錄護我命，疾病遠我，官事離我，盜賊避我，羣星明我，天炁利我，地炁安我，踰河渡海，風浪不起，虎狼見我，摧牙折齒，丹書九通，辟除灾凶，白素爲符，凶害滅除，禹爲除道，蚩尤避兵，延年无極，與天相畢，急急如律令。

卷內符並朱書。




三太上正一三五考召錄品第十八

鎮瀝口治右監貢炁祭酒，屬金，在興元府西縣，應氏宿，霜降九月中。

維某年某歲月朔日辰，某州郡縣鄉里，某法錄弟子某乙，本命某甲子某月日時生，上屬北斗某星君，今謹齋法信，詣某法師門下，奉受太清中宮三五將軍考召錄，錄中吏兵請給醫治百姓，助國扶命，急急如律令。

- 上請東方召鬼大將軍一萬吏兵度，
- 上請南方召鬼大將軍一萬吏兵度，
- 上請西方召鬼大將軍一萬吏兵度，
- 上請北方召鬼大將軍一萬吏兵度，
- 上請上方召鬼大將軍一萬吏兵度，
- 上請下方召鬼大將軍一萬吏兵度，
- 上請召竈大將軍一萬吏兵度，
- 上請召七祖大將軍一萬吏兵度，
- 上請召宅大將軍一萬吏兵度，
- 上請召社大將軍一萬吏兵度，
- 上請召神大將軍八千吏兵度，
- 上請召青帝大將軍六千吏兵度，


- 上請召赤帝大將軍六千吏兵度，
- 上請召白帝大將軍六千吏兵度，
- 上請召黑帝大將軍六千吏兵度，
- 上請召黃帝大將軍六千吏兵度，
- 上請召左僕射大將軍六千吏兵度，
- 上請召右僕射大將軍六千吏兵度，
- 上請召活人大將軍二萬吏兵度，
- 上請召煞鬼大將軍二萬吏兵度，
- 上請召斬鬼大將軍二萬吏兵度，
- 上請召附水大將軍四千吏兵度，
- 上請召附城大將軍四千吏兵度，
- 上請召附鞭大將軍四千吏兵度。



三太上正一斬邪赤籙品第十九



鎮後城治左都炁祭酒，屬水，在漢州什邡縣，應房宿，立冬十月節。


某法籙弟子某乙，命屬北斗某星君，即日投道，自實宿緣，有幸得誕人道，雖忝清化，執行頑愚，幽俗下賤，自小及長，常抱疾病淋瀝，為姦邪所淫，初無健日，今謹齋法信，詣某法師門下，請受太上正一天靈赤官斬邪大籙將軍吏兵營護某乙，隨從行來，出入住止，辟斥衆邪，收滅精魅，龜鼉龜鼈，狐狸老精，千歲妖怪，百歲孽王，剛柔清濁，山海高下，妖魅巧偽，六天故炁，三魂七魄，安附身神，依如老君律令。



- 天靈赤官斬邪直使功曹二人，
- 天靈赤官斬邪正一功曹二人，
- 天靈赤官斬邪治病功曹二人，
- 天靈赤官斬邪左官使者二人，
- 天靈赤官斬邪右官使者二人，
- 天靈赤官斬邪都使者二人，
- 天靈赤官斬邪陽神決吏二人，
- 天靈赤官斬邪陰神決吏二人，
- 天靈赤官斬邪陽官太醫二人，
- 天靈赤官斬邪陰神太醫二人，
- 天靈赤官攝邪將軍二人，
- 天靈赤官誅邪將軍二人，
- 天靈赤官伐邪將軍二人，
- 天靈赤官斬邪將軍二人，
- 天靈赤官治邪將軍二人，
- 天靈赤官截邪將軍二人，
- 天靈赤官斬邪陽神將軍二人，
- 天靈赤官斬邪陰神將軍二人，
- 天靈赤官護身將軍二人，
- 天靈赤官擒搏將軍二人，
- 天靈赤官斬邪衛身將軍二人，
- 天靈赤官監邪吏二人，
- 天靈赤官監邪直符二人，

- 天靈赤官斬邪使者二人，
- 天靈赤官斬邪正一使者二人，
- 天靈赤官斬邪御史二人，
- 天靈赤官斬邪刺奸二人，
- 天靈赤官攝邪護身大神二人，
- 天靈赤官斬邪擒奇使者二人，
- 天靈赤官斬邪天醫扁鵲二人，
- 天靈赤官斬邪仙人道士玉女各二人，
- 天靈赤官青龍朱雀白虎玄武各二人。






天符有常教臣來，北斗鬼神皆怖走，保命延長，青龍侍左，白虎侍右，朱雀導前，玄武從後，三十六仙人扶護左右，使百二十神天符給用地符給糧，出入東西南北，與仙人同行，攝神使者百二十人，與驅使收攝百鬼，南斗護命天符輔身，仙人駕四龍遙詣天門，太上護身，急急如律令。

三太上正一辟邪大籙品第二十


鎮公墓治右都炁祭酒，屬水，在漢州什邡縣，應心尾宿，小雪十月中。

某法籙弟子某乙，命屬北斗某星君，素以胎生凡夫肉人，百官子孫，有幸建延考犯疾病何邪，今於某年之中，轉見進甚，恐是邪精鬼魅，不自分別，

今謹依科齋法物，詣某法師門下，求乞拜受太上正一辟邪大籙以自捕捉，受符之日要當如法檢身斬絕，不與邪鬼交通，一如太上玄都法罪律令。
四獸依式裝



符保某身，諸衆邪故炁五酉鬼速去



急去，知汝名字，急急如律令。

三太上正一四部禁炁錄品第二十一

鎮平岡治左貢炁祭酒，屬水，在蜀州新津縣，應箕宿，大雪十一月節。

某法錄弟子某乙，命屬北斗某星君，好道樂法，嘗遊名山，遍歷川澤，志慕神仙，今謹齋大刀一口，命米一石二斗，薪一束，絳七尺五寸，銀環一雙，白素四十尺，紙一百張，墨一丸，書刀一口，真珠一兩，以為誓信，詣某法師門下，求乞拜受太上正一太玄胡玄西玄壺公雜呪法四部禁炁錄，却邪保生，扶家助國佩受，一如太上律令。

子禹步三前還王上吞十二炁，
丑禹步三前還王上吞十二炁，
寅禹步三前還王上吞十二炁，
卯禹步三前還王上吞十二炁，
辰禹步三前還王上吞十二炁，
巳禹步三前還王上吞十二炁，
午禹步三前還王上吞十二炁，
未禹步三前還王上吞十二炁，


申禹步三前還王上吞十二炁，
酉禹步三前還王上吞十二炁，
戌禹步三前還王上吞十二炁，
亥禹步三前還王上吞十二炁，
右十二時吞炁畢。

次思五方炁，
先思東方青炁，
次思南方赤炁，
次思西方白炁，
次思北方黑炁，
次思中央黃炁，
次思太歲上二十四炁，
先思今日上炁吞之，
次思今時上取炁吞之，
右思五方等炁畢。

次思五藏炁，
青炁歸肝中主青龍，
赤炁歸心中主朱雀，
白炁歸肺中主白虎，
黑炁歸腎中主玄武，
黃炁歸脾中主黃老君，
木數九，火數八，水數七，金數六，
土數五。

禁倮蟲用木炁，
禁鱗蟲用金炁，
禁羽蟲用水炁，
禁毛蟲用火炁，
禁甲蟲用土炁。

右炁禁法皆如前次第。



某乙奉道精誠，勤修禁戒，至心專一，請受禁炁神仙之法，受者執刀，長跪再拜，發星法取炁步十二時，從子起禹步，左足前右足後，呪之。

言敕湯火文，
又言敕路宿文，
又言敕自防身文，
又言敕臘文，
又言敕虵文，
又言敕惡鬼文，
又言敕社公毒文，
又言敕印文，
又言敕雲中鬼子文，

又言敕臙文，
又言敕都雜符文，
又言敕腫文，
又言敕獮文，
又言敕俗家房廟坐席文，
又言敕水鞭文，
又言敕蟲文，
又言敕師前病家文，
又言敕惡瘡文，
又言敕俗師文，
又言敕虎狼文，
又言敕食文，
又言敕按摩文，
又言敕他家竹塚文，
又言敕犬文，
又言敕針文，
又言敕度雜炁文，
又言敕禁樹文，
又言敕刀文，
又言敕虵虎瘡文，
又言敕蚊虻文。

右合三十條牒，度太玄，胡玄，壺公等禁炁雜決，信物並備限。

右據某乙狀如前，稱素胎生肉人，流俗子孫，千載有幸，制屬太上諸君丈人道炁三師以相自保，持前蒙師老賜署重籙治職，得在師任以來，未得明師口訣，求請鱗生肉人，口奏上天曹，願典者罷塞故炁，愍念羣生，助賜星炁，得明道法，宣行有方，救治有效，道炁興王，用法治病，百鬼皆伏，身中吏兵，盡力傳行，畢立神功，遷轉名位，凡所禁止，依法施行，又請通炁君十二人，官將百二十人，又請五方炁禁斷毒蟲虎狼等神將，一合隨文度入某乙身中，凡遇禁攝，立使安寧，急急如律令。

胡玄君姓高諱子嵩，身長十丈赤冠，五色之衣，華蓋玉牀，入鎮某乙身中。

右三玄君斗帳玉牀四角華蓋，入鎮某乙身中。

東方青炁吏兵，
南方赤炁吏兵，
西方白炁吏兵，
北方黑炁吏兵，
中央黃炁吏兵，



東方青炁君，
南方赤炁君，
西方白炁君，
北方黑炁君，
中央黃炁君。

右五方真炁君吏等，度入某乙身中，某乙好生樂法，當遊名山四海，令五方君吏驅逐邪炁，天下地上一切毒蟲，咸令攝伏，急急如律令。

三太上正一斬河邪籙品第二十二

鎮主簿治右貢炁祭酒，屬金，邛州蒲江縣，應斗宿，冬至十一月中。

某法籙弟子某乙，命屬北斗某星君，素以胎生凡夫肉人，專心樂道，或施為不法，被冥考所罰，或疾病是何邪精魅作祟，不自分別，即日依科，謹齋法信，詣某法師門下，求乞拜受太上正一斬河邪籙，受佩之後，永自輔身，斷絕鬼祟，不敢與鬼交通，宣行正法，救治百姓，若違背科約之日，坐見中傷，不得怨道咎師，一如太上老君律令。




三太上正一三五功曹錄品第二十二

鎮玉局治左察炁祭酒，屬水，在益州成都縣，應牛宿，小雪十二月節。

某法錄弟子某乙，命屬北斗某星君，今謹齋法信，詣某法師門下，求受太上正一三五功曹錄，受佩之後，要當扶助醫治百姓，不得違背科約，有違之日，坐見中傷，不得怨道咎師，急急如太上老君律令。

太清甲官正一功曹千二百人，
泰清甲官治病功曹千二百人，
泰清甲官直使功曹千二百人，
泰清甲官五命功曹千二百人。




絳服緣皂履



此符乃太上老君所傳，專治一切瘟疫，功效如神。凡遇此症，即以此符焚之，立見奇效。此符之妙，不可言喻。凡欲求此符者，須先修心養性，積善功，方能感應。此符之靈，實非筆墨所能形容。凡我信士，宜常備此符，以保平安。此符之文，係用神霄玉府之秘法，配合天地之氣，而成此符。


上仙都三五功曹二百人，
上仙都正一功曹二百人，
上仙都上元功曹二百人，
上仙都中元功曹二百人，
上仙都下元功曹二百人。

絳服青緣
紅帶皂履



照候稽還清那助麥
照循穆沫勿王那巽
冥習空警死忽梁豈

上靈官三五功曹一十五人，
上靈官正一功曹一十五人，
上靈官直使功曹一十五人，
上靈官治病功曹一十五人，
上靈官扶香使者一十五人。



絳服皂緣皂履



和尙強三三盟至矣禁
南化西雲造營三
高刻嬰略出引運發

三五功曹，五帝直符，正一功曹，直使功曹，錄曹符契。

三五功曹吏十二人，
五帝功曹吏十二人，
直使功曹吏十二人，
正一功曹吏十二人，
香官使者吏十二人。



絳服青緣皂履



三太上正一延生保命籙品第二十四



鎮北邙治右察炁祭酒，屬土，在洛京洛陽縣，應女宿，大寒十二月中

某乙命屬北斗某星君，今謹齋法信，詣某法師門下，求受太上三五保命長生之籙後，要當扶助醫治百姓，不得違背科約，有違之日，坐見中傷，不得怨道咎師，急急如太上老君律令。



綠冠綠帔深
綠緣皂履





天靈官扶香使者三人，
 天靈官扁鵲醫治三人，
 天靈官除黑簿使者三人。

監度
 保舉
 度師

太上三五正一盟威錄卷之六

(錢安靖點校)

030 太上正一盟威法錄

經名：太上正一盟威法錄。撰人不詳，約出於南北朝，係早期天師道法錄。一卷。底本出處：《正統道藏》正一部。

- 太上一官童子錄，
- 太上十官童子錄，
- 太上七十五官童子錄，
- 太上三五赤官斬邪錄，
- 太一護身將軍錄，
- 太上二十四治氣錄，
- 太上護身延年解一切灾厄錄，
- 太上保命長生錄，
- 太上鳳凰解穢妙錄，
- 太上三五解妨害寶符妙錄，
- 太上老君授徐甲延生保命錄，
- 太上招財鎮寶妙錄，
- 太上九一河圖寶錄，

太上百五十將軍男仙靈錄。

太上一官童子錄

維某年某月某日，某州縣鄉里，某宮觀受某法錄姓某，素被新出老君太上高皇帝王神氣在身，不能自分別，今齋信詣三洞法師臣某，請受太上一官童子錄，自實悉言，被君召，即日聽署之後，要當扶助天師醫治百姓疾病，不得輕泄淫盜鬲戾始妬，行不正之事，自作一法，誹笑師主者，此魔鬼所嫉，但當慈仁育孝，敬老愛少，父母兄弟，更相承奉，常以五臘吉日於堂上祝家親九祖，二月八月同日祀社竈，其餘不得私祀他鬼神，一旦違犯，坐見中傷，不得怨道咎師，一如律令。



- 北一上官直使功曹二人，
- 北一上官郎吏虎賁百二十人，
- 北一上官正一功曹二人，

北一上官察姦鈎騎百二十人，

北一上官治病功曹二人，

北一上官三官僕射百二十人，

北一上官左官使者二人，

北一上官天騶甲卒百二十人，

北一上官右官使者二人，

北一上官天丁力士百二十人，


北一上官陰陽神決吏二人，

北一上官收氣食氣吏百二十人，

赤天歷旗剛風將軍百二十人，

赤天歷旗左右將軍百二十人。

卷內符並朱書



保舉

監度

度師

太上十官童子錄

維某年某月某日，某州縣鄉里，某宮觀受某法錄姓某，素被新出老君太上高皇帝王神氣在身，不能自分別，今

齋信詣三洞法師臣其請受太上十官童子錄，自實悉言，被君召，即日聽署之後，約當慈仁育孝，敬老愛少，父母兄弟更相承奉，常以五臘吉日，於堂上祀家親九祖，二月八月同日祀社竈，其餘不得私祀他鬼神，一旦違犯，坐見中傷，不得怨道咎師，一如太上老君律令。


童子取前服式同



上仙都直使功曹二人，
上仙都郎吏虎賁二百四十人，
上仙都正一功曹二人，
上仙都察姦鉤騎二百四十人，
上仙都治病功曹二人，
上仙都三官僕射二百四十人，
上仙都左官使者二人，
上仙都天驕甲卒二百四十人，
上仙都右官使者二人，
上仙都天丁力士二百四十人，

上仙都陰陽神決吏二人，
上仙都收氣食氣吏二百四十人，
上仙都陰陽官太醫吏二人，
上仙都剛風騎置驛馬上章吏二百四十人，

赤天歷旗剛風官驛將軍二人，
赤天歷旗剛風左官驛將軍二人，
赤天歷旗剛風右官驛將軍二人，
赤天歷旗剛風左將軍二人，
赤天歷旗剛風右將軍二人。



保舉
監度
度師

太上七十五官童子錄


維某年某月某日，某州縣鄉里，某宮觀受某法錄姓某，素被新出老君太上高皇帝王神氣在身，不能自分別，今齋信詣三洞法師臣某，請受太上七十五官童子錄，自實悉言，被君召即日聽署

之後，約當慈仁育孝，敬老愛少，父母兄弟更相承奉，常以五臘吉日於堂上祀家親九祖父母，二月八月同日祀社竈，其餘不得私祀他鬼神，一旦違犯，坐見中傷，不得怨道咎師，一如太上老君律令。



上靈官直使功曹二人，
上靈官郎吏虎賁二百四十人，
上靈官正一功曹二人，
上靈官察姦鉤騎二百四十人，
上靈官治病功曹二人，
上靈官三官僕射二百四十人，
上靈官左官使者二人，
上靈官天丁力士二百四十人，
上靈官右官使者二人，
上靈官收氣食氣吏二百四十人，
上靈官陽神決吏二人，
上靈官收鬼食鬼吏二百四十人，
上靈官陰神決吏二人，

上靈官科車赤符吏二百四十人，
 上靈官陽官太醫吏二人，
 上靈官剛風騎置吏二百四十人，
 上靈官陰官太醫吏二人，
 上靈官驛馬上章吏二百四十人，
 上靈官候神將軍二人，
 上靈官候都神將軍二人，
 上靈官候左都神將軍二人，
 上靈官候右都神將軍二人，
 上靈官候仕將軍二人。



保舉
 監度
 度師

大上三五赤官斬邪錄

維某年某月某日，某州縣鄉里，某
 官觀受某法錄姓某，素被新出老君太
 上高皇帝王神氣在身，不能自分別，今
 齋信詣三洞法師臣某，請受三五赤官
 斬邪支兵，定三魂，安七魄，隨逐上下，

行來出入，辟斥衆邪，收滅精怪，龜鼈
 龜鼈狐狸老精，千歲妖孽，王相剛柔，
 羣凶故氣，不得妄犯弟子之身，一如太
 上老君律令。

金甲淺紅袍皂

緣淺青帶朱履



天靈赤官直使功曹二人，
 天靈赤官正一功曹二人，
 天靈赤官治病功曹二人，
 天靈赤官左官使者二人，
 天靈赤官右官使者二人，
 天靈赤官陽神決吏二人，
 天靈赤官陰神決吏二人，
 天靈赤官陽官太醫吏二人，
 天靈赤官陰官太醫吏二人，
 天靈赤官攝邪將軍二人，
 天靈赤官誅邪將軍二人，
 天靈赤官伐邪將軍二人，




天靈赤官斬邪左將軍二人，
 天靈赤官斬邪右將軍二人，
 天靈赤官陽官將軍二人，
 天靈赤官陰官將軍二人，
 天靈赤官護身將軍二人，
 天靈赤官禽奇將軍二人，
 天靈赤官陰神太醫吏二人，
 天靈赤官陽神太醫吏二人，
 天靈赤官監邪直符二人，
 天靈赤官斬邪使者二人，
 天靈赤官正一使者二人，
 天靈赤官斬邪刺姦二人，
 天靈赤官斬邪御史二人，
 天靈赤官斬邪都護二人，
 天靈赤官斬邪將軍二人，
 天靈赤官斬邪禽奇二人，
 天靈赤官斬邪玉女二十四人，
 天靈赤官扁鵲醫吏二人，
 天靈赤官斬邪青龍白虎朱雀玄武各三
 十六人。



太上護身將軍籙

保舉
監度
度師

維某年某月某日，某州縣鄉里，某宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受太一護身將軍神符籙，受任之後，太一真神五帝直符千乘萬騎隨逐弟子之身，度厄長存，當勤心敬法，尊崇大道，不得輕泄神文，一如太上老君律令。








皇天堂堂，覆弟子身，皇地厚載，弟子不開自通，不扶自行，日月同照，辟除五殃，聖神養育，坐食甘漿，王父相念，奉致仙方，王母相念，延年益壽，玉女相念，煢燒五香，真人相念，語笑相迎，兵人相見，摧折鋒鏑，力士相見，姦人敢當，橋梁即渡，水為不流，山林進止，辟斥道途，五兵鬼賊，逃避要頭，行無不通，止無不休，依科奉受，立得仙度，急急一如太上老君律令。

保舉
監度
度師

太上二十四治氣籙

係天師陽平等治，太上中氣，東西南北四部，將行督察二十四治，領二十四氣，監天都功統九州里社天師門下小臣，今有弟子應被逮召，應備法職，今輒選補二十四氣。



- 陽平治  太上中氣功曹平氣大品將軍一人，
- 鹿堂治  太上中氣大都功大品將軍一人，
- 鵠鳴治  太上中氣右領兵大品將軍一人，
- 漓沅治  太上中氣平五氣大品將軍一人，

葛瓚治 **風** 太上中氣左領功曹大品將軍一人，

庚除治 **火** 太上中氣左監神氣大品將軍一人，

秦中治 **水** 太上中氣右領真氣大品將軍一人，

真多治 **風** 太上中氣右領監氣大品將軍一人，

昌利治 **土** 太上中氣左領行氣大品將軍一人，

隸上治 **土** 太上中氣左監白氣大品將軍一人，

涌泉治 **土** 太上中氣右監神氣大品將軍一人，

稠稔治 **水** 太上中氣右察氣大品將軍一人，

北平治 **風** 太上中氣東部行氣大品將軍一人，

本竹治 **木** 太上中氣南部行氣大品將軍一人，

濛秦治 **水** 太上中氣左領決職大品將軍一人，

平蓋治 **土** 太上中氣佐四部氣大品將軍一人，

雲臺治 **火** 太上中氣右領決職大品將軍一人，

澧口治 **木** 太上中氣西部行氣大品將軍一人，

後城治 **土** 太上中氣右領行氣大品將軍一人，

公慕治 **風** 太上中氣執氣大品將軍一人，

平崗治 **風** 太上中氣左領神大品將軍一人，

主簿治 **風** 太上中氣左察氣大品將軍一人，

玉局治 **土** 太上中氣右察氣大品將軍一人，

北邙治 **土** 太上中氣右領神大品將軍一人，

維某年某月某日，某州縣鄉里，某宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受太上二十四

治籙，修行供養，永為身寶，急急一如律令。

太上護身延年解一切灾厄籙

保舉 監度 度師

維某年某月某日，某州縣鄉里，某宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受太上護身延年解一切灾厄籙，永為身寶，所有千灾萬厄，永不相侵，子能持之，可以長生矣，急急如太上老君律令。


淺青帔深

綠緣朱履



上仙官解年灾厄童子十二人，上仙官解連星厄童子十二人，上仙官解筭盡厄童子十二人，上仙官解死灾厄童子十二人，

上仙官解官灾厄童子十二人，
 上仙官解疾病厄童子十二人，
 上仙官解破財厄童子十二人，
 上仙官解復連厄童子十二人，
 上仙官解虎狼厄童子十二人，
 上仙官解蟲蛇厄童子十二人，
 上仙官解天羅厄童子十二人，
 上仙官解地網厄童子十二人，
 上仙官解元辰厄童子十二人，
 上仙官解橫禍厄童子十二人，
 上仙官解水火厄童子十二人，
 上仙官解劫賊厄童子十二人，
 上仙官解刀兵厄童子十二人，
 上仙官解刑獄厄童子十二人。




保舉
 監度
 度師

太上保命長生籙




維某年某月某日，某州縣鄉里，某

宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受保命長生籙，受任之後，要當扶助天師，醫治百姓，不得飲酒食肉，一旦違犯，坐見中傷，不得怨道咎師，一如太上老君律令。



太上保命神符護弟子之身長生，急急如律令。

雲鵲淺綠帔黃
 服青緣朱履




天靈官好生使者二人，
 天靈官東斗注筭君吏九人，
 天靈官保命使者二人，
 天靈官南斗上生君吏三人，
 天靈官長生使者二人，
 天靈官西斗記名君吏七人，
 天靈官扁鵲太醫二人，

天靈官北斗落死君吏五人，
天靈官除黑簿吏二人，
天靈官中斗大魁君吏十二人。

保舉
監度
度師


太上鳳凰解穢妙錄

維某年某月某日，某州縣鄉里，某宮觀受某法錄姓某，素被新出老君太上高皇帝王神氣在身，不能自分別，今齋信詣三洞法師臣某，請受太上解厄延年，除三灾辟九厄，令耳目聰明，安魂定魄，保度衰厄，解除百穢，急急一如太上老君律令。




東方青帝木官解穢君吏九人，
南方赤帝火官解穢君吏三人，
西方白帝金官解穢君吏七人，
北方黑帝水官解穢君吏五人，
中央黃帝土官解穢君吏十二人，

天上地下解穢君吏百二十人，
解穢玉女百二十人，
九鳳破穢君將吏兵百二十人。



九鳳取宜裝



東方青穢，南方赤穢，中央黃穢，西方白穢，北方黑穢，五方五色之穢，天穢地穢，人穢鬼穢，牛馬六畜之穢，濁不忤清死不妨生，從今解穢，令我長生。

保舉

太上三五解妨害寶符妙錄

監度
度師

太玄中一金闕寶符真格妙錄，高皇玉帝於紫微宮請西王母內篇之奧，有濟拔之科，隨世下化，救度生靈，解除妨害生屬，或犯三刑四殺，孤辰寡宿，天殺地殺，天年歲星，元辰六害，兒子父母死絕入墓中，生致得相妨，今請受解除大妨害錄，保身護命，延年益壽，和合年命，所尅悉乞消散，和睦六親，慈育九眷，父母兄弟宗族，基係受之於身，永保長生，一如太上老君律令。



上仙都直使功曹和神吏五人，
上仙都無上功曹合神吏十五人，
上仙都正一功曹和神吏五人，
上仙都虛無功曹合神吏十五人，

上仙都五帝功曹和神吏五人，
 上仙都無為功曹合神吏十五人，
 上仙都三天功曹和神吏五人，
 上仙都赤天解妨合神吏十五人，
 上仙都左官使者和神吏五人，
 上仙都赤天解害合神吏十五人，
 上仙都右官使者和神吏五人，
 上仙都陰陽解元辰六害合神吏十五人，
 上仙都陰陽使者和神吏五人，
 上仙都陰陽解孤辰寡宿三刑四殺合神吏十五人。



聞金冠淺紅服
 青緣朱紅膝衣
 青座朱紅帶

維某年某月某日，某州縣鄉里，某宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受太上解妨害寶符妙籙，釋除所犯六害孤辰煙火絕滅，衝破約絞，五鬼八難，三刑四殺，父

母不宜，男女所尅，並乞消除保宜福祿，更相悅喻，不得誹笑真人，一如太上老君律令。

保舉
 監度
 度師
 太上老君授徐甲延生保命籙

無上玄元始氣玉皇高尊上帝真君生筭定壽，延年久視，保身護命，要聖靈文也，且玄科祕隱非凡所行，昔函谷關令尹喜先生，親承旨授傳流下世，宣於後賢，其有真仙之子，骨命合道者，可得奉佩此文，昔元狩元年，有東陵虛皇之子東方朔，親詣西王母清齋千日，祈請此法持佩在身，得獲真道徐甲授之，增筭千年，張道陵佩之，白日昇天，趙昇修行便證，正真子能依科奉受修持，即得延年久視，長生增筭益年，保身護命，辟除千災，消滅萬害，護法玉童玉女，天官君將吏兵，天丁力士定筭，直符益筭將軍等，各千萬衆，隨逐佩法者，身永不相離，子能奉持長生久視，生死獲道，斯法祕妙，非真勿傳，傳

授不依科限，殃及七祖，逮兆生身，不得怨師咎道，一如太上老君律令。

紫道服



淺紅服淺綠帔深綠緣朱履碧蓮




淺紅服淺綠帔深青緣朱履



老君曰：玄元始氣，生筭定壽，延年久視保身護命，長生昇仙變化，寶符攝錄，生筭將軍，定筭吏兵，益筭仙童，

保筭玉女等，各千萬衆，隨逐佩籙者，身行住坐卧，出入遠近，纏身繞骨，防護營衛，永不相離，子能奉受，持佩修行，可以登仙。



太清子日子時，生筭延年久視，保身護命，定童王女各九千萬人。

太清丑日丑時，生筭延年久視，保身護命，定壽仙官各九千萬人。

太清寅日寅時，生筭延年久視，保身護命，定體地官九千萬人。

太清卯日卯時，生筭延年久視，保身護命，除死水官九千萬人。

太清辰日辰時，生筭延年久視，保身護命，東斗注筭君九千萬人。

太清巳日巳時，生筭延年久視，保身護命，南斗上生君九千萬人。

太清午日午時，生筭延年久視，保身護命，西斗記名君九千萬人。

太清末日未時，生筭延年久視，保身護

命，北斗落死君九千萬人。

太清申日申時，生筭延年久視，保身護命，中斗大魁君九千萬人。

太清酉日酉時，生筭延年久視，保身護命，三台長生君九千萬人。

太清戌日戌時，生筭延年久視，保身護命，二十八宿消灾君九千萬人。

太清亥日亥時，生筭延年久視，保身護命，三十五星除罪君九千萬人。

太清玄元無上三天無極大道太上老君門下，臣胎生凡短，耳目不明，昔以云云。

維某年某月某日，某州縣鄉里，某宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受老君生筭定壽，久視保身護命，永爲身寶，仙聖感應，奉佩之後，不得輕慢經文，誹笑道士，妬賢嫉能，欺凌寡弱，抑奪不平，行之不犯，十年可傳。

保舉
監度
度師

太上招財鎮寶妙籙

老君曰：紫微玉皇道君招財鎮寶者，蓋東海青童君之祕訣也，靈文隱祕，凡無所觀，昔黃帝於太白山親承西王母玄女奉受，乃獲富貴而登仙，有玉釜仙人傳流於世，自無宿福不可聞見斯文，寶籙招金召銀，錢帛日增，五穀充盈，奴婢保宜，田蠶倍收，商估有利，買賣倍還，財去復來，保護家門，賊寇無傷，凶徒惡侶，慈心相向，奉受修行，家門富貴，男忠女貞，年長命遠，福蔭後胤，官祿日增，仕君得意，人所愛敬，出入遠近，四路開通，官私敬仰，萬惡不忤，龍蛇虎獸，永自潛伏，五瘟疫鬼，遠迸千里，斯籙寶祕，非真勿傳，子能持之，深宜慎焉。


淺紅服淺綠帔金緣朱履粉青冠




淺青服深青緣粉紅裙朱履




老君曰：紫微中閣招財神符，常以丙子丁丑壬寅癸卯戊申戊午滿成收開，日朱書帶之，招五方錢財，令人富貴，興估萬倍，買賣返還，符神九千九百九十九人侍衛人身。



老君曰：紫微中閣鎮寶神符，用前六富日朱書帶之，男左女右，所求如意，萬願從心，錢財充足，六畜蕃息，保宜田蠶，官私敬仰，萬厄不臨，符神吏兵九千九百人侍衛弟子之身。



老君曰：紫微中閣興佑神符，依以六富日書而帶之，興佑覓利，所求皆得，萬願從心，常能清淨，帶此神符萬病不侵，錢財倍益，符神吏兵三千九百九十人保護受者之身。



太清招天庫藏金銀錢帛吏兵直符使者

百萬人，

太清招地庫藏金銀錢帛吏兵直符使者

百萬人，

太清招東方角姓金銀錢帛吏兵直符使

者百萬人，

太清招南方徵姓金銀錢帛吏兵直符使

者百萬人，

太清招西方商姓金銀錢帛吏兵直符使

者百萬人，

太清招北方羽姓金銀錢帛吏兵直符使

者百萬人，

太清招中央宮姓金銀錢帛吏兵直符使

者百萬人，

太清招九州百二十郡大富長者金銀錢帛吏兵直符使者百萬人。

維某年某月某日，某州縣鄉里，某宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受太上老君招財鎮寶妙籙，修行供養，以為身寶，受法之後，上不違天，下不負地，中不輕師，慢法欺孤賤寡憎老愛少，一旦違科，減筭九年，受之不犯，十年可傳，一如太上老君盟科律令。

保舉
監度
度師

太上九一河圖寶籙

維某年某月某日，某州縣鄉里，某宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受太上九一河圖元紀九皇隱諱長生不死之訣，九府靈官下衛弟子之身，却邪納正，同會玉帝之前，一如太上老君律令。

第一陽明星玉皇九辰君，天樞星陽明

之魂也，對西門上真皇夫人。

第二陰精星玉皇主華辰君，天旋星陰精之魂也，西北門上仙皇夫人。

第三真人星玉皇主仙辰君，天機星真人之魂也，對東門明皇夫人。

第四玄冥星玉皇主上飛蓋君，天權星玄冥之魂也，對南門華皇夫人。

第五丹元君玉皇金魅七辰君，天斷星丹元星靈也，對北門中皇夫人。




第六北極星玉皇北辰華君，北極星北極魂靈也，北極門元皇夫人。

第七天關星玉皇悲靈北蓋君，搖光星天關魂，大明兩門下北門虛皇夫人。

第八左輔星玉皇帝尊九辰君，洞明星輔星魂，精陽明西門帝皇夫人。

第九右弼星玉皇帝真元辰君，隱元星弼星魂精也，東南門上皇夫人。

九宮取宜裝



諸靈官飛龍騎吏繡衣使者，玉童玉女各九億萬人。


丹元斗君府七百二十品，九億萬諸靈官飛龍騎吏繡衣使者，玉童玉女各九億萬人。

北極太常府七百七十品，九億萬諸靈官飛龍騎吏繡衣使者，玉童玉女各九億萬人。

天關上帝府七百七十品，九億萬諸靈官飛龍騎吏繡衣使者，玉童玉女各九億萬人。

輔天尊玉帝府九百二十品，九億萬諸靈官飛龍騎吏繡衣使者，玉童玉女各九億萬人。

弼大帝真府九百九十品，九億萬諸靈官飛龍騎吏繡衣使者，玉童玉女各九億萬人。



陽明大尉府九百二十品，九億萬諸靈官，飛龍騎吏繡衣使者，玉童玉女各九億萬人。
陰精上宰府五百五十品，九億萬諸靈官飛龍騎吏繡衣使者，玉童玉女各九億萬人。
真人司空府七百七十品，九億萬諸靈官飛龍騎吏繡衣使者，玉童玉女各九億萬人。
玄冥游擊府八百八十品，九億萬

太上百五十將軍男仙靈錄

保舉 監度 度師

太上百五十將軍男仙靈錄

維某年某月某日，某州縣鄉里，某宮觀受某法籙姓某，素被新出老君太上高皇帝王神氣在身，不能自分別，今齋信詣三洞法師臣某，請受太上百五十將軍男仙靈錄，自實悉言，被君召即日聽署之後，要當扶助天師醫治百姓，不得飲酒食肉，輕淫盜取，鬲戾姘妬，行不正之事，自作一法，誹笑師主，此魔鬼所嫉，但當慈仁育孝，敬老愛少，

父母兄弟更相承奉，常以五臘吉日於堂上祀家親太祖，二月八月同日祠社竈，其餘不得私祀他鬼神，一旦違犯，坐見中傷，不得怨道咎師，一如太上老君律令。


金甲粉紅袍深青綠緣帶朱履



上仙都直使功曹十五人，
上仙都正一功曹十五人，
上仙都治病功曹十五人，
上仙都左官使者十五人，
上仙都右官使者十五人，
上仙都陰神決吏十五人，
上仙都陽神決吏十五人，
上仙都陰官太醫吏十五人，
上仙都陽官太醫吏十五人，
上仙都陰官功曹十五人，
上仙都陽官功曹十五人，
赤天歷旗剛風大將軍五人，

赤天歷旗剛風左將軍五人，
赤天歷旗剛風右將軍五人，
赤天歷旗中官剛風大將軍五人，
赤天歷旗中官剛風左將軍五人，
赤天歷旗中官剛風右將軍五人，
赤天歷旗中官大將軍五人，
赤天歷旗左中官將軍五人，
赤天歷旗右中官將軍五人，
赤天歷旗剛風官大將軍五人，
赤天歷旗剛風左官將軍五人，
赤天歷旗剛風右官將軍五人，
赤天歷旗剛風騎大將軍五人，
赤天歷旗剛風左騎將軍五人，
赤天歷旗剛風右騎將軍五人，
上仙都郎吏虎賁千二百人，
上仙都察姦鈎騎千二百人，
上仙都三官僕射千二百人，
上仙都天丁力士千二百人，
上仙都天驪甲卒千二百人，
上仙都收氣食氣吏六十人，
上仙都收神食神吏六十人，
上仙都收鬼食鬼吏六十人，
上仙都收邪食邪吏六十人，


上仙都收毒食毒吏六十人，
上仙都科車赤符吏六十人，
上仙都剛風騎置吏六十人，
上仙都驛馬上章吏六十人。



上靈官直使功曹十五人，
上靈官正一功曹十五人，
上靈官治病功曹十五人，
上靈官左官使者十五人，
上靈官右官使者十五人，
上靈官陰神決吏十五人，
上靈官陽神決吏十五人，
上靈官陰官功曹十五人，
上靈官陽官功曹十五人，
上靈官陰官太醫吏十五人，
上靈官陽官太醫吏十五人，
上靈官驛騎大將軍五人，
上靈官左驛騎將軍五人，
上靈官右驛騎將軍五人，
上靈官都驛騎大將軍五人，

上靈官左都驛騎將軍五人，
上靈官右都驛騎將軍五人，
上靈官都官大將軍五人，
上靈官左都官將軍五人，
上靈官右都官將軍五人，
上靈官都督騎大將軍五人，
上靈官都督左騎將軍五人，
上靈官都督右騎將軍五人，
上靈官中都騎大將軍五人，
上靈官中都左騎將軍五人，
上靈官中都右騎將軍五人，
上靈官郎吏虎賁千二百人，
上靈官察姦鈎騎千二百人，
上靈官三官僕射千二百人，
上靈官天騶甲卒千二百人，
上靈官天丁力士千二百人，
上靈官收氣食氣吏六十人，
上靈官收神食神吏六十人，
上靈官收鬼食鬼吏六十人，
上靈官收邪食邪吏六十人，
上靈官收毒食毒吏六十人，
上靈官科車赤符吏六十人，
上靈官剛風騎置吏六十人，

上靈官驛馬上章吏六十人。



一者不殺當念衆生，
二者不色淫犯非法，
三者不盜取非義財，
四者不欺善惡反論，
五者不醉常思淨行。

保舉
監度
度師

太上正一盟威法錄

①「錄」字下原有「一部」二字，刪。

(錢安靖點校)

031 四斗二十八宿天帝

大錄

經名：四斗二十八宿天帝大錄。
撰人不詳，約出於南北朝。係早
期天師道法錄。一卷。底本出
處：《正統道藏》正一部。

某號某年太歲，某月日子，上建某州
郡縣鄉里，男女姓名，年如干歲，某月某
日生，屬北斗第幾星君，係諸天二十八
宿，今臣某乙謹齋信抱詞列誓，終身奉受
不敢輕易違師叛道，更從異學嫉忌鬲
戾，不忠不孝不仁不義，愛養百姓，恭
敬萬神，斷諸酒肉，清靜身心，不貪不
慾，不憎不嫉，救度一切，馘滅千邪，和
天安地，保國寧人，輔佐帝王，敷明聖
道，不諂不佞，不讒不謗，謙卑退讓，先
人後己，貞淳敦厚，恪勤眷穆，事上接
下，視如手足，若犯約違盟，棄真就偽，

某乙與七祖父母長淪地獄，風刀萬劫，
不敢有言，一如太上玄都律令。



東方九炁青天蒼龍七宿錄文

箕星中靈官神仙兵馬九萬人，
太皇黃曾天中神仙兵馬九萬人，
都官功曹各九人，
尾星中靈官神仙兵馬九萬人，
太明玉完天中神仙兵馬九萬人，
上部功曹各九人，
心星中靈官神仙兵馬九萬人，
清明何童天中神仙兵馬九萬人，
中部功曹各九人，
房星中靈官神仙兵馬九萬人，
玄胎平育天中神仙兵馬九萬人，
下部功曹各九人，
氏宿中靈官神仙兵馬九萬人，
光明文舉天中神仙兵馬九萬人，
都官使者各九人，
亢星中靈官神仙兵馬九萬人，
七曜摩夷天中神仙兵馬九萬人，
上部使者各九人，
角星中靈官神仙兵馬九萬人，
虛无越衡天中神仙兵馬九萬人，
中部使者各九人，
星中靈官各九人，
太極濛翳天中神仙兵馬九萬人，
下部使者各九人，
星中真人各九人，
青天將軍各九人，
青衣兵士各九萬人，
星中道士各九人，
青天神王各九人，
青衣甲卒各九萬人，
星中玉童各九人，
青天金剛各九人，
青衣天驪各九萬人，
星中玉女各九人，
青天直符各九人，
青衣天丁各九萬人，
星中童子各九人，
青天直事各九人，
青衣力士各九萬人，
九炁排天吏各九人，
青天典案各九人，
青衣虎賁各九萬人，
九炁敢健吏各九人，

東方收炁食炁吏各九人，
 青衣飛龍騎各九億萬衆，
 九炁鐵額吏各九人，
 東方收神食神吏各九人，
 青帝雲騰騎各九億萬衆，
 九炁執法吏各九人，
 東方收邪食邪吏各九人，
 青帝虎遊騎各九億萬衆，
 九炁科車吏各九人，
 東方收鬼食鬼吏各九人，
 青帝麟行騎各九億萬衆，
 九炁赤符吏各九人，
 東方收毒食毒吏各九人，
 青帝鳳翔騎各九億萬衆，
 九炁上章吏各九人，
 東方收精食精吏各九人，
 青帝神仙騎各九億萬衆。

東方

卷內星符並朱書




南方三炁丹天朱雀七宿籙文

軫星中靈官神仙兵馬三萬衆，
 赤明和陽天中神仙兵馬三萬衆，
 都官功曹各三人，
 翼星中靈官神仙兵馬三萬衆，
 玄明恭華天中神仙兵馬三萬衆，
 上部功曹各三人，
 張星中靈官神仙兵馬三萬衆，
 耀明宗飄天中神仙兵馬三萬衆，
 中部功曹各三人，
 星星中靈官神仙兵馬三萬衆，
 竺落皇笏天中神仙兵馬三萬衆，
 下部功曹各三人，
 柳星中靈官神仙兵馬三萬衆，
 虛明堂曜天中神仙兵馬三萬衆，

都官使者各三人，
 鬼星中靈官神仙兵馬三萬衆，
 觀明端靜天中神仙兵馬三萬衆，
 上部使者各三人，
 井星中靈官神仙兵馬三萬衆，
 玄明恭慶天中神仙兵馬三萬衆，
 中部使者各三人，
 太煥極瑤天中神仙兵馬三萬衆，
 下部使者各三人，
 星中真人各三人，
 赤天將軍各三人，
 赤衣兵士各三萬人，
 星中仙人各三人，
 赤天神王各三人，
 赤衣甲卒各三萬人，
 星中道士各三人，
 赤天金剛各三人，
 赤衣天騶各三萬人，
 星中玉童各三人，
 赤天直符各三人，
 赤衣天丁各三萬人，
 星中玉女各三人，
 赤天直事各三人，

赤衣力士各三萬人，
 星中童子各三人，
 赤天典案各三人，
 赤衣虎賁各三萬人，
 三炁排天吏各三人，
 南方收炁食炁吏各三人，
 赤帝飛龍騎各三億萬衆，
 三炁敢健吏各三人，
 南方收神食神吏各三人，
 赤帝雲騰騎各三億萬衆，
 三炁執法吏各三人，
 南方收鬼食鬼吏各三人，
 赤帝鳳翔騎各三億萬衆，
 三炁鐵額吏各三人，
 南方收邪食邪吏各三人，
 赤帝虎遊騎各三億萬衆，
 三炁科車吏各三人，
 南方收精食精吏各三人，
 赤帝麟行騎各三億萬衆，
 三炁赤符吏各三人，
 南方收毒食毒吏各三人，
 赤帝神仙騎各三億萬衆。

南方



西方七氣素天白虎七宿籙文

參星中靈官神仙兵馬七萬衆，
 元載孔昇天中神仙兵馬七萬衆，
 都官功曹各七人，
 觜星中靈官神仙兵馬七萬衆，
 太安黃崖天中神仙兵馬七萬衆，
 上部功曹各七人，
 畢星中靈官神仙兵馬七萬衆，
 顯定極風天中神仙兵馬七萬衆，
 中部功曹各七人，

昂星中靈官神仙兵馬七萬衆，
 始皇孝芒天中神仙兵馬七萬衆，
 下部功曹各七人，
 胃星中靈官神仙兵馬七萬衆，
 太皇翁重天中神仙兵馬七萬衆，
 都官使者各七人，
 婁星中靈官神仙兵馬七萬衆，
 無思江由天中神仙兵馬七萬衆，
 上部使者各七人，
 奎星中靈官神仙兵馬七萬衆，
 上揲阮樂天中神仙兵馬七萬衆，
 中部使者各七人，
 星中真人各七人，
 無極曇誓天中神仙兵馬七萬衆，
 下部使者各七人，
 星中神仙各七人，
 素天將軍各七人，
 白衣兵士各七萬人，
 星中道士各七人，
 素天神王各七人，
 白衣甲卒各七萬人，
 星中玉童各七人，
 素天金剛各七人，

白衣天騶各七萬人，
 星中玉女各七人，
 素天直符各七人，
 白衣天丁各七萬人，
 星中童子各七人，
 素天直事各七人，
 白衣力士各七萬人，
 七炁排天吏各七人，
 素天典案各七人，
 白衣虎賁各七萬人，
 七炁敢健吏各七人，
 西方收炁食炁吏各七人，
 白帝飛龍騎各七億萬衆，
 七炁鐵額吏各七人，
 西方收神食神吏各七人，
 白帝雲騰騎各七億萬衆，
 七炁執法吏各七人，
 西方收邪食邪吏各七人，
 白帝虎遊騎各七億萬衆，
 七炁科車吏各七人，
 白帝鳳翔騎各七億萬衆，
 七炁赤符吏各七人，
 西方收精食精吏各七人，

白帝麟行騎各七億萬衆，
 七炁剛風吏各七人，
 西方收毒食毒吏各七人，
 白帝神仙騎各七億萬衆。

西方

卍

奎 產 婁 奎

胃 昂 胃 昂

畢 觜 畢 觜

參 樂 參 樂

北方五炁玄天玄武七宿籙文

壁星中靈官神仙兵馬五萬衆，
 皓庭霄度天中神仙兵馬五萬衆，
 都官功曹各五人，
 室星中靈官神仙兵馬五萬衆，
 淵通元洞天中神仙兵馬五萬衆，

上部功曹各五人，
 危星中靈官神仙兵馬五萬衆，
 翰寵妙成天中神仙兵馬五萬衆，
 中部功曹各五人，
 虛星中靈官神仙兵馬五萬衆，
 秀樂禁上天中神仙兵馬五萬衆，
 下部功曹各五人，
 女星中靈官神仙兵馬五萬衆，
 無上常融天中神仙兵馬五萬衆，
 都官使者各五人，
 牛星中靈官神仙兵馬五萬衆，
 玉隆騰勝天中神仙兵馬五萬衆，
 上部使者各五人，
 斗星中靈官神仙兵馬五萬衆，
 龍變梵度天中神仙兵馬五萬衆，
 中部使者各五人，
 星中靈官各五人，
 太極平育天中神仙兵馬五萬衆，
 下部使者各五人，
 星中真人各五人，
 玄天將軍各五人，
 黑衣兵士各五萬人，
 星中神人各五人，


玄天神王各五人，
 黑衣甲卒各五萬人，
 星中道士各五人，
 玄天金剛各五人，
 黑衣天騶各五萬人，
 星中玉童各五人，
 玄天直符各五人，
 黑衣力士各五萬人，
 生中玉女各五人，
 玄天直事各五人，
 黑衣天丁各五萬人，
 星中童子各五人，
 玄天典案各五人，
 黑衣虎賁各五萬人，
 五炁排天吏各五人，
 北方收炁食炁吏各五人，
 黑帝飛龍騎各五億萬人，
 五炁敢健吏各五人，
 北方收神食神吏各五人，
 黑帝雲騰騎各五億萬人，
 五炁鐵額吏各五人，
 北方收邪食邪吏各五人，
 黑帝虎遊騎各五億萬人，

五炁執法吏各五人，
 北方收鬼食鬼吏各五人，
 黑帝鳳翔吏各五億萬人，
 五炁科車吏各五人，
 北方收精食精吏各五人，
 黑帝麟行騎各五億萬人，
 五炁赤符吏各五人，
 北方收毒食毒吏各五人，
 黑帝神仙騎各五億萬人。

北方








壁	危	女	斗
			
			
	室	虛	牛
			
			


五帝五星五嶽神仙籙文

東方青帝靈威仰其精歲星下應泰山神
 仙靈官兵馬各九億萬人，
 南方赤帝赤燁弩其精熒惑下應衡山神
 仙靈官兵馬各三億萬人，
 西方白帝白招矩其精太白下應華山神
 仙靈官兵馬各七億萬人，
 北方黑帝叶光紀其精辰星下應恒山神
 仙靈官兵馬各五億萬人，
 中央黃帝含樞紐其精鎮星下應嵩山神
 仙靈官兵馬各一億萬人。

中央符



太上三五黃神越章籙



某號某年太歲某月日，子上建某州郡縣鄉里，男女生姓名，年如干歲，某月某日生，請受太上三五黃神越章，四天平剛橫行赤章，七十二印赤錄，某乙一心歸向丹誠，勤求請以七祖為盟誓不負心，臣某乙昔詣某君門下奉授之日，要當內以治身，外以濟物，百姓凡有告請不敢有違，即日依科傳授，男官某乙不敢隱真出偽某乙奉授之後不敢妄傳，傳非其人，一旦違科，九祖獲考，一如三天太上黃老將軍功曹吏兵仙童玉女玄都大道律令。


赤天三五行印大將軍百千萬人，
赤天三五行印使者大將軍百千萬人，
赤天三五行印唐將軍百千萬人，
赤天三五行印上部大將軍百千萬人，
赤天三五行印中部大將軍百千萬人，
赤天三五行印周將軍百千萬人，
赤天三五行印下部大將軍百千萬人，
赤天三五行印傳香大將軍百千萬人，
赤天三五行印却兵大將軍百千萬人，
赤天三五行印治病大將軍百千萬人，

赤天三五行印攝鬼大將軍百千萬人，
赤天三五行印殺鬼大將軍百千萬人，
赤天三五行印青腰玉童百千萬人，
赤天三五行印青腰玉女百千萬人，
赤天三五行印傳香玉童百千萬人，
赤天三五行印傳藥玉童百千萬人，
赤天三五行印傳藥玉女百千萬人，
赤天三五行印傳香玉女百千萬人，
赤天三五行印上部治病功曹百千萬人，
赤天三五行印直符使者百千萬人，
赤天三五行印却虎伏虎大將軍百千萬人，
赤天三五行印滅魔大將軍百千萬人，
赤天三五行印直事使者百千萬人，
赤天三五行印傳香火大將軍百千萬人，
赤天三五行印斬邪大將軍百千萬人。



太上三五交乾步綱錄

大道弟子某乙，行年若干歲，幾月生，出行已來，精神薄弱，恐不免災厄，今收除邪逆惡人鬼賊，即日聽署三五交乾，六紀翻天倒地，百鬼逃亡，精鬼魔滅，三五所指，鬼當自死，急急如律令。



監度
度師

四斗二十八宿天帝大籙

(錢安靖點校)

032 太上正一延生保

命錄



經名：太上正一延生保命錄。
原不題撰人，出於明初。一卷。
底本出處：《正統道藏》正一部。

據某鄉貫，居位奉道信士某，詞稱本命某年月日時建生，上屬北斗某星君注照言念，某素以太上高皇帝王神氣在身，不能自分別，詣道自實，言被三炁君召，即日謹齋法信，叩頭恭詣龍虎山嗣漢天師真人門下，拜受太上正一延生保命祕錄一階，修身鍊己，保命護身，過度千災，驅除萬惡，延年益算，學道成真，有違科約，坐見中傷，伏願大道元恩錫垂祐助，添神益算，真炁流通，慶及群生，七祖九曾俱蒙開度，行符勅水，救病扶危，先人後己，施無望報，成

功不幸，如此之行，道將立見，急急依遵太上正一元降律令。


太上老君於无上天三天，與十方大聖至真尊神，長生保命護身天尊，領諸得道神仙真仙飛仙及慈悲度厄真人，尋聲救苦真人，濟生度死真人，萬福護身真人，歷觀世界，見諸男女，各遭三灾九厄，十苦八難，遇殃值禍，無方解謝，沈墜三塗，漂諸六趣，永沒地獄。天尊觀見，憫念群生，教以謝愆之法，濟生度死，得離罪苦，若有男女，橫被六天疫毒，水火盜賊，蛇虎魑魅，惡人咒詛，復連殃注，五土尅病，皆當闔家齊心修齋，安置壇場，香花燈燭，請三洞道士焚香行道，誦經佩錄，如法修行，諸灾橫難，永得解脫，十直八節，三元本命，父母降生之日，修齋佩錄，保安家眷，即得降大神力，保命護身，若元辰六害十惡，修齋佩錄，即得除灾滅厄，保命護身，若父母夫妻亡歿，修齋佩錄，心願生天，即得拔亡度厄，保護人身，若元辰六害死氣之厄，修齋佩錄，即得解害滅妖，無灾無難，無罪不穰，保命護

身，永得清淨。



東方青騎天官兵馬九億萬人，
東方保命護身金剛力士九億萬人，
南方赤騎天官兵馬三億萬人，
南方保命護身金剛力士三億萬人，
西方白騎天官兵馬七億萬人，

西方保命護身金剛力士七億萬人，
 北方黑騎天官兵馬五億萬人，
 北方保命護身金剛力士五億萬人，
 中央黃騎天官兵馬十二億萬人，
 中央保命護身天騶甲卒十二億萬人，
 十方保命兵士千億萬人，
 十方護身兵士千億萬人，
 十方解害兵士千億萬人，
 十方除病兵士千億萬人，
 十方消災兵士千億萬人，
 十方護命兵士千億萬人，
 十方滅考兵士千億萬人，
 十方斬瘟兵士千億萬人，
 十方滅毒兵士千億萬人，
 十方解誓兵士千億萬人，
 十方治癩兵士千億萬人，
 十方斬妖兵士千億萬人，
 十方助法兵士千億萬人，
 十方護經力士千億萬人，



天靈官監生使者三人，
 天靈官保命使者三人，
 天靈官長生使者三人，
 天靈官扁鵲太醫三人，
 天靈官除黑簿吏三人，
 天靈官東斗註算君吏九人，
 天靈官南斗上生君吏三人，
 天靈官西斗記名君吏七人，
 天靈官北斗落死君吏五人，
 天靈官中斗大魁君吏十二人。

以上符篆並丹書

正一真人曰：世間善男信女，佩受太上正一延生保命錄，尊奉敬禮，仙曹真吏營衛兆身，名標金簡，克作長生，七祖超昇，位登天人，子其遵奉焉。弟子某即日齋持質信，恭詣天師門下，拜受太上正一延生保命錄一階，誓願修奉，罔敢輕慢靈文，倘或有違，甘當冥憲，不敢怨道咎師，一如玄科律令。
 太上正一延生保命錄

請錄法詞

太上正一延生保命錄請法詞：

維某年月日某辰，具貫隸某處居住，奉道

信士某詞稱，本命某年月日時建生，上屬北斗某星君注照，即日謹齋法信叩頭，恭詣龍虎山嗣漢天師真人門下，拜受太上正一延生保命錄一階。伏以道與之貌，百神默拱於泥丸，天賦之形，萬烝齊資於玉戶，養正則神明陰相，惑邪則災害旁加，度身威光，命不待護而自護，受天法錄，神未嘗存而默存，延福延齡，消自戕之妖孽，常清常靜，保惟止之吉祥，既睹慈光，恭遵嚴戒，某無任懇禱之至，謹詞。

天師門下，據弟子某齋持質信，詣道自陳，求受太上正一延生保命錄一階，及請真師寶諱，終身敬奉，今來所據投詞，即日告盟天地，立誓三官，破券分環，依科傳授給付，如後。

錄一階

太上正一延生保命錄

儀式

正一修真旨要節目

祖玄真三師玉諱

祖師三天扶教輔元大法師正一冲玄神化靜應顯佑真君張道陵。

玄師嗣師太清演教妙道真君張衡。
真師系師太清昭化廣德真君張魯。

經籍度三師法諱

經師上清三洞經錄南曹真士玉府上卿
都天大法主嗣漢四十二代天師張正
常。

籍師上清三洞經錄太極執法真宰靈寶

領教真人都天大法主嗣漢四十三代

天師張字初。

度師上清三洞寶錄靈寶領教玄化真人
南曹執法仙宰都天大法主嗣教四十四
代天師張字清。

臨壇師法名

證盟師

監度師

保舉師

天師正應先生曰：玄聖格言，天
真祕檢，扶衰度厄。當知三元華蓋之
靈，保命延生，此謂五斗藏身之錄，感
孚孔易，福利無邊。故我太上設教，流
傳世學，由是歷代真師對敷寶訓，汲引
有緣，繩繩不絕。我以夙慶，世戴國
恩，紹正一之師傳，振天目之宗緒。第

法錄傳世寢遠，乃選良匠，鋟木成書，
以久其傳。若夫禁戒守持，惻隱慈悲，
從古至人，莫不如是。登壇善信，各宜
滌除玄覽，積行累功，庶幾有願皆符，
自此超凡入妙。昭然盟載，可不慎歟。

天師廣微子曰：我家以太上符錄
濟度人天，保鎮國祚，千有五百餘歲
矣。祖訓孔昭，奚庸贅贊。惟我先真
君，際遇聖朝混一區宇，首見尊崇，江
南冠褐咸隸管領。予襲教以來，三朝
帝闕疊被恩光，恭遇龍飛，特頒渙號，
以精嚴比虛靖，謂祇肅似冲和，加官徵
例於唐朝，胙土進封於留國。做好事，
傳符錄，俾紹先猷；祈福貺，禦民災，
欽承聖訓。祈天永命，敢不祇勤，度錄
傳符，益彰開化，上以對敷天子丕顯之
命，下以敷錫庶民皇極之休。尚克時
忱，以介景福。

正一玄壇保舉師，上清三洞經錄，
某保舉到奉道信士某，參受太上正一延
生保命錄，皈身佩奉。本壇除已具錄
事由，躬請正一嗣教天師真人，申聞祖
天師正一真人，依科傳度外，爰給詞以

爲證，俾遵教以奉行。倘負盟言，自貽
玄憲。

太上正一延生保命錄^①

①「錄」字下原有「請法詞」三字，刪。

（錢安靖點校）

033 太上正一解五音咒 詛秘錄

經名：太上正一解五音咒詛秘錄。原不題撰人，出於明代。一卷。底本出處《正統道藏》正一部。

據某鄉貫居住奉道信士某詞稱，本命某年月日時建生，上屬北斗某星君注照，即日謹齋法信叩頭，恭詣龍虎山嗣漢天師真人門下，拜受太上解五音咒詛錄一階，解釋咒詛，蕩穢魔禱，消災度厄，延壽長年，敬受奉行，克符效信，有違科約，坐見中傷，一如玄科律令。

東方九夷甲乙君領兵九千人，翻解春三月咒詛。





南方八蠻丙丁君領兵三千人，翻解夏三月咒詛。

西方六戎庚辛君領兵七千人，翻解秋

三月咒詛。

北方五狄壬癸君領兵五千人，翻解冬三月咒詛。

中央三秦戊己君領兵一萬二千人，翻解四季月咒詛。



弟子某或被惡人圖畫形像，以刀刺心或道上神社壇場牢獄，山林溪澗，井竈之間；或與河伯水官，俗中邪師，凡有鬼神之處，咒詛百端，致生災害。奉請太元兵士百萬眾，又請翻倒君兵士十萬人，一合來下，悉皆解之，放遣魂魄，不得拘留，平和神炁，消蕩災凶，急急如律令。

已上符篆並丹書

正一真人曰：吾觀世間男女多為惡人魔禱，指斥天地，呼證鬼神，興諸咒詛，百盟之鬼，所見拘繫，使人動止輒軻，夢寢不寧，怪異妄生，妖祥屢見，無由解釋，以致殞傷，深可哀憫，於是即詣太清天中老君金闕之下，殷勤禮請，乞開紫陽之宮，啓雲錦之笈，請太上解五音咒詛妙錄，傳付世間善信之士，得參佩者，即免斯苦，克終天年，永無天惡，子宜敬奉焉。

弟子某即日齋持法信，恭詣天師門下，拜受太上解五音咒詛祕錄一階，佩受之後，誓遵盟約，一旦有違，甘當冥考，不敢怨道咎師，一如玄科律令。

太上正一解五音咒詛祕錄

請錄法詞

太上正一解五音咒詛祕錄請法

詞：

維某年某太歲某月，某朔某日某辰，某鄉貫居住奉道信士某詞稱，本命某年月日時建生，上屬北斗某星君，即日謹齋法信叩頭，恭詣龍虎山嗣漢天師真人門下，拜受太上解五音咒詛祕錄一階，供養尊禮，伏以天灾物癘，固塵世之常，然鬼責人，非豈本心之欲爾，世諦謂之咒詛，道書乃曰冤憎，義雖不同，理或有是，至有終日不解，歷世相仍，聞諫愈憎，巧言莫喻，惟吾大道憫念此徒興慈悲心，舉直措枉。飛符攝籙，挫銳解紛，俾其和氣，自然嗔心，不動求哀，末學未省過尤，稽首師尊，願垂拯救，某無任懇禱之至，謹詞。

天師門下，據弟子某齋持法信，詣道自

陳，求受太上解五音咒詛祕錄一階，及請真師寶諱，終身敬奉，今來所據投詞，即日告盟天地，立誓三官，破券分環，依科，傳授給付如後。

錄一階

太上解五音咒詛祕錄

儀式

正一修真旨要

祖玄真三師玉諱

祖師三天扶教輔元大法師正一冲玄神化

静應顯佑真君張道陵，

玄師嗣師太清演教妙道真君張衡。

真師系師太清昭化廣德真君張魯，

經籍度三師法諱

經師上清三洞經籙南曹真士玉府上卿

都天大法主嗣漢四十二代天師張正

常，

籍師上清三洞經籙太極執法真宰靈寶

領教真人都天大法主嗣漢四十三代

天師張字初。

度師上清三洞寶籙靈寶領教玄化真人

南曹執法仙宰都天大法主嗣教四十

四代天師張宇清。

臨壇師法名

證盟師

監度師

保舉師

天師正應先生曰：紫陽寶誥，雲笈靈文，解咒詛之牽纏，破魔謀之陰害，始傳聖筆，載在玄文，授付世人，消諸橫惡。故我太上設教，流傳世學，由是歷代真師，對敷寶訓，汲引有緣，繩不絕。我以夙慶，世戴國恩，紹正一之師稱，振天目之宗緒。第法籙傳世寢遠，乃選良匠，鋟木成書，以久其傳。若夫禁戒持守，惻隱慈悲，從古至人，若不如是。登壇善信，各宜滌除玄覽，積行累功，庶幾有願皆符，自此超凡入妙。昭然盟載，可不慎歟。

天師廣微子曰：我家以太上符籙，濟度人天，保鎮國祚，千有五百餘歲矣。祖訓孔昭，奚庸贅贊。惟我先真君，際遇聖朝混一區宇，首見尊崇，江南冠褐，咸隸管領。予襲教以來，三朝帝闕疊被恩光，恭遇龍飛，特頒煥

號，以精嚴比虛靖，謂祇肅似冲和，加官徵例於唐朝，胙土進封於留國。做好事，傳法籙，俾紹先猷；祈福貺，禦民災，欽承聖訓。祈天永命，敢不祇勤，度籙傳符，益彰開化，上以對敷天子丕顯之命，下以敷錫庶民皇極之休，尚克時忱，以介景福。

正一元壇保舉師，上清三洞經籙某保舉到，奉道信士某，叅受太上解五音咒詛祕籙，皈身佩奉，本壇除已具錄事由，躬請正一嗣教天師真人，申聞祖天師正一真君，依科傳度外，爰給詞以爲證，俾遵教以奉行，倘負盟言，自貽玄憲。

太上正一解五音咒詛祕籙^①

①「籙」字下原有「請法詞」三字，刪。

（錢安靖點校）

034 太上正一度仙靈錄儀

經名：太上正一度仙靈錄儀
(擬)。撰人不詳，約出於南北朝。係早期天師道授籙儀式。
《正統道藏》未收。現存敦煌
S. 6040 + 10376 + 203 等殘抄
本^①。

(前缺)

上刺入靜先三上香叩齒三(缺)

次太上玄元如法。

謹出臣身中五體真官功曹吏(缺)

一治病功曹、左右官使者、陰陽(缺)剛
風騎置驛馬上章吏官各二人出(缺)儀
直使功曹牟朱陽之幘，戴通天之冠
(缺)帶龍頭之劍，持謁薄，正一功曹著
朱(缺)絳章單衣，腰帶虎符，齊執玉板
左右官(缺)戴九德之冠，腰帶明光之

劍，持幢執節(缺)方，正一功曹住立中
央，左右官使者持幢在前(缺)建節在
後，陽神決吏立左，陰神決吏立右，科
車赤符吏、剛風騎馬上章吏，盡出此
軍，在臣前後左右，冠帶事訖，擊持玉

上，請與功曹使者對共互省。臣謹伏
讀關聞，△叩頭稽顙伏地，當(上)章刺
如法。便讀刺，讀共此出官法。讀章刺竟，鳴
鼓三通，曰：

案，銜受臣口中辭語，分別關啓此間△
州縣里中真官注炁、監察考召君將吏、
左右都平君、左右都候君、左右虎賁
將、中宮謁者、周天八極君、天皇執法
吏、執法天皇並^②諸官君、四部司隸都
官從事左右君，歷關右吏，次啓諸官
第，皆以次分別。謹上啓天師、嗣師、
女師、係師、女師君、夫(人及門)^③下

謹重關臣身中五體真官、官一小
吏、十二書佐，冠帶垂纓，摩研沾筆，隨
章刺上詣三天曹，誤字爲正，脫字爲定，
有君歷關，有吏次啓，必使頭達，無令
錯互。上官典者有所譴却，閉口炁升，
慎勿稽停。當令臣所請時下，所召時
到，所願時得，分別關啓事訖，還復宮
室。因伏地閉一炁也。

〔官〕君將吏等，陽平、鹿堂廿四治官君
將吏。臣以頑愚，蕪草(噍)類，冥緣有

次拜刺復官如左。若拜度錄章，於此便
立決耳。後文重出官。

幸，得在道門，預染治錄，受治之日，要
當採賢擇能，化喻百姓。今謹有△州
郡縣鄉里男女生民某甲，年如干歲，素
以胎生肉人，枯骨餘胤，千載運會，得
奉大道，遭值三天教統，正一開靈，亭
毒品物，蒼生係仰。△甲不揆頑瞽，崇新
大化，今詣^④臣求受△官如干將軍錄，
謹拜單紙度錄章刺一通，在此靜中玉案

臣關奏事竟，所出身中五體真官、
功曹使者，將軍吏兵悉還，從衆妙門而
入在地，還臣身中，無離左右，無令錯
互。功曹使者、將軍吏兵悉還中宮，各
復金堂玉室，須臣後召，復出奉行，一
如故事。便伏三叩齒、小仰頭，以鼻微微噏炁三
咽止，便再拜。

次鳴鼓三通，依舊復爐。

明旦平朝，入靜燒香發爐如前，再

拜出官，請度錄章，然後度錄。其中出官操章，悉如上法。其中口辭小異，臨時消息。操章畢，勿還官，又叩齒十二通，出吏兵曰：

臣身中仙靈二官直使正一功曹各五人出，正一功曹各五人〔出〕，左右使者各五人出，陰陽神決〔吏〕各五人出，郎吏虎賁、察奸鈎騎、三官僕射、天鄒〔騶〕甲卒、天釘力士官，各十二人出。臣昨日子午時上刺啓，爲男女生△甲如干人，各請將軍吏兵種數如牒，今日當下直使功曹簡閱吏兵，正一功曹分別將軍，付授肉人身中，不得錯互。讀此吏兵竟，師讀錄，弟子案前稱名受。

次叩齒三通，勅錄上符，呪曰：太上行，何皇皇。吏兵□□，羅列有次。行符從錄千里光，千鬼萬神不敢當。急急如律令。

勅錄上符竟，置案上，以一杯水著案前。猶未授錄，次重關啓曰：

某州〔郡〕縣鄉里中真官注炁監察考召四君將吏兵、都候謁者、治君治吏官、從事吏等，天神至，水神來，太一

陽將陰神，攝召男女生△三曾五祖，七世父母，詣臣靜治，監察肉人子孫，啓受官將軍吏兵，此下里中監盟君、監祖君錄上吏兵，一時持度，於今以去，隨行隨止，隨卧隨起。△甲若行山林之中，爲辟斥虎〔狼〕毒蟲；若行江淮，辟斥風波；若行城營里城，辟斥惡人口舌；若行疾〔病〕之中，當令灾消禍散；若入軍陣之中，辟斥白刃。原赦△甲未受錄之前，從七歲有識以來所犯心望意貪之罪，從天至地一切原赦，吏兵扶衛，一使如法，急急如生官考鬼律令。

讀此畢，勅向案前水汾受錄人，勅水文如左。叩齒三通，噓吸水，呪曰：

神水當起，追逐吏兵，受入肉人身中，上天下地，入火不燃，入水不濡，白刃之下不傷，與道合同。次以水三汾受錄人，師仍左手執錄，授與弟子，男左手、女右手，因繞腰三通竟，又抱錄西向再拜。次還向師，重約勅，其文如左。便長跪，叩齒十二通，曰：

功曹使者、郎吏虎賁、察奸鈎騎、

三官僕射、天鄒甲卒等官，各三百卅人出。出者嚴莊顯服，正其威儀，對共功曹使者，簡閱錄上將軍吏兵。從度吏兵之後，付授肉人身中，不犯惡爲非，一日違科犯約，坐見中傷，吏兵先坐。畢，復官如前法。因再拜。次復爐，呪如上法。都畢。

度仙靈錄儀 錄召儀

正月生被太玄清微中耀炁君召，
二月生被上玄玉理通炁君召，
三月生被中玄耀炁右官重光君召，
四月生被下玄微明化炁君召，
五月生被太元中官微明歷炁君召，
六月生被上元中官左歷炁君召，
七月生被中元左官歷炁君召，
八月生被下元重光中機化炁君召，
九月生被太始中辟萬道神君召，
十月生被上始始明中官君召，
十一月生被无下九老中狄君召，
十二月生被无下九老下狄君召。
右男女所受靈官錄召法。

若不知生月，取十二月召。

△郡縣鄉里男女子王甲，年若干歲，言被△官神童召。

男女生甲乙保舉 戶屬男官祭酒

△甲治，

右一人先无錄，奉道專心，脩良謹慎，今求請上仙或上靈十將軍吏兵，請給謹狀。

△郡縣鄉里男女童子甲乙，年若干歲，

言被△官君召。

男女生甲乙保舉 戶屬男官祭酒

△甲治，

右一人先佩上仙上靈童子一將〔軍〕錄，肉人奉道專心，屬行脩勤，好道務進，年轉長大，今求遷，請上仙或上靈十將軍吏兵，〔請〕給謹狀。

△郡縣鄉里男女更令△甲，年紀如干

歲，言被△官君召。

男女生甲乙保舉 戶屬男官祭酒

△甲治，

右一人先配上仙或上靈十將軍錄，肉人奉道專心，履行修勤，好道務進，今求遷，請上仙或〔上〕靈七十五將軍吏

兵，請給謹狀。

△郡縣鄉里男女生△甲，年如干歲，言被△官君召。

男女生甲乙保舉 戶屬男官祭酒

△甲治，

右一人先佩上仙或上靈七十五將軍錄，肉人奉道專心，屬行脩勤，好道務進，今求遷，請上仙上靈二官百五十將軍吏兵，請給謹狀。

△郡縣鄉里男女生△甲，年若干歲，言

被△官君召。

男女生甲乙保舉 戶屬男官祭酒

△甲治，

右一人先佩△官如干將軍錄，從來積年，甲素无狀，多違佩不謹慎，△年月日零失所佩錄，思愚自責，推求不得，今輒依科輸飯〔飯〕賢罰薪，如法詣妾求更復如先，請給謹狀。

係天師△治烝祭酒臣妾甲稽首再拜，

謹言刺如牒主郡一、主縣一，男女子王

甲童矇無知，恐為故烝所見中傷。今求請上仙或上靈童子一將軍吏兵，以自防護。謹牒〔郡〕縣鄉里姓名年紀，

所請將軍種數，并者〔著〕保舉人名姓如右。輒遣功曹使者與考召君吏，知肉人情實，應選用與不應用者，願及時下將軍吏兵。甲若未合法烝者，當重為考正，趣令合選，肉人無須待拜署謁言。甲誠惶誠恐，稽首再拜。

白刺 詣考召

太歲△子月日時男官祭酒△郡縣

臣妾王甲令於△郡縣里中

白刺 四君

右錄刺法，日中時上，亦可夜半子時

上。隨所受錄大小，依前牒易。

△郡縣鄉里男〔女〕子王甲，年〔如〕干歲，

右一人童矇無知，恐為故烝所見中傷。

今求請上仙或〔上靈〕童子一將軍吏兵，以自防護，請給謹狀。

泰玄都正一平烝係天師△治烝祭酒臣

妾△稽首再拜

上言：謹案文書，臣妾以昨日子午時入刺，請如牒主郡一、主縣一，男女子△甲童矇無知，恐為故烝所見中傷，求請上仙或上靈童子一將軍吏兵，以自防

護，謹拜章一通上聞，願天曹上官典者分別課次，下將軍吏兵，各案左右入肉人身中，常為甲消灾却耶，辟斥下官〔故〕炁，復注鬼炁。當令甲受錄之後，心開意忤，道炁附著△身，以為效信。恩惟

太上分別求哀，臣妾愚謹因二官直使、正一功曹、左右官使者、陰陽神決吏、科車赤符吏、剛風騎置驛馬上章吏官，各二人出操。臣謹為男女子王甲拜度錄章一通，上詣三天曹，伏須告報。臣甲誠惶誠恐，稽首再拜以聞。

右初受童子錄章。若受十錄牒及章中語，隨次前立成易之。泰清太歲悉如舊具法。

△郡縣鄉里男女更令△甲，年如干歲，右一人前以某年月日得疾病，詣祭酒李乙自保積治，甲從死得生，自說受令給使無恨。祭酒所在之詣，積如干年，甲改惡〔為〕慕樂長生之道，脩義給使有功勳。今求遷，請上仙或上靈十將軍吏兵，請給謹狀。

泰玄都正一平炁係天師△炁祭酒臣△稽首再拜

上言：謹案文書，臣妾以昨日子午時入刺，請如牒主郡一、主縣一，男女子△甲童蒙無知，恐為故炁所見中傷，求請上仙或上靈童子一將軍吏兵，以自防護，謹拜章一通上聞，願天曹上官典者分別課次，下將軍吏兵，各案左右入肉人身中，常為甲消灾却耶，辟斥下官〔故〕炁，復注鬼炁。當令甲受錄之後，心開意忤，道炁附著△身，以為效信。恩惟

太上分別求哀，臣妾愚謹因二官直使、正一功曹、左右官使者、陰陽神決吏、科車赤符吏、剛風騎置驛馬〔上〕章吏官，各二人出操。臣謹為男女子王甲拜度錄章一通，上詣三天曹，伏須告報。臣甲誠惶誠恐，稽首再拜以聞。

右初受童子錄章。若受十錄牒及章中語，隨次前立成易之。泰清太歲悉如舊具法。

△郡縣鄉里男女更令△甲，年如干歲，右一人前以某年月日得疾病，詣

祭酒李乙自保治，甲從死得生，自說受令給使無恨。祭酒所在之詣，積如干年，甲改惡為慕樂長生之道，脩義〔給〕使有功勳。今求遷，請上仙〔或上〕靈十將軍吏兵，請給謹狀。

泰玄都正一平炁係天師△炁祭酒臣△稽首再拜

上言：謹案文書，臣以昨〔日〕子午時入刺，請如牒主郡一、主縣一，男女更令甲，前以△年月日時得疾病，詣祭酒李乙自保，甲從死得生，〔自〕說受令給使無恨^⑤。祭酒所在之詣，積如干年，甲改惡為慕〔樂〕長生之道，脩義給使有功勳。今求遷，請上仙或上靈十將軍

錄，拜章一通上聞，願天曹上官典者分別課次，下將軍吏兵，各案左右入肉人身中，當為甲消灾却耶，辟斥下官故炁，復注鬼炁。肉人 更令時，〔考〕召君吏、逮召君吏，并前後故九種吏兵，令謁為言功舉遷如常科，比中官錄署使曹隱職，無令失意悉恨者。當令甲受錄之後，心開意了，道炁附著甲

身，以爲效信。恩惟
太上分別求哀。

右更令遷十將軍錄章法。

△郡縣鄉〔里〕男女生△甲，年如干歲，

右一人先佩上仙或上靈七十五將
軍錄，肉人奉道專心，履行脩懃，
好道務進，今求遷，請上仙上靈二
官百五十將軍吏兵，請給謹狀。

泰玄都正一平炁係天師△治炁祭酒臣
稽首再拜，

上言：謹案文書，臣昨日子午時入刺，
請如牒主郡一、主縣一，男女生△甲，
先佩上仙或上靈七十五將軍錄，肉人
奉道專心，履行脩懃，好道務進，今求
遷，請上仙上靈二官百五十將軍錄，謹
拜章一通上聞，願天曹上官典者分別
課次，下將軍吏兵，各案左右入肉人身
中，當爲甲消灾却耶，辟斥下官故炁，
復注鬼炁。肉人身中故將軍吏兵，隨
章受遷天曹，考召君吏所考事立，所召
者詣，有功勞者，謁爲言功舉遷如常
科，比中官錄署使曹隱職，無令失意悉
恨者。當令甲受錄之後，心開意了，道

炁附著甲身中，以爲效信。恩惟
太上分別求哀。

（以下原缺）

（P. 3484 抄本^⑥，前缺）

兵，各各上至玄都，典者受秩加賞，臣
等俱飛升仙，伏須告報。臣等誠惶誠
恐，稽首再拜以聞。

臣姓名 都縣

泰清无極无形无名虚見无自然至真
无上天尊金闕七寶玉陛下

年月日於△郡縣鄉里中齋竟上啓

神泉觀道士王道深敬寫

① S. 6040 + 10376 抄本首尾及下半部均殘損，末行文字可與
S. 203 抄本首行綴合。S. 203 原首尾殘缺無題，卷中有小
標題《度仙靈錄儀·考召儀》。其授度正一盟威法錄之儀
式，大致與《正統道藏》所收《正一法文法錄部儀》、《正一
法文十籙召儀》等書近似，故擬定經名爲《太上正一度仙
靈錄儀》。

② S. 203 抄本起於此行。

③ 方括號中文字，原抄本缺損或脫漏，據文義擬補。下文
同此。

④ 「詣」，原作「訴」，據文義改。

⑤ 「恨」字下原衍「給」字，刪。

⑥ 案 P. 3484 抄本原無標題，僅殘存數行。大淵忍爾《敦煌
道經目錄編》假定經名爲《上啓文例》。今考其內容應爲
早期天師道齋儀，文體與 S. 203 抄本近似。姑置於此。

（王卡點校）

035 上清洞天三五金剛

玄籙儀

經名：上清洞天三五金剛玄籙儀。撰人不詳，約出於南北朝。係早期天師道授錄儀。一卷。底本出處：《正統道藏》正一部。

係清玄無極真上元始天尊，長明金真玉署治左清真元氣九萬九千九百九十九重，流明玉天真人右積陽真精元氣八萬八千八百八十八重，金光寶耀真人中玄生靈清妙無鞅真氣百千萬重，玉玄金元真人都領上景清虛生神妙氣九億九萬九千九百九十九重氣，三十六洞天至真空玄丈人，臣某今領高上天寶玉皇三十六治都監，十方飛天神王總司九天三元八極，上下周迴四象，下統萬靈，普告十方，無窮諸天靈官三界六道，一切鬼神衆司等，臣某今

奉受高上上元元始洞天金剛三五九天元籙，即日依法宣行，傳授十方天人，

今有男女生某體素丹質，心慕清真，投詞自誓，求受上元洞天金剛三五元籙，

即依科加署天剛將軍兵士天官將吏位號，一依無極大道元始太上，高上玉

皇，無上至真，大聖十方，太上道君，三天太上老君，九天太上丈人，無上空玄

太上玉晨君，金闕玉帝陛下，即日授付元籙，所部上元洞天金剛三五九天元

真將軍兵士，天官將吏，各依品數位次，度某身安鎮三元上中下部，金堂玉

府闕節五城宮室，羅列天儀羽儀室儀神儀鳳儀營某身，左轉九億萬重衛某

身，右轉九億萬重，出入遊行，天剛即制御十方，攝召天神地祇八極萬靈，并

五嶽名山大澤，三河四海，江河淮濟，四瀆九域，鄉亭鬼主，九州符廟，里社

虛空，無極無窮，無幽無冥，無上無下，洞淵清虛，水府一切神祇皆當奉承符

命，天官統御，即防某身隱某形藏其景，若有凶神惡鬼六天雲中遊獵，精靈妖

魅魍魎欲來傷害某身者，天剛當齊功震

天動地，威風蕩滅，不得有違急急如高上太上玉皇律令。

洞天玄剛乘騎十億萬衆兵士，洞靈赤天剛騎十億萬衆兵士，洞天真剛乘騎十

億萬衆兵士，洞天上明剛乘騎十億萬衆兵士，洞靈赤天飛仙剛騎吏十億萬

衆，洞天上玄剛乘騎十億萬衆兵士，洞靈赤天飛行剛騎吏十億萬衆，洞天元

虛剛乘騎十億萬衆兵士，洞靈赤天飛飄剛騎吏十億萬衆，洞天元氣剛乘騎

十億萬衆兵士，洞靈赤天伏氣剛騎吏十億萬衆，洞天七元剛乘騎十億萬衆

兵士，洞仙赤天歷地消邪，剛騎吏十億萬衆，洞天翻天剛乘騎十億萬衆兵士，

洞仙赤天名殺剛騎吏十億萬衆，洞仙赤天覆地剛乘騎十億萬衆兵士，洞仙赤天

覆剛騎吏十億萬衆，洞天執錄剛乘騎十億萬衆兵士，洞仙赤天消惡剛騎吏

十億萬衆，洞天列宿剛乘騎十億萬衆兵士，洞仙赤天飛行列星剛騎吏十億

萬衆，洞仙赤天飛行列星剛騎吏十億

萬衆

萬衆，洞天迴命剛乘騎十億衆兵士，洞
仙赤天度筭剛騎吏十億萬衆，洞天北
玄剛乘騎十億萬衆兵士，洞仙赤天東
方七宿都星剛騎吏十億萬衆，洞天東
玄剛乘騎十億萬衆兵士，洞仙赤天南
方七宿都星剛騎吏十億萬衆，洞天南
玄剛乘騎十億萬衆兵士，洞仙赤天西
方七宿都星剛騎吏十億萬衆，洞天西
玄剛乘騎十億萬衆兵士，洞仙赤天北
方七宿都星剛騎吏十億萬衆，洞天中
玄剛乘騎十億萬衆兵士，洞仙赤天都
星剛騎吏十億萬衆，洞天中星剛乘騎
十億萬衆兵士，飛剛驛騎吏三十六億
萬衆，元命五氣剛乘騎百億萬衆兵士，
飛剛歷旗驛龍騎吏三十六億萬衆，元
命九氣剛乘騎百億萬衆兵士，飛剛璇
璣騎吏三十億萬衆兵士，元命七氣剛
乘騎百億萬衆兵士，飛剛大殺騎吏力
士三十六億萬衆，元命三氣剛乘騎百
億萬衆兵士，飛剛大營騎吏力士三十
六億萬衆，元命四氣剛乘騎百億萬衆
兵士，飛剛力士騎吏三十六億萬衆，上
元剛乘騎百億萬衆兵士，歷天金剛遊

天力士三十二億萬衆，上元剛乘騎百
億萬衆兵士，歷天金剛遊天力士三十
二億萬衆，上元剛乘騎玉晨君百億萬
衆兵士，歷天虎賁察姦鉤騎力士三十
六萬衆，洞元三五擊伐剛乘騎百億萬
衆，太上明真飛剛天丁力士三十五萬
衆，洞元三五擊刺剛乘騎百億萬衆，太
上明真飛剛金剛童子力士三十五萬
衆，洞元三五斗剛乘騎百億萬衆，太上
明真飛剛八神力士三十五萬衆，元洞
九天破殺剛乘騎百億萬衆，太上陽神
八殺君吏力士三十六萬衆，元洞九天
剛魅剛乘騎百億萬衆，太上陽神斗加
剛君吏力士三十六萬衆，元洞九天剛
魁騎百億萬衆兵士，太上陽神捕鬼剛
君吏力士三十六萬衆，上元歷天十方
都監大將軍一人兵士百億萬人，上元
根天十方都督大將軍一人兵士十億萬
人，上元生剛營天大將軍一人君吏九
十億萬人，上元生剛制天大將軍一人
君吏九十億萬人，上元飛天十方生剛
大將軍一人君吏九億萬人，上元九天
下元八極生剛大將軍一人君吏九億萬


人，上元九天上府三輔生剛大將軍一
人君吏九十億萬人，九元九天三台大
將軍一人君吏九十億萬人，九元三天
三台火剛將軍一人君吏九十億萬人，
上元三十二天三台大將軍一人君吏九
十億萬人，上元攝召十方三台洞陽大
將軍一人君吏九十億萬人，上元總御
天地三台洞陰大將軍一人君吏九十億
萬人，上元洞剛大將軍一人君吏億千
萬人，元洞中黃飛剛郎騎力士三十五
萬衆兵士，太上陰神消害剛君吏一人
官將百億萬衆，元洞中黃飛剛天騶甲
卒力士乘騎三十五萬衆兵士，太上陰
神羅身剛吏一人官將百億萬衆，元洞
中黃飛剛滅僞力士仙騎三十五萬衆兵
士，太上陰神藏形玉影剛君吏一人官
將百億萬衆，元洞中黃飛剛安身仙騎
三十五萬衆兵士，太上陰神覆形剛君
吏一人官將百億萬衆，无上三天飛仙
剛騎三十五萬衆兵士，太上陰陽伏禍
却灾剛加君吏一人官將百億萬衆，无
上三天飛仙執錄剛騎三十五萬衆兵
士，太上陰陽收氣食氣剛加君吏官將

百億萬衆，无上三天飛仙收惡剛騎三十五萬衆兵士，太上陰陽收毒食毒剛加君吏官將百億萬衆，无上三天飛仙萬福剛騎三十五萬衆兵士，太上陰陽收神食神剛加君吏官將百億萬衆，无上三天飛仙防身剛騎三十五萬衆兵士，太上陰陽收鬼食鬼剛加君吏官將百億萬衆，无上三天飛仙護命剛騎三十五萬衆兵士，太上陰陽收邪食邪剛加君吏官將百億萬衆，无上三天飛仙隱形剛騎三十五萬衆兵士，太上陰陽收魔食魔剛加君吏官將百億萬衆，无上三天飛仙召殺剛騎三十五萬衆兵士，太上陰陽收精食精剛加君吏官將百億萬衆，无上三天飛仙飛符剛騎三十五萬衆兵士，太上陰陽收凶食凶剛加君吏官將百億萬衆，无上三天飛仙最紀剛騎三十五萬衆兵士，太上陰陽收惡食惡剛加君吏官將百億萬衆，無上三天飛仙歷紀剛騎三十五萬衆兵士，太上陰神太醫官一萬二千人，无上三天剛風驛呈騎三十五萬衆兵士，太上陰陽執投湯火剛君吏一萬二千人，

無上三天赤剛中章飛騎三十五萬衆兵士，太上赤黃中剛吏送章飛剛君吏一萬二千人，無上三天赤剛飛步周天剛騎三十五萬衆兵士，太上赤天乘剛三元大將軍各三千萬衆兵士，无上三天乘日月剛騎三十五萬衆兵士，太上赤天乘二十八宿君吏三千萬衆兵士，无上三天乘剛都騎億千萬衆兵士，太上赤天乘三十六慧都星君億千萬衆兵士。

无上高上元始太上玄真上元太光開真洞明十方，玄映諸天金闕，受命總攝羣方，高上乘運，金剛震威，三五列位，九天奉行，元籙御神，歷度天關，生剛考召，天魔推崩，鬼帝攝精，清微廣明，元剛匡制，十方萬神之宗，營天鋪地，周任太空，流輝耀電，威備毒風，璇天玄象，元父氣陽，轉即禹餘，化即赤天，飛剛躡紀，流裔諸天，法輪應運，乘剛輔真，保劫制灾，經理天氣，飛剛乘騎，爲某藏形隱影，消灾散禍，濟命度厄，三象真形，乘星九元，以某魔神形魄俱到天庭。臣某年某月某日某時，於某國

郡縣鄉里受度，臣姓名某年若干歲，即日齎金鈕一雙，絳紋三十五尺，朱砂七兩，木香十斤法信等，登於靈壇，奉受高上上元元始洞天金剛三五九天元籙。臣某即於泰清洞天十二玄老无極大道太上老君，太上玄元老君，太上三天玄元始氣上皇老君，太上玉晨君，九老仙都丈人，上清洞天无上太上大道君，无極太上至真大道元皇太上老君，玉清洞天上上太上上明玉皇無極大道至真玄一老君，元始太上高玄丈人，鎮御无上金闕玉帝陛下，勅下，上皇三五真人，中皇三五真人，下皇三五真人金剛所部將軍乘騎兵士，天官將吏，各鎮某身中，周匝億千萬億重，一依高上元始太上大道君律令。



右契并文並朱書。

三五契儀


兩頭覆縫書之。

某年太歲某月朔日子時，某郡縣都鄉某里，住臣姓名年若干歲，自質心契，徵實冥誓，今齋金鈕一雙，絳紋三十五尺，朱砂七兩，木香十斤等物，求受高上上元元始洞天金剛三五九天元籙，真剛三象，真形元始飛剛神，金洞天虎符，飛天玄契等，臣某即日依科，加玄金剛天剛元剛三將軍兵士，乘騎天官將吏，

上清洞天三五金剛玄籙儀

天儀羽飾，種數名諱，真訣登壇，付度畫一，生氣破契，一依高上玄格受法之後，攝召十方八極，萬靈總御，五嶽名山大澤，三河四海，江河淮濟，四瀆九域，鄉亭鬼主，九州符廟，里社山林孟長，十二河源，津梁溪女，清靈水府，一切神明，皆當奉勅符命，助天理運，誅除妖魔逆鬼凶神，消灾却禍，斬伐不祥，明相營衛，某受道自誓，不敢橫生殺害，放逸正氣，作之無道，役使天官，有犯之日，即受天罰，皆如今約，

一如高上元始太上大道君律令。



一如高上元始太上大道君律令


一如道役使天官有犯之日，即受天罰，皆如今約，受道自誓，不敢橫生殺害，放逸正氣，作之無逆鬼凶神，消灾却禍，斬伐不祥，明相營衛，某切神明，皆當奉勅符命，助天理運，誅除妖魔，山林孟長，十二河源，津梁溪女，清靈水府，一河

淮濟，四瀆九域，鄉亭鬼主，九州符廟，里社八極，萬靈總御，五嶽名山大澤，三河四海，江氣破契，一依高上玄格受法之後，攝召十方，天儀羽飾，種數名諱，真訣登壇，付度畫一，生金剛天剛元剛三將軍兵士，乘騎天官將吏，洞天虎符，飛天玄契等，臣某即日依科，加玄五九天元籙，真剛三象，真形元始飛剛神金十斤等物，求受高上上元元始洞天金剛，三齋金鈕一雙，絳紋三十五尺，朱砂七兩，木香住臣姓名年若干歲，自質心契，徵實冥誓，今某年太歲某月朔日子時，某郡縣都鄉某里




洞天三五三將軍符儀

元始洞天三五洞真天剛符

已後符並朱書



四六五



高上无上元始太上洞天飛无玄虚玉都
左輔上元九天金剛，三五大威橫越平
天大將軍總制八極，高功車騎葛浩靈，
字文始，身長三千萬丈，督護九天軍兵
馬力士將吏都軍事，領陣億萬億萬乘
騎，排天羽儀無鞅之衆，周備十方，營
天制地，飛行九綱，威風震烈，掃除六


天，防災保劫，消灾滅禍，遊歷天地，執
御天璣，明理運數，扶命三元，鎮常五
行，三界司迎，某今奉受真形玄符，法鎮
於人，左宮青華玉闕，天璣九關，常主
九天生靈之運，玄玄光下，映日月同
成，流明輝電，洞煥某形，金剛乘騎大官
兵士將吏，皆守備某身周帀，百億千萬
重，出即神功，彌天蓋地，光威煥空，藏
即寂然，定光某身，自高上九天以下，莫
不歸降，通隨某身，遊鋒履刃，水火三
灾，九厄莫敢當，三界神官迎送，以某共
登皇庭金闕玉帝陛下，飛剛步紀，除天
灾，滅羣凶，斬惡神，龍虎遊戲，攝召羣
非，朱鳥翔儻，九魔崩摧，玄武巡虛，妖
精檢形，將軍扶天理運，助國輔時，制
灾，九元三光，七曜璇璣，玉衡五方，玄
斗布列，某形高上无上元始太上，左輔
三五，主東方南方十四宿，陽斗陽神陽
氣，通天通地，鎮上上太一生神部九十
九萬人，治肝府无上玄老生神部八十
八萬人，治心府即安鎮洞天左宮二方，
臨蓋天元，急急一如
元始太上律令。

金甲朱衣綠帶



高上无上元始太上洞天飛元虚无上都
右弼上元九天元剛三五廣威橫天大將
軍總制八方，高晨車騎唐文昌字金玄，
身長三千萬丈，都督三軍兵馬力士將
吏都軍陣事，領兵億萬，乘騎駭空，排
天雲儀无鞅之衆，周備八極，檢天制
地，總攝三綱，飛行震空，風馭諸天，光
烈萬方，收魔召神，討凶戮妖，斬伐不
祥。扶命三天，某今奉受真形玄符，法
鎮於人右宮素天七寶之闕，金闕之巔，
常主三天生神之運，常朗光日月之宮，
下映某身，營守備衛，天億千萬，重出流
耀，電轉洞明，某形天剛乘騎天官兵士
將吏，皆當備滿某身，出即彌天蓋地，隱
即寂處无間，定光某身之中，自无上三
天以下，莫不歸伏，隨某遊山涉水，三軍
五兵，莫不靡伏，飛元步星，徐蕩十方

野道，六天之神，虎龍騰躍，檢攝魔靈，朱鳥振翼，百鬼摧鋒，玄武躍虛，誅滅羣殃，將軍扶天制氣，助國御運，消灾保祚，七元三光，七曜璇璣玉衡，五方星宿布列，某形高上无上元始太上右弼三五，主西方北方十四宿生神陰運陰靈陰天陰氣，通天通地，鎮太一化生神部七十七萬人，治肺府玄上太上靈化生神神部五十五萬人，治腎府安鎮洞天右宮二方，臨蓋天機，急急一如元始太上律令。



高上无上元始太上洞天飛梵王虛元都

中鎮上元九天元剛三五平天正威廣越大將軍，督天十方高上車騎武神都軍周文度，字金光，身長三千丈，都領十方飛天軍將兵馬力士將吏神功擊伐事，領陣億億，萬萬乘騎，駭天排空，天儀赫烈，耀虛九演，無鞅之衆，備鎮九元，營天威攝，震動雲營，驅除六天，檢攝北酆，制御萬靈，執戈天兵，召制三界，羣魔百精，建節鬼帝，截滅姦凶，聞僞即討，聞妖即誅，聞邪即戮，聞善即護，聞正即遷，聞真即衛，聞福即防，聞禍即消，聞吉即保，聞凶即除，是以扶命天地，某今奉受真形玄符，法鎮人之三元太微玉府中皇之宮，金闕五城，九晨之堂，常主天地生神明運，匡正璇璣，左日右月，飛耀照空，火甲前陣，毒兵後從，左列武士，青龍萬重，右列神將，白虎天衝，朱鳥靈禽，吐火嘯風，句陳玄武，食鬼食凶，左侍橫天力士，斬捕姦妖，右侍金剛力士，吞邪食鬼，流明炎電，敢有不祥，出即威風蕩穢掃塵，營天制地，彌蓋太空，隱即太寂細微之中，定立天地，悉由神功，今鎮某身

三元之中，自天上天下，地上地下，莫不歸隸，某若遊行山丘廣野，江河四海，八極九州，一切神祇，鬼王土地，符廟里神，真官注氣，咸當奉符承命也，將軍明理，三元正氣，輔國扶命，天地通運，四時五行，用化九天，三元七曜，璇璣玉衡，諸天日月，星宿三綱，六紀布列，一切光明大神，皆列在某形高上無上元始太上太微玉虛中皇上元上府，主三元九府太一元精生神之運，通元通始，法鎮九天上元部十二億萬人，治脾府太上元皇清真靈運之首，一如元始太上律令。

某年號太歲某月某朔某日子時，某郡縣鄉里，男官女官，臣姓名某年若干歲，奉受高上上元元始洞天三五金剛玄籙，於某郡縣里中，登壇付度。

上元洞天真剛三五策板杖等儀

揚州社君鄒混，冀州社君馮遷，豫州社君範祀，荊州社君張象，兗州社君費萌，徐州社君賈萌，雍州社君盛季，青






州社君韓育，梁州社君楊謙。

元始老君勅天地水三官，山川五嶽，崑崙九土，日月五星，二十八宿，九星七曜，三十六慧，璇璣玉衡，五斗真人，百億衆神，咸當奉承衛命某身，攝魔收鬼殺邪滅惡，九土社界，急行驛傳，急急如律令！

太歲某年某月某日

角星亢星，氐星房星，心星尾星，箕星斗星，牛星女星，虛星危星，室星璧星，奎星婁星，胃星昂星，畢星觜星，參星井星，鬼星柳星，星星張星，翼星軫星，靈天三十二度天剛，驛呈二十八宿，營護某身，三五飛剛，召鬼滅兵，九州真官，從某奉行得道之日，飛昇玉清，齊功真形，急急如律令。
某郡縣鄉里，男官女官，生某年若干歲奉受。

右某郡縣書板下。



右三五板中五符，并轉板符，悉用朱書佩之。板上真人姓王名无字赤，總領五斗。真人身長三丈五尺，腰帶二十八宿星名，足躡三綱六紀，總司九州里社，姓名如右。

三五板杖等印文

(原缺)

付度三五章奏出官儀

次鳴天鼓三十六通

次發爐

清玄无極真上三天玄元始氣无極大道太上老君，左右香官飛仙驛龍乘騎捧香使者，飛天龍騎五帝侍香玉童玉女等各二十四人出，上啓

虚无自然元始尊天尊，臣今正爾燒香奏表，付度法事，願得

太上十方正真生炁降入臣等身中，所啓逕上无極大道至真玉皇御前。畢，再拜。

次長跪香案前，出官奏表，付度。

謹出臣某身中五體真官，三五功曹官各二人出，上元九天三五元命正一功曹官各二人出，上元洞天三五度命功曹官各二人出，上元洞天三五消灾度道功曹官各二人出，上元洞天三五條檢功曹官各二人出，上元洞天三五陰陽治病功曹官各二人出，无上上元九天上靈飛天白虎送章仙龍騎吏官各二人出。臣某身中所部三五天官將吏，衆真人，仙都直真符吏，領仙都官使者各二千二百人出，嚴裝整服垂纓，各整三五諸天羽儀鳳飾，羅列雲陣，四面八方

營衛臣某左右前後，流精耀電，光煥太空，震威天地，掃除不祥，玄鑒臣某表奏，付度法事，今有某郡縣鄉里男女生等若干人，投詞玄真至心歸命二尊，求受上元洞天三五金剛玄籙三將軍真形玄符，策板杖契等，即日書寫列位天官位號，依法署籙。若上刺，即云某時上刺；若付度，即云某時付度。即以某時拜請上元洞天天官付度，今重章表，上啓

无極大道元始太上玉皇无上至真大聖天尊金闕玉帝陛下仙都真官考召行狀都官使者，伏願慈真下降玄察垂神監度某等，法事皆當依位次，度某等身中安宮鎮府周帀營衛，左轉九億萬重，右轉九億萬重，防護某等身命天儀光耀威風十方三五將軍，乘騎兵士天官將吏，以某形影合同神光，洞映內外，流明煥儀爲是，某所履土地諸處真官，注氣監察考召諸君吏等，共相輔佐，當隨功德賞，不負效信，所啓逕上

无極大道至真玉皇御前。畢，再拜。

次奏章，竟即重勅，言奏章功。

臣某重勅身中所部三五天官衆真功曹

將吏兵士都官使者，飛天白虎送章仙龍騎吏等，臣某向出官言奏章奏事，竟所部衆真各迴騰虛駕空，還復官府安鎮本位，營天鋪地周備，臣某身中百千萬重天官正真，各從朱門妙闕而還職位，臣某所啓上御

无極大道前。畢，再拜。

次迴案，北向長跪，重出天官，竟即付度三五封策板杖。

臣某重勅身中五真郎吏，三五功曹，左右真官使者，三五元命正一功曹，上元三五度命功曹，三五消灾度道功曹，三五開度功曹，三五條檢功曹，三五陰陽治病功曹，三五都剛君吏官各三十五人，官將兵士各九十億萬衆，出三五金剛使者，三五元剛使者，三五天剛使者，三五諸天日月三光，七曜，璇璣玉衡，七星北斗魁魁魍魎魍魎君吏，五斗玄神三五君吏，三五周天君吏，三五制地君吏，十方諸天星宿君吏，收神食神君吏，收鬼食鬼君吏，收邪食邪君吏，收毒食毒君吏，收精食精君吏，收凶食凶君吏，收氣食氣君吏，北度都陣

君，東度都陣君，南度都陣君，西度都陣君，赤陽朱天甲子都官七十二官君，陽天丙子三十五官君，流明金剛君吏，列天剛君吏，羅天剛君吏，營天剛君吏，制天歷地剛君吏，三五生剛君吏，三元九天元剛君吏，三氣君吏，五氣君吏，九氣君吏，二十四官君吏，陰陽水火君吏，上元三十六洞天元陽上府都官官君吏，三五都監神剛使者，都剛飛天乘騎直真符吏，太一玄府開度仙都玉郎飛行羽騎八十四萬剛君等，名將天官乘騎兵士，天官將吏，各九億萬衆出，各各嚴裝整服，天儀羽飾，彌天蓋地，排陣雲營，威風十方，列侍虛庭，方位八極，御制天地，攝召三官，流精耀電，掃蕩不祥，左右營衛四面，并勅天地五嶽，三河四瀆，淮濟江河，九州土地之主真官，注氣皆共監盟，依法領押監察，羅列付度，某等所受上元洞天三五金剛玄籙三將軍真形玄符策板杖契等，分明列度鎮，某二元關節官府，五城內外周備，各九千萬重，勿令錯誤營衛，某等以衆真合同，臣今所啓逕上

无極大道至真玉皇御前。畢，再拜。

次分契文

今日以某畫一分一法，天一法，地一法，人一法，誓九天三一以盟九天父母某，今指天畫地，不負三尊，不違三一，自分契之後，有違有負，輕師慢道之日，某身以七世歷劫，長充風刀水火考罰，永失光明。畢，即畫一分契，師得右，弟子得左，各金鈕貫之也。契亦以籙同佩限。

次度三五符真形勅文，先鳴天

鼓三十五通，畢，呪曰：

玄天蕩蕩，玄元靈清，清虛妙運，安固劫齡，元始開真，正道流明，營天制地，十方駭驚，神功攝召，萬帝束形，周蓋四象，風火敢停，威震六天，野道不生，玄符勅到，役剛使兵，收邪斬妖，魔界盡平，流金激電，艷都摧崩，急急如律令！次勅板文，先鳴天鼓，二十四通，畢呪曰：

上元符命，檢威十方，天地奉勅，策召神王，三界司官，莫不束形，九土真官，以某合并，遊山涉海，山神水帝，皆來送迎，傳告五帝，保某劫齡，諸天星宿，自

相輔營，急急一如律令！

次勅策板文，先鳴天鼓二十四通，

畢，呪曰：

玄映流曜，五方神功，策天天開，策地地通，策山神束，策水降龍，策火火滅，策神神迎，策鬼鬼倒，策妖妖亡，迴轉十方，萬靈保當，佩策之後，任適五常，形神鎮守，萬劫無傷，急急一如律令！

次勅度氣水文，先鳴天鼓，三十五

通，呪曰：

太上碧津，三氣生流液，九元三五靈，五氣化神朱，天河丹水湧出，天剛羅玄靈，九氣月化飛，二十四神各有威，萬氣所宗，鬱峨巍三剛所攝，鎮九微靈生，逐水守關機，營神保氣防外，非歷劫長存常相迫，急急一如律令！竟授水，以弟子啜水三口止。付度畢，即長跪。

次內官言功

臣某上啓

无極大道元始太上至真大聖天尊，向所出臣某身中五真郎吏，三五功曹，左右真官，三剛君吏，諸天日月，三光七曜，璇璣玉衡，七真魁魑魍魎魍魎君

吏，爲是三五所部將軍乘騎兵士，天官將吏，十方諸天，羽儀監察，考召真官將吏等，今付度某法事已竟，請舉遷言功，各當加真高位，品上天爵，帝秩萬重，齊功五帝，皆如金簡，功賞受遷事畢，各迴靈駕，排陣天儀，騰虛乘空，還復玄宮，金堂玉府，周鎮三元，並加仙位，須後召復出，臣某所付度某等，上元洞天三五金剛玄籙，三將軍真形玄符策板杖契等，從今以去佩帶常相鎮守，彌齡歷劫，永爲身寶，臣某啓奏上簡无極大道至真玉皇御前。畢，再拜。

次復爐，竟使出。

左右香官，飛仙驛龍，乘騎捧香使者，飛天龍騎等，當使靈壇，上生自然，金暉寶曜，玄映玉瑛，金液之精，使某受道福慶，自在天下，受恩十方，玉童玉女，侍衛香煙，逕奏臣某所啓无極至真玉皇御前。畢，即出也。

投詞文

某郡縣鄉里男女，生某年若干歲月日生，右若干人，今投詞請受上元洞天三五金剛玄籙三將軍真形符圖策板杖契

等，請給謹狀。

受三五符儀信物

金鈕一雙，絳紋三十五尺，朱砂七兩，木香十斤。

清玄无極正一玄氣，係天師某治炁如法，臣某稽首再拜，

高上真威正氣，謹按玄科，今有男女生某等，先蒙師真啓拔，賜署天官治職，佩荷非分之恩，實銜罔極，无量慈澤，但某生長濁世，命處三灾，形染十惡，習以性成，負越禁誡，罪滿虚空，自罹咎釁，無功可謝，若非天慈，何由濟度，伏聞

大道慈真普弘，恩備十方，開度蒼生，法橋濟苦，无物不備，澤潤三界，恩霑六道，某等謹以投詞至心，玄真歸命，三尊乞見，授度上元洞天三五金剛玄籙三將軍，真形玄符策板杖契等，永濟某等長河之苦，佩法之後，當依科奉行，不敢有違禁約，即依某詞如法加署天官，謹依某等郡縣鄉里姓名年幾，即日逆刺，上言章奏天官位號，如前事狀，伏願
无極大道无上金闕玉帝至真大聖降勅

上元九天仙都署仙玉郎，九天真王監真度命使者，攝召天官，分別正位，尅以今月某日，付度某等依法拜署，謁言上刺，奏御无極大道御前，臣某誠惶誠恐，死罪死罪，稽首再拜，白刺上詣太无上元九天金闕玉帝，考召清真正氣。

太歲某月某日子時，臣某於某郡縣鄉里，白刺太玄上九天无上真明大衆至真降遣。

度三五章儀

清玄无極正一玄氣係天師治炁如法，臣某稽首再拜

高上真威正氣，謹按玄科，今有男女某等若干人，投詞稽顙，求受上元洞天三五金剛玄籙三將軍，真形玄符策板杖契等，臣某以今月某日依科署某等天官列位，如前刺表，伏願无極大道至真大聖太上天尊垂神玄鑒，慈真降下，開度某等，永爲身寶，願勅九天高上玉皇監真使者，玄都仙王監盟玉郎使者，十方

飛天開度玉司神仙羽郎使者，三五開度使者，无上三天金闕玉帝消灾度道真公使者，一合來下，天真乘騎，彌天蓋地，流精電轉，流明晃煇，掃蕩六天群非，攝召三界神官，共下監臨，開度某等法事，條例付度，永鎮某等身中無令失冷，臣某伏地拜上紙章一通，恩惟无極大道无上金闕玉帝至真大聖，哀愍臣某所表，隨事分別清真正氣，生靈神妙之功，天真官属，付度某等，常當營衛，流光電耀，布在宮室，鎮守三元，謹因直真符吏飛龍乘騎飛天玉郎，送章飛真白虎神龍騎吏等，各千二百人，驛傳章文上奏

无上至真玉帝御前，臣某誠惶誠恐，死罪死罪，稽首再拜以聞。

臣姓某属某宮觀住持

太清如法

太歲年月日子時於某里拜上。
右朱書章文刺亦如法
泰玄正真玄元清玄无極真上天君，真明元君，无上三天君，太上大道君，億

千萬重真玄生氣道君，太上丈人九老
仙都君，百千萬重氣君真天陛下。

右取此用新降泰清如前

上清洞天三五金剛玄籙儀

（錢安靖點校）

036 洞玄靈寶課中法

經名：洞玄靈寶課中法。撰人不詳，約出於南北朝。係早期天師道法錄考召儀，內容與《正一法文十籙召儀》大致相同。一卷。底本出處：《正統道藏》正一部。


紫虛籙儀

維某年歲次月朔日辰，某嶽真人某乙，本命某年月日時生，係某天領籍，其所係以納音推，如木命是蒼天，氣係某天君，只如甲子丙子，是係禁上天。今於某氣天中，此是師之氣，東青南赤云。

寅卯青帝，巳午赤帝，申酉白帝，亥子黑帝，辰戌丑未黃帝。

寅卯九天九氣，巳午三天三氣，申酉七天七氣，亥子五天五氣，

辰戌丑未一天一氣。



受正一籙中所受某階法籙，課召氣每階各別不同，今列於左：

子生中玄三氣君召，卯生上始三氣君召，午生太元三氣君召，酉生下元三氣君召，丑生下玄三氣君召，辰生中始三氣君召，未生上元三氣君召，戌生太玄三氣君召，寅生太始三氣君召，巳生下始三氣君召，申生中元三氣君召，亥生上玄三氣君召。

右件三將軍召氣如前，星剛亦同用此召。

寅申巳亥四孟生言被太上清微天化氣君召，

子午卯酉四仲生言被太上禹餘天保氣君召，辰戌丑未四季生言被太上大赤天籙氣君召，右件百鬼召籙氣召。斬邪籙亦同用此召。

甲子至戊辰，清微天泰清太陽君召，甲寅至戊午，清微天泰清通陽君召，甲辰至戊申，禹餘天泰玄微陽君召，甲午至戊戌，禹餘天泰元太陰君召，甲申至戊子，大赤天泰元通陰君召，甲戌至戊寅，大赤天泰始微陰君召，己巳至癸酉，清微天泰始太陽君召，己未至癸亥，清微天泰玄微陽君召，己酉至癸丑，禹餘天泰玄通陽君召，己亥至癸卯，禹餘天泰元太陰君召，己丑至癸巳，大赤天泰始微陰君召，己卯至癸未，大赤天泰始通陰君召。

右件青甲籙召取弟子行年為對

子生北大神重明君召，午生南大熒惑太陽耀氣君召，左太玄中狄君召，右元太帝中蠻君召，丑生北大神辰中黃神氣君召，未生南大熒惑中黃靈化君召，中元七寶玉理君召，中黃三泰始氣君召，

寅生東重華顯陽君召，
 申生西太白子留金城耀陰君召，
 左玄道氣上夷君召，右驛導真上戎君召，
 卯生東重華耀陽君召，
 酉生西太白子留金城重耀天君召，
 左玄通明中夷君召，右太素中戎君召，
 辰生東重華中黃明化君召，
 戌生西太白子留金城中黃化北君召，
 中黃三泰始氣九真君召，
 中泰五氣原君召，
 巳生南大熒惑陽明君召，
 亥生北大辰耀輝君召，
 右元洞明上蠻君召，左始洞真上狄君召。

右赤甲錄仙召。

元命赤錄科召如左：

正月生上夷君召，二月生中夷君召，
 三月生下夷君召，四月生上蠻君召，
 五月生中蠻君召，六月生下蠻君召，
 七月生上戎君召，八月生中戎君召，
 九月生下戎君召，十月生上狄君召，
 十一月生中狄君召，十二月生下狄君召。

右元命赤錄。男不知年，用九下君召；

女不知年，用太陰下君召。

百五十將軍錄科生月召如左：
 正月生下太玄清微中耀五氣君召，
 二月生玄理玉通氣君召，
 三月生被中玄耀氣右官重光君召，
 四月生下玄微生化氣君召，
 五月生太玄中元官微明曆氣君召，
 六月生上元中官左曆氣君召，
 七月生中元左官曆氣君召，
 八月生下元重光中機化氣君召，
 九月生太始中辟萬導神氣君召，
 十月生上始始明導驛氣君召。

上靈官錄召如左：

正月生被無下九老東上夷君召，
 二月生被無下九老東中夷君召，
 三月生被無下九老東下夷君召，
 四月生被無下九老南上蠻君召，
 五月生被無下九老南中蠻君召，
 六月生被無下九老南下蠻君召，
 七月生被無下九老西上戎君召，
 八月生被無下九老西中戎君召，
 九月生被無下九老西下戎君召，

十月生被無下九老北上狄君召，
 十一月生被無下九老北中狄君召，
 十二月生被無下九老北下狄君召。
 右男女所受上靈官錄科召。不知生
 月即取十二月召。

子生人屬貪狼星黑帝子，虛无越衡天
 丑生人屬巨門星黃帝子，上明七曜天
 寅生人屬祿存星青帝子，无明文舉天
 卯生人屬文曲星青帝子，
 辰生人屬廉貞星黃帝子，觀明端靜天
 巳生人屬武曲星赤帝子，
 午生人屬破軍星赤帝子，
 未生人屬武曲星黃帝子，
 申生人屬廉貞星白帝子，觀明端靜天
 酉生人屬文曲星白帝子，
 戌生人屬祿存星黃帝子，元明文舉天
 亥生人屬巨門星黑帝子。上明七耀天

解錄略說正一之儀

錄者，戒錄情性，止塞愆非，制斷
 惡根，發生道業。從凡入聖，自始及
 終，先從戒錄。然始登真，夫事悉兩

存，兩存理無不通。錄亦云錄，三天之妙氣，十方神仙，靈官名號，與奉道之人修行，故經云：生無道位，死爲下鬼。俗士高人，有希道之心，未能捨世榮祿，初閉不可頓受也。且受三五階，若修奉有功，然更遷受。上古真人，尋諸經記，唯受一二階修行，便登上真之位，若多受不修行，又不會至理師，又不明修行之由，不能有益道，在用心須真，而又正修行契合，道無不應，其應如神矣。夫正一錄初流傳於世，總有二十四階以應二十四生氣，今略明一二階以明正一之由。正一二三五一百五十將軍錄，有兩階，上階云上仙，下階云上靈，俱是人身上一二儀之正神也。又釋正一三五混沌元命真人赤錄之由。正一者，法中王也，制伏邪僞悉歸正道。混沌者，是我身初生受氣之時，亦如天地混沌之初也。元命者，有 myself 身之元命也，知道修其元命，可爲真人矣。元命之理修長，事難具載，臨壇授法，度師合明示及弟子，令識元命之由。餘階之理，不離身上解釋也。夫

萬法悉有內外兩存，以天中指事者正一盟威，處乎皇漢斗宮之中，若內指事以身中者，即三丹田爲三氣，正神變化有千二百形影，萬二千精光，故云得三氣之所生能知六數之所因，則陽氣化爲龍車，陰氣變爲玉女，騰轉无方輪舞空玄之上，又云氣之所在，隨神所生焉。神在則氣成神，去則氣零。氣者則二十四神之正氣也，氣亦成神，神亦成氣，氣散之爲雲霧，合之爲形影，出爲仙化，入爲真一，上結三元，下結萬物，靜用爲我身，動用爲我神，故知道成動用悉在我身，修鍊之人陰氣自消，陽氣自降，既無陰氣，自然九天之上無陰，九地之下無陽，此之謂也，正一之理即在茲乎。

洞玄靈寶課中法

（錢安靖點校）

037 太上三五正一盟威

閱錄醮儀

廣成先生杜光庭刪定

經名：太上三五正一盟威閱錄醮儀。唐末杜光庭刪定，係早期天師道閱錄儀改編本。一卷。底本出處：《正統道藏》洞神部威儀類。

凡閱錄，常以甲子、庚申、本命、三會、三元、晦朔等日，卯酉二時。

次發爐

太上玄元五靈老君，當召功曹使者，左右龍虎君，捧香使者，三炁正神，急上關啓三天太上玄元正一道君，臣今正爾入靖燒香，以今某月某日吉辰，於某州縣鄉里謹依先師之法，簡閱身中所佩正一盟威上仙上靈二十四階寶錄中將軍吏兵，以自防護，願得八方正真生炁

降入臣等身中，令臣自啓速達，徑御太上至真無極大道玉皇上帝御前。

係天師某治炁赤天三五步綱元命真人，臣某稽首再拜，上啓

太清玄元無上三天無極大道太上老君，太上丈人天帝君，天帝丈人九老仙都君，九炁丈人百千萬重道炁千二百官君太清玉陛下，小臣愚短，千載幸會，得染清化，乃蒙覆蓋，賜受吏兵，以自保護，常依科法，每以吉日簡閱，臣所佩正一上仙上靈將軍等錄，錄上功曹使者將軍吏兵各有主職，保護臣某身形安神養性，長調官府，三尸墮落，衆灾消滅，內除疾病，外却衰形，臣當以時言功舉遷，不敢違負謹啓。

次鳴法鼓二十四通

東向平坐閉目存左青龍，右白虎，前朱雀，後玄武，麒麟鳳凰翔踞四隅，日月五星二十八宿北斗七星臨照形神。

次出官

謹出臣某身中上仙上靈百五十將軍，直使功曹，正一功曹，治病功曹各十五人

出，主爲臣某執使者，主將送東西南北正定諸炁，消除疾病，上仙上靈左右官使者，主將送東西南北，辟斥三灾九厄五刑六害之考，都主吏兵，主左右無令前却錯互，上仙上靈陰陽神決吏各十人，出爲臣和合陰陽，決定生籍安神養性，使合真仙上仙上靈陰陽治病，功曹治病太醫吏各十五人，出主爲臣某調理陰陽察候五藏神仙妙藥，却病銷灾，上仙上靈二官百五十將軍，主領官將吏兵士卒圍繞臣某身周而三重，無令空缺，上仙上靈郎吏虎賁察姦鉤騎三官僕射吏各千二百人，出主爲臣某屯守所居宅舍房院營衛左右，隨逐東西南北常去臣百步兵刃，外向討捕凶逆，執捉姦邪，並令絕滅，不得縱逸，皆共保護臣某等身，上仙上靈天驕甲卒各千二百人，出天丁力士各百二十人出，主爲臣某隨逐東西南北所有呼名應口而集，上仙上靈收炁食炁吏，收神食神吏，收鬼食鬼吏，收邪食邪吏，收毒食毒吏各六十人出，主爲臣某收食天下毒疫鬼炁妖精邪神傷寒瘡痢毒注温邪蟲獸，強殄

一切皆收而食之，悉令蕩散，上仙上靈科車赤符吏，剛風騎置驛馬上章吏各十人，出主爲臣某收捕兇邪鬼賊不正之氣，呈章奏表，速令上達。

次出奏法錄吏兵

謹出太上正一一將軍錄，錄中功曹將軍使者吏兵玉女等，爲臣助國行化，翦滅凶惡，至道長興，謹出太上正一十將軍錄，錄中將軍符吏功曹等，爲臣斬惡賞善，萬願隨心。謹出太上正一百五十將軍錄，錄中靈官功曹將軍騎吏使者甲卒等，爲臣辟斥四方不正人鬼，禍害永消。謹出太上正一三將軍錄，錄中將軍功曹童子玉女等，爲臣脩生養炁，延長壽祿，所向隨心。謹出太上正一召百鬼錄，錄中功曹護身將軍玉童玉女等，爲臣收斬天下身中魍魎，無害於人。謹出太上正一元命赤錄，錄中三天解穢玉童玉女五方龍王吏兵等，爲臣消滅血食浮遊侵人之鬼，一切蕩除。謹出太上正一上仙召鬼錄，錄中諸部真人真神功曹六甲神將六丁玉女等，爲臣殺滅身上三灾九厄，一切無他。

謹出太上正一九州社令錄，錄中諸部大將軍功曹玉童玉女直符使者等，爲臣行綱布炁，制伏羣精。謹出太上正一星綱五斗錄，錄中太玄禁師，胡玄禁師，西玄禁師，壺公禁師將軍吏兵等，爲臣禁截不道害人凶逆邪祟。謹出太上正一河圖保命錄，錄中真人功曹將軍玉童玉女等，爲臣保守身命，應臣所請，悉令效驗。謹出太上正一六害錄，錄中太一君，皇天上帝君，太上元君，六害神消刑滅害功曹將軍等，爲臣驅逐妖殃千精萬鬼，並令攝伏。謹出太上正一九鳳破穢錄，錄中天靈赤官斬邪功曹，誅攝斬伐擊截翦滅禽奇將軍使者玉童玉女等，爲臣滌蕩不係籍之邪神，當令神應。謹出太上正一都章畢印錄，錄中天靈官功曹將軍仙人道士玉女使者等，爲臣斬滅千邪萬妖不侵生人。謹出太上正一華蓋大錄，錄中諸部功曹將軍玉童玉女使者，爲臣誅斬惡逆，消姦滅僞。謹出太上正一九天兵符錄，錄中功曹將軍吏兵甲卒等，爲臣守固所居，呼召立到。謹出太上正一

九宮捍戾錄，錄中功曹仙靈官將軍使者天驕甲卒等，爲臣助國救民，應於心口。謹出太上正一八卦護身錄，錄中五方召鬼將軍，五帝將軍，左右僕射吏兵等，爲臣尺置一兵，里置一營，按劍持戟，斬絕精靈。謹出太上正一三五考召錄，錄中三元將軍，五斗功曹，五星功曹諸童子使者等，爲臣招星落斗，纏絡身形邪神惡人，並令攝伏。謹出太上正一龍虎斬邪錄，錄中功曹將軍使者玉童玉女等，爲臣抵扞精邪，存念密應。謹出太上正一辟邪神錄，錄中玄老將軍，五鎮將軍，五蓋將軍，太上將軍功曹使者等，爲臣鎮壓天神地祇魍魎精魅，永不害人。謹出太上正一四部禁炁錄，錄中赤官諸部功曹，將軍吏兵，玉童玉女等，爲臣跳星躡斗，步紀存神，應於本心，勿生疾病。謹出太上正一大斬河邪錄，錄中五領將軍，胡越氏羌僮等，老君虎賁，施天發地，搖天動地將軍，五色華蓋兵馬無上玄老將軍吏兵使者，玉童玉女等，爲臣飛戈輪刀，搜索精邪，營衛居止，皆令安隱。謹出

太上正一三五功曹錄，錄中蔽身隱影藏已兵馬等，爲臣內守三宮，外治三界，天神地祇，壞道邪魔，悉乞蕩除，存思密應。謹出太上正一保命長生錄，錄中魁綱左右諸部功曹將軍吏兵使者等，爲臣內治五藏，不使邪炁注入，心肝脾腎肺，敕三尸殄滅，百關調暢，白日冲天，仰荷玄澤。

次出諸部將軍兵馬

謹出太上正一諸部玄老五侯大將軍五十萬人，出無上玄老留大將軍，周天大將軍，蓋天大將軍，建天大將軍，中越大將軍，中武大將軍，中御大將軍，中亭大將軍各十萬人，出太上五蓋大將軍，天營大將軍，九種大將軍，冲天大將軍，九關大將軍，北闕大將軍，九珠大將軍，九道大將軍，正天大將軍，平天大將軍，越門大將軍，中央高皇領大將軍，東方青領大將軍，南方赤領大將軍，西方白領大將軍，北方黑領大將軍，中央黃領大將軍，各十萬人。出各領所部，並依本位營衛臣前後左右，除凶滅惡，無上五種兵馬五十萬人。出

中宮五營校尉兵十萬人，出城門校尉兵士四十萬人，出中央大兵四十萬人，出九正文人中央大兵百萬人，出太上天門兵，天丁兵，前帝東營大兵，督天大兵，發地大兵，北方五秦兵各四十萬人。出太上青蓋赤蓋白蓋黑蓋黃蓋大兵各四十萬人。出左右將軍兵各十二人。出左右橫行兵六十〔萬〕人。出東方胡老君反甲逆鱗兵九十萬人。出南方越老君火營騎吏火燭兵八十萬人。出西方氏老君鍊杖金精兵六十萬人。出北方羌老君烏丸扁鵲兵五十萬人。出中央僉老君二十五萬官君兵五十萬人。出東方青始甲乙君，南方赤始丙丁君，西方白始庚辛君，北方黑始壬癸君，中央黃始戊己君，天柱司命君等，車騎兵各千二百人。出高天萬丈大鬼百鬼中王各萬二千人，吏兵六十萬人。出高功司馬中騎大將軍郎吏虎賁察姦鉤騎三官僕射各千二百人。出天驪甲卒天丁力士收炁食炁吏，收神食神吏，收鬼食鬼吏，收邪食邪吏，收精食精吏，收毒食毒吏，誅符破廟吏各萬二千

人。出主爲臣某並在案前所部，備執天威，嚴加器仗，誅討凶逆，翦滅精邪，防護臣身，呼召相應。謹出臣所佩上三天三五功曹中部元命混沌真人赤錄，直使功曹正一功曹各十五人，出主爲臣執使東西南北布定正炁，救療諸病，益壽延年左右官使者各十五人。出爲臣某通達幽冥，共相整理，無令前却陰陽神決吏各十五人。出主爲臣某調和陰陽，決定生籍生炁陰陽二官治病太醫吏，各十五人。出主爲臣某和合針藥，療諸疾病，收僞却邪功曹使者，各十五人。出主爲臣某收邪却僞滅惡誅凶司命吏十五人。出爲臣某增壽益筭司祿吏十五人。出主爲臣某加爵厚祿司危吏十五人。出主爲臣某治化無亂司罰吏十五人。出主爲臣某斬妖滅魔司直吏十五人。出主爲臣某却枉翦濫司姦吏十五人。出主爲臣某執制邪淫司察吏十五人。出主爲臣某請是護非都司吏十五人。出主爲臣某伏逆理順上三天文昌中宮中黃九道司命君十五人。出主爲臣某除死籍，正生名，固守丹田，消災

擊凶逆，斬伐精邪，滅禍禳災，驅除鬼賊，天靈赤官直使功曹，攝神都護，攝獄吏攝邪使者，攝神直符斬刺姦邪吏各二人。出仙人道士玉女各百二十人。出護身七神，不得離身將吏十四人，治病功曹護身將軍各二人。出兵曹吏各九人。出扁鵲吏天醫吏各二人。出並按威儀誅邪滅僞，却死來生，救助臣某等身，保令呼吸相應，臣某草苗小子，千載幸會，伏蒙師尊弘愍賜授法籙，以自防保過泰之恩，實謂罔極，臣所受上仙上靈等二十四籙所部將軍，功曹，使者，真官，玉童玉女吏兵，士卒，並乞依按所部當局行事，銜命傳真，宣揚道要，勸進良善，若有下官故罔惡逆凶邪，縣官口舌惡人，謀議欲見中傷臣某，左右官使者徑上天曹言白，不得容隱，從歲竟歲，從月竟月，從日竟日，從時竟時，周而復始。奉行如法，營衛臣某身命，免厄度難，長生久視，心神安定，所向合真，出入行遊，諸所造詣，金石爲開，水火爲濟，皇天所覆，皇地所載，日月所照，山川所通，百邪摧伏，萬

神敬諾，使某百關流潤，五藏生津，真炁降身，鍊形易質，功成德備，白日昇天，當以時言功，不負效信，臣晚學淺劣，加以愚暗，所簡閱將軍吏兵士卒，恐不合儀式，不相次比，千愆萬過，乞垂赦宥，哀濟未悟，不見罪罰，某誠惶誠恐稽首再拜。

次三嘯氣起，長跪祝曰：

臣閱籙事訖，向來所出上仙靈官功曹使者將軍吏兵悉還臣身中，從衆妙門而入，依按次位，在左還左，在右還右，安隱金堂玉室，直使功曹檢押，無令錯互營衛，周匝纏繞，表裏彌綸，天地無有違越。

次復鑪呪

次吟受送頌曰：

此法甚玄妙，免汝九祖役，是其人不授。令人與道隔，非人而輒授，見世被考責，死墮三途獄，萬劫悔無益。

次出戶呪後云

閱籙已後，唯願臣等三師得道，九祖生天，見存獲福，善善和顏，父慈子孝，學道成仙。

太上三五正一盟威閱籙醮儀

（錢安靖點校）

038 太上正一閱錄儀

廣成先生杜光庭集

經名：太上正一閱錄儀。唐末杜光庭編集，係早期天師道閱錄儀改編本。一卷。底本出處：《正統道藏》洞神部威儀類。

凡受正一法錄，常以甲子、庚申、本命、三元、三會、五臘、八節、晦朔等日。是日乃天氣告生，陽明消暗，萬善惟新，天神盡下，地神盡出，水神悉到，太一在位，搜選種民，考算功過，掇死定生，列名金闕。道士及種民其日須清齋入靖，以卯酉時焚香，排辦酒果二十四分，或一十六分，或一十二分，或八分，務令嚴潔。先展舒法錄於几案之上，著新淨衣服，澡浴盥漱畢，然後入戶上香存注，一如法，不可闕也。

太上正一閱錄儀

先持入戶呪，
次上洞案香，
次上本案香，
次上香呪，

次禮師存念如法，

次鳴法鼓二十四通，

次發鑪呪，

太上玄元五靈老君，當召功曹使者，左右龍虎君捧香使者三炁正神，急上關啓

三天太上玄元道君，臣今正爾入靖燒香，以某會之日，正月七日上會，七月七日中會，十月五日下會謹依天師具典，簡閱臣身中所佩正一盟威寶錄，願得八方正真生炁降流臣某身中，所啓速達徑御太上至真無極大道玉皇尊帝御前。各三禮。

次各稱法位

泰玄都正一平炁係天師某治某炁赤天三五步綱元命真人臣某，謹上啓
太清玄元無上三天無極大道太上道君、太上老君、太上丈人，天帝君、天帝丈人，九老仙都君、九炁丈人，百千萬

重道炁、千二百官君、太清玉陛下。臣以凡愚，獲奉玄化，大道垂法，正一興行，叨荷師尊，授傳祕錄延生飛化三五品文，內正身心，和寧神炁，外祛灾沴攘制氛邪，上仙上靈魁罡寶訣錄中將吏功曹衆官，各有職司，保身護命，調平六府，澄靜百關，使妖惡不侵，灾害不擾，三尸墮落，九蟲銷亡，九祖七玄，生天證道，開度羣品，廣濟天人，佐國爲時，立功及物，每以三會之日言功舉遷，永誓遵修，不負效信，伏惟三天大聖太上衆尊，省覽臣誠，常加恩宥，臣某誠惶誠恐，稽首頓首，謹啓。

次出官

謹出臣某身中上仙上靈北一太上一將軍，太上十將軍，上仙百五十將軍，直使功曹，正一功曹，治病功曹，各十五人，出主爲臣執使主將，司察東西南北，正定諸炁，消除百病；上仙上靈左右官使者，主將送東西南北，辟斥三灾九厄，五刑六害之考；都主吏兵主領左右，無令前後錯互；上仙靈陰陽神決吏各十五人出，爲臣和正陰陽，決定生

籍，安神養性，使合真仙；上仙上靈陰陽治病功曹，陰陽治病天醫吏，各十五人，出主爲臣調理陰陽，察候五藏神仙妙藥，却病消災；上仙上靈二官百五十將軍，主領官將吏兵士卒，圍繞臣身周匝三重，無令空缺；上仙上靈郎吏、虎賁察姦鉤騎，三官僕射吏，各千二百人出，主爲臣屯守所居，營衛左右，隨逐

東西南北，去身百步兵刃，外向討捕凶逆，執捉姦邪，並令絕滅，不得縱逸，常當保護臣身；上仙上靈天騶甲卒各千二百人出，天丁力士各百二十人出，主爲臣隨逐東西南北，所有呼召應聲而集；上仙上靈收炁食炁吏，收神食神吏，收鬼食鬼吏，收邪食邪吏，收毒食毒吏，各六十人出，主爲臣收食天下毒症鬼炁，妖精邪神，傷寒瘡癘，毒症瘟邪，蟲獸強殄，皆收而食之，悉令蕩散；上仙上靈科車赤符吏，剛風騎置驛馬上章吏各十人出，主爲臣收捕姦邪鬼賊不正之炁，呈章奏表，速令上達。

次隨品出錄中吏兵

謹出太上正一一將軍錄，錄中功曹將

軍使者吏兵玉女等，爲臣助國行化，翦滅凶惡，使至道興弘。

謹出太上正一十將軍錄，錄中將軍符吏功曹官將等，爲臣斬惡賞善，萬願隨心。

謹出太上正一百五十將軍錄，錄中左上仙，右上靈功曹將軍騎吏使者甲卒等，爲臣辟斥四方不正人鬼，禍害永消。

謹出太上正一三將軍錄，錄中將軍功曹童子玉女等，爲臣修生養炁，增延壽祿，所向安寧。

謹出太上正一右上靈召百鬼錄，錄中功曹護身將軍，玉童玉女等，爲臣收斬身中及天下魍魎魍魎，無害於人。

謹出太上正一混沌元命赤錄，錄中三天解穢玉童玉女五方龍王吏兵等，爲臣消滅血食浮遊侵人之鬼，一切蕩除。

謹出太上正一上仙召百鬼錄，錄中諸部真人，直神功曹，六甲神將等，爲臣殺滅身上三灾九厄，一切無侵。

謹出太上正一九州社令錄，錄中諸部大將軍功曹，玉童玉女，直符使者等，爲臣於九州十二國分野之內，制伏邪

精，行神布炁，所向之地，隨逐司迎擁護臣身，克登仙品。

謹出太上正一星綱五斗錄，錄中太玄西玄壺玄禁契三師將軍吏兵等，爲臣行綱布禁，遏截凶邪，一切精祟。

謹出太上正一河圖保命錄，錄中真人功曹將軍使者，玉童玉女等，爲臣保身護命，應臣召請，悉令效驗。

謹出太上正一解六害神符錄，錄中太一君，皇天上帝君，太上元君，解六害神，消刑滅害功曹將軍等，爲臣驅逐妖殄，解除灾害，千精萬鬼，並令攝伏。

謹出太上正一九鳳破穢錄，錄中天靈赤官，斬邪功曹，誅邪攝邪破邪伐邪擊邪截邪翦邪滅邪禽奇將軍使者，玉童玉女等，爲臣滌蕩不係籍之神，皆令滅除。

謹出太上正一都章畢印錄，錄中天靈官，功曹將軍，仙人道士，玉女使者等，爲臣斬滅萬邪灾禍，不侵於人。

謹出太上正一華蓋大錄，錄中諸部功曹，將軍吏兵，玉童玉女，五雲兵士等，爲臣誅斬惡逆，消滅姦僞。

謹出太上正一華蓋大錄，錄中諸部功曹，將軍吏兵，玉童玉女，五雲兵士等，爲臣誅斬惡逆，消滅姦僞。

謹出太上正一九天兵符錄，錄中功曹將軍吏兵使者甲卒等，爲臣守固所居，呼召立到。

謹出太上正一九宮捍厄錄，錄中功曹上仙上靈將軍使者，天驪甲卒等，爲臣助國救人，應於所召。

謹出太上正一八卦護身錄，錄中五方召鬼將軍，左右僕射吏兵等，爲臣尺置一兵，里置一營，按劍持戟，斬絕邪精。

謹出太上正一三五考召錄，錄中三元將軍，五斗功曹，五星功曹，童子使者等，爲臣招星落斗，纓絡身形凶神惡人，並令攝伏。

謹出太上正一龍虎斬邪錄，錄中功曹將軍使者，玉童玉女等，爲臣抗扞精邪，存念立應。

謹出太上正一辟邪妙錄，錄中玄老將軍，五蓋將軍，太上將軍，功曹使者等，爲臣鎮壓天神地祇害於物者，魍魎精魅，永不害人。

謹出太上正一四部禁炁錄，錄中赤官諸部功曹將軍吏兵，玉童玉女等，爲臣跳星躡斗，步紀存神，應於本心勿生疾

患。

謹出太上正一大斬河邪錄，錄中五十領將軍，胡越氏羌僮等老君虎賁將士，施天發地，搖天動地將軍，五色五蓋兵馬無上玄老將軍吏兵使者，玉童玉女等，爲臣飛戈輪刀，搜索精邪，營衛居止，皆令安穩。

謹出太上正一三五功曹錄，錄中蔽身隱形藏己兵馬等，爲臣內守三宮，外治三界，所有天神地祇壞道邪魔，悉令蕩除，思念立應。

謹出太上正一保命長生錄，錄中魁綱左右諸部功曹將軍吏兵使者等，爲臣內治五藏，外却衆邪，使三尸殄滅，百關調暢，功成行滿，白日昇天，仰荷玄澤。

次出諸部將軍兵馬

謹出太上正一諸部玄老五侯大將軍五十萬人。出無上玄留大將軍、周天大將軍、蓋天大將軍、建天大將軍、中越大將軍、中武大將軍、中御大將軍、中亭大將軍各十萬人。出太上五蓋大將軍、天營大將軍、九種大將軍、冲天大將軍、九關大將軍、北闕大將軍、九珠

大將軍、九道大將軍、正天大將軍、平天大將軍、越門大將軍、中央高皇領神大將軍、青領大將軍、赤領大將軍、黃領大將軍、白領大將軍、黑領大將軍各十萬人。出各領所部並依本位，營衛臣前後左右，除凶滅惡。無上五種兵十五萬人，出中宮五營校尉兵十萬人出，城門校尉兵四十萬人。出中央大兵四百萬人。出九正丈人中野大兵百萬人。出太上城門大兵四十萬人。出天丁大兵四十萬人。出前帝東營大兵四十萬人，出督天大兵四十萬人，出發天大兵四十萬人，出北方五秦兵四十萬人，出五蓋大兵各四十萬人，出左右將滅亡兵各二十，人出左右將橫行兵各六十人，出東方胡老君反甲逆鱗兵九十萬人，出南方越老君火營騎吏火燭兵十萬人，出西方氏老君鍊杖金精兵六十萬人，出北方羌老君扁鵲烏丸兵五十萬人，出中央三秦僮老君二十五萬官君兵士百二十萬人，出東方青始甲乙君，南方赤始丙丁君，西方白始庚辛君，北方黑始壬癸君，中央黃始戊

己天柱司命君，車騎兵各千二百人，出高天萬丈百鬼中王各萬二千人，兵士六十萬人，出高功司馬中騎大將軍，郎吏虎賁察姦鉤騎、三官僕射，各千二百人，出天騶甲卒、天丁力士、收炁食炁吏，收神食神吏，收邪食邪吏，收鬼食鬼吏，收精食精吏，收毒食毒吏，誅符破廟吏各萬二千人，出主爲臣侍衛前後所部兵士，備執天威器仗，誅討凶逆，翦滅精邪，防護臣身，呼召立至。

謹出臣所佩上三天三五前後中部元命混沌真人赤籙直使功曹各十五人，出主爲臣執使東西南北布定正炁救療諸病，益壽延年左右官使者，各十五人。出爲臣通達幽冥，共相整理，無令前却陰陽神決吏各十五人。出爲臣調和陰陽，決定生籍，流布生炁陰陽二官，治病天醫吏各十五人，出爲臣和合針藥，療諸疾病。

謹出收邪却僞功曹使者各十五人，出爲臣收邪却僞，滅惡誅凶司命吏十五人。出爲臣增壽益筭司錄吏十五人。出爲臣加爵進祿司危吏十五人。出爲

臣理化無亂司伐吏十五人。出爲臣斬妖滅魔司直十五人。出爲臣却枉翦濫司姦吏十五人。出爲臣執制邪注司察吏十五人。出爲臣請是護非都司吏十五人。出爲臣伏逆理順上三天文昌中宮中黃九道司命君十五人。出爲臣除死籍正生名，固守丹田，消灾辟病。

謹出赤天三五混沌生身蔽神斗綱大將軍左將軍右將軍各九人，出斗魁大將軍左將軍右將軍各九人，出斗魁大將軍左將軍右將軍各九人，出九部將軍並治臣左腎，斗綱定生，斗魁生肝，斗魁生魄，不得有違。

謹出赤天三五混沌生形蔽影斗魑大將軍左將軍右將軍各九人，出斗魑大將軍左將軍右將軍各九人，出斗魑大將軍左將軍右將軍各九人，出九部將軍並治臣右腎，斗魑生形斗魑生肺，斗魑生魄，不得有違。

謹出赤天三五混沌生軀蔽身斗魍大將軍左將軍右將軍各九人，出斗魍大將軍左將軍右將軍各九人，出斗擊大將軍左將軍右將軍各九人，出九部將軍

並治臣心中，斗魍生人，斗魍生筋，斗擊生神，不得有違。

謹出赤天三五輔體斗擊大將軍左將軍右將軍各九人，出斗伐大將軍左將軍右將軍各九人，出斗殺大將軍左將軍右將軍各九人，出九部將軍並治臣肝中，斗擊安魂，斗伐靜魄，斗殺仙魄，不得差互。

謹出赤天三五璇璣却敵大將軍左將軍右將軍各九人，出斗衡破敵大將軍左將軍右將軍各九人，出收擊大將軍左將軍右將軍各九人，出九部將軍各治臣肺中，却敵安魂，破敵靜魂，收擊仙魄，不得有替。

謹出赤天三五中黃司命大將軍左將軍右將軍各九人，出定壽大將軍左將軍右將軍各九人，出定仙大將軍左將軍右將軍各九人，出九部將軍並治臣脾中，司命安神，定壽靜神，定仙百神，不得有犯。

謹出上仙都太上神明上靈官中宮執凶郎吏，虎賁力士，破敵察姦，鉤騎僕射力士，斬邪三官都官僕射力士各二百

四十人，出主爲臣守護所居，執捉凶逆，討捕姦邪，並令消滅，不得遺失。

謹出上仙都太上神明上靈官中宮斷截都官僕射各二百四十人，出主爲臣南北東西給侍驅使，呼召立到。

謹出上仙都太上神明上靈官中宮乘魁收炁食炁吏，乘斗收神食神吏，乘星收鬼食鬼吏，乘璇璣收精食精吏，乘玉衡收邪食邪吏各百二十人，出爲臣收食天下凶注鬼炁精邪妖孽之神。

謹出太上神明上靈官中宮乘日三五科車赤符吏，乘月科車捕鬼使者各百二十萬人，出爲臣誅翦凶逆，討捕精邪，赤符追攝，並令殄滅。

謹出太上神明上靈官中宮剛風騎置驛馬上章吏，三五除死籍定生名吏各十萬人，出爲臣呈章奏表，速令上御消除死籍，注上玉曆生名。

謹出上仙都太上神明上靈官中宮中黃九道定志吏，定意吏，定膽吏，定慧吏，定聰吏，定勇吏力士各十二萬人，出主令臣心神開悟，通達玄微。

謹出太上神明上靈官中宮六陰六陽成

身吏各十二萬人，出爲臣調理陰陽，延年保命，成身合道，通神接真。

謹出太上神明上靈官中宮八神金剛力士高車直事使者，赤車直符使者，科車檢捕使者，科車交擊力士各七千二百人，出爲臣討擊凶逆，斬伐邪精，滅禍禳灾，驅除鬼賊。

謹出天靈赤官直使功曹，攝神籍神都護攝獄大吏，攝邪使者，及攝神直符斬邪刺姦吏各二人，出仙人道士玉女各百二十人，出護身七神，不得離身將吏各十四人，出治病功曹護身將軍各二人，出兵馬曹吏各九人，出扁鵲吏天醫吏各二人，出出者並按威儀誅邪滅僞，却死來生，扶助臣身，令呼吸相應，臣某

草茅賤質，千載幸會，伏蒙師尊賜授寶籙，制心脩身，以自防保過泰之恩，實爲罔極，臣所佩受上仙上靈等籙所部將軍功曹使者，真官君將，玉童玉女，士卒吏兵，並乞依按所部當局行事，銜命傳真，宣揚道要，立功佐國，行化救人，訓道愚迷，勸進良善，若有下官故炁惡逆，凶邪縣官口舌，惡人謀議，欲見中

傷臣某者，左右官使者徑上天曹言白，不得容隱，從歲竟歲，從月竟月，從日竟日，從時竟時，周而復始，奉行如法，營衛臣身，免度厄難，長生久視，心神安定，所向含真，出入行遊諸所造詣，金石爲開，水火爲濟，皇天所覆，皇地所載，日月所照，山川所通，百邪摧伏，萬神敬諾，百關流潤，五藏生津，真炁降身，鍊形易質，功成德備，白日昇天，當以時言功，不負效信，臣晚學淺劣，加以愚暗，向所簡閱將軍吏兵官將士卒等，恐不合儀式，不相次比，千愆萬過，乞垂赦宥，哀濟未悟，不見罪罰，臣某誠惶誠恐，稽首再禮。畢，三咽炁。

次叩齒三通長跪祝曰

臣閱籙事訖，向所出上仙上靈功曹使者將軍吏兵，悉還臣身中，從衆妙門而入，依按次位，在左還左，在右還右，安隱金堂玉室，直使功曹主領檢押，無令錯互營衛，周而纏繞，表裏彌綸，天地無有違越，須召又到，一如故事。

次復鑪

香官使者，左右龍虎君，侍香諸靈官，

令臣靜室閱錄之所，自然生金液丹碧芝
英百靈衆真交會在此，香火鑪前，所啓
上達徑御太上玉皇尊帝御前。三禮

次吟學仙頌

次出戶呪

太上正一閱錄儀

(錢安靖點校)

039 太上正一閱衆錄儀

經名：太上正一閱衆錄儀（擬）。
撰人不詳，約出於南北朝。係早期天師道閱錄儀式。《正統道藏》未收。現存敦煌 P. 2394 + S. 1020 殘抄本一件^①。

（P. 2394 + S. 1020 抄本，前缺）

吏兵出；太上神仙青甲三將軍錄、太上神仙青甲三將軍錄〔所部軍〕^②將吏兵出；太上神仙赤甲三將軍錄、太上神仙赤甲三將軍錄所部軍將吏兵出；昇玄內教赤契廿八宿錄、廿八宿錄所部軍將吏兵出；紫宮移災大錄、紫宮移災大錄所部軍將吏兵出；周天歷地〔錄〕、周天歷地錄所部軍將吏兵出；七星大錄、七星大錄所部軍將吏兵出。出者嚴莊顯服，正其威儀，各案所典主，爲△甲誅剪惡逆，斬截凶邪，蕩滌

妖氛，除奸滅僞。△甲所受三五元命赤錄及諸符籙等，各件〔所〕部將軍、功曹神官、玉童玉女、香官使者、吏兵士卒等，並案所典當局行事，銜命傳真，宣揚道要，勸進良善。若有下官故炁惡逆凶邪，欲見中傷△甲者，左右官使者逕上天曹言〔白〕，不得容隱。從歲竟歲、從月竟月、從日竟日、從時竟時，周而復始，奉行如法，營衛△甲身，令△甲免災度難，長生久視，心安神定，所向合真，出入行遊諸所之詣，金石爲開，水火爲滅，皇天所覆，皇地所載，日月所照，山川所通，百邪摧伏，百神敬

諾，使△甲百關流潤，五藏生津，真炁降身，練形而質，功成德備，白日昇天。△甲當以時言功，不負效信。臣△誠惶誠恐，稽首再拜。

直使功曹、正一功曹、左右官使者、領錄△甲身中功曹使者、將軍吏兵，各還△甲身宮室之中，各案左右次第而入，隨逐行來東西南北諸所之詣，防護△甲身如法。△甲須後召，復出奉行，一如故事。三叩齒，三咽炁，再拜，復爐。

香官使者、左右龍虎君、侍直衆真，當令此間露壇之上，自然生金液丹碧之英，百靈衆真交會，集在香火爐前，令△甲學道得道，求仙得仙，合門大小受福，普天率土蒙恩。十方仙童玉女侍衛香烟，奏達所啓，上御至真無極大道玉皇帝几前。

閱衆錄儀

統天無量大度真錄

卅二天大錄

太一無極五炁金剛五疊籙

三五步綱^③躡紀廿八宿錄

太一無終仙錄

三天紫宮移災玉臺仙錄

太清武甲錄

太上神仙文甲錄

三天青甲錄

真一赤甲錄

三一神仙無終玄錄

青天大錄

太一仙身八疊內秘遁甲紫甲錄

小河圖寶錄

洞淵神祝龍輿錄習仙錄

右常以月一、十五、三會等日清晨
敷施，如上叩齒三通，發爐。

太上玄元五靈老君，當召功曹使
者、左右龍虎君、捧香使者、三炁正神，
急上關啓三天曹，太上玄元道君，臣某
正余以今某月日，或十五日、或三會吉
日，於△所露壇之上，謹依科法，簡閱
身中所佩三五步綱躡紀廿八宿等錄一
十壹件所部將軍吏兵，以自防護，願得
八方真生炁入某甲身中，令所啓速達，
逕御太上無極大道至真玉皇帝几前。

再拜長跪。

係天師△治炁三五步綱大洞三景
弟子臣某甲，稽首再拜泰清玄元上三
天無極大道、太上老君、太上丈人、天
帝君、天帝丈人、九老仙都君、九炁丈
人等百千萬重道炁、千二百官〔君〕泰
清玉陛下。臣△云云，投誠大道，歸命
高尊，願稟佩靈文，果諧仙侶，所受三
五步綱躡紀廿八宿錄等一十一件所部
將軍、功曹使者、吏兵士卒等，各有部

數。臣依案先師本法，常以月日、十
五、三會吉日，簡閱所受身中吏兵士
卒，乞巧功曹使者、將軍吏兵各有所
主，保護△甲身，營養神性，長〔生〕宮
府，三尸墮落，衆災消滅，內除老病，外
却衰形，久視長生，飛行度化。△甲當
以時言功，不負效信。

次鳴天鼓廿四通。

謹出臣身中所佩三五步綱躡紀廿
八宿上仙上靈玉歷功曹^①使者四千八
十萬人，出赤天上靈綱元磨旗將軍二
千六百六十四萬部，出吏兵士卒等六
千三百六十萬人；出太一無終錄所部
仙化無終功曹使者等一千八百六十三
億萬人，出上天皇天飛天等將軍一千
八百九十億萬部，出吏兵士卒一萬八
千七十九億萬人；出三天紫宮移灾玉
臺仙錄所部青真等功曹使者一千五百
九十七人，出飛龍遊鳳等將軍六百七
十二部及三公九人，出吏兵〔士〕卒一
千五百八十五人；出太清武甲錄所部
上仙都功曹使者等七千二百人，出上
仙泰清等將軍六千四百八十萬部，出

吏兵士卒一千一百五十八萬四千八百
人；出太上神仙文甲錄所部上仙上靈
正一正思功曹等一千九十四人，出太
上神仙神靈先生十四人，出吏兵士卒
一十六萬八千一十人；出三天青甲仙
錄所部上仙〔上〕靈功曹使者等三萬一
千八百八十八人，出上三天上靈官將
軍七百廿部，出吏兵士卒一百廿九萬
四千六百六十六人；出上三天上靈赤甲仙
錄神仙生錄所部上仙上靈功曹使者等
一千五百人，出赤天上靈將軍三百六
十部，出吏兵士〔卒〕九萬四千四百
人；出三一神仙無終玄錄所部無上玄
老功曹使者等一千六百二十萬人，出
泰清上一太甲將軍四百卅二大億萬
部，出功曹吏兵士卒四萬三千二百大
億萬人；出青天大錄所部上仙上靈功
曹使者等一千九百廿人，出上仙上靈
將軍一千二百部，出吏兵士卒九萬六
千一百九十二人；出太上老君逍遙錄
所部功曹使者等三千九百萬人，出道
遙太素雲飛將軍一千五十部，出吏兵
士卒一千六百廿萬人；出太一仙身八

疊內秘遁甲紫甲仙錄所部太一太清功曹使者等一萬二千四百卅七人，出將軍三千五百萬六千九百一十部，出吏兵士卒六千四萬三百一十九人出。

右將軍等各率所部，營護△甲身；直使功曹等爲△甲執使，東西隨事；正一功曹等爲△甲執正諸炁；三部功曹、陰陽療病功曹等，爲△甲刊定生籍，理順調貫九宮，清神五藏，合和針藥，辟病消災，令△甲久視長生，昇仙度化；左右官使者爲△甲糾察奸僞，檢押祿凶，共相整理，無令前却；三部使者等爲△甲遏絕諸惡，隨部正定；郎吏虎賁、查奸鈎騎、三官僕射、天鄒（騶）甲卒、天丁力士等，爲△甲屯守所居城隍宮殿觀宇，收捕鬼賊，討擊精邪，斬馘祿群，麾摧魔衆；收炁食炁、收神食神、收鬼食鬼、收凶食凶、收精食精、收邪食邪、收毒食毒吏等，爲△甲收食天下凶毒鬼炁、血食邪神、魍魎精靈、魔魅被孽，並令消滅；科車赤符吏、剛風騎置驛馬上章吏等，爲△甲呈奏章表，令上御注生削死，保命延

年。

某甲所受三五步綱躡紀廿八宿等錄，合一〔十〕一件，所部將軍、功曹使者〔吏〕兵士卒等，並勤修科法，爲△甲案行左右功曹使者，糾察奸非，共相整理，常隨保護。若有下官故炁鬼賊精邪、逆黨凶徒專行毒害，欲見中傷者，左右官使者逕上天曹言白，不得容隱。從歲至歲、從月至月、從日至日、從時至時，周而復始，奉行如法，令△甲免災度難，久視長生，學道得道，飛行自在。△甲當以時言功，不負效信。某甲誠惶誠恐，稽首再拜。

直使功曹、正一功曹、左右官使者、領△甲身中功曹使者、將軍吏兵，各還△甲身宮室之中，各案左右次第而入，隨逐行來東西南北諸所之詣，防護△甲身如法。須△甲後召，復出奉行，一如故事。三叩齒、三咽液，再拜。

香官使者、左右龍虎君，當令此間閱錄之所，自然生金液丹精之英。百靈衆真交會，在此香火案前，令△甲學道克獲上仙。十方仙童玉女侍衛香

烟，傳臣向來言啓，逕御無上至真玉帝几前。

（以下原缺）

① P. 2394 + S. 1020 抄本，原首尾殘缺無題。大淵忍爾《敦煌道經目錄編》假定經名爲《閱錄儀》。今案原抄本中有小標題《閱衆錄儀》，且其儀式大致與《正統道藏》所收《太上正一閱衆錄儀》、《太上三五正一盟威閱衆錄儀》等書近似，故擬定經名爲《太上正一閱衆錄儀》。

② 方括號中文字原脫漏，據後文例擬補。下文括號中文字均同此。

③ 「步綱」，原誤作「步剛」，據文義改。

④ 以上爲 P. 2394 抄本，以下爲 S. 1020 抄本。

（王卡點校）

040 太上正一閱紫錄儀

經名：太上正一閱紫錄儀（擬）。撰人不詳，約出於南北朝。係早期天師道閱錄儀式。《正統道藏》未收。《道藏缺經目錄》著錄正一法文三天紫宮玉臺無極神仙紫錄，疑即此書。現存敦煌P.2457號殘抄本一件。

（P.2457抄本，前缺）

紫宮玉臺赤真度世黃神下選使者三人出，上詣三天太玄目錄，上我舉家大小皆在種民輩中，覩見太平，壽萬八千歲，與日月齊輝。

紫宮玉臺度世上真飛龍大騎、左右前中後使持節羽衣平東九部將軍，各廿四人出，恒隨我身上天入地，東西南北周旋八極。九州抹將爲我身辟斥群精百鬼之疫，千邪萬魅符廟、豺狼虎

豹〔敢〕^①有干我者即斬，使東方九夷九八十一萬里中鬼神皆來伏從，爲我駟使將軍乘青龍之騎，致青精雲立覆我護我，與〔將〕軍同升太清。

紫宮玉臺度世上真遊鳳大將軍、左右前中後騰登天厥無體前衛平南八部將軍，各廿四人出，恒隨我身上天入地，周旋八極。九州之內虎狼毒害灾疫、千邪萬魅諸符廟敢有干〔我〕者即斬，使南方八蠻八八六十四萬里中鬼神皆來伏從，爲我駟使將軍常乘紫雲鳳皇，與我同升太清。

紫宮玉臺度世上真虎騎大將軍、左右前中後斷斬金羅平西六部將軍，各廿四人出，恒隨我身上天入地，同遊八極。九州之內虎狼毒害灾疫，千邪萬魅諸〔符〕廟敢有干我者即斬，使西〔方〕六戎六六卅六萬里中鬼神皆來伏從，爲我駟使將軍常乘〔素〕雲白虎之騎，與我同升太清。

紫宮玉臺度世上真神龜大將軍、左右前中後平北五部將軍，各廿四人出，恒隨我上天入地，同遊〔八極〕。九

州之內虎狼毒害灾疫、千邪萬魅諸符廟敢有干我者即斬，使北〔方〕五狄五五廿五萬里中鬼神皆來伏從，爲我駟使將軍常乘白虎^②玄武之騎，與我同升太清。

紫宮玉臺度世太尉^③無上公三人出，主統知上三天諸曹上事，爲我啓元尊，注上舉家大小口數，著太玄紫籍度世籍中。

紫宮玉臺度世中黃司徒公三人出，爲我削除舉家户口死籍，注上神仙度世簿中，爲我致降中和烟煜之炁，覆我護我，與公同遊虛無，覩八方，白日升度，土戶不經。

紫宮玉臺度世下黃司空公三人出，爲我考覈九地太山廿四獄諸司，解散三曾五祖、七世父母，下及我身妻子諸所犯違盟誓、祝詛叫喚天地、結髮歷血諸莫大之罪，深重之過。從天至地八極之內，壹爲我赦除，使存亡三魂七魄，太清之中永係名籍，供給仙官左右，遨遊無窮，除生死罪籍。三公捻統八極之內，催切功曹使者、將軍吏兵，

各隨局營護我身及家〔口〕大小，皆得登度爲後世種民，俱登太清。

紫宮〔玉臺〕青府羽衣郎吏、虎賁越天輕翔罷前絳飛斷斬羅網九將，各八十一萬騎出，皆著玉鎧羽施，帶劍履刃，把弓簇箭，隨將軍東西南北防衛我〔身〕及家〔口〕大小，使灾害不干，萬禍無作。

紫宮玉臺赤府^①十四萬騎，皆著名精之鎧，被紫羅之袍，把弓簇箭，隨將軍東西南北防衛我身〔及〕舉家大小，無去須臾，使千灾不生，萬禍無作。

紫宮玉臺白府收鬼食鬼、收精食精、收邪食邪平天將吏，各卅六萬騎，皆著金鎧，被赤羅之袍，帶劍履刃，〔隨〕將軍東西南北防衛我〔身〕及家口大小，使衆惡不生，萬邪敢起。

紫宮玉臺黑府科車赤符吏、剛風騎置驛馬上章吏、遊羅傳教詔，各廿五萬騎，皆著金鎧鐵^⑤，被白羅之袍，帶銅履刃，隨將軍東西南北防衛我身及家口大小，使下官故炁六天惡逆之鬼，壹皆山崩瓦解，令我上章啓事，逕上至三

天紫宮玉臺至尊机前，勿有經由稽留。

紫宮玉臺大黃中黃下黃度身防^⑥

種民兵廿七億萬騎出，隨三公防衛我身，周遊九天九地五岳四瀆三河四海，出入人間諸所經由，皆〔防〕衛我身及家口大小如干人，皆是天師、太上所別種民定數。五方符廟、六天故炁、縣官口舌、五温疫毒、虎狼蛟龍蛇蝮、千邪萬魅惡逆之鬼、惡逆之人、強姓之人，其有妄欲干侵我〔身〕及家口如干人者，即斬。諸君與我長相保守，無離須臾，既至太平，同升紫宮，拜謁聖皇。臣身中所佩紫宮六百七十二部將軍錄上功曹使者、將軍吏兵、三黃防種民兵、三公捻統，各使隨局案職，保護我身〔及〕家口大小，使五神聰明，肌堅骨強。神男神女、玉男玉女，列爲官府，與我同升太清，〔得爲〕太上種民，使萬民同心，所願皆至。言功舉遷三公，依三天紫宮，奉如吾所受事。

吾所閱紫錄，向所出紫宮玉臺度世真宮、使者三公、將軍兵士，各案左右還復我身中，歸筋繞骨，附親所守，

存致主炁，無令錯互。

受紫錄至真度世，言一生，米一斛，天命恒使全也；龍一身，薪一束，龍者升天，薪者我身得升太清太陽也。去師遠，不能年年致。

閱紫錄儀三年一說

開元廿三年太歲乙亥九月丙辰朔十七

日丁巳，於河南府大弘道觀。

救隨 駕修祈禳保護功德院，奉爲

開元神武皇帝寫一切經，用斯福力保

國寧民。經生許子顯寫。

修功德院法師蔡茂宗初校

京景龍觀上座李崇一再校

使京景龍觀大德丁政觀三校

①「敢」字原脱，據後文例擬補。以下凡括號中脱漏字，均係整理者據前後文例擬補。

②「白虎」，據前文例，疑當作「黑雲」。

③「太尉」，據後文例，疑當作「太黃」。

④「赤府」二字下疑有脱文。

⑤「金鎧鐵」，疑當作「鐵鎧」。

⑥「度身防」，原作「防度身」，不通。據後文例改。

（王卡點校）

041 太上金書玉牒寶章儀

經名：太上金書玉牒寶章儀。撰人不詳，約出於南北朝或隋唐。係早期天師道出官上章儀一卷。底本出處；《正統道藏》洞神部威儀類。

謝過祈安章

謹出臣某身中五體真官功曹吏，出上仙上靈直使功曹吏官各二人，出正一功曹官各二人，出左官使者官各二人，出右官使者官各二人，出陽神決吏官各二人，出陰神決吏官各二人，出科車赤符吏，剛風騎置驛馬上章吏官各一人，出出者嚴裝顯服，冠帶垂纓，鹵簿齊執玉版，住立臣前，銜受臣口中辭語，分別關啓，此間土地里域，真官風氣注氣，社稷邑主道上二玄，三元四始，甲子諸

官，七十二官君，四面方位，三元考召君等，上啓太上老君，太上丈人，天師女師嗣師系師三師君門下五氣君等，臣以頑塞聾瞽，視聽不聰，謬爲玄真，所見標拔，授署之日，約當輔助天師，宣揚正化，救治百姓，料理人鬼，凡有告請，不容遏塞，今有弟子某頻歲已來，家中屯坎，夢想凶惡，羣鳥衆鵲，繞宅喧啾，怪鳥異禽，頻來嘲噪，合家惶怖若履冰危，無方披訴，即日整慮澄心，詣臣求乞章表，臣按師法，爲錄奏某章一通，露在案上，功曹使者對共平省，必令投達，伏聽披文。

次祝水度章，弟子跪捧進師，師披進讀，凡稱名即禮拜，勿令香烟中斷。

臣謹重勅五體真官，功曹將吏，但某積殃累疊，過在彌天，奏拜章文，恐不御達，今重請虛無直符三十六人，虛無直事三十六人，泰清直符三十六人，泰清直事三十六人，今歲直符三十六人，今歲直事三十六人，今月直符三十六人，今月直事三十六人，今日直符三十六人，今日直事三十六人，今時直符三十

六人，今時直事三十六人，功曹二十人，主簿四人，幹佐一十二人，傳書送封吏十二人，金光童子吏十二人，并臣身中五體真官功曹使者，臣謹爲某拜奏，上某章一通，露在案上，乞使上達

聖司玉皇帝前，三師門下，但臣頑陋，胚軀不賡大訓，書字拙弱，行列不端，文字謬誤，顛倒錯亂，不合儀式者，事在陰陽二官，陰陽決吏，四部案章，從事錄章書吏，傳言書佐習事小吏，隨此章文進對，迴左歸右，必使正定上達天府，若有下官故烝，六天鬼賊道路遏絕，邀截章文，不即上達者，仰付天曹赤梁北獄，依法治罪，令臣章書，以時上詣

太上御前左君歷關右吏，次啓諸君歷遞，乞事事投達，令臣所擊者破，所治者差，所收者得，所化者信，功曹受事尋文，分別晷刻勿停，以明

天憲，臣拜奏事訖，向出仙官功曹將吏悉還，臣身中從衆妙門而入，在左歸左，在右歸右，功曹使者主領檢押，還復本位，須臣後召，復出，一如故事。

叩齒嚙液三遍，微祝曰：功曹使者各歸金堂玉室之中，須召復出，一如故事，臣某頓首再拜。

言功都章

謹出臣某身中五體真官功曹吏，出臣所佩上仙上靈官消灾散禍解厄君吏，各十二人出，三天天靈左部騰章功曹官各二人出，三天天靈右部騰章功曹官各二人出，三天天靈都部騰章功曹官各二人出，陽天決吏二人出，地仙決吏二人出，聖典決吏二人出，登元決吏二人出，騰車決吏二人出，起尸決吏二人出，太醫決吏二人出，上選決吏二人出，中選決吏二人出，左官使者二人出，右官使者二人出，科車赤符吏二人出，剛風騎置驛馬上章吏各二人出。出者嚴裝顯服，冠帶垂纓，鹵簿住立，臣前後左右，銜受臣言，分別關啓，操臣單章，上詣

太上老君，太上丈人，天師女師嗣師系師三師君門下，五氣君等君將吏兵，各有所典，右官歷啓，實記言功，正月七日，七月七日，言生定錄，十月五日，都章言功，又有男官某等，奉信真誠，以先對令條牒臣民戶數，所屬州縣鄉里，名籍戶口年紀，始上關籍，又臣謹以酒果醪饌，俗中供具，陳薦丹懇，并上紙刺，呈啓奏事，言功賞賀，乞上官主者，監厨直事，監察主司書佐習事，一合來下降，履醮所主事施行，勿令錯互，仙官書佐，在臣左右，謹披章文。

次祝水度章，弟子捧跪進於師，師接進讀，勿令香烟中斷。

謹重勅五體真官，三師道主諸君丈人，天師女師嗣師系師，三師君等門下，五炁君，即日座中飲食勞賞事訖，匹帛銅錢，聊充酬獻，監厨受事訖，各還天曹，臣身中，功曹使者將吏兵士，在左還左，在右還右，纏身繞體，經緯百脉，恩惟上官典者，原臣身中積行所犯千罪萬過，一乞赦貸，不見謫罰，所出仙官天靈，真吏君將吏，兵書佐習事等，隨事

主察當局主職，削罪原愆，改注死籍，刊名玉曆，長生簿中，所保者全，所騰者達，所請者下，護身將軍，護法靈童，隨逐匡扈，隨事通覽，宣告事訖，各還臣身中，從衆妙門而入，復於宮室，須召又到，復出奉行，臣某稽首再拜。

保護嬰兒章

謹出臣身中五體真官，功曹吏官各二人出，上仙上靈二官功曹官各二人出，上仙上靈上部功曹騰章吏官各二人出，上仙上靈中部功曹騰章吏官各二人出，上仙上靈下部功曹騰章吏官各二人出，左右官使者，陰陽神決吏，科車赤符吏各二人出，剛風騎置驛馬上章吏各二人出，五體真官功曹吏各二人出，上明嬰兒解厄使者二人出，上真嬰兒度厄使者二人出，上生丞中清沉使者二人出，上生河中生算使者二人出，中真三元度厄使者二人出，中真三官臨河使者二人出，中真生官臨江使者二人出，中真三官生命使者二人出，下府水官道德使者二人出，中元通候江影使者二人出，下明水中訴請使者二

人出，下生清沅拔命使者二人出，上元天官赦罪使者一人出，中元地官原考使者二人出，下元水官原愆使者二人出，三官淮濟生算使者二人出。出者嚴裝顯服，冠帶垂纓，整其威儀，羅列上下扶助，奏請移告水官門下，三湍五湖，淮濟曹府江海之中，申訴天曹真尊道主，今爲某息兒某，受生已來灾厄不息，又恐六天縱逸鬼魔，尅傷三官，不拘三凶竊逼，枉遭外殃內鬼，及石下犬子乳母，貓鼠兵獵氣鬼類爲崇害，無方投措，合家一意罄慮，洗心歸命

三尊道主，太上老君，正一真人，河上老子，湖中玉女靈仙，監察一切，靈官度厄，尊神執符，把籍使者，詣臣申表，披雪殃原，臣按先師科法，謹爲錄章申奏，露在案上，上請天官將吏，兵士營衛扶從，逐時傳達，在臣左右，行立所在，聽臣省閱章文。

次祝水度章，弟子跪捧上師，師接進讀，勿令鑪中烟絕，稱名再拜。

謹重勅真官直使，左右書佐，習事小吏，直符直事、日宮月宮星宮，主察三

河四海，八極五湖，河中玉女，受事仙官，臣謹爲某家拜奏嬰兒保護大章一通，封置事訖，恐日惡時凶，所啓不達，謬悞顛倒，言句差錯，乞仙官直使，十二書佐，主爲修治長毫利筆，逐行調治，龍劍書刀，尋文割截剩者，爲割錯字爲易，勿令漏沒，及時徑達

太上御前，以明效信，但恐某宿業深厚，妨及男女，或宿緣惡業，害及家門，逮及殃鍾，延沒非淺，章書漏落，不即上達，重請虛無直符三十六人，虛無直事三十六人，泰清直符三十六人，泰清直事三十六人，今歲直符三十六人，今歲直事三十六人，今月直符三十六人，今月直事三十六人，今日直符三十六人，今日直事三十六人，今時直符三十六人，今時直事三十六人，圍繞章行，必令投達，奏章事訖，臣身中功曹使者君將吏兵，悉還臣身中金堂玉室之中，在左還左，在右還右，在前還前，在後還後，從衆妙門而入，纏身繞體，彌綸天地，而繞四肢，經緯百脉，須召復出，隨事奉行，一如故事，臣某頓首頓首再

拜。

斬惡破鬼章

謹出臣某身中五體真官功曹吏，出無上三天清微天禹餘天大赤天，無上九天赤陽三五功曹，上皇真人十二高車元神，赤氣赤車使者，玄元始氣使者，陰陽真氣使者，黃書契令覆蓋君將吏兵，陰陽生氣君，度道消灾散禍解厄君吏，上天變惑中化神君兵吏，中胎真人，赤松君將中胎真官，赤車兵吏各十二人，出臣身中上仙上靈二官直使功曹官各二人，出秦氏二官三部功曹官各二人，出正一功曹故錄吏官各二人，出上部功曹收惡錄惡吏官各二人，出中部功曹收惡錄害吏官各二人，出促氣功曹收害錄逆吏官各二人，出上部使者收惡逆外殍收魂錄魄吏官各二人，出中部使者收魂錄魄吏官各二人，出下部使者的頭反縛吏官各二人，出絞手截頭吏官各二人，出赤車使者監殺露，出都市吏官各二人，出高車使者官各一人，出髡頭截耳吏官各一人，出監殺外殍

使者官各二人，出監殺搦案吏官各二人，出監殺長刀截頭吏官各二人，出剛風騎置執法收逆斬殺吏官各二人，出功曹使者嚴裝冠帶垂纓，鹵簿銜，受臣言分別關奏，謹有某詞言款到，求乞收捕外殍某鬼等，前後累來干犯，臣謹依天師真科，好生惡殺，賞善罰惡，宣揚法化，爲肉人告訴情懇，臣輒按師法，露出明星之下，拜上赤章一通，牒奏外殍某鬼等，乞此間某處土地真官注氣監察真官里域邑主所請天官將吏兵士，同心併力收捕惡逆之鬼，鈎肝押耳，抽腸拔肺，將向都市，拔舌鉗咽左右走使擒捕吏，倚住左右懸頭髡截斬首吏等，倚立臣前後，受臣驅使，聽臣宣讀章文。

次祝水度章，弟子跪捧上師，師接進讀，上香勿令烟絕。

臣謹重勅五體真官功曹將士書佐小吏，天師女師嗣師系師三師門下五氣君等，臣謹爲某拜上消灾解害，斬馘惡逆，收殍破鬼章一通，上詣聖司三天門下，主遣臣身中五體真官三五小吏，十二書佐功曹使者，頭戴通天

之冠，夜光之璧，齊著五色之綬，齊執玉版，嚴裝事訖，磨硯點筆，及時來下，主爲某家注定章文，上詣天曹收捕妖殍，若有下官故氣鬼賊瀝賊道路，遏絕臣章，不使上達者，

謹重請今時直符直事三十六人，今日直符直事三十六人，今月直符直事三十六人，今歲直符直事三十六人，四時直符直事各三十六人，陰陽直符陰陽直事各三十六人，星宿直符星宿直事各三十六人，五帝直符五帝直事各三十六人，六甲直符六甲直事各三十六人，三五直符三五直事各三十六人，天一直符天一直事各三十六人，太虛直符太虛直事各三十六人，太玄直符太玄直事各三十六人，太始直符太始直事各三十六人，泰清直符泰清直事各三十六人，功曹二人，主簿四人，幹佐十二人，小吏十二人，金光童子十二人，五官六人，雲中扶章督郵吏二人，從事二人，案章二人，賚章二人，左社右稷，扶護臣章，上誥太上無極大道太上老君，諸君丈人，新

出老君，泰清玄元，無上三天，無上大道，無上天尊，太上丈人，玉皇案上付省章玉女通達詣上，若有謬誤脫漏，文字不端，言句倒錯，不知次第者，委功曹使者案章四部從事傳言書，佐習事小吏龍頭書刀長者，爲剔短者爲益，剩者爲除，隨時上達功曹使者，銜毫利筆，即爲正定，勿令上官典者有所譴却，若有下官故氣遮遏斷截者，仰收付天一北獄之中，依法治罪，以明天憲，閉口銜氣，徑上

太上御前，慎勿稽停，左君歷關，右吏次啓，諸君歷遞，分別次第，必使投達所請者至，所召者到，所押者伏，所消者滅，伏待告報上章事訖，所出身中三五功曹君將吏兵，從衆妙門而入，案其次第，直使功曹差次檢錄，在左歸左，在右歸右，纏身繞體，經緯百脉，須召又到，復出奉行，一如故事，臣某頓首再拜。

科要

餅果五十盤，鹿脯二觔，魚脯一觔，清酒一斗，真香三兩，鎮綵五段，錢一千二百文，鎮

信絹一疋，弓一張，箭五隻，命米一斗二升，銀環一雙，線五色二十四尺，刀一口。

於江岸作壇，置高座。施安五方香火，奏章訖，天門上焚之，畫鬼形像，函盛釘沉水底，千萬不出，如不就江河，須清水三斗，依法沉之，筆一管，墨一錠，紙一百幅，須一一虔潔，書章紙香上熏過，露於像前，三日不被飄落，鼠汗然可用。

太上金書玉牒寶章儀

（錢安靖點校）

042 正一出官章儀

經名：正一出官章儀。撰人不詳，約出於南北朝。係早期天師道出官上章醮儀。一卷。底本出處：《正統道藏》洞神部威儀類。

迴善章出官

謹出臣身中五體真官功曹吏，出三五清微天、禹餘天、大赤天，五炁功曹，上皇真人，十二真官，神元赤炁赤車使者，陰陽真炁黃書契令腹目君將吏，陰陽生氣度道開化君將吏，九炁丈人逮召將吏，消灾散禍解厄君將吏，還神君將吏，胎生赤白涌池將軍吏官各十一人，出臣身中上仙上靈二官，直使功曹官各二人，出三五直使功曹官各二人，出正一功曹收凶錄吏官各二人，出上部功曹收惡吏官各二人，出中部功曹收錄

逆吏官各一人，出下部功曹收害吏官各二人，出促炁功曹收陰陽吏官各二人，出上部使者收魂錄魄吏官各二人，出中部使者收魄錄魄吏官各二人，出下部使者連頭反縛吏官各二人，出促炁使者監時守擊吏官各二人，出左官使者打核鎖檻吏官各二人，出右官使者開枷閉獄吏官各二人，出高車使者銳其頭截其耳吏官各二人，出赤車使者監路巾官吏各十二人，出高手截項吏官各十二人，出監殺直兵吏官各十二人，出監殺參軍吏官各十二人，出監殺功曹吏官各十二人，出監殺真符吏官各十二人，出監殺促戰吏官各十二人，出監殺信幡吏官各十二人，出監殺拔劍吏官各十二人，出監殺鳴鼓吏官各十二人，出監殺長刀截頭吏官各十二人，出剛風騎置驛馬捉法逆戰吏等官各十二人出，出者嚴裝顯服，冠帶垂纓，住立，臣前後，具銜，臣所受今有某口辭列素，求乞章書迴化厭倒，捕逐惡人凶害謀圖之人，臣伏按天地科法，好生惡殺，賞善罰惡，忝佩符籙，職任在

身，受約之日法當宣揚正化，誅滅惡人，今有某州縣某鄉里月日某被某事，即日叩頭，告臣元無所見，苦切非輕，爲某謹按天師科法，拜上赤章一通，臣啓此間土地里域真官正炁所在君將吏兵士等，監察考召里社廟主，共收取惡人某，被害伐吏兵鉤出都住，臣左右走使擒縛惡人，某身住某，前後皆爲懸頭銳截，不得寬延嚴裝，事訖錯鋒，刺殺惡人，某身章上所請天官將吏兵士立臣前後，聽讀章文，各依次第，厭伐惡人，某彌加攝錄三魂七魄，封著天曹，問惡人作橫使伏諾考召之刺取，三日四日即令伏死，急急如太上老君律令，今日上請赤天將軍收執惡人，吏兵士萬人來列惡人某家收縛滅之，上請官將吏兵萬人斬截惡人，某誑言惑語，上請官將吏兵士三十萬人來下考惡人，某迷惑遊走，上請將軍吏兵收取，平論道德，吏兵士三十萬人來下縛取惡人，某勞頭返縛，捍社考効，口不得語，上謗師無道不敬，吏兵三十萬人來下收取返縛，以得爲限，即

為滅之，湯煮火燒，筋骨焦然，身沒十八地獄之中，請天官將吏兵士及時詣某家收魂魄送付社令，懸頭考問治罪，急急如

太上金口律令，臣請乞開伏讀章文於案，謹重敕臣身中五體直官功曹使者書佐小吏朱陽之幘。

拜章了月厭十三步，書惡人名著符上，左手捻刀作穴中絕炁，以左脚大指踏之，三過止呪曰：



咄，天綱何相相，地理何亡亡，收惡人某魂魄付鑊湯，急入天綱之下密厭深藏，若汝出破傷身，入上失故鄉，如吾敕誅張，急急如太上老君律令。

左迴還生炁上善人著北壁邊高三尺訖。

謹請翻綱倒地大將軍千二百人，張眼廓目君百二十人，又請五方大額神君各千二百人，收錄惡人三魂七魄，考究治罪，枉擊某身牽引，謹請太白君迴化惡人之心，願切伏匿消滅摧伏，急急如律令。

又一法，某處築壇書惡人名，以竹筒

盛之五路，及月厭上安打令，沒躡七星步，從月建上來就厭建與厭同，從生炁來厭，呪曰：朝發大靈臺，迴向符官神到，天曹誅殺惡人，急急如太上老君律令。



呪曰

天地行符，攝錄鬼神，大道行符，攝錄真神，三師行符，天道自然，自知非真，勿當吾神，所治者愈，所救者脫，所厭者伏，所護者活，為護神真，急急如太上玄都老君律令。

用鹽一斗二升，清水一石二斗，大刀一口，炭三斤，油一斗二升，呪曰：

五行相推，綱最持威，六紀輔我，三尊

辟非，天迴地轉，三五璇璣，長生久視，日月同輝，逆我者滅，背道者衰，三綱六紀，沈在綱前，衆口皆滅，刑獄釋然，急急如律令。

迴好章出官

謹出臣身中五體真官功曹吏，出大聖真神錄仙靈官使者功曹各二人，出泰玄二官直使功曹二人，出都部功曹二人，出上部功曹二人，出中部功曹二人，出下部功曹二人，出左右官使者二人，出赤車使者二人，出陰陽神決吏二人，出科車赤符吏二人，出剛風騎置驛馬上章吏各十八人，出飛龍騎吏等各十八人，出功曹吏兵各十八人出，出者嚴裝顯服冠帶住立，臣前後感受，臣口中辭語，分別關啓，此間州縣鄉里真官炁監察，里域考召君將吏等，今謹有某所陳某事，臣謹為某拜上三五迴好章一通，在臣前素案之上。

章文

泰玄都正一平炁係天師鶴鳴治太上中炁元命真人統領十五階，臣某稽首再拜上言，謹按文書本貫某州縣鄉里，臣某

謹上啓

太上無極大道太上老君，天師女師嗣師系師君夫人門下五炁君等，今時謹有某州縣鄉里，某年如千歲戶一家口如千人，今居某村住止，即日叩頭，列素胎生肉人，百官子孫，千載有幸，制屬

太上諸君丈人三師道炁，以自保持，得在清心，從來蒙恩，誠自歡慰，而某頑肉弊緣，會遇值運，不以微軀耗附靈澤，洗塵滌垢，沐浴清風，染身行化，得佩法錄長生之術，仰銜大恩，常蒙祐護，且臣闇昧有餘，不能隱棲巖谷，奉法違科，舉動施爲，觸事成釁，某忽於某年月日，橫被某事或惡人毒心所欲侵害，緣某事情，吏曹或視罪過欲潛害某，或所始妬，臣忝蒙大道之恩，身符祕法，受道之日，法當爲禳災害，而某惡逆生心規圖，謀相中傷，潛擊於某不勝爲，被此惡人某等四面非橫，更相凌易，上窮下迕，復情計切，肝膽塗地，今者託身幽冥，仰憑至真，一希道炁，保助某禳却惡人口舌，迴化惡人惡逆之

心，見某必令歡悅，某得理，某甲受罪，若故行惡逆，謀圖欲見中傷某，請乞當令惡人惡逆自破碎死亡，悉令滅族，返受其殃，不得動作，若有不良之者，又欲於中故相讒擊，某者破死摧滅，伏地而死，無動無作，上請東方青帝，南方赤帝，西方白帝，北帝黑帝，中央黃帝等，各一人吏兵八千人，主爲厭伏惡人吏民四面口舌，某惡人某等皆令消伏不成，欲作災害者，即令絕滅，上請五方明星君，周天八極君，官將百二十人，主爲迴化天綱轉地紀，某口舌即息，並自消滅，又請北斗魁綱君，主爲迴化，四面惡人望風皆執伏破壞，若惡人惡心事不止，即令魁綱掩其口，使不得語，上請消炁兵士十萬人，主爲某惡心事不止，即消除四面衆災害氣，欲令來侵犯某者，皆令摧滅，又請官律君一人，官將千二百人，重請玄兵十萬人，又請主星君十萬人，官將百二十人，治地官主摧元炁，捉擊惡人，皆令消亡，又請盟威君官將百二十人，又請高倉君官將百二十人，又請天官祐護將軍

萬福丈人官將百二十人，一合下主，爲消滅惡人，聚會口舌，讒擊某身者，以時迷惑其心，皆令自滅，又請和合官將百二十人，主爲某消惡人某没入太陰之中，又請四時五刑運炁君將百二十人，主消惡人某，皆令執伏，又請東方大額君，南方大額君，西方大額君，北方大額君，中央大額君，官將千二百人，爲某消伏陽官口舌，并求中傷讒擊某者，皆令滅亡，心迷意惑，返自受殃，又請無上諸玄君兵士百二十人，又請南鎮五星將吏兵各百二十人，又請越女兵三十萬億人，一時下收捕惡人某，四面非謗潛擊之心，乞皆伏死魁綱之下，不得動作言語，心迷意惑，使自伏滅，某在生炁之中過度灾厄，今某洗心解脫，酌水香火，并總以消惡人橫禍官私口舌，吏民盜賊，皆令沙崩，開解，一時釋散，然臣不以罪穢忝佩符錄，人末形微，不任某被惡人某非謗誣損，元逆之甚，令釋散安隱無他，如願之日，輸送付還所在訖，然臣所請事衆官，一時言功舉遷，進入中宮加寵，置與便曹隱

職，各加其狀，將吏千二百人等兵士五十萬人等，如天曹科比無令失意，恩惟太上分別操，臣謹爲某爲某事告臣，伏地拜上迴好章，伏惡人赤章一通，上詣太上三天曹伏須告報，臣某甲誠惶誠恐稽首再拜以聞。

臣姓某係某州縣宮觀焚修

太清玄元無上三天無極大道太上老君，太上丈人，天帝君，九老仙都君，九炁丈人百千萬重道炁，千二百官君太清玉陛下。

太歲

開牢獄章

泰玄都正一平炁係天師陽平治左平炁臣某稽首再拜

上言，謹按文書某州縣，某鄉里，某年若干歲若干人，某處住止，即日叩頭辭，素以胎生肉人，百官子孫，千載有幸，得奉

大道，從來蒙恩，忽值軼軻疾病，更互夢想不真，妖怪競興，公私口舌，橫生無端，而某先身量染獄刑冤對，某身某事月日被某事文案，今勘當收執枷禁

刑，自屬於法獄文案，紛紜即罪罰猶極，肉人惶怖，向臣告訴，求乞料理，具如所列，自己人鬼治罪各有所屬，鬼刑繞右詣獄，人刑繞左詣獄，難出顯異，一統刑罪參同，請爲某推案陰陽二律，恐某前身今身犯陰陽過，考屬左官，死

犯行詣獄，某身今幽執囚圍，身被鞭杖考掠，禁對求請枉抑，某身輕重未測，當令陽九之世，人鬼惡逆，或爲姦吏所苦，或協以先讎，圖相刑憾，枉理於禁

繫之下，害人乞掠求情，無所不至，臣以理救度刑厄，天慈所重，某今被刑獄飈急，事留生變，不宜稽停，輒爲冒湯火，露出中庭太陽之下，拜單章急開，伏願

天慈必垂救拔，謹爲某上請十方飛天仙官騎乘三開南門主者，某前身宿對所犯陰罪陽過，願爲飛疾解脫，又請司

過君解將各百二十人急左官陽符之中，隨某今罰所在爲，若有姦吏宿怨追見執累者，願請迴化逆化君官將百二十人，與迴迷吏官寬人對簡令迴伏，若

某逐姦逆豫魂惡性不解化，願與迴迷吏官寬人對簡令迴伏，若某逐姦逆，請

五方大額君兵士千萬人符，攝獄檻神考額逆吏官，諸欲強梁者，驚魂制刑，迷其六情，落筭結舌，與心同心，然願刑獄解散，罪殃絕滅，身無痛楚，以爲恩效，當爲所請天官，言功報勞，不負效信，恩惟

太上，分別求哀，操臣謹爲某事拜請元官吏兵士解散，詰問死滅乞恩，朱章一通，上詣太上三天曹，伏須告報，臣某誠惶誠恐，稽首再拜以聞。

臣姓

太清玄元無上三天無極大道太上老君，太上丈人天帝君，九老仙都君，九炁丈人百千萬重道炁千二百官君太清玉陛下

太歲

又一法，出病家人門，故脚踏門限都監印，呪曰：

咄，吾能收鬼伏邪，爲言遷害病某之鬼抽腹出肝，吾師返病某乙伏寒，急急如律令，勿迴顧也，叩齒出官。

謹出臣某身中所佩上仙上靈二官，直使正一功曹各二人，出中部功曹使者各

二人，出五帝使者各二人，出四時功曹各二人，出四時使者各二人，出陰陽神決吏各二人，出科車赤符吏各一人，出剛風騎置驛馬上章吏各二人，出擊持素案對立，臣前咸受，臣口中辭語，分別聽臣所啓，速達上聞，謹按。

泰玄都正一平炁係天師陽平治臣某再拜，臣仰希元景至尊慈父聖母垂恩照察，分別真僞，以語衆心，某州縣鄉里惡人恣行頑僞，非但一一，臣竊聞

太上主者後胤之子，屢見中傷，加剋罵詈不敬，打拍枉謗無辜不可記數，天道幽遠，未敢上聞，如此之人，合應擒鞠，謹請

太上三天曹特爲告下三官，收錄某家九祖七世父母已來，送付北獄地牢之中，側閭之所，量由放縱某人，輕慢天道，敕惡人所居土地真官里社等廟神祇敕，某人三魂七魄，依不敬師道之律，如時考問，謹請魁綱將軍三千六百人，隨臣口啓，到詣某家，收翦某人三魂七魄付天獄，以鐵杖打殺之，又請清微天禹餘天大赤天考吏各千二百人，一合

下指某人身中，考劾所輕慢道法，臣主者之子呼引名字，罪在不輕，經法不許，宜加推鞠。又請天地水三官考劾某人酷怨天道，輕師慢法，不遵道教，而恣意縱心，罵詈呪詛或打拍，承官勢監逼於神主者之身，依三官律論，願所啓請天中將吏，一時加心用意，而今剋驗，有效之日，言功舉遷，不負效信，恩惟

太上分別求哀，操臣所啓，擒鞠收翦惡人，縱心罵詈，臣羞恥上章，上詣

太上三天曹伏須告報，臣某誠惶誠恐，稽首再拜以聞。

臣姓

太清玄元無上三天無極大道太上老君，太上丈人天帝君，九老仙都君，九炁丈人百千萬重道炁千二百官君太清玉陛下。

太歲

迴化章

泰玄都正一平炁係天師陽平治左平炁臣稽首再拜

上言，謹按文書某州縣鄉里男弟子某

年若干歲，即日口辭，素以胎生肉人，百官子孫，千載有幸，得奉

大道，但由肉人頑愚，不揆輕微，敢有列訴天曹，今有家生奴某名年若干歲忽去，某月日內該某生資衣被雜物逃叛，東西南北藏隱匿避曹主，悔背生養，但某忽於某月日重捉得其奴，將歸住宅繫縛，不使逃走背主，到某夜某時拽斷縛繩，惡心不止，重更逃走，背叛曹主，前後經于若干度，累年逃叛，事非一迴，偷該資財妬害，惡心尤甚，但某日傾家男女良賤大小伺候擒捉不獲，東西南北搜逐近遠山野，並不知所

在住止，隱匿蹤跡背叛，不與曹主知見，但某即日僭多福少，宅人耗漏，奴財散走，不附某身背叛，唯主一心，上憑
大道保護某身，今齎白素若干尺，米若干斗升，良賤等物，詣某觀三寶御前，詣臣求乞迴化厭伏，此奴某自迷自惑，心中煩悶，欲叛不得，使令迴歸本宅，自顛自狂，叫喚出道路之中與某相見，不得東西叛避，急令自歸自迴，立待恩

上言如前一心委命，上憑

大道，詣臣乞迴化奴某，一一如前，即日謹齋命信巾素，米一石二斗，白紙百張，筆一管，墨一丸等物，以立心信告訴，向臣求乞迴化厭伏奴某，背某乙逃叛，即日尋訪，不知所在，急使迷道，所欲不得，嚴加擒捉，令自迴歸就某乙，臣小子頑愚，立功不充補過，臣某誠惶誠恐頓首，死罪伏地，拜上丹赤表大章一通，上聞天曹，請天官吏兵太上諸君丈人，天師君夫人門下，典者五炁君，伏願垂慈省察，所陳事告下都星君都炁君兵士百萬，衆生爲迴化收捕逃奴某，急令迴惑自歸就主，不得遠去，失道迷途，如輒遠叛歸宅，悔背曹主，惡心不改者，上請羅網君百萬人斷截圍繞道路，縛錄桎劾，勿使東西，令自歸就主。又請社廟城隍張元範，即懸屍付社門，一如前狀，謹上請東方青帝君一人兵士九九八十一萬人，上請南方赤帝君一人兵士八八六十四萬人，上請西方白帝君一人兵士六六三十六萬人，上請北方黑帝君一人兵士五五二十五萬

人，上請中央黃帝君一人兵士萬二千人，一合來下，同心併力，下爲某迴化家生奴某背主逃叛，惡心不止，令使迷途失路，欲去不得，急來就主收捉，不得遺失，一如前約，令得爲限，如願恩效，平安得奴之日，言功報勞，遷賞天兵典獄健兒不負效信，恩惟

太上門下，典者分別求哀，臣愚謹因二官直使，正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣謹爲某上請天官爲迴化家生奴某背主逃走不歸，乞爲厭迴就主，不得遺失，東西南北遠去，迷途失道，令自出歸家宅，詣臣拜上丹章赤表連獄一通，臣某庸微，不敢抑絕頓首死罪，上請天官乞垂省察，上詣三天曹伏須告報，臣某誠惶誠恐，稽首再拜以聞。

臣姓

太清玄元無上三天無極大道太上老君，太上丈人天帝君，九老仙都君，九炁丈人百千萬重道炁千二百官君太清玉陛下。

太歲

正一出官章儀

(錢安靖點校)

043 正一指教齋儀

經名：正一指教齋儀。全稱《正一指教齋宿啓儀》。相傳漢末天師道有指教齋法，後改編為指教齋儀。一卷。底本出處：《正統道藏》洞神部威儀類。

宿啓儀

先發鑪

太上玄元五靈老君，當召功曹使者，左右龍虎君，捧香使者三炁正神，急上關啓三天太上玄元大道君，臣等正爾燒香，宿啓齋事，願得八方正炁，來入臣等身中，所啓速達徑御至真無極道前。

次西向

係天師陽平治左平炁都功臣某甲稽首再拜，各三叩搏謹關啓天師嗣師系師女師三師君門下典者君吏，願得正一生炁，

灌養形神，五藏生華，六府宣通，消四方之灾禍，解七世之殃患，長生久視，得爲飛仙再拜。

次北向

係天師陽平治左平炁臣姓名稽首再拜，謹關啓上皇太上北上大道君，臣某胎生肉人，枯骨子孫，願得解除七世已下逮及某身，千罪萬過，陰私伏匿考犯三官者，皆乞消解，當令福生五方，禍滅九陰，邪精惡鬼，莫敢當向，存思神仙玉女來降，長生久視，壽同三光。再拜。

次東向

係天師陽平治左平炁臣姓名稽首再拜，謹關啓太清玄元上三天無極大道太上老君，太上丈人，天帝君天帝丈人，九老仙都君九炁丈人等，百千萬重道炁，千二百官君，泰清玉陛下，臣等願心開意悟，耳目聰明，萬仙會議，賜以玉丹，消灾却禍，遂獲神仙，世官高貴，金車入門，口舌惡禍，千殃萬患，一時滅絕，記在三官，被受三天丈人之恩。再拜。

次南向

係天師陽平治左平炁臣姓名稽首再拜，

謹關啓南上大道君，三天萬福君，願書名玉籍，告諸司命，以長生爲定，又乞敕三天萬福君，致四方之錢財，八方之穀帛，富積巍巍，施行功德，所向所欲，萬事克成，如心所願，如手所指，久視神仙，壽同天地。再拜。

次還東面西

係天師陽平治左平炁臣姓名等，上啓太上無上大道上皇太上北上大道君，南上大道君，泰清玄元上三天無極大道太上老君，太上丈人天帝君，天帝丈人九老仙都君，九炁丈人等，百千萬重道炁千二百官君，泰清玉陛下，天師嗣師系師女師三師君門下典者君吏，臣等夙參錄治，依法遵行，助國扶命，出自經旨，宣道利物，前修所尚，敢籍斯義，冒有披陳，今謹有齋忱，用伸宣讀。

讀辭

具如所言，誠宜拯濟，謹依漢中舊典，奉建指教齋，直一日一夜，三時行道，即夕同集，宿啓上聞，恩惟太上大道君，四方教主，三師靈應，俯垂鑒攝，告下羣司，宣勒職掌，及土地

里域，正炁真官，社里邑君，咸垂擁護，清淨座所，遏却邪魔，傳祈所願，必令通感，齋功成就，言功酬賞，謹以奏聞，願加申勒，臣某等稽首再拜。

次還西向坐，說威儀十二法

正一真人三天法師曰：指教齋戒有十二法。

一者不得食含血有生炁之物，薰辛之屬唯得食菜，非向生之月。

二者平旦飲粥，日中則食，自是之後，水不過齒，晝則燒香，夜則然燈，令燈香光不輟，須臾坐起，卧息不離法則。

三者棄捨因緣，唯道是務。

四者思經念戒，洗心精進。

五者慈孝一切，愍念不知，開示愚癡，爲之痛心。

六者悔謝罪過，恒如持毒，叩頭自搏，禮謝竭誠。

七者棄世爵祿，所寶唯道。

八者勞身苦體，恭敬盡節，爲道驅馳。

九者願除衆病，十苦八難，得免厄世，爲太平種民。

十者尊道貴德，心口相副，洗漱精進，內外清潔，齋直禮拜，不敢怠倦。

十一者誦經講道，安心定意，志願分明，無有邪亂。

十二者當此之時，令淨入戒，令入靜念。

次補職

高功姓名，其職也道德，內充威儀，外

備俯仰，動止莫非法式，三界所尊，鬼神所瞻，關啓祝頌，通真召靈，解釋疑滯，導達衆賢。

都講姓名，其職也閑習儀範，綜括憲章，宣暢誠理，引導疑昧，必令俯仰

合度，規矩從式，勿漏越唱違忤禮儀。

監齋姓名，其職也才用貞審，質範嚴明，勵己齊衆，取爲人則，方可糾察

邪違，繩正規軌，勿得輕略科典，縱任怠替。

侍經姓名，其職也位服端儼，敬肅堂筵，必令中帳嚴整，几案齊列，開卷

蘊軸，每存祇勵，勿使執置乖序，典章虧失。

侍香姓名，其職也通言暢理，所資在

香，必令煙炁氛氳，飛馨散馥，然後響聞太空，聲傳上境，勿使灰炭沈

冥，芬芳輟息。

侍燈姓名，其職也洞幽朗夜，寔寄燈濁，必令列燄齊明，通光月路，始能

皎鏡泉途，炳煥沈穴，勿使煙光扇蕩，暉影傾翳。

次復鑪

香官使者，左右龍虎君，侍香諸靈官，當令靜室行道，靈壇露悃之所，自然生

金液丹精芝英，百靈衆真交會在此香火案前，使某等得道，尅獲神仙，臣身受

福，合門荷恩，八方玉女，侍衛香煙，傳奏所言，徑御

至真無極道前。

次詠紫霞頌出壇
紫霞舞玄堂，元炁常無形，洞灌三丹田，八景承高清，七曜房朗朗，超哉鬱

冥冥，曲靜徘徊泉，神龍同轡駟，三周一感會，灾脫仙道成。

正一指教齋儀
(錢安靖點校)

044 正一指教齋清旦行道儀

經名：正一指教齋清旦行道儀。
撰人不詳，約出於南北朝。係早期天師道齋儀。一卷。底本出處：《正統道藏》洞神部威儀類。

先發鑪

太上玄元五靈老君當召功曹使者，左右龍虎君，捧香使者，三炁正神急上關啓三天太上玄元大道君，臣等正爾燒香清旦齋事，願得八方正炁來入臣等身中，所啓速達，徑御至真無極道前。

次上香周迴，還東向再拜。

次長跪叩齒二十四通出官。

謹出臣等身中五體真官功曹吏，出臣等身中治職君吏，建節監功大將軍，前部效功，後部效殺，驛亭令，驛亭丞，四部監功謁者，及臣等所佩仙靈二官直使正

一功曹。治病功曹，左右官使者，陰陽神決吏，科車赤符吏，剛風騎置驛馬上章吏官，各二人出。出者嚴裝顯服，冠帶垂纓。整其威儀，住立臣等前後左右，感受臣口中辭語，分別關啓泰清官屬監齋君吏，天師所布下二十四治諸官君將吏，道上二玄三元四始甲子諸官君，七十二官三官考召，直日直符，五嶽四瀆，丘沼廟神，山林孟長，山川溪谷，及此間州縣鄉里，里域真官，炁監察，考召土地之主，社里邑君，一時嚴裝，與臣等身中功曹使者及飛龍驛吏，上啓太上大道太上老君，太上丈人，四方衆真，道德尊君，天師嗣師系師女師三師君門下典者君吏，泰清靈神，正一諸官君，臣等謬參法教，職在披述，爰值歸告，輒爲宣騰，謹有云云。

次讀辭

辭言懇倒，謹具陳請，爲依漢中舊典，建指教齋直，一日一夜，三時行道，日夜祇誠，特賜玄澤，俯垂臨照，請三天監齋仙官天兵騎乘，各依儀法，一合來下，行神布炁，輔衛道場，澄潔身心，祈

願感達，降福消禍，乞如所陳，功曹使者分別聞奏，以時上達，列啓事竟，各還臣等身中，復於宮室，須召又到，一如故事。因伏地，三叩三咽，起再拜。

次便四方朝

若中亥，即於此先發鑪，然後行四方朝。

太上玄元五靈老君當召功曹使者，左右龍虎君，捧香使者，三炁正神，急上關啓三天太上玄元大道君，臣等正爾燒香，清旦齋事，願得八方正炁來入臣等身中，所啓速達，徑御至真無極道前。

次法師還東面，西向長跪，上香周竟還。

周竟還

次西向，各稱治職，再拜，平坐，讀：

謹關啓天師嗣師系師女師三師君夫人門下典者君吏。

次北向

謹關啓上皇太上北上大道君。

次東向

謹關啓太清玄元上三天無極大道太上老君，太上丈人，天帝君天帝丈人，九老仙都君，九炁丈人等，百千萬重道炁

千二百官君太清玉陛下。

次南向

謹關啓南上大道君司命衆官三天萬福君，臣等宿世因果，稟承正教，運逢僥倖，叨擢冥津，業愧清虛，行慚忍辱，恒願立功補過，延福拔咎消遣，累欲增長勝緣，拯接憂危，祈濟苦難，今謹有齋忱用伸宣讀。

讀辭

具如翰墨所陳，宜可騰奏，輒相携率，爲施主某乙建立天師指教齋，直一日一夜，三時行道，願以是功德爲齋主家七世父母先過後亡，一切神爽，消釋殃對，和解基罰，拔長夜魂，贖永劫罪，斷地獄緣，結天堂業故，歸身大道，歸神大道，歸命大道。

第一上香願，以是功德上延七世父母過去神識，當令免離灾厄苦難，咸得解脫煩惱惡根，受鍊朱陵，輪化南極，永出三塗長遠，五道不更，六趣不涉，八門澤被，後徒福流見，在今故燒香自歸依師君，昇入無形，和與道合真。

第二上香願，以是功德奉爲帝主國王

君臣吏民保鎮皇基興隆，計稷安邦，利壤延福享祚，故歸身大道，歸神大道，歸命大道，持是功德，上延帝主國王君臣吏民，當令免離灾厄苦難，咸得解脫煩惱惡根，使壽永乾坤，年逾椿嶽，國治民安，功成道泰，上慈下孝，君禮臣忠，六合寧靜，九有清平，今故燒香自歸依師君，昇入無形，和與道合真。

第三上香願，以是功德爲供主自身及家門眷屬尊卑，善慶救灾度厄，保命延年，滅禍消凶，除殃却患，祈恩請福，拔罪解愆，并及同炁左右衆官治所領民，天下吏民等，普同福慶，徧受洪潤，故歸身大道，歸神大道，歸命大道，持是功德歸某等身及家門眷屬尊卑大小同炁左右衆官治所領民，天下吏民，當令免離灾厄苦難，咸得解脫煩惱惡根五刑六害，一切消弭，千殃萬患並皆迴伏，四關九竅，吐故納新，三一五神鎮衛官府，心開意朗，耳目聰明，所向所欲必獲從果，所營所作萬事諧克，求道降真，求財得寶，南昌領籍司命記名，長存久視，德合天地，畜牧之屬，蝗飛

蠢動，已生未生，咸蒙成就，今故燒香自歸依師君，昇入無形，和與道合真。再拜

次誦詠三首

淨意結五內，攝情修齋直，先人獲其慶，子孫得其福，身固殊金剛，壽命無終極，心如瑠璃珠，光明照身外，是謂無上道，衆道中之最，皆從齋直生，捻香之所得，是爲大道座，賢者各努力。

捻香上虛無，精誠感一切，一心無二意，願念隨煙昇，香煙昇太清，願念尋煙至，煙御大道前，太上稱爲快，旋行各三周，功德因族邁，三官除罪契，左神著生錄，仙都定玉曆，記名著左契，天老刻玉籙，冥德於金匱。

齋戒攝情念，燒香向空無，旋行奏至誠，從道求所知，願除億會罪，赦貫代兆軀，基考一切解，福德當歸流，明內受吉慶，後世悉皆知，是皆燒香得，知此由天師，不勝情喜躍，禮拜天師君。

正一指教齋清旦行道儀

(錢安靖點校)

045 正一救壇儀

經名：正一救壇儀。撰人不詳，似出於南北朝或隋唐。一卷。底本出處：《正統道藏》洞神部威儀類。

夫救壇先辦水劍，安地戶，上具壇簡。行道就劍水所，先存思本師在西，次存思三將軍，次存思有一真官絳衣乘斗而至，乃啓白：

臣聞調陰陽者莫過乎百靈，濟家國者豈逾於大道，故碧落有灾祥之變，令人則之，黃籙有拯拔之科，令人修之，臣雖不材，竊慕玄化，忝佩法籙，叨稱治官，所歷山川，敢忘報效，以今太歲某月朔某日辰，謹於某州某縣鄉里，領行法事，道士若干人，謹爲大道弟子某爲某事修建某齋幾日幾夜，禳灾却禍，請福祈恩，建立壇場，依科關奏，臣等澡鍊形

炁，棲心靜神，克期奉行，敢不上聞，伏惟
太上布維新之令，開覆育之恩，敕下真官分司降鑒，使煙雲暫息於三界，風雨無施於四冥，懺謝必聞，啓傳無間，臣等不勝慊切之至，專思神念，真伏待報應。

次存思報應畢，又存四靈畢，便過壇簡與他人，次垂手握固，召

四靈：

東方青龍，角亢之精，吐雲鬱炁，噉雷發聲，飛翔八極，周遊四冥，來立吾左。南方朱雀，衆禽之長，丹穴化生，碧霄流響，奇彩五色，神儀六象，來導吾前。西方白獸，上應觜參，英英素質，肅肅清音，威懾衆獸，嘯動山林，來侍吾右。北方玄武，太陰化生，虛危表質，龜蛇合形，盤遊九地，統攝百靈，來從吾後。

次收兩手捧心，二足丁字立，咒曰：

吾召百神，百神既集即當遊，帶日挾月行九州，十六神將爲吾使，天官地官水官同其休。

次三才步就劍水，右手執劍，咒曰：
五行所運，火木水土金，我佩剛劍，禁敕鬼神，二十八宿，隨吾指陳，北斗七星，挾輔靈真，周流萬方，百福同臻。

次左手執水碗咒曰：

江河淮海非臣水，五龍吐出清天地，大帝服之三萬年，今日吾將淨祿氣，急急如律令！

次劍水相向，稱名位

泰玄都正一平炁係天師某治某炁祭酒赤天三五步綱元命真人臣某
謹請東方青帝青龍銜符帶劍入吾水中，
謹請南方赤帝赤龍銜符帶劍入吾水中，
謹請西方白帝白龍銜符帶劍入吾水中，
謹請北方黑帝黑龍銜符帶劍入吾水中，
謹請中央黃帝黃龍銜符帶劍入吾水中，
吾水非常之水，五龍五星真氣之水，吾

劍非凡之劍，九鍊堅剛，七星挾傍，踏躡北斗，跨踞魁罡，太一作水，周流萬方，清無過水，濁無過穢，以清治濁，以水治穢，急急如

太上老君律令，攝嘑水。

次法師行至天門，少立存思，四靈訖，便誦禹步咒：

乾尊曜靈，坤順內營，二儀交泰，要合利貞，配天享地，永寧肅清，應感玄黃，上衣下裳，震離坎兌，翼贊扶將，乾坤艮巽，虎步龍驤，天門地戶，人門鬼門，衛我者誰，昊天旻蒼，今日禹步，上應天綱，鬼神竇伏，下辟不祥，所求如願，應時靈光，急急如律令！

次至東北角，面東請青童君

謹請東方青童君，身長九千萬丈，從官九千萬人，乘東方歲星之精，真炁浮空而來，降臨壇所，行神布炁，搜索邪精，驅除鬼賊，有罪無赦，攝嘑水。

次禹步至東南角，嘑水喝攝，面南請赤童君

謹請南方赤童君，身長三千萬丈，從官三千萬人，乘南方熒惑星之精，真炁浮

空而來，降臨壇所，行神布炁，搜索邪精，焚燒鬼賊，有罪無赦，攝嘑水。

次禹步至西南角，嘑水攝，面西請白童君

謹請西方白童君，身長七千萬丈，從官七千萬人，乘西方太白星之精，真炁浮空而來，降臨壇所，行神布炁，搜索邪精，誅斬鬼賊，有罪無赦，攝嘑水。

次禹步至西北角，嘑水攝，面北請黑童君

謹請北方黑童君，身長五千萬丈，從官五千萬人，乘北方辰星之精，真炁浮空而來，降臨壇所，行神布炁，搜索邪精，漂蕩鬼賊，有罪無赦，攝嘑水。

次禹步至于上方嘑水攝，面北請黃童君

謹請中央黃童君，身長一十二萬丈，從官一十二萬人，乘中央鎮星之精，真炁浮空而來，降臨壇所，行神布炁，搜索邪精，埋藏鬼賊，有罪無赦，攝嘑水。

次往鬼門上或地戶上，步七星背建向破，旋身入斗中，衣斗履斗，存天官兵馬，日月星宿神

仙，五嶽四瀆兵馬各九億萬衆，森然在目前，及青龍白虎，朱雀玄武，並羅列左右，即再啓事。

次重稱法位

太玄都正一平炁係天師某治某炁祭酒，赤天三五步綱元命真人，臣某等奉爲大道，弟子某修建某齋，幾日幾夜，祈恩謝過，請福禳災，上請天仙兵馬九億萬衆，地仙兵馬九億萬衆，日月星宿兵馬九億萬衆，神仙兵馬九億萬衆，五嶽四瀆兵馬九億萬衆，各請嚴振落驛，風驟雷舉雨沸雲奔，一合來下克，以今日今時齊到此處，蓋屋三重，繞壇三匝，上張天羅，下布地網，九土齊功，兵馬列陣，於壇場之內，門戶之傍，井竈之間，花果之下，所有伏屍故氣，土木百精，貓鬼野道生人，厭蠱爲害，鬼賊於道，不順者收付魁罡之下，入地萬丈，無動無作，急急如律令，攝。嘑水。

次視劍五行咒曰：

五行相推，剛最持威，六紀輔我，三台辟非，天迴地轉，陰陽開闢，長生度世，日月同暉。

次提劍擬地視之，咒曰：

天赦煌煌，地赦正方，禹步所至，百鬼
伏藏，急急如律令，攝嘑水。

便殺劍後，便右旋身，出斗避，
踏星罡畢，就事行道。

正一救壇儀

（錢安靖點校）

046 正一解厄醮儀

經名：正一解厄醮儀。撰人不詳，約出於南北朝或隋唐。一卷。底本出處：《正統道藏》洞神部威儀類。

凡人年命有厄，元辰死忌，五羅筭盡，陽九陰八，盜賊口舌，疾病官橫，財產不利，觸事災憂者，可依法推究章醮解之，即得轉禍為福，大吉利。宜以太歲、本命、甲子、庚申，及諸吉日，醮請司命北斗七星，生度災厄。所須之物，並隨其貴賤豐儉量之，今聊舉其數如左：

淨席六領，小案一面，香鑪六枚，並奩漆盤二十四面，燈盞四十九枚，并燈篋四十九枚，枚長三尺五寸，並夜用，白日不用。色綵五段，段長八尺已上，青五段，段長八尺已上，布綵隨用，亦可用紙二十四張。小

壘二枚，壇纂十二枚，長一丈二尺，并赤線二十四丈作欄，並白日用，夜不用。銅磬子一枚，大盤一面。

右一十一件，一造永用，亦可借充。

乾棗四十八顆，栗黃四十八顆，時果子色別四十八顆，捻頭四十八枚，餠餌四十八枚，雜餅色別四十八枚，黍飯三斗，米拌之屬色別四十八枚，香一兩，鹽半斗，豉一斗，然燈油四十九盞，并炷，並夜用，白日不用。淨水一椀，

右一十三件，醮訖並分散令盡。

手巾三尺五寸，布帛隨用，鎮錢一千二百文，命米一石二斗，命綵尺數計歲餘一。紫綾為上，土隨本命納音色。

右四件可臨事裁量，醮訖並施散。

醮法於家庭中若諸靜處，若室中作壇埤方二丈四尺，開四仲門，門闊四尺，欄纂三重，題正東青陽之門，正南朱明之門，正西皓陰之門，正北玄英之門，內依五方敷席。一法不用欄纂，以隨三色綵周圍舒為壇。壇南門外五尺一席。師座一香案，案上敷巾帛亦可五方安五香案。壇上東席五帝五盤五分，南席三神三盤

三分，西席三台三盤三分，北席六甲六盤六分，中席七星七盤七分，鹽左豉右，其淨水置几上，米及錢綵置案上，五方座隨神階降，敷綵席為神座，紫為上，次緋，次綠，次碧，次黃，次白。綵前敷青布，眾綵為食單上列盤壘。金銀為上，次銅，次漆，次雜器。壇十二尺面別一十二燈，燈高三尺五寸，師案前一燈高二尺一寸，執事從東門出入，先安鎮物，次燒香，次下食盤，若行香從中席西頭為始，次第東南西北，弟子立壇東，師北面扣磬三十六下，平立安心，靜默絕鬧止喧，存四獸及玉童玉女俠侍左右。

次叩齒三通祝曰：

太上玄元五靈老君，當召功曹使者，左右龍虎君，捧香使者，三炁正神，急上關啓三天太上玄元道君，臣正爾燒香，為某設醮，奉請北斗七星，五帝諸君，消灾乞福，願得八方正真生炁，來入臣身，所啓速達，徑御
太上昊天玉皇上帝几前。

次長跪，請神曰：

維國號某年歲月某朔某日某辰，臣某稽首

再拜，謹上請北斗第一貪狼星，第二巨門星，第三祿存星，第四文曲星，第五廉貞星，第六武曲星，第七破軍星，七星真君各率官屬降臨中席，歆饗醮禮。謹上請三台六星上鼎君，各率官屬降臨西席，歆饗醮禮。

謹上請東方青帝九炁君，南方赤帝三炁君，西方白帝七炁君，北方黑帝五炁君，中央黃帝一炁君，五方帝君各率官屬降臨東席，歆饗醮禮。

謹上請南上司命司錄延壽益筭度厄尊神，各率官屬降臨南席，歆饗醮禮。謹請六甲六旬王文卿等陰陽六十神，從官將吏玉女衆靈，一切來下降臨北席，歆饗醮禮。師伏地思神，集座起，再拜。

次上香

獻茶

初獻

上啓七星五帝三台命錄六甲等神，伏願一降臨，歆饗醮禮。今有州縣鄉里官位姓名年歲生月本命甲子，其神王文卿，從官十八人，屬北斗第一貪狼星，字露神子，生在凡俗，百行多違，無福禳災，遂延憂患，動止懷懼，心念不安，唯恐今歲年中被諸衰厄，衆死并會，刑殺加

臨，八難所纏，七傷爲惡，凶神構禍，毒鬼興災，一日遭罹，無方取濟，告祈感切，深可哀矜，謹以今日吉慶良辰，某地露出中庭，依科首謝，謹齋命綵命米，信錢信物信香，并奏一通於北斗之下，對衆靈之前歸命星官，披心帝府，輒獻微禮，率薦丹誠，醮降真神，祈恩委命，伏願流慈布澤，合謙停輝，若人多，云謹條具醮人姓名年屬如左。弟子再拜。

次上香

亞獻

重啓衆真等，某慊倒翹勤，乞求靈祐，唯願賜爲某解却身命，今歲來年所有災厄，願解東方青瘟青災，春之三月木行之厄，願解南方赤瘟赤災，夏之三月火行之厄，願解西方白瘟白災，秋之三月金行之厄，願解北方黑瘟黑災，冬之三月水行之厄，願解中央黃瘟黃災，四季之月土行之厄，願解本命行年生胎，日月五行相克九宮不利之厄，願解衆元諸殺，天年歲星三刑六害五羅筭盡之厄，願解四出行來，逢災遇禍，所求不得，所作不成，田種薄收，蠶桑不熟之厄，願解盜賊兇寇劫掠侵奪，亡失錢財

剝削之厄，願解官私口舌，牢獄囚繫，刑法律令枷鎖之厄，願解時行疫炁，患瘡中風，千病萬痛危亡之厄，願解軍行戰鬪，兵刀殺傷山川阻險，沒溺之厄，願解四方十二時上新死故亡，雄雌注殺破射之厄，願解虎狼蟲蛇蛟龍蜂蠆毒螫之厄，一切諸厄悉乞解除，若天羅所加，地網所繞，六神爲惡，九醜爲災，厭殺剋傷，建破衝擊，年窮筭盡，厄會深重者，伏願天官迴罔極之施，降雲雨之恩，俯鑒丹誠，俄流惠澤，厄元瓦解，禍難冰消，則枯木更榮，朽骸蒙潤，咸荷明聖，覆護重恩，若上章，即云臣今謹爲拜奏某章一通，上聞天曹，請先出功曹使者及時騰達，伏願尊神照省，總云弟子再拜謹啓。

次散洒飲食

出官

上章訖

上香

終獻

重啓明星北斗三台五帝司命司錄六甲等神，某敢竭至誠，奉請明聖，几筵穢濁，所獻輕微，仰勞尊神，迂屈雲駕，垂恩曲盼，被福蒼生，特乞淵波恩霑，某千

愆萬過，賜爲消除，夢想正真，灾殃弭滅，北斗落死，南宮注生，五帝真靈，並加匡衛，六甲神吏，常與扶持，舉向開通，營求允遂，若在官者官秩昇進，品位高遷，政化風行，威嚴霜肅，永綏天祿，長簡帝心，朱紫騰芬，微猷克著，若在宅者居宅清肅，人口平安，金玉滿堂，錢財運合，五龍鎮守，六耗不生，男女貞賢，門戶興盛，若在道者，六通洞遠，四達圓明，慧業相資，威神自在，玉曆題字，金簡刻名，兆庶欽崇，人天敬仰，若疾病者，某所苦之處，即蒙輕減，五內通理，百關調暢，鬼滅毒散，寒消熱歇，四大平復，六府清和，總云則上荷明神無邊慧力，惟垂廣蔭，被受大恩，弟子再拜謹啓。

宣疏 送神

伏以神降條欵，應感斯須，禮謝既周，行香已畢，神歡人悅，留連盡席，雲車整轡，羽駕踟躕，晷刻易淹，不敢稽滯，上界天官，仰昇宮陛，下地神祇，各還部署，向所祈啓，具騰表裏，願垂采鑒，領納所陳，昇車之恩，惟垂愷悌，臣及弟子再拜奉送神馭。

復鑪

香官使者，左右龍虎君，捧香使者，當令醮壇之內，自然生金液丹精芝英，芳味流溢，百靈交會於香火鑪前，令某設醮之後，灾消厄度，受福蒙恩，十方仙童玉女侍衛香煙，傳臣所啓，徑御昊天玉皇上帝几前。

行事畢，主人取本命星盤再拜，食之餘吉，其下醮盤為土地，主下一盤於壇外，亦得。

正一解厄醮儀

（錢安靖點校）

047 正一醮宅儀

經名：正一醮宅儀。撰人不詳，似出於南北朝或隋唐。一卷。底本出處：《正統道藏》洞神部威儀類。

凡人居宅虛耗，牛馬死失，田蠶不熟，人口嬰害，或每年有五瘟時氣，及狗鼠蟲蟻作怪，或犯五方十二時土財，利散亡舉，向不稱者，以四時王相日醮之吉。

淨席六，領箭十二隻，麻縵二十四丈，青赤白黑各六丈。燈九盞，并竹燈柱九枚，枚長二尺五寸，白日不用燈。大案一面，小案五枚，無者可香鑪五枚，香一兩。色綵五段，青八尺，赤七尺，白九尺，皂六尺，黃五尺。錢三百五十文，手巾五尺，漆盤三十五面。乾棗七十顆，栗子一升，胡桃七十顆，黍米飯三斗，米拌

三斗，捻頭七十枚，薄餅三十五枚，麥米飯一斗，豆豉一斗，粟米飯一斗，粳米飯一斗，米五斗。鏡四面，并竹柱四枚，長三尺。大盤一面，紙三十二張，五色石色別一斤。

右件隨豐儉量之食物奠盤中。

醮法於宅中庭方二丈四尺，畫地爲壇，四季上開天門地戶，人門鬼門，皆以箭爲之，當方色縵，三重欄之，門安兩燈，師案前一燈，壇中五方設五方神座，隨方色著綵及錢於青座，北設竈君座黑座，南方神座赤座，東方神座青座，西土神座白座，南功曹主簿座赤座，北直符座黑座，西宜安丈人座白座，東從官座青座，四維十二辰上各一座別細席一，其五方神座及直符座，座列食盤，二餘座，座列食盤，一五方安香火五綵錢帛，依五行成數，東方八色青，南方七色赤，西方九色白，北方六色黑，內方五色黃，諸侯已上用五色寶璧，卿士已下用石無斤用兩，諸侯已上綵用匹，卿大夫用丈，士庶用尺，錢諸侯已上用千，卿大夫用百，士庶用十，亦可五方安五金龍東麥南黍

西稻北豆內粟，壇南五尺師座一席一案，巾覆案上，東南上從地戶出入。

先幣，次進食，燒香再拜，少坐

祝曰：出家法師但坐不拜。

維某年歲月朔日某辰，某州縣鄉里，官位姓名，謹擇吉日齋戒，肅敬內外，至誠淨宇，清壇庶羞，香案信幣，新華品物咸具。

謹請東方宅神青土將軍各領東方甲乙寅卯，直符儀服，皆青，降茲東座。

謹請南方宅神赤土將軍各領南方丙丁巳午，直符儀服皆赤，降茲南座。

謹請西方宅神白土將軍各領西方庚辛申酉，直符儀服皆白，降茲西座。

謹請北方宅神黑土將軍各領北方壬癸亥子，直符儀服皆黑，降茲北座。

謹請內方宅神黃土將軍各領內方戊己辰戌丑未，直符儀服皆黃，降茲內座。

謹請乾坤震巽坎離艮兌，四孟四仲四季，歲月日時，刑殺德合，建厭冲對，太歲太陰大將軍，門丞戶尉，并竈伏龍，庭堂屋吏，宅內七神，陰陽官屬，並依位就座，領納丹誠，歡侑慶樂，弟子再

拜謹啓。

次上香 上茶 上酒

謹啓五方宅神，五土將軍，宅內衆官等，弟子某生代有緣，依居宅宇，乾坤蔭覆，得在凡流，資水火而求安，假稻梁以爲命，自於此宅居住以來，日月推移，動淹年載，被蒙寧吉，戴荷誠深，或云而比年以來，輾軻虛耗，人口大小，更互不健，男殍女殍，妄爲崇害，招引五瘟，六天之鬼，屯結宅中，不肯退散，今謹依先聖科法，謹以今日吉慶良辰，靜念至心，灑掃庭宇，燒香設位，謁請靈神，首罪謝愆，祈乞福祐，謹上餅果，並悉芳馨，敬薦宅中，五方宅神，五土將軍，宅內衆官，伏願一切降臨，賜爲歆饗，弟子再拜謹啓。

次上香 上酒

謹啓諸神等，弟子此宅，或是初時起立豎柱架梁，或從居住已來修理改換，或移徙抵向，犯觸王神，或嫁娶葬埋，非家姓便利，或於中殺害，汗穢宅形，或罵詈咒詛，動成愆咎，致有觸犯四面八方天地陰陽百官禁忌，五土之炁，刑耗之神，

或犯男女大小之命，及犯牛馬六畜之命，爰居爰處，載憂載懼，今設薄禮，仰謝愆失，并獻雜物，安定衆神，伏願降以嘉福，惠以厚恩，所有犯觸，一切釋散，人口康健，瘟毒不干，上得天和，下得地利，青龍鎮左，白虎居右，朱雀捍前，玄武衛後，五行得所，四王安方，龍神鎮守，邪炁消亡，辟除盜賊，禳却災殃，解謝之後，萬福來祥，弟子再拜謹啓。

上香 上酒

重啓神君等，弟子今日誠心致禮，伏願神官普垂恩祐，請勤五方直符，爲某驅遣宅內五虛六耗，蜚尸邪魅，及以時瘟疫炁，中外強殍，行客寄鬼，雄雌注殺，遠去千里，若宅中地王害炁發動，悉自伏滅，願請青龍來，下鎮宅東，消却東方青色災禍。開木門招集東方五穀，金銀財寶來入，願請赤龍來，下鎮宅南，消却南方赤色災禍。開火門招集南方絲綿綵帛財寶來入，願請白龍來，下鎮宅西，消却西方白色災禍。開金門招集西方金玉珍奇財寶來入，願請黑龍來，下鎮宅北，消却北方黑色災

禍。開水門招集北方魚鹽牛馬財寶來入，願請黃龍來，下鎮宅中央，消却中宮黃色災禍。開土門招集四維錢財匹帛珍寶來入，五色神龍鎮遏五方，祭謝以後，宅神安定，門丞戶尉，備衛家門，禁制百鬼，無使來前，散滅凶殃，招集福祿，令弟子所居所住，安鎮百年，男女賢明，老少元吉，惡口赤舌，沒入九陰，家口尊卑，常沾五福，保宜天祿，永迨遐齡，六畜滋繁，五穀豐熟，錢財運合，倉庫充盈，仕宦高遷，蠶桑蕃息，子孫昌熾，門戶興榮，舉家承擁護之恩，畢代荷神明之德，蒙如所願，被受洪恩，弟子再拜謹啓。

次散食於壇外四方

重啓禮謝三周，合座豐足，惟諸明祇，各還本府，宅內諸神各安其部，伏願留恩降福，一如所啓，再拜。

行事畢收五方飲食埋宅五方，門位飯食埋大門樞側，餘盤迴以散食。

正一醮宅儀

(錢安靖點校)

048 正一醮墓儀

經名：正一醮墓儀。撰人不詳，似出於南北朝或隋唐。一卷。底本出處：《正統道藏》洞神部威儀類。

凡人墓山年月深久，或有崩壞，須得補葺，或時凶衰，地氣王動，致令子孫貧耗，遭非橫禍，百事不利者，須饗祭墓之山川土地神祇，安穩亡人，即得子孫平安，所向吉利。

細席三十五領，無席用淨茅，大席二領，香一兩，小案一面，香鑪四具，小盤三十五枚，黍米飯五升，粳米飯三升，粟米飯一升，胡桃七十顆，乾棗三十五顆，栗子一升，餅三十五枚，淨水刀鋤，供用竹纂四枚，枚長一丈二尺。漆盤一面，小繩一條，長三丈六尺，銅鏡一面，鹽一斗二升，鼓一斗二升。

右件物隨豐儉量之。

於墓近道左，治地爲壇，方三丈六尺，四角立標，壇中央設五方神座次，外設二十四神座次，外四方設阡陌座，墓前左設亭長座，右設丈人座，座列細席一，領飲食一盤，所用鎮幣錢物，並隨時豐儉，但令合五行四維支干數，唯須精新，不得穢汙，預前一日潔淨營辦，其日設飲食於壇東南，祭官立於壇南，祝人在壇西南，弟子立於壇東，執事升壇，布幣進食，置香鑪於壇內，四角。

先上香，再拜，跪讀祝文。出家法師但坐不拜。

維年歲月朔日，某官位無官者州縣鄉里，姓名，敢昭告于后土五方五行諸神，此境山川百靈，某家丘墓阡陌之神，往以龜筮襲吉於此山源，爲亡祖考安厝宅兆，青龍白虎，左右相扶，朱雀玄武，前後相對，置立塋域，整齊阡陌，千年萬載，永附山源，但以年月幽深，丘墳蕭索，或四靈失守，八將無依，蒿里明靈，不垂冥祐，屯危者云比年以來，居家屯坎，

舉向衰耗，無所良宜，當得翻失，應成却敗，錢財流散，官事紛紜，田種薄收，蠶桑不熟，子孫傷夭，仕宦不遷，日甚憂惶，無以取濟，謹以今日奉齋薄禮，并及雜物，庶羞備具，獻上至誠，奉請后土諸神，丘墓丈人，二十四位功曹，傳送阡陌諸神願，並率所部降臨其位，次第而坐，饗受所獻，弟子再拜。

次上香 上茶 上酒

謹重上白后土諸神等，某先人末胤，奕代承家，恐山宅之不安，懼宗禋之罔嗣，敬以今日誠心設醮，伏乞亡者魂寧於幽室，子孫獲慶於將來，惟此山岡鬱鬱蒼蒼，年年興盛，代代富昌，上合天文，下符地理，左陪金匱，右帶玉堂，男女位備，無所不良，五方錢財歸流，生人子孫富貴，仕宦高遷，門戶強盛，兒女貞賢，田蠶豐熟，財積如山，寶貨充滿，車馬駢闐，安倉鎮庫，豐溢無量，亡人受恩，利祐子孫，弟子再拜。

次上香 上酒

向來至誠，殷勤奉請，馨香既薦，言謝已陳，禮物輕微，意慕欽重，仰蒙洪澤，

饗納微誠，再拜三謝之禮，悉以周徧鎮謝之物，既蒙受納，願嚴神駕，各還所止，請道路將軍瞻察前後，浮遊邪魅，驅令蒿里，丈人丘墓長寧，后代子孫昌盛，福祐蟬聯，一如律令，再拜。

行事畢，其阡陌座物，當分埋之於壇東南角，舒席於墓前，迴食盤與亡人上食，咒訖並分散令盡，凡平收日不用醮墓凶。

墓神正月在子寅卯辰申戌亥，二月在子亥，三月在卯巳午申戌亥，四月在巳午未戌亥，五月並同，六月在丑卯辰巳未亥，七月八月在寅，九月在子丑寅辰未戌，十月在卯戌亥，十一月在子卯辰午未申酉戌亥，十二月在丑寅卯辰巳亥。

右件地犯之殺人凶，若去墓十五步外無忌，其日亦不得祭墓。

正一醮墓儀

（錢安靖點校）

049 洞真黃書

經名：洞真黃書。撰人不詳，約出於南北朝。係早期天師道房中修煉法訣。一卷。底本出處：《正統道藏》正一部。

師曰，願分別天地大度八生之法，天地六合，人六合，男乘甲子甲辰甲寅，男歸癸亥，三合成德，更相配以八生爲大度。黃書八炁有二十四神人，三神人三神尊以三一炁應其炁，夫妻結精成神月生，一日得癸丑癸卯，陰家生炁兩半成一，可共度厄消病，所求與老子生炁并，但行九一，无妄施。二日得甲辰，天地生炁陽合。三日乙巳，陰陽大度。四日丙午，老子白日昇，雲開施四炁，男女三合，女乘甲午甲申甲戌，女歸癸巳，三合以應十二時，各乘十二二十四炁，男炁白，女炁黃，男一

女二，左三右六，先甲寅癸丑，還癸酉日。男三先癸卯還甲辰，乙巳出天門入地戶，地持天柱爲真，過戊己度元元堅自守，子欲求生活，歷度三五，勿過七九。癸亥五五二五炁，癸巳八八六十四炁，癸卯九九八十一炁，癸酉六六三十六炁，癸丑三五炁，癸未三五炁。甲子五炁施，甲午八炁施，甲寅九炁施，甲辰九炁施，甲申六炁施，甲戌六炁施。道出三五七九，天師以漢安元年壬午二年癸未從老子稽首受黃書八卷，赤炁三炁九符七符各一玄籙，一混成一中章三神籙一，口受二十四日乙巳日中歷度二十四卷上下，通到二十四己巳日，口授升長稚英等，宣天地大度，皆明知擇其人，擇其骨，擇其德，要死爲效爾，乃傳二卷。神宜不妄施，六甲五行，二十四炁，九宮八卦，陰陽度世，消災保命，服食三微，虚无祕經第八勿妄傳。

東方甲乙木，西方庚辛金，木畏金，甲以女弟，乙配西方庚，庚乙爲夫妻。南方丙丁火，北方壬癸水，火畏

水，丙以女弟，丁配北方壬，壬丁爲夫妻。北方壬癸水，中央戊己土，水畏土，壬以女弟，癸配中央戊，戊癸爲夫妻。中央戊己土，東方甲乙木，土畏木，戊以女弟，己配東方甲，甲己爲夫妻。西方庚辛金，南方丙丁火，金畏火，庚以女弟，辛配南方丙，丙辛爲夫妻。春三月東方木王甲女弟乙爲庚妻，見家王持西方金還東方生，金剋木，故榆莢拆是微陰殺。夏三月南方火王丙以女弟，丁爲壬妻，見家王持北方水還南方生，水好滅火，故殺薺麥。秋三月西方金王庚以女弟辛爲丙妻，見家王持南方火還西方金生，火消金，如成器故可穫禾報社。冬三月北方水王壬以女弟癸爲中央戊妻，見家王持中央土還北方生，土好生萬物，故冬至之時，萬物動於黃泉之中，故易言潛龍勿用，孝經援神契曰，溟滓始互濛濛滋萌，此之謂也。

八卦在天，乾爲天一，坤爲攝提，震爲豐隆，巽爲招搖，坎爲咸池，離爲軒轅，艮爲形時，兌爲呈時。八卦在


地，乾為金石，坤為土，震為木，巽為草，坎為水，離為火，艮為山，兌為澤。八卦在人，乾為頭，坤為腹，震為足，離為目，巽為鼻，亦為股，艮為手，坎為耳，兌為口。八卦初生，從九宮起，當持四十五，籌置子午卯酉中央，各九次呼之曰，水流歸末分八至丑，木落歸本分六至亥，金剛火彊分二至未，土王四季分四至巳，位成一二四為肩，六八為足，左三右七戴九履一，一五在中宮，主為藏腹實巽，呼天門從乾得一艮八，高舉散三從坤震雷動澤，從兌得二坎水不獨六，從離得四位成三五齊等，若一震陽坎艮各自成位，巽陰離兌餘各有位，一乾當成坤，一復來八九五居中宮卦各居位。



月生一日一九，二日二九，三日三九，四日四九，五日五九，六日六九，七日七九，八日八九，九日九九八十一中雨。

四	九	二	四	九	二
三	五	七	三	五	七
八	一	六	八	一	六

從十日行三五七九，十一日行三五七九，十二日行三五七九，十三日行三五七九，十四日行三五七九，十五日行三五七九，此為六合部成日月，此中不得妄雨，雨則別有災，慎之慎之。



從十六日行八八十七日行七八，十八日行六八，十九日行五八，二十日行四八，二十一日行三八，二十二日行二八，二十三日行一八，此句中可一雨，天地夫妻陰陽之行，其餘七八屬戊己，不可妄行，各自啓自守結氣，兩相含生，擇其骨，慎勿犯之。


師曰：八卦九宮，月生六甲，陰陽相配，六合八生，大度八風，二十四雨，三五施行，七九災厄，三五子如施，七五灾如施，三一前後後三，八風八炁相配，上元一，中元二，下元三，九一生其中，八風二十四雨亘一施，十日但風炁下，胎息千二百炁，十六日三炁下如雨，天地大度三元炁合，二十四日但風炁，甲子五炁三五，

甲申六炁三五，
甲午八炁三五，
甲戌六炁三五，
癸酉陰炁多，
癸卯陽炁多，
癸巳陰炁多，
癸亥陽炁多，
甲辰九炁三五，
癸丑陽炁多，
甲寅九炁三五，
癸未陽炁多。

癸酉癸卯天地大度以陰陽相配
合，子能明知陰陽六合轉相配偶，禁忌
三五六合，七九六合，左三炁右六炁，
三五七九與二十四神人相應，三五者
但行左无上右玄老中太上灾疾千二百
炁，小疾二五七九，欲養性保命无疾
病，三五大要五炁最爲真，七炁九炁疾
病灾，子自三思勿違犯。



師曰：八卦九宮月生六甲，陰陽
相配，六合八生大度八風二十四雨，三
五施行，七九灾厄，五行男女生禁忌，
子能施行如玄籙，炁混混沌沌，黃白之

炁，能相殺能相生，修身念善，但共貪
生樂活，有急爾乃施行，恐子不明，故
下三炁行法，從壬午癸未始，漢安元年
正月十日，日中時出八卷玄籙混成圖
書，宣勅男女莫妄施符契，辟除故炁尸
注鬼，言灾病欲度世，以赤炁過度，戊
己白日昇，雲龍倒絕，去雨卧兩手過頭
滿三，從故玉室出去復還八幽，解十六
結，思八炁令炁解生，炁者乃施父生泰
玄府母生泰微府，父生丙寅，母生丙
申，天地未立，分別黃白，共施九九八
十一炁，炁如二兩半，成一左炁上，一
右玄老，三中太上，三九九八十一。故
令男女先二後三，即是三五子，共三思
中章腹目，明三生三起爲三生三卧，爲
三死人之明，以以炁爲保，勿違犯。



師曰：三五位成，七九灾除，三一先
行，二四九一生炁，炁如三合成德，思
之勿妄施。

道以月生一日至九日各共思玄元始炁
在頭目，頭念八卦在人身二十四神與
三五七九，知之身可度矣。




道以月旬之後，其數三五七九，從十日
盡十五日，日行三五七九日，此爲天地
人之六合，日月當明，不得妄雨，可消
灾，雨則傷敗，枯根糜子，不明三五之
法，七九之施，爲欲妄施，恐子如魚之
失水，人之失炁，雨有害，慎之慎之。

二洞房宮	七女媧宮	六司錄宮
泥丸九丹田宮	五大宮	一真一丹田宮
四明堂宮	三伏羲宮	八司命宮

道以月十六日施八八至一八，此旬中可一雨，下弦屬戊己，七八可風不雨，二十八日當止，子不能共施三五，但行三五七九與二十四神相應，不與左无上右玄老中太上相應，三一者三官正炁，前一後二者，上元中元也，兩共却卧，兩足相距，出入極望元元，三訖過度戊己，嬰兒胎息千二百炁，身被灾疾，不復除爾，乃思上下丹田中神二十四炁，亦共思之，三五之神，亦共思之，男左思女右思，勿妄傳，擇其人，慎之慎之。


乙未認	甲午姐	乙巳認
丙申	丁酉	戊戌
己亥	庚子	辛丑
壬寅	癸卯	甲辰

道以十二月相配陰陽大度八生之法玄炁來下，始炁來上，神炁男女各名，其神可共歷度疾病之灾，受真四字，名號八字配炁，道出冥冥，入窈窈，三五炁當正身得神仙帝王安寧，萬不失一命可得全，男三炁女五炁，男十二炁女十二炁，十二時相配，各自堅其神，男神王文卿周左右松，女神衛上卿周史公來，如此心自明，勿違犯。



道生六合，當欲過五厄，歷度諸灾，消去疫炁，口舌疾病不止，先思甲子諸君之神道，隨日名其神，神為厄者上天曹除三官考逮，不念其神章上言誓，歷年日月，不解出入，行來男官乘六十神，加令得陰神日，可質使之，加令得陽神日，亦可質使，陽神五日在陰家，陰神五日在陽家，以故兩相含，今日甲子

日，思神還六戎十神，為人走使，今日甲午日，思其神還九夷十神，為人走使，故置子午將六癸神之所歸，人能明六癸，舉事可過度，男女各自保其神，施炁不得妄行，中有不死道，帝自三思。



日道生未然，先具甲子諸神，次具二十四神，正月一日隨日名號至十二月，男神炁同其一，失一者其命不全，故置神位，隨月施行，不可失之錯互他呼召，不為人使出入，若治病疫氣，皆宜自啓天地水三官，與日神併力佐助，道人王甲施行三五七九，子能以受吾真

言要語，當共明師口訣旨語，上下九宮八卦符契圖書錄籍，以漢安元年七月七日中時太上老君授與張陵，口要長生度世尸解白日昇天，子孫係世過度諸災，道陵以二年歲在癸未正月七日中時授與趙升王長，王稚，王英等，施行黃書契令九宮禁忌，知男女官神所治第八卷，要言出其中，升等授三夫人於莊山北望治，分別卷契，先授赤炁口訣，天地六合三五正行七九配炁，男女生各隨其神，長短衣服，皆共思之，令神各自守，死令錯互人始生，先念精神，如念腦髓生骨完，堅彊羅綱，解十六結，其神散手過頭上止，勿妄傳，慎之慎之。

右玄老	等百千萬重道	千二百官君
五	九	六
泰清玄元	上三天無極大道	太上老君
三	七	二
左无上	天帝君	九老仙都君九炁
八		八

師曰：天地九夷，八蠻，六戎，五狄，天

地水三官，考召六質，二十四官君，天師女師係師三師君，將三天正炁大赤天一，清微天一，禹餘天一，子能明三炁三五者，可共度厄脫年命除去疫病，要言口傳勿文，按男官二十四炁，女官二十四炁神錄玄錄混成中章，不可不擇其人爾乃傳。


三前二後二三五七九	千二百		
兩共其一	出入極	望元元	
過度戊己	龍倒	嬰兒何傳	
一仰一覆三	一來一往三	思神十二	
散神十二	天炁三	人炁三	地炁三
天炁五	人炁五	地炁五	
天炁七	人炁七	地炁七	
天炁九	人炁九	地炁九	

子能明此九九，可共消灾散禍，中有服食三微，不知老歷度三炁，甲辰癸卯始

此為真，甲午乙未丙申六十之歲，恐子左驅除惡逆，不復久事，可守一不可三更甲午道韻，正月七日，日中時下。

泰清玄元上三天君列上

以生年受炁左何
某散二十四神名號
方六戎六六三六
校赤炁三君大赤天
太上赤炁言天曹某
日昇天體輕出八極
丑十二時將吏各并



男行個女某生應二
五七九知三父生
輒以時謁拜願請東
方九夷九九八十
炁願請北方五狄五
官將百二十人禹餘天
昔別上天地相合授
與夫妻和合歷度三
成於一光到東瀛演
望元元黃白相結共
大度赤炁次度某書
若干卷炁果生年七

丙寅母生丙申父牟 爲某行炁母門留爲
炁願請南方八蠻八 八六十四炁願請西
將吏并請十二時君 監察過赤炁某書先
官將百二十人各共度 諸神賢者陰殘三炁
災過我五厄之中某 生應過戊己身得白
卯辰南謁巳午未西 謁申酉戌北謁亥子
月七日十月五日正 月七日不爾生炁受

南八蠻唐上卿 西六戎扈公陽 北五狄龐明心
南八蠻衛上卿 西六戎孔利公 北五狄王文卿
南八蠻杜仲陽 西六戎展子江 北五狄龐季卿
左男右女三炁 左男右女三炁 左男右女三炁

洞真黃書

(錢安靖點校)

050 上清黃書過度儀

經名：上清黃書過度儀。撰人不詳，約出於南北朝。係早期天師道房中修煉儀式。一卷。底本出處：《正統道藏》正一部。

夫弟子在師治受道，不得過二十不
過度，二十外受道，即過度當沐浴禁
誠熏香也，入靖必先啓師然後行事，
出入皆拜靖乃謝。

入靖

第一入靖，陽立寅上，陰立申上，
求過者長跪，言某以肉人千載有幸，得
染道化，求法經時，未蒙過度，稽首歸
依，乞丐生活，便再拜。師答言今日
吉，合當爲橋梁。求者重言，願蒙成
就。答曰，當爲啓白，弟子伏惟受恩，
復再拜師，便執手引之東向。

存吏兵

第二俱東向正立，陽左陰右，兩手
相持，叉手立陽，以第二指貫陰，第二
三指中間各鳴鼓十二通，各思所佩籙
上功曹使者，將軍吏兵，冠顯衣服，羅
列行伍，衛臣妾前後左右，當爲臣妾致四
方生氣消灾散禍，隨事分別關啓，皆使
分明了然。如此一過止。

思白氣

第三各思丹田白氣，大如六寸面
鏡，出在兩眉中間，漸大光明照耀之頭
上，下灌身而體，徹見五藏六府，九宮
十二室，四支五體，關節筋脉，孔竅營
衛，表裏一切，莫不朗然。如此一過止。

思王氣

第四各思王氣，春思東方青氣潤
澤我身，赤氣相之。夏思南方赤氣，黃
氣相之。秋思西方白氣，黑氣相之。
冬思北方黑氣，青氣相之。四季思中
央黃氣，白氣相之。仰頭以鼻納氣，低
頭咽之，下至丹田，中上昇崑崙。三取三
咽之止。

咽三宮

第五各思三元生氣，正白來下，周
而覆身，因仰頭以鼻納生氣，言天一
宮，生氣當來生我，低頭咽之，令滿腹
下丹田，中上昇泥丸，地水如天法咒咽訖
仰頭，以鼻納生氣，天地水三宮生氣，
當共來生我身，低頭咽之，令滿腹下丹
田，中上昇泥丸。三宮生氣，浩然正白，覆身
體，貫達五藏六府十二支干間。如此一過止。

啓事

第六啓仍俱東向長跪，各鳴鼓十
二通，臣身功曹，吏出上仙上靈二官，直
使正一陰陽生氣，治病功曹左右官使
者，陰陽神決吏官二人出，出者嚴裝顯
服，住立臣前後，咸受臣口中辭語，分別
關啓某郡縣鄉里，中真官注氣考召諸官
君將吏，都候四始，四面監察，諸官主
考召四君將吏，謹上啓

太上無極大道無上玄老大上三炁
君將吏，太上老君太上丈人諸官君將
吏，天師嗣師係師女師三師君夫人門
下生炁，諸官君將吏，真人君將吏，太
和君將吏，黃書契令腹目君將吏，九炁

丈人逮召君將吏，陰陽生炁度道君將吏，中胎真人備白君將吏，中胎赤白備泄君將吏，中黃戊己百節君將吏，陰陽功曹導化君將吏，陰陽真炁越道君將吏，監察內外開化君將吏，消灾散禍解厄君將吏，天節地節人節，三旄建節，四時八節，五行爲合三五功曹斗杓君將吏，天地水三官考召諸官君將吏，此下里中營域中化神君將吏，官將百二十人故炁君將吏，鬼賊君將吏，臣某惶恐白，臣以頑愚癡下，好道樂生，前後某治炁祭酒真人某，甲進受真言要語，人生大度之法，要當奉行，謹有某郡縣鄉里男女生某，甲年如干歲，好道樂仙，今來詣臣求乞過度，奉行陰陽五行三炁，先從中元一生，上元一生，下元一生，三炁相結，共成爲道，願請監察內外開化君吏，還神復色補炁君吏，營域中化神君將吏，天地水三官考召諸君將吏，當爲臣及甲解釋三官，考逮撤除死籍，著名長生王歷，得在種民輩中，願臣及甲精神專固生炁，布染四支五藏，各得無他，所求者得，所過者度，口舌伏匿，

事竟言功，不負效信，臣某誠惶誠恐，稽首再拜，謹以上啓須報奉行。

姓屬云云

太清云云

太歲云云

地網

第七越地網三過，初一過言左，無上中過右，玄老後太上合手，慈父聖母，解脫羅網，除我死籍，上我生錄。

天羅

釋天羅三過，初在無上中右玄老，後太上對合手，生我者甲子，王文卿師父康，懷我者甲午，衛上卿師，母姐生我活我，事在大道，與父母。

四尊

第八朝四尊，兩手相叉，持向寅上一拜長跪，言甲寅明文章，道父讚厥又縱厥十某爲臣妾，消天下大灾，師言：令有男女生某甲，從臣妾乞丐過度。弟子言：臣妾令從師某乙乞丐，更相過度，共奉行道德，乞丐陰陽和合，生氣布流，臣妾身中，釋神專固，各得無他，次迴向申，上言甲申，扈文長道，母闡捏尤，戎拘，爲臣妾散地

上八方八禍。次向子上言：甲子王文卿，師父可囊夏堂康，爲臣妾消天下大灾。次向午上言：甲午衛上卿，師母姐乃丑切，爲臣妾散地上八方之禍。咒皆如寅上法，一過止。

存思

第九對坐陽寅，上陰申上，求度者以兩膝著外，合手陰却，兩手膝上陽覆，兩手叉掩，各琢齒十二通，思無上炁，正青玄老炁。正黃太上炁，正白三炁，共爲一混沌狀，似鷄子，五色混黃，下詣丹田中。如此一過止。

十神

第十思甲子甲午十神，易先思甲午，衛上卿乙未，杜仲陽丙申，朱伯衆丁酉，臧文公戊戌，范少卿甲子，王文卿乙丑，龍季卿丙寅，張仲卿丁卯，司馬卿戊辰，季楚卿願遣此十神，上詣上三天曹。師言：今有男女生某甲，從臣乞丐過度。弟子言：臣妾今從師某乙乞丐，更相過度，共奉行道德，乞丐陰陽和合，生氣布流，臣妾身中，精神專固，各得無他，當爲甲撤除死籍，著名長生玉曆，過度九厄，

得為後世種民，乙先思甲子至戊辰，次甲午至戊戌。

配甲

第十一配十二尊名言，甲寅明文

章，道父讚厥又縱厥十某，甲申扈文長，道母闡挫尤戎拘，師言：今有男女生某甲，從臣妾乞丐過度。弟子言：臣妾今從師某乙乞

丐，更相過度，共奉行道德乞丐陰陽和合，生炁布流臣妾身中，撤除死籍，著名長生玉曆，過度九厄，得為後世種民，次呼甲子王文卿，師父康，可囊夏堂甲午衛上卿，師母姐乃丑切，次呼乙亥龐明心，道父橐顛託，乙巳唐文卿，道母閻該罷切，次呼乙卯戴公陽，道父契欺制，乙酉孔利公，道母孃慈卒、慈律二切。次呼甲辰孟非卿，道父杵祇藻東實，甲戌展子江，道母媿知御切。次呼乙丑龍季卿，道父挈寧琦男尾，乙未杜仲陽，道母媿。

五神

第十二思五神，太歲神，今月神，本命神行年神，今日神，願遣此五神，上詣三天曹，師言：今有男女生某甲，從臣妾乞丐過度。弟子言：臣妾今從師某乙乞丐，更

相過度，共奉行道德，願為臣妾解除三官考逮，解脫羅網，撤除死籍，著名長生玉曆，過度九厄，乞為後世種民。如此二過止。

八生

第十三解手八生，第一戲龍虎初，

左無上中右玄老後太上，臣今過度男女生某甲，共奉行道德乞丐陰陽生氣共生臣妾，解除三官考逮，解脫羅網，撤除死籍，著名長生玉曆，過度九厄，乞為後世種民。第二轉關初左無上中右玄老後太上，新出老君太清玄元，上三天無極大道。第三龍虎交初左無上中右玄老，後太上老君太上丈人三炁君。第四龍虎校初左無上中右玄老，後太上帝君天帝丈人。第五龍虎推初左無上中右玄老，後太上九老仙都君，九炁丈人等。第六龍虎盪初，取上元左無上中，取上元右玄老後，取上元左無上中，取上元右玄老後，取上元太上太清道君，太清丈人玉陛下。第八揖真人初取上元左無上，

中取上元右玄老後，取上元太上天師嗣師係師女師。

右解中元二十四氣，皆言今有甲乙乞丐過度，共奉行道德乞丐陰陽生氣共生臣妾身，願為臣妾解除三官考逮，解脫羅網，撤除死籍，著名長生玉曆，過度九厄，得為後世種民都畢。

解結食

師為弟子解衣帶結，散髮，告者亦解賢者結。

第十四食生吐死法，男左女右，兩手相叉，俱向王仲兩脚坐頭，以鼻微微納生氣，低頭咽之，俱卧瞑目，以口微微吐死氣，三卧三坐止。

九宮

第十五布九宮法，首午天地相臨，橫畫為乙，縱畫為甲。

☰☷ 第一子九，陽行下元四，陰行五，共呼子九。


☱☲ 第二午九，陽行上元四，陰行五，共呼午九。

☳☶ 第三卯九，陽以左手四指覆橫，掩陰右手五指上，合為九，置東方，

共言卯九。


☳☳ 第四西九，陰仰伸左手五指，陽覆右手四指，橫覆陰指上，置西方，共言酉九。

☰☷ 第五中九，天覆地載，陽思肝心肺脾四藏，陰思肝心脾肺腎五藏，合為九，共言中五九位成。



共言：水流歸末，分八至丑，陽以左足二指，陰以右足五指，又以右手一指併足邊，陽指掩陰足指為八，置丑上，共言：艮八還，作坎一，陰陽共言坎一。又命木落歸本，分六至亥，純陽右足手各三合為六，掩陰左足上，置亥，言乾六還，作震三。陽以左手一指橫掩陰右手二指，合置卯上，令對腰，言震三。又命金剛火強，分一至未，純陰，陽以左手伸二指橫掩陰，手上置西

南，對肩言坤二還作兌七陰，以左手伸四指陽，以右手三指橫掩陰，指上置西，對腰言兌七。又命土至四季分四王已陽，以左手三指陰橫，右手一指置東南，對肩言巽四還，思中宮五藏陽，思肝腎陰，思心肺脾各竊言中宮五，又命火強炎上，自處其鄉，不分位成，又命二四為肩陽，以手共注陰左眉上一，又注右眉上四，又命六八為足陽，以右足注陰，左足上六陽，以左足注陰，右足上八，又命左三右七，陽以左手，陰以右手，共注陰，左腰三，陽以右手，陰以左手，共注陰，左腰七，又命戴九覆一，陽取上元三，陰取上元六，下元陰陽各半，一又命五在中宮，主為腹實，共思五藏陽，腎肝陰，心脾肺以心相摩，五九宮位成。



各言巽，呼天門，從乾得一，便行五，各言乾五，退報五，又行五，各言中退，又行五，各言巽五，退報五，又言艮八，高

舉散三從坤，便行五，各言艮五退報，又行五，各言坤五退報，又言震雷動澤，從兌得二便行五，各言兌五退報，又行五，各言震五退報，又言坎不獨立，從離取四便行五，各言離五退報，又行五，各言坎五退報，又言三五縱橫，齊等如一。四十五氣畢。

度甲首東卯度乙首南午卧

第十六躡紀。第一陽躡紀，下陰左邊卧乙卧，戴右手第二指甲起，以左手第二第三指中間相叉，持乙指，舉左足於前，右足橫後，因舉左足三摩乙心咒曰，中央戊己百節君吏，四時八節千二百官君吏，輔臣過某三橋之下，因舉左足從乙心度乙，右南行西旋北轉，至乙右脅邊十一跡。第一陰躡紀，下陽右邊卧甲卧，戴左手第二指乙起，以右手第二第三指中間相叉，持陽指舉右足於前，左足橫後，因舉右足三摩甲心咒曰，中央戊己百節君吏，四時八節千二百官君吏，輔妾過某三橋之下，因舉右足從甲心度甲，左東行北旋西轉，至甲左脅邊十一跡。第二散步還申，更叉乙指，舉左足於前，右足橫後，因舉左足三摩乙心咒跡如前。第二散步還寅，更叉甲指，舉右足於前，左足橫後，因舉

右足三摩甲心，咒跡如前。第三散步還申，更又乙指，舉左足於前，右足橫後，因舉左足三摩乙心，咒跡如前。陽行繞三周而還陰，左卧陽起秉魁，上行三氣三取三元三咽畢。第三散步還寅，更又甲指舉右足於前，左足橫後，因舉右足三摩甲心咒跡如前。陰行繞三周而還陽，右卧陽起秉魁，上行三氣三取三元三咽畢。甲因起以右手捧崑崙，左手摩泥丸，左迴三過，因將面從左邊下至泥丸，言左無上三取上元，因度右邊，報之三過，又以左手捧崑崙，右手摩泥丸，右迴三過，因將面右邊下至泥丸，言右玄老三取上元，復左邊報之三，又以右手捧崑崙，左手摩泥丸，初左迴次右迴，又左迴合三周，將從面上直下至命門，言太上三取三元，因度右邊報之三即還左，以右手扶崑崙，左手摩左邊中元左乳下，左迴三過，直將下至泥丸，言在左無上，度右報三，又以左手扶崑崙下，右手摩右中元右乳下，右迴三過，直將下至泥丸，言右玄老復還左報三，以右手扶崑崙，左手摩泥丸，左迴次右迴，又左迴合三周，將面上直下

至命門，言太上因度右報三即還左，以右手扶崑崙，左手摩丹田左邊臍下丹田，左迴三過，直下將至命門，言左無上，又度右報三，以左手扶崑崙，右手摩丹田右邊，右迴三過，直下將至命門，言右玄老復還左報三，以右手扶崑崙，左手摩絳官，初左迴，次右迴，又左迴，合三周直下將至丹田，左右迴三下，至命門，言太上，因度右報三。

思三氣

復還左，正偃卧思神，左無上氣，正青右玄老氣，正黃太上氣，正白貫臣妾身，六甲五藏，支干間，左上右下，周而一身，還治臣妾下丹田中，上昇崑崙山。

思一宮

太清玄元青氣，左上右下，繞一宮太素白氣，左上右下，繞一宮太初赤氣，左上右下，繞一宮太始黃氣，左上右下，繞一宮肝氣，正青，左上右下，繞一宮肺氣正白，左上右下，繞一宮心氣正赤，左上右下，繞一宮脾氣正黃，左上右下，繞一宮腎氣正黑，左上右下，

繞一宮一宮者下丹田，中有真人君治其中，存思諸氣，皆圍繞一宮三重。陰右上左下如上法

自導

思氣神都畢甲因以手自導，以左手將左乳邊至足，言左無上三過止，又以右手將右乳邊至足，言右玄老三過止，次以左手將額上直下，下至丹田太上，右手隨之，如此三將三言之便，乘魁起不受三五龍行上，復以右手摩下丹田三便詣生門，以右手開金門，左手挺玉籥注生門上，又以左手扶崑崙，右手摩命門縱橫，三言水東流雲西歸，陰養陽氣微，微玄精滋液，上詣師門，甲又呪神男持關王，女開戶配氣從陰，以氣施我乙咒陰陽施化，萬物滋生，天覆地載，願以氣施臣妾身。

甲乙咒法

第十七甲咒，吾欲乘天綱入地紀，四時五行，各自當真人，不得動搖，持紀綱五氣，自附玄且黃歸吾五藏，自生光，乙咒吾欲偃地承天，合陰陽四時五行，各自當真人，不得動搖，持紀綱五

氣，自附玄且黃歸吾五藏，自生光，甲以左手扶道父，咒曰一君在吾前，二君在吾後，爲吾援除灾害惡逆，一切皆令消滅，注左三言左無上，注右三言右玄老，注上三言中太上，言臣妾有某甲乞巧過度，共奉行道德，乞長生久視，得爲種民，注中央三言，左無上右玄老，太上三氣，共生臣妾身，混沌爲一，名曰桃康，舍止北極，號曰子丹，衣服五色，赤幘大冠，金牀玉榻，五色欄干，珠玉斗帳，正當命門，神男玉女侍兩邊，陽氣左轉，陰氣右旋，上至太清，下至無下，常遊九宮五藏六府之間，領錄羣神，案錄召名，不得逋亡，長在我身，與我俱仙，仰頭鼻三納生氣，三五七九咽陽，言天道行乙，言地道行，便進入生門中，令半首又咒，柳君姐君萬神生，吾欲搖天動地，五君各自諦乙咒，柳君姐君丹田府，吾欲動地搖天，身中五神各自堅徑進淵底，閉口以鼻納生氣，口吐之，三琢齒，言九一生其中，小退還半，首度甲先行始生氣。

支干數

甲子旬生，天始生丙寅，地始生壬申，甲戌旬生，天始生丙子，地始生壬午，甲申旬生，天始生丙戌，地始生壬辰，甲午旬生，天始生丙申，地始生壬寅，甲辰旬生，天始生丙午，地始生壬子，甲寅旬生，天始生丙辰，地始生壬戌，次行三五七九退報，又行二四六八退報，又行五氣退報六咽。度乙先行始生，次二四六八退報，又行三五七九退報，又行三氣退報，取上元氣三咽之。便躡紀下不受三五龍倒

下
第一陰躡紀下陽右邊，卧陽卧戴，左手第二指陰起，以右手第二三指中間相叉持陽指，舉右足於前，左足橫後，因舉右足三摩甲心咒，中黃戊己百節君吏，四時八節千二百官君吏，輔妾過某三橋之下，因舉右足，從甲心度甲，左東行北旋，西轉至甲右脅十一跡。第一陽躡紀下陰左邊，卧陰卧戴，右手第二指陽起，以左手第二三指中間相叉持陰指，舉左足於前，右足橫後，因舉左足三摩乙心咒，中黃戊己百節君吏，四時八節千二百官君吏，輔臣過某三橋之下，因舉左足，從乙心度乙，左南行西旋，北轉至乙左脅令成十

一跡。

第二散步還寅又甲指，舉右足於前，左足橫後，因舉右足三摩甲心咒，度跡如第一。第二散步還申又乙指，舉左足於前，右足橫後，因舉左足三摩乙心咒，度跡如第一。第三散步還寅，悉復如前。第三散步還申，悉復如前。

右過陽三繞周市行三繞市，陰還陽右卧陽起，乘魁上行三炁，取上元三咽畢。右過陰三繞周市行三繞市，陽還陰左卧陽起，乘魁上行三炁，取上元三咽畢。

第一陽躡紀下陰右邊陰卧戴，右手第二指陽起，以左手第二三指中間相叉持陰指舉，左足於前，右足橫後，因舉左足三摩乙心咒曰，中胎真人長三寸二分，填乙絳宮，攝錄生官三萬六千神長守乙體，與乙俱仙，因舉左足從乙心度右，南行西旋北轉，至乙左脅，令成十一跡。第一陰躡紀下陽右邊陽卧戴，左手第二指陰起，以右手第二三指中間相叉持陽指舉，右足於前，左足橫後，因舉右足三摩甲心咒曰，中胎真人長三寸二分，填甲絳宮，攝錄生官三萬六千神長守甲體，與甲俱仙，因舉右足從甲心度左，東行北旋西轉，至甲右脅，令成十一跡。第二散步

還寅更叉甲指，舉右足於前，左足橫後，因舉右足三摩甲心咒跡如第一。第二散步還中更叉乙指，舉左足於前，右足橫後，因舉左足三摩乙心咒跡如第一。第三悉復如第二。

右過陰三繞周帀陽還陰，左卧陽因起，乘魁上行三氣，取上元三咽畢。右過陽三繞周帀陰還陽，右卧陽因起，乘魁上行三氣，取上元三咽畢。甲言天道畢，乙言地道畢，悉三叩齒，各咒曰三五成日月，出窈窕入冥冥真氣，入正氣，通神氣，布道氣，行姦邪鬼賊皆消亡，視我者盲，聽我者聾，敢有謀圖我者反受其殃，便二十四息止小退言太初君令半首咒曰，一君在吾前，二君在吾後，為吾破除灾害惡逆，一切皆絕太陰中，又小退念太素，又退太始君，出朱門便龍倒下陰右邊，以左手扶崑崙，右手摩中元，三言左無上，右玄老太上，三取上元氣，摩下元咒曰，水流歸末，木落歸本，金剛火強，土王四季，因度還左，各正身平卧，叉手過泰清，十二叩齒，三五七九，咽鼻微微納生氣，至三五七九二十四氣都畢。

還神

第十八便思，還諸神陰陽，各以兩手交額上，各思解氣無上氣正青，還臣妾左腎中。三玄老氣正黃還臣妾脾中。二太上氣正白，還臣妾右腎中。五脾氣正黃，右上左下，還臣脾中。四腎氣正黑，右上左下，還臣腎中。陰官左上右下七肺氣正白，右上左下，還臣肺中。六心氣正赤，右上左下還臣心中。九泰始氣正黃，右上左下，還治玉堂宮中。八肝氣正青，右上左下，還臣肝中。十太素氣正白，右上左下，還治長命宮中。太初氣正赤，右上左下，還治絳宮中。太清玄元氣，右上左下，還治臣妾左腎中。太清氣正青，右上左下，還治建高宮中。太素白氣，右上左下，還治臣右腎中。肺為華蓋宮，心為絳宮，肝為紫微宮，膽為長命宮，脾為明堂宮，胃為太倉宮，腎為雙合使者，五城十二樓，常與赤子俱各還吾宮室中。

王氣

第十九各以兩手相摩令熱以摩面及身體，春思肝為紫微宮，其色青，潤

澤有光，青氣從鼻中出，大如九寸面鏡，漸大覆面，一身鬱青。夏思心為絳宮，其色赤，潤澤有光，赤氣從鼻中出，大如八寸面鏡，漸大覆面，一身通赤。秋思肺為華蓋宮，其色白，潤澤有光，白氣從鼻中出，大如六寸面鏡，漸大覆面，一身皓白。冬思腎為雙合使者，其色黑，潤澤有光，黑氣從鼻中出，大如五寸面鏡，漸大覆面，一身黧黑。四季土王思脾，為黃庭宮，其色黃，潤澤有光，黃氣從鼻中出，大如三寸面鏡，漸大覆面，一身薰黃。便以右手自摩兩乳間，又下手三摩左右邊丹田又偏下，手從臍下摩之，無復數竟，叉手過頭，上引氣，從兩足上，兩脛中上至關元中夾脊脊三道上。陰右青左白中黃陽左青右白中黃逕入泥丸中，竟髮標復，引氣還下，陰左青右白中黃陽右青左白中黃從髮本額上兩眉經面，如中下入口鼻喉嚨，經五藏下至兩脚，十指復還，上手如前法，三上三下，還藏下丹田中。

〔嬰〕兒迴

第二十嬰兒迴，陽屈左脚在右脚下，以右

手持左脚大指引之，因右轉陰屈右脚在左腳下，以左手持右脚大指引之，因右迴轉仍以兩腳相距。陽先以右足距陰，左足陰，以右足距陽，左足次又陽，以右足距陰，左足陰，以右足距陽，左足一往一還，竊言左無上，右玄老太上，如此三往三還止。

斷死

陽將膝鵠座，以兩手從額將上至足，以兩手各引足大指坐，又以兩手歷兩膝一過，名斷死路。陰對作因，望元元陽，以兩手將丹田經命門斂還至玉父，以大拇指及手肘厲面上，舉手高頭於下，望玉室，陰卧小舉頭，望元元騰天陽，騰天踏地，蝶翅而下。陽兩手按黄土名曰踏地，自長跪舉手高頭名曰騰天，因下手著後名曰蝶翅而去。陽以左手叉陰，右手俱作龍倒三過。從頭上過，男左迴女右轉，自還相向。次重越地網如上，初言左無上，中言右玄老，後言太上。慈父聖母，解羅脫網，除我死籍，上我生錄，次重釋羅，初左無上，中右玄老，後太上。生我者甲子王文卿，師父康，懷我者甲午衛上卿，師母姐，生我活我，事在大道，與父母。

躡時

躡十二時相叉陽，左足躡寅右，在中。言甲寅道父，十某爲臣妾消四方之災陰，右足躡申左，在中。言甲申道母，留爲臣妾散四方之禍，陽次卯陰次未咒，如初交已亥周寅申，每一周咒曰，生我者師父康，懷我者師母姐，生我活我，事在大道與父母。三周止。

謝生

次謝生相又向寅言，甲寅道父十師言，向有男女生某甲，從臣某乙乞丐過度。弟子言，臣妾從師某乙乞丐更相過度。共奉行道德，蒙恩如願，各得無他，恩惟道父。十某爲臣妾消四方之災，再拜，次乙卯道父契周十二時咒如寅。

言功

次言功俱東向，叉手長跪，鳴鼓十二通。

臣謹啓功曹使者，陰陽神功曹，生炁君將吏，中胎真人，赤白君將吏，黃書契令腹目君將吏，此里域中真官注氣，監察考召諸官君吏，天師嗣師女師三師門下生氣君將吏，陰陽生氣度道君

將吏，九氣丈人逮召君將吏，天地水三官考召君將吏，消災散禍解厄君將吏，臣妾等某惶恐白，臣以頑愚好道樂生，師

言向啓有某郡縣鄉里男生甲乙，從臣妾乞丐過度弟子，言臣妾向從師某乙乞丐更相過度。謹按師法與甲共奉行道德，三五七九之化，陰陽之施，男女更相過度，蒙恩如願，精神專固，兩相含生，各得無他，謹遷陰陽功曹，生氣君將吏兵士，詣上三天曹中宮錄署，分別遷達，如天曹舊儀，無令失意，以宣勞苦，受功事竟，各親所職，保守如故，願令臣等長生久視，過度灾厄，削除死籍，更著生名玉曆，爲後世種民輩中以爲效信，臣甲乙等，誠惶誠恐，稽首再拜以聞。

姓屬云云

泰清云云

太歲云云

次復官言，臣妾所出契令諸官六甲諸神，日行道事，還入中宮，三叩齒咽。願念法三上香，一心願師言，令有男生甲，從臣妾乞丐過度。弟子言，臣妾從師某乙乞丐更相過度。共奉行道德，和合三氣，

乞長生不死，願以是功德，歸流臣妾，身故歸身，歸神歸命大道，臣妾首體投地，自歸三尊，扶是功德，歸流臣妾，身願學道得道，求仙得仙，還年却老，長生無窮，昇入無形，與道合同出靖時咒，一君在吾前，二君在吾後，爲我破除四方之災，皆令執伏，兩手破除而出戶。

言功

上言謹按文書，臣妾以頑愚六蔽，好樂長生之術，真言要語，奉承黃書契令大度之法，要當奉行，輒有某郡縣鄉里，男女甲乙年如干歲，好道樂仙，今月日時，詣臣妾求乞過度，奉行道德，三五七九，二四六八三三之氣，蒙恩如願，精神專固，各得無他，謹承師法，拜章一通，願爲臣妾身中三官考召君吏，黃書契令腹目君將吏，中黃戊己百節君吏，真一君將吏，太和君將吏，天節地節人節，三旄建節，四時八節，五行爲合，三五功曹斗杓君將吏，中胎真人赤白涌白泄君將吏，九氣丈人逮召君將吏，此某郡縣鄉里中用事，主氣諸官君將吏等言功三百等，將吏言功二百

等，兵士言功五十等，上詣中官二宮謁受收錄署使曹隱職各加其秩等數，加常科比無令恚恨者，某有千罪萬過，併蒙赦貫臣妾及某身中，陰陽生氣，通利五藏六府，十二宮室，肌骨堅強，面目潤澤，橫行天下，覆載成就，乞丐爲後世種民，令惡逆絕滅，口舌官符，一切執伏以爲效信，恩惟慈父聖母，分別求哀操過度，謝生言功，中章一通，上詣上三天曹。

上清黃書過度儀

（錢安靖點校）

051 洞真三天秘諱

經名：洞真三天秘諱。撰人不詳，似出於南北朝。係早期天師道修行法訣。一卷。底本出處：《正統道藏》正一部。

凡受三五，先存識三天真名，三師真名，有急灾困病，三聲大喚三天名，密喚三師名，灾病皆消也。

上清微天真名防，
中禹餘天真名元，
下太赤天真名德丘。

右三天真名。

左无上真名森，

右玄老真名众，

中央太上真名龜

右三師真名。

凡知三天三師真名，長生不死，其間存之不恒，行善未備，時有灾厄，步

綱消之，不得行神龜天躡直禹步步星，咒願亦驗，又常應存斗諱台名也，勿忘勿忘。

凡開星圖及步時存思，并晨起夕卧，皆先叩齒九通，陰祝九星，名曰：

第一太星精名玄樞，願某飛仙乘虛駕浮。

第二元星精名北台，願某飛仙遊行洞臺。

第三真星精名九極上真，願某飛仙得治三雲。

第四紐星精名璇根，願某名列為飛仙。

第五綱星精名天平，願某飛仙登行上清。

第六紀星精名命機，願某飛仙名書太微。

第七關星精名玄陽，願某飛仙得使玉童。

第八帝星精名高上玉皇，願某飛仙得登後聖之堂。

第九尊星精名太微帝君，願某飛仙得入丹瑤玉房。
右九咒畢，叩齒九通，行隨意卧有口

中火者，達乎道也。

凡見凶鬼惡人，即存斗星指之，閉氣心祝曰：吾是天目與天相，逐精若雷電，明耀八域，徹知表裏，無物不伏，如此則姦凶萬鬼禍惡衆輩莫敢犯子。

卧斗訣

斗星者，太極之紫蓋，玄真之靈闕，九星之神席，天尊之偃房，學真之士，天尊授之，使其偃息斗中，暮卧存斗星，在所卧席上依圖首九極，使真氣入泥丸，足躡尊帝二星，心念飛仙令，高上拘我七魄，太微制我三魂，左手把北台，右手執璇璣，行之十八年，色反嬰童，九星之精變成九老，俱來迎子，白日登晨。

凡能赴請為人救灾嚴就行出家門外三步，正立叩齒三通，陰喚七星魂魄名，密咒依如步法咒時臨目諦存神星，雖急忿忿亦並行並咒存咒畢，握固勿已，未至所往之家三十步，心存為火燒，所往人家屋舍蕩盡，前進二十五步存腎為水，往殺火，作新屋舍立具，至門扣齒二十通，仍禹步九跡，入門存三

將軍姓名兵衆，周繞身形。

又存五方五星將軍，又存四大七星，華蓋覆頭，徑入死畏，入坐向月建歲王，不便者先向之閉氣，就座得向日時建王，亦善唯勿用破閉，起止出入，常存慎之，坐定咒，咒畢命主人掃洒堂庭，晴則庭中，雨則堂內，施席香火，晝向東，夜向北，盆水置席前，大刀置盆上，計取斗中，加鬼門時主人投辭，拜請道士束帶就座，漱口發爐，捻香口章。

凡惡夢光怪死喪滯病凶人，公私侵凌淫盜，皆用驅除若年初斷絕瘟疫及邪病大癘鍊易，故氣流布祈恩，悉以大盆盛水細沙石子，數斗赤豆隨多少宅大小取足淨物，貯之置鬼門上，六吉日依法施行。甲寅旬，辛酉壬戌凶，餘日皆吉。

事畢坐及餘食卧息便旋出還皆有咒，若有病急不得驅除，至病人前咒，一甌水盛鹽，吩漱散之三過止，仍存神配衣訖，向九星陰咒之，日留不徐冉太陽夫人老君陽太上眼鄒索諾橐頭刺心我八千亦水女母門人可畢見步綱竟下星

冥目視，去地尺許，骨節盡赤，如新生形存，左目爲日，右目爲月，青龍白虎五神備具，頭上七星，足下七星，左手指地，目視北斗，陰喚十五言離羅耀鬱俗神明珠蘇樊光性吞玄茂畢下手變形存兩耳爲玉門髮髮爲衆星，口爲斬邪使者。左手滅亡使者五頭一身，右手伐逆使者五頭一身，以治病摧伏災害。訖，次向真人星稱位姓名，謹啓：

太上老君，太上丈人，天師女師，三師夫人，北斗七星，三五將軍，謹有同義男女姓某，奉法失忠，招灾抱考，因有事者，依源陳之，父母兄弟某疾厄，云云，稽顙詣臣求乞云云。鍛鍊凶邪温毒鬼賊，臣與某義同腹目，不復所見，謹按先師本法奉修，所受願所請者下，所召者到，所厭者伏，所收者擒，所誅者滅，所治者愈，所禳者却，恩唯太上衆尊乞垂恩祐，覆蓋肉人。謹啓。畢，再拜。

凡有官灾疾病、急卒灾厄，初下七星祭，向北仰頭存見斗星，赤光赫然，仍大喚七聲，喚曰北斗某星真諱魁綱府君，如此七遍。某今有某事急切云云，乞丐

救濟須效即爲魁綱七星府君，七星諸官設祭，奉上清酒香餅新果正味，報賞有功，不負信誓，便去勿顧，如願即解，用清酒七勝乾棗栗子七勝沉香十兩，五方香爐各一具，潔壇場之法，夜半時於無人處靜寐爲之施設畢，七聲大喚，請下府君禮七拜跪啓乞。隨願言之，凡七過上酒，願隨意說之。畢，於座食之，令盡法，不得遺分他人。臨時食不盡，埋壇上，忌雞犬見之，若急事厄難困病下大醮，向北三聲大喚喚北斗魁綱府君，左右三部大將軍，唐葛周五方三元將軍，顛倒鉤天擊地斬伐繫逆消灾散禍金鎧金裝大將軍，三將軍力士捕鬼使者三五衆官赤氣吏兵。某今某事云云，乞丐救濟須效奉設醮具，以報勞苦，不負效信，還勿顧如願即解。依後儀式。若有大事卒急下三五厨，向東三聲大喚赤天三五左右大將軍，太上三尊。某今有事云云，乞丐救濟須效即設某厨如干人，言功報賞不負效信，跪真絳五十尺爲綱頭信，次二十尺，亦用四十尺，五丈七丈九丈，極十五丈，隨灾輕重及家貧富量

之，如願即解。

今撰上品十誠之律，可以度人，廣加開化，令入法門，勤奉之者，則得自然之福無爲之道也。十誠者，一者，不得嫉妬勝己，抑絕賢明。二者，不得飲酒放蕩穢亂三宮。三者，不得淫犯他妻，好貪細滑。四者，不得弃薄老病窮賤之人。五者，不得誹謗善人毀攻同學。六者，不得貪積珍寶，弗肯施散。七者，不得殺生祠祀六天鬼神。八者，不得評論經典，以爲虛誕。九者，不得背師恩愛，欺詐新學。十者，平等一心，仁孝一切。此十誠普教十方無極世界，開度一切能奉之者，功書十天，福延九祖，拔出長夜九幽之中，上升南宮，身入光明，因緣不絕，尅得神仙。

諸行並足，當避十惡遠於盲道。十惡者，一者，飲酒淫色貪欲無已。二者，陰賊世間訛謗道士。三者，輕師慢法，傲忽三寶。四者，竊取經書妄宣道要。五者，借換不還，欺誘萬民。六者，殺生貪味，口是心非。七者，不孝背恩違義，犯諸禁忌。八者，誦經忽略，噴

嗔自是。九者，責望人意，瞋恚四輩。十者，臆斷經旨，損益聖典，不信宿命，快情所爲，穢慢四大，不念生道。此十惡之誠不能離身，犯之者身遭衆橫鬼神害命，考楚萬痛恒無一寧，履善遇惡萬向失利，死入地獄，幽閉重檻長夜之中，不睹三光，晝夜流曳，抱銅柱，履刀山，循劍樹，入鑊湯，吞火食炭，五苦備經，長淪九幽，無有生時，縱得解脫，還生六畜之中，不得人道，惡惡相牽，善善相因，罪福之對如日月之垂光，生死之不滅，如影之隨形，緣轉相加，如車之輪，今說是誠，護度天人，明識諦受，勤行勿忘矣。

洞真三天秘諱

（錢安靖點校）

052 無上三天法師說蔭育衆生妙經

經名：無上三天法師說蔭育衆生妙經。撰人不詳，約出於南北朝。假託正一天師張陵傳弟子成法道等。一卷。底本出處：《正統道藏》正一部。

天師曰：善哉善哉，吾見天地轉動，日月變移，星辰失度，劫運將終，饑鬼出世，異災萬端。吾在空中，愍念衆生，欲出此經，乃見萬民饑餓，草萊爲食，多分死者，難可待活。不論貧富之家，倉庫空虛，蠶麥無收，蕎豆不成，有樹無花，有花無子。有三色之鬼，散出人間，食人糧食，使人饑餓而死。窮鬼行諸色病殺人。第一經求遂路被人殺死。第二食葛蔓根腹中脹滿死。第三食肉味病重死。第四往還行不得施。

第五氣力薄弱死。第六國土不安，賊戰鬥死。第七蟲虎食人死。第八覓糧逐路饑死。第九羸瘦死。第十食蔓根不濟死。以至災劫運數之日，風霜折木，鬼兵出世，爲此荒亂。鬼行毒藥殺人，收人，五穀蕩盡，食人糧食，遣人糧米不息，令人饑餓而死。富貴作種不成，死無收拾，倉庫空虛。貧人遭之，噉食草萊，面目烏黃，蔓根亦無，米豆乏絕。人無筋力，已漸瘦損衰微。今故告天下萬民，欲得免災難，請造《蔭育衆生妙經》，闔家大小等，各寫造一本，修設神呪，靈寶清齋，蕩除藥毒之鬼，請出家三洞法師修建善根，設齋禮懺，即濟治萬民。動修一中一宵，家家可須營造此經，歸家供養，即獲康健，氣力丁強，飲食得息，田蠶倍收，五穀成熟，經求亦得稱意。若不信者，魔鬼所侵，身遭災劫。爾時，天師乃說頌曰：

衆生不修善，饑死不生營。葛蔓根不充，米麵何處生。求覓不可得，汝等心不驚。見身受苦辛，安得不經營。

今年小災起，來年大難生。饑鬼在人間，食人糧食盡。鬼出遣人請，朝飽食滿足，轉身便即饑，作聲氣力微，消瘦非人形。欲得免災難，涿家讀此經，見錢三百文，遞家須表慶。凡今爲汝說，讀諸得安寧。不論貧富等，聞者即來聽。

但是在世人，家家讀此經。汝等請法師，家口莫相爭。五穀大豐熟，鬼灾自滅形。不遵天尊教，七祖谷幽冥。見身受辛苦，所作何由成。信邪入地獄，念道得仙名。傳符降此經，救護諸衆生。超度饑大劫，永離饑窮形。

天師言：不但夷夏之家，須普修禳，虔心懺悔，忠君孝親，不殺不盜，廣積善功。至逆魔出世，耗損萬民，及傷五穀不熟，家家饑餓，草萊爲活，不可思議。汝等好好備辦香油米麵於清淨之地，安立道場，依自然齋法禮懺，列戶計口出錢，不以多寡，隨心布施，法師和心等意，勿得爭競。不依經旨，徒費香油盤饌，終不契聖意，無功德力。輾轉困苦，貧窮饑餓，何似各各發心作

功德力。忽遇天尊經傳汝家，須信授，勿得生疑惑。若用金銀贖，還得金銀果報。若用絲絹贖，還得絲絹果報。若用錢財贖，還得錢財果報。若用惡物贖，還得惡物果報。


天師曰：善報善緣，由作善而昭著。惡因惡果，實積惡以嬰纏。吾觀下界衆生，不崇正道，不奉至真，役役貪生，孜孜利欲；善根不種，惡業競爲；淫祀鬼神，耽迷邪教；雖遵厄會，孰免枉亡。吾今以《太上神符蔭育妙經》於庚戌歲十一月下雲臺山中，付崇道三洞弟子，廣勸世人，流傳天下，萬民急修造功德，遲恐不免羅水火疾疫，災難大起，失損性命，明示奉行。說如當州縣鄉邑信敬男女，明監勸誘造此經教。吾當常加擁護此人，延年益壽，災厄消散，運爲和合，四路開通，饒財益寶，富貴不斷。

閩州雲臺山豐饒里中有一道人，年登六十，姓成名法道，以庚戌歲十一月一日平旦往山中尋採藥苗，偶見一真人，身著五色金衣，頭戴圓光，左右

仙人侍從，來下雲臺山中。法道便即向前叩頭頂禮，三十二拜，親見天師。天師語法道曰：汝莫驚怖，吾是正一天師，今親自來下遣汝，傳吾祕言。近以八月九月，乃有新出鬼師，將領饑餓鬼無數，巡歷天下。作者鼠形，入人家中，食人五穀，嚙人家臭味聲唧唧。復作人形，在人門邊，看作食熟，契人飲食，飲人肌血，令人常日羸瘦無力，脚

手痿弱，瘡癩卒死，蟲虎傷死。吾在空中，不忍下觀，故授汝此經，廣傳布與萬民，欲得免災難，及家家平安，飲食豐饒，氣力健壯。來年春秋冬夏，各得田蠶，倍收吉健之家，當爲設靈寶清齋一日一夜，遂家各於庭中造立壇場，依法條禳。吾聞鐘磬聲，即下降，遣左右真人王長、趙昇等，持太上神符，爲汝馘絕一切鬼孽，令汝萬民平安。汝等若不信吾祕言，心生疑惑，意逸僧嗔，不知罪福因緣，堪可哀憫。吾苦告汝等，各發崇道之心，急急寫造妙經，設靈寶清齋，即當安穩。恐有不生信心，吾故叮嚀汝爲吾委曲流布，庶使萬民

永不遭橫夭疫死。今告汝等，符到奉行。



無上天師，神符朱書。主弟子蒙保護，合家大小平善，各得田蠶倍收，五穀成熟，六畜丁壯。收魔斬鬼，急急如律令。

無上三天法師說蔭育衆生妙經

(李剛點校)

053 正一天師告趙昇

口訣

經名：正一天師告趙昇口訣。
撰人不詳，約出於南北朝。假託
正一天師張陵告弟子趙昇。一
卷。底本出處：《正統道藏》正
一部。

天師告趙大夫曰，吾欲告子口訣，不忍言。昇叩頭千下，願見哀憐，賜昇一言。師曰：且止，須明年相告。至壬午年正月七日中時，於雲臺治閉房，昇叩頭千下。師曰：太上有吾，吾有汝，然官契至要，難可具宣，道重理妙，不可妄傳，今九天俱立，使六天出治，隨世分布，三道治正轉亂，不能中正，三五之氣，上三天恚怒，無本父母臨正，使太上老君絕世，更立正一盟威之道，太上開化，不以吾輕賤小人，受吾

真法爲百鬼主者，使開二十四治以應二十四氣，置署職錄，以化邪俗之人，黃老赤籙以修長生，吾言大道永畢。

太上老君前與尹相吾臨孟津河上，告吾天有常運大期行交，先不治三天清遵父母大神，今躬臨正統，理三天上治，使李君下牧萬民，吾欲不就事，上官命嚴，命放六天故氣，三官百鬼，以大兵大病虎狼蛇虺百毒驅除天下，當爾之時，枉暴者衆，銜痛泉壤，善惡不分，莫不可言天而地盈都停，二十四萬人爲種民，先得道神仙者不在其例，聖人前敕三陽比筭，南至大江，北至北濱，東至東夷，西至濛汜，已逆注十萬人名上太玄紫簿，餘十四萬人於三代之中索之，遣十二仙乘飛龍，官從二十四人，十二玉女周旋天下，考校州郡里域，求清貞慈孝忠信朴實之人以充種民，使吾先授職錄化看人情，後授黃老赤籙，分別善人以補種民仙官，周行考求，吾所分別善人以補種民，大期將盡，金馬甲子日既西傾我立不停，德應人主，先爲世相，此甲子爲斷，自此大

簿既定，不須受籍，甲申大水蕩沃穢濁，仙官乘龍日不進寸不見種人，但見佩黃老職治之人與三官百鬼，文墨紛紛，更相毀鄙，濁亂清文，多佩籙職，自稱真人，賣術自榮，妖惑愚人，貪尺帛十錢斗米聚斂，人物求目下之安，不顧大命將至三官條狀，受贓賄不恥，名曰劫盜之物，信義不送，亦同其罪，中犯不正，名曰奸淫，三官皆錄爲奸盜，身入三塗，名編黑籍，太玄紫簿，未得一人，吾親在事尚復如此，後世當以黃赤相傳以爲常事，不可分別，太上憐愍百姓，愛念善人，甚若赤子，且上期急促太上求申，至壬辰癸巳爲料種民應備事急，今出太玄九光，萬稱生符，以簡料真一，甄別種人，太上敕十二仙官遊行天下，見有佩吾萬稱九光符者，便以種民定數注上太玄玉籙，壹無所復，問至太平之時，聖君自當簡料隨德，分敕天下億鬼兵將百毒，皆衛護種人，使至太平之世，舉家完全，如有毀傷，檢校所得即斬，今三災之世交爭方興，太平在金馬之末，年歲尚爾，世非賢人所

處，吾不忍先經土戶白日昇天，當須神丹，便與昇長避世隱居，採精石髓玉瑰羅珠鳳腦芝英，奇異絕殊，隨四時能合千日丹成，各服刀圭，身變五色，毛羽立生，體融金光，太上遣仙官乘鶴鹿來迎，昇天翠羽登騎輕翔英稚二生，攀龍俱舉，趙昇侍從，俱至無極之崖，青雲之中，躍龍踟躕，徘徊天路，顧呼趙生，吾今即位，衆事敬積料生別死，大運期近，不得中還，以太平爲期，汝且還料理治中，普告清信男女諸弟子，忠貞者大運已促勤，以忠信爲務，勿貪財色，夫天生萬物皆有終始。

老子隨時改易，皆應大運，人生滿百二十，要當還土戶，十鍊九轉，名上太玄紫簿者，命終亦經土戶，魂魄即登紫府，侍衛聖君，須至太平之世，魂精還其故形，白骨更起，血氣更流，始經宿昔之間，暮卧朝起，化示世情，當斯之時，明此符真雖受職，治黃老大要紫黃金剛，不見九光萬稱之符，不免三官驅除，死沒黃泉，不得過土戶，骨肉灰腐，魂魄付三官拷楚，荼毒難言，不欲

尸解者，當合神丹，故須九光萬稱生符，不得此符不得名上太玄生簿，此符如天子有玉璽，三公有黃鉞，諸侯有印綬，若有清賢志士死者，生時未見此符，追授死人，至太平之世，死尸更生，與聖君同出吾說，此符口不忍言不忍以付弟子，非世所見，得吾此符，但當修行潔己，慈孝忠貞，精誠自守，信真任道，考官日日門至戶達，視看人心，若有厄急，懸命漏刻，但正心向道，把九光萬稱符至尊救度人也，此際會之恩，聖君屈節，日近所稟，未至聖君垂出，不復經土戶，自然得壽萬八千歲，但聖君當簡料其中各有所在爾，其是壬辰癸巳前得吾九光萬稱符者，皆在種人之例，壬辰癸巳後受符無復及也，衆官集紫府仙官還天曹，復不得受人也，此是聖人心口中祕言，祕符平常不忍出也，今事促不得不空囊傾心也，遣侍郎一人度世，玉女一人隨此符，不慈不孝不忠不貞不誠不信之人脫得見吾此符，侍郎玉女迷塞其心，不使得受，應合之人，神開其心趣，得見勤苦求

請，三一有百人，萬稱九光有一人，三一有千人，萬稱九光有十人。爾形影天下衆靈，共祕此符，故使希見，世間不明吾言，子看後世萬人受道者，約無一人得佩此符者，今以付子，是吾極耳，子勅後人推擇忠良清貞一心者，依科盟授千金勿示也，三十年吾遣人迎汝，趙昇稽首再拜，銜命奉辭。

正一天師告趙昇口訣

（錢安靖點校）

054 太上正一咒鬼經

經名：太上正一咒鬼經。撰人不詳，似出於南北朝。假託正一真人張陵告諸祭酒弟子。一卷。底本出處：《正統道藏》正一部。

天師曰，太上大君，天之尊神，左監祭酒，天之真人，左從百二十蛟龍，右從百二十猛虎，前導百二十朱雀，後從百二十玄武，頭上有五彩華蓋，足履魁罡，素男玉女，衣服元炁玄炁玄黃，周旋而遊生門，晝夜與日月同光，下統地祇，上應北辰，自有力士童男童女數千萬人，齎持刀劍，所礙者穿，皆乘天鹿鳳凰麒麟，窮奇辟邪，數百為羣，騰蛇猛獸，九萬九千，皆能飛行，出入無間，噉食百鬼數千萬人衆精，百邪不得妄前，天師神咒，急急如律令。

天師曰，太和玄老，乘青雲紫輦，

華蓋玉女車輪，水精為輿，金銀為廂，

驂駕九龍，光照諸天，絳紫毛裘，混混沌沌，晃晃昱昱，震動驚人，但求百官江河大神，龍王鬼帥，藏在雲間，叩頭搏頰，求自披陳，不聽理訴，收付獄君，銅枷鐵鎖，鉗其喉咽，衆邪惶怖，不敢妄前，勅辦行厨，賜吾真神，吾今當出召神君，久藏不見十億年，但捕血祀諸姦神，殄窮天下剋異民，祆言妄語，自為神，訾毀道炁始妬賢，皆是妖惑蟲道神，但行邪偽別正真，天師銜命化善人，蟒蛇之鎧兼欲前，邪逆妄害鐵鎖連，捉頭三斬烹汝身，窮奇辟邪縱橫吞，比至神祀盡根元，家親丈人但莫前，授吾神咒爾莫前，勅急急如律令。

天師曰，吾為天地除萬殃，變身人間作鬼王，身長丈六頭面方，銅牙鐵齒銜鋒鏑，手持磨磨戴鑊湯，動雷發電迴天光，星辰失度月慘黃，顛風泄地日收光，草木焦枯樹摧藏，崩山裂石斷河梁，車載鐵鎖梏銀鐺，一月三榜六咒章，募求百鬼勤豪強，得便斬殺除凶殃，吾持神咒誰敢當，急去千里勿當

殃，急急如律令。

天師曰，吾上太山謁見黃老君，教吾殺鬼語，我神才上呼玉女，收捕非殃登天，左契佩帶印章，頭戴華蓋，足躡魁罡，左扶六甲，右扶六丁，前有黃神，後有越章，神師誅伐，不避豪強，先殺邪神，後滅遊光，何神敢前，何鬼敢當，縛汝置水，煮汝鑊湯，三日一笞，五日一榜，門丞捉縛，玉女拷掠，吾吏受辭，竈君上章，某甲無罪過，不得病賢良，吾含天地炁咒，毒殺鬼方咒，金金自銷，咒木木自折，咒水水自竭，咒火火自滅，咒山山自崩，咒石石自裂，咒神神自縛，咒鬼鬼自殺，咒禱禱自斷，咒癰癰自決，咒毒毒自散，咒詛詛自滅，天師神呪至，不得相違戾，急去千里，急急如律令。

天師曰，吾為天地師，驅逐如風雨，左手執青龍，右手據白虎，胸前有朱雀，背上有玄武，頭上有仙人，足下有玉女，手中三將軍，十指為司馬，功曹令束縛，送到魁罡下，徘徊三台間，五星皆捉把，浮遊華蓋宮，徑過閭闔

下，勅誥太山府，並及行使者，收捕姦邪鬼，祿魅耗亂者，及時誅邪僞，露尸於道左，御史上天曹，今以奏得下，天師神咒至，急急如律令。

謁請素車白馬君五人，兵士十萬人，主收某家宅中三丘五墓之鬼。

謁請運烝君五人，兵士十萬人，主收某家宅中百二十刑殺之鬼。

謁請都曹正君五人，兵士十萬人，主收某家宅中衆精百邪之鬼。

謁請考召君五人，兵士十萬人，主收某家宅中下官故烝之鬼。

謁請守宅神君五人，兵士十萬人，主收某家宅中辟邪盜賊之鬼。

謁請廣司君五人，兵士十萬人，主收某家宅中十二月建破殺之鬼。

謁請北城語命謀議君五人，兵士十萬人，主收某家宅中北時建王之鬼。

謁請刺史從事千二百人，各官將五人，兵士十萬人，主收某家宅中五方瘟疫烝剔人之鬼。

謁請無上太和君五人，兵士十萬人，主收某家宅中百二十祿魅邪道之

鬼。

天師曰，欲行道法，欲治身修行，欲救療病苦，欲求年命延長，欲求過度灾厄，欲求白日昇天，欲求宅舍安穩，欲求田蠶如意，欲求販賣得利，欲求奴婢成行，欲求仕宦高遷，欲求訟詞理訴，欲求男女命長，欲求保宜子孫，欲求婦女安胎，今爲別請十部都曹，正烝中即，刺史從事，素車白馬君，北城詔命君，天上督逆君，廣司君，太玄老君，太和之烝一千二百人，各將軍五人，屯住某家中庭，兵刃外向，監察内外下官故烝，血食之鬼，祿惑之神，衆精百邪，千鬼萬神虜屍，土精土毒，造功立宅，架屋立柱，築治園墟，修營家宅，破壞舍屋，移轉井竈，動促門戶，補治籬落，縛束壁帳，穿井掘窖，填補塞孔，高下之功，立成之功，破殺之烝，悉以斬殺之，并收某家宅中五殘六賊，十二祿惑，男女非殄，先代咎殃，及咒殺虜屍，破邪故烝，留殃妖魅，寄鬼始妬，五虛六耗，十二注詛，野道夢寤，顛倒縣官，口舌背自，消滅中宗外親，前亡後死，男

女復連，無辜之鬼，客死之鬼，兵死之鬼，星死之鬼，注死之鬼，前死之鬼，後死之鬼，應時咒殺之鬼，及諸百怪梟鳥，鴟鵂百鳥妄鳴，狗嗥作怪，血光金光，火光水光，木光衣光髮光，舍宅門戶開閉音聲之怪，甌叫釜鳴金鐵之精，天蜂青蠅蟲蛇野獸狐狸六畜五毒之烝，藏在宅中不肯去者，伏惟太上勅下天曹，應咒斬殺之，如玄都鬼律不得相于奉天師神咒，急急如律令。

臣重啓太上大道君，太上老君，太上丈人，天師嗣師系師等三師文書事門下君將吏兵，六質六直六端六愆二十四君等，臣某稽首再拜上言，今世微薄，運劫欲盡，人民凶逆，相習來久，外陽爲善，內懷豺狼，但欲作惡，不念行慈，背面異辭，共相規圖，萬人之中，無有一人欲求生道者乎，心懷惡行，始妬異端，俱作死事，淫泆好色，馳務榮祿，輕孤易貧，強弱相凌，君臣相伐，父子相言，兄弟相殺，母女相罵，婦姑相怕，夫婦相圖，骨肉相食，不避親疎，是以道烝不覆，故放天灾於九州之内，白骨千

里，雖好者，百不遺一，如此之人，自爲剛強，抄賣婦女以爲嬖妾，上有五六，下有三四，車馬衣裘，富貴奢泰，任情恣意，無所窮之，維行鳴趨，不避老少，但行祆惑，責領奸師，更相厭固，或錄人形像，召人名諱，長付社竈，波也泉水，無不痛處，香美齋餅，求於司命，欲令男女，憎他愛己，迴心附影，以爲歡悅，隨時祭祀，遂成野道，雖利目前，殃考在後，食人兒女，盡以及身，破門滅戶，殃及後代，如此祆惑，不可常事。臣以奸惡，故列表上奏，歸命太上三天道主，惟願太上勅下天曹，請下吏兵六甲將軍六丁之神，依咒斬殺野道之氣，誅邪滅僞，太上之制，煞鬼生民，大道正法，割給吏兵，如臣所上，佐臣討伐，立時消滅，如玄都鬼律，急急如律令。

天師曰今日甲貫野道脅，今日乙斷野道髮，今日丙斷野道影，今日丁斷野道形，今日戊斷野道手，今日巳斷野道脾，今日庚斷野道肝，今日辛斷野道肺，今日壬斷野道心，今日癸斷野道尾，斬野道死，天野道三，地野道五，非

主人家親不得住，吾持神咒速出，去江海中，有窮奇共避邪，將咸池食野道肉，噉野道皮，汝不急去死，乃至天帥神咒，急急如律令。

天師曰，今日六乙，野道急出，六丙六丁，野道自刑，六戊六己，野道不起，六庚六辛，野道不神，六壬六癸，野道自死，六甲將軍六丁之神斬殺野道，不得近人，天師神咒，急急如律令。

天師曰今日寅申，野道不神，今日卯酉，野道不壽，今日辰戌，野道急出，今日未丑，野道不久，天師神咒，急急如律令。

天師曰五寅五卯斬殺野道，五辰五巳斬殺野道妻子，五午五未斬殺野道祆魅精祟，五申五酉斬殺野道父母，五戌五亥斬殺野道付海，五子五丑斬殺野道頭首，天師神咒，急急如律令。

天師曰，今日甲辰，野道不神，今日甲戌，野道悉出，今日乙庚，野道不行，今日丙辛，野道殺身，今日丁壬，破野道心，今日戊癸，殺野道死，今日甲巳，殺野道棄市，天師神咒，急急如律

令。

天師曰，東方野道青龍蛟，南方野道炎火耀，西方野道白虎嘯，北方野道玄武尾掉，中央野道黃帝飲汝血，血出毒出矣，吾知汝姓名，北海大神謂銜狄，身長三丈，頭長三尺，黃金爲牙齒如曲鑿，面廣三尺，額頸正白，朝食三千，暮噉八百，野道不盡，見推求索，天師神咒，急急如律令。

太上運炁解厄君百萬人，無上太中君三千六百人，無上九帝君三十一萬人，無上太和君官將，九宮十二營衛諸天虛空，大小一切百姓，有病苦者告諸弟子大一太玄元始炁三十萬億諸國祭酒，今牒中國諸姓字，依名殺之，若有居諸山鬼林鬼，草鬼木鬼，塚鬼墓鬼，家鬼他鬼，水邊鬼道傍鬼，中鬼外鬼，飲食鬼卧時鬼，青赤黃白黑五色鬼，有長鬼短鬼，大地小鬼，廣狡鬼夢寐鬼，朝起鬼夜行鬼，步行鬼飛行鬼，問人鬼呼喚人鬼，傷人鬼，嗔恚鬼，急疾鬼行病放毒鬼，五瘟鬼別人鬼，有急咒之，

鬼自摧滅。

正一真人告諸祭酒弟子，若能受吾是經，有急頭痛目眩寒熱不調，常讀此經，魔魅破碎，不敢當吾咒也，若有官獄水火之災，亦讀此經，宅中有鬼亦讀此經，元君諱字當讀是經，有諸高大廣長鬼神苦撓天下，暴酷百姓，鬼神行病，鬼神行疫，鬼神行炁。鬼神有外殍鬼，思想鬼，癡殘鬼，魍魎鬼，熒惑鬼，遊逸鎮鬼，厭咒鬼，伏屍鬼，疰死鬼，淫死鬼，老死鬼，宮舍鬼，停傳鬼，軍營鬼，獄死鬼，市死鬼，驚人鬼，木死鬼，火死鬼，水死鬼，客死鬼，未葬鬼，道路鬼，兵死鬼，星死鬼，血死鬼，逋禱鬼，斬死鬼，絞死鬼，逢忤鬼，自刺鬼，恐人鬼，強死鬼，兩頭鬼，騎乘鬼，車駕鬼，山鬼，神鬼，土鬼，山頭鬼，水中鬼，據梁鬼，道中鬼，羌胡鬼，蠻夷鬼，忌誕鬼，蟲獠鬼，精神鬼，百蟲鬼，井竈池澤鬼，萬道鬼，遮藏鬼，不神鬼，詐稱鬼。一切大小百精諸鬼，皆不得耗病某家男女之身，鬼不隨咒，各頭破作十分，身首糜碎。當誦是經，咒鬼名字，病即除

差，所向皆通。此經功德，聖力難量，於是諸祭酒眾等，仰歎靈文，欽承法訓，志願奉持，稽首而退。

太上正一咒鬼經

（錢安靖點校）

055 三天內解經

經名：三天內解經。南朝劉宋天師道士徐氏撰。二卷。底本出處：《正統道藏》正一部。

三天內解經卷上

三天弟子徐氏撰

夫人生體，上稟乎天，下象乎地。

日月則有幽明之分，寒暑則有生殺之氣，雷電則有出入之期，風雨則有動靜之節，人則有賢愚之質、善惡之性、剛柔之氣、壽夭之命、貴賤之位、尊卑之序、吉凶之證、窮達之期。天地無人則不立，人無天地則不生。天地無人，譬如人腹中無神，形則不立。有神無形，神則無主。故立之者天，行之者道。人性命神同，混而為一，故天地人三才成德，為萬物之宗。天不可不養生，地

不可不長物，人不可不攝氣而養生也。故天違玄元則有勃蝕之變，地乖黃裳而有風震之災，人背至道故有凋零之傷。精氣浮於上而衆精流於下，上下相貫，影響相由。人事錯亂於下，則災應滅筭在上，則日月勃蝕，星辰倒錯，皆由人事不正，以致斯變。今下古民人，年命夭橫，尸骨狼藉，不終年壽，皆由所修失本，婚姻非類，混氣亂濁，信邪廢真，本道乖錯，群愚紛紜，莫知禍之所由。或烹殺六畜，禱請虛無，謠歌鼓舞，酒肉是求。求生反死，邪道使然。頭癢搔足，事不相由。祈請乖越，以致滅軀，天此年命，誠可痛哉。今撰集《三天要解》以示未悟。可謹而祕之，勿妄輕傳。傳非其人，殃流子孫。道源本起，出於無先，溟滓鴻濛，無有所因，虛生自然，變化生成。道德丈人者，生於元氣之先，是道中之尊，故為道德丈人也。因此而有太清玄元無上三天無極大道、太上老君、太上丈人、天帝君、九老仙都君、九氣丈人等，百千萬重道氣，千二百官君，太清玉陛

下。今世人上章書太清，正謂此諸天真也。從此之後，幽冥之中，生乎空洞。空洞之中，生乎太無。太無變化玄氣、元氣、始氣，三氣混沌相因，而化生玄妙玉女。玉女生後，混氣凝結，化生老子，從玄妙玉女左腋而生，生而白首，故號為老子。老子者，老君也。變化成氣，天地人物，故輪轉而化生，鍊其形氣。老君布散玄元始氣，清濁不分，混沌狀如雞子中黃，因而分散，玄氣清淳，上昇為天；始氣濃濁，凝下為地；元氣輕微，通流為水。日月星辰於此列布。老君因冲和氣化為九國，置九人，三男六女。至伏羲女媧時，各作姓名，因出三道，以教天民。中國陽氣純正，使奉無為大道。外胡國八十一域，陰氣強盛，使奉佛道，禁誡甚嚴，以抑陰氣。楚越陰陽氣薄，使奉清約大道。此時六天治興，三道教行，老子帝帝出為國師。伏羲時號為鬱華子，祝融時號為廣壽子，神農時號為大成子，黃帝時號為廣成子，顓頊時號為赤精子，帝嚳時號為錄圖子，帝堯時再

出，號務成子，帝舜時號尹壽子，夏禹時號爲真行子，殷湯時號錫則子。變化無常，或姓李名弘，字九陽；或名聃，字伯陽；或名中，字伯光；或名重，字子文；或名宅，字伯長；或名元，字伯始；或名顯，字元生；或名德，字伯文。或一日九變，或二十四變，千變萬化，隨世沈浮，不可勝載。至殷武丁時，又反胎於李母。在胎中誦經八十一年，剖左腋而生，生而白首，又號爲老子。今世人有三台經者，是老子於胎中所誦者也。反胎於李母者，自以空虛身化作李母之形，還以自胞，非實有李母也。世人不知，謂老子託胎於李母，其實不然也。至周幽王時，老子知周祚當衰，被髮佯狂，辭周而去。至關，乘青牛車與尹喜相遇，授喜上下中經一卷，五千文二卷，合三卷。尹喜受此書，其道得成。道眼見西國胡人強梁難化，因與尹喜共西入蜀賓國，神變彌加大人，化伏胡王，爲作佛經六千四萬言。王舉國皆共奉事。此國去漢國四萬里。蜀賓國土並

順從大法。老子又西入天竺國，去蜀賓國又四萬里。國王妃名清妙，晝寢，老子遂令尹喜乘白象化爲黃雀，飛入清妙口中，狀如流星。後年四月八日，剖右脅而生，墮地而行七步，舉右手指天而吟：天上天下，唯我爲尊。三界皆苦，何可樂焉。生便精苦，即爲佛身。佛道於此而更興焉。下古僭薄，妖惡轉興，酌祭巫鬼，真僞不分。太上於瑯琊以《太平道經》付于吉、蜀郡李微等，使助六天檢正邪氣。微等復不能使六天氣正，反至漢世群邪滋盛，六天氣勃，三道交錯，癘氣縱橫，醫巫滋彰，皆棄真從僞，絃歌鼓舞，烹殺六畜，酌祭邪鬼，天民夭橫，暴死狼藉。太上遣真人及王方平、東方朔，欲輔助漢世，使遊觀漢國，看視人情。漢帝不信，以爲妖惑。是故漢室衰破，王莽執治。劉氏漢帝乃是龍精之子，大聖遺體，應傳二十四君，四百餘年。帝胤難絕，故令光武中興。其間中絕帝業者，皆由不信真正，無有輔翼，故群妖亂作，沒於鬼官。自天地開闢，乃有邊夷

羌、蠻、戎、狄，爲中國之籬落，婚姻嫁娶，各正其類，奉事至道，各專其真，不使雜錯。自從漢光武之後，世俗漸衰，人鬼交錯。光武之子漢明帝者，自言夢見大人，長一丈餘，體作金色。群臣解夢，言是佛真，而遣人入西國，寫取佛經，因作佛圖塔寺，遂布流中國。三道交錯，於是人民雜亂，中外相混，各有攸尚。或信邪廢真，禱祠鬼神，人事越錯於下，天氣勃亂在上，致天氣混濁，人民失其本真。太上以漢順帝時選擇中使，平正六天之治，分別真僞，顯明上三天之氣。以漢安元年壬午歲五月一日，老君於蜀郡渠亭山石室中，與道士張道陵將詣崑崙大治，新出太上。太上謂世人不畏真正而畏邪鬼，因自號爲新出老君。即拜張爲太玄都正一平氣三天之師，付張正一明威之道，新出老君之制，罷廢六天三道時事，平正三天，洗除浮華，納朴還真，承受太上真經。制科律積一十六年，到永壽三年歲在丁酉，與漢帝朝臣以白馬血爲盟，丹書鐵券爲信，與天地水三

官、太歲將軍共約：永用三天正法，不得禁固天民。民不妄淫祀他鬼神，使鬼不飲食，師不受錢，不得淫盜，治病療疾，不得飲酒食肉。民人唯聽五臘吉日祠家親宗祖父母，二月八月祠祀社竈。自非三天正法，諸天真道，皆爲故氣。疾病者，但令從年七歲有識以來，首謝所犯罪過，立諸跪儀章符，救療久病困疾，醫所不能治者，歸首則差。立二十四治，置男女官祭酒，統領三天正法，化民受戶，以五斗米爲信。化民百日，萬戶人來如雲。制作科條章文萬通，付子孫傳世爲國師。法事悉定，人鬼安帖，張遂白日昇天，親受天師之任也。天師之子張衡、孫張魯夫婦，俱尸解昇天，故有三師并夫人。自從三師昇度之後，雜治祭酒，傳授道法。受者皆應跪受經書，還則拜送，使必是三天正法。人多不爾者，趣得一卷經書，便言是道經，更相傳付，或是六天故事，致有錯亂。承用彌久，至今難可分別。天師受太上正一盟威之道、三天正法，付子孫傳爲國師，謂當

終於無窮，豈有雜錯。從來未幾，而今六天故事漸漸雜錯。師胤微弱，百姓雜治，祭酒互奉異法，皆言是真正，將多謬哉。今有奉五斗米道者，又有奉無爲旛花之道及佛道，此皆是六天故事，悉已被廢。又有奉清水道者，亦非正法。云天師有奴，不知書注，難以文化。天師應當昇天，愍其敬心，勅一井水，給其使用，治病療疾，不應雜用澡洗、飲食。承此井水治病，無不愈者，手下立效。奴後歸形太陰，井水枯竭。天師以此水給奴身，後人不解，遂相承奉事者，自謂清水之道。其清明求願之日，無有道屋、厨覆、章符、儀，惟向一瓮清水而燒香禮拜，謂道在水中。此皆不然也。自奉道不操五斗米者，便非三天正一盟威之道也。五斗米正以奉五帝，知民欲奉道之心。聖人與氣合，終始無窮，故聖人不死。世人與米合命，人無米穀，則應餓死。以其所珍，奉上幽冥，非欲須此米也。漢高帝是龍精之子，起於泗水亭吏，而徑登帝業。至文帝時，老子降於河之上，因號

爲河上公。文帝命駕，往問道焉。老子授以《道德五千言》上下篇而去。漢武帝欲學上道飛仙之法，太上又遣東方朔輔助漢治。武帝又不知朔是真人而爲吏民，令不異於凡人。西王母、上元夫人皆輪駕降於武帝，欲成其道。武帝不能開悟，仰感靈澤，棄蕩穢濁，而貪世榮，殺伐不止，三官有血罪相牽，被髮告冤，稱訴鬼官，又情欲不絕，道遂不成，歸形太陰。至光武時與王莽爭治，有黃河之難，命危絲髮。太上立化以助光武。六月盛暑，使河水生冰，得度軍馬，以濟其難。漢祚天授應圖，甘露降庭，真人駕御，神鳳來儀，日迴影再，中三足鳥、九尾狐，靈瑞曷煥，衆聖輔翼，正道助之。自光武之後，漢世漸衰，太上愍之，故取張良玄孫道陵顯明道氣，以助漢世，使作洛北邙山，立大法，帝王公臣以下，莫不歸宗。當此之時，正氣遐布。漢世前後帝王，凡四百二十五年之中，百姓民人得道者甚多。漢室驕豪怠慢，不能昇玄，故民人得之。天師三世夫妻，六人爲三師

之任。茅君兄弟三人爲司命之任。自王長、趙昇散仙之徒，乃有百數，非可悉名。劉氏之胤，有道之體，絕而更續，天授應圖，中嶽靈瑞，二十二壁，黃金一餅，以證本姓。九尾狐至，靈寶出世，甘露降庭，三角牛到，六鍾靈形，巨獸雙象，來儀人中，而食房廟之祇，一皆罷廢。治正以道，蕩除故氣，此豈非太上之信乎？宋帝劉氏是漢之苗胄，恒使與道結緣。宋國有道多矣。漢時已有前謨，學士不可不勤之哉。蓋三道同根而異支者，無爲大道、清約大道、佛道，此三道同是太上老君之法，而教化不同，大歸於真道。老子主生化，釋迦主死化。故老子剖左腋而生，主左，左爲陽氣，主青宮生錄。釋迦剖右腋而生，主右，右爲陰氣，主黑簿死錄。是以老子、釋迦教化，左右法異。左化則隨左宮生氣，使舉形飛仙。右化則隨右宮死氣，使滅度更生。法服悉黑，使着黑衣以法陰氣，入於黑簿也。太上作此三道教化，法雖殊塗，終歸道真，無有異也。但人受元氣以得

成形，方復經壞，受陰化輪轉，自爲難耳。右化雖不及左宮速易，輪轉歸真，亦爲善乎。所以言右不如左者，《經》言：真道好生而惡殺。長生者，道也，死壞者，非道也。死王乃不如生鼠。故聖人教化，使民慈心於衆生，生可貴也。夫有心者，可熟案《五千文》。此經皆使守道長存，不有生死。道之宗本，在乎斯經也。

三天內解經卷上

三天內解經卷下

三天弟子徐氏撰

老子教化，唯使守其根，固其本。人皆由道氣而生，失道氣則死。故使思真念道，堅固根本，不失其源，則可長生不死。《經》云：百尺之臺，事由下基。正此之謂也。道氣至微，不可得見，不可得聞，迎之無前，追之無後，包含六合，覆載天地，德尊上皇，功高二儀。神明之君，敬之則有福，慢之則有凶。故不可得而臣也。福者亦非道祐之使得福，凶者亦非道伐之使得凶，唯道無親，適人所爲，善惡之報，應之若響。爲凶則凶，爲吉則吉，隨人所行耳。道若有親疏，可得彼此者，得道之人，則應以道上其父母，遺其妻子，奉獻其君。不能得如此者，則道在己身，不由他人。道者，無也。一切之物皆從無生，有者則以無爲本。《經》云：無者，不知誰之子，強字之曰道。有者終則歸無。能察無者，則忘其身。忘

身者，一切之物都盡忘之。忘之者，是不愛物。既不愛物，唯無是愛。無以養見，不以身爲身。悠悠吾子，處有無之間，不有憂患也。所謂形無形，色無色，味無味，聲無聲，道常在無，人不知。故老君《經》云：吾所以有大患者，爲吾有身。及吾無身，吾有何患。此之謂也，深哉畢矣。是知古始，還朴反真，復上古之始無，則與道合同。有形而無體，故真人能存能亡，承虛而行，日中無影，皆是無身。身與無合，故無有體影也。故《經》云：學道有家、有身、有心。有此三者，則貪欲不滅，妬害不除，神真高遊，思念無感，衆魔不伏，可謂有有，竟不有無，無無不容，恬然無爲，不有辭辯，似頑似鄙，不生不死，無有復反，此之妙哉，深也畢矣。夫爲學道，莫先乎齋。外則不染塵垢，內則五藏清虛，降真致神，與道合居。能修長齋者，則合道真，不犯禁戒也。故天師遺教：爲學不修齋直，冥冥如夜行不持火燭。此齋直應是學道之首。夫欲啓靈告冥，建立齋直者，

宜先散齋。必使宿食臭腥消除，肌體清潔，無有玷穢，然後可得入齋。不爾，徒加洗沐，臭穢在肌膚之內，湯水亦不能除。自天臺公家祠祀靈廟，猶尚先加散齋，而况真道求靈降者乎。余每見今世俗祭酒，所佩符籙極多，朝禮拜數甚少。自謂我是大道之士，已成真人，不畏殄穢。又附《經》言：真道無所畏忌，入火不灼，入水不寒，入殄不穢，入兵不傷，謂已得道真，亦可笑者哉。夫不畏殄者，亦非所佩符籙多而能攘却殄穢，但以一身內外真實，內無邪念，神真充實；外無正事，玷之不汙，如此可得不畏大殄耳。譬如朴石，體質自虛，泥土染之，則玷汙難脫。玉璧真實，穢不能染。真與不真，履殄之宜，正如此耳。學有數品，大乘之學，當怡心恬寂，思真注玄，外若空虛，內若金城，香以通氣，口以忘言，慈心衆生，先念度人，後自度身，悉在昇仙，不念財錢，迴心禮謝，不勞身神，求真於內，然後通玄，念與道合，自無多陳，可謂呼吸六合，歷覽未聞。夫小乘之

學，其則不然。唯以多辭爲善，多事爲勤，頭頰相叩，損傷身神，口辭爭競，內思不專，三指撮香，所陳億千，則求神仙度世，飛行上清；又欲仕宦高遷，五馬同轅；又欲世世昌熾，千子萬孫，又欲錢財豐積，奴婢成行；又欲延年度厄，大小休康；又欲治生估作，萬道開通；又欲心開意悟，耳目聰明；又欲使百鬼遠逃，疫不過門；又欲父慈子孝，夫愛婦貞；又欲徹視萬里，洞見天源；又欲使遺財於念，朋友歡欣；又欲思真念道，玉女降房。所求者多，尚者煩，不合老子守一之源。口則疲於所請之辭，形則弊於屈折之苦，心則困於多欲，神則勞於往來。《經》云：久勞傷神，久語傷氣，久行傷筋，久視傷眼，負重傷骨，食多致病，慮事傷命，不合修身養性之法。可謂多則惑，少則得，此之謂也。小乘之學，叩齒冥而求靈應，此自是教化之道，使人修善除罪改過，非是治身延年益壽求飛昇之法，故曰小乘之學也。夫沙門道人，小乘學者則靜坐而自數其氣，滿十更始，

從年竟歲，不暫時忘之。佛法不使存思身神，故數氣爲務，以斷外想。道士大乘學者，則常思身中真神形象，衣服綵色，導引往來，如對神君，無暫時有輟，則外想不入，神真來降，心無多事。小乘學者，則有百事相牽，或有憂愁萬慮，外念所纏。大乘、小乘，其路不同，了不相似也。小乘學則須辯口辭，可爲世師。大乘之學受氣守一，寶爲身資。《經》云：善計者不用籌筭，所營在一。能知所營在一者，則萬事畢，故不須籌筭也。

三天內解經卷下

（尹志華點校）

056 尊下長樂經（擬）

經名：尊下長樂經（擬）。撰人不詳，疑係早期天師道經文。講述學道讀經之樂，語頗俚俗。《正統道藏》未收。原本卷數不詳。現存敦煌殘抄本兩件：S.4610（卷六）、P.3200（卷次不詳）。

（S.4610 寫本，前缺）

披羅巾。玉女把經卷，喜度得道人。掌中攻堅固，度上詣青天。山居無至實，遊行放世間。世間多煩惱，清天入由延。得道強名籍，名籍看昂然。手中把香花，禮拜好精勤。感徹聖尊意，八萬合一椿。用心不退落，賢直能作人。尊見喚度之，上天簡龍群。轉讀萬部經，六時禮拜尊。載經入天宮，尊喚迴頭看。勇猛勤精進，計尋好心肝。

講經能說義，齋誠不道難。尊言可共事，徘徊有歲寒。尊言好共事，眼大心裏寬。四海起橋梁，沉頭不道寒。禮拜勤復勤，得食不道殘。此人解法禮，尊喚共同盤。念其作善行，亦好腳頭安。此人知得道，抽觔摸腦看。打骨挑出髓，自知心裏單。聖尊開函書，天宮裏許安。學道得尊意，天堂裏安壇。聖尊甚為意，心中念此人。

尊下長樂經，香花映天攬。紫微花由延，比如天下梵。但看龍花樹，比如度海汎。學道未登天，俱至山中潛。晝夜長禮拜，讀經長不厭。前世得道仙，七世父母殲。龍王轉日月，遙看白廉廉。得道感自然，得領仙人監。昇至自在天，通書並下恬。仙人花中生，海外轉天攬。卅三種重天，文書來闕□^①。金銀作布部，讀經先安鉗。琉璃作南雅，紫金團鑾驗。紫微花天宮，比如安舫玷。四海外聖人，奉師畏地陷。千萬微塵數，擲籌不知厭。黃卷千萬部，數亦不可尋。星辰列當戶，十方來下添。學道無不果，尊喚願奉幡。清

淨擎香花，比如真丹苦。斗數出經部，手開金銀檻。月珠封中庭，終日不畏閻。晃昱放光明，十方安八攬。願至山中停，叩頭思靜念。願見聖尊形，轉經千萬部，願得度父兄，父兄家中牽。入山無心情，憶家不學道，一宿九倒驚，一箇了門分。舉家送轟轟，家事不可度，田地須犁耕。學道不如初，只作罪過生。學道理眼前，一身自取名。七世祖父母，已填崑崙坑。五世祖父母，搥砂不盤停。三世祖父母，已自作鬼形。學道採花香，家中駕車迎。罪緣作牽累，文書不得呈。用心不齊正，罪過如黜方。學道無名字，曲木畏直繩。玉女難度之，若為得高騰。七世父母牽，比魚水下停。玉女難度之，學道跪帝名。更覓學道人，入山朝傾心。念道不娉娶，捉心如石碇。父母得過度，六姻如松林。學道千萬年，變色成黃金。勤強好禮拜，自然道德兼。結絲作經帳，安帶長廉檐。青絲點黃字，讀竟入函中。珍重口不語，尊自體中臨。知是得道人，尊自喚入前。尊知

得道應，捉筆點青函。晝夜不眠睡，言語不誇張。轉讀萬卷經，手臂長殲殲。心意長傾庭，擔經比千金。發語解沉浮，安徐入花林。

尊下長樂經，天花普表仙。教人學道時，山中好勞堅。禮拜勤叩頭，行道滿一千。得道倚山水，八萬七千年。父母得過度，勤強上花巾。六親皆得道，齋誠益潤身。父母兄弟牽，對強料理山。得道倚清虛，家裏相拘牽。得道落好處，得上天上天。本是下里時，布施不道貧。聞齋往懺悔，沒命不惜身。學道得高昇，故行懺悔恩。六親無譴累，故得王子孫。玉女欲度之，先共聖尊論。此人可過度，布施不道貧。願尊先記識，富貴長者身。生男得方伯，生女作夫人。勇猛勤精進，天道不負人。天尊念度之，譴龍往到門。冢墓無牽累，仙函中有名。尊人幡覆蓋，會由前身來。〔學〕道莫難言。

尊下長樂經，天花照紫微。賢聖相過度，日月見光暉。學道山林居，得道依品齋。仙人下香花，聖賢相提携。

萬姓好遭蒙，仙藥如刀圭。學道依巖山，言語不參差。賢聖不怨嗟，四海通江淮。頭破成珠玉，犁樹天人才。得道登九天，花樹千萬團。花樹千餘重，天道紫微宮。玄中見者才，骨作紫艷光。冥中出威儀，尊念心顛顛。喚入蓮花池，感徹天梁柱。日月見光暈，天道紫微宮。乘龍東下迴，天尊念此人。發語聲悲哀，太平萬世樂。願與尊挈衣，禮拜勤經誠。行道依六時，手把黃卷經。轉讀不思惟，父母得過度。光明自照之，靈響感清天。玉女織經衣，經衣是經巾。珞帶靈下垂，珞帶起珠靈。音聲萬倍宜，玉女用尊語。喜度得道歸。得道依冥契，入定思九時。得道行花香，品誠相提携，得道感清虛。仙藥如刀圭。黃卷微塵數，萬部一過題。

長樂經卷第六

(P.3200 寫本，前缺)
待名顯。學道千萬年，得見天□□。

□□□□看，得見龍花景。冥中得應報，得□□□□。□來千萬年，六姻甚絕永。永絕無遙□，□□□著銘。父母得過度，願尊別安省。聚集□□□，各自通名領。與尊典浴池，摩持使炁。與尊典龍王，摩娑舉天銘。舉足千萬里，勞勞不言迴。金銅作宮殿，與尊後園並。相離一千餘，團圓數萬頃。仙人長來去，路通無澀梗。讀經千萬部，與尊整衣領。千重萬餘對，料理使泠泠。手中把香花，照見天公井。

尊下長樂經，得道登虛空。學道入深山，自然皆道封。心樂案行尊，向上乘花龍。授經心中煩，向下食款冬。晝夜憶尊師，不覺淚下雙。讀經千萬卷，言語好多容。海外登天看，龍自覓路衝。天公覓罪人，打鼓石腔腔。面目無異別，乘舩入海同。用心衣淨潔，意欲沒潭中，枉殺邊老儂。諮議有名字，慎莫橫羅蹤。諮義無慈念，沒沉與沙封。口中白沫出，頰顛並耳聾。身壞臙脈起，魚食遶邊聰。人欲度江海，用心長顛顛。江海成沙洲，會由諮議

龍。牽舩悚沒沉，使鬼通浦中。濤流
左右轉，風浪團鑾擁。得師誠勅來，萬
倍作好儂。斷酒不復飲，肉不入玄雍。
得師重受誠，斷去看吉凶。典當江海
事，如望一舩封。計筭一年中，八百九
萬充。八百九十（以下缺）

① 原本此處漏抄一字。

（王卡點校）

057 正一論

經名：正一論。撰人不詳，約出於南北朝。一卷。底本出處：《正統道藏》正一部。

有客難曰：蓋聞三生萬物，大道無私。賦命自天，皇天弗欺。受載於地，謂地必厚。生非所迎而來，死非所送而去。道法自然，人亦則之，吉凶定分各自得也，豈是要福所能遠禍乎？且聖人垂教，應有定期，如何世道參差，或新或舊，九十六種各稱妙化，道家復何以旨教？靈寶一法二用，故當服膺從之。懼乖先王之法行，一差毫毛之機，長懷千里之失。望古興悲，諮疑莫辯。是以望雲欽響，踟躕仙駕，側席下風，仰延高誨。

答曰：探微測妙之說，辯幽論玄之事。故當求其理顯，然徵其形跡爲

據。至理絕言，非言無以載其極。至德不形，非形無以驗其有。夫在形言，寧無善惡。禍是福之所倚，故明其有徵也。福是禍之所伏，故明其有主也。有徵有主，孰爲不信。端形不招直影，而直影自見。和聲無追順響，而順響必至。倚伏循環，寧在定分。是以聖人立教，遷善伐惡，化惡伏善，其化用不一者，寔關人情之有淳薄，風俗之有興鄙。人淳則滋章不行，禮薄則法令競起，教以順民，化以從俗。是以太伯文身於東夷，仲尼褻裳於西裸，誠非至德之盛化。然應變有方，行藏之理，抑亦在時。博施於民而能濟衆者，豈曰無功，蓋亦從物情而成業者耳。若保專一不離，則天清地寧矣。此則達人之高尚，非庸才之所及。一者，正一也。張君以正一統世，八極無二，玄綱一舉，六合同風，天覆地載，教養修道，非正一焉可得語其优劣哉。余幸會大明洪流，闡化欽風。先聖味道，餘生羨章。雲梯馳情，天路籍素。移年閑虛，已日不勝。飲露秋松，荷澤春芳。魚

悅水深，鳥希木茂。栖林一枝，闕河量腹。但才愧尺短，情非寸長。智乏玄解，識非通悟。鏤管鑿光，何酬明誥。

難曰：聖人設教，情無彼此，何忌靈寶、清齋、旨教、塗炭謝邪？

答曰：旨教齋法及塗炭謝儀，共出一卷經中，聖人豈容應令修天師之謝，而不修天師之齋。若其齋可略，其謝可換充靈寶闕者，恐不但天師不許，深非葛君之意，特由世學者，欲截鶴接鳧耳。誠願其長短齊一，然要非可相換也。

難曰：塗炭儀所說云：悉如靈寶法。推之斯言，可得兼用？

答曰：塗炭法者，由羣生咎障既深，非大功不釋，宿對根密，非塗炭不解結考。不解則學仙不成，厄世不度。天師以漢安元年十月十五日下旨教於陽平山，以教衆官，令入仙目。王趙修之，卒登上道。當爾之時，塗炭之謝已行，而靈寶齋儀未敷，唯五符而已，豈得兼行？推年檢事，足明爲謬。斯乃造作支流，穿鑿真文，足此數字，欲令

張葛二教，俱同一用。信不足，有不信矣。

難曰：竊聞議者所說：旨教齋者，天師以教治官而已。此是小乘之法，非靈寶道士之所宜修。

答曰：天師所說云：吾以此法教治官道民，令免灾厄，爲後世種民。種民之許寧忘道士，道士之儔孰非治官，治官不修種民焉。度十苦八難，非功不濟，功違正一，難與論德。在位謀正，君子同所，懷寶迷邦，蓋亦愚夫之所深有失矣。

難曰：法以從善必可化，以會時爲用，旨教齋法雖真而古拙，凡樸通居，凡素之跡，不宜以施盛觀。

答曰：夫信言不美，古自常然。美言不信，今也居之。古不會今，誠如來告。未辯盛觀，終何所宜。若所宜在我有乖，大丈夫處厚之情必移之於人，豈得兼愛之旨？無欲觀妙，情歸玄極。重察盛觀之意，將非聖人之糟粕邪？大音希聲，非無聲焉。是以陽雷動蟄，蠢蟲爲之解甲。大象無形，非無

形焉。是以二儀覆載，含生得所戴履。五行通風，四時成俗。萬物負陰抱陽，亭毒育養，窈然而見精，恍兮而示象。子未帝之先；母無名之始。師絕言之業，資不可名之教，然後抱一以爲式矣。陳言示形，以爲不藏至理病，是以病也。豈可同乎塊然之器、木石之流而齊於觀化者哉？

難曰：按前來說，靈寶齋儀起於葛氏，旨教齋法出自天師，天師、葛氏相去近一百許年，葛氏未生之前，已有塗炭，不宜今者引入靈寶，敬如清旨，未詳葛氏所敷爲當可用而不宜行邪？

答曰：垂拱而治，洪堯之軌，墳索爛然，盛周之風，何必以結繩之純真，而苟貶書記之淡泊也。古而不今，則質在文無，今而不古，則質喪文行。吾疑子以舊故見遺，子乃以新知相嫌。大略爲疑者，子復不文質彬彬耳？

難曰：若新舊之教理宜兼行，而今子之所修，唯舊不新，行與言乖，的何爲許？

答曰：魚鳥異效，各自得之。飛

沈川陸，天情不共。五常同稟，或剛柔殊操。余蓬軀籜質，紆曲任風，若水之念，從善如流，心忘得失，不以寵辱見驚，志存天道，無親疏間。然不勝效新者多邪，復留心舊教耳，何必非今世之古人後生之一標誌哉？

難曰：天師大聖設教救物，何令今者廢而不修，將非三天之法，有鄙正一之化不神通邪？

答曰：上士聞道必行，故松喬其人焉。下士聞道大笑，蓋亦丘壑之徒矣。至道不行者，豈非松喬之黨，丘壑之類多。故鳳麟罕出而莫用，雞駟雲疇以常馳，不修之理居其然乎？物勢之所之，若颶風之所衝。人情之所注，如驟雨之所泊。但颶風不可移崇朝，驟雨難爲日用耳。道隱無名，誰與名焉。大辯若訥，故誰與辯焉。知我者希，則我者貴焉。凌霜之幹，不俟陽春易彩。既震之雷，無待弦鐘示音。萬羅捕鳥，成功一目。鑽燧颺煙，興自無朕。何必須區區於人物，灼灼於榮華哉？絕聖棄智，民利百倍。絕仁棄

義，民復孝慈。絕巧棄利，盜賊無有。夫天化覆育，仁教弘愍。大聖恢恢，全生濟物。豈得崇智棄聖，喪德於慈聽者乎？蓋非至道之所取矣。至道所取，引心長霄之上，投節清都之官，埋迹衆妙之門，送心玄玄之無窮。宴朝陽以栖影，庇太虛以席空。揖虛皇以畢性，習玄老之祕蹤。佩蘭蕙以齊芳，尚松桂以易容。附青煙以傳誠，留白日以照忠。情無事於易俗，德自可以移風。召良友於東華，叱鬼爽於北酆。正一何所鄙哉？想不惑於今日耳，相望吾子廓然自曉，若被太陽於深夜矣！

正一論

（李剛點校）

058 陸先生道門科略

經名：陸先生道門科略。南朝劉宋道士陸修靜撰。一卷。底本出處：《正統道藏》太平部。

夫大道虛寂，絕乎狀貌；至聖體行，寄之言教。太上老君以下古委懟，淳澆樸散，三五失統，人鬼錯亂，六天故氣稱官上號，構合百精及五傷之鬼，敗軍死將、亂軍死兵，男稱將軍，女稱夫人，導從鬼兵，軍行師止，遊放天地，擅行威福，責人廟舍，求人饗祠，擾亂人民，宰殺三牲，費用萬計，傾財竭產，不蒙其祐，反受其患，枉死橫夭，不可稱數。太上患其若此，故授天師正一盟威之道，禁戒律科，檢示萬民逆順、禍福、功過，令知好惡。置二十四治、三十六靖廬，内外道士二千四百人，下《千二百官章文》萬通，誅符伐廟，殺鬼

生人，蕩滌宇宙，明正三五，周天匝地，不得復有淫邪之鬼。罷諸禁心，清約治民，神不飲食，師不受錢。使民內修慈孝，外行敬讓，佐時理化，助國扶命。唯天子祭天，三公祭五嶽，諸侯祭山川，民人五臘吉日祠先人，二月八月祭社竈，自此以外，不得有所祭。若非五臘吉日而祠先人，非春秋社日而祭社竈，皆犯淫祠。若疾病之人不勝湯藥針灸，惟服符飲水，及首生年以來所犯罪過，罪應死者皆為原赦，積疾困病莫不生全。故上德神仙，中德倍壽，下德延年。而今之奉道，是事顛倒，無事不反。余謹請為出其疾病如左，天師立治置職，猶陽官郡縣城府治理民物，奉道者皆編戶著籍，各有所屬。令以正月七日、七月七日、十月五日，一年三會，民各投集本治師，當改治錄籍，落死上生，隱實口數，正定名簿，三宣五令，令民知法。其日天官地神咸會師治，對校文書，師民皆當清靜肅然，不得飲酒食肉，誼譁言笑。會竟，民還家，當以聞科禁威儀教勅大小，務共奉

行。如此道化宣流，家國太平。而今人奉道，多不赴會，或以道遠為辭，或以此門不往，捨背本師，越詣他治。唯高尚酒食，更相銜誘。明科正教，廢不復宣，法典舊章，於是淪墜。元綱既弛，則萬目亂潰，不知科憲，唯信詭是親。道民不識逆順，但肴饌是聞。上下俱失，無復依承。相與意斷闕斫，動則乖喪，以真為偽，以偽為真，以是為非，以非為是，千端萬緒，何事不僻，顛倒亂雜，永不自覺。如此之師，則滅後絕種；如此之民，則天橫破喪。雖來者令昧然，過去甚昭然，明白君子，可不鑒之。

道科宅錄，此是民之副籍。男女口數，悉應注上。守宅之官，以之為正，人口動止，皆當營衛，三時遷言，事有常典。若口數增減，皆應改籍。若生男滿月，齋紙一百、筆一雙，設上厨十人。生女滿月，齋掃帚、糞箕各一枚，席一領，設中厨五人。娶婦，設上厨十人，籍主皆齋宅錄詣本治，更相承錄，以注正命籍。三會之日，三官萬神

更相揀當。若增口不上，天曹無名；減口不除，則名簿不實。今人奉道，或初化一人，至子孫不改。三會之日又不投狀，既無本末，本師不能得知，爲依先上年。或死骨爛，籍猶載存；或生皓首，未被紀錄；或納妻不上，或出嫁不除。乃有百歲童男，期頤處女。

如此存亡混謬，有無不實，至於疾病之日，不歸本師而告請他官。他官不尋所由，便爲作章，疾痛之身，錄籍先無，今章忽有，非守宅所部，三師不領，三天闕籍，司命無名，徒碎首於地，文案紛紛，既不如法，道所不濟。如此之理，可不思乎。奉道之科，師以命籍爲本，道民以信爲主。師爲列上三天，請守宅之官依籍口保護，禳灾却禍。雖一年三會，大限以十月五日齋信一到治。又若家居安全，設上厨五人。若口數減落，厨則不設，齋信如故。若命信不到，則命籍不上。雖復別有重跪厨福，不解此信之闕。故教云：千金雖貴，未若本齋之信命。奉道之家不齋命信，動積年歲，如此三天削落名

籍，守宅之官還天曹，道氣不復覆蓋，鬼賊所傷害，致喪疾夭橫。輻輳之家，永不自覺，反咎師怨道，可不哀哉。

奉道之家，靖室是致誠之所。其外別絕，不連他屋；其中清虛，不雜餘物。開閉門戶，不妄觸突。灑掃精肅，常若神居。唯置香爐、香燈、章案、書刀四物而已。必其素淨，政可堪百餘錢耳。比雜俗之家，床座形像幡蓋衆飾，不亦有繁簡之殊，華素之異耶？而今奉道者，多無靜室，或標欄一地爲治壇，未曾修除，草莽刺天；或雖立屋宇，無有門戶，六畜遊處，糞穢沒膝；或名爲靜室，而藏家什物，唐突出入，鼠犬栖止。以此祈尊妙之道，不亦遠耶？

道家法服，猶世朝服，公侯士庶，各有品秩，五等之制，以別貴賤。故《孝經》云：非先王之法服不敢服。舊法服單衣袷，錄生袴褶，所以受治之信。男齋單衣墨幘，女則紺衣。此之明文，足以定疑。巾褐及帔，出自上道。禮拜著褐，誦經著帔。三洞之軌

範，豈小道之所預。頃來纔受小治，或錄生之法竊濫帔褐，已自大謬，乃復帽褶對裙，帔褐著袴，此之亂雜，何可稱論。夫巾褐裙帔，製作長短，條縫多少，各有準式，故謂之法服，皆有威神侍衛。太極真人云：製作不得法，則鬼神罰人。既非分僭濫，禍可無乎？

科教云：民有三勤爲一功，三功爲一德。民有三德則與凡異，聽得署錄。受錄之後，須有功更遷，從十將軍錄，階至百五十。若錄吏中有忠良質朴，小心畏慎，好道翹勤，溫故知新，堪任宣化，可署散氣道士。若散氣中能，有清修者，可遷別治職任。若別治中復有精篤者，可遷署遊治職任。若遊治中復有嚴能者，可署下治職任。若下治中復有功稱者，可遷署配治職任。若配治中復有合法者，本治道士皆當保舉，表天師子孫，遷除三八之品。先署下八之職，若有伏勤於道，勸化有功，進中八之職。若救治天下萬姓，扶危濟弱，能度三命，進上八之職。能明鍊道氣，救濟一切，消滅鬼氣，使萬姓

歸伏，便拜陽平、鹿堂、鶴鳴三氣治職。當精察施行功德，採求職署，勿以人負官，勿以官負人。若學不由師成，非根生；不承本名，爲無根之草。受道越次第，謂之非根生；不緣本師起，謂之不承本也。而今人受籙，無此德，受治，無此才。此德謂三德，此才宣化之才也。或都無師籍，人先雖奉道，失師來久，不復更屬，或先是凡俗之民，一身流寓，浮好假信，道士不先依法化受，而便授籙治，如此之人皆是虛妄，徒爲道士，縱復修勤服善，三天無名，故不免於枉橫矣。況其放慢違逆者乎！或有師無籍，謂雖有師主，三會不到治，命信不上，天曹削籍，所以爲無。或雖有師籍而無德，於時受籙之日，越詣他官，既不歸本，又不緣階，妄相置署，不擇其人，佩籙惟多，受治惟多，受治惟大，爭先競勝，更相高上，遂乃身受下治，署人上品。謂自受天師平蓋、玉局之徒，乃署人陽平、鹿堂。或自荷白板，而加板於人。謂自受白板治，既不詣天師除正，遂以終身常後白板於

人。縱橫顛倒，亂雜互起，以積釁之身，佩虛僞之治籙。絕無戶籍，有逋信宿脆，或先是俗身，負鬼祭饌，越入道法，不收結贓直，立身以來，罪惡狼籍，而抱釁帶咎，永不肯改，而詣狂僞之師，受不真之法也。身無戒律，不順教令，越科破禁，輕道賤法。夫受道之人，內執戒律，外持威儀，依科避禁，遵承教令。故經云：道士不受老君百八十戒，其身無德，則非道士，不得當百姓拜，不可以收治鬼神。其既闇濁，不知道德尊重，則舉止輕脫，賤慢法術也。恣貪欲之性，而耽酒嗜食。宣行道法，不期於功德，救治之日，非慈仁之意，但希望財利，念在酒食，永不以科禁示民，惟課責重脆，詢求好食，五辛之菜，六畜之肉，道之至忌，噉之已自犯禁，乃復宰殺雞犬鵝鴨，飲酒洪醉，乘以奏聞，遂有寢卧靖壇，吐嘔案側，如斯之徒，往往有之。背盟威清約之正教，盟威法：師不受錢，神不飲食，謂之清約。治病不針灸湯藥，唯服符飲水，首罪改行，章奏而已。居宅安

塚，移徙動止，百事不卜日間時，任心而行，無所避就，謂約。千精萬靈，一切神祇，皆所廢棄，臨奉老君三師，謂之正教。向邪僻祿巫之倒法。祭祀鬼神，祈求福祚，謂之邪。稱鬼神語，占察吉凶，謂之祿。非師老科教而妄作忌諱，謂之巫。書是圖占、塚宅、地基、堪輿、凶咎之屬，須上章驅除。乃復有曆，揀日擇時，愚僻轉甚，正科所明，永不肯從，法之所禁，而競尊用，背真向僞，謂之倒也。把持刀筆，遊走村里。道法廉退，應而不唱，靜躬修術，以待求者，告訴謙至，然後撫接。若遊行自術，法之所禁。遇逋違之民，嬰考被災。雖是道民，失師來久，治無命籍，家無宅籙。或有師主，三吉之日不赴會齊信，而有急之時下脆願厨，蒙恩不解，謂之逋。雖奉道法，不遵科禁，淫犯殺生，信邪卜問，百行不良，凶逆無狀，謂之違。凡逋違之民，天曹奪筭削籍，三官遣考，召君史潛守門戶，考逮人口，令招災害。罪重遭六害，輕罪被五灾。故令死喪、疾病、官府、牢獄、水

火、盜賊。如此之徒，有急師道，道士皆當以科法折却考劾罪崇。若能柔伏，反善吐罪，投誓三官，畫一爲信。然後依科次第拯救。而愚僞道士，既無科戒可據，無以辯劾虛實，唯有誤敗故章、謬脫之符，頭尾不應，不可承奉，而率思臆裁，妄加改易，穢巾垢硯，辱紙污筆，草書亂畫，葷以酒肉，順口隨意，所索浮辭假語，不依事實，違源背理，干觸考官。或濫收無罪之鬼，枉劾非崇之神；或宜解而反結，或應伐乃更遷。換倒互錯，事無准的。入靖啓奏，不辯文句，是其所識，則洪聲鼓響，聞於四鄰。其所不解，則咳咤吟呀，抹略而過。如此之徒，吏兵不爲使，道氣所不降，考速日更急，病者轉就，增虛益重。跪卒無效驗。客主共迷，不悟其非，乃生謗毀，怨道咎神，或致憤錄、毀靖、化廬。凡事鬼種，禍殖殃咎，至於滅門。如此之失，可不省哉。

陸先生道門科略

（尹志華點校）

059 洞玄靈寶五感文

陸脩靜集

經名：洞玄靈寶五感文。南朝劉宋道士陸修靜撰。一卷。底本出處：《正統道藏》正一部。

此五感之文，乃是道士修六齋之法，皆出三洞大經，尊貴妙重，不可穢慢。若看之者，皆洗手，著淨巾上。蓄之者，必著器中，不得輕慢。輕慢者，必被天殃。

至道清虛，法典簡素，恬寂無爲，此其本也。而世物浮僞，鮮能體行，競高流淫，信用妖妄，倚附邪魅，假託真正，君子小人，相與逐往，昏迷長寢，曾莫甄悟。致上危神器，下傾百姓，滅身破國，猶不以戒。至乃濁亂正炁，點染清真，毀辱大道，可爲痛酷。余生值末世，教法綱頽，人皆趣彼，而我竊守此，

法甚日損，歸根食母，卷志謝芳潔之聲，開懷受塵垢之污。乞免分競之斧斤，請保無用以自足。既閑且宴，逍遙永日。研經翫理，時修功德。以癸巳年冬携率門人建三元塗炭齋，科禁既重，積旬累月，負戴霜露，足冰首泥，時值陰雨，衣裳霑濡，勁風振厲，嚴寒切肌，忍苦從法，不敢虧替。素各羸冷，慮有怠懈，乃說五感，以相勸慰。并統序衆齋，標題門戶，均塗異轍，粗爲詳辯，豈曰矜誇。數十同志，信好之士，幸鑒之哉。

若塗炭齋者，無五感之心，不得勸吾之意。一則費香徒勞，二則成於虛誑，三則輕慢法禁，四則毀辱師教，五則更招罪罰。

一感父母生我育我，鞠我養我，出懷入抱，嘯含摩牧，勞心損體，辛苦憂勤。我或不夷，時有疾病，則愁我念我，心如炙焚，夙夜怵惕，忘金失眠，增感憔悴，泣涕漣漣，願成願長，我得如今。念此重恩，不可稱量，誓心上答，昊天罔極。

二感父母爲我冠帶婚娶，積蓄貨財，造買基業，苟欲我多，不覺貪濫，與物求競，動生怨怪，致有愆尤，或至無狀，觸忤天地，傷害人物，或外犯王法，內犯冥科，或刑罰所加，及於性命，緣起有我，以招斯患。今落三塗，嬰罹衆難，循於劍樹，墮於刀山，履於炎火鑊湯之熱，沒於幽夜冰凍之寒。或懸在笞神撻杖之下，千痛萬楚，不可堪當。悲惱憂厄，時刻難忍。希望免脫，無由自濟。念此崩哽，肝心潰亂，五體戰懷，形魂失措，不覺投地，塗炭乞哀。

三感普天之下貴賤男女，皆受人身，身口之累，有生所重。食則五味，衣則五綵，既飽既暖，不復自裁，服玩奢豪，恣情快意，追逐營求，無有厭足。傷神害身，永不自覺。氣命既凋，形體朽爛，平生觸物，竟復何用。孤魂獨逝，遍受諸苦。誠此冥昧，非世所了。而餘財四散，方爲後患。生奸起盜，子孫所爭，强者克多，弱者獲少，與奪失得，更相忿恨。或告訟官司，又被裁戮。或稱訴神鬼，陰受凶禍。骨肉之

親，共構架。天屬之重，棄若遺土。孔懷之愛，自競錐刀。身滅家殘，鬻由貪奢。悠悠一切，相與淪沒。未曾有

悟，悟不能捨。過去皆爾，來者復然。遂用爲常，甘心無恨。我識此非，故背當世，委離六親，遺榮遺累，尋道求生。積學自濟，能及有益，先報我親平素之日鞠育之恩。今獲神丹，以濟沉溺，登此法橋，度彼絕岸，悲喜踊躍，五情飛越，心馳神往，忽忘四體，不覺捨我，歸命三寶，罄竭資財，奉充法用。唯懼弗及，更無遺悵。願我父母上昇福堂，長免八難，無復憂惱，庶此微誠，以備供養。

四感太上衆尊大聖真人，開此大化，出斯妙法，拯拔三塗，接濟五道，億曾萬祖，積劫殃對，一旦釋然，幽魂苦爽，超昇福堂，因緣種族，咸受慶惠。我身得道，後世蒙福，此恩希有，萬劫一出。既得遭遇，竭命奉行，傾心盡節，故無懈怠。

五感我獲此福，事有所由，因緣開度，使我見者。我師之恩，仰戴罔極，

有過天地。故行道之日，每至懇禱，冀有微功，上酬仁德。身困體疲，不敢有辭。

我得此法，懽喜無量。有若貪夫遇金玉藏，衆人不知，唯我獨見。伏身潛嘿，肆力採掘，積日累月，無有厭極。唯恐寶盡，不以爲勞。負霜戴雪，涉水踐冰，凍身切骨，不覺爲寒，崎嶇嶮巖，不以爲難。心怡情悅，故無所惑。

衆齋法

道以齋戒爲立德之根本，尋真之門戶。學道求神仙之人，祈福希慶祚之家，萬不由之。既子識有明闇，則入悟有利鈍。資力有優劣，則所任有多少。是以聖人階其精麤，分析轍轍，大體九等，齋各有法，凡十二法。

一曰洞真上清之齋，有二法。

其一法，絕羣離偶。捨朋友之交，無妻奴之累。孤相獨宴，泊然窮寂，形影相對。無爲爲業端推好然，無所一爲。胎息後視，心所神機。寂胃，胃以受食爲有事，既虛息不食，則泊然寂定也。虛申，請齋以晷爲期，至申而食。今既不食，徒有此中虛過而已。眠神，神司外，務躁動。今

既無事，怡靜內藏，故謂之眠。靜炁，炁者，體之化，神之舜。神動則炁奔。今神遂內，後則炁靜體寧。遺形忘體，形以有待，故接物體之以有，累不可忘。今內無飢寒之切，外無纏縛之累，洞遂虛漠，故不知四大之所在也。無與道合。道體虛無，我有故隔，今既能忘，所以玄合。

其二法，孤影夷豁。皆與上同，但混合形神，諷經有異。

二曰洞玄靈寶之齋，有九法，以有爲爲宗。某徒衆盛典儀，備仰有節，進退有度，威威月齋，軌範洋洋，振揚法音，開化訪物，使求輯者聞，來見者見，恢廓弘偉，難可備言。

其一法，金錄齋。調和陰陽，救度國正。法於鐸地玄壇，廣三丈二尺。攔纂四而開四爲用，合一門。又於壇內立重壇，廣二丈四尺，開四角上。下爲十門，各有榜題。於壇中央安一長燈，長九尺。上安九燈火。圍壇四面安色燈，合三十六燈。壇外欲燃千百，隨人也。書五方天文，以五案盛之，愍五方金龍五枚，枚重一兩，以鎮天文之上方一香火，文用五色紋繒，隨方疋數，都合三十六之道。士結衆行道，春則九日，夏則三日，秋則七日，冬則五日，四季之月十二日，一曰六日。仕射十方事竟，焚天文，散龍繒，爲功德也。

其二法，黃錄齋。爲同法，拔九祖罪根。法亦立壇，廣狹門戶與金錄同，但圍壇四面安力十燈，十門三香火，十方紋繒之信，庶人一百三

十六尺，諸侯丈數，天子疋數，金龍十枚，枚重一兩，金有上中下，爲貴賤之差，行道禮謝二十方，日數如金籙，隨四時之制，事竟投龍於水，又埋於山，餘紋繒散爲功德也。

其三法，明真齋。學士自拔億曾萬祖九幽之魂。法亦於露地然一長燈，上有九大，如金籙燈法，但不立壇門戶之式耳。遶香燈行道一日一夜，六時禮謝十方。

其四法，三元齋。學士一年三過，自謝涉學犯戒之罪。法以正月七月、十月，皆用月半日，一日三時沐浴，三時行道，於齋堂中禮謝二十一方也。

其五法，八節齋。學士一年八過，謝七玄及己身宿世今生之罪。法以八節日於齋堂內六時行道，禮謝十方也。

其六法，自然齋。普濟之法，內以修身，外以救物。消灾祈福，適意所宜。法亦結徒衆，亦可一身，禮謝十方，亦一日、三日，亦百日、千日，亦可三時，亦可六時。

其七法，洞神三皇之齋。以精簡爲上，單己爲偶，絕塵期靈，沐浴玄雲之水，燒皇上之香，燃玄液之燭，服上元香丸。合衆名香，各有分數，蒸鍊爲香珠青絲穿連，暴令乾，又以衆香前油爲香，又作香湯沐浴，又和作香丸服之，皆有節度。然三十六油燈，又安

三十六香鑪，以相開次，侍燈侍香，晝夜不輟，或百日、四十日，注心密念，燭燈行香，呪願清真妙辭，凡三十二言。欲召神祇，盡皇文召之，所召所問，求仙求生，在意所欲。

其八法，太一之齋。以恭肅爲首。皆契同潔己，勵志施爲，唯法不雜異學，跪拜揖讓，同法罄折盡節也。

其九法，指教之齋。以清素爲貴。祭酒籙生共應用，隨巨細無苦，時遭飢食，唯菜蔬，向王之菜，則不得噉。中食之後，水不過齒，思經念道，不替須臾。

又曰：三元塗炭之齋，以苦節爲功，上解億曾道祖無數劫來宗親門族及己身家門無鞅數罪，拯拔憂苦，濟人危厄，其功至重，不可稱量。法於露地立壇安欄格，齋人皆結同氣，賢者悉以黄土泥額，被髮繫著欄格，反手自縛，口中銜壁，覆卧於地，開兩脚，相去三尺，叩頭懺謝，晝三時向西，夜三時向北。齋有上中下三元相連，一元十二日，合三十六日。下元限竟，進中元十二日，內加三過，方謝。中元竟，進上元，十二日內，加五過，方謝。於謝者，向上下中四面四角中一方謝，增爲苦劇。所以名三元者，元則數之始也。一年有十二月，三百六十日，十日爲一旬，月有三旬，旬有上中下，十二月合三十六旬，斯則十分之一，分爲三元，一元十二日，一周也。

洞玄靈寶五感文

(李剛點校)

060 老君音誦誡經

經名：老君音誦誡經。又名《雲中音誦新科之誡》。北魏神瑞二年（415），嵩山道士寇謙之假託太上老君降授。據《魏書·釋老志》載，原本為二十卷。現殘存一卷。底本出處：《正統道藏》洞神部戒律類。

老君曰：煩道不至，至道不煩，按如修行，諸男女官見吾誦誡科律，心自開悟。可請會民同友，以吾誡律著按上作單章，表奏受誡，明慎奉行如律令。

老君曰：道官、籙生，初受誡律之時，向誡經八拜，正立經前，若師若友，執經作八胤樂，音誦受者，伏誦經意卷後訖，後八拜止。若不解音誦者，但直誦而已。其誡律以兩若相成之，常當

恭謹，若展轉授同友及弟子，按法傳之，明慎奉行如律令。

老君曰：道官、籙生，未使寫經，誡律脫誤，增損一字，有不得抄撮；寫誡三紙二紙，不說卷首，使科律不具，災當及身。吾此科誡，自有典事之官，隨經誡監臨，明慎奉行如律令。

老君曰：吾漢安元年以道授陵，立為係天師之位，佐國扶命。陵以地上苦難，不堪千年之主者，求乞昇天。吾乃勉陵身，元元之心，賜登昇之藥，百鍊之酒，陵得昇雲躡虛，上入天宮。從陵昇度以來，曠官實職，來久不立係天師之位。吾使諸州郡縣，土地真官，注氣治理鬼事，領籍生民戶口，不用生人，祭酒理民，濁亂之法。而後人道官諸祭酒，愚闇相傳，自署治籙符契，攻錯經法，濁亂清真，言有三百六十契令，能使長生。鬼神萬端，惑亂百姓；授人職契錄，取人金銀財帛。而治民戶，恐動威逼，教人跪願，匹帛、牛犢、奴婢、衣裳，或有歲輸全絹一匹，功薄輸絲一兩。衆雜病說，不可稱數。妄

傳陵身所授黃赤房中之術，授人夫妻，姪風大行，損辱道教。有祭酒之官，稱父死子係，使道益荒濁。誡曰：道尊德貴，惟賢是授，若子胤不肖，豈有繼承先業？有祭酒之官，子之不肖，用行顛倒，逆節縱橫，錯亂道法，何有承係之理者乎？鐵券首云父死子係何？是近世生官王者之法制耳。吾今未立地上係天師正位，據聽道官，愚闇相傳，自署治籙。諸道官祭酒，可簡賢授明，未復按前，父死子係，使道教不顯。吾論一事，吾豈死，有子孫係吾老君天師之後。天道無親，惟賢是授。明慎奉行如律令。

老君曰：吾得嵩嶽鎮土之靈集仙官主表聞稱言：地上生民，曠官來久。世間修善之人，求生科福，尋緒詐偽經書，修行無效，思得真賢正法之教。宜立地上係天師之位為範則。今有上谷寇謙之，隱學嵩嶽少室，精鍊教法，掬知人鬼之情，文身宜理，行合自然，未堪係天師之位。吾是以東遊，臨觀子身，汝知之不乎？吾數未至，不應見身

於世。謙之，汝就係天師正位，並教生民，佐國扶命，勤理道法，斷發黃赤。以諸官祭酒之官，校人治籙符契，取人金銀財帛，衆雜功賄，願盡皆斷禁，一從吾樂章誦誡新法，其僞詐經法科，勿復承用。謙之受誡，二宿三日，掬尋窈冥之情。老君召，謙之臨言：臣以蒙覆，愚而不進，有不賜長生神藥，不能役使鬼神，何能化惡爲善，消灾伏異，師範之？則願道哀念，賜存生命，須老君出於世之時，得有神藥之應，皆道氣入身，乃敢受係天師之位。願錄愚誠。老君曰：吾以汝受天官內治，領中外官，臨統真職，可比係天師同位。吾令聽汝一讓之辭。吾此樂音之教誡，從天地一正變易以來，不出於世，今運數應出，汝好宜教誡科律，法人、治民、祭酒按而行之。奉順誡約之後，吾當勅下九州四海之內土地真官之神，騰籍戶言^①。其有祭酒道民，奉法有功，然後於中方有當簡擇種民^②，錄名文昌宮中。若道官祭酒不閑教化者，導及養生之術，有疑事不了，汝當與決之，分

明順奉，行如律令。太上老君樂音誦誡令文曰：我以今世人作惡者多，父不慈，子不孝，臣不忠，運數應然當疫毒臨之，惡人死盡。吾是以引而遠去，乃之崑崙山上。世間惡人，共相魚肉，死者甚多，其中濫枉良善，吾愍之辛苦，時復東度，覆護善人。九州四海之內土地真神，五嶽官屬，盡集對各說土居好德異同，林言事實，稱今世人惡，但作死事，修善者少。世間詐僞，攻錯經道，惑亂愚民，但言老君當治，李弘應出，天下縱橫，返逆者衆。稱名李弘，歲歲有之，其中精感鬼神，白日人見，惑亂萬民，稱鬼神語。愚民信之，誑詐萬端，稱官設號，蟻聚人衆，壞亂土地。稱劉舉者甚多，稱李弘者亦復不少，吾大瞋怒！念此惡人，以我作辭者，乃爾多乎！世間愚癡之人，何乃如此。吾治在崑崙山，山上臺觀衆樓，殿堂宮室，連接相次，珍寶金銀，衆香種數，雜合錯飾，蘭香桂樹，窮奇異獸，鳳凰衆鳥，棲於樹上，神龍騏驎，以爲家畜，仙人玉女，盡集其上。若欲遊行，

乘雲駕龍，呼吸萬里，天地人民鬼神，令屬於我，我豈用作地上一城之主也，我不願之！若我應出形之時？宜欲攻^③易天地，經典故法，盡皆殄滅，更出新正。命應長生之者，賜給神藥，昇仙度世，隨我左右。惡人化善，遇我之者，盡皆延年。若國王天子，治民有功，輒使伏杜如故，若治民失法，明聖代之。安民平定之後，還當昇舉，伏宅崑崙。我出之時，乘駕九龍之車，龍有九色連錢斑文，車有羽蓋十二出，檀梓爲車，飾以金銀珠玉，雜色奇異，不可目名；徵召天下真官，海嶽風伯雨師，役使萬鬼；傾天綱，縮地脉，迴轉天地如迴我身；把捉日月，能令天地晝闇；仙人玉女，駟車侍從，鍾鼓音樂，遍滿虛空；百獸真徒，鳳凰衆鳥，翔于其上；天地運動，人衆鬼兵，無有邊際，見我威光，無不弭伏我哉！愚人誑詐無端，人人欲作不臣，聚集逋逃罪逆之人，及以奴僕隸皂之間，詐稱李弘。我身寧可入此下俗臭肉奴狗魍魎之中，作此惡逆者哉！世人奸欺，誦讀僞

書，切壞經典，輸吾多少，共相殘害，豈不痛哉！吾出誦誡，宜令世人，咸使知聞，好加思尋，努力修善。修善功成，可得遇真，延年益壽。明慎奉行如律令。

老君曰：吾初立天師，授署道教治籙符契，豈有取人一錢之法乎？喻如生官署職，有財錢若干，吾今並出新法，按而奉順。從今以後，無有分傳，說願輸送，做署治籙；無有財帛，民戶雜願，歲常保口，厨具產生。男女百灾，疾病光恠，衆說厨願，盡皆斷之，惟有校藏，三分收一，即其民市買計，厨會就家解散，易復可詣師治。民有病患，生命有分，唯存香火，一心章表，可得感徹。唯聽民戶，歲輸紙三十張，筆一管，墨一挺，以供治表揀度之功。若有道官，濁心不除，不從正教，聽民更從新科正法清教之師。明慎奉行如律令。

老君曰：祭酒之官，遷功之後，子孫清徹聰明，閑練鬼事，可就明師，受署治籙符誡，承繼父後。若子孫用行

顛倒，與俗不別，不順科約者，諸官平處，奏表天曹，聽民更受。明慎奉行如律令。

老君曰：道民或有家宅，說願厨具，不由師治者，師即時使還，令民市備，爲會解散。

老君音誦誡曰：道民不練科法，不能精勤香火，消灾散禍及病痛，行來憂慮縣官，光恠衆諸，欲有保說者，盡不聽。聽先啓，何以故也？此戶安道以求福，是誤事也。自今以後，道民若有求願，先修厨會之具請。若集啓設求願，其一事求上之，收福無他。明慎奉行如律令。

老君曰：道官授署，職治符籙，隨家豐儉。意欲設會，任意人數，三人以上，復能重設。諸餽和會可通，若不能者，無苦也。明慎奉行如律令。

老君曰：厨會之上齋七日，中齋三日，下齋先宿一日。齋法：素飯菜一日，食米三升，斷房室、五辛、生菜，諸肉盡斷。勤修善行，不出，由行不經。喪穢、新產欲就會時，向香火八

拜，使大德精進之人，在坐首作好飯漿，在坐上頭，人別作漿。其參同不奉道者，請會無苦。而世間愚人，真以所奉不同，便作異意，不齋慢道，科法不爲。主人求思恭肅之，故坐會之中，瞋恚無常。從今以後，諸官以意科處，思尋妙旨，苟能同心福願之人，參爾無苦會。既還家爲主人，燒香逕宿，三過香火，牋言爲：甲乙之家所請厨會，解求某事恩福，願得道氣覆護。明慎奉行如律令。

老君曰：厨會之法，應下三漿，初小食，中酒，後飯。今世人多不能三下漿，但酒爲前，五升爲限。明慎奉行如律令。

老君曰：男女官受治籙，天官叩章。順誠之人，萬邪不惑。當喻如生官臣使，夫有職之人，道民豈能欺犯者乎？道官祭酒，愚闇相傳，自署治籙，爲請佩千部將軍、吏兵相惑，亂請之僞，吏兵衛護，盡皆無有正。可常佩受署某官而已。通神得道之人，遇值仙官。諸受職籙者，不得五人三人，吏兵

給吏。然地上愚人，自署相做，何可能有此百千萬重將軍。吏兵、管護者哉！從今以去故時爲事，未復承用。明慎奉行如律令。

老君曰：請客就會，人習嚴整衣服，如生官天子殿會，恭肅共同。明慎奉行如律令。

老君曰：道民奉戶師，如生民事官等，言則稱道民。明慎奉行如律令。

老君曰：其受治籙，誠之人弟子，朝拜之喻，如禮生官位吏，禮法等同。明慎奉行如律令。

老君曰：道官祭酒，授人職治符籙，但與其道。受佩之後，不能精進，違科犯約，用行顛倒，奸怨非法，遊行民間，讀僞科律，詐惑萬端，世間不奉道之家民，有疾病危困，輒便改動我道者，當與治差。愚人無智，輒便動移，操米束薪，投戶治病，謂病當差，返受死亡。死亡之後，先以功變，所還本屬，輒即爲民。然病者得差，便言得道恩福，言道有神，唱告於世，世人聞之，有喪禍變恠縣官，復有改屬歸化之者。

戶口漸多，而戶生祭酒，顛倒無常，用行逆節，姪盜殺生，體性短少，逼迫恐動，銜神賣道。其於無則詐見老君，兼復感悟，如是神教語，致使民心懷歎恨積。有復道官，我俱奉戶主，何以不如他師，奉事禮拜，使人有暫正，欲更就明賢，言科法難犯。如此之徒，毒可檢校，其衰禍阨運，命有長短，自有一定，非是愚人道官所能延遠。詐惑之人，濁亂道法，若有此輩，此諸官參詳。所集化戶作厨會，取民辭狀，道官連名表章，聽民改屬，民不得輒自移叛。明慎奉行如律令。

老君曰：吾觀視世間凡愚，祭酒化戶，領民上章，奏上練文書，多者十紙五紙，少者三紙二紙。多之以少，都無頭緒，萬億章奏，達者無一。何以爾者？土地真官，典事主者，懼罪相連，覆停稽違。吾令並出音誦歌誡，宣勅諸官。章書之法，如似生官文書，可得達理。凡愚道官，不練章表奏，不就於明能學習練法。世間道官，遷達亡人度星，作爲二十、三十紙，千萬美說於

事，不如修謹善行，齋練苦身，香火自縷，百日功建，爲先亡父母遷度魂靈。月月單章，言達齋功，勝於千通度星遊說之事，齋功不達，無有感徹之理。先齋立功，却上度星章，無有雜色、米絲、紙筆，正爲先亡集賢會，燒香拔免亡人，最上可不度星。煩道不至，至道不煩，從今以後，思尋誦誡。明慎奉行如律令。

老君曰：道官、籙生、男女民，燒香求願法：入靖東向懇，三上香訖，八拜，便脫巾帽，九叩頭，三搏頰。滿三訖，啓言：男官甲乙，今日時燒香，願言上啓。便以手捻香著爐中，口並言：願甲乙以年七以來過罪得除，長生延年。復上香，願言：某乙三宗五祖、七世父母、前亡後死，免離苦難，得在安樂之處。後上香，言：願門內大小口數，端等無他利害，來錢出入滑易。復上香，願仕官高遷。復上香，願縣官口舌疾病除愈。一願一上香，若爲他人願通，亦無苦十上、二十上、三十上，隨願。齋日六時燒香，寅午、戌亥、子丑

是六時。非齋日，朝暮。辰巳之日，天清明，夜半北向悔過，向天地叩頭百下三十六，搏頰三過，三百下以爲常則。先緣福深者，通神在近，先緣福淺者，八年得仙。明慎奉行如律令。

老君曰：三會日，道民就師治。初上章籍時，於靖前南正北向行立定位，各八拜、九叩頭、九搏頰。再拜，伏地請章籍訖，然後朝賀師。明慎奉行如律令。

老君曰：道官祭酒，修行之法，復歷民間，東西南北，行來出入，直身直面，一向直去，不得左右顧盼。到民家，不得妄有瞋怒，有呵譴食飲，好惡牀席，舍廬衆雜，論說是非。不可得先到貴豪富家苦顧，歷民儀，先到寒貧家，教誨求福，使科約具備。明慎奉行如律令。

老君曰：男女籙生及道民，家有奴婢，不得喚奴婢，當呼字。若有過事，不得縱橫撲打，但以理呼在前，語甲乙。汝有此事，應得杖罰，令受之。若責數，奴婢自當糺罪，無有怨恨之心。

道官道民，出言吐氣，不得言說死事，此道民之大忌。明慎奉行如律令。

老君曰：世間有承先父祖事道，自作一法，家宅香火。復有承先祖作祭酒之官者，民戶無知，言父死子係，更不正屬。戶師民氓，同姪祠邪，令衆雜邪，令非一倣言奉道。見他官政治祭酒，使復禮拜言：我是道民，意欲就正，復懼衰神，與之災考。如此之人，爲請作道會，滿三約正誠，若不從令，勿復重請。如此之徒，奸情不已，非是天民，不如請諸不奉道之民。何以爾者？等是天民，統一道治，然則別屬，有參會更好，豈比之奉道無師而有衰心乎？道官祭酒，宜以參會，更言據是，民可請爲客，此乃違失事多，宜如詳酌。若請爲客，以刑律論。明慎奉行如律令。

老君曰：道民求福願厨，先刺客齋，上中下齋隨意，明當設會。今日請客來在主人家中宿，諸求願還，官衆共保乃行，出無他適。雞鳴至日出，盡皆上厨之列，來致仙官。唯解先亡厨，平

旦至日中爲限。若人士從願到官，一切郡縣，及以公侯卿相伯子男封土，隨意欲設厨，可作耳求宰。民得腹心，土居安寧，風雨時節，隨意而設，無有先科。今不限人頭數，不設亦復無苦，但精勤香火。明慎奉行如律令。

老君曰：道氣百千萬重，自從開闢，黃燧之治，門有仙聖。從今以來，人僞道荒，經書舛錯。後人詐僞，仙經圖書，人人造法，天下經方，百千萬億，草藥萬種，萬藥百數。後人樂道長生，循放^①無效者何？然愚人意短，不達至妙，長生至道。仙聖相傳，口訣授要，不載於文籍，自非齋功，念定通神，何能招致乘風駕龍，仙官臨顧，接而昇騰，服食草藥、石藥，服而得力之者，此則仙人奏表上聞，遣仙人、玉童、玉女來下臨。天官神藥，參入分數，一草一人，得力一石。一人得力，服氣方法，亦俱等同。今世人豈能達此理乎？不降仙人，何能登太清之階乎？而案藥服之，正可得除病壽終，攘却毒氣，瘟疫所不能中傷。畢一世之年，可兼穀

養性，建功齋靖，解過除罪。諸欲修學長生之人，好共尋諸誦誡建功，香火齋練，功成感徹之後，長生可剋。抱朴子者，未明蓋世，掬合前賢諸家經方，造經勸仙，內外卷首言仙之可得，可開悟人心。承前多有遺經，亦復不妄造出人意，不犯改經詐說之罪。造經勸仙，功過自保，補後身當得仙人之階。諸有修道之人，勿復承按前人偽書經律。今世人習讀美經典，可益得身，朝但富貴，爲子孫資蔭耳。無有長生登仙之階，欲求生道爲可先讀五千文，最是要者。明慎奉行如律令。

老君曰：靖舍外，隨地寬窄，別作一重籬障壁，東向門。靖主人入靖處，人及弟子盡在靖外。香火時法，靖主不得靖舍中飲食及著鞋屐，入靖坐起言語，最是求福大禁。恐凡人入靖有取，物盡皆束帶。明慎奉行如律令。

老君曰：道官道民，有死亡七日後解穢，家人爲亡人散生時財物作會，隨人多少，可參請俗民無苦爲亡人過度設會。功滿三，復欲設會，隨意。能

備可作，若不能備，無苦勤香火。明慎奉行如律令。

老君曰：爲亡人設會燒香時，道官一人，靖壇中正東向，錄生及主人亦東向，各八拜、九叩頭，九搏頰，三滿三過止。各皆再拜懇。若人多者，亦可坐禮拜叩頭，主稱官號姓字，上啓無極大道，萬萬至真無極大道。以手捻香三上，著鑪中，口並言爲亡者甲乙解罪過，燒香願言。餘人以次到壇前懇上香如法盡，各各訖。靖主上章，餘人當席拜主人，東向叩頭上章訖，設會。解坐訖，靖主入靖啓事，爲主人求願收福，言當時，主人東向叩頭，坐罷出時，客向靖八拜而歸家焉。主人一宿之中，滿三過燒香。明慎奉行如律令。

老君曰：道民家有疾病，告歸到宅，師先令民香火在靖中。民在靖外，西向散髮叩頭，謝寫愆違罪過，令使皆盡，未有藏匿，求乞原赦。若過一事不盡，意不實，心不信法，章奏何解？師亦自別啓事云：民某甲求乞事。及病者亦道首過。若過盡者，師自得好感

應；若過不盡，師亦不得好感應報。首過時，爲可並行符承銜。民首辭上章，一日三過。上三日後，病人不降損，可作解先亡謫罰章。病家晝則向靖叩頭，夜則北向，向天地叩頭首過，勿使一時有闕。病家惶怖，欲有所說錢財厨願，勿聽之。若能備厨，請客三人、五人、十人以上，隨人多少，按如科法設會。會時，客主人，病者考禮拜燒香，求乞救度。病者設會訖，客歸到家，爲病者燒香叩頭，一宿之中，滿三過，以病者救度禮叩頭，燒香同法。明慎奉行如律令。

老君曰：道民不慎科法，淫犯殺生，宜校贖物，計錢使還民家，自市厨具，師得與表章解散。當作會時，主人衆客前向香火，八拜叩頭，三十六搏頰，滿三訖，再拜。手捻香著鑪中，並告言：某甲啓太上大道，甲乙是肉人無知，奉科許祠某官求其事，并復有以塞詰之者，今依科輸贖，直爲厨具，請客證明。以從今以後，生死付道，不敢以前爲比。乞願得在赦格之例，蒙恩生

活，道氣哀念。明慎奉行如律令。

老君曰：男女道官，濁亂來久，有作祭酒之官，積勤累世貪濁，若身化領求復經數餘載，贓錢逋說，貪穢入己，此是前造，詐言經律。此等之人，盡在地獄。若有罪重之者，轉生蟲畜，償罪難畢。吾故出音樂新正科律，依其頭領，欲使信道，以通人情，清身潔己，與道同功。太上清氣，當來覆護，與民更始，改往修來，一從新科爲正。明慎奉行如律令。

老君曰：道氣百千萬重，前賢後聖，修學長生，盡遇仙官，人人各得一重之氣，而得昇度之後，終不載於文籍。房中之教，通黃赤經契，有百二十之法。步門庭之教，亦無交差一言。自從係天師道陵昇僊以來，唯經有文在世解者，爲是何人？得長生飛仙者，復是何人？身中至要，導引之訣，盡在師口。而筆牒之教，以官人心，若開解信之者，執經一心，香火自纓，精練功成，感悟真神，與仙人交遊，至訣可得。今後人詐欺謾道，愛神潤飭，經文改

錯，法度妄造，無端作諸僞行，遂成風俗，勸教天下。男女受佩契令，愚闇相傳，不能自度，而相領弟子，惑亂百姓，犯罪者衆，招延灾考，濁欲道教，毀損法身。吾誦誠斷改黃赤，更修清異之法，與道同功。其男女官錄生佩契黃赤者，從今誠之後，佩者不吉。若有不慎之人，所居止土地真官，注氣靖治，典者使者，當自校錄，吾與之灾考，死入地獄。若輪轉精魂，蟲畜猪羊而生，償罪難畢。吾觀世人，夫妻修行黃赤，無有一條按天官本要所行，專作濁穢，手犯靖廬治官禁忌，而天官、仙人、玉女，尚不犯治室之法。吾今以黃赤貪濁，道教來久無有，真正愚闇相傳，盡各不得其中正。時有清真潔素之人，無經律錯亂，吾盡欲灾除此輩之人，不令而犯誅誚之暴。是以先令誠約，遷遣一教。然房中求生之本經契，故有百餘法不在斷禁之列。若夫妻樂法，但勲進問清正之師，按而行之，任意所好，傳一法亦可足矣。今世濁惡，有形之人，流轉精神，罪緣難消，是以誠約。

要須齋功，與返爲始，雪罪除愆，乃得感悟真仙。男女官努力修齋，尋諸誦誠，香火建功，仙道不遠。明慎奉行如律令。

老君曰：從係天師昇仙以來，曠官實職，道荒人濁。後人諸官，愚闇相傳，自署治錄符契，氣候倒錯，不可承准。吾本授二十四治，上應二十八宿，下應陰陽二十四氣，授精進祭酒，化領民戶。道陵演出道法，初在蜀土一州之教，板署男女道官，因山川土地郡縣，按吾治官靖廬亭宅，與吾共同領化民戶，勸惡爲善。陽平山名，上配角宿，餘山等同。而後人道官，不達幽冥情狀，故用蜀土盟法，板署治職。勅令文曰：今補某乙鶴鳴、雲臺治，權時錄署治氣職，領化民戶，質對治官文書，須世太平，遣還本治。而九州土地之神，章表文書，皆由土地治官真神，而得上達。有今聞道官章表時，請召蜀土治宅君吏，他方土地之神，此則天永地隔，人鬼胡越，吾本下宿治號令之名，領化民戶。道陵立山川土地宅治

老君音誦誠經

之名耳，豈有須太平遣還本治者乎？從今以後，諸州郡縣，男女有佩職錄者，盡各詣師，改宅治氣。按今新科，但還宿官，稱治爲職號，受二十四治。中化契令者，發號言補甲乙正中官，真氣角宿治。以亢宿、氐宿、房宿二十八，如法上章時，直言臣，而不得稱真人。若靈籙外官，不得稱治號。其蜀土宅治之號，勿復承用。若係天師遺胤子孫，在世精循治教，領民化者，不得信用諸官祭酒；爲法律上章時，不得單稱係天師位號，當稱職號，名與諸官同等。明慎奉行如律令。

老君曰：夫爲道官、正治、祭酒，進善舉賢，領受弟子，授人職治、誠錄、符契。進一賢善，除過十年，求仙速達。進一佞一惡，反罪十年，求仙求福，終不可得。其投道門之民，欲爲弟子者，當觀望情性，與約誠相應者三年，體能修慎法教，精進善行，心無有退，志無傾邪，乃可授籙誠，納爲弟子。明慎奉行如律令。

老君曰：中官正氣宿治祭酒，得

授人職錄誠，其錄生之人，不得妄授人誠錄。若不領民戶，受中治錄者，當受中治散氣祭酒職。若上靈官，不領民戶，受外官散氣祭酒職。其外官祭酒治民者，坐會時百五十籙，下坐。若中官治民，正氣祭酒子息受治署中官。中官宿治，散氣祭酒在父民間行章，稱文治氣上章。若他官祭酒，民間自治氣上章。若求生之人，一身自度，不化愚俗，不領民戶，亦可直受中官上仙赤天七十五將軍籙，生起亦在外治祭酒上。明慎奉行如律令。

老君曰：道官道民，其先亡祖曾父母，幽謫不解，復注子孫。若齋功不達，章書謬說，多言十通百通，無益於事，要先齋感徹之，後乃可章表證達。齋功章書之法，不須多重，重煩濁天曹，不如不上齋。滿百日一齋功，達表章之日，兼能請賢，隨多少人數設會，拯拔收福益仁。若不能備者，但就師表章遷達亡人。若祭酒者，日日可言，齋功滿百日，就師表章。明慎奉行如律令。

老君音誦誠經

- ① 此處疑有漏脫。
- ② 「方有當」疑爲衍文。
- ③ 「攻」疑當作「改」字。
- ④ 「放」當作「做」。
- ⑤ 此處疑有漏脫。

（李剛點校）

061 太上老君戒經

經名：太上老君戒經。撰人不詳，約出於南北朝。假托老君為關令尹喜講授。一卷。底本出處：《正統道藏》洞神部戒律類。

戒上

老君西遊，將之天竺。

周幽王之末也。周而西之于天竺。

天竺，國名也。事出《玄妙內篇》。

以道德二經，授關令尹喜，喜受經畢，又請持身奉經之法。

授經之事，具載記傳，此略序請戒之端耳。受經既竟，理應宣通，故重請奉經持身。持身之法，備在經文，但文旨深微，非始學便曉，故別請其要，以斬後語者也。

老君於是復授喜要戒，普令一切，咸持度世。

謂但持戒去惡，自得度世。然持戒者，乃為奉經，奉經者，必在求道。今既聞奉持之法，且舉戒而言也。

於是說頌三章。

頌者，美其事也。明持戒奉法，並為道之因，故先誦其宗致，以悟始學，令知其指歸也。初章明持戒所得，身心福漸。次章明其法既普，家國咸興，天人同慶。後章明自漸之深，理窮於經，經理既窮，乃至成真。故有三章也。

樂法以為妻，

妻者，栖也，謂相依栖也。陰陽肇氣，人倫之道，莫不由夫妻生我者矣。樂者，謂並有待而相樂也。一切衆生，咸知樂妻，若栖心法教，則無待返偶而生理自足。又明樂法能如樂妻，則能持身奉經也。

愛經如珠玉。

法，語其所宗；經，指其所學。愛者，寶愛也。世之所寶，莫過珠玉，而世寶無益於心，經法有永於得，故令學人去彼而取此也。

持戒制六情，

六情者，六欲也。眼欲淫色，耳欲淫聲，鼻欲芬芳，舌欲脂味，身欲柔滑，意欲放佚。如此六事，皆成乎心，故為之情也。並是三塗惡業，故制而去也。若不檢制，縱恣六情，生為世人所惡，死為鬼之所迫也。

念道遣所欲。

戒以防外，念心攝內。內攝由念道，念道則所欲外亡。《西昇經》云：道之微心，子未能別，撮取於要，慎戒勿失，先損諸欲，莫令意佚。即此戒者也。

淡泊正氣庭，

人之所以躁競者，由是六情之所使也。若持戒念道，則六情澄靜，神安氣正，邪惑所不能擾。庭者，黃庭也。

蕭然神靜默。

蕭然，無欲也，靜默內定也。天魔並敬護，

天魔謂五帝大魔也，領人生死，在六天之上。若持戒奉法，終獲真仙，則超

於三界，故並為其所敬護也。魔有四種，餘三在人身中，故曰天魔。

世世受大福。

謂持戒念道，衆惡不生，善因日建，雖經生死，今身後身，常在福中，及至成道，故云大也。

鬱鬱家國盛，濟濟經道興。

謂持戒之福，命無夭傷，見世昌盛，子孫繁茂，有家有國，逮至十方，莫不鬱然而盛者也。

天人同其願，

天謂天上仙也，人謂世中人也。言持戒奉法，始在人中，受報生天，進業人中，受報生天，進業乃至上清，是故天人同其願也。

飄眇入大乘。

大乘，謂上清法也。緣麓必至妙，階漸自之深。既離世昇天，從天之上，故云飄眇。飄眇，猶勢飄然也，飛騰之貌矣。

因心立福田，

福者，善之果也。為福之因，不由於他，己心即福田也。若修身奉法，衆

惡自除，猶如治田，去其草穢，草穢既盡，自獲良穀者也。

靡靡法輪升。

靡靡，猶漸漸也。福既積，則法輪漸升之也。

七祖生天堂，

身獲道真，七祖蒙慶。

我身白日騰。

持戒志道，功成德就之所至也。

大道洞玄虛，

一切諸法，皆稱為道。乃有百官及萬八千種，並是六天及三界之道。大道者，無形無象，洞玄虛^①。道無不在，理無不應，故云大也。

有念無不啓。

啓，謂感也。此明持戒念道，有心即感，念念不止，以至成道，莫非念力。

練質入仙真，

欲多則神濁，氣清則質練，練質成真，莫不由戒。

遂成金剛體。

言其表裏堅真，無復朽敗者也。超度三界難，

欲界、色界、無色界，此三界生死輪轉無休，恒與三塗對治，故云難也。自非成真，莫能超者也。

地獄五苦解。

五苦是地獄中寒池、火車、鑊湯、刀山、劍樹也。解脫既超三界，無復苦緣也。亦謂五道為五苦者也。

悉歸太上經，

上清法也。衆法所窮，故云歸太上經也。

靜念稽首禮。

誦說既竟，法緣略顯，今將說戒，故令靜念稽首而受也。

於是尹喜聞說頌已，稽首而立，請受戒言。老君曰：第一戒殺，第二戒盜，第三戒淫，第四戒妄語，第五戒酒。是為五戒。若清信男，清信女，

若有男女發心受戒，便得清信之號。

奉持五戒，畢命不犯，謂持戒至于命終而不能犯也。

是為清信男，清信女。

向發心即號清信，若中塗虧缺，則清信心廢。唯盡命不犯，來生又受福

果，則全清信之理，故重云爾。

老君曰：戒殺者，一切衆生，含氣以上，翾飛蠕動之類，皆不得殺。

蠕動之類，無不樂生，自蚊蟻蝨蚰，

咸知避死也。

老君曰：戒盜者，一錢以上，有主無主，非己之物，皆不妄取。

在地地官，在水水官，在人人主，如是則無無主之物。此言無主者，謂當時無誌護也。

老君曰：戒淫者，非夫婦。若出家人，不妻不娶，若男若女，皆不得犯。

夫妻雖非犯戒，過亦為姪犯。

老君曰：戒妄語者，若不聞不見，非心所了而向人說，皆為妄語。

所說事與心相違也。復有綺言諛曲，反覆兩舌，在後戒也。

老君曰：戒酒者，非身病，非法禮，皆不得飲。

身病，謂己身疾，必應以酒也。法禮者，明非世俗饌會及鬼神之胙。若尊卑之禮，真靈之饗，則不至於失之者也。

老君曰：是五戒者，持身之本，持法之根。

身本無惡，緣惡持戒，心淨身清，可以奉法，故曰法根者也。

善男子，善女人，

前章云清信者，明受戒改惡，乃得此號。此言善者，謂生而善也，是稟業所得，非持戒而起。

願樂善法，

一切法也。緣有宿善，故能願樂。

受持終身不犯，

犯為虧缺，不全首尾；毀為毀慢，生不信心。

是為清信，得經得法，永成道真。

夫得經者，不必能修行，能修行者，乃為得法耳。得法則得道，故云永成。永，謂遠者也。

於是尹喜聞受既已，

已，謂已畢也。聞說戒言而親受之，非如五千是老子自出。

再拜而問，何故有五？

言人之為惡，其事萬萬方，皆應防戒，今何故止說有五也？

老君曰：五者，攝一切惡。

言一切衆惡，皆起此五，若持此五戒，則衆惡悉絕也。

猶天有五精，以攝萬靈；

五精，星也。靈，謂神靈。

地有五行，以攝群生；

金木水火土也。群生所稟，莫不資之。

人有五藏，以攝神明。

人所以有神明之識者，由於五藏也。六情五欲，各有所生，故以五戒對而治之。明此五戒，自天至人，三才之本，非始有也。

戒者，防也，防其失也。

未失則防而不為，既失則戒而不犯，皆是防其義者也。

失而不防，則三塗盈逸，天人虛空。

不防其失，則縱惡日多。惡緣報對，則充滿三塗，三塗既盛，則鬼道橫逸。夫一切衆生，皆有定數。三塗既滿，則天堂虛空，生人咸少也。

是故五也。

明五戒根本，所由如此也。

尹喜曰：大乎戒也，何故失耶？

既聞斯旨，方歎其大。言有此戒，其來久矣，云何衆生，猶有此失。

老君曰：本得無失，既失而得，亦無所失。

本得無失，謂前身過去已得此戒，故於今身而無失也。而今身有失者，前身無戒，或有而違犯，故有失耳。雖為有失，而於今身得受持者，則見生無失，後身復善，故既失而得，亦無所失。前頌云：世世受大福。即此義也。尹喜所問一失，而併舉三失答之，是對其後問，頓顯前身、此生、後身也。明人稟道，本自無失，義見經中也。

尹喜曰：敢問其本？

得失既顯，事理須明，故却問其本，以求其末也。

老君曰：今當為爾，具說其本。

順其所問而言其所以，故云具。

諦聽，諦聽受持，普為一切之所知也。

諦聽，戒其闕失。諦受，使無漏妄。

然後可令一切，咸得知聞。

尹喜再拜，恭立而聽。

恭立者，即今長跪也。

老君曰：五戒者，天地並始，萬物並有。

舉其本也。夫有天地則有萬物，有萬物則有得失，有得失則有法戒之者也。

持之者吉，失之者凶。

善果為吉，惡對為凶。吉凶之事，悉備後章。

過去成道，莫不由之。

言凡得道者，莫不緣於戒者也。

故其神二十五也，

五五之數也。《內經》有二十五神，是人身之靈，上應天真而鎮在人身。持戒身清，則其神常安。

經文五千是其義也。

謂失之事，備在五千，而後此戒者，特應尹喜所請耳。

老君曰：五戒者，在天為五緯，

東曰歲星，西曰太白星，南曰熒惑星，北曰辰星，中央曰鎮星也。

天道失戒，則見灾祥。

五星各位一方，行度氣色，並各有常。若天運失和，陰陽愆戾，皆非其分度而見妖徵，故經云：天無以清，將恐裂。裂，謂王者失德，陰陽圯裂，五緯返常也。

在地為五嶽，

東曰太山，南曰衡山，西曰華山，北曰恒山，中央曰嵩高山也。

地道失戒，則百穀不成。

五嶽各鎮其方，風雲水雨之所由也。若地道失戒，則疾風涌水，曠旱之灾，百穀不實也。一切草木，皆謂之穀。經言：地無以寧，將恐發。謂山崩川竭，萬物灾傷，皆由王者咎。先見兆於天，次降灾於地也。

在數為五行，

東方木九，南方火三，西方金七，北方水五，中央土十二。雖中央而位在四季。

五數失戒，則水火相薄，金木相傷。

五數推移，四時以成，若其有失，則灾癘刀兵。《西昇經》曰：五行不相剋，萬物盡可全也。

在治爲五帝，

東方太皞木，南方炎帝火，西方少皞金，北方顓頊水，中央黃帝土也。

五帝失戒，則祚夭身亡。

五帝爲帝王更治，五行相生，隨方受任，若失戒暴虐，則國祚不長，身不獲壽也。

在人爲五藏，

肝屬木，心屬火，肺屬金，腎屬水，脾屬土也。

五藏失戒，則性發狂。

所行過惡，則五藏失神，五藏失神，則令人性狂。狂，謂僻也。尋五戒以防五惡。爲惡各有所生，但一惡便使性狂，不待五也。今言五者，總其數耳。經云：馳騁田獵，令人心發狂。心爲五藏之主，故舉其一也。故後章云：失一則命不成。又尋戒旨，自天及人，皆云失戒而致災祥者，明爲患之起，起自由人。是以帝王有慶，兆民賴之，如有不善，則天下受殃。故知三才等治，得失必同。又自天至人，雖有五條，爲失之本，

在人而已。故次章云：戒於此者，而順於彼也。

老君曰：是五者，戒於此而順於彼。

謂上來五事，悉在於人，故云戒於此也。順於彼者，理也。夫患之所生，由於違理，若順理而行，復何戒乎？明爲戒於過耳，若過而不戒，禍患之興，豈可讓也！

故殺戒者，東方也，受生之氣，尚於長養，而人犯殺，則肝受其害。

氣數相感，自內于外。肝主長養，故一切咸知慕生。懷殺之性，則逆氣衝肝，肝氣凶壯，還自災身，故云害也。

盜戒者，北方也，太陰之精，主於閉藏，而人爲盜，則腎受其殃。

腎爲太陰，陰主閉藏，故一切咸知收斂。而人爲盜，則腎氣爲傷，故云殃也。殃者，積惡之應者也。

姪戒者，西方也，少陰之質，男女貞固，而人好姪，則肺受其疹。

肺爲少陰，金性堅貞，故男正女潔。而人好姪，則肺氣枯竭，故云疹疹惡

氣也。旱災曰疹也。

酒戒者，南方火也，太陽之氣，物以之成，而人好酒，則心受其毒。

心爲一身之主，以成乎人，是太陽之氣也。好酒之人，則毒衝于心，藏府荒廢，以致迷喪者也。

妄語戒者，中央土德信，而人妄語，則脾受其辱。

脾屬土，土信而有恒，故言德也。人之稟性，以信爲本，而人妄語，則辱歸於己。脾總人身爲義也。五德相資，不可虧缺。

虧，謂廢也。缺，謂傷也。言人受生，必備此五德，五德無虧，則終享福吉，故云不可虧缺者也。

老君曰：此五失一，則命不成。

向辯人身，各有所生，此名毀犯，虧缺之咎，故云命不成。命不成者，謂不全其性分及天年也。《元命包》

曰：行正不過得壽命。壽命，正命。是故不殺者，乃至無有殺心。

夫殺心之起，起於不戒，遂至增甚。今言乃至無有殺心者，自微自防也。

自有雖不手殺，或因人行殺，或勸人行殺，或看人行殺，或使人行殺，而心不為惡，皆同於殺也。所以然者，皆由有殺心。若其不戒，終不能成就者也。

不盜，乃至無有邪取。

謂貪盜之人，始於小竊，小竊不戒，遂至大取。或因公利私，或憑法招物，或依恃勢力，封山畋澤，或誘說癡愚，以役其力。如此而得，皆非正理，同於盜，故云乃至無有邪取。明非正偷盜也，貪婪皆是者也。

不姪，乃至無有邪念。

姪者，皆由放恣，或男或女，情慾不一。尋五戒之重，莫過於姪，亡身喪家，故不復論。又有不畏罪網，因法媾慾，外託奉道，內實姪濁。如斯之徒，實為巨惡，故云乃至無有邪念。自非夫妻而行姪者，皆為邪也。

不酒，乃至無有勢力。

夫酒致過，或因尊上之所勸逼，遂至亂失。今以戒自持，雖有勢力，亦不違犯。酒之傷人，如火不救，逾多逾

盛，不極而不止者也。

不妄語，乃至無有漏泄。

真實之心，則無私惡。無私惡，故無有隱諱。無隱諱，復何漏泄也。

如是可謂成也。

前云失一則命不成，是理未曲備。今既重說，其義粗顯，故云如是可謂成也。

老君曰：戒中姪酒，能生五惡。

姪則奢，奢則貪，貪則盜，盜則欺，欺則懼，懼則殺，此並姪之所能至也。酒能發狂，又能姪。《太清經》云：人身有三萬六千蟲，皆在五藏皮膚之中，飲酒則諸蟲嗔動，嗔動則衆惡興，衆惡興則無所不為。故云能生五惡也。

戒者，戒惡也。惡世之中，男女謹姪，懼於骨肉。

謹，謂雜也。懼，謂犯也。言姪慾之心，人乃至不避姓族，因法混雜，無復分別者也。

上慢下暴，毀箴天德。

上慢天靈為箴，下相殘害為暴之者

也。

沈酗爭訟，禍命辱身。

沈，猶耽也，狂酒日酗。對鬪為爭，訴理為訟，害命為禍，陷身為辱也。

妄詐欺誑，罔有所由。

妄謂妄語。詐謂詐偽。欺謂妄詐之人。要求財利，不顧在此三者也。

六親相盜，非但於他。

夫婦、父子、兄弟，六親也。言為盜者，非但於他，乃至子盜於父，婦盜於夫，兄弟相盜，無所不為。

殺害衆生，利養身口。

殺生治病為養身，宰害供厨為利口也。

如此等輩，見生受業，永墜諸苦。

生不受戒，唯惡是行，惡業增長，則淪三塗。

備加五惡，無有休限。

其有五惡者，則入地獄，備五苦之報，無有休息及年限也。經云：三塗受報，近者一劫。

如有出者，

言其受對，或有輕重，如有得，竟還

生人中者也。
當在邊夷，短命傷殘。

邊夷，俚獠也，其人相食。此謂殺害之報，受生此地，若生中國，則短命及形體不具。

夫婦醜惡，及不貞廉。

姪報也。醜謂可憎，惡謂弊惡。不貞為姪，不廉謂貪也。

貧窮凍露，在處不安，如有財畜，為人所奪。

盜報也。凍露謂居無屋宅，不安謂飢寒不立，縱有財物，則被劫奪，以償先債也。

言說不信，人所不親。

妄語報也。其所言說，是之與非，人皆不信，既無信義，寧得親友也。

意慮昏塞，衆所慢輕。

酒報也。生既昏濁，死無神明，此之受身，豈得清靜，故人所輕慢。

老君曰：清信男，清信女，奉持戒行，見世安樂，無有憂惱。

奉戒持行，所志者道。衆惡既消，長與善會，復何憂惱哉！夫憂惱者，由

於惡行，故與惡相牽耳，豈有不為而至者邪？

衆所恭敬，

不姪，則為衆所敬也。

見者歡喜，

無復殺心，故一切見之，莫不歡喜者也。

常蒙利養，

不盜也。既無邪取，則人樂給與也。

一切歸仰。

不妄語也。所言必實，誰不歸仰。

其智深微，

不飲酒也。則思慮安靜，入於深微。

處在清靜，四大完堅，

既受此五報，行止所在，人所敬愛。

常清靜，不雜凡穢，四體也。外思不

加，則內府無傷，表裏堅密，萬病不生也。

故能修集衆法，以成道真。

前明無戒，惡緣果報。此明奉法，見

世受福，乃至成道，莫不由之。又明

為道必修集衆善乃得成真，故以法

明道，以真明人者也。

尹喜再拜曰：敢問受持之法？

受，當為授。戒法既備，次問授持之

儀也。更起諮端，故再拜而請。

老君曰：若男子女人聞法，生信歸身三寶，

此直云男子女人者，總謂始發心也。

法謂戒法也。三寶亦曰三尊，亦曰

三師，謂太上之法，太上之法傳太上

之法，是為三也。故太上為萬法之

主，傳法者為衆學之師，老君即此法

之師，餘法各隨所出。

即時稽顙，

言有欲發心者，即時授與，不待依

違，辯其由來。所以者何？戒本去

惡，但令有心，何論往行。且人心多

惑，自有善機暫起，迴復退悔，故承

機而獎，不待終日也。

歸身大道，歸神大道，歸命大道。

此三歸者，謂身有善惡，神有恐怖，

命有壽夭，蓋一切衆生之必有也。

今以此三悉歸於道者，謂受行法戒，

一則生死常善，不墮惡緣；二則神

明強正，不畏邪魔；三則見世長壽，

不遭橫夭。歸雖有三，其實一也。向言歸身三寶是法，此言大道是常，即前頌云玄虛之道。

男子女人，稱姓名以告誓。

捨世邪法，

捨，猶離。凡世間所為，悉是邪法。

奉持正戒，

如手持物，恒畏遺失。

盡身盡命，終不毀犯。

身，語其行。命，言其識。故盡犯二邊而不毀慢及虧犯也。

於是讚誦，恭心而受。

讚誦五戒之事也，謂受之身。三歸既竟於三寶前，稽顙自誓，一一受解，然後授之。恭心者，如對神也。

老君曰：若復男子女人受正戒已，進求經法，

謂五千文者也。

先當受戒，

向言受戒已，今復云先當受戒。前是受經之時，更復說戒，若經戒具受，故宜先受戒。

一一堅淨，然後授與。

辯覈已持戒者，若有漏失，許其自新，明知所以更授者也。

旦暮恭心，不怠時節，

朝夕禮事，雖復飢寒，亦不闕廢，此是奉經之法也。

月修十直，

月有十齋日也。

年用三齋，

一年用三月長齋也。

誦經萬遍，白日登晨。

闍讀曰誦。晨者，真仙之域也。用

此齋直，誦經萬過，則獲飛仙。《西

昇經》云：羅縷妙言，內意不出，誦

文萬過，精誠思徹。此之義也。十

直三齋，別自有經也。

若為人敷說宣通妙義，大利衆生，乃拔三塗一切諸苦。

敷揚講說，開導未悟，則功德廣濟，

三塗救拔也。

以是功德，能斷宿命，無量諸根，得昇上清，無復退墮。

功圓德備，則生死根滅，上清之道，

無復退轉。此略明學道之所至也。

始自持戒，終於無為，舉大法之始終者也。

老君曰：清信男，清信女，在家出家，

受持經法，願樂神仙，日夜誦讀，求諸妙義。

謂無為至理也。

去諸諠雜，調心制性。

謂即世學也。夫上士學道在市朝，

下士遠處山林。山林者，謂垢穢尚

多，未能即諠為靜，故遠避人世，以

自調伏耳。若即世而調伏者，則無

待於山林者也。

柔顏善氣，勸諸男女，

心麤則貌強，意獷則言惡。若和顏

軟語，則見者親愛，不生忿心也。

遠離五惡，受持五戒，供養三寶。

既知至妙之理，又能分別善惡，則以

我所得為敷說，勸令捨離諸惡緣也。

取令成就，不擇甘苦。

識有利鈍，性有善惡，曲己順彼，取

令入道，不為身利，不辭屈辱，此為教也。

若具持大戒，苦行精懃，布施忍辱，捨身救物，

謂修行者也。大戒為百八十、太清等戒。若四明科禁，衆仙大忌，皆是學真之具法也。精進懃謂匪懈布施，凡來求無不給與，不吝財賄，不問有無。忍辱謂受辱不言，乃至打罵亦無嗔恨。捨謂見諸危難決往救，不顧身命，若見凍餓，剔身給與，不待有求，是為捨也。

若復離世獨往幽栖，專想至寂，衆難不驚，

謂耽神者也。離世山栖，以避誼濁，獨往無群，無復他念。專謂志一。想謂思神至之者也。寂謂定也，此專定心，智定內安，非復外難榮辱所驚也。必至無爲。

言修此等行，必果無為之真也。

尹喜曰：奉經有犯乎？

持戒善惡既備於前，夫知奉經凌犯罪失。云何？此總問衆經非止五千也。前頌云悉歸太上經，此後又明

破法及授受之難，推此故知也。斯乃尹喜相資發，故令出罪福之事耳。

老子曰：十有三者也。

經云：生之徒十有三，死之徒十有三。言奉經順法，則獲長生；違戒犯惡，則動之死地。既答所問罪失，故直云十三也。

尹喜曰：何謂也？

問十三之事也。

老子曰：爾諦聽之。

既更有所明，故復戒。

十有三者，六塵六識，皆由於心。

六塵，謂六入也。以其所入能穢染正性，故言塵也。六識，即六入之根，能起分別，故云識也。心為其主，是為十三，下卷具解。凡致惡之由，因十三起，入善之由，因十三滅。入善為生，為惡而死。死生之謂，非止此身也。謂修善不已，以至成道，成道之日，豈得非生？故經云出也。為惡不息，遂淪地獄，豈非死乎？故經云入也。

是故淫貪疾恚，

淫之所起，由於色取，故在十三之端。夫淫必有貪，而貪者不必皆淫。

然貪之為病，非但在於富貴，乃至貪名貪世。不欲人在己先病者，妬嫉也，嫉彼而勝我也。恚謂嗔恚也。貪嫉既起，嗔恚自生者也。

欺盜妄詐，

違戒取物，是為欺盜，謂欺心者也。自詭要時，是為妄詐，是用權數苟得者也，所謂民之賊矣。

綺言兩舌，

辭非而澤，謂之綺言。反覆是非，是為兩舌。皆緣欺詐而有。

諂利持權，

口忌災崇，明言禍福，卑辭高物，以要利人，是為諂也。憑恃時威，自我制物，是為權也。夫諂之甚者，乃至祈神祭鬼，以求曲祐也。

溷集破法，

男女無別為溷。破法者，謂有此等事也。始則貪姪，終於混集，並皆相因而至之也。

非清信也。

如此皆之死地，尚非清信，况復奉經者乎！

天網不失，

引經明事也。夫天網雖疏，報對之理，必無遺失也。

生死無地，

生謂見報，死謂考對，無地可逃也。

答所問十三畢，此以下乃明罪報也。

如此等人，非其智分。

由無智識起諸罪業，故於法無分也。

染污至法，毀廢善根。

法法相傳，如樹有栽，生長不絕，是為善根。如此惡行，日相深漬，善根

豈得不廢？

不為善人，之所知識。

所行既惡，則惡惡相知，愚下之類自多黨。善人，謂才識高明德勝者也。

備衆生身。

皆由前緣，無有慧業，故令今生，得此愚癡。夫言愚癡者，謂造諸惡業也，非謂無所解矣。生既無善，死墮三塗，受衆生身。衆生萬等，各隨緣報而備得其身者。

種於姪慾，無所憎避。

衆生所以繁多，由其種類姪慾故也。謂因法行姪而受此報，猶雞犬等在於人中無所避就，得類便為，亦無憎愛，皆由前業之所行者也。

常懷怖畏。

因往貪取之報也。餓鬼之中，復有萬品，雖云是餓，有時得足。此言無足者，便是未嘗暫飽也。

若在地獄，五痛無間。

地獄受苦，有時而息。此言無間，是時無休息也。五痛猶五苦也，明三塗報應如此。

如此受身，備諸苦惡。

三塗報盡，出生人中，則形體不具，備諸殘疾，或瘡痒疥癩，可惡之極者也。

物所懷惡，

非但於人，乃至畜生，亦有憎惡。

無有救治，

疾既可惡，則人無治者，此是穢慢淨法之報應也。

生死輪轉，無聞無見，

無聞，謂不信法教。無見，謂不值善緣。此總明十三，破法之罪，生死所之也。

皆由一念中生至無數念，其對無窮。夫為惡者始起。原缺文

太上老君戒經

①「洞」字上疑脫「空」字。

②「之人」前疑有脫漏。

(李剛點校)

062 太上老君經律

經名：太上老君經律。撰人不詳，約出於南北朝。纂集早期天師道戒律四種（缺二種）。一卷。底本出處：《正統道藏》洞神部戒律類。參校本：《雲笈七籤》卷三十八、三十九（簡稱七籤本）。

道德尊經戒 九行二十七戒。

老君百八十戒 已上男官同受。

太清陰戒 闕。

女青律戒 闕。已上女官受。

道德尊經想爾戒

行無爲，行柔弱，行守雌，勿先動。

此上最三行。

行無名，行清靜，行諸善。此中最三

行。

行無欲，行知止足，行推讓。此下最三行。

此九行，二篇八十一章，集會爲道舍，尊卑同科。備上行者，神仙；六行者，倍壽；三行者，增年不橫夭。

道德尊經戒

戒勿喜邪，喜與怒同。戒勿費用精氣。戒勿傷王氣。戒勿食含血之物，樂其美味。戒勿慕功名。戒勿爲僞，彼指形名道。戒勿忘道法。戒勿爲試動。戒勿殺、言殺。此上最九戒。

戒勿學邪文。戒勿貪高榮強求。戒勿求名譽。戒勿爲耳目口所誤。戒常當處謙下。戒勿輕躁。戒舉事當詳，心勿惚恫。戒勿恣身，好衣美食。戒勿盈溢。此中最九戒。

戒勿以貧賤強求富貴。戒勿爲諸惡。戒勿多忌諱。戒勿禱祀鬼神。戒勿強梁。戒勿自是。戒勿與人爭曲直，得諍先避之。戒勿稱聖名大。戒

勿樂兵。此下最九戒。

此二十七戒，二篇共合爲道淵，尊卑通行。上備者，神仙；持十八戒，倍壽；九戒者，增年不橫夭。

老君說一百八十戒并序

昔周之末，赧王之時，始出太平之道，太清之教。老君至瑯琊，授道與干君。干君受道法，遂以得道，拜爲真人，又傳《太平經》一百七十卷，甲乙十部。後帛君篤病，從干君授道護病，病得除差，遂復得道，拜爲真人。今瑯琊有木蘭樹，干、帛二君所治處也。幽王時，老君教胡，還當入漢中，過瑯琊，干君得見老君。老君謂干君曰：吾前授汝，助人救命，憂念萬民，拜署男女祭酒，廣化愚人，分布弟子，使上感天心，下動地祇，當令王者歡心。而自頃以來，吾遙從千萬億里觀之，諸男女祭酒，託老君尊位，貪財好色，擅己自用，更相是非，各謂我心正，言彼非真，利於供養，欲人奉己，憎惡同道，妬賢嫉

才，驕恣自大，禁止百姓，當來從我。我道最正，彼非真也，皆不當爾，故來相語。干吉稽首再拜，伏地叩頭百下，唯唯告曰：太上從今日已去，不知當何由去諸男女祭酒之重罪，令祭酒輩生活，既蒙道祐，可得昇仙，壽終之後，不入九地下牢之苦，非但祭酒，復其萬民。萬民無知法則，祭酒之罪，臣之過咎，實在於己也。唯願太上赦既往之失，署臣修將來之善耳。臣干吉死罪死罪。

老君曰：可正安意定坐。吾恐大道澆季，萬民喪命，一二祭酒死入九幽之下，不足痛也。吾但念萬民痛耳！汝當善聽，記錄心中，當為後世作法則，勅諸男女祭酒，令改往行，從今之善。

老君曰：人生雖有壽萬年者，若不持戒律，與老樹朽石何異？寧一日持戒為道德之人而死補天官，尸解昇仙。世人死有重罪，無益魂神，魂神受罪耳！祭酒明奉行之。乃曰：諸祭酒，各明聽，天下萬民，無有長存。人

生有死，物成有敗，日出則沒，月滿則缺，從古至今，誰能長存者？唯道德可久耳！今月亦善，今日亦善，今時亦善，諸賢亦善，師甲亦善，弟子亦善，萬神備具，吏兵皆到。今吾以諸賢故，念萬民之命，故受王甲禁戒重律。

老君曰：人生雖有壽萬年，不持戒律，與瓦石何異？寧一旦持戒，終身為道德之人而死，不犯惡而生。持戒而死，滅度練形，上備天官，尸解昇仙。世人持戒律，死有重罪，無益魂神。善男善女，明奉行之。戒曰：

- 第一戒者，不得多畜僕妾。
- 第二戒者，不得姪他婦女。
- 第三戒者，不得盜竊人物。
- 第四戒者，不得殺傷一切。
- 第五戒者，不得妄取人一錢已上物。
- 第六戒者，不得妄燒敗一錢已上物。
- 第七戒者，不得以食物擲火中。
- 第八戒者，不得畜猪羊。
- 第九戒者，不得邪求一切人物。

- 第十戒者，不得食大蒜及五辛。
- 第十一戒者，不得作草書與人。
- 第十二戒者，不得多以書相聞。
- 第十三戒者，不得以藥落去子。
- 第十四戒者，不得燒野田山林。
- 第十五戒者，不得以金銀器食。
- 第十六戒者，不得求知軍國事及占吉凶。

- 第十七戒者，不得妄與兵賊為親。
- 第十八戒者，不得妄伐樹木。
- 第十九戒者，不得妄摘草花。
- 第二十戒者，不得數見天子官人，妄與為親。
- 第二十一戒者，不得輕慢弟子，邪寵以亂真。
- 第二十二戒者，不得貪惜財物。
- 第二十三戒者，不得妄言綺語，隔戾嫉妬。
- 第二十四戒者，不得飲酒食肉。
- 第二十五戒者，不得積財物，侮蔑孤貧。
- 第二十六戒者，不得獨食。
- 第二十七戒者，不得販賣奴婢。

第二十八戒者，不得知人婚姻事。
第二十九戒者，不得持人長短，更相嫌恨。

第三十戒者，不得自習伎樂。
第三十一戒者，不得言人惡事，猜疑百端。

第三十二戒者，不得言人陰私。
第三十三戒者，不得說人父母本末善惡。

第三十四戒者，不得面譽人，屏處論人惡。

第三十五戒者，不得以穢污之物調戲人。

第三十六戒者，不得以毒藥投淵池及江海中。

第三十七戒者，不得獨與宗族私親。

第三十八戒者，不得輕疏他人之尊。

第三十九戒者，不得自殺。
第四十戒者，不得勸人殺。

第四十一戒者，不得別離他人家口。

第四十二戒者，不得因恨殺人。
第四十三戒者，不得投書譖人。
第四十四戒者，不得自用。

第四十五戒者，不得自貴。
第四十六戒者，不得自驕。
第四十七戒者，不得妄鑿地毀山川。

第四十八戒者，不得惡言罵詈。
第四十九戒者，不得以足蹋六畜。

第五十戒者，不得揜人目。
第五十一戒者，不得厭治病。

第五十二戒者，不得希望人物。
第五十三戒者，不得竭水澤。

第五十四戒者，不得評論師。
第五十五戒者，不得裸形露浴。

第五十六戒者，不得輕慢經教。
第五十七戒者，不得慢老人。

第五十八戒者，不得觀六畜交陰陽。

第五十九戒者，不得調戲。
第六十戒者，不得恃威勢凌人。

第六十一戒者，不得阿黨所親。
第六十二戒者，不得帶刀仗。
若在

軍中，不從此律。

第六十三戒者，不得門戶別離居。
第六十四戒者，不得起瞋恚。

第六十五戒者，不得罵人作奴婢。
第六十六戒者，不得立小便。
第六十七戒者，不得黥奴婢面。

第六十八戒者，不得咒人命死敗。
第六十九戒者，不得快人死敗。
第七十戒者，不得亂縱行遊。

第七十一戒者，不得張目視人。
第七十二戒者，不得吐舌向人。

第七十三戒者，不得橫求人物。
第七十四戒者，不得強乞擾亂百姓。

第七十五戒者，不得爲世俗人賦斂。

第七十六戒者，不得爲世俗人作禮頭主。

第七十七戒者，不得爲人圖山，立塚宅起屋。

第七十八戒者，不得干知星文，卜相天時。

第七十九戒者，不得漁獵傷殺衆

生。

第八十戒者，不得姪洩，別離夫妻。

第八十一戒者，不得視弟子偏頗。
視弟子當如其子。

第八十二戒者，不得奪人冥中火。

第八十三戒者，不得馳騁世俗，吊問死喪。
宜密哀邱之。

第八十四戒者，不得與俗人共相群黨，更相嘲毀。

第八十五戒者，不得敗人成功，言是己德。

第八十六戒者，不得擇好室舍，好牀卧息。

第八十七戒者，不得訾毀人物以爲惡。

第八十八戒者，不得自舉己物以爲好。

第八十九戒者，不得驚惶令恐怖。

第九十戒者，不得擇人飲食爲好惡。

第九十一戒者，不得爲人往來惡言。

第九十二戒者，不得以縣官中傷人。

第九十三戒者，不得預人間論議曲直事。

第九十四戒者，不得強取人物以恩惠。

第九十五戒者，不得冬天發掘地蟄藏。

第九十六戒者，不得輕行妄遊，日月馳騁。

第九十七戒者，不得妄上樹探巢破卵。

第九十八戒者，不得籠罩鳥獸。

第九十九戒者，不得穿人家壁，闖看人家內婦女。

第一百戒者，不得以穢污之物投井中。

第一百一戒者，不得塞池井。

第一百二戒者，不得欺罔老小。

第一百三戒者，不得妄發讀人書。

第一百四戒者，不得誘枉良人爲奴婢。

第一百五戒者，不得積聚財寶，以

招凶禍。

第一百六戒者，不得貪戀居家。

第一百七戒者，不得藏埋器物。

第一百八戒者，不得破壞見錢。

第一百九戒者，不得在平地然火。

第一百十戒者，不得施槍棘著道中。

第一百十一戒者，不得多言弄口舌。

第一百十二戒者，不得將書字之物，自投埋於厠前。

第一百十三戒者，不得向他鬼神禮拜。

第一百十四戒者，不得畜世俗占事八神圖，亦不得習。

第一百十五戒者，不得與兵人爲侶。

第一百十六戒者，不得便溺生草上及人所食之水。

第一百十七戒者，不得與寡婦親。

第一百十八戒者，不得祠祀鬼神以求僥倖。

第一百十九戒者，不得爲人多作

忌諱。

第一百二十戒者，不得自多忌諱。

第一百二十一戒者，不得妄輕入江海中浴。

第一百二十二戒者，不得妄假舉人物以為禮賂。

第一百二十三戒者，不得為人保賃券契，賣田宅奴婢之事。

第一百二十四戒者，不得與淫泆之家相往來。

第一百二十五戒者，不得錄毒藥著器中。

第一百二十六戒者，不得高厲聲每含笑。

第一百二十七戒者，不得為人作詞訟，和人官事。

第一百二十八戒者，不得趣求密謀之書讀之。

第一百二十九戒者，不得妄鞭打六畜。

第一百三十戒者，不得無故走馬馳車。

第一百三十一戒者，不得以手團

食殘噉衆肴。

第一百三十二戒者，不得驚鳥獸。

第一百三十三戒者，不得評論人家食飲善惡。

第一百三十四戒者，不得妄開決陂湖。

第一百三十五戒者，不得自銜治病。病家自來請求，乃可往之。

第一百三十六戒者，不得獨行。行與人俱。

第一百三十七戒者，不得為人謀合私利。

第一百三十八戒者，不得廣求寶物。

第一百三十九戒者，不得帶女人入山，皆應別岐異室。

第一百四十戒者，不得叛本逐末。第一百四十一戒者，當隨可供養，勿多難。

第一百四十二戒者，當念清儉法，慕清賢鹿食牛飲。

第一百四十三戒者，當慎所投止。先行視之，勿所驚觸。

第一百四十四戒者，當迴向正一，勿得習俗事。

第一百四十五戒者，當有大意秉志，不得雜犯負違三尊教命。

第一百四十六戒者，當勤避嫌疑，勿以父母狎恩事君。

第一百四十七戒者，當勤求長生，晝夜勿倦。

第一百四十八戒者，當勤避惡難，勿貪祿苟榮。

第一百四十九戒者，當勤服氣斷穀，為不死道。

第一百五十戒者，當勤避兇人，勿棄背朋友。

第一百五十一戒者，每飲食從一邊起，勿勤咤言美惡。

第一百五十二戒者，每燒香，當為萬姓請願，令天下太平，勿但為己。

第一百五十三戒者，每人呼汝為祭酒，汝顧畏人，勿自輕躁，為百姓所笑。

第一百五十四戒者，每得萬人食，常咒願令主人得福，一切飽滿。

第一百五十五戒者，每得萬人食，常咒願令主人得福，一切飽滿。

第一百五十五戒者，無事不得多聚會衆，飲食狼籍。

第一百五十六戒者，無事不得妄多受人禮敬。

第一百五十七戒者，入國必先問賢人善士，當親依之。

第一百五十八戒者，入他國必先問其所禁忌。

第一百五十九戒者，入人家必先問人家尊老名諱。

第一百六十戒者，至人家不得希望萬姓主人飲食。

第一百六十一戒者，女人不得與男子同行。

第一百六十二戒者，男不得與女人冥室中共語。

第一百六十三戒者，男女衣不得過畜三通。

第一百六十四戒者，男女不得共坐食飲，交手授受。

第一百六十五戒者，天有災變，水旱不調，勿得患厭。

第一百六十六戒者，世人惡多善

少，勿悒悒道自護法。

第一百六十七戒者，人有罵汝，汝但服勿應答。

第一百六十八戒者，人侵謗汝，汝但當自修啓大道，勿憂怖以損精神。

第一百六十九戒者，人惡向汝，汝重以善往。善之穰惡，猶水澆火。

第一百七十戒者，人有持物與甲，而乙不得有恨人不與己。

第一百七十一戒者，人爲己聲譽勿喜，爲己毀辱亦不得嗔。

第一百七十二戒者，人爲己殺鳥獸魚等，皆不得食。

第一百七十三戒者，見殺不食。

第一百七十四戒者，見羶不食。

第一百七十五戒者，不知所從來，可食不可思美。

第一百七十六戒者，能斷衆生六畜之肉爲第一，不然則犯戒。

第一百七十七戒者，能食菜最佳，而不可向王者。

第一百七十九戒者，行無居家，可投便止，宿樹木巖石間，諷誦百八十戒，神自營衛汝，三重兵、賊、鬼、虎，不敢近汝。

第一百八十戒者，行戒不犯，犯即能悔，改往修來，勸人奉受，念戒不念惡，廣度一切，吾拜神真，神真成汝。

右長存要律百八十戒

老君告弟子曰：往昔諸賢仙聖，皆從百八十戒得道；道無形，從師得成。道不可度，師不可輕。弟子稽首，再拜受命矣。

太上老君經律

（李剛點校）

063 太上經戒

經名：太上經戒。撰人不詳，約出於南北朝。纂集上清、靈寶及天師道戒律六種。一卷。底本出處：《正統道藏》洞神部戒律類。參校本：《雲笈七籤》卷三十八。

十戒

《玉清經本起品》云：道言，昔元始天尊與諸賢聖，億億萬衆，處處周旋，最後下觀棄賢世界，有一國王名曰德正直，利根辯慧，爲衆生故，而爲導首。遍告國內臣民男女言：今得太平，天下無事，火災消滅，兵刃不起，百穀成熟，皆由道恩，非自然也。何以報道？罔極之恩，唯當傾心盡意，恭敬供養，造立宮觀，香花燈燭，晨夕禮誦，齋

戒悔過，以求福祐。於是天尊命巨靈仙人而告王曰：子爲一國之主，天下所推，凡間之貴，不先於此，但以正法治化，不枉人民，亦足功感上天，何煩祕要？祕要之道，卒難可聞，然祕要之階，不過慈善，慈善之法，不違科戒。戒有多種，人亦多品。上品之人，身先無犯，亦無所持。中品之人，心有上下，觀境即變，以戒自制，不令放逸。如此之人，或受十戒、五戒，以自防護。下品之人，惡心萬般，難可禁制。下品之中，復有二品：上品者，身欲奉戒，或受一百九十九戒，或受觀身三百大戒，或受千二百威儀之戒，以自防保，令無越逸。下品者，身同禽獸，雖有人形，而無人心，縱受其戒，終無所益。今且受第二中戒，十種科禁。入道初門，諸人聞說，歡喜抃蹈，悉皆俯伏而奉戒言。天尊告曰：

第一戒者，不得違戾父母、師長，反逆不孝。第二戒者，不得殺生屠宰，割截物命。第三戒者，不得叛逆君王，謀害家國。第四戒者，不得淫亂骨肉，

姑姨姊妹及他婦女。第五戒者，不得毀謗道法，輕泄經文。第六戒者，不得污漫靜壇，單衣裸露。第七戒者，不得欺凌孤貧，奪人財物。第八戒者，不得裸露三光，厭棄老病。第九戒者，不得耽酒任性，兩舌惡口。第十戒者，不得兇豪，自任自作威利。

右此十戒當終身奉持。

大戒上品

并序

《上品經》云：太極仙公於天台山靜齋念道，稽首禮拜，請問太極法師徐來勒曰：弟子有幸，得侍對天尊，自聞微言，彌綸萬劫，洞觀道源，過泰之歡，莫有諭也。顧玄少好神仙，白日飛騰之道，必想上聖，恒以髣髴，大經微遠，妙蹟難通，將稟口訣，釋我冥津，洞暢虛漠，有無都盡矣。近而未究人生宿世因緣，本行之由，今願天尊覺所未悟。是時太上玄高真人嘯咏步虛洞章，歡然含豫輝金顏而言曰：子以累劫念道，致太極玉名，寄慧人中，將獨

步玉京，超逸三界，巍巍乎太上仙公之任矣，故慈心於天人，念度於後學也。常以外身濟物，有德而弗名，玄都所詮，諒不虛矣。而謂大極真人曰：卿受太上虛皇道君之教，爲其師保，亦必盡教以高上大洞之淵蹟也，豈俟彼多陳乎！吾受任忝爲都教之法師，至於執卷由子矣。

太極真人答曰：此童真之人，名刊金簡，才質清遠景秀，太上玄微洞虛，故當爲仙公之任，弘道大度者也。吾忝受教化，愧不足爲彼宗匠。太上有命，何敢不傾韞哉！衆妙之統，仰賴於法師矣。

太極真人又曰：夫道，無也。彌綸無窮，子欲尋之，近在我身，乃復有也，因有以入無，積念以得妙。萬物芸芸，譬於幻耳，皆當歸空，人身亦然。身死神逝，喻之如屋，屋壞則人不立，身敗則神不居。當制念以定志，靜身以安神，寶氣以存精，思慮兼忘，冥想內視，則身神並一，身神並一，近爲真身也。此實由宿世本行，積念累感，功

濟一切，德廢萬物。因緣輪轉，罪福相對，生死相滅，貴賤相使，賢愚相傾，貧富相欺，善惡相顯，其苦無量，皆人行願所得也，非道、非天、非地、非人，萬物所爲矣，正由心耳。此對既鍾，亦難脫也。弱喪之徒，信道者少，宿命者多。不積善定念，修德理身，而欲忽德忘身，強求外物，其可得哉！既已不剋，莫不傷身矣。故有道之士，取諸我身，無求乎人。道言修身，其德乃真，斯之謂也。夫學道不受大智慧道行本願上品大戒，無緣上仙也。子有宿命，是以見此經。其文隱秘，立信效心，然後而傳，不可妄示，不信必發異念，異念既生，彼此獲罪，是故藏之於無待，有應爲仙王者，乃告焉。是時雲龍踊躍，諸天散華，飛香奏煙，山海靜波，觸類竄默，鬼魅消亡，神魔降伏，五苦俱解，長離地獄，惡者返善，信順受福爾。乃命太極侍經仙人劉文靜，披雲韞而授經也。

太極真人曰：宿世禮奉經師，口誦身行，布施厄困，願樂三寶，君親忠

孝，遠纂山水，栖憩賢儒，虛心有道，燒香散華，護度一切，修道補過，信順宿命，靜思忍情。其行也，上可昇仙度世，下可輪轉富貴，生爲人尊，容貌偉秀，才智清遠，爲人之道，莫不具足。夫居世富貴，笑於貧賤，今報以貧賤。居世好殺，今報以傷殺。居世輕易笑於醜陋，今報以醜陋。居世聰明不教於人，今報以頑塞。居世常康笑於困病，今報以滯疾。居世不信通，笑於經教，今報以下愚，長與道隔。女人居世，奪人壻者，今報以少寡。男子居世，誘人婦女，今報以鰥獨。居世發心爲夫妻，而後世不得俱生人道，死爲鬼魅，今報以本念，成於邪病。自非大法，莫有解其宿纏而消此邪病矣。夫爲父母、兄弟、姊妹、夫妻、君臣、師保、朋友，皆先世所念願，爲因緣展轉相生，莫不有對者哉，故曰倚伏難窮矣！唯學仙道士，當兼忘因緣，絕滅生死，同歸乎玄，以入妙門。能知是者，始可與言學道之本也。

若見居家妻子，當願一切早出愛

慾，攝意奉戒。

若見飲酒，當願一切制於命門，以遠禍亂。

若見彩女，當願一切守情忍色，志慕賢貞。

若見淫人，當願一切除棄邪念，翹心禁戒。

若見婦人，當願一切忍割浮華，樂道自娛。

若見貞人，當願一切履信正化，日入法門。

若見衆人，當願一切推仁無爭，懷道安世。

若見善人，當願一切時刻存念，仰軌其道。

若見惡人，當願一切棄凶即吉，不犯王法。

若見貧人，當願一切損身施惠，後受大福。

若見富人，當願一切救濟萬物，世世受祿。

若見貴人，當願一切承其教旨，悉令典訓。

若見賤人，當願一切勤修匪懈，各得所爲。

若見帝王，當願一切奉仰王道，孝如父母。

若見主相，當願一切受其教制，四方歸仁。

若見兵甲，當願一切各念仁心，天下讓賢。

若見王子，當願一切日歌太平，係國承家。

若見賢人，當願一切履行其德，道爲世宗。

若見法師，當願一切明解法度，得道無爲。

若見棲山道士，當願一切悉見法門，速得昇仙。

若見教化，當願一切親受聖教，皆爲淵博。

若見聖人，當願一切尊禮侍見，諸國並瞻。

若見仙人，當願一切真道悉成，飛昇天堂。

若見城郭，當願一切嚴整修飾，以

道爲基。

若見大國，當願一切歸宗慕德，若水注海。

若見小國，當願一切知止虛沖，安其所居。

若見市朝，當願一切群賢雲萃，悉弘正道。

若見靜觀，當願一切功德巍巍，天人得道。

若見齋戒行香，當願一切道德日新，庠序雅正。

若見誦經，當願一切盡上高座，咸聞聖音。

若見經教，當願一切各各受讀禮習，普行教化。

若見樓觀，當願一切洞觀十方，無所隱藏。

若見高山，當願一切智思無量，輔成家國。

若見栖憩茂林，當願一切安居自在，廕庇含識。

若見好學，當願一切得成師宗，養徒敷教。

若見淨手，當願一切常執經書，無

時暫輟。

若見善口，當願一切耽味洞經，日

新不厭。

若見動足，當願一切超步三界，飛

行上清。

若見靜止，當願一切滅景停真，安

閑空寂。

若見飲食，當願一切棄累入淨，存

得道味。

若見大藏，當願一切除其災害，施

為福田。

若見疾病，當願一切以道自安，免

此苦厄。

若見死喪，當願一切學道常存，濟

度三徒。

若見畋獵，當願一切不為始終，入

為無罪。

若見夷狄，當願一切得生中國，不

生邊地。

若見少年，當願一切及時學問，遂

成學名。

若見老病，當願一切以道攝生，不

更衰老。

若見三光，當願一切普明靈曜，閻

冥即消。

若見雲雨，當願一切惠澤盈溢，無

所不宜。

若見素雪，當願一切常居潔白，逍

遙自在。

若見靈風，當願一切韞懷披散，德

流遐邇。

若見淨水，當願一切洗垢清虛，平

等其心。

若見名香，當願一切受慈芳淨，衆

穢肅然。

若見好華，當願一切樂散諸聖，相

好具足。

若見車馬，當願一切得道無為，乘

鳳駕龍。

若見絃歌，當願一切翫經歎法，以

道娛樂。

若見福食，當願一切無不飽滿，世

享天厨，德流後人，如水歸海，宗廟裒

長，常居貴盛，世與四輩，俱生王家。

若見散施，當願一切禍滅九陰，福

起十方，德如山海，莫不興隆，七祖生天，子孫賢忠，富貴巍巍，所欲皆從，學道飛仙，駕雲乘龍。

道士坐卧，常願我等，四大合德，

同體道真，長存玄都，師友自然，濟度

十方，天下受恩，逍遙無為，洞觀妙門。

禮經祝三首

真人口訣云：侍經仙童玉女，聞此祝皆歡喜而祐兆身也。是大經悉用此祝而禮拜矣。若冥心禮經者，亦心祝其文，乃上仙之祕祝也。

第一首

樂法以為妻，愛經如珠玉。持戒制六情，念道遣所欲。淡泊正氣停，蕭然神靜嘿。天魔並敬護，世世受大福。

第二首

鬱鬱家國盛，濟濟經道興。天人同其願，縹緲入大乘。因心立福田，摩法輪昇。七祖生天堂，我身白日騰。

第三首

大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

太極真人曰：學昇仙之道，當立千二百善功，終不受報。立功三千，白

日登天，皆濟人應死之難也。施惠其人尤善矣！學道當令衆行合法，廣建福田，發大慈之心，動靜常起道意。能如是也，吐納、服藥、佩符，讀經精進，終身不倦，豈有不得仙乎？人無此德，雖服藥、佩符、讀經齋戒，故終命而不驗矣。學士明思要言。

太極真人曰：立三百善功，可得長存地仙。若一功不全，則更從一始，而都失前功矣。常有其念在於心膂者，則是也。若導人作善，即爲善功也。

太極真人曰：常念嘯詠洞經，修行大慈，先人後身，揚善化惡，斷絕衆緣，滅念守虛，心如太玄，爲道是求，始謂能言神仙之道也。

太極真人曰：吾受昔太極智慧十善勸助德戒於高上大道虛皇，世世宗奉修行大法，度人甚易，此自然之福也。太上以普教天人，令各得本願，始入法門，長存無爲，不受十苦八難罪對，罷散地獄，休息三官，日日寧閉，世世榮樂，咸脫羅網，後生安泰，天性恬

然，所願隨其，得戒如上，以傳賢信。

十善勸戒曰：勸助禮敬三寶，供養法師，令人世爲君子，賢孝高才，榮貴巍巍，生爲人尊，門族昌熾。三寶者，謂道經師也。能養生，教善行，爲人範，是名法師也。

戒曰：勸助治寫經書，令人世世聰明，博聞妙蹟，恒值聖世，見諸經教，能誦章句。

戒曰：勸助建齋淨治，令人世世門戶高貴，身登天堂，飲食自然，常居無爲。

戒曰：勸助香油衆供，令人世世芳盛，香潔光明，容貌絕偉，天姿高秀。

戒曰：勸助法師法服，令人世世閑雅，逍遙中國，不墮邊夷，男女端正，冠冕玉珮，稱諸身飾。

戒曰：勸助國王父母，子民忠孝，令人世世多嗣，男女賢儒，不受諸苦。

戒曰：勸助齋靖讀經，令人世世不墮地獄，即昇天堂，禮見衆聖，速得返形化生王家，在意所欲，玩好備足，七祖同歡，善緣悉備，終始榮樂道法，轉至將得仙道。

戒曰：勸助衆人學經，令人世世才智洞達，動靜威儀，常爲人師。

戒曰：勸助一切布施，諫諍善事，令人世世壽考富樂，常無怨惱。

戒曰：勸助一切民人，除嫉去欲，履行衆善，令人世世安樂，禍亂不生，病者自愈，仕官高遷，爲衆所仰，莫不吉祐，門戶清貴，天人愛育，神魔恒護，常生福地。

太極真人曰：人之行惡，莫大於嫉殺、貪奢、驕淫也，若此一在心，伐爾年命矣。挾之以學神仙者，不亦悲乎！

太霄琅書十善十惡

十善既行，十惡自息。息惡行善，大慈德成。是以上品戒云：卹死度生，救疾治病，施惠窮困，割己濟物，奉侍師主，營建靜舍，書經校定，修齋念道，退身讓義，不爭功名，宣化愚俗，諫諍解惡，邊道立井，植種果林，教化童蒙，勸人作善，施爲可法，動靜可觀，教

制可軌，行常使然。十善遍行，謂之道士。不修善功，徒勞山林。能信斯旨，勤尋諸戒。戒部甚多，隨緣所得，無數諸戒，無央科律，皆輔一神，攝於三業。三業者，口身心也。運動造作，善惡無量。無量善惡，十爲惡端：一者妄言。二者綺語。三者兩舌。四者罵詈。此四口惡，返之則善。五者貪愛。六者竊盜。七者姦淫。此三者，屬身。八者嫉妬。九者恚瞋。十者邪癡。此三者，屬心。心業最重，爲十惡根。斷絕十惡，修十善本。實言直語，通和講誦，謙讓捨財，內外貞潔，慶讚懽喜，敬信三尊。備此十善，十惡永除。

思微定志經十戒

一者不殺，當念衆生。二者不姪，犯人婦女。三者不盜，取非義財。四者不欺，善惡反論。五者不醉，常思淨行。六者宗親和睦，無有非親。七者見人善事，心助歡喜。八者見人有憂，助爲作福。九者彼來加我，志在不報。

十者一切未得道，我有不望。

經云：時有十二年少，處世間樂，日日相就，共作好食，酣飲嬉戲，或復論議持戒之難易。天尊以道眼，遙見此人前世曾爲人師，而祕悽經典，逮諸弟子，於道之心亦復猶豫，因此微緣，猶可度耳。於是天尊化作凡人，從會中過，託之乞食，因悉共語諸年少輩，復論如初。中一人曰：我數隨兄至安樂山，見諸道士，悉持十戒，肅肅甚佳，洎至於死，魂神所在，亦當不虛。但其十戒，人持難悉從耳。化人曰：持此甚易，違此甚難。諸人問化人曰：云何持戒則易，不持返難？化人曰：立身如戒，上不畏天子，亦不畏鬼神，何謂之難？違戒之者，悉畏之是難也。其中一人曰：餘戒可持，惟酒難斷，所以者何？我先服散，散者發之日，非酒不解，是故難耳。化人曰：散發所須，此乃是藥，將養四大，藥通可通，但勿過量耳。一人曰：餘事即可，妄語其難，所以者何？若有密事，在尊長前，應爲隱諱，而人見問不得欺，欺即犯

戒，是故爲難。化人曰：事有隱諱，而人見問不得欺，欺即犯戒，是故爲難。化人曰：事有隱諱，理有方便，此亦可通，但勿善惡返論，說其長短耳。一人曰：餘戒即可，唯盜戒難，小小之間，以挂犯目。化人曰：大事實難，小小之間，益可慎之。而說偈曰：

何不受盜戒，不受盜亦難。孰云闇昧中，中有記盜官。取一年年倍，倍殊不寬。以手捧鎔銅，燒口煮心肝。一朝言此苦，終年猶心酸。何不受此戒，保持必令完。我信彼亦信，在在無不安。安坐招靈人，永享長年歡。

一人曰：餘戒悉易，淫最難斷。所以爾者，我曾履斯事，數隨兄中食，當中食時，自云一日精進，無不過理，亦謂身後當得此齋戒之福。至是夕夜，是我所愍，輒來狡獪，雖苦加抑迨，不覺已爾，每每如此，是知最難。化人曰：色者是想爾，想悉是空，何有色耶？但先自觀身，知身無寄，便知無色，何可不忍？且淫慾頗恣，如飲鹹水，飲多渴多，唯死而已，何有馱足？

而說偈曰：

色慾劇於渴，小忍差何度，何爲進鹹水，水鹹益渴故。子能善解渴，當飲天甘露，甘露香且薰，通體皆流布。天人尋香降，玄趣自然悟，熙熙永無爲，長保九天祚。

一人曰：餘悉可從，唯煞難戒，所以者何？我好噉雞，一食無雞，了自無味，數日便瘦。化人曰：賢者，肥爲人患，瘦即體輕，用肥何爲？即說偈曰：

賢賢戒其煞，亦無懷煞想，衆生雖微微，亦悉樂生長。如何害彼命，而用以自養？自養今一時，累汝自然爽，長淪三塗中，辛苦還復往。善惡各有緣，譬如呼有響。何不改性行，慈心以自獎？真人携手遊，逍遙雲景上。

說此偈已，化人見大威，變極道之姿，侍從僚屬，鈞天大樂，非可目名，返於上方。諸人悉見，喜懼交集，并聞要說，意解開悟，俱登道果。

妙林經二十七戒

元始天尊告諸四衆：一切衆生，貪著有爲，欣生惡死，意雖求生，由造死業，不持戒行，假使長壽，猶如老樹，有何殊別？若持戒行，死補天官，升仙自在。人雖有王公之位，上至帝王，死皆重罪，無益魂神，受苦不可堪忍。善男子，汝等思惟，明奉戒行，直心行道。吾爲汝說，天下萬物，無有長存，有死有生，有成有敗，日出則沒，月滿則虧，從古至今，誰能違返？若有道德，不生不滅。修善者，今日亦善，今日亦善，今時亦善，善善積德，諸行修足，善念護持，令入法寶。戒曰：

不得盜竊人物。不得妄取人財。
不得妄言綺語。不得因恨殺人。
不得貪嗔癡狠。不得慢老欺人。
不得咒詛毒心。不得罵詈高聲。
不得訾毀謗人。不得兩舌邪佞。
不得評人長短。不得好言人惡。
不得毀善自譽。不得自驕我慢。

不得毒畜藥人。不是投書譖善。
不得輕慢經教。不得毀謗聖文。
不得恃威凌物。不得貪姪好色。
不得好殺物命。不得耽酒迷狂。
不得殺生淫祀。不得燒野山林。
不得評論師長。不得貪惜財賄。
不得言人陰事。

老君二十七戒

行無爲，行柔弱，行守雌勿先動。
右上最三行。
行無名，行清淨，行諸善。
右中最三行。
行忠孝，行知足，行推讓。
右下最三行。
此九行，二篇八十一章，集合爲道舍，尊卑同科。九行備者，神仙；六行備者，壽；三行備者，增年。
戒勿費用精神。戒勿食含血之物，樂其美色。戒勿傷王氣。戒勿貪寶貨。
戒勿忘道。戒勿爲妄動。戒勿枝形名道。戒勿殺生。戒勿貪功名。

右上九戒。

戒勿爲耳目鼻口所娛。戒常當謙讓。戒舉百事詳心勿惚恫。戒勿學邪文。戒勿資身，好衣美食。戒勿求名譽。戒勿貪高榮強求。戒勿輕躁。戒勿盈溢。

右中九戒。

戒勿與人諍曲直，得失避之。戒勿爲諸惡。戒勿厭貧賤強求富貴。戒勿多忌諱。戒勿稱聖人大名。戒勿強梁。戒勿禱祠鬼神。戒勿自是。戒勿樂兵。

右下九戒。

此二十七戒，二篇共合爲道淵，尊卑同行。上備者，神仙；持十八戒備者，壽；持九戒備者，增年不橫夭矣。

太上經戒

①「返」即爲「反」。

（李剛點校）

064 老子說百八十戒序

(敦煌本)

經名：老子說百八十戒序。撰人不詳，傳說出於漢代，與《太平經》同時。實際應出於南北朝。一卷。底本出處：敦煌 P. 4731 + P. 4562 號殘抄本。參校本：《雲笈七籤》卷三十九（簡稱七籤）^①。

昔周之末赧王之時，始出太〔平之道太清之〕教。老子至瑯琊授道與干君。〔干君受道法，遂〕以得道，拜為真人。又傳《太平〔經〕一百七十卷》^②，甲乙十部。後帛君篤病，從干君受道。受〔道後〕病除差，遂復得道，拜為神人^③。今瑯琊有大木蘭樹，干帛二君所治處也。幽王時，老子西入關，教胡國，授佛道。佛是胡言，於漢言曰道

也，同是一正之治炁。修佛道亦得長生，其道清靜。教胡還，當入漢中，過瑯琊。瑯琊干君得見，老子乃責數干君曰：吾前授汝道，助國扶命，憂念萬民，拜署男女祭酒，廣化愚人，分布子弟，使上感天心，下動地祇，當令王者歡心。而自頃以來，吾遙從千萬億里觀之，諸男女祭酒，託老子位^④，貪財好色，擅己自用，更相是非，各謂我心正，言彼非真，利於供養，欲人奉己，憎惡同道，妬賢嫉財^⑤，驕恣自大，禁止百姓當來從我。我道最正，彼非真也，皆不當爾，故來相語。干室^⑥稽首再拜，伏地叩頭百下，唯唯〔告曰〕^⑦：太上，從今日已去，不智^⑧。當何以救諸男女祭酒之重罪，令祭酒輩各得生活，既蒙道祐，可得昇仙，壽終之後，不入九地之下地獄之罪。非但祭酒，祭酒復染誤萬民，萬民無知法則。祭酒之罪，臣之過咎，咎在臣也。唯願太上赦既往之罪失察，臣修將來之善耳。臣干室^⑨死罪死罪。

老子曰：可止止^⑩。安意定座。吾

恐大道遂壞，萬民喪命，一兩祭酒死入九地之下，不足痛也。吾但念萬民痛耳。汝善聽，善聽著心中^⑪。當為後世萬民作法則，勅諸男女祭酒^⑫。老君曰：人生雖有壽萬年，不持誠律，與老樹久石^⑬何異。寧一日持誠，為道德之人而死，不犯惡而生。持誠而上補天官，尸解昇仙。世人死有重罪^⑭，〔無益魂神，魂神受罪耳。祭酒明奉行之，乃曰：諸祭酒各明聽，天下萬民無有長存，人生有死，物成有敗，日出則沒，月滿則缺，從古至今，誰能長存者，唯道德可久耳。今月亦善，今日亦善，今時亦善，諸賢亦善，師甲亦善，弟子亦善，萬神備具，吏兵皆到。今吾以諸賢故，念萬民之命故，授王甲禁戒重律，當三遍讀之。然後說戒曰〕^⑮。

^① P. 4731 + P. 4562 抄本首尾均殘，拼合後卷首仍有殘損，標題僅存「老子」二字，據經文內容可知應為《老子說百八十戒序》。經文殘存三十三行，大致與《太上老君經律》及《雲笈七籤》卷三十九所載《老君說一百八十戒并叙》之序文部分相當，但文字略有殘損或不同。今據《七籤》

校補敦煌本部分文字。無關文義之異文，不出校記。

- ② 以上方括號中文字原本殘損，據《七籤》補。
- ③ 「神人」，《七籤》作「真人」。
- ④ 「託老子位」，《七籤》作「託老君尊位」。
- ⑤ 「財」，《七籤》作「才」。
- ⑥ ⑨ 「千室」，《七籤》作「千吉」。
- ⑦ 「告曰」，敦煌本無此二字，文義不通，據《七籤》補。
- ⑧ 「不智」，《七籤》作「不知」。
- ⑬ 「可止止」，《七籤》作「可正」。
- ⑪ 「汝善聽善聽著心中」，《七籤》此句作「汝當善聽，記錄心中」。
- ⑫ 「勅諸男女祭酒」，《七籤》此句後有「命改往行，從今之善」八字。
- ⑬ 「久石」，《七籤》作「朽石」。
- ⑭ 敦煌本止於此處，以下括號中文字，據《七籤》補。
- ⑮ 《七籤》本此句後有戒律一百八十條，文繁不錄。

(王卡點校)

065 老子說法食禁誡經

經名：老子說法食禁誡經。撰人不詳，似出於南北朝或隋唐之際。《正統道藏》未收，《道藏缺經目錄》著錄。底本出處：敦煌 P. 2447 抄本。

老子曰：吾與天地萬物同在道中，共分一氣，稟受形神，而獨能長生不死，前天後天變化常存者，由吾抱道積德，保神養氣，不犯諸惡故也。人民所以夭折多病，衆厄〔死〕亡，不盡天筭者，以其不奉禁誡，縱情侈欲，生煞无度，飲食不啻故也。上古之時，唯食元氣，壽遐億萬，而唯守道，不起衆心。及至末世，代薄時澆，諸見爭起，群橘（譎）競興，不能淳一，飲食傷性。故食土者不如食草，食草不如食穀，食穀不如食芝英，食芝英不如食金玉，食金玉

不如食元氣，食元氣不如不食。不食者，天地雖沒而身常存。愚夫淺夾（狹），不能守志以求長生，啖食無度，煞害衆生，臭穢滿腹，罪負纏身，意牽六欲，心起萬災。而求不死，其可得乎？

老子曰：凡食有五，一氣、二藥、三穀、四菓、五菜。氣謂導引胎息，吐故納新，呼吸元精，調和六氣。藥謂金玉、芝英、黃精、苟杞、白朮、松柏，調和血液，保養形神，安魂定志，辟除風濕，益命延齡。穀謂黍稷麻菱^①、秬（粳）稻諸豆，依法取食，充實藏府，守氣和身。菓謂棗栗雜菓，通生津液。菜謂草木花葉而可食者，隨分取啖。唯此五者，惣謂法食，可得長生。夫天地晝夜，十有二時，陰陽代謝，氣有生煞。從夜半至禺中爲生氣，須咽漱吐納，飲食滋液。從日中至人定爲死〔氣〕，宜導引呼吸。道士常須夜半、禺中飲食，若餌藥服氣，聽於餘時，然不如生氣時也。

說禁誡卅五條：

凡食皆先禮拜十方諸天三寶，願

念悔過。

凡食皆須清淨，先獻諸天三寶，一切賢聖，存想身中三一及五神。存神分明，已安坐定志，隨時咽氣，然後如法食矣。

凡食皆先出諸食別器中，食竟散諸鳥獸蟲魚。

凡食皆不得男女同食。

凡食皆祝漱〔後〕食。

凡食皆別畜巾器。

凡食皆不得與人同盤器。

凡食皆不得人犯觸。

凡食皆不得人臨上。

凡食皆不得求其精細。

凡食皆不得食有餘。

凡食皆不得中道起坐。

凡食皆不得中道休息。

食從遠來勿食。

食從死家來勿食。

食從產家來勿食。

食從盜家來勿食。

食從淫家來勿食。

鳥獸蟲魚食餘勿食。

祠祀神廟鬼神食勿食。

酒肉葷穢食勿食。

米菱餅菓落穢處來勿食。

米菱餅菓犯灰土勿食。

孩子及婦人穢犯食勿食。

飛鳥穢污米菱餅勿食。

非清淨器具勿食。

非信心家食勿食。

非時食勿食。

非法食勿食。

凡道士皆當清淨獨食，勿使非同

志人犯觸穢雜。

凡道士皆當隨分精羸，不得心生

貪求甘美諸味。

凡道士食竟，餘悉散施，勿得貯

積。

凡常住衆，食皆有所由，不得輒惠人爲恩。

凡道士受人食，皆當爲主人懺悔發願，持心誦經念道，以酬其福。

道士臨食，若見有道，先當與之；若見賢人，先當與之；若見老病，先當與之；若見飢寒，先當與之；若見法

師，先當與之。

老子曰：道士凡食能持此禁誡，常不違犯，諸天爲人延年益筭，增添衣食，世世繁昌，永享自然。

老子說法食禁誡經

①「菱」，原本作「麥」，當係假借字。後同此。

（王卡點校）

066 女青鬼律

經名：女青鬼律。撰人不詳，約出於魏晉南北朝。原本八卷，現存六卷。底本出處：《正統道藏》洞神部戒律類。

女青鬼律卷之一

律曰：天地初生，元氣施行，萬神布氣，無有醜逆妖邪不正之鬼，男孝女貞，君禮臣忠，六合如一，无有患害。自後天皇元年以來，轉生百巧，不信大道，五方逆殺，疫氣漸興，虎狼萬獸，受氣長大，百蟲蛇魅，與日滋甚。天有六十日，日有一神。神直一日，日有千鬼飛行，不可禁止。大道不禁，天師不勅，放縱天下，凶凶相逐。唯任殺中民，死者千億。太上大道不忍見之，二年七月七日日中時下此鬼律八卷，紀

天下鬼神姓名吉凶之術，以勅天師張道陵，使勅鬼神，不得妄轉東西南北。後有道男女生，見吾祕經，知鬼姓名皆吉，萬鬼不干，千神寶伏。奉行如律，不得妄傳非其人，傳非其人，灾流七世，勿怨道咎。師紀姓名譜曰：

高天萬丈鬼，百鬼，中皇姓，係天六方鬼之主，住在太山東南角道水中，諸死人所歸。鬼亦上天，對問考罰，月上。上古以來，已三萬六千餘年，如有三萬六千神與鬼等數。

南鄉三老鬼，俗五道鬼，姓車名匿，主諸死人錄籍，考計生人罪，皆向之。此鬼在太山西北角，亦有官屬。太山有召一還。此鬼天煞，唯聞文書，上不著天，下不著地。

雲中无頭壞軍死將逆惡大鬼，姓李名三可。

北斗三台招搖大鬼，姓伴名玩。

西斗三台鬼，姓車名球。

南斗三台鬼，姓溟名温夫。

中斗三台鬼，姓王名咸。

東斗三台鬼，姓角名車。

右五斗煞鬼名姓，主煞人。

東方凶神鬼，姓堅名角子。

南方凶神鬼，姓精名玉，又名後竹。

西方凶神鬼，姓天邪名古子。抑救切

北方凶神鬼，姓王名精。

中央凶神鬼，姓戴名應子。

右五方凶神鬼姓名，主煞人。

五方逆煞注鬼名鬪。

五方直符注鬼名結，天考逆煞直符鬼

名天殃，一名越。

天一神長惡子孫鬼，名高翠子。

天一神長傷邊子鬼，名譚契子。

天飛行長環子鬼，名梁扶，一名汝夫。

天信義長鬼子，名太紫元。

右五鬼，三官帝常遣司察人罪。鬼

恒在人間，不可得見。

天雲中无名遊行鬼，長三萬六千丈。

天雲中遊行鬼，名瓊子，又名憍。音熙

天雲中二十八宿直煞鬼，名域子。

右三鬼，天陰陽鬼，主煞生人。

東方青帝直符鬼，名伯神子，一名果子。

子。

西方白帝直符鬼，名伯和子。

南方赤帝直符鬼，名泰伯子。

北方黑帝直符鬼，名忝衣子。

中央黃帝直符鬼，名伯溪，一名淵。

右五方直符鬼，常煞人六畜，主作光

怪死鬼，先人所使。

東方青帝无名煞鬼，姓元名谷玄。從東

方甲乙君使令，以甲乙日、辰日午時煞也

南方赤帝，姓變名乳。

西方白帝，姓這名顏。之鼓切

北方黑帝，姓遐名明。

右四方煞鬼，主煞天下逆惡不孝。

北斗主煞一人，上下烏衣，長七千丈，

姓吳名還臨子。

斗綱加煞七人，長九丈，赤幘，主煞天

下姦邪逆鬼。太一主煞无形无名鬼，

長一丈六尺，赤幘赤衣服，天二五考煞

鬼，名慧，長一丈七尺，白衣赤幘，持戟

向人。

天帝常司過鬼，姓遐反，名班子，日暝

人定時下聽人口語，逆知心神，還啓考

煞。

五嶽鬼，名進強。

右北斗等鬼，主煞姦邪，司聽語默。

甲子日鬼，名元光。

乙丑日鬼，名邴彰。邴音丙

丙寅日鬼，名釗昌。釗音昭

丁卯日鬼，名子方。

戊辰日鬼，名生進。

己巳日鬼，名傳弁。

庚午日鬼，名柴方。

辛未日鬼，名音父。五故切

壬申日鬼，名石松。

癸酉日鬼，名倚迢。音落

甲戌日鬼，名甲光。

乙亥日鬼，名迺進。迺五官切

丙子日鬼，名留遐。

丁丑日鬼，名王眸。

戊寅日鬼，名却心。

己卯日鬼，名遙子。

庚辰日鬼，名耳子。

辛巳日鬼，名元聲。

壬午日鬼，名銜。

癸未日鬼，名歷厨。

甲申日鬼，名瑯光。瑯以者切

乙酉日鬼，名聶下。

丙戌日鬼，名齷生。齷狼董切

丁亥日鬼，名石爺。之蛇切

戊子日鬼，名證方。

己丑日鬼，名旨都。

庚寅日鬼，名苓。音琴

辛卯日鬼，名慧。扶北切。一音馥，一音卜。

壬辰日鬼，名契。

癸巳日鬼，名輩方。

甲午日鬼，名麻子角。

乙未日鬼，名不扶響。

丙申日鬼，名右公。

丁酉日鬼，名進卿一集。

戊戌日鬼，名召公高。

己亥日鬼，名珠夫子。

庚子日鬼，名季方。

辛丑日鬼，名迺。以是切

壬寅日鬼，名羅結。

癸卯日鬼，名健木。

甲辰日鬼，名索良。

乙巳日鬼，名晶冗。

丙午日鬼，名挺濃。奴道切

丁未日鬼，名矣伍。

戊申日鬼，名却劄。

己酉日鬼，名戴劫。

庚戌日鬼，名總夫。

辛亥日鬼，名安懸。

壬子日鬼，名道子。

癸丑日鬼，名唱適。

甲寅日鬼，名別狀。

乙卯日鬼，名天暗。

丙辰日鬼，名天濇。他計切

丁巳日鬼，名天橫。

戊午日鬼，名耳迹。音奔。

己未日鬼，名噫噫。

庚申日鬼，名義俚。

辛酉日鬼，名義呼。

壬戌日鬼，名遣夫。遣音權

癸亥日鬼，名答高敵。

右甲子六十日直煞逆鬼六十人，人身无異，赤毛无衣，有耳无目，飛行千里，其身三。凶逆不孝，煞害天民。人隨日憶知其名，鬼不敢近人。

甲子十日一旬，凶神姓玄名玉衡。

甲戌十日一旬，凶神姓恒名捧。

甲申十日一旬，凶神姓既名閨。音盈

甲午十日一旬，凶神姓本名滿。

甲辰十日一旬，凶神姓恒名堅子。

甲寅十日一旬，凶神姓蘇名迳。

右六甲神逆惡主煞神君。

人生於世，无百年之生，朝不保暮，死多生少。逆煞之鬼，流布人間，誑作百病。五逆疾炁，寒熱頭痛，或腹内結堅，吐逆短炁，五内脹滿，目視顛倒，口噤手足攣縮，不自知慮，命在日夕，凶鬼來守。天下男女，汝曹自可按吾圖書視鬼等名，施吾太玄之下符，上三天生炁，三五七九之生，以與天民，天民死而更生。自見天下男女，從太始以來鬼黠，不信吾真，故隱祕斯經，而死者不可胜數。念之傷悼，今重下律令，天下鬼神姓名、衣服、綵色、長短。知律，至正一之炁，子可隨日名，萬鬼不敢干。子自不知，言吾无神，上怨大道，下咎於人。子反自中傷，可慎三五之年，子自當見天下不信真炁者，及笑還與鬼私通。念子自當分別，今日何可得生，子自三思，勿違犯，慎之。

律曰：天道以鬼助神施炁，人畏鬼，不畏神，詭託名於彼，自號其位。人聞鬼存无神，百其語言，故制陰陽，

清身和心，无有邪淫，可以制鬼。御天下三萬六千餘神，皆為子使，令子身不正，反受其殃，念子昌乎。

北斗主煞，南斗注生，煞是天綱，生是三台，自如人身，上應天地，法之日月，道在不遠，三五來返，超然其可貴也。

天下散民中有孝順忠信者，可書六十日鬼名，著烏囊貯之，常以正月一日日中時以身詣師家受之，係著左右臂，以此行來，鬼不敢干。天下太平，送還本治。夜行恐逢惡，可服其鬼名，鬼不敢當，人不知鬼神自治，空身受灾，不達義方，通三六之年，子自滅亡。

女青鬼律卷之一

女青鬼律卷之二

太清玄元上三天太上律勅天地水三官主者，皇天初生，唯神為尊。今世憤憤，邪亂紛紛，不見真神，唯鬼亂人。今當紀別鬼名，定立三五神以治鬼。重下第二卷山海鬼姓名，服之三年，萬鬼不敢當。行來出入，制御邪魅。

道曰：千年之木成人，百歲之石為僮女，百獸之形皆有鬼形。子知其名，鬼復真形，勿傳。

山精之鬼長一尺，名濯肉。
木精之鬼，名群天。鳥老切。一名式
石精之鬼，名摠肉子。摠於巾切
虎精之鬼，名健莊子。
蛇精之鬼，名恻石圭。恻音戚
狩精之鬼，名大晶子。何鳥切
猴精之鬼，名馬痢子。側毫切
狐精之鬼，名迨午。音代
獬樹之鬼，名連不智。獬各勿切
五洿之鬼，名截道子。洿音烏
大山之鬼，名弓強。

小山之鬼，名和邴。

大樹之鬼，名方域。

小木之鬼，名轉其。

山室之鬼，名啓削。

石留之鬼，名水連。留口感切

土珺之鬼，名客臾。珺音至

搏石之鬼，名月遡。音訴

搏木之鬼，名汝遠。搏徒搏切

木榴之鬼，名鳴賑。音震

百蟲之鬼，名遐迂。莫號切

空流之鬼，名活稍。音朱

江遮之鬼，名逆鱗子。遮孫容切

漠明之鬼，名咸覽。

昌利之鬼，名堪坊。音墳

山都之鬼，名天王。

蓋山之鬼，名柱佳虬。古兮切

五色之鬼，名後嚮。

太玄之鬼，名居集。

男淫之鬼，名戴文。

女淫之鬼，名截交。

青炁温鬼，名高遠。

白炁温鬼，名伯桑。

赤炁温鬼，名士玄。

黄炁温鬼，名君太。

黑炁温鬼，名文遐。

屋室之鬼，名搖子。

食器之鬼，名後服。

園廁之鬼，名項天。

井鬼，名瓊。

竈鬼，名干遠。

床鬼，名赫子一扶。

傘蓋鬼，名晏。

麾幢鬼，名託。

鼓音鬼，名亂。

笙篁鬼，名譴。

坩坑鬼，名父雉。一名羅元。

圩莒鬼，名赫子。一名入徵。圩音區

戟甲之鬼，名耳禽。甲音擲

刀鬼，名劍子夫。

甲鎧之鬼，名子賢。

元子車鬼，名如賢子又馬車牛之鬼

千歲白骨鬼，名遠世。

百歲白骨鬼，名音世。

五十年鬼，名聰黎。聰音忠黎音絳

天嶽鬼，名瑾生子。

天鞭鬼，名客夫元。

地青土公鬼，名元。
地赤土公鬼，名赤赫元。
地黃土公鬼，名尅元。
地白土公鬼，名述本。
地黑土公鬼，名士民。
河伯鬼，名達。
九江鬼，名活。
三河鬼，名建。
四瀆鬼，名候。
犬馬鬼，名賜。
車鬼，名慟。
朴棖之鬼，名天賜。一名兵車。
鐵精之鬼，名醫願。
金精之鬼，名夷衝。
銅器鬼，名揚煞。
五嶽之鬼，名耳擒。一名山夫。
遊亂之鬼，名趣。一名歎發。
柱木之鬼，名文羅，一名元羅。
五斧之鬼，名兀生。
長男之鬼，名菑。一名子石。
衣服之鬼，名是廬。苦頰切。
五綵之鬼，名提敬。
五味之鬼，名元蓀。側巾切。

律曰：天下一生之中，自有千億之鬼，去神更遠，去鬼而近。天下凶凶，不可得知。此遭凶遇死者千萬有人，而鬼不已。今記其真名，使人知之。一知鬼名，邪不敢前，三呼其鬼名，鬼炁即絕，天鬼來下，地鬼並煞。凡鬼皆有姓名，子知三台鬼名，萬鬼使令。

律曰：人身有疾病厄急，可令主者施符呼名鬼煞名，用制鬼法。人家有灾疾不止，可於中庭北向以符著日辰上，使左手揲天關，右手揲火行三呪言：天一女青煞鬼，萬千太一九炁收邪神鬼，死神至道，求無極叱叱。便右迴轉向天門，閉炁二十四通。通息，還向地戶三呪言：太一使我煞萬鬼，鬼去神至。急急如此三通，百魅立到前後，諸神扶送天綱，催切諸鬼相考，無有漏脫。可以治身，勿妄以示俗人。

太和之鬼，無身有頭，頭長三尺，目大三寸，耳廣七寸，眉廣五寸，口廣三寸，鼻大二寸，鬚長三尺，髮長一丈，呼吸天炁，吐之成雲。子行見者其名

子碑，三呼之，形自見，終鬼從者皆自伏。子行勿以金錢著身，其有光炁，鬼逆見之避人。有錢在身不可，鬼知子解藏之。若水行見者，呼河紛，其亦作水鬼，易形爲鳥形，明如鳥大。子煞之，勿告人。三年人行來，出入山海，永無所畏，大吉。

女青鬼律卷之二

女青鬼律卷之三

道律禁忌

天師曰：視天下男女，日用不忠，行善不報，災害日興。天考鬼賊，五毒流行，皆生於不信不念。守一行善，身招其禍，念子不得久世長生。吾受太上教勅嚴切，令以示天民，令知禁忌，不犯鬼神靈書《女青玄都鬼律》。令使汝曹，皆悉知聞，逆者還順，惡者還善，改往修來，當依鬼律令。

一者，不得自東自西，自南自北，出入去來，去無所關，還無所白，任意從心，皆負律令，除筭三十二。

二者，不得呼天無神，言道師旨，敗刑亂政，自言己是道人，言非皆負鬼律，天奪筭一十三。

三者，不得持真入偽，姦亂聖明，飲酒食肉，呼嗟無道，奪筭千三百。

四者，不得傳宣惡語，道說他人，妄作一法，不信天道，虛言无實，天奪筭千二百。

五者，不得傳虛兩舌妄語，喜怒無常，專行逆煞，不慎陰陽，天奪筭百三十二。

六者，不得輕慢老人，罵詈親戚，夫妻呪詛，自相煞害，毒心造凶，不孝五逆，天奪筭一百八十。

七者，不得受道不知輕慢，傳非其人，貪財受利，取人自益，借物不還，以爲私寶，天奪筭一千八百。

八者，不得鬥爭言語，因醉淫色，假託大道，妄言鬼語，要結男女，飲酒食寅，天奪筭三百。

九者，不得遊行東西，周合男女，消灾不解，因成邪亂，天奪筭萬三千，死殃流七世。

十者，不得傳道童女，因入生門，傷神犯氣，逆惡無道，身死無後：不得反男爲女，陰陽倒錯，天奪筭三百。

十一者，不得露合陰陽，觸犯三光，因酒往還，承威相接，天奪筭三百。

十二者，不得一人氣生，一人氣死，逼犯真人，天奪筭三十三。

十三者，不得一父子別居，室家離

散，天奪筭二十二。

十四者，不得嗜慾惡失，男女聚集，妄道邪言，天奪筭百二十。

十五者，不得同法相相，更相道說，不信三五，評論天氣長短，天奪筭八百二十三。

十六者，不得逃遁父母，遊行四方，位立真氣，自相收合，天奪筭三百二十。

十七者，不得滅天所生，妄煞走獸，彈射飛鳥，指南作北，任心所從，不依鬼律，天奪筭三千。

十八者，不得干知人事，宣布他家，藏善出惡，姦人婦女，謀圖人壻，逆戾三光，陰賊呪詛，不孝五逆，天奪筭千二百二十。

十九者，不得行道之日，貪色淫心，行氣有長，自解不已，私共約誓，因生不孝，姦心五內，無道之子，天奪筭三萬。

二十者，不得思神不報，因行生氣，取降元炁，貪淫愛色，手足不離，彌日竟夕，如此無道，天奪筭三百四十

二。

二十一者，不得以赤炁妄傳俗人，口手胸心，更相交接，委道自叛，師主無法，天奪筭三百。

二十二者，不得妄以經書授與俗人，道父母名諱，洩漏真要訣語俗人，天奪筭三百。

天師曰：吾受太上旨教，禁忌甚重，汝男女憤憤生來，至今不知禁制，自作一法，與天相違。考至主者，天奪子筭訖，恐將可痛，不見太平。生者及祭酒道士，宣化有功，功過相贖，民若不用，故有宣化之心，可自改往修來，專一養性，可度天三灾九厄。子唯行惡逆，不行忠孝，恐子年命不自保，念子可傷，幸復重囑丁寧甚也。

天師曰：天下男女，見善戒之文，不能從用，唯欲從其所欲，教人行非，走作口舌，專作鬼教。老小凶凶，天下一時之樂，千年之禍，伐身之斧，滅命之殛也。子已知道，及未知者，見吾鬼律，新故科文，皆可從用。三五七九之日，慎行生炁。子依吾圖局，不犯三

炁，如可仙，化民一千。不知道父母真名，故為俗人。道士雖知黃書契令，不知二十四神人，故為偽人。道極數訖，天有三五，子自不知，何得言道不神？子不知道，何得言炁不明？百聞不如一見，子何不自改心易腸，入吾生炁，得為真人，太平之日飛舉上天。子只復不飛，壽終不死，便為地仙，得見太平。子日一日，憤悶憤悶，不信不忠，唯行無道，不見太平，念子自衰，吾當何苦。

天師曰：天下男女已知三五七九長生大道，子不依吾法，行惡姪亂，恐子死沒惡人之先，幸復告想可勤之。

天師曰：制節行道，謹慎科文，目不妄視，口不妄言，心不妄念，足不妄遊，親善遠惡，與體自然，故不重教，幸復可思之。

女青鬼律卷之三

女青鬼律卷之四

天師稽首，敢承先王之道，制民勅鬼，今當以盟威正一之氣、女青鬼律役使天下邪魅妖殍，助道興化，勒鬼真名，主者明加切正，使天下道氣宣布，邪逆賓伏，子知鬼名姓，鬼自趨走，不敢害人。子常念之，勿違犯矣。

道上將軍名侯夫

道下將軍名逸車

天上逆鬼名文延玄

地下逆鬼名精子

右四鬼主風雨時隨之作害人，行來道路遭大風雨，呼四鬼名，惡氣不敢加。

古凶鬼謹忠世

逆鬼弄耳弄子鬻切

右二鬼是古死人敗冢，或巫師、不正道士之鬼。鬼害人百行，子知其名，鬼自伏住，不敢動。

天正鬼迭卧迭大結切

地正鬼杵木杵音琴

右二鬼是宅中死煞守鬼，常住人堂屋梁上，夜主傷害人雞犬六畜。子知其名，鬼伏住不敢動。此鬼不敢害人，宅中應有福德之家，此鬼主護人外客殃煞，不敢過宅中。

申久年 後穆高


右二鬼，人家作屋，不契柱色鼻，朝成立見，星月有靈神，主煞人為邪。子知其名，鬼不害人。

令精華 是補坐

右二鬼，人家宅中有銅金錢精，主作於此鬼，鬼或變化作人形，居宅不安，呼之即去。

已巴良 赦姑 殷咎

右三鬼，是人屋中四壁角中鬼，主人夫妻無道，不順陰陽。此鬼白直符，直符白奏事，除人生籍。子知名，鬼不敢動。並勅鬼著屋四壁角厭，用桃刺長尺二朱書，又懸門戶上，勅法如左。



此符青龍主東，白虎主西，朱雀主南，玄武主北，中央黃麟，辟除鬼賊，急急如律令。

右符制百鬼

天載 茂嚮音惡註兩切

右二鬼是門伯戶丞，白日為神福室，暮作鬼。子知名，人定時於門戶左右呼其名，三掌手，反首持兩三過，此鬼即止，不敢作害。

斧金木 和鎧鉀粗

右二鬼是人家宅上有樹或竹林，為烏鳩止，白鷺、群鳥所依，此皆有邪魅。子知其名，夕夕三呼之，鬼知人不可干，不過七日、九日，鬼自死。不煞鬼者，多聞中喚之，鬼伏住不害人。

紫肝方轉。肝，喜俱切。轉，陟贊切。

汰泝上音大，下音妬。

塵發

右三鬼是世中癩癩煞人之鬼，其赤衣服，烏冠幘，主收人魂。子知其名，有疾即差，鬼不敢干。

桑華載 辟氣途付

右二鬼是女人月水之精，鬼常貪陰陽血味，女子月水來，日夕存之，呼名，鬼不敢害人。鬼長三尺，上下青衣。

語忌 敬遺唯鼻切

右二鬼，女臨產鬼。女子產生時，呼此鬼名，即不害人。鬼長三寸三分，上下烏衣。

勗精華

右一鬼，主害人田蠶，蠶女鬼。夫立春日平旦，可向天門三呪曰：

天之皇清明，長遠上多神，陰不及與汝，馬姑來我宅中，使蠶大得千萬倍次田畝，汝收千億斛，思天中上下，天地中上，止大道。勗華為我使叱咄，急殺百傷，小魅何狼粹。

金進邊百道力追切

右一鬼是旦夕掃除鬼，令人失財。子知名，可日日平旦向天門三呼名，呪曰：

石未子，石未子，太一使汝為我使，何物逆鬼，令速出、速出。

道以令天下男女，各受道，思口訣

真要，以持示子。子可以存念神明，以真除邪。八卷之中，有第四卷，至真，可以度世。子勿違犯，慎之。天師勅邪中是聞律，鬼莫不伏聽。飛符連天，一元三靈，此天師自呪身中神鬼要法。遠兵士，太王主元一九三氣，丈人九氣，父母太一，使我收煞，汝急出來。良久，俯三叱，叱二十四，暗暗。

右天師勅水大邪，鬼不敢害人。

女青鬼律卷之四

女青鬼律卷之五

道曰：天下憤憤，常如浮雲。君圖其臣，婦謀其夫。熒惑太白變作人，專作苟語小兒邊。走作邪僞相交連，撲子喉咽不得吞。治進道路更相傳，念子死亡不出年。一則大樂後相恐，天地運會故令然。受任主者當令勤，盡當守一修長存。勿得任意唯捉心，不行三五唯邪淫。言天大道而不禁，三官主者擇種民。取合炁者萬八千，從來至今有幾人。大限未足子勤身，改心易腸道真人。師受口訣以見賢，佩吾券契一爲先。得見太平神仙君，五帝主者傳祕言。三五七九道炁尊，治在清微崑崙山。近見三天入人身，解脫綱羅拜老君。安心定意行至仙，長短須已勿半身。可至契令思元辰，七九之運別真人。

天下人民各頑愚，見世憤憤不知憂。寒鬼入來與子遊，太白流橫長六朱。老公道上更相扶，饑餓搏頰輒叩

頭。米穀金貴不可求，灾兵大厄庚子年。念子命運與此堅，方外故州胡夷人。交頸腫領惡逆民，化生風毒身奉天。大小皆來至此間，餘有胡鬼億萬千。食人血性逆毛遷，今來入國汝何緣。兵馬浩亂不可言，念子一旦與相連，入步不進屈輒申。子若不信庚子年，自當思吾今日言。

日月冥冥恐無光，五穀不生逆鬼行。是庚子歲約不亡，若有餘人如飛蜂。大小更互道相從，三五相逐一合雙。念子一旦不值逢，未至此年當死亡。百不遺一柰何從，天日與月當更生。唯留下地太平中，種民在天見母親。不信大道念可言，非不慈孝道不存。一旦如此豈可言，何不少學得神仙。大平過度爲真人，日月列布如流星。三五七九道炁明，分布九州若父兄。皆同一契心合並，義各如一道引經。黃赤大要守長生，上部太紫人數并。萬萬之紀合神靈，託愚作癡不言聲。以守三一從道經，千炁不失事見明。

天道蕩蕩信自有，旦來暮去天地久。以日為夫月為妻，天氣交接等何如。神壘大山依神居，自見元化不安廬。束手真實不發舒，超王之教故可胥。

北斗中有太白星，三角浩浩象人形。遊走天下化不平，有知者悟愚者驚。誰正此道有姓名，木子三台常與並。約在大會天下平，五行列布金木生。火水父母土為營，道出元炁從老經。合景內外神真形，羅縷紫機上天庭。遠望八極登太清，八八之數從一生。子心不解口語名，天地陰陽人為先。五體骨節皆有神，樂人長生俱飛仙。除辟大厄却災患，少知三五以治身。長行七九真炁分，太平度世為種人。天下男女合如雲，會於太一仙道天。三日不摩徊復還，一心兩口上應天。

流。故出女青鬼律書，傳行天下樂何如。有智自來謁真儔，元者自去太山居。白骨縱橫鬼暗噫，喻响不止奈何餘。仙童玉女依神居，望見斯輩當何如。

切切天下真欲弊，庚子之年其運至。千無一人可得脫，有心相遇世道清。遠惡從善不求榮，塵垢之衣以蔽形。心在太一詠誦經，白日修善暮守生。被髮而行在黃庭，上啓太上道姓名。一出玄都入太清，口授異訣過灾殃。念世愚子不知生，何當合會隨邪靈。太一來下條姓名，恐子一身不久停。發願不死從吾經。

天師曰：大道垂律，女青所傳，三五七九，長生之本，「謹」以奉行，世世相傳。子有心分，來入吾炁，自當思行仁義，六合守忠，專一養性，以道為家，不得負違。太上真言，師老太一。今故以元年正月七日奉行，從者千人之中，有王長、趙昇二人，可以道炁化度，令畢得長生大義。

不得犯男神靈，

不得呼天引地，
不得祠祭故炁，
不得指鬼呼神，
不得淫色違慢，
不得言炁不明，
不得兩心不正，
不得妄傳鬼教，
不得露行三光，
不得犯五靈七政，
不得與鬼通同，
不得干亂神祇，
不得入俗勝真，
不得行來出入，
以急有厄，呼嗟鬼神。

女青鬼律卷之五

女青鬼律卷之六

天師曰：自頃年以來，陰陽不調，水旱不適，災變屢見者，皆由人事失理使其然也。人爲中才，法地則天，動靜以時，通而不爭，利而無害，故能神仙。末世廢道，急競爲身，不順天地，伐逆師尊。尊卑不別，上下乖離。善惡不分，賢者隱匿。國無忠臣，亡義違仁。法令不行，更相欺詐。致使寇賊充斥，洿辱中華，萬民流散，荼毒飢寒，被死者半，十有九傷，豈不痛哉！豈不痛哉！亂不可久，狼子宜除，道運應興，太平期近。今當驅除，留善種人，男女祭酒，一切生民，急相核實，搜索忠賢，恭慕道德，按名列言，自然者寡，督厲宜勤。若能改過，即爲勳人。人無尊卑，不遵貴賤。唯惡爲真，不得私飾。所舉參錯，不直之人，此者坐之，無望久活。帝王牧守，長吏百僚，若信吾言，舉善而教，不能則勸，流刑行仁，祭酒領錄，條列上天，有勞顯報，位登神

仙。有不用心，憚勞迴避，不肯著名，

奉行善者，即還惡人，陷於驅除，直符

疏記，毫分不差。百姓樂善，得爲善

人，時還本鄉，以安國土。人人念善，

天下太平，禍亂不作，災害不生，豈不

快乎，豈不快乎。今遣五主，各領萬

鬼，分布天下，誅除凶惡，被誅不得稱

狂，察之不得妄救。鬼若濫誤，謬加善

人，主者解釋，祐而護之。鬼若不去，

嚴加收治，賞善罰惡，明遵道科。

東方青炁鬼主姓劉，名元達。領萬鬼，

行惡風之病。

南方赤炁鬼主姓張，名元伯。領萬鬼，

行熱毒之病。

西方白炁鬼主姓趙，名公明。領萬鬼，

行注炁之病。

北方黑炁鬼主姓鐘，名士季。領萬鬼，

行惡毒霍亂心腹絞痛之病。

中央黃炁鬼主姓史，名文業。領萬鬼，

行惡瘡癰腫之病。

右五方鬼主，諸欲著名生錄爲種民

讀之，令罹災害皆消。

東方青炁鬼名咎遠。

南方赤炁鬼名士言。

西方白炁鬼名堯。

北方黑炁鬼名天遐。

中央黃炁鬼名太黃奴。

第六炁鬼名誅女。

第七炁鬼名伯陵。

祖父名梁州。

祖母名交成。

父名延年。

母名出中。

右五方炁鬼，兄弟七人，合祖父母、

父母十一，形能飛，隨月行毒，以誅

惡人。

一炁鬼名釋渠。

二炁鬼名咎。

三炁鬼名禮咎。

四炁鬼名成晏。

五炁鬼名不釋。

六炁鬼名烏悟。

七炁鬼名綠支。

八炁鬼名育夷。

九蠱鬼名石千。

右九蠱之鬼，行諸惡毒，妖媚蠱亂天下，與五溫鬼太黃奴等，共行毒炁也。

正月溫鬼名惟。

二月溫鬼名腫。

三月溫鬼名劉。

四月溫鬼名存。

五月溫鬼名壘。

六月溫鬼名殍。

七月溫鬼名半。

八月溫鬼名懷。

九月溫鬼名農。

十月溫鬼名卑。

十一月溫鬼名羸。

十二月溫鬼名堅。

右十二月溫鬼，各隨其月，放逸天下，傷害群生。

子日溫鬼名根。

丑日溫鬼名蕩。

寅日溫鬼名怡。

卯日溫鬼名疑。

辰日溫鬼名厄。

巳日溫鬼名愛。

午日溫鬼名悟。

未日溫鬼名奴長。

申日溫鬼名未。

酉日溫鬼名石。

戌日溫鬼名志。

亥日溫鬼名憂。

右十二日溫鬼，各各直其日。從十二時支干上來疾病民人，日月鬼蠱並順劉元達等，毒害五方，不得道戒，皆受其殃。行善精懃，存道遵教，能知名，皆共降伏。法應去者，各自遠避，制應留者，却其凶黨，更相約束，不犯善人。

吳時病人之鬼名文通。

金精鬼名因兌。

木精鬼名倚震。

火精鬼名附離。

水精鬼名託坎。

土精鬼名乘坤。

五精鬼名矯乾。

遊蕩鬼名獲張。

血食鬼名刃方。

虎狼鬼名咳蕪。

蛇龍鬼名甲子。

狐狸鬼名勾舉。

龜鼉鬼名地殃。

露死鬼名天殃。

傷死鬼名真果。

獄死鬼名史蘇焜。

餓死鬼名伏藏。

客死鬼名逆千。

男傷鬼名菟悟千。

女傷鬼名艾赤丹。

冢訟鬼名害知。

丘丞鬼名地令。

墓伯鬼名土下侯。

冢下鬼名二千石。

右二十四鬼，放縱下羅截四方，充塞六合，擅筭五行，更相署置。官府列陣，出入導從，兵馬權強，殺害無辜，恣意快心。寡福之人，悉逢其苦。志士學道，方術厭禳，符章禁斷，乃保利貞。

斬死之鬼。

故死之鬼。

喪車之鬼。
魍魎之鬼。
天殃之鬼。
殃注之鬼。
雌雄之鬼。
寄死之鬼。
行客之鬼。
地殃之鬼。
天凶之鬼。
地凶之鬼。
天殺之鬼。
地殺之鬼。
日月玄符鬼。
三十六殺鬼。
百二十殃注鬼。
千殃萬魅鬼。
魍魎精邪鬼。
迷惑不利鬼。
火逆惡注鬼。
逆道醜賊鬼。
大道邪精千炁之鬼。
千二百官逆之鬼。
地上千師萬醫鬼。

天地水三官轉逆魅鬼。
著耳角之鬼。
自稱皇天上帝土玉鬼。
狐狸老精自號之鬼。
宅中強殍奸詐聲之鬼。
宅中魔邪恐怖人之鬼。
宅中靈林古瘞之鬼。
宅中光怪之鬼。
宅中虛耗之鬼。
宅中鄙辱離怨之鬼。
宅冢訟逮之鬼。

右三十六鬼，皆遊行世間，乘人衰隙，伺侯有惡，助佐凶殃，造作禍害，敢形易象，隨便陵人。學士知之，立功建德，啓告太上，一切收治，年初章奏，列名斷之，衆鬼畏懾，悉自逃亡。不告者，一如律令。

女青鬼律卷之六

（李剛點校）

067 玄都律文

經名：玄都律文。撰人不詳，約出於南北朝末。據《三洞珠囊》等書引述，原本應有二十品以上。《通志·藝文略》著錄作二十五卷。現僅殘存一卷。底本出處：《正統道藏》洞真部戒律類。

虛無善惡律

一者遺形忘體，怕然若死，謂之虛。二者損心棄意，廢偽去欲，謂之無。三者專精積神，不為物集，謂之清。四者反神服氣，安而不動，謂之靜。五者深居宴處，功名不顯，謂之微。六者去妻離子，獨與道遊，謂之寡。七者呼吸沖和，滑澤細微，謂之柔。八者緩形縱體，以奉百事，謂之卑。九者憎惡尊榮，安貧樂辱，謂之卑。十者遜羸逃滿，衣食麓疏，謂之

損。十一者爭作陰陽，應變却邪，謂之時。十二者不飢不渴，不寒不暑，不喜不怒，不哀不樂，不遲不疾，謂之和。十三者愛視愛聽，愛言愛慮，不費精神，和光順世，謂之齋。

律曰：凡此十三者，混沌為虛無，行道守真者，敬奉師法，順天教令，窮極無為之道，虛、無、清、靜、微、寡、柔、弱、卑、損、時、和、齋。夫為道者，氣鍊形易，民和國寧家吉，灾不起，壽命延，家國昌。違律者為天所刑。

律曰：人不念作善，但行惡事，父母不孝，事師主不義，事君不忠，為善者自天祐之，為惡者天必殃之。人一善，心定體安。人有十善，氣力強壯。人有二十善，身無疾病。人有三十善，所求者得。人有四十善，昌熾富貴。人有五十善，子孫富盛。人有六十善，遭厄得脫。人有七十善，神明護之。人有八十善，得地之利。人有九十善，尊貴顯榮。人有百善，天德降之珍寶。人有二百善，後世揚名。夫下人有三百善，後世大富。人有四百善，

後世出富貴人。人有五百善，後世延壽。人有六百善，後世出忠孝。人有七百善，後世智慧。人有八百善，後世道德。人有九百善，後世出賢聖人。人有千善，後世出神仙真人。

右人有為善者，得福自天祐之。人有一惡，心勞體煩。人有十惡，血氣虛羸。人有二十惡，身多疾病。人有三十惡，所求不諧。人有四十惡，軼軻衰耗。人有五十惡，絕無子孫。人有六十惡，數得非禍。人有七十惡，賊鬼害之。人有八十惡，水火害之。人有九十惡，貧賤困極。人有百惡，天地殘罰其形。人有百五十惡，寇賊害之。人有二百惡，後世無姓族。人有三百惡，後世受貧困。人有四百惡，後世沒為奴婢。

戒頌律

第一勿詐鬼欺神，輕罔天道。第二勿以偽為真，以真為偽。第三勿以善為惡，以惡為善。第四勿以曲為直，以直為曲。第五勿以濁為清，以清為濁。第六勿以邪為正，以正為邪。第

七勿以醜爲好，以好爲醜。第八勿以虛爲實，以實爲虛。第九勿以逆爲順，以順爲逆。第十勿以非爲是，以是爲非。第十一勿以親爲疏，以疏爲親。第十二勿以東爲西，以西爲東。

律曰：十三條名曰妖惑之人耳，身受其害，捨命不得全生，災殃流及五世，子孫犯者，害命奪筭，犯主吏坐謫，依罪輕重論也。

律曰：常敬從師教，令一如師法，不得輕冒，詐僞欺罔，違律罰筭四百日，主吏坐謫。

律曰：常以平旦、日中、日入後存想五方五氣。東方青氣化爲青龍，西方白氣化爲白虎，南方赤氣化爲朱雀，北方黑氣化爲玄武，中央黃氣化爲己身，則調和五方，音而頌之。違律者罰筭三百日，主吏坐謫。

律曰：平旦頌曰：微妙而博大，子元氣之精光。巨麗而可樂，子魂神之翱翔。藏我胸臆中，子廓然虛而張。潔白如明月，子通洞乎十方。芝草何英英，子不憂無食糧。呼吸新與故，子

因以通神明。

律曰：暮頌曰：曠曠怖怖，與神元懼，被服精華，飲食玄武。招搖爲馬，玉衡爲輻，上下無限，出入無時。百病除愈，神氣獨持，司命著籍，玉簡丹書。編以金縷，纏以素絲，千億巨萬，無所復疑。太一祐我，神明扶持，清靜絕念，向王相地。頌之佩錄，吏與天地作約，以身修道樂法者，皆頌之。不如法，罰筭五年，主吏坐謫。

律曰：戊辰、戊戌日不得頌，正心守一念道，眼無妄視，口無妄言，心無妄念，耳無妄聽，違律奪筭五十。安神定志，尊道德，敬師長。不如律，輕慢道德，不敬師友，爲家則禍災，爲國則亂亡，罰筭二紀，主吏謫千日。謂道德之人師朋友，當如禮敬事之。

律曰：寬和忠孝，恭敬朝修，淡泊慈仁，畜孝篤信，思義所行。不如律，罰筭七紀。不得因鬼稱神，託名官號，誹師謗道，淫祀百鬼，反真亂正，自作法度，不如師法。違律者罪及害身，主吏罰五年也。

律曰：不得食日暮之食，不得食祭神之食。違律罰筭千日也。謂日之暮亦不須食也。遇祭鬼神之食，食之者皆坐罪也。

百藥律

律曰：夫德以除災，藥以愈病。不知律者，爲國則無延祚之期，爲家則無子孫，爲身則刑兆虛亂，正氣不居，年命爲衰。故非道而治，非法而言，亡筭奪紀，司過言罪，司命削籍。

律曰：德爲醫也，行爲藥也。人不修其德行而廣求醫藥，藏罪而多求章表，上而所行不改，其罪更凶。

律曰：柔弱去欲，寬和恭遜，藥之道德府。違律者罰筭五年，主吏坐之。尊天敬地爲一藥，欽奉三光爲一藥，恬淡無欲爲一藥，仁恕謙讓爲一藥，好生惡殺爲一藥，不多聚財爲一藥，不犯禁忌爲一藥，廉潔貞信爲一藥，不燒山林爲一藥，空車助載爲一藥，志弱性柔爲一藥，不自尊大爲一藥，行寬心和爲一藥，不好陰私爲一藥，動靜有禮爲一藥，陰德樹功爲一藥，起居有節爲一藥，不論訴人爲一藥，近德遠色爲一

藥，灾病不干爲一藥，施不望報爲一藥，爲人慕願爲一藥，推恩義讓爲一藥，慈愍憐愛爲一藥，好稱譽人爲一藥，心靜意定爲一藥，爲人願福爲一藥，祛邪弼正爲一藥，不干豫人爲一藥，教化愚暗爲一藥，戒勅童蒙爲一藥，解散思慮爲一藥，因貴爲惠爲一藥，內修孝悌爲一藥，爲人起利爲一藥，蔽惡揚善爲一藥，以力助人爲一藥，好飲食賜人爲一藥，憐貧傷危爲一藥，救日月蝕爲一藥，言語謙遜爲一藥，恬淡寬舒爲一藥，不負宿債爲一藥，思神念道爲一藥，質徑端正爲一藥，立功不倦爲一藥，不爭是非爲一藥，除情去欲爲一藥，受辱不怨爲一藥，不取非財爲一藥，推好取醜爲一藥，雖灾自受爲一藥，稱揚賢良爲一藥，好相引用爲一藥，不自彰顯爲一藥，救禍濟難爲一藥，不自伐善爲一藥，諫正邪亂爲一藥，勞苦不恨爲一藥，開導迷誤爲一藥，覆蔽人過爲一藥，因富布施爲一藥，進勝己者爲一藥，扶接老弱爲一藥，惠與窮乏爲一

藥，誓不罵詈爲一藥，爲人嚴淨爲一藥，智德不退爲一藥，位高接士爲一藥，好言善語爲一藥，恭敬卑微爲一藥，生無懈怠爲一藥，至誠篤信爲一藥，不罵畜生爲一藥，推直引曲爲一藥，心平意等爲一藥，進退可否爲一藥，不念舊惡爲一藥，推善掩惡爲一藥，聽諫受化爲一藥，推多取少爲一藥，忿怒自制爲一藥，見賢自省爲一藥，閉門恭肅爲一藥，推功救苦爲一藥，尊奉耆老爲一藥，好人有功爲一藥，清廉貞分爲一藥，聽經實行爲一藥，助人執力爲一藥，富有愍無爲一藥，遠嫌避疑爲一藥，安貧不怨爲一藥，尊奉聖文爲一藥，好成功德爲一藥，宣揚聖化爲一藥，得失自觀爲一藥，勸人學道爲一藥，願禮拜三寶爲一藥，以言爲善爲一藥。

律曰：夫人有疾病者，坐於過惡，陰掩不見，故應以病。因緣非飲食風寒溫氣而起也，由其人犯法違戒，神魂拘謫，不在形質，肌疏藏虛，精氣不守，敢爲利焉。雖居榮服，不敢爲非。度

形而爲衣，量腹而爲食。雖富且貴，不敢恣慾。雖貧自賤，不犯戒律。是故自然外無殘暴，內無疾病也。

百病律

律曰：求灾除難，不如防之易。治病療疾，不如修之吉。若事父母師長以孝道，事君以忠敬，朋友以篤信。違律者罰筭一紀，主吏坐其病到身。

律曰：有君不能保社稷，有臣不能全壽命。聖人求福於未兆，絕禍於未有，蓋灾生於稍稍，病起於細微，小善不積，大福不成。爲惡者雖欲以章跪願，服符籙以自防救，不肯改更心腹，必爲罪不除，亦罰筭，五病則入身。

律曰：常思病來之罪所犯過惡，司過神、解過神、司過君、解過君當解除之一切罪過、世間所犯諸惡，則病消除。

喜怒無常是一病，不好耆老是一病，好色無德是一病，舛戾自用是一病，憎之欲死是一病，從貪弊惡是一病，擅變自可是一病，鬼黠諛諂是一病，快禍遂非是一病，兩舌無信是一

病，乘權縱橫是一病，罵詈風雨是一病，侮易孤寡是一病，教人墮胎是一病，威勢逼勒是一病，孔內窺人是一病，借不念還是一病，背向異端是一病，曲人自直是一病，調戲異同是一病，惡人自喜是一病，探巢破卵是一病，愚人自賢是一病，水火敗人是一病，以功自與是一病，教人去婦是一病，以勞自怨是一病，合禍睽愛是一病，喜說人過是一病，唱禍導誹是一病，以貴輕人是一病，見物欲得是一病，以賤恥貴是一病，亡義取利是一病，以德自顯是一病，專心係受是一病，以私亂公是一病，敗人自舉是一病，陰惡自害是一病，輕口喜語是一病，論評誹議是一病，非人自是是一病，瑕人自誓是一病，以力勝人是一病，無施真人是一病，語欲勝人是一病，怒自怨評是一病，貨不念賞是一病，蠱道厭人是一病，以嗔傷人是一病，憎人勝己是一病，怒喜自伐是一病，心不平等是一病，以賢自真是一病，不受諫諍是一病，謗有功人是一

病，煩符輕疏是一病，以富驕人是一病，好自作正是一病，以貧妬富是一病，蹲踞無禮是一病，讒人求婦是一病，輕易老小是一病，惡能醜對是一病，敗人成功是一病，喜禁善人是一病，樂塞人路是一病，惡言不改是一病，好掩戲人是一病，危人自安是一病，激厲謗悖是一病，多憎少愛是一病，推負著人是一病，嗜得懷詐是一病，持人長短是一病，乘酒險橫是一病，與人追悔是一病，干務人事是一病，施人望報是一病，惡生好殺是一病，罵詈虫畜是一病，負債盜竊是一病，些毀高大是一病，喜短唐突是一病，毒藥醜餌是一病，故患誤人是一病，言語不忠是一病，欲談人短是一病，追念舊惡是一病，刀胎剖形是一病，內疏外親是一病，笑盲聾啞是一病，談愚癡人是一病，教人搥捶是一病，搥捶無理是一病，教人作惡是一病，多疑少信是一病，笑顛狂人是一病，醜言惡語是一病，強奪人物是一病。

律曰：人能除此百病，無災無患，長生度世，子孫蒙祚矣。

律曰：天下萬民，教化罪福，違法令病入身，奪命刑籍，灾死名滅，則其身已。言人犯罪當改心易行，奉承道法，不敢行鬼加罪，半原。非違法事，則一切過得度，長生也。

制度律

律曰：制道士、女官、道民、錄生、百姓所奉屬師者，父亡子繼，兄沒弟紹，非嫡不得繼。或兒息小弱，當大人攝治，兒長則立治依舊。若無人承領，則尋根本上屬，不得他人屬。違律罰笞一紀。

律曰：道士、女官、錄生、道民，本師亡沒之後，子孫不令其堪承襲，或遭亂失，本屬師推尋原末，不相知識，皆聽上屬事師，皆當遵奉法教，此性命之主也。不敬事師，冒慢神明，治國則亂，治家則亡，殃考延及後世也。

律曰：制男官、女官、錄生、道民，天租米是天之重寶，命籍之大信，不可輕脫，禍福所因，皆由此也。七月七日為上功，八月為中功，九月為下功，十

月五日輸者無功無過，皆輸送本治。違法則命籍不上吏守人，上延七祖，下流後代，家長罰筭二百日，戶口皆各罰二紀。

律曰：制男官、女官、主者領戶治位，皆有科次品號。若是甲治，受所領民租米百斛，七十斛納治中用，折三十斛傳天師治。若二百斛，皆當詣本治施設。若去本治三百里以外，聽於家設。不如法，罰筭三紀。

律曰：生男上厨，生女中厨，增口益財，求官保護，延口歲中無他。上厨之例，求度厄難，遠行，求遷官。厨中之例，求治疾病，消縣官口舌牢獄繫閉。下厨之例，故略。條品法律，科格如此。違律罰筭一紀。

律曰：男官、女官、主者、錄生，年初願口數，竟歲無十人，設厨二十人。若三十口已上，設二十四人厨。若百千萬口，不過二十四人厨。一口設一人厨，至二十四人止也。違律罰筭一紀。

律曰：男官、女官、主者、錄生，條

跪願品格，十人以下，跪絹二十尺，二十人已上，跪絹四十尺，蒙恩則輸送。不如法，則罰筭一紀。

律曰：男官、女官、主者，三會之日，所以供厨、使布、散租米，而比者衆官令使百姓以供會，此皆不合科典，違律罰筭一紀。

律曰：生男兒，設厨食十人，中章紙百張，筆一雙，墨一丸，書刀一口。生女子，厨食五人，席一領，糞箕一枚，掃帚一枚。月滿則輸。不如律法，父母奪筭二紀，兒子奪筭。天師治不得長取，亦得奢結，鬼氣不去，及還中傷，不得隱匿他用，以營家私，此罪不輕，滅身。

律曰：男官、女官、主者，尋奉道之民，各有根本，而比者衆官互嚙受他戶，寔由主者之過，不能以科法化喻，輒便領受。愚民無知，謂可輕爾，致使去就任意，不遵舊典，主者受奪略之罪，民受叛逆之愆，師則以狀言奏，天曹必至。違律者各罰筭一紀。

律曰：男官、女官、錄生、道民，至

於解厨，家主齋戒，宿請客言，刺被請之身，皆嚴整，勿履穢汗，悉沐浴，換易衣裙、幘、褐、袴、褶，不得著裙履露衣，輕冒至真。所以爾者，此律是天官之威，神仙臨降，非小故耶。皆正心存想，不得亂語說流俗不急之事，悉依法錄大小爲次第。若所受同，以前後爲次。若所受法錄治職同日，當以年長爲次。若受外官，次雖大，悉不得加上內治。次若不用，別爲次第也。違律罰筭一紀。

律曰：男官、女官、主者，上厨，人酒五升，錢三百。中厨，人酒四升，錢二百五十文。下厨，人酒三升，錢一百文。某甲治受領民租百斛，折八十斛入甲乙治，以二十斛傳天師治。又某甲治受所領民租米百斛，折八十斛入丙丁治，以二十斛傳天師治。及公跪誓物，一如上治計丈尺，以傳天下萬民。米一斛，具使令二斗達天師治。其米不至，天師主者受割截之罪。唯紙筆墨給治用，不煩傳上。明各依承，違律罰筭三紀。

律曰：男官、女官、主者、百姓，有疾病厄，急歸告之者，當匍匐救之，不得以私事託設，妄說禍祟，求人意氣，受取皆計減爲罪。違律罰筭一紀。

律曰：男官、女官、主者、道民，年初保家口，或病痛百事，至心立願，皆質其辭誓，主者依承狀申述，蒙恩限滿則輸，即爲言功報勞。不得違言負約，此罪不輕。若不蒙恩福便爲言除，不可橫受。其歲中雖有死亡減口，租不在跪例，依常輸上。宜各尊奉。違律者，罰筭一紀。

律曰：男官、女官、主者，當詳擇救民，不得苟且塵穢。清虛化民，皆檢其墨辭，質却情狀，令家內大小和同，然後宣化，依科救之。違律者，奪筭二年。

律曰：道士、女官、主者，誅罰邪僞，清寧四海，受民以禮，養育群生，三會吉日，質對天官，教化愚俗，布散功德，使人鬼相應。而比者衆官烹殺畜生，以供厨會，不合冥法。殺生求生，去生遠矣。犯者殃及後世，主者罰筭

一紀。

律曰：男官、女官、主者、錄生，安靖於天德者，甲乙丙丁地，治有品第。民家靖廣八尺，長一丈。中治廣一丈二尺，長一丈四尺。大治廣一丈六尺，長一丈八尺。面戶向東，鑪按中央。違治則罰筭一紀，按如盟威律論法也。

律曰：男官、女官、主者，受法錄治職之號，譬如王位，至於選補，皆由天臺。而頃者衆官輒便私相拜署，或所受治小而加人大治，或以身所佩法表言上。違律者，各罰筭二紀。

律曰：男官、女官、主者，制陽平治得署四正遊治，鹿堂治、鶴鳴治得署三正遊治，自此以下，一歸天師治。凡受法，當隨功輕重，依品受任，不得苟且，互求大治。違律者，罰筭二紀。

律曰：道士、女官、主者、錄生，朔望皆朝拜，雞鳴皆起，嚴敬整容，冠帶朝拜，衣幘袴褶，入治依位號執笏朝拜，訖，便簡閱如舊法。出朝於師，皆五拜，問訊起居安否而退。其戊辰、戊

戌不朝，違律罰筭一紀。

律曰：男官、女官、主者、錄生，己午忘失朝，退位一等，奪筭三年。不朝，退位三等，奪筭七年。不朝於師，皆有考坐，謂故不朝，輕罔天地也。

律曰：男官、女官、錄生、道民，家有穢汙，不過晦朔，不得入治。哭亦三日。穢三年之喪未滿，百日不得入治拜禮、奏表章書。違律者，考坐，罰筭一紀。

律曰：奉道之民，誓心至死歸道，不得兩心猶豫，違背道德，悔道還俗。此罪不輕，禍至滅門。亦不得淫祀邪鬼。若有犯者，牒狀歸首太治，專心悔過，得免殃咎。而知者故違，罰筭一紀。

律曰：道士、女官、主者，受道之日，內以修身，外以禳災，不得妄同，中傷百姓，及漁獵萬端，或更相評論，妬忌勝己。此是瞽盲所行，非道法真正之體。犯者罪考八十，主者科之。如謂狀罰之人也。贖玉四兩准罪。

律曰：道士、女官、錄生，身年十

八已上，得受大法。若外法，自受百五十將軍錄已上，堪著黃色法服、衣冠。內法，自然昇玄真文已上，上清大洞已下，須用紫色法服、衣褐，笏履袴褶，其笏但十戒已上，則執之。若朝朝禮謁集及章表，而須法具衣冠幘褐笏履。違律罰玉八兩，考及三世，自身水火官事所考，如玉法。言三皇以前，人民淳樸，禮制蓋微，謂之板，二頭俱平。自人皇以後，謂之爲笏者，言之似天地方員，衆官所執，常存天地，與道同體，敬之如法也。

律曰：道士、女官、祭酒、錄生，身任法誠，若死，要在靖宇觀治，不得在俗人舍宅。言死時喪禮，送葬不合在俗也。其魂神所居穢地，天地水三官不許屍被考掠，作河三年徒役。

律曰：陽平、鹿堂、鶴鳴諸治，男官、女官、主者、錄生等，教寫科制如右。竊尋比頃以來衆官百姓道民，或有無師而自立法；或去本治遼遠，布於四野，私相號授，領民化戶，威福自由；或有去治不遠而致隔絕，至於租民賄物，逋廢積年，私自没入己，不傳奏上，自作一法，無所稟承，背違冥科，

前後非一，其事萬端。致使正法不明，真偽無別，氣候錯亂，妖惡滋生，罹灾被考，豈不痛哉。斯皆主者之豐，不能讚揚聖化，令愚人惶怖，謂輕惑有心，而不見科律儀令事件，別各標所用。咸使聞知，宣揚布化，賞善罰惡，相與揭厲，精加檢察，使功勤必獲其德。犯違之者，地官牒名連引上，依法檢治，若不糾問，主者與同罪。明須告示，各遵承一如玄都科令律也。

章表律

律曰：轆軻衰耗，數得飛禍，絕無子孫，疾病痿厄，所求不諧，牢獄閉繫，血氣虛羸，貧賤困極，殘年夭死，癡狂聾僻，或出妖臣逆子，破家癩厲，刑人市死，盪失骸骨，水火刀兵，寇賊所害，田蠶耗漏，衣食不充，仕官不達，皆由罪惡。司過司考，師家治中，將吏所害，考罪先世，殃咎所逮也。皆參詞條，某州縣鄉里，年紀，男女，大小戶口，居止，所屬師主，實效審古旨列事狀，詣天師下治官祭酒、精進主領民戶者，奏詞皆依春夏秋冬夏，頓首俯仰，自

搏頰滿數則止。謂奏詞請章，貢上天曹，解過除罪，禳灾降福。

律曰：於洛陽靖，天師隨神仙西遷蜀郡赤城，人濁不清，世渾不平，於是攀天柱，據天門，新出正一盟威之道，欲更清明天人，誅罪不義，養育群生。立二十四治，署男職女職二十四職，乘玄元之施，開化後代，皆悔過，及得列爲真人。一月聽三貢上章表，自改悔罪過，斷絕復連，消除灾害、疾病。危急，一月聽三上章也。

律曰：入治上章，皆自嚴裝衣冠，正法服，平坐，存五方生氣及身中功曹吏兵，按分位，恭如相臨對倚，侍左右前後也。謂入治奏章之時，絕念定意，悉憶想神明也。

律曰：入治上章，避戊辰、戊戌不上章。穢污法，不過晦朔，亦不得上章。天下百姓不得觸穢詣治見師主者。違律罰筭減年，返獲其罪也。依律皆爲司過司考所劾其罪。

律曰：入治上章，皆正身趨步，科次左右肅恭致，不得男女雜錯，望視謬語，前却遲速。主者職吏降一階，不

降，罰玉三兩，又罰筭二紀。

律曰：道士不得妄爲惡逆男女上章。輕慢姪盜取，凶逆無道，不孝父母師主，不義君長姑姨，不敬奉道德，輕慢鬼神，賊害冒姦，毀辱賢善，讒伯誹謗，背父母，叛師主，不順不善，皆爲惡逆男女也。此皆不得爲上章。不滿一年，被奪壽五年，死付河伯謫作，又罰玉八兩，退位二等也。

律曰：章詞質而不文，拙而不巧，朴而不華，實而不僞，直而不曲，辯而不煩，弱而不穢，清而不濁，直而節，簡而要而輸誠，則感於天地，動於鬼神，御上天曹，報應立至也。違律司非執法，治官吏坐。

律曰：章消疾病，向鬼門。消災，向地戶。求長生，向天門。求富貴財利，向地戶。消口舌呪詛，向人門。厭虎，向寅。厭蛇，向巳。與天罡並力大吉也。

律曰：上章求財富貴，用天倉日戊子是。求爵位，用天府日上，不用自刑日。午酉亥辰，皆自刑。寅刑巳，戌

刑未，子刑卯，申刑寅，卯刑子，巳刑申。違律被罰考，病五十日也。

律曰：請求章奏，解先亡冥考殃罪，及身中所犯坐疾病災禍吉凶，由本治。若去師遼遠，聽詣同法。自非宗祖師，又非甲祭酒領戶治官之者，上章不達天曹，甲乙丙丁以下，皆爲奏上對。夫領戶三百以上，爲治疾官，三戶以上，爲職署，皆爲主者也。

律曰：修福延年，消災害，治厭百病，皆東向上章。解墓除責，開心聰明，過災厄，皆向西上章也。

律曰：災難厄急，從死中求生，消惡伏邪，皆北向上章也。

律曰：修身養性，溫潤富貴萬願，皆南向上章。

律曰：上章皆質立跪信，以驗心志。與吏兵要誓，不得違律也。

律曰：天爲除之應死者，天爲減罪。如此者，衆身有益，勿效他人。後世子孫，皆老人福是爲耳。諸職治道士女官，及散民新民，皆不得與狼戾祭祀家飲食。狼戾之家更相請呼，飲酒

食肉，男女合會，小大語笑，從心快意，吾之所禁。勿爲口腹所誤，令人故氣來往不絕，以致災禍。宜當節度身中吏兵，皆受不清之名，豫爲作備。若見中傷，勿得咎怨也。

律曰：諸職道士女官，皆不得使民數行問解淨汗，多有忌諱，緣真作僞，私行意氣狐疑，爲意不正，終不得道恩。邪僞自至，徒自苦耳。久於身無益，科律所禁，可得怨天也。

律曰：道士女官，皆不得使民私祠祀鬼神，殺猪羊，妖言惑語。此僞事，皆道之所禁。若有此色，皆須斷除。違律者犯錄上禁，罰筭一紀也。

玄都律文

①「敢」字當爲「改」字之誤。
②「穢」字疑衍。

(李剛點校)

068 赤松子章曆

經名：赤松子章曆。撰人不詳，據考應為唐代道士編集。係早期天師道上章儀範。六卷。底本出處：《正統道藏》洞玄部表奏類。

赤松子章曆卷之一

謹按《太真科》及《赤松子曆》，漢代人鬼交雜，精邪遍行，太上垂慈，下降鶴鳴山，授張天師正一盟威符籙一百二十階，及千二百官儀，三百大章，法文祕要，救治人物。天師遂遷二十四治，敷行正一章符，領戶化民，廣行陰德。爾後年代綿遠，寶章缺失，今之所存，十得一二。又按：赤松子問天老平長：己丑上章，何不報？平長答云：見扶章齋到天門，門閉。復問：

一日一夜何時開，何時閉？平長具答，

悉如科文。且世人求貢章奏，或為家國，或為己身，或為眷屬，或為先亡，種種不同，具如分別。又云：人生年命，

悉有星宿管係。若為惡事，記名黑簿，令人精神恍惚，夢寐不安，既多迍邅，更減年算。若清心信向之士，崇尚道法，求乞章符，奏即罪滅福生，增添祿壽，先靈遷達，願念從心。凡曰奏章，

先須備信，神明鑒燭，冀質誠心。若都無信，即神明不納，責子有慳鄙不捨之心。又云：章無的信，富饒者增之，貧窮者減之。或有官高富足之家，心希功德，而悛惜財物，便效貧窮之人，出

信如此，亦無益於有為。科云：有寒棲貧乏之人，求請章醮，師為代出法信。舊章雖各具所用，大抵有三：天子、王公、庶人。且尊卑不同，品目各異，不可殺混而無分別。科云：章信之物，施散貧窮，宜行陰德，不可師全用之。十分為計，師可費入者三分而已。天科嚴峻，犯者獲罪於三官，殃延九祖，永為下鬼，可不慎之！今並次

比，具有條貫，冀行之者，知次第焉。

章信

天旱章

米一石二斗，油一斗二升，命素一疋，淨席一領，筆二管，墨二笏，五方綵隨方色，紙二百四十張，銀環一雙，重一兩二銖，香二兩。

請雨得水過止雨章

米一石二斗，油一斗二升，命素一疋，淨席一領，筆二管，墨二笏，五方綵隨方色，紙一百二十張，香一兩，錢一千二百文。

却蟲蝗鼠災食苗章

（闕信儀）

收鼠災章

（闕信儀）

收除虎災章

（闕信儀）

解咒詛章

（闕信儀）

消怪章

芒繩一百二十尺，刀一口，五方綵隨方色，錢一千一百文，米一石二斗，筆一管，命素一疋，墨一笏。

攘災却禍延年拔命却殺都章

命素一疋，錢一千二百文，油一斗二升，米一石二斗，紙二百四十張，筆二管，墨二笏，香二兩，果子。

本命謝過口啓章

(闕信儀)

飛度九厄天羅章

青絲一百二十尺，算子一百二十枚，米一石二斗，命素一疋，錢一千二百文，香二兩，紙一百二十張，油一斗二升，筆一管，墨一笏。

却三災章

(闕信儀)

青絲拔命章

命素四十尺，米一石二斗，錢一千二百文，紙一百一十張，筆墨各一，算子百二十枚，錫人五身，香一兩，油一斗二升。

疾病醫治章

(闕信儀)

疾病困重收滅災邪拔命保護章

(闕信儀)

扶衰度厄保護章

命素一疋，米一石二斗，錢一千二百文，油一斗二升，香一兩，紙一百二十張，筆一管，墨一笏。

謝土章

(闕信儀)

却虛耗鬼章

(闕信儀)

言功安宅章

(闕信儀)

斷瘟毒疫章

(闕信儀)

斷魁泉章

(闕信儀)

解天羅地網章

命素一疋，錢一千二百文，白米一石二斗，油一斗二升，香一兩，紙一百二十張，朱繩一百二十尺，釧子一，素絲一兩，筆一管，墨一笏。

驛馬章

亦云開度章。金人一身，五方綵各

一疋，紫案巾、牙笏一，冠一，衣一領，幘一，筆、墨、算子、紙、青絲、席一，書刀一，水履一，紫傘蓋一，錢一千二百文，米一石二斗，命素一疋，油、香。

謝五墓章

黃繒一疋，白米一石二斗，油一斗二升，錢一千二百文，筆一管，紙一百二十張，墨一笏，香一兩，果子。

解五墓章

錫人五形，米一石二斗，錢一千二百文，命素一疋，墨一笏，油一斗二升，紙一百二十張，筆一管，算子一百二十枚。

謝先亡章

(闕信儀)

保胎章

(闕信儀)

催生章

(闕信儀)

小兒上光度化章

米一石二斗，錢三百六十文，命素一疋，紙一百二十張。

保嬰童章

(闕信儀)

斷亡人復連章

(闕信儀)

疾病謝先亡章

(闕信儀)

疾病破棺章(闕文)

白素四十尺，金人一形，刀一口，斧一張，鑿一，大槌一，鋸一，炭三十斤，木衝一雙，鍬一，紙一百二十張，錢一千二百文，筆墨一副，油一斗二升。

收除火災章

五方綵五疋，素絹一疋，銀環一雙，錢一千二百文，墨一笏，米一石二斗，油一斗二升，紙一百二十張，筆一管，席一領，絳巾一丈二尺。

甲子丐過章

(闕文信儀)

上清言功章

(闕信儀)

三五雜錄言功章

(闕信儀)

絕泰山死籍言功章

(闕信儀)

遷達先亡言功章

(闕信儀)

百姓言功章

(闕信儀)

收怪章

扶衰章

斷傷章

斷官章

大斷骨血注代命章

斷土章

拔厄章

救難章

斷墓章

斷子注章

解一身羅網章

拔墓章

拔天河章

拔三十六獄章

初化除罪章

求子章

夫妻積病療治章

產後疾病首罪乞愈章

夫妻興氣相應首過章

暴病請官一時相付章

家道軼軻絕子請宅乞祐章

宅中光怪歸命乞丐白章

疾病牒所犯移徙諸忌請官救章

疾病歸化心口有違改更乞恩章

請官收捕妄作一法章

夫妻離別斷注消怪章

違犯科要首謝乞原章

(已上二十七章皆闕文)

右同用白素四十尺，白米一石，油一斗，香一斤，紙一百張，筆一雙，墨一笏，書刀一口，席二領，布巾五尺。

憂厄困辱謝過解咎章

金環一雙，書刀一口，紙一百幅，筆二管，墨一笏，米五斗，席二領，香五兩。

始覺有疾首罪乞恩章

錢百一十，米三斗，紙百幅，筆二管，墨一笏，香一兩，席一領，書刀一口。

疾病累日謝醫救治章

紙百幅，筆二管，墨一笏，書刀一口，

米三斗，香一兩，席一領，錢一百二十文。

斷瘟疫章

紙百幅，香三兩，筆一管，墨一笏，書刀一口，席二領，油一斗，錢七十文，繒一丈二尺，隨家口多少各別。

請雨章

油三斗六升，筆二管，墨一笏，紙百幅，朱砂一兩，香三兩，席二領，米五斗，錢三百六十五文。

疾厄斷除鬼訟拔危保安章

紙三百張，油三斗，青絹四十尺，筆一管，墨一笏，香五兩，米五斗，席二領，書刀一口。

解九五元辰厄會章

白米石二，席四領，油一斗二升，繒一疋，無者用紙百張，筆二管，墨二笏，書刀一口，算子百二十，金環一雙，香二斤，絳繩三種，每種九條，百二十尺。厄重者，五色絲各三兩。

請晴章

蠟五斤，筆二管，墨二笏，紙百幅，朱砂五兩，書刀一口，席二領，米五斗。

解八卦元辰大厄章

白素四十尺，米一石二斗，油一斗二升，書刀一口，素絲五兩，金環一雙，重二分。錢一千二百，亦可六百，或三百八十四文。算子百二十，紙百幅，香一十三兩，筆二管，墨一笏，席二領，書刀一口。

退盜章

五色左繩隨方丈數，青紋九十尺，大刀一口，紙一百張，筆墨一副，香三兩，席一領，書刀一口，米五斗。

入居改易不利大小謝宅章

紙百二十張，筆一管，墨一笏，書刀一口，五方綵各隨方數，蠟五斤，席二領，米五斗，錢百二十文，香三兩。

新居恐懼鎮宅章

黃繒十尺，錢百二十文，米五斗，席二領，紙百幅，筆一管，墨一笏，香三兩，書刀一口。

虛耗光怪斷絕殃注章

紙百張，筆一管，墨一笏，書刀一口，席一領，油一斗，黃布一十四尺，白米石二，香二兩。

解釋三曾五祖塚訟章

木五十斤，燒，及作散，法在後。十斤、二十五斤亦得。黃布五丈，米一石五斗，紙一百張，墨一笏，筆一管，香一兩，席一領。

官私咎謫死病相連斷五墓殃注章

紙百張，筆一管，墨一笏，書刀一口，席一領，油一斗，黃布二十四尺，米一石二斗，朱砂一兩，香一兩。

數夢亡人混涉消墓注章

黃布五丈，白素四十尺，油三斗六升，紙一百張，筆一管，墨一笏，書刀一口，香三兩，朱砂二兩。

宅中怪異小驅除章

紙五十張，筆一管，墨一笏，米三斗，席一領，香一兩，錢七十二文。

喪葬後大驅除章

紙一百張，筆二管，墨一笏，書刀一口，香一兩，席一領，米三斗，錢百二十文，朱砂一兩，繒十尺。

病死不絕銀人代形章

銀箔人，隨家口多少，一人一形。銀無，用錫人，或錢九十九，奏章後，投

水中。紙百張，筆一管，墨一笏，書刀一口，米五斗，香二兩，繒一丈一尺。

疾病多怪收捕故氣章

桃符六十枚，板長尺二寸，廣一寸二分，厚三分。赤小豆九斗，左繩百一十尺，大刀一口，紙百張，筆一管，墨一笏，席一領，香二兩，書刀一口。

疾厄沈滯解二十四獄章

青紋二十四尺，香三兩，紙一百張，筆一管，墨一笏，米五斗，刀一口，席一領。

拔五獄救疾章

素絲三兩，金環一雙，香十兩，紙百張，筆一管，墨一笏，席一領，米五斗，書刀一口。

解五斗閉繫災絕拔命章

白素四十尺，素絲三兩，金環一雙，墨二笏，筆二管，紙二百張，香五兩，米五斗，書刀一口。

夢見亡人閉繫大遷達章

素絲四十尺，紙一百張，筆一管，墨一笏，書刀一口，油一斗，席二領，香

三兩，錢百一十文，米五斗。

夢見亡人愁恨小遷達章

紙百張，筆一管，墨一笏，書刀一口，油一斗，香二兩，席一領，米三斗，錢百二十文。

服滿後遷達請恩章

紋繒四十尺，紙百張，筆一管，墨一笏，米五斗，書刀一口，油一斗，香七兩，席二領，錢一百二十文。

解咒詛章

錢三百二十六文，命綵隨年數，紙一百張，筆墨各一副，米五斗，席二領，香五兩，書刀一口。

解五方咒詛章

錢三百六十文，命絲隨年數，紙一百張，筆一管，墨一笏，米三斗，席二領，香五兩，書刀一口，五色絲隨方數。

乞子章

油一斗四升，米二石四斗，紙一百張，筆一管，墨一笏，朱砂二兩，書刀一口，席一領，命素一疋，錢一千二百文，香五兩。

銷口舌誹謗章

蠟三斤，炭五十斤，錢百二十文，米三斗，席一領，香五兩，紙五十張，筆墨一副，書刀一口。

解厄延命章

米九斗，油七斗，錢一百二十文，紙一百張，筆一管，墨一笏，書刀一口，香一兩，席二領。

積病忽劇急請命章

白素四十尺，米一石，油五斗，香二兩，紙一百張，筆一管，墨一笏，書刀一口，席二領。

延算拔命章

紙一百張，筆一管，墨一笏，香五兩，朱砂二兩，書刀一口，席二領，金環一雙，青絲三兩，絹一疋，米一石二斗，算子百二十枚。

錄魂魄章

錢一百一十文，席一領，朱砂一兩，香二兩，書刀一口，紙一百張，筆一管，墨一笏，米三斗。

度厄保護章

和香五斤，席一領，紙一百張，筆一

管，墨一笏，書刀一口，米三斗。

八方大保護章

紙一百張，墨一笏，筆一管，書刀一口，絹一疋，米一石二斗，油三斗，銀環一雙，青絲三兩，和香一斤，席二領。

五方生養保護章

米一石二斗，白素四十尺，香五兩，席二領，紙一百張，筆一管，墨一笏，書刀一口。

滯疾進退解羅網章

白素四十尺，米一石，金環二雙，紙一百張，筆一管，墨一笏，書刀一口，朱砂五兩，香五兩，席一領。

扶衰度厄解羅網章

已上三十九章皆闕文
金環二雙，青絲二十四兩，白素四十尺，米一石，香五兩，紙一百張，筆二管，墨一笏，書刀一口，席二領。

為天地神祇言功章

三五言功章

除太山死籍章

為先亡言功章

三月一時言功章

三會言功章

酆都章

米一石二斗，炭五十斤，油一斗二升，著身衣三事，命素一疋，香二兩，錢一千二百文，紙一百二十張，筆一管，墨一笏。

生死解穢洗蕩宅舍章

(闕信儀)

大醮宅章

五方綵各一疋，命素一疋，油一斗二升，紙二百四十張，錢一千二百文，米一石二斗，筆一管，墨一笏，香二兩。

開通道路章

衣服三事，錢三百六十文，絹巾一丈五尺，衣綿三事，紙一百二十張。

拔河章

(闕信儀)

保蠶章

油二斗四升，白素一疋，米一石二斗，紙五貼，筆墨各五事，雞卵一雙。

接算章

青絲一百二十尺，算子百二十枚，錢一千二百文，米一石二斗，油一斗二升，香五兩，命素一疋，金環一雙，紙一百二十張，墨兩笏，筆兩管。

大塚訟章二通

沐浴章

解謫章

久病大厄金紫代形章

錢二百四十文，紫紋四十尺，金人一形，重一兩二銖。墨一笏，紙二百張，書刀一口，香十兩，席二領，米一石二斗，筆一管，油一斗，朱砂五兩。

收魔夢章

為亡人首悔贖罪解謫章

齋亡人衣物解罪謫遷達章

滅度三塗五苦鍊尸受度適意更生章

出喪下葬章

新亡遷達開通道路收除土殃斷絕復連章

章

新亡灑宅逐注却殺章

受官拜章

臨官蒞民章

受官消滅妨害章

遷臨大官章

保護戎征章

論三等章

千二百官儀，三百大章，章中雖各具質信，然教跡來久，行之者多有增減，所以尊卑雷同，高下不等，今抄出三等，約為準的。

繒綵，天子用紫紋疋數，王公用本命色丈數，庶人用繖繒尺數。

鎮錢，天子用金錢，王公用銀錢，庶人用銅錢。

祿米，天子三石六斗，王公二石四斗，庶人一石二斗。

鎮油，天子一石二斗，王公六斗四升，庶人二斗二升。

用香，天子全斤，王公半斤，庶人三兩、五兩。

紙、筆、墨、朱砂，此物給主者書章起草，換易陋誤，應是諸章，悉須置辦，不可暫闕，其餘並依本例色目，不得謬濫。違，減年算。

章辭

凡欲奏章，先具辭疏，列鄉貫、里

號、官位、姓名，年幾，并家口、見存眷屬、男女、大小等，令依道科，齋某法信於某處，詣某法師，請求章奏，伏乞慈悲，特為關啓，辭中或說事意，須質而不文，拙而不工，樸而不華，真而不偽，直而不肆，辯而不煩，弱而不穢，清而不濁，簡要輸誠，則感天地，動鬼神，御上天曹，報應立至，如違，奪算一紀。

天門開時

子日卯巳未西亥丑開，

子為日神，傷師命時不可用。

丑日辰午申戌子寅開，

丑為日神，傷牛犢時不可用。

寅日卯巳未西亥丑開，

寅為日神，傷六畜時不可用。

卯日辰午申戌子寅開，

卯為日神，傷師時不可用。

辰日卯巳未西亥丑開，

辰為日神，傷父母時不可用。

巳日辰午申戌子寅開，

巳為日神，傷婦女時不可用。

午日卯巳未西亥丑開，

午為日神，傷師時不可用。

未日辰午申戌子寅開，

未為日神，傷病者時不可用。

申日卯巳未西亥丑開，

申為日神，傷遠人時不可用。

酉日辰午申戌子寅開，

酉為日神，傷飛鳥時不可用。

戌日卯巳未西亥丑開，

戌為日神，傷遠行時不可用。

亥日辰午申戌子寅開，

亥為日神，傷行人時不可用。

天門閉時

辰午申戌子寅閉，子日

卯巳未西亥丑閉，丑日

辰午申戌子寅閉，寅日

卯巳未西亥丑閉，卯日

辰午申戌子寅閉，辰日

卯巳未西亥丑閉，巳日

辰午申戌子寅閉，午日

卯巳未西亥丑閉，未日

辰午申戌子寅閉，申日

卯巳未西亥丑閉，酉日

辰午申戌子寅閉，戌日

卯巳未西亥丑閉，亥日

五音呈章利用

建日可呈章九通，

利上開化大道、收摘凶殃鬼賊，不上誅符廟，傷一門及師。忌申時，斗擊下。他倣此。

除日可呈章十二通，

利上治病、分解塚墓殃考連達子孫，不上保護錢財。忌酉時。

滿日可呈章六通，

利上安穩塚墓及保護錢財，不上解宅中虛耗，傷六畜時不可用。忌戌時。

平日可呈章十七通，

利上分解百功禁忌、收除衆邪，不上保護錢財、六畜，傷師及奴，不可用。忌亥時。

定日可呈章十七通，

利上五方保護、安宅、解上公虛耗，不上收除故炁，傷長者。忌子時。

執日可呈章五通，

利上收百鬼賊，解中捕者，不上治病，傷病者。忌丑時。

破日可呈章七通，

利上誅房廟、收滅殃怪、伏尸惡死，不上解塚墓絕世，不吉。忌寅時。

危日可呈章十二通，

利上度星、解亡人復連、先世牽速子孫，不上安宅，傷六畜。忌卯時。

成日可呈章十八通，

利上錄署、保護大小、治病，不上遠行，行人不還。忌辰時。

收日可呈章百二十通，

利上首謝度厄、保護六畜、安宅，不上解官，有獄死。忌巳時。

開日可呈章百二十通，

利上收除故炁房廟、千師萬巫、六畜衆精、室中魍魎雜神之死，不解亡人復連，六畜死。忌午時。

閉日可呈章五通。

利上解土工禁忌、破射年命，不上保護大小，傷材。忌未時。

五音利用

宮音屬土，長生申，七月。沐浴酉，

八月。冠帶戌，九月小墓。臨官亥，十月。

帝王子，十一月。衰丑，十二月。病寅，正

月。死卯，二月白虎。墓辰，三月大墓。絕

巳，四月。囚死午，五月。廢休未，六月。破殺寅卯，本音亥子，刑殺亥子，季殺丑未。

商音屬金，長生巳，四月。沐浴午，

五月白虎。冠帶未，六月小墓。臨官申，七

月。帝王酉，八月。衰戌，九月。病亥，十

月。死子，十一月。墓丑，十二月大暮。絕

寅，正月。囚死卯，二月。廢休辰，三月。

本音申酉，破殺寅卯，刑殺巳午，季殺

辰戌。

角音屬木，長生亥，十月。沐浴子，

十一月。冠帶丑，十二月小墓。臨官寅，正

月。帝王卯，二月。衰辰，三月。病巳，四

月。死午，五月。墓未，六月大墓。絕申，

七月。囚死酉，八月白虎。廢休戌，九月。

本音寅卯，刑殺申酉，季殺丑未。

徵音屬火，長生寅，正月。沐浴卯，

二月。冠帶辰，三月小墓。臨官巳，四月。

帝王午，五月。衰未，六月。病申，七月。

死酉，八月。墓戌，九月大墓。絕亥，十月。

囚死子，十一月。廢休丑，十二月。本音

巳午，破殺子亥，刑殺申酉，季殺丑未。

羽音屬水，長生申，七月。沐浴酉，

八月。冠帶戌，九月小墓。臨官亥，十月。帝王子，十一月。衰丑，十二月。病寅，正月。死卯，二月。墓辰，三月大墓。絕巳，四月。囚死午，五月白虎。廢休未，六月。本音亥子，破殺巳午，季殺丑未。

六甲旬天門開時

甲子旬辰時天門開，
甲戌旬寅時天門開，
甲申旬子時天門開，
甲午旬戌時天門開，
甲辰旬申時天門開，
甲寅旬午時天門開。

上章吉日

甲午吉利，甲戌大吉，甲申吉，乙未、乙亥、丙午、丁丑、丁巳、戊子、己亥、己卯、己酉、己未、庚午、庚子、庚辰、庚戌、庚申、辛巳、辛卯、壬午、壬子、壬辰、癸卯、癸未、癸丑，並吉。

正月十一日、二月三日、十八日、

三月七日、九日、四月十五日、五月二日、五日、六月三日、十三日、七月一日、十七日、八月二日、八日、十八日、九月九日、十月五日、十一月四日、十

六日、十二月二十一日。

五德日

甲辰、丙辰、甲午。
已上三日可謝罪，求乞善願。吉。

天願日

己丑，

此日求乞善願，易遂心。

甲辰、乙巳。

此日名天生日，宣設醮，大吉。

修齋吉日

每月三、九、十一、十七、十八、二十四、二十七。

已上齋日大吉。此日令人歡樂，功德成就，齋主長生，主人受福，師得仙道。

三元、八節、甲子、庚申、三會、五臘、十直、本命、行年、四始。

已上等日修齋大吉。

醮章吉日

己酉、壬申、庚辰、壬子、辛未、甲寅、戊子、癸丑、己丑、丙申、壬辰、甲午、乙亥、丁酉、庚子、丙午、丙辰、庚申、甲子、乙丑、庚午、癸酉、甲戌、乙亥、己

卯、辛巳、甲申、乙酉、丁亥、甲午、乙未、甲辰、丁未、庚戌、戊申、戊午、己未、辛酉、癸亥、丁卯、壬午、己丑、辛卯、丁巳。

上件醮祭大吉。

七星醮日

建、滿、平、定、成、收、閉。

已上醮星神下降，主人歡喜，得福進財。

六甲章符日

甲子，上章凶，設醮書符吉。厭百鬼不去。乙丑，章、符凶，醮吉。厭百鬼去不遠。

丙寅，章、醮凶，符損三人。厭百鬼去百里。

丁卯，章、醮吉，符鎮宅凶。百鬼不去。

戊辰，章、醮、符凶。鬼煞三人。

己巳，章、符吉，醮凶。鬼南去百里。

庚午，章、醮、符吉。鬼速去。

辛未，章吉，醮、符凶。鬼不去。

壬申，章、符凶，醮吉。鬼損二人鬼西去七百里

癸酉，章、符凶，醮吉。鬼殺人不。去。

甲戌，章、醮吉，符五人凶。鬼去千里。

乙亥，章、醮吉，符二人凶。鬼東去一百里。

丙子，章、醮、符吉。鬼南去七百里。

丁丑，章吉，醮凶，符妻凶。鬼東去九百里。
戊寅，章、醮凶，符吉。鬼東去百里。
己卯，章凶，醮吉，符中子凶。鬼南去百
里。
庚辰，章吉，醮凶，符奴婢凶。鬼不去。
辛巳，章、醮吉，符凶。鬼南去千里。
壬午，章、醮吉，符失火。鬼南去萬里。
癸未，章吉，醮凶，符得財。鬼南去萬里。
甲申，章、醮吉，符宅得財。鬼西去萬里。
乙酉，章、醮吉，生貴子，符凶。鬼西去萬里。
丙戌，章、醮吉，符益財。鬼去千里。
丁亥，章、醮吉，符中子吉。鬼不去。
戊子，章、醮、符吉。鬼東去萬里。
己丑，章、醮、符吉。鬼東去萬里。
庚寅，章、醮吉，符凶。鬼不去殺家長。
辛卯，章吉，醮、符凶。損中子鬼不去。
壬辰，章吉，醮、符凶。鬼不去。
癸巳，章、醮吉，符傷母。鬼不去。
甲午，章、醮吉，符王凶。鬼去不遠。
乙未，章吉，醮凶，符失火。鬼東去萬里。
丙申，章、醮吉，符凶。鬼去他方。
丁酉，章凶，醮吉，符小子凶。鬼南去十
里。

戊戌，八靖忌醮，符不帶，二人凶。鬼不去。
己亥，章、符吉，醮殺婦。鬼不去殺六畜凶。
庚子，章、醮吉，符失火。鬼不去。
辛丑，章吉，醮凶，符女子凶。鬼不去。
壬寅，章符吉，醮凶。鬼不去。
癸卯，章、符吉，醮凶。鬼不遠去。
甲辰，章凶，醮、符吉。鬼不去。
乙巳，章、醮吉，符家長凶。鬼妨家母。
丙午，章、醮凶，符婦凶。鬼去千里。
丁未，章、醮吉，符子凶。鬼南去萬里。
戊申，章吉，醮凶，符得財。鬼去不五人凶。
己酉，章、醮吉，符長子凶。鬼。
庚戌，章、醮吉，符凶。鬼不去。
辛亥，章凶、醮吉，符必鬪。鬼去不遠。
壬子，章、醮、符吉。鬼不去。
癸丑，章、醮、符吉。鬼去不遠。
甲寅，章、醮吉，符二人凶。鬼不去。
乙卯，章、醮吉，符得財。鬼不去。
丙辰，章、醮吉，符得財。鬼南去萬里。
丁巳，章、醮吉，符凶。鬼南去萬里。
戊午，章、醮、符吉。鬼去不遠。
己未，章凶，醮吉，符二千石。鬼不去。
庚申，章、醮吉，符凶，殺三人。鬼不去。

辛酉，章、醮吉，符凶。鬼去千里。
壬戌，章吉，醮凶，符。鬼去七百里。
癸亥，章、醮吉，符凶。鬼不去。
右六甲章符，厭百鬼等，日宜細看
之。

赤松子章曆卷之一

赤松子章曆卷之二

受道倍日

正月、二月。

子日五十倍，丑日四十倍，寅日殺，子卯日殺妻，辰日大凶，巳日自如，午日七十倍，未日殺身，申日殺父，酉日殺子，戌日七十倍，亥日五十倍。

三月、四月。闕注。

五月、六月。

子日殺子，丑日大凶，寅卯日凶，辰日五十倍，巳日殺子，午日自刑，未日殺婦，申日殺父，酉日五十倍，戌日二十倍，亥日不吉。

七月、八月。

子日五十倍，丑日大吉，寅日大凶，卯日殺母，辰日大凶，巳日四十倍，午日殺子，未日五十倍，申日三十倍，酉日殺母，戌日二十倍，亥日五十倍。

九月、十月。

子日自如，丑日五十倍，寅日凶，卯日二十倍，辰日七十倍，巳日大凶，午日殺子，未日二十倍，申日三十倍，酉日殺母，戌日殺子，亥日殺婦。十一、十二月。

子日殺子，丑日殺子，寅日二十倍，卯日五十倍，辰日五十倍，巳日殺父，午日殺婦，未日七十倍，申日三十倍，酉日三十倍，戌日大凶，亥日殺婦。

書符式

凡欲書符，先向王方叩齒，勅劍

水，存七星，咒，噴了，啓曰：

元命真人唐葛周三將軍，今有男女某甲疾病，告訴向臣，求乞救護，臣謹依法，以道真符與某甲吞帶，當願勅下真官直符使者，百千萬重道氣，隨禁降入符中，行神布氣，搜索邪精，誅戮鬼賊，救濟天人。次存思案前五色真氣，真氣上，左右有直符童子，朱衣青裙，案前有一行符將軍，朱衣玄冠，佩劍持鉞斧，左右各有一直符，黃冠，黃裙，緋褐，執劍，我面前有左日右月，去面九

寸，日月光芒覆朱盞，頭上七星，星在頭，懸在朱盞上。畢，口三云：合明天帝日。了，存朱筆為騰蛇，便閉氣書符。

凡書符之法，先以青墨郭外四周，乃以丹書符文於內，若無青墨，丹亦可用。

若書治邪病符，當用虎骨真朱合研，研畢，乃染筆書符，咒曰：

謹勅臣身中五體真官，魂為天父，魄為地母，頭為雷公，髮為黑雲，頂為明星，腦門為朱雀，眉為麒麟，眼為日月，鼻為虎賁，上脣為風伯，下脣為雨師，舌為九州都督，喉為九層樓臺，左頰為東王公，右頰為西王母，耳為仙童遠聽，項為天柱，肩為金剛，肘為力士，左臂為璇璣却狄大將軍，右臂為玉衡破狄大將軍，掌為火車，指為甲卒，肝為青帝，肺為白帝，心為赤帝，腎為黑帝，脾為黃帝，腸為黃龍，膽為太一，膀胱為河伯，血為水官，筋為天網，骨為地網，毛為天羅，足為白馬，前步三官，各領七千萬衆，乘駕大車，並從臣身中出，助

臣書符行炁，破殺兇魔，魍魎魑魅，惡鬼邪炁，急急如太上口勅律令。

甲子旬治病使者，領炁功曹，子時太上還治。

甲戌旬治病使者，治病功曹，戌時太上還治。

甲申旬治病使者，治病功曹，申時太上還治。

甲午旬治病使者，正一功曹，日中太上還治。

甲辰旬治病使者，中部功曹，食時太上還治。

甲寅旬治病使者，直使功曹，平明太上還治。

右凡書符，取此時乞願，符禁迅速。

書章法

書章，筆、硯勿雜用。研墨，左轉四十九重，磨亦然。以聞，去再拜下一寸。臣姓，去以聞隔三行。太清，去臣姓三行。太歲，去太清三行。若書章已成，而有小事，經年不可上。若未下細字，經月可上。細字，上度三寸五分，中度四寸五分，下度五寸，不得過此。今人多言一寸五分，非也。章至太歲，紙盡，不可上。若有主行，即可。若兩行，可全紙續之。錯誤脫字，小章不過三字，大章以意量之。書章，上讓八分，下通蟻走。書章，以巾敷案上，不得令著牀，勿以衣著章上，及落地。書

章，入靜，不得常人亂鬧，論及他事，臭穢之言。書章，不得以筆點水中及口，當閉口，不得有所食，及氣衝。書章，

淨洗手，向北書。身經穢穢，不得書

章。書不得敗字不成，紙不得破裂，不

得飲酒、食肉，薰穢，當整理衣冠，不得

裸露。書章，當須匍匐恭敬，不得蹲

踞。書章畢，先校讀一遍，然後奏之。

臣字不得上行頭，不得懸生露死。鬼字

不得居行首。不得抽破人姓名，不得

令人竊讀，觸動太清。日月不得預下，

當在臨時。若急事上章，當用朱筆題

署。若上逐鬼章，當朱書所上正一弟

子姓名。若治邪病章，用青紙。三官

君吏，貴在青色。若疰氣鬼病作繫鬼

章，朱書青紙。章奏了，於治中燒，和

真朱二分擣，和蜜爲丸，平旦入靖，再

拜服之，垂死皆活。莫令人知。若因

病入靖書章，即四面燒香火。

三元日

正月十五日上元

七月十五日中午元

十月十五日下午元

右件，天地水三官檢校之日，可修齋祈福。

三會日

正月五日上會

七月七日中會

十月五日下午會

右此日宜上章言功，不避疾風暴雨，

日月昏晦，天地禁閉。其日，天帝一

切大聖俱下，同會治堂，分形布影，

萬里之外，響應齊同。此日上章，受

度法錄，男女行德施功，消災散禍，

悉不禁制。

又女青鬼律云：天會丙午，地會壬午，

人會壬子，日會庚午，月會庚申，星辰

會辛酉，五行會甲辰，四時會甲戌，天

節甲午，地節甲申，人節甲子。

右已上日，可立功德，乞福大吉。

子時相破

子時破午，午時破子，凡啓醮，宜

用子午二時。若值相破，及斗擊在子，

須避子。在午須避午。若急疾亦得或

避，得爲佳。

奏章向背

日中奏章向東，夜奏向北。又云：白日受度向東，破契子午、請命星宿、急疾章，皆向北，存大帝。自非星宿大章，登壇大事，并收捕驅除急章，不煩露上。治病向鬼門，消灾厄向地戶，求長生向天門，求富貴財利向地戶，消口舌咒詛向人門，厭虎向寅地，厭蛇向巳地。

又曰：作福延年、消災厭病，宜東向。解墓陰責，開心聰明，過度災厄，宜西向。疾病垂死，章符治救，宜北向。治身養命，求乞富貴，宜南向。上章謝罪，宜北向。正月、五月、七月、九月治病，不向東。四月、八月、十二月治病，不向南。七月、三月、十月治病，勿向西。二月、六月、十月治病，勿向北。

右已上向背，章符治病，不得越錯。如違，依科奪算。

逐月詣宮

正月、十二月上詣太上虛無丈人宮，二月上詣太上玄老仙都宮，三月、

四月上詣太上三天太清宮，五月上詣太上重道宮，六月、七月上詣太上九炁文昌宮，八月上詣太上天帝宮，九月、十月上詣太上大道宮，十一月上詣太上侍中左右監神諸將軍宮，閏月隨月宮上詣太上金單太歲宮。或隨前月。

逐日詣曹

一日建王曹，治赤虛宮。二日太素曹，治太微宮。三日太微曹，治北平宮。四日都正曹，治太清宮。五日正一曹，治東明宮。六日玄一曹，治上明宮。七日太素曹，治高靈宮。八日靈集曹，治紫微宮。九日丹靈曹，治待春宮。十日太清曹，治武靈宮。十一日三水曹，治素女宮。十二日月錄曹，治巨野宮。十三日清叙曹，治西明宮。十四日玄正曹，治上絳宮。十五日中都曹，治曲平宮。十六日司非曹，治北府宮。十七日司姦曹，治南真宮。十八日統攝曹，治東明宮。十九日統錄曹，治西靈宮。二十日監考曹，治司命宮。二十一日監司曹，治陽明宮。二十二日典考曹，治太陽宮。二十三日

司宮曹，治少陽宮。二十四日玄元曹，治太陰宮。二十五日太玄曹，治少陰宮。二十六日都司曹，治北辰宮。二十七日都候曹，治太白金宮。二十八日直使曹，治林明宮。二十九日司直曹，治陽明宮。三十日集都曹，治啓明宮。一云典者曹。

月忌

正月庚申，又二日。二月辛酉，又九日。三月甲戌，又十日。四月癸亥，又十一日。五月壬子，又十一日。六月癸丑，又十一日。七月甲寅，又十二日。八月乙卯，又十三日。九月甲辰，又十三日。十月丁巳，又八日。十一月丙午，又十五日。十二月癸未，又十三日。又戊辰、庚辰、壬辰、乙巳、辛巳、癸巳、己巳、丁巳。

已上不可章醮。

弦望式

上弦八日、九日，下弦二十二日、二十三日，大月八日、二十二日，小月九日、二十三日，不可用。

天羅地網

戌、亥為天羅，辰、巳為地網。子、午為

中宮，寅、申爲算盡，丑、未爲五墓。

右章醮推人年命，切須看之。

血忌

正丑，二未，三寅，四申，五卯，六酉，七辰，八戌，九巳，十亥，十一午，十二子。

右十二月血忌日，不可用。

九空

正辰，二丑，三戌，四未，五卯，六子，七酉，八午，九寅，十亥，十一申，十二巳。

右十二月九空日，不可用。

天狼籍日

正子，二辰，三午，四酉，五子，六卯，七午，八未，九子，十卯，十一午，十二酉。

右十二月狼籍日，不可用。

道父母

丙寅丁卯道父忌，

丙申丁酉道母忌，

戊辰戊戌南帝忌，

壬辰壬戌北帝忌。

右已上日，不可燒香啓奏。

天官朝禮天門

正月二日，二月九日，三月十日，四月十一日，五月十一日，六月十一日，七

月二日，八月十三日，九月十三日，十月八日，十一月十五日，十二月十三日，閏月十一日。

右件日，不可拜章。

推斗擊時

建日忌申時，除日忌酉時，滿日忌戌時，平日忌亥時，定日忌子時，執日忌丑時，破日忌寅時，成日忌辰時，收日忌巳時，開日忌午時，閉日忌未時，危日忌卯時。

右已上日斗擊下時，不可上章治病。

每月凶妨

正庚申，二辛酉，三庚戌，四癸亥，五壬子，六癸丑，七甲寅，八乙卯，九甲辰，十丁巳，十一戊午，十二丁未。

右十二月此日，不可上章，害師。

四時凶日

春三月酉，夏三月午，秋三月亥，冬三月子。

右四時日，不可上章，害師。

上章香煙

凡上章，先看香煙。南轉向東，病者難差。直起逕衝，大吉。煙遶身師，與章

生俱有罪過。煙上中滅，病者死。煙細從四邊起，生人有二心，不精誠。

十二時辰

正月、四月、七月、十月，雞鳴、食時、未、戌、神在門。平旦、禹中、申、亥、神在外。日入、午、酉、子。神在內。二月、五月、八月、十一月，卯、午、酉、子、神在門。雞鳴、辰、未、戌、神在外。寅、巳、申、亥、神在內。三月、六月、九月、十二月，寅、巳、申、亥、神在門。卯、午、酉、子、神在外。辰、未、戌、丑。神在內。

右十二月十二時辰，所在不可犯。

陰殺所在

正月在寅，癸亥。二月在巳，辛酉。三月在午，庚戌。四月在未，癸亥。五月在寅，壬子。六月在卯，癸丑。七月在辰，甲寅。八月在亥，九月在巳，乙卯。十月在丑，丁巳。十一月在酉，丙午。十二月在酉，丁未。

右十二月此日，陰殺，可避之。

天醫所在

正丑，二庚，三壬，四庚，五壬，六丙，七壬，八酉，九丙，十申，十一丙，十二辛。

右十二月天醫所在，若欲收擊治病，常從天醫上來，大吉。

天綱忌用

正月巳時後，天綱加鬼門。二月未時後，天綱加鬼門。三月午時後，天綱加鬼門。四月巳時後，天綱加鬼門。五月辰時後，天綱加鬼門。六月卯時後，天綱加鬼門。七月寅時後，天綱加鬼門。八月丑時後，天綱加鬼門。九月子時後，天綱加鬼門。十月亥時後，天綱加鬼門。十一月戌時後，天綱加鬼門。十二月酉時後，天綱加鬼門。

右天綱頭所在。

正月在未，二月在申，三月在酉，四月在戌，五月在亥，六月在子，七月在丑，八月在寅，九月在卯，十月在辰，十一月在巳，十二月在午。

右已上天綱，切須避之。

殺師忌日

正月巳，四日、十六日、二十一日。二月寅，五日、十九日、二十一日、二十八日。三月酉，六日、十二日、二十七日。四月申，一日、八日、十三日、十五日。

五月辰，六日、十四日、二十三日。六月戌，七日、十一日、二十二日、二十九日。七月未，七日、十五日、二十三日。八月丑，二日、十一日、十四日、二十六日。九月午，六日、七日、八日、九日、二十五日。十月寅，二日、七日、二十四日、二十九日。十一月卯，二日、九日、十二日、十三日、二十五日。十二月酉，四日、七日、二十日、二十八日。

右天殺日，上章避之。

宅神將軍遊

正、二、三，三月遊北方。四、五、六，三月遊東方。七、八、九，三月遊南方。十、十一、十二。三月遊西方。

右將軍遊方，不可犯之。

宅神遊去來

壬戌去甲子來。丁卯去辛未來。戊寅去壬午來。丙戌去庚寅來。丙申去辛丑來。戊申去辛亥來。甲寅去己未來。

右宅神遊去來，若醮宅，神在有福。

河伯土公遊

甲子北遊七日，庚午還。甲戌東遊十日，甲申還。甲午南遊七日，庚子還。甲辰西

遊十日。甲寅還。

右謝土遇神在，即有福。

將軍太歲遊

甲子東遊五日己巳日還。丙子南遊五日辛巳日還。庚子西遊五日乙巳日還。壬子北遊五日丁巳日還。戊子中宮遊五日癸巳日還。

右將軍太歲去來，切須避之。

凡宅神，十二月二十五日上天，正月五日下午。三月未上天，四月二十七下。五月未上天，六月二十七下。餘時並在宅。又云：宅有二十四神，甲乙丙丁庚辛壬癸。

右已上章醮請乞，遇神在，請福無不應矣。

天狗下日

正亥，二子，三丑，四寅，五卯，六辰，七巳，八午，九未，十申，十一酉，十二戌。

太歲天狗下食

歲在子，狗在寅，下食卯時。己未酉吉。歲在丑，狗在卯，下食辰時。午申子吉。歲在寅，狗在辰，下食巳時。未酉亥卯丑

吉。歲在卯，狗在巳，下食午時。辰卯戌子寅吉。歲在辰，狗在午，下食未時。巳酉亥丑卯吉。歲在巳，狗在未，下食申時。辰午子戌寅吉。歲在午，狗在申，下食酉時。卯未亥丑吉。歲在未，狗在酉，下食戌時。辰午申戌寅吉。歲在申，狗在戌，下食亥時。卯巳未酉亥吉。歲在酉，狗在亥，下食子時。辰午申戌吉。歲在戌，狗在子，下食丑時。卯巳未酉亥吉。歲在亥，狗在丑，下食寅時。午申戌子吉。

右太歲天狗下食，章醮宜須避之。

十二月天狗

正在亥食巳，二在子食午，三在丑食未，四在寅食申，五在卯食酉，六在辰食戌，七在巳食亥，八在午食子，九在未食丑，十在申食寅，十一在酉食卯，十二在戌食辰。

右每月天狗下食時，不可醮祭，鬼殺人，上章即通，但取其方上土，泥鼠穴及蠶室四壁，大吉利。

十二屬凶時

子生人不用午時 丑生人不用未時
寅生人不用申時 卯生人不用酉時

辰生人不用戌時 巳生人不用亥時
午生人不用子時 未生人不用丑時
申生人不用寅時 酉生人不用卯時
戌生人不用辰時 亥生人不用巳時

右已上神相衝，章醮不用。

帝酷殺日

正丑辰戌，二寅辰巳，三丑卯午，四辰未，五丑巳未，六卯巳未，七丑卯未，八寅酉戌，九子丑卯戌，十巳午，十一子丑辰巳申戌亥，十二子丑辰戌。

右已上十二月殺日，不可用。

六甲存思

甲子仇明主入水存之。甲寅成隆主入病存之。甲辰林車主入官存之。甲午監兵主入鬪戰爭。甲申益章主入草存之。甲戌張先主入火存之。

右六日存神思之

六合日

寅與亥合，卯與戌合，辰與酉合，巳與申合，午與未合，子與丑合。

天地閉塞日

壬爲六塞日，癸爲六閉日。又云：甲癸不通章醮。

右章醮避忌此日不用。

天父日

三日、九日、十五日、二十七日。

右此四日不上章。

天母日

四日、十日、十六日、一十八日。

右此四日不上章。

四季日

春寅午戌，夏巳酉丑，秋申子辰，冬亥卯未。

右此日不上章及書符。

五臘日

王長謂趙昇真人曰：子知五臘日乎？趙昇真人曰：吾於鶴鳴洞侍右，聞先師與鬱華真人論之，五臘日者，五行旬盡，新舊交接，恩赦求真，降注生氣，添神請算之良日也。此日五帝朝會玄都，統御人間地府、五嶽四瀆、三萬六千陰陽，校定生人，延益之良日也。學道修真求生之士，此日可齋戒沐浴，朝真行道。今故明傳妙旨，可宜勤行之。正月一日天臘，

五帝校定生人神氣，時限長短，益添

年命。求禱子孕，祭祀先亡，昇達玄祖。其日不可壅滯溝澗，用力色欲。可吟詠歌讚，導引神氣。

五月五日地臘，

五帝校定生人官爵，血肉衰盛，外滋萬類，內延年壽，記錄長生名字。此日可謝罪，求請移易官爵，祭祀玄祖。其日不可伐損樹木、血食，可服氣，消息四大。

七月七日道德臘，

五帝校定生人骨體枯盛，學業文籍，名官降益。其日可謝罪、請福、服氣、沐浴、祭祀先亡。其日不可伐樹碎石，食啖酸鹹，乘騎臨險。可導引攝理，展舒筋骨。

十月一日民歲臘，

五帝校定生人祿料、官爵、算盡、疾病輕重。其日可謝罪、請添算壽、祭祀先亡、沐浴玄祖。慎勿多食、姪昏醉睡。可行道禮拜、旋遶庭壇。

十二月王侯臘。

五帝校定生人處所、受祿分野、降注三萬六千神氣。其日可謝罪、求延

年益壽、安定百神、移易名位、迴改貧乏、沐浴、祭祀先亡、大醮天官，令人所求從願，求道必獲。此日不得聚會飲樂。可清淨經行山林有壇庭之處，行道有念，三魂七魄，不得經營俗事，逢臘日即是。

誠惶誠恐

科云：應是諸章，悉合著誠惶誠恐之語。如違，奪算。

稽首再拜

科云：小小疾病，事事從輕。上章只合言臣某稽首再拜，上言。章後亦如此。如違，奪算。

頓首死罪稽首再拜

科云：疾病困重，事情迫切，上章云：臣某頓首死罪，稽首再拜，上言。章後亦如此。若違，奪算。

請官

太真科曰：諸疾病，先上首狀章。不愈，即上解考章。不愈，上解先亡罪謫章。不愈，上遷達章。若沈沈，上却殺收注鬼章。若頓困，上解禍惡大章。不差，上解五墓謫章。不差，上扶衰度

厄大章。不愈，上還魂復魄章。不愈，上安墓解五土耗害章。不愈，上安宅鎮神驅除收鬼章。不愈，上分解中外大考章。若危急，上子午請命并却三官死解章。若進退，上仰謝三十二天章。大危篤，上續命文跪、又拔命、又獨解復連又五燈、又二十八宿、又分解先亡大注八十一章。若無此灾疾，不得妄求此章。犯者二刑論。二刑者，掃路、修橋。五刑論者，謫輸天師治覆屋茅三千束。六刑論，責輸屋瓦二千合。一刑掃路二十日。二刑掃路二十日。若言一紀，是一年。若言算，云十日，或為一日一算。

若大事言功，可三四百字。垂死言功，可五百字。小小，可止一二百字耳。多則正氣囂散，吏兵敗事。

若有急上章，當上請天昌君，黃衣兵士十萬人。亦可入靖東向，口請令，收家中百二十殃怪，中外強殄、十二刑殺鬼。

若面目有患，當上章及入靖請天明君五人，官將百二十人，在南宮下，治面上諸疾。

若逆上氣，吐下青黃赤白五瘟五

毒六魃六鬼，當請北星大機君，官將百二十人，在六宮下，爲治之。

若右腹心脹滿、小腸拘急、帶下，十二病之鬼，當請封離君，官將百二十人，令治之。

若腹內飲食不消結堅，淋澀不愈者，請赤素君，官將百二十人治之。

若氣逆絞急，腹中堅硬，不下飲食，請五衡君，官將百二十人，在大丘宮下爲治之。

若吐逆，當請五衡君，官將百二十人，在太平宮治之。

若小腹脹滿，請九河北海君，官將百二十人，在河元宮治之。並井竈鬼爲病者，請王法君五人，官將百二十人，在五姓宮制滅治之。

若癰疽，請九集君，官將百二十人，在西玉宮治之。

若疲瘦骨消，肉盡垂困者，請陽秩君，官將百二十人，左右百二十人治之。

若益壽命，請南上君，官將百二十人，在倉果宮，令延年不死。

若久病著牀困苦者，請須臾君，官將百二十人治之。

若家中強鬼，令厭絕精崇者，請石仙君一人，官將百二十人，令制之。

若欲斥逐故炁，斷絕鬼疰，却死來生，却禍來福，請益天將軍十萬人，令捕治之。

若欲收捕衆老之精，侵犯家中者，當請上元士君一人，官將百二十人，令收執之。

若犯行年本命、太歲土、五墓、辰建破，當請制地君五人，官將百二十人，下其宮制滅之。

若家中有考訟鬼不正之炁，致不安穩，請胡君，官將百二十人，令解散斷絕之。

若家中多死喪，注身中刑害，請運炁解厄君，兵七十萬人治之。

若家中有五墓之鬼作祟，傷鬼往來者，請無上高倉君，兵七十萬人，使收治之。

若家中火復注者，請無上天君，兵十萬人斷絕之。

若欲破房廟坐席禱鬼邪物者，請平天君，官將百二十人，在北朔宮治之。

若欲學神仙，而輾軻疾病注連沈滯，請虛素天精君，赤衣兵士十萬人，在天柱宮，以制鬼滅禍，却赤天之氣。

若家有惡鬼不肯散故爲者，請赤天食炁君，官將百二十人治之。

若家中墮坎不安，夢寐亂錯，魂魄不守，請收神上羽君，官將百二十人主治之。

右請官治病，以應二十四神，身中之官也。官將及吏兵人數，悉道家三炁應事所感作也，非天地生人也。此精誠發，因物致感，所以炁作而成吏兵也。其餘官號，在千二百官儀。此二十四正號，以應體中二十四神。有急當隨事稱之，皆驗也。亦可入靖燒香，口啓四方，請求救也。

封章法

凡章讀了，置奏案，以書刀朱筆鎮上。次操復畢，如法緊卷，以香度過，仍以全紙封之。題云：謹謹詣虛無自

然金闕玉陛下。下具所受法位：泰玄都正一平炁，係天師陽平治，左平炁門下，版署三品大都功，兼左廉察祭酒，赤天三五步綱元命真人臣某謹封。

次入函，以青絲三道纏，然後以蠟填印池，用九老仙都之印印之。

次以青紙外封。先以朱點，上下不得顛倒。然後封兩頭，題作全字。朱書，各以印印之。

外封題云：奉為大道弟子，具官銜姓名，為某事請拜某章若干通，謹詣三天門下，請進。三天門下，字須平寫。請進，字於三天門下側注。次題法位，如前某甲謹封。謹封處，以印印之。

殮穢

科曰：家有死亡，無論大小，婦人生產，大喪，殮一百日。生產，女子傷身，殮一百日。入產婦房，殮三日。小兒及奴婢死，殮一月。六畜死，殮一日。在外即無殮。葺喪四十日。大功總麻，月內殮，出月即解。往喪家哭泣，其日殮。久喪無殮。喪家祭食，產

婦三日，及滿月之食，並不可喫。右已上諸殮，不可修齋、設醮、上章，如在別處遇者，但以符水解之。

存思

科曰：操復畢，便於案前伏地，便存赤紅炁從己心中出，上昇天。俄頃如經歷百里，赤紅炁路蕩蕩，兩邊無瑕翳，惟多寶樹，忽見一黃道，即日月黃道也。直過黃道五六里，遙見紫雲隱隱。直到紫雲，見天門。門度一丈八尺，諸侍衛悉住。唯與周將軍及直使功曹傳章。玉童擎章表至闕門之下，西謁，見正一三天法師姓張名道陵。載拜訖，具陳章表事由。天師九拜，即往鳳凰閣門之下入。須臾，有一仙童朱衣玄冠出，就傳章。玉童手中接章表入，少頃，復出，引入見太上。太上著九色雲霞之帔，戴九德之冠，當殿而坐，左右二玄真人侍衛。又見太一著朱衣玄冠，呈太上章表，太上一覽，太一承太上意，署太清玉陛下，作依字。了，又見一仙童，收章表於右陛，分付今日日直曹官使。心載拜，辭太上出

門。又載拜，辭天師。同奏章真官扞躍而迴至奏章之所。便起稱以聞。

要安吉凶

要安日章醮，諸天來降，生人受福，大吉。玉堂日章醮，諸天歡樂，福慶延永，大吉。金堂日章醮，諸天降靈，延年益算，大吉。龍虎日章醮，諸天不降，少福。罪至日章醮，諸天煩惱，有理不申，大凶。敬心日章醮，諸天歡悅，神靈鑒納，獲福。普護日章醮，諸天降福，福慶甚多。福生日章醮，諸天並集，欣悅大吉。受死日章醮，諸天書罪，主人受殃，大凶。聖心日章醮，諸天校福，延益之日，大吉。益後日章醮，諸天喜樂，開度萬民，大吉。續世日章醮，諸天開泰，求乞得福。

右要安等日，以十二月傍通，逐月看十二辰，即定知吉凶日。

正二三四五六七八九十十一十二

要安，寅申卯酉辰戌巳亥午子未丑申寅玉堂，卯酉辰戌巳亥午子未丑申寅金堂，辰戌巳亥午子未丑申寅卯酉龍虎，巳亥午子未丑申寅卯酉戌辰罪至，午子未丑申寅卯酉戌辰亥巳

敬心，未丑申寅酉卯戌辰亥巳子午
普護，申寅酉卯戌辰亥巳子午丑未
福生，酉卯戌辰亥巳子午丑未寅申
受死，戌辰亥巳子午丑未寅申卯酉
聖心，亥巳子午丑未寅申卯酉辰戌
益後，子午丑未寅申卯酉辰戌巳亥
續世，丑未寅申卯酉辰戌巳亥午子

藏章故本

《太真科》曰：爲人奏章竟，諸小
章復鑪畢，即卷付函。齎出，別舉諸大
章，一時取之。舉錄如法。若應燒者，
復鑪前燒之。若在他處將章歸，題署
封緘，不得泄露蟲鼠，及貨易取利，違
太上勅命。蓋章中有真官位號、鬼神
姓名、靈祇祕訣，不可污辱。章皆有正
本，傳爲校定分明，切不可用故本。事
狀不同，請宮殊異，俗人家不得輒留章
本。違犯，五刑論。

斷章

《太真科》云：上言，謹按文書，臣
某治依法修行，宣揚道氣，請召真官，救
護萬姓，所奏章表，應燒不燒者，緘封
箱閣，卷束積多，法不得散，恐蟲鼠所

犯，漏濕爛敗，有所遺落，從來謹遵，不
敢違旨，即日依科，隨斯斷奠。自某年
月日合有如干通，於某淨壇淨處，火化
煙通，升靈降炁，布吉除凶。謹請直使
正一功曹、治中虎賁威儀銓下伍百各
二人，校尉十二人，功曹主簿幹佐小
吏、金光童子各五人，中部章督郵從事
使者各二人，同時監臨，對共料省，焚
除塵故，采納光新，原赦臣某愚短不及
之愆。乞前所印寫，永登天府，後所奏
聞，悉免寒池。諸官證明，獎助有功，
依都章言功，不負效信。恩惟太上分
別求哀。

斷章通數不同，蓋時有豐儉，法有行
藏，藏時少，行時多，計滿百通爲斷。
如前文，每年至十月爲斷。

奏章案

案長二尺四寸，闊一尺二寸，高八
寸，仍須曲脚，以栢木楠梓爲佳。今人
多用高案直脚者，此並非法，違科奪
算。

天老問三皇

天老問三皇曰：何以用戊戌作

符？三皇對曰：戊者，天門也。戊者，
土中官君像也。天帝常以戊戌日從天
門來遊，觀見此日作符，歡悅，賞賜所
願。戊者，土也，必得官爵，封侯食土
邑矣。用午時佩之。午爲太陽之精，
純金之光也。金紫高位之像。

避忌

科曰：上章醮，弟子不得殺生。
違，減算一紀。

上章，家中大小、雞犬，不得喧雜。
違，罰算一紀。

大風大雨、連綿風雨，不得上章。
違，罰病一年。

身有六疾，不得與人上章。違，奪
算三紀。

上章，不得食酒肉五辛。違，奪算
一紀。

禁戒

禁曰：上章官曹請官不得越錯。
犯穢不得入治。

見殮不得入江河山林藪澤。
六畜生產未滿七日，不得入治。

小兒未滿百日，不得入治。

六畜生子未滿月，不得入治。

章醮信物，不得假借於人。

不得於治中燒諸臭穢、毛羽皮角。

入治皆須恭肅禮拜，不得傲誕。

入治不得指斥形容，妄說非法，言語戲笑。

治中不得裸露形體。

跪信當須散於道民。詣治請章，

救度疾厄，當須束帶履版，恭敬叩頭，

自陳本末。不得傲誕狠戾，高聲自貴。

犯，三刑論。

令曰：父有疾厄，兒受天師大治

在身，父當冠帶巾褐，叩頭搏頰，子方

入治奏章。

令曰：父子求請不如法，父子犯

三刑論。兄弟如上。

令曰：婦受治職，夫有急厄，當須

束帶履版，叩頭如法，婦乃入靖奏章。

令曰：夫請不依法，坐二刑論。

婦宣令不明，坐三刑論。

令曰：親伯叔疾厄，子姪治錄在

身，求奏章如父子法。

令曰：舅姑姨疾厄，請子孫上章，

如伯叔子姪法。

令曰：凶逆之人，手行誅戮，謀君

殺父，此罪大逆，非財貨之功所能補

贖，當履刀山，隼劍樹，經鑊湯，被燒

煮，萬載不原，難以拔贖。

禁律曰：人身中常有司過之神，

隨時上下，日以善惡。過滿百二十為

一刻，刻者令人多害少利。百八十過

為一耗，耗者令人六畜不繁息。十過

為一徧，徧者令人疾病。五百四十過

為一兇，兇者令人損胎傷子。七百二

十過為一吹，吹者令人死。七百二十

九過為一殃，殃者令人瘖瘂盲聾。千

八十過為一禍，禍者令人暴夭死亡。

千二百過為一殘，殘者令人出逆子。

千二百六十過為一咎，咎者令人絕嗣。

千四百過為一基，基者令人殃流五世。

千六百二十過為一謫，謫者令人斷世

無後嗣。千八百過為一患，患者令人

家出顛疾狂癡。二千六十過為一暴，

暴者家出兵刀逆死。二千三百三十過

為一虛，虛者家出父子兄弟相攻伐。

二千五百二十過為一曾，曾者家犯肌

膚惡疾。二千七百過為一害，害者家

出聾。二千八百過為一灾，灾者家出

骨肉姪亂悖逆。三千六十過為一異，

異者家出眚盲陰殘。三千一百三十過

為一變，變者家出獄死族誅。三千一

百五十過為一怪，怪者家出都市乞丐

人，骸骨棄捐。三千六百過為一滿，滿

者應死也。

律曰：人生或年二十、三十，刻滿

兇夭。或五十、六十，而刻滿兇夭；或

小來無過，而今天者，此受先世餘過。

或妄行惡逆，竟壽而不遇禍患者，受其

祖餘慶也。故積德之後有餘福，積惡

之後有餘禍。故人能悔過，過滅福生。

當思愆自責，改而勿犯。行之一句，其

人身中司過為之除一刻。行之百日，

除二刻。行之一歲，除三刻。行之三

年，其福自應。如不思不悔，其過日

深。小過止其身，大過下流子孫。積

善如梁上塵，積惡如突中煙。可不明

慎之哉。

受錄吉辰

甲子、丙寅、丁卯、辛未、壬申、癸

甲子、丙寅、丁卯、辛未、壬申、癸

酉、乙亥、丙辰、辛丑、丁未、庚戌、戊午、庚辰。

已上是義日。

甲午、丁丑、丙戌、庚子、壬寅、丁未、戊申、己酉、辛亥、癸卯、丙辰、乙巳、丙戌、丙辰。

已上是寶日。

己丑、戊戌、丙午、壬子、甲寅、乙卯、己未、庚申、辛酉、癸亥、戊辰、丁巳、丙辰、乙未。

已上是專日。

右義寶專等日，傳受經錄吉日，亦具受道曆。

相刑自刑日

子刑卯，卯刑子，巳刑申，申刑寅，寅刑巳，未刑丑，丑刑戌，戌刑未，辰午酉，亥自刑。

右四辰自刑，章醮切須看之。

赤松子章曆卷之二

赤松子章曆卷之三

天旱章

具法位，

上言：謹按文書，某以下愚，遭逢道會，得睹聖世，因緣幸遇，染在大法。伏蒙太上廣覆，師君矜愍，功無絲髮，夙夜憂惶，如履冰谷，無以上答天地之恩。臣受法之日，約當虔奉師門，布散道德，助國扶命，拯拔一切，救物爲先。自頃已來，天地運否，陰陽相刑，四時失度，國境亢旱，禾稼不登，慮以祆災競起，純陽在上，凝陰在下，二氣不交，玄澤不降，旱風烈日，萬姓熬然，稼穡焦枯，涸魚懼日。良由帝王受天禪祚，君臨萬邦，三才台輔，伯牧股肱，宰長首吏等，不能俯仰理物，治功不逮。臣某等受道重任，宣化無方，不能理正允中，調和氣序，致使五行失度，天灾所衝。伏尋科法，道氣廣覆，洽潤生靈。臣某伏聞，乾知泰始，坤作成物，天地交泰而品物咸亨。春生夏長，秋收冬藏，陰陽

和順，草木滋榮，五穀成熟。太陰主雨，立春之日，男以農種，女以桑麻，冀以秋冬得資賦稅，承天受地，品類以生。立春二月始種五穀，雨水和均，五穀以益，和氣蓄結。某時炎旱若干日，甘雨不降，陽氣興盛，天無行雲之應，地無津液之潤，臣竊不自揆，謹依天師科法，觸冒湯火，謹以上聞，誠惶誠恐，頓首死罪。伏願

太上無極大道三師君，夫人好生惡死，特垂大道之化，願上官典者爲分別五行，驅處律呂，羅列八卦，標明節月，使陽不侵境，陰不退度，五來鎮一，水自潤下，五來升二，火自炎上，五來乘三，木自曲直，五來除四，金結從革，五來自偶，法滋稼穡，須五而成，而無不生，然後使鷄火收焰，玄枵吐津，箕宿傾舌，畢宿動根，五嶽抽石，四瀆騰泉。伏乞

天恩哀愍，謹請靈臺宮中漢明君各一人，官將百二十人，主攝天雷等。元名宮中小玄明君一人，官將百二十人，主攝河伯呂公子、三十六水帝、十二溪

女、九江水帝、河平侯掾吏、中部水神、興雲下雨。河天宮中九海北玄君一人，官將百二十人，主下水氣，出風雷。

太山宮中泗州九谷君，官將百二十人，主起水氣。又請泗州九海君水帝，又請浮雲使者等，官將百一十人，一合來下，與某州縣邑下地主明大社神，名山大澤、源谷山川之靈，古今卿士大夫，有功於民，以配廟食者，及諸村鄉亭里域真官，注氣營傳，符廟司舍，一切諸神君降下，同心盡力，輔助天道，以行神靈，興雲降雨，洪澤沛濡，旱苗蒙膏潤之榮，萬民有來蘇之命。功成事立，言功舉遷，風伯雨師，亦同升三天，預酬勞苦。願天曹告下，速使旱魃之鬼應章消滅。特從

太上三師，乞丐應驗，不負效信。恩惟太上分別，哀臣愚劣。謹因二官直使正一功曹左右官使者、陰陽神訣吏、科車赤符吏、剛風騎置驛馬上章吏，官各二人出操。臣某謹爲某等天氣旱燥，恐百穀失收，拜上，請天官以時降下，潤澤流注。寶章一通，上詣

三天曹，伏須告報。臣某誠惶誠恐，稽首載拜，以聞。

請雨得水過止雨章

具法位，

上言：謹按文書，某遭值運會，得承師道，助國扶命。頃以寒暑不節，祆孽滋生，初陽以來，亢旱無雨，人失農務，禾稼萎枯。臣謹爲百姓寒心，請乞披雲降雨。洪澤四注，陰氣遍降，遂爾不息。霖雨浩衍，百川滂溢，萬姓廢業，田苗蕩沒。朝野憂難，請臣謹依舊儀，貢章上聞，願乞遷達。臣前所諮告雨泉官並還天曹，中官錄署，進受功賞。重請天公正氣君一人，官將百二十人，河上玉女千二百人，各一合下。上請天曹止雨移風，風伯雨師，依四時八節，無令越錯，收雲斂翳，三光麗景，當爲止雨。諸官言功報賞，以爲效信。恩惟太上分別，求哀。操臣謹爲請雨蒙荷上恩，今乞停止，拜章一通，上詣某曹。伏須告報，臣誠惶誠恐，稽首載拜，以聞。

却蟲蝗鼠灾食苗章

具法位，

上言：謹按文書，某日載幸遇，得奉清化，某以多招灾咎，比年田種，每不如意。今年於某處，野穗種植，灾蝗所食，不可禁止，向臣求乞禳辟。謹爲伏地拜章上聞，願請北門宮中天田君一人，官將百二十人，主爲某家辟除灾蝗蟲鼠傷犯苗稼者，一切蟲鼠爲害，皆令消滅。重請地盡宮中天野君，官將百二十人，下利田作，令獐鹿百鳥蟲鼠不得傷害。重請三氣陽元君，官將百二十人，治黃雲宮中，主收鳥獸傷暴穀稼之精，不得爲害。

虛皇大道勅所在土地山林孟長、十二溪女、社稷色君，令某田收倍獲，無復灾損。如願之日，不負效信。恩惟太上分別。云云。謹爲某日拜奏，上請天官，今春田作，蝗蟲鼠灾，委恃道氣，令得防護。寶章一通，上奏三天曹，伏須告報。臣等誠惶誠恐，稽首載拜，以聞。

收鼠灾章

具法位，

上言：謹按文書，臣某并弟子，素以草苗子孫，田作為業，千載有幸，得奉

大道，賜佩重籙，顯加治職，天官吏兵，以自營衛。罪積山海，功無絲髮，上答天地，不敢自寧。某處田作，橫被鼠灾傷損，非可禁止。臣不勝所見，謹為伏地拜章一通上聞，特從

無上大道、諸君丈人、三師君、夫人、上官典者，垂恩省察，謹上請三五陽元君，官將百二十人，治黃雲宮中；重請南山白虎將軍吏兵，一合來下，收捕境內羣鼠，令還曠野，有穀之地，不得停住。界內某鄉里土地山林孟長、十二溪女、社稷邑君，同為收絕鼠耗，以時靜滅，使五穀豐登，百姓蘇悅，以荷大道生育之恩。不負效信，恩惟太上分別。云云

收除虎灾章

具法位，

上言：謹按文書，某素以胎生，下官子孫，千載幸會，遭逢

大化，被受厚恩，夙承師道，賜某天師符籙，以自營衛。寵光重沓，實為過泰。屬以時遇凶灾，虎狼入境，餐食生人，

傷害六畜，日月滋深，無由禁止。唯恐某家男女年命衰厄，羅網縈纏，觸犯衆禁，太歲將軍，行年、本命，十二禁忌，尸故氣，飲食之鬼，山精海靈，百二十精魅，及太古已來，顛倒將軍，道上將軍，各稱官號，與五方神傷，當路神傷，並乞不為患害。某上請北玄君一

人，官將百二十人，治黑治官。重請北平護都君，官將百二十人，治赤治官。一合來下，與禁斷所居里域，真官注氣，監察考召山川社稷土地之主，同心共意，攘却虎狼之害。重請伏行宮中百精君一人，官將百二十人，一合來下，主收衆老百氣之精，與人作祆害者。重請制地君一人，官將百二十人，天中督御、河伯水帝、十二書事，主收捕五方虎狼傷殺萬物、百二十傷注腥血之鬼，斷絕中外死亡傷注之氣。重請九夷八蠻六戎五狄三秦君，各隨方位，春夏秋冬，與某家宅三將軍二十四

吏兵士三十萬人，勤加營護，一切衆生，並令掃蕩，願州縣某家男女大小、牛馬六畜，行來出入，不逢虎狼衆灾之難，毒害不過此境，並蒙全祐。將軍吏

兵效力之官，言功報勞，不負效信，恩惟太上分別。云云。謹為某驅逐凶獸，拜章一通，上詣某曹。云云。

解咒詛章

具法位，

上言：謹按文書，某即日口辭自列，千載幸會，得奉

大道，但以愚鄙，信向多違，招延考氣。比者居止輓軻，夢想紛紜，怪異妄生，祆祥屢起，四支沈重，顏色痿悴，精神浮散，不附身形。占筮推求，云有惡人，更相厭禱，牽引天地，指鬼呼神，咒詛百端。或題刻姓名，或畫作形影，或以刀刺心，或割髮截指，將告神社。恐有百盟之鬼，所見拘執。莫知何功，可以解釋，防保身命。唯用丹心，特齋儀信，上憑

大道，告訴向臣，求乞章奏，翻解咒詛。謹爲伏地拜章，上聞

天曹，伏願

太上老君、太上丈人、三師君、夫人、門下典者，垂神省理檢勅。若是春三月寅卯辰咒詛厭禱某身，上請東方九夷甲乙君爲某翻而解之。若是夏三月巳午未咒詛厭禱某身者，上請南方八蠻丙丁君翻而解之。若是秋三月申酉戌咒詛

厭禱某身者，上請西方六戎庚辛君翻而解之。若是冬三月亥子丑咒詛厭禱某身者，上請北方五狄壬癸君翻而解之。

若是四季之月咒詛厭禱某身者，願中央三秦戊己君消而解之。或二十八宿咒詛厭禱者，願隨方星宿君翻而解之。或被惡人畫作形像及刀刺心，或道上神社、壇場牢獄、樹木神靈、井竈之中，或與河伯水官、俗中邪師私有鬼神之處，伏以

太上清高，三天遐邈，正氣悠遠，邪氣縱橫，枉害良民，遭者非一，某橫罹無辜，深恐一旦奄沒鬼官，乞丐

太上大道、太上老君、太上丈人、天師、

女師、三師君夫人、門下典者、五氣真君，留神省念，或犯五盟七咒之罪，伏請太元兵士百萬衆，又請翻倒君兵士十萬人，一合下，爲某放遣三魂七魄，不得留執，還魂制魄，平和神氣，分解身中千邪萬鬼，永不干亂，一切邪神咒詛，悉乞消蕩。所請天官，依臣言功遷舉，請住宅至以爲效信。恩惟太上分別。云云。

消怪章

具法位，

上言：謹按文書，某即日口辭自列，素以胎生，下官子孫，千載有幸，得奉大道，從來蒙恩，誠實罔極。但某比者宅舍不安，邪神擾動，所向不吉，凶災數見。以今某日，忽見某色之怪，開書列字，憂慮非一。求乞消蕩百怪章一通，伏乞上達

三天曹。謹爲弟子某家推尋怪兆，理合申騰，依法齋芒繩一百二十尺，刀一口，及五方鎮信、錢米、命素等物，爲拜上五方大消怪章一通，願

太上無極大道、三師衆聖，曲垂恩眄。

竊以東方青怪自稱歲星，妄作妖怪，老木之精，動作青物，多所中傷。乞東方青帝消滅怪殃。南方赤怪，自稱熒惑，動作赤物，欲來所害。願南方赤帝消滅怪殃。西方白怪，自稱太白，動作白物，專爲凶逆，妄爲怪異。乞西方白帝消滅怪殃。北方黑怪，自稱辰星，發泉源龜之精，動作黑物，轉易姓名。乞北方黑帝消滅怪形。中央黃怪，自稱鎮星，動作黃物，託號家親，招集不祥，互作怪異。乞中央黃帝除滅怪殃。謹按天師千二百官章，表錄上請天昌君，黃衣兵士十萬人；督御君，兵士百萬

人；又請無上元士君五人，各官將百二十人，下爲某家收捕百二十殃怪。一時掃蕩，消而滅之，衆老之精，前後愆咎，乞垂原赦。所請天官，依三會言功，不負效信。恩惟太上分別。云云。爲某去某月日見怪，今求乞天官五方大消怪章一通。上詣某曹云云。

禳灾却禍延年拔命却殺都章

具法位，

上言：謹按文書，某即日口辭自列，云素以胎生，下官子孫，千載有幸，得奉大道，從來蒙恩。但某入今歲之中，推算年命，灾厄多端，無福自輔，唯憑一心，求乞章奏，以救拔身，得遂安居。伏乞三景真官切爲分解年中天羅地網、遊城赤鼠、三丘五墓、刑殺吟辰，俱欲爲禍，願迴保扶身命，延益年算，消灾度厄。謹爲拜《保護章》一通，上聞天曹官官，屬布散道氣，流潤弟子某身中，上請太和真一好生君五人，運氣君五人，解刑度厄君五人，延命益算君五人，請命保生君五人，太皇萬福丈人，宮中天昌君，黃衣兵士十萬人。又請收刑却殺君、斬刑絕殺君、執刑收殺君各五人，官將百二十人，保佑弟子某身中百怪刑厄，從一厄至于九厄之中，皆令度脫，却死來生，消灾散禍，迴凶作吉。次及劫殺、灾殺、天殺、地殺、年殺、月殺、日殺、時殺、陰殺、陽殺、吟辰三殺、五刑、六畜，欲爲殃崇，上請萬福君、運氣君、解厄君、南上司命君、太白明星君、拘魂制魄君、財庫君、祿庫君、

定命玉曆君各五人，官將百二十人，爲弟子某落除死簿，注上生名。今依玄科，齋法信命素絹一匹，錢一千二百文，油一斗二升，米一石二斗，紙筆香果等，獻上十方靈官，願爲弟子辟斥邪魔，養護身命，天官聖母等，普願特爲利便。又重請東方九夷君，九九八十一官君，寅卯辰甲乙君，爲弟子某解除東方青灾青厄、青瘟青毒、青疰青殺。又請南方八蠻君，八八六十四官君，巳午未丙丁君，爲弟子某解除南方赤灾赤厄、赤瘟赤毒、赤疰赤殺。又請西方六戎君，六六三十六官君，申酉戌庚辛君，爲弟子某解除西方白灾白厄、白瘟白毒、白疰白殺。又請北方五狄君，五五二十五官君，亥子丑壬癸君，爲弟子某解除北方黑灾黑厄、黑瘟黑毒、黑疰黑殺。又請中央三秦戊己君，千二百官君，爲弟子某解除中央黃灾黃厄、黃瘟黃毒、黃疰黃殺，并爲辟斥五方黃病之鬼，時行瘴癘水火之灾，皆令消滅。及社里邑君，同心併力，加備守護弟子某家，福祿日新，公私清吉，不負效信。

恩惟

太上分別云云。爲某謹拜上却灾拔命扶衰度厄章一通，上詣

某曹云云。

本命謝過口啓章

具法位，

上言：云云。某素以胎生，下官子孫，千載運會，得奉

正一，致屬道門，遇蒙師老，所見榮飾，賜署符籙，以自檢慎，進參中乘，荷佩契重，蒙任治職，奉道經寶。過泰之恩，實爲罔極。但臣某愚鈍，神氣不平，三魂不守，七魄不寧。誠惶誠恐，稽首載拜

皇上玉帝。臣等七世已來，所行陰罪陽過，積惡殺生之罪，名奏三官。乞今以去，令臣某萬過消滅，削除罪名，邪氣殄散，九福常寧。七祖父母，下及玄孫，魂魄升遷，反胎還嬰。令臣某神仙久視，長生太無，北揖玉清。誠惶誠恐，稽首載拜

太素三元君。臣等七祖已來，下及臣身，所行陰罪陽過，殺生之罪，簡過帝前。

從今已往，乞除罪名，削死上生，萬過除滅，七祖父母，反胎玉庭，上昇日月，遊行七星。臣某稽首載拜

上清三素君。臣等有知已來，所行千罪萬過，上及七祖陰惡之罪，各錄三官者，乞從今已去，願令萬罪消滅，邪僞不生，陰罪散滅，七祖反靈，身登帝堂，迴眄玉庭。臣誠惶誠恐，稽首載拜

四老道中君。臣等七世已來，上及七祖父母，所行陰逆，積惡之罪，名書三陰者，乞從今已往，令臣千罪蕩散，萬考傾除，魂魄分明，七祖反胎，萬靈侍衛，五老定符，壽同二儀，名形玉書。臣誠惶誠恐，稽首載拜

三司君。願從今已後，令罪結散蕩，考氣消滅，百惡不生，邪氣匿絕，七祖昇仙，三魂和練，七魄纏綿，衆靈扶持，得爲上真。臣等誠惶誠恐，稽首載拜。中有七篇，語相似，不寫，本上如此。臣小子，千載運會，得在道末，忝受治職。但臣頑愚，生長流俗，釁積山海，無以自知。貪生好欲，夙興夜寐，不自定息。伏乞

太上開化之恩，澤施無外，接爾愚民，

消罪之法，不以人微道劣，敢冒清嚴，拜章陳謝，五情震惶，肝心破裂。特從道君，乞三赦之恩，愍臣丹懇，並乞道氣日新，所得通利，舉事如心，門戶興隆，大小受恩，以爲效信。恩惟太上大道君分別。云云。謹因衆官云云。操臣謹拜上

三天大道，仰謝身年，七世已來，及生世三師，父母存亡，陰罪陽過，乞丐長生，永保長存。口啓章一通，上詣太上三天曹，載拜以聞。

飛度九厄天羅章

具法位，
上言：云云。謁在某宮，絕命在某宮，本命在某忌。某年某月，恐有天羅所纏，地網所繞，只知惶怖，不自分別。唯專一心，上憑

大道天師科儀，謹爲某家拜奏飛度九厄天羅章，謹辦青絲一百二十尺，算子一百二十枚，命米一石二斗，命素絹一匹，錢一千二百文，香油紙筆等，爲求乞救解過度灾厄章一通，謹請東方春三月寅卯辰甲乙九夷君，九九八十一

官君，謹請南方夏三月巳午未丙丁八蠻君，八八六十四官君，謹請西方秋三月申酉戌庚辛六戎君，六六三十六官君，謹請北方冬三月亥子丑壬癸五狄君，五五二十五官君，各降臨醮座，同心併力，爲某家等消除灾厄。又請延命大將軍，兵士千二百人，一合來下，爲弟子男女等，延續年命，扶度衰厄，永保元吉，竟歲無他，以爲效信。恩惟太上分別。云云。爲某分解厄難飛度九厄天羅章一通，上詣某曹云云。

却三灾章

具法位，
上言：云云。去某月日，抱疾所苦。云云。因師披檢。云云。年命不利，尋九宮飛符元辰算曆之中，有對算盡，兼公私、口舌、水火、虎狼、蟲蛇，一切衆厄在身，或今年劫殺，或明年灾殺，或爲年殺、月殺、日殺、時殺，及吟辰之殺，東方青殺、南方赤殺、西方白殺、北方黑殺、中央黃殺，又恐天羅地網所見纏綿，恐被一旦中傷，不蒙脫免，大小惶

怖，無所情計。云云。慮以年中一厄二厄三厄四厄五厄六厄七厄八厄九厄，虎狼刀兵之厄，賊役之厄，三刑三殺之厄，上請度厄君、鎮命君、壽命君、益命君、續命君、脫厄延命君、大福德君，各官將百二十人，上請皇天上帝、日月華蓋、北斗君、三天錄都司算君、度厄司馬，并直使功曹，下治某腹中百病，正一功曹，下治某心中百病，治病功曹，下治某脾中百病，役氣功曹，下治某胃中百病，中部功曹，下治某肝中百病，陽神決吏，下治某左腋下百病，陰神決吏，下治某右腋下百病，狼吏虎賁，下治某腸中百病，察姦君吏，下治某肺中百病，鈎騎君吏，下治某小腹中百病，三官僕射，下治某背脊中百病，天騶甲卒君吏，下治某二十指中百病，天丁力士，下治某頭腦間百病。並各令除愈。甲子將軍王文卿領兵士三萬六千人，直息某左右，防衛至酉。甲戌將軍展子江領兵士三萬六千人，直息某左右，防衛至未。甲申將軍扈文長，領兵士二萬六千人，直息某左右，防衛至巳。甲午將軍衛上

卿，領兵士三萬六千人，直息某左右，防衛至卯。甲辰將軍孟非卿，領兵士三萬六千人，直息某左右，防衛至丑。甲寅將軍明文章，領兵士三萬六千人，直息某左右，防衛至亥。六甲將軍，六部兵將，各部領兵馬三萬六千人，尅時傳相契合，隨逐某身東西南北，行來進止，真神衛護，從直息防衛，解散某身灾厄，辟斥温氣，悉令殄滅，年命延長，家口康寧，眷屬休泰，皆荷

大道洪恩之德。所請天官，勞屈君吏，三會吉慶日，都章言功，加官、益祿、遷賞，不負效信。恩惟

太上云云。某疾病厄難保命醫治却殺章一通，上詣

某曹云云。

青絲拔余章

具法位，

上言：某素以胎生，下官子孫，千載有幸云云。頃者已來，身中軛軻，今歲行年云云。今謹齋法信，白素四十尺，以進命度厄。命米一石二斗，以倍糧益算，以添倉儲斛斗。錢一千二百文，以

證質丹誠，定三百六十神氣，日生日，安其宮室。筆、墨、紙、算子，注上生名。錫人五身，請為某上詣五方，代形易名。香油燈燭，繼續光明。用錢米質信，以表丹誠，拔贖生命。上請太上宮中拔命君十二人，續命君十二人，鼎倉王女五人，司命君五人，五緯宮中玉女千二百人，明堂君一人，南昌君一人，朱陽君一人，黃老君一人，天魂地魄君各一人，起生玉女千二百人，玉曆素女千二百人，天官地官水府官等各百二十人，并諸官考召君吏，同心併力，為弟子某度脫年命，住處平善，安定無他。所請天官，依三會言功，吉日舉遷，不負效信。恩惟

太上云云。

疾病醫治章

具法位，

上言：云云。頃日已來染疾，恐沒溺生路，詣臣求乞章奏。三天曹，願為拔贖。比旬日已來，寒暑不節，腠理失所，或當風卧冷，致招此疾，或五刑三灾謫罰。但以愚塞，不知

將何省理。上請五方生氣，以濟醫治。特願

太上無極大道、太上老君、諸君丈人、天師君、三師君、夫人、慈父聖母，留恩省念，賜以道氣覆蔭某身。謹謁天曹，上手天醫、太醫君吏十二人，下爲某身，隨病所在，即爲救療。上請治病功曹十五人，爲某上請天曹，削除某前世今生所犯罪源。五臟之中，四肢百脉，皆蒙愈差。次請東方青生氣，南方赤生氣，西方白生氣，北方黑生氣，中央黃生氣，並下某身中。又上請解考君、度命君、益算君、防民君、誅殃禍君、遊羅大將軍、地境大將軍，各收邪精、故氣、疫毒之鬼，令病者痊復云云。所請天官，依三會言功遷賞，不負效信。恩惟太上分別云云。

疾病困重收滅灾邪拔命保護章

具法位，

上言：云云。緣身疾病困重，告急於臣，求乞章奏。爲某所犯罪結尤重，依憑大道，如蒙哀祐，乞賜進算，令疾病即日痊可。謹請陰陽治病功曹、五官醫

吏，詣鳳凰太宮日月之中，請取太清五色神藥，灌注口中，流布百脉，腹内胸膈之中，痼疾皆能消愈。木官持藥，火官主灸，金官持針，水官主湯，土官和劑，各隨所使。九竅相承，五臟通暢，六腑和調。上請和考君、太和君、太陽君、延壽君、保命君、度厄君、五帝丈人、都氣君，又請高麾大將軍、返甲逆鱗兵士三十萬衆，下爲某身五臟六腑、四肢關節、十二宮室，百二十關機，伏乞併力掃除惡鬼。或係綴某身者，請告

天地水三官、五嶽四瀆、山林孟長、二十四禁忌，並與臣身中所佩剛風赤天騎吏，同共收捕惡鬼。又願萬福君、天倉君、東方青氣君、南方赤氣君、西方白氣君、北方黑氣君、中央黃氣君，各領兵士，下爲某身中驅遣邪氣。乞蒙平復，延續性命，保守無他。得如所願，三會吉日，言功舉遷，不負效信。恩惟太上分別云云。爲某身染重疾，困頓在牀，拜上拔命保護章一通，上詣某曹云云。

扶衰度厄保護章

具法位，

上言：云云。但某某身忝承下官之胤，因六氣以成形，蓋萬劫之良緣。沐三光之照曜，處非常之世，得預人流。以今年灾厄深重，日月長遠，貞吉難保，伏聞

大道含澤，拯拔黎民，使枯骨重榮，迴骸起死。某沐此大恩，甚爲無量。或恐厄在東方天獄之中者，請東方青帝甲乙九夷君，從官九九八十一官君，乘青龍，飛行萬里，持節執符，主爲某解東方青灾、青厄、青瘟、青凶、青毒。春三月灾禍之氣，悉爲蕩除。若厄在南方天獄之中者，請南方赤帝丙丁八蠻君，從官八八六十四官君，乘赤龍，飛行萬里，持節執符，主爲某解除南方赤灾、赤厄、赤瘟、赤凶、赤毒。夏三月灾禍之氣，悉令蕩除。若厄在西方天獄之中者，請西方白帝庚辛六戎君，從官三十六官君，乘白龍，飛行萬里，持節執符，主爲某解除西方白灾、白厄、白瘟、白凶、白毒。秋三月灾禍之氣，悉

令蕩除。若厄在北方大獄之中者，請北方黑帝壬癸五狄君，從官五五二十

五官君，乘黑龍，飛行萬里，持節執符，主爲某解除北方黑災、黑厄、黑瘟、黑凶、黑毒。冬三月災禍之氣，悉令蕩除。若厄在中央天獄之中者，上請中央黃帝戊己三秦君，從官三三爲九、九千二百官君，乘黃龍，飛行萬里，持節執符，主爲某解除中央黃災、黃厄、黃瘟、黃凶、黃毒，解除某身中從一厄至于九厄八難，並乞消除。又請

皇天上帝、日月五星、五帝王相、華蓋北斗君、三天却錄司命君，一合下爲某解除三災九厄，并解今年瘟黃瘴氣，悉皆遠離身心。即日奉齋儀信白素絹一匹，命米一石二斗，鎮錢一千二百文，油一十二升，香燈紙筆等，以爲效信，表質丹誠。上請

太上三天解死籍，上生名，削除萬病之厄，家口平安，道力扶助，職祿求遷。蒙恩之日，所請天官吏兵，依臣三會吉日言功，不負效信。恩惟太上云云。拜上

天官扶衰度厄章一通，上詣某曹云云。

謝土章

具地位，

上言：云云。比者已來，居宅不利，招延災考。某處宅中，土精地靈，更相追責。不知修何功德，防保家口。唯用一心，仰憑

大道。向臣求乞章奏，上詣

三天曹。願上官主者，以時平省。謹爲上請謝土君五人，制地君五人，解土君五人，安土君五人，定宅君五人，各官將百二十人，一合下爲某家披謝五方五土衆神。但某自從立此宅已來新舊掘鑿、移籬換柱、造立屋舍、起土興工、平高就低、改動門戶、六甲禁忌、瓦石萬靈、沈屍伏藏、銅鐵白土、黑土黃土、土皇土王、土相土府將軍、土公、土下君侯二千石、陰土陽土、四時五行、中央太皇、宅前宅後、宅左宅右、五土神王、中庭令長、夾門大夫、門丞戶尉、井

竈精靈、青龍白虎、朱雀玄武、騰蛇伏龍、太歲、太陰、太陽、司命、十二時辰

將吏、天剛太一、勝先小吉、傳送從魁、河魁、登明神后、大吉功曹、太衝、拘刑

破殺土中真靈，四孟、四仲、四季，子午卯酉，天門地戶。東方土神所犯，解謝震宮。南方土神所犯，解謝離宮。西方土神所犯，解謝兌宮。北方土神所犯，解謝坎宮，中央土神所犯，解謝乾坤艮巽等宮，並蒙放赦。某守宅大神，晏子、大戴，蓋屋三重，遶舍三帀，東西南北，邪精故氣，及諸禍害，一時消蕩。乞某家大小永保元吉云云。恩惟

太上分別。求哀云云。起造宅舍以來，觸犯宅神土公禁忌，更相追責。拜上天官搜謝解釋考氣乞恩口章一通，上詣三天曹云云。

却虛耗鬼章

具法位，

上言：云云。但某口舌橫生，奴婢逃叛，皆緣虛耗，鬼魅相仍。謹請五福天官、地祇十二官將、百二十人，尋究此章奏上，爲某家收捕宅內五虛六耗之鬼，各歸本方。或青虛青耗之鬼，

遣歸東方青帝收而禁之，勿令遊走。或赤虛赤耗之鬼，遣歸南方赤帝收而禁之，勿令遊走。或白虛白耗之鬼，遣歸西方白帝收而禁之，勿令遊走。或黑虛黑耗之鬼，遣歸北方黑帝收而禁之，勿令遊走。或黃虛黃耗之鬼，遣歸中央黃帝收而禁之，勿令遊走，干擾人家。所請天官兵吏，及某家守宅三將軍等三十萬人，同心併力，爲某馳遣宅中，虛耗退散，願某家資產業集聚，迴凶作吉，田蠶萬倍，牛犢盈欄，金銀增積，口舌潛消，灾厄不生，所願皆成，人口平康，財食增長云云。

言功安宅章

具法位，
上言：某若干人，住宅不安，慮觸冥司，招延考氣。以今年運，五毒流行，中傷天民，不擇良善。蓋某以胎生無知，下官子孫，千載幸會，得奉大道，常懷恐懼，無地自安。頃者家口大小，處在其中，不自保持，憂慮尤切。爲比年或有修補掘鑿，移籬換柱，事非一條，觸犯天禁地忌、太陽太歲將軍、神頭神足，

行年本命、大虛小耗、灾殺劫殺、勾陳白虎、十二時神、土靈土殺，一切虛耗，上下土官，慮有觸犯，致某家舍宇宅神不安，并竈龍神之主不爲利便。願與某安穩，宅舍遷達，各得安居。謹按天師千二百官章，上請卿邑大夫神君官將百二十人下，爲某家分解前後所犯禁忌，並乞消除。伏請制地君五人，官將一百二十人，爲解太歲太陰太陽大將軍、大小虛耗、蠶室畜官、上下禁忌之鬼，一切並乞消滅。謹請東方青帝九夷君，南方赤帝八蠻君，西方白帝六戎君，北方黑帝五狄君，中央黃帝三秦君，四季五土，更相分氣，及四方官將，並爲某家宅中收除禁忌，千精萬邪，下官故氣，歲月日時，灾殺破害之鬼，一切消滅。五帝安宅，諸禍不生，利祐一歲之中，四時安穩，八節無灾，二十四氣相應，乾上廣覆，坤下普載，永享貞吉。震生青龍，治宅左。離生赤龍，治宅前。兌生白龍，治宅右。坎生黑龍，治宅後。坤生黃龍，鎮宅中央。五龍治宅，辟除不祥，消滅凶惡，掃蕩千殃。

神龍安鎮，四鄰和睦。改逆從順，除前愆，成後善。道氣流行，宅舍清吉。仕宦高遷，所求如意。從心之日，不負效信。恩惟

太上分別。求哀。云云。爲某家恐居宅不安，龍神不利，禁忌撓動，謹拜上，上請

天官將吏，乞爲收除鬼氣，安慰冥司，迎請五龍安宅保護人口乞恩寶章一通，上詣

某曹云云。

斷瘟毒疫章

具法位，

上言：云云。即日自列，千載有幸，得奉大道，被蒙恩覆，以自營衛。但某百行多違，招延考氣，大小疾病，日轉有增。詣臣求乞章奏，令瘟氣斷絕。臣以暗昧，不明鬼氣，按天師千二百官章，有下官故氣，邪淫鬼賊，周天巾地，妄生灾禍，尅害良民。伏聞

太上高尊，三天清遠，宇宙廣大，日月光明，無所不照，行邪之鬼，並皆誅滅。若是東方生青瘟青毒青症，鬼名高遠。

在南方生赤瘟赤毒赤疰，鬼名士言。在西方生白瘟白毒白疰，鬼名白幸。在北方生黑瘟黑毒黑疰，鬼名大黃奴。父子七人，男女兄弟各行惡毒疫氣。正月至十二月，各有瘟鬼，隨其放逸，天下病害。又甲子乙丑寅卯辰巳午未申酉戌亥十二月辰，瘟鬼皆有名字。從十二時上來，五方五色，黃奴老蟲。致今末世，愚民逢禍，致死不可稱計。臣受法之日，約當助國扶命，醫治百姓，按如科文，誅滅邪僞，掃除逆鬼，皆令滅絕。臣備受治職，謹當伏地拜章，上

聞

太上無極大道諸君丈人，鴻恩覆護某家，悉與掃蕩羣精，滅絕惡鬼根本。上官使者，時蒙斷省。願東方主斗成主絕青瘟，南方主斗平主絕赤瘟，西方主斗遷主絕白瘟，北方主斗長主絕黑瘟，中央主五父君主絕黃瘟。東西南北，四維上下，十二時神，並令營衛惡鬼，無令放入。又東方青帝、南方赤帝、西方白帝、北方黑帝，四方一時，同臨祐助。上請高天萬丈百鬼中王萬二千

人，兵士各八十萬衆，與臣身中吏兵，及守宅三將軍、二十四吏、兵士三十萬人，併刀同心，蓋屋三重，繞宅二匝，兵刃向外，一時掃蕩，凶逆邪精，並令消滅。所請天官，言功報勞，不負效信。恩惟

太上分別云云。為某家拜請天官乞恩，防斷疾病，并鄰里疾病。請五方天官收捕五瘟疫癘鬼賊章一通，上詣三天曹云云。

赤松子章曆卷之三

赤松子章曆卷之四

斷魁泉章

具法位，

上言：云云。某即日叩頭自列，口乞恩辭，素以胎生，千載慶幸，得奉

大道，忝切蒙恩。頃者已來，居處軼軻，疾病相連。卜筮云是山泉三河為禍，并此間土地山林覓食之鬼侵害某身，憂怖屏營，不知修何功德，唯用一心，上憑

大道，以救性命。告訴向臣，求乞章奏，收除里域東西南北山泉四壟河中諸雜鬼神橫行禍崇之者，一切乞令收斷。臣職叨典治，謹為伏地拜章一通，乞

太上老君、太上丈人垂恩料省，原赦某身，恐是山丘壟泉三河五河乳母等鬼作此妨害，上請麾幢大將軍、陂湖大將軍各五人，返甲逆鱗大將軍五人，兵士一萬人，重請覓音大將軍官將各百二十人，搖天動地九氣君吏兵士一千二百人，請左靈君、右靈君、高天大將軍、

盟威君、八卦君，各宮將百二十人，上請東方九夷君、九九八十一官君、寅卯辰甲乙君、南方八蠻君、八八六十四官君、巳午未丙丁君、西方六戎君、六六三十六官君、申酉戌庚辛君、北方五狄君、五五二十五官君、亥子丑壬癸君、中央三秦戊己君千二百人，上請誅符破廟君萬六千人、太陰太陽太醫君、治病功曹官將兵士各百二十人，同心併力，下爲某收捕鬼賊，付與天丁力士、天一北獄，依法治罪，不令脫漏。上章之後，悉令斷絕，蒙恩之日，以爲效信。恩惟

太上云云。爲某收斷河泉惡鬼章一通，上詣

某曹，伏須告報。

解天羅地網章

具法位，

上言：云云。某身及妻子，並有厄難，恐爲天羅地網以見纏結，告訴向臣，求乞章一通。臣以學淺，不明氣候，無精算術，皆憑六甲五行更相剝復，以知曆數。凡以戊亥絕陽之鄉爲天羅，辰巳

絕陰之地爲地網。年命會此則受其殃。男以本命臨太歲功曹，加生月爲天羅傳送，加胎月爲地網。女以本命臨行年爲天羅河魁，加胎月爲地網。復以行年臨本命功曹，加胎月爲天羅傳送，加生月爲地網。又天綱臨太一，下爲天羅。胎在登明，下爲地網。五刑六害七傷九厄之月，及以衰年衰月，魁綱雜殺，千凶萬患，妨損非一。恐某家大小年命有犯五方羅網，九宮八卦，更相剋伐，仍是九天玄極之氣下遊世間，縱橫九百九里。羅者如炎火，網者如黑雲，悉帶九星精氣，赤精煥爛，若人年命當之，立見凶損。某今齋法信，素絹一匹，錢一千二百文，白米一石二斗，油一斗二升，紙一百二十張，朱繩一百二十尺，釧子一雙，素絲一兩，筆墨香燈等，伏惟

天官恩盼，太上無極大道、天師門下典者、五氣君，垂神省念，上請東方寅卯辰甲乙青氣君，解除東方青厄青毒；南方巳午未丙丁赤氣君，解除南方赤厄赤毒；西方申酉戌庚辛白氣君，解

除西方白厄白毒；北方亥子丑壬癸黑氣君，解除北方黑厄黑毒；中央戊己黃氣君，解除中央黃厄黃毒。五方之氣，十二時候，皆不敢爲害。臣聞上三五爲天，中三五爲人，下三五爲地。天有五行，地有五氣，人有五常。天不失五行則日月精明，地不失五氣則萬物滋生，人不失五常則能生長，禮樂獲全。某家恐五氣不合，臟腑不調，五行更相剋剝，伏願上官典者，爲某上解玄象五星之考氣，下解地上三十六禁忌，中解某等身中千罪萬過。謹請北斗七星貪狼巨門斷絕死源，祿存廉貞替易死形，文曲武曲削除死錄。謹請解厄君、太皇萬福君、運氣君、玉曆君，各官將百二十人，下爲某收捕衆災，分解諸厄，從一厄至于九厄，所居里域，真官注氣，監察考召，太祖父母，家親丈人，一切遷舉，進入中宮，署與功賞，使分曹署職，隨功加秩，天曹科典，令存亡受恩，幽明相祐，要以某身年命延長，災厄度脫，以爲效信。恩惟太上分別。

驛馬章亦云開度章

具法位，

上言：某以胎生，下官子孫，千載有幸，得奉大道，從來蒙恩。某今當驛馬發年，是求福之歲，若不章奏扶迎，恐有妨害，年命傷尅，官祿不遷。但以憂慮，無功可修，專用一心，上章奏表，禳却驛馬之厄，扶迎官祿，不爲災害。今賚法信，金人一軀，五色綵等前件物，將立心信，求拔除驛馬之厄，遷舉財祿，過免時災，永保元吉，得入生圖，扶迎驛馬，以保壽命。闔家大小，並乞無他。臣以愚昧，不明氣候，聞太易有補過謝罪之功，遁甲有向建避凶之道。元元一心，上憑

太上大道、諸君丈人、天師君、三師夫人門下，或三命已窮，一期載續。謹請皇天上帝、王相華蓋、北斗君、三天司命加祿君、扶命君，扶持驛馬，得成官祿。以金人一軀，上詣北斗，拔命除死厄。五色綵各一匹，以詣五方五帝，迎益官祿。紫案中、牙笏、衣幘、木履等，以證祿位。紫傘蓋一張，以蓋本命。

席一領，以鋪正座。油一斗二升，以徹

照虛玄。青絲、算子，延續祿壽。米一石二斗，以益倉糧。紙、墨、筆，以書立生籍。錢一千二百文，以證質丹心。香一斤，祈北斗落死籍，南斗上生名，延壽無窮。重請功曹生氣君吏，上詣

太玄都生宮，請調星度算，替名易形。上請度命君、呼魂君，北詣玄陰御女君、延續姓名君，各五人，官將百二十人，爲某扶迎驛馬，官祿超榮，災厄殄滅，光明心腑，乾坤震巽坎離艮兌八卦、二十八宿、三丘五墓，所典節氣，善功付度，周而復始。上請祐命將軍、萬福丈人、解患君、運氣君、解厄扶衰君，各十五人，官將百二十人，下爲某同心併力，保守身命，祿位高遷，延年益算，穀帛盈倉，錢財集聚，永保元吉。所請天官，預有功勞，依臣三會吉日言功，不負效信。恩惟

太上分別，哀臣愚劣。謹因二官直使、正一功曹、左右官使者、陰陽神決吏、科車赤符吏、剛風騎置驛馬上章吏，官各二人出，操臣某謹爲某求乞和合驛馬

除災厄迎財祿乞恩章一通，上詣某曹。伏須告報。臣某誠惶誠恐，稽首載拜以聞。

謝五墓章

具法位，

上言：謹按文書，今據鄉貫某云，今月某日，染疾，進退不差，恐不存生。某家三曾五祖、七世父母已來，生時積罪，招延殃釁，或塚墓之中，有訴訟之害，嗔怨天地，致使亡人不安，擾動生人。或岡勢斷絕，松柏爲人所伐，斫掘塹邊，行往道路侵逼墓所，深恐一旦沒溺泉壤云。除已備奏

諸天帝尊，申三界真司牒，合屬去處外，今賚法信，黃繒一匹，白米一石二斗，油一斗二升，錢一千二百文，紙筆香果等，仰憑

大道，求乞章奏，解謝先亡，安穩塚墓，從生及死，千罪萬過，並乞消除。輒承口辭，爲伏地拜章一通，上聞

天曹，願垂省察，原赦先世及新亡，并久遠及新舊墳墓所犯咒詛冤氣者，悉爲斷絕，即求差愈，先亡安穩，塚墓清

寧。上請謝墓君五人，又請都星君、青

蓋官都候君、太清宮主，及地甲君，各

官將百二十人，下為某消除疾病，解謝

先亡。或墓在龍頭，或葬在龍尾，或葬

在龍左，或葬在龍右，或葬在龍足，舉

動縮伸，盤旋禁忌之處，致令亡人魂魄

震動，恐怖不安，返害生人。致使生人

軼軻，疾病附注。並乞消除五音丘丞

墓伯，塚中二千石，諸塚考氣，皆使滅

絕。安穩亡人，無有殃禍，一切原赦。

願存亡無責無罰，一切和解。見在家

口興隆，嗣胤不絕。不負效信。恩惟

太上分別，求哀臣愚。謹因二官直使、

正一功曹、左右官使者、陰陽神決吏、

科車赤符吏、剛風騎置吏、驛馬上章

吏、飛龍騎吏，官各二人出。又因某日辰

從官云云二人，直神從官符吏隨日辰易，舉此為

例。操臣謹為齋主某家大小疾病，上拜

請天官六龍謝墓遷達亡人和解考氣乞

恩寶章一通，上詣

太上某曹治某宮。曹治隨日月換，舉此為例。

伏須

告報。臣某誠惶誠恐，稽首頓首，載拜以

聞。

空三行

臣某 屬 某宮焚修

空三行

太清玄元無上三天無極大道太上老君太上丈人

天帝君天帝丈人九老仙都君九炁丈人百千萬

重道炁千二百官君太清金闕七寶玉陛下

年號歲次某甲某月某朔某甲子某時章於某處齋

壇拜上

空三行

可漏用全紙一幅為之。

太清玄元無上三天無極大道太清金闕七寶玉陛

下 具章奏法位臣姓某 上奏 謹封

內方函

謹 謹 上 詣 具章奏法位姓某謹重封

外方函

謹 謹 上 詣 具章奏法位姓某謹重封

三天門下請進

解五墓章

具法位，

上言：臣謹按

玄科，今據鄉貫某，叩頭自列，素以胎生，

下官子孫，但某身中，今歲行年到某辰

上，入墓之年，或為五墓所纏，及三殺

之下。夫人入墓之年，恐被墓神注連，

鬼氣纏繞。比者脚手沉重，飲食不加，

罔知拔贖五墓灾厄，扶護身命。唯以

一心，上憑

大道，仰希鑒照，特垂救護。今賚法

信，錫人五軀，命米一石二斗，命錢一

千二百文，命素一匹，油一斗二升，紙、

筆，算子百二十枚，向臣求乞章奏，斷絕

亡人殃禍。令以錫人代形，分解灾厄，

延年保命。謹以拜章一通上聞。願

天曹上官典者，垂恩照省，原赦某身，年

七世已來所犯千罪萬過，並賜除蕩，五

墓五方之厄來臨者，以錫人五形代之，

令弟子無有錯悞之厄。上請還命君、

壽命君、延命君、拔命君、續命君、扶命

君、益命君各五人，官將百二十人下，

同為某上詣南宮中司命、司錄，轉贖弟

子性命，三藏一期，三百一時，解除身

中灾厄。當為排天門，却死籍，移名青

錄長生之簿，永為後世種民。上章之

後，某身中年命延長，五墓殃注，並令斷

絕，五墓灾刑，返為恩福，以為效信。

恩惟

太上衆真分別，求哀臣愚。謹因同前章，只換直神云。謹爲某上請

天官解除五墓殃注灾厄錫人代形乞恩紙章一通，上詣

太上某宮曹治。同前章式。

謝先亡章

具法位，

上言：臣謹按

玄科，今據鄉貫某，比者中外夢想紛紜，精神惚恍，或鬼賊屯集，口舌橫生，錢財耗散，怪崇屢見，田產不收，蓋由觸犯先亡翁婆先祖、左社右稷、井竈土公、凶神惡鬼。闔家惶怖，仰憑大道，告訴向臣，求乞章奏，都謝城隍社廟神祇，諸部將軍，大小虛耗，十二禁忌，一切先亡，並蒙解釋，具如所列。臣以愚昧，不明氣候，謹爲伏地拜章，上聞天曹，伏願上官典者，以時平省，垂恩鑒照。謹爲上請解過君、解刑君、解厄君各五人，官將百二十人，爲某都謝先亡，却除灾厄，保護人口平和。從今年章御之後，千罪萬過，悉蒙原赦。願某

家口大小，危中得度，敗中得成，難中獲免，死中得生。所請天官君兵士等，有功勞者，依都言功舉遷，不負效信。恩惟

恩惟

太上衆真分別，求哀臣愚劣。謹因。同前章，只換直神云。

謹爲某拜請

天官都解謝先亡乞恩報章一通，上詣太上某宮曹治。同前章式。

保胎章

具法位，

上言：臣謹按

玄科，今據鄉貫某，即日口辭自列，素以胎生，下官子孫，千載有幸，得奉大道，被受元恩。某與妻無功可記，有罪斯多，深恐一旦受此冤苦，無所任持，向臣求乞保胎，收却河邪乳母，產婦懷胎後傷亡容閻鬼賊。謹爲拜章一通，上聞天曹。伏願

萬福解厄君二人，官將百二十人，下爲

某妻防保身命，胎妊易生。又請保胎聖

母君二人，官將百二十人，爲某妻守護

三元丹田之中，辟斥邪精、魍魎鬼賊，

守養赤子，當令某妻身得安全，免遭艱

阻，保護胎妊，安穩六甲，足滿十月，子

母相見，並蒙安貼。乞天門大聖，擁護

某娘身體和釋，無生煩惱。當爲諸君聖

母言功報勞，以爲效信。恩惟

太上衆真分別，求哀臣愚劣。謹因。同

前章，只換直神云。

謹爲某妻保胎章一通，上詣

太上某宮曹治。

催生章

具法位，

上言：臣謹按

玄科，今據某即日口辭自列，素以胎生愚昧，荷蒙天地重光之覆，某妻妊娠月數已滿，恐臨生不安，倍增惶怖，唯用一心，上憑

大道，告臣求乞章奏，上聞

天曹，不勝欣荷。臣謹爲伏地拜章一

通，願上官主者，以時平省。謹爲請天

門子戶君二人，速生君、乳母君、導生君、生母君、天醫助生君、催生君各二人，催生黃帝，伏在中庭，欲見子母形體。上請監臨坐草六百生父，守護某妻身，生產滑利，捨逆從順，辟斥衆忌，歲殺、月殺、時殺，白虎、咸池，千邪萬精，一切消滅，母子安全，如願從心，解脫無他。謹爲諸君聖母祐助衆神言功報勞，以爲效信。恩惟

太上衆真分別，求哀臣愚劣。謹因。如前章，只換直神云。

謹爲某拜

天官催生口啓章一通，上詣

太上某宮曹治。

小兒上光度化章

具法位，

上言：云。某即日居某村坊，叩頭自列，宿緣有幸，得奉

大道，欣慶無涯。但某凡愚，信奉多違，招延考氣。頃者已來，有男某，夢想紛紜，恐以不爲祥瑞，四支虛弱，慮染沈痾，莫知何功，可以防保。今賚法信，投誠委質，上憑

大道，告訴向臣，求乞壽命延長，上光度化，增算益年，扶衰度厄。臣謹爲拜章一通，上詣

三天曹。伏願

太上高尊無上元君，慈父聖母，上官典者，特乞平安。上請天地五光君，日月星宿五光君，東方請日光，西方請月光，南方請火光，北方請水光，中央請土光，上請壽命長生，付著某身形。上請壽命君五人，火炬君五人，三魂七魄君五人，各官將百二十人，下爲流布天仙妙藥，太和之氣，入某身中，還顏復色，精光悅豫。上詣

天官，與落死籍，蕩滌故氣，注上生名，六腑調和，五藏安穩，光益壽命，一切精崇，並令消滅。夢想真正，飲食甘美，長保安全，以爲效信。恩惟

太上衆真分別，求哀臣愚劣。謹因二官直使、正一功曹、左右官使者、陰陽神決吏、科車赤符吏、剛風騎置驛馬上章吏、飛龍騎吏，官各二人出，操臣某謹爲某拜請

天官上光度化口章一通，上詣

太上某宮曹治。

保嬰童章

具法位，

上言：謹按文書，某夙生慶幸，得奉

大道，從來荷恩，實爲無量。但某信敬多違，男女若干歲，今在童兒，未有所識，即日憂惶，恐爲故氣邪精、聾尸暗穢、乳母化神、天地河伯、鉤星血沒之鬼，承闔構禍，侵斥某身，求臣保祐，伏地拜章，上聞

天曹。特從

太上老君、諸君丈人、天師君、門下主者、五氣君，垂恩省理。上請陽仙護魂君、陰仙護魄君、天養生君，按摩某身，削除脾肺腎中、大小腸膽上下、幽都氣海，道氣宣布，百脉通利，病厄消蕩，顏華光澤，與日月同輝。上請太皇萬福君、解患君、東王父、西王母君，各五人，官將百二十人，三天九宮、甲子甲午官君，一切鬼毒，並不侵損。仰荷鴻恩，以爲效信。恩惟

太上分別云云。爲某拜請

天官爲保嬰童章一通，上詣

太上某曹云云。

斷亡人復連章

具法位，

上言：臣謹按

仙科，今據某云，即日叩頭列狀，素以胎生，下官子孫，千載幸遇，得奉

大道，誠實欣慰。某信向違科，致有灾厄。某今月某日，染疾困重，夢想紛紜，所向非善。尋求算術，云亡某為禍，更相復連，致令此病連綿不止。恐死亡不絕，注復不斷，闔家惶怖，恐不生全。即日詞情懇切，向臣求乞生理。輒為拜章一通，上聞

天曹。伏乞

太上老君、太上丈人、天師君、門下主者，賜為分別。上請本命君十萬人，為某解除亡人復連之氣，願令斷絕。生人魂神屬生始，一元一始，相去萬萬九千餘里。生人上屬皇天，死人下屬黃泉。生死異路，不得擾亂某身。又恐亡某生犯莫大之罪，死有不赦之愆，繫閉在於諸獄，時在河伯之獄，時在女青之獄，時在城隍社廟之中。不知亡人某魂魄

在何處，並乞遷達，令得安穩，上昇天堂，衣食自然，逍遙無為，墳墓安穩，注訟消沉，某身中疾病，即蒙除愈，復連斷絕，元元如願，以為效信。恩惟

太上衆真分別。求哀。臣為某上請

天官斷絕亡人復連章一通，上詣

太上某曹治。

疾病謝先亡章

具法位，

上言：謹按

玄科，今據某云，但某以信向多違，招延灾崇，頃者已來，怪異屢表，疾病更互，合家憂惶。尋究算術，云是家先并客死之鬼，嗔責生人，恐是前後年節，祠祀飲食不精，所設微薄，為後世禍崇所伐。乞丐

太上大道君，遷達迴轉，去離憂苦之處。謹為上請保護君、護命君各五人，官將百二十人，為某身典治鬼等，所有疾病厄難，原赦除愈，以為效信。恩惟太上衆真分別。求哀。臣為某上請天官疾病謝先亡章一通，上詣太上某曹治。

收除火殃章

具法位，

上言：謹按

玄科，今據某州縣鄉貫某，即日口辭自列，素以胎生，下官子孫，千載有幸，得奉

大道，從來蒙恩，誠實欣慰。某以凡味，修奉違科，屢招灾考。比者已來，聞見不真，忽以某時見火殃落在某處所，光影耀地，恐是死殃。火殃散漫村坊，侵害百姓，男女遭罹，非一吁嗟，道俗不可稱計，憂惶恐怖，何以禳却？仰憑一心，上告

大道。謹依師法，伏地拜章一通，上詣三天曹，令火殃即時消滅。上請中宮諸官君，及錄上將軍、二十四吏，兵士三十萬人，天地水三官，算考召君吏，道上二玄三元四始甲子諸官君，四方位，社邑里君，四野五野七野九野都平君等，所居某里中真官注氣。上請北方太陰君，官將百二十人，治太陰宮。又請風伯雨師消滅某處火殃，速去千里。又請誅殃君，官將百二十人，所部

宋無忌，主收火殃之鬼，令不燔燒良民所居住宅、屋舍、倉囤。上官典者，勅東方心尾二宿，藏火精，攝異神，勅風伯，藏伏氣，非節不行。又請九海北玄君，官將百二十人，動畢星宿，昇陰氣，興散雨雲，制伏火殃，令不得起。某等村坊某家，悉令灾火不發，竟歲無他，宅舍安定，人口平吉，以爲效信。恩惟太上衆真分別。求哀。臣爲某拜請天官收除火殃口章一通，上詣太上某宮曹治。

上清言功章

具法位，

上言：謹按文書牒，得某州某縣弟子某，年若干，某月日生，伏自惟省，素以胎蘗微蔑，宿緣幸會，得奉

大道，歸命正真，荷四時所養，皇老好生，太上惡殺，賜臣氣命，逮及今日，仰受太陽之恩，謬蒙師道之澤，賜署治錄，進叨《老君道德五千文》尊經，洞神洞玄洞淵洞真等法，奉受之日，要當供養寶文，修功立德，行合神仙，長生度世，永壽無極。縱不得仙度，託命太

陰，受煉更生，化爲真人，免脫三塗。道重人輕，實非尸肉所行參佩，廣開法門，舟航一切，濟度天人，存靈念真，餐御吐納，注心玄極，修行生道。非法不精，非法不真，但臣積世無狀，七世已來，莫大之罪，結固未已，至有誠心，未能潛隱。特以伏地奏聞，爲臣所佩三洞經法等，五帝、真靈、玉女、直符、直事、領仙侍郎、監察大夫、日月星宿、五嶽四瀆、十方真官、法上將軍、吏兵千乘萬騎，悉同言功報勞，上詣玄都，進品上仙，加爵帝秩，隨科署真，無令遺失。臣某家七祖父母，去離苦惱，上登天堂，衣食自然，天下太平。臣某學道未備，俯仰之格，道法難精，前後施爲，不合儀式，爲四司所糾，五帝所執，千愆萬過，乞蒙原赦。臣某身中五體真官，受秩事竟，各還臣身中，保氣全真，安穩如故。恩惟太上衆真分別。求哀。臣謹爲拜上天官言功報勞章一通，上詣太上某宮曹治。

三五雜錄言功章

具法位，

上言：謹按文書，某州某縣弟子某，年若干歲，某月生，伏自惟省，千歲幸會，得奉

大道，被受元恩。臣某仙靈二十四治錄，錄上將軍吏兵，奉受之日，誓依師教，優使吏兵，醫治百姓，修身之外，救物爲先，三會吉日，舉遷言功。臣自受任已來，諸所施行，皆如所願。謹依科法，以今月某日三會吉辰，拜奏言功章一通，爲臣所佩受三五上靈官一將軍錄、三五上靈官十將軍錄、百五十將軍錄、赤天中部赤錄、赤天三部三將軍錄、百鬼召錄、混沌赤錄、九州社令錄、星剛二十八宿錄、河圖錄、解六害神符錄、九鳳破穢錄、都章畢印錄、華蓋錄、九天兵符錄、九官捍厄八卦護身錄、考召錄、斬千鬼萬神錄、大斬邪錄、四部禁氣錄、斬河邪錄、功曹錄、保命長生錄等，二十四階法錄，六壬、太一、雷公三十六部神式錄，八史君六甲支干靈符，十二月將，時直二十四治職將軍

錄、孝道仙王一十八階征山神將錄、中宮敢健剛武強伐商天萬丈百鬼中王都官從事高功司馬中騎大將軍、八極排天延壽六星斗君、中黃司政君、元黃九仙司直君、魁頭主刺君、剛頭司殺君、消灾散禍扶命解厄君、天驪甲卒、天丁力士等，保守臣身如故，令臣所向，金石爲開，水火爲滅，所厭者伏，所治者愈，所解者開，所繫者破，所消者散，衆惡邪賊，欲見中傷臣身者，一切滅絕，令臣某得蒙過度三灾九厄凶世惡年，萬姓歸仰，睹見太平，奉迎聖君，永爲種民。過泰之恩，以爲效信。恩惟

太上云云。今因三會大慶，奉爲身中所佩三五將軍內外雜錄君吏拜上言章一通，上詣

太上三天曹云云。載拜以聞。

絕泰山死籍言功章

具法位，

上言：謹按文書，某州縣鄉里觀上清大洞三景弟子某嶽先生臣某等年若干，某月生，素以胎生，千載有幸，得奉

大道。師老垂矜，賜署治錄，不以凡愚，參佩經寶，真祕重沓，荷恩過泰，欣慰罔極。但臣某雖叨妙法，不閑科禁，功無絲髮，愆犯罪積，累年轆軻，生途不稱，居住不安，命屬

皇天上帝十二司命君。謹按天師舊儀，三會吉日，斷除泰山死籍，削除右契罪名死目，改定生錄，注上生名左錄長生宮中。上請倉生君一人，請爲三官將吏兵士一切言功，受賞如常，原赦臣某等所犯謬誤之愆，先亡眷屬同免苦楚，受大福德，衣食自然，殃疰斷絕，道氣降附，存亡清泰，以爲效信。恩惟泰山云云。爲依法三會吉辰，拜上上請天官斷除泰山死籍改定生錄乞恩紙筆章一通，上詣

太上某宮曹治。

遷達先亡言功章

具法位，

上言：謹按文書，某州縣觀上清三洞三景弟子某嶽先生臣，某年月生，素以胎生，千載有幸，得奉

大道，兼蒙師真賜佩天官治錄，叨忝經

寶，以存供養。臣以好道樂生，奉宣文書，助國扶命，勸化萬民百姓，一切蒙恩

太上大道、諸君丈人重恩成就。伏聞大道三會吉日，太上老君下流八極，澤潤無垠。臣等先亡三曾五祖、七世父母、前亡後死、五服種親，或恐執繫地獄之中，未能下解者，乞丐

太上大道君、上官典者，願臣今奏章告下天地水三官、泰山二十四獄、中黃天九平獄、中都大獄、水官土府、九江水帝、河伯呂公子、將從掾吏，徒謫役作罪目，五盟七詛，不忠不孝，陰惡咎匿，從天至地，一切原赦，令臣學業成就，智慧增廣，宿愆赦貫，存亡安泰，以爲效信。恩惟

太上分別云云。今日日三會吉慶自拜上遷達三曾五祖七世父母乞恩紙筆章一通，上詣

太上三天曹云云。載拜以聞。

百姓言功章

具法位，

上言：云云。但臣依天師舊式，以三會都治舍所，領户化民，依天師文書，輟死言生，并天師昔所布下二玄三元四始甲子諸官君將吏兵、二十四治官將吏兵等，言功舉遷。令依科禁，不敢不聚會。謹於所在某處鄉甲觀中，條列所領户化民百姓男女，求恩乞願，並佩正一盟威等籙，二十四階，七十五童子，并及散民等，願請無上玄老太上三尊將軍吏兵守宅，三將軍兵士三十萬人，保護某家口男女，使三灾九厄，並乞隨章蕩散，并臣身中內外種親，及所佩法籙等，前亡後化，男女之鬼，並乞遷達，免離諸苦，上昇天堂，斷絕復連，宿疾除差，日就安穩，蒙恩如願，以為效信。恩惟

太上分別云云。依常品拜上，今年某月日三會吉慶，言功云云。載拜以聞。

赤松子章曆卷之四

赤松子章曆卷之五

為天地神祇言功章

具法位，

上言：謹按文書，某州縣鄉思觀道士某等，素以胎生，叨賜

天官治籙，內外重沓，過泰之恩。臣以下愚，六情奔蕩，不自覺知，歲月滋深，積罪無數，難可安全。仰賴身中所受神仙寶籙，所見營護，受恩隆重，伏地拜章一通上聞。特從

太上無極大道、諸君丈人、天師君夫人造化之恩，赦臣等宿世今生千罪萬過，及臣前後為百姓男女消灾救疾，告急章奏，建立齋直，施行功德，口啓願諸所求乞，上請

天官役使吏兵及天地水三官、前後水陸行諸道逕州縣鄉亭里域諸官君正炁，助道興化者，從正月十月已來，天官吏兵有功勞者，悉乞為言功，遷加爵秩，從一等至百等，從百等至千等，如天曹科品，錄署便曹穩職，無令失意有

恨者。天官、地官、水官受功事訖，各還本位。并從正月至十二月，所請君將吏兵，今為言功。月一日至三十日，所請君將吏兵，今為言功。日子時至亥時，所請君將吏兵，今為言功。盡為舉遷，依

天曹科品，皆無令恚恨。符契吏兵，及時伏臣等身中保守如故。伏願

太上無極大道、諸君丈人、天師君夫人，降下正一生炁，覆蓋臣某身，生氣真全，宿疾除愈，四體輕強，三尸墮落，九蟲沈零，學道棲神，心開意悟，曉知未來，長生久視，神仙度世，得見太平。願臣生緣家口大小等身，並乞灾厄過度，年命延永，五瘟疫毒，不敢侵斥。至來年某月某日安穩如願，當為眾官拜奏言功，不負效信。恩惟

太上分別，求哀臣愚劣。謹因二官直使、正一功曹、左右官使者、陰陽神決吏、科車赤符吏、剛風騎置驛馬上章吏，官各二人出，操臣某因三會吉慶，為天地神祇及臣等身中吏兵，為前後百姓同詣救治疾厄，求乞恩福。臣等拜上都

言功口章一通，上詣

三天曹，伏須告報。臣某誠惶誠恐，稽首頓首，再拜以聞。

空三行

臣某 屬 某宮焚修

空三行

太清玄元無上三天無極大道太上老君太上丈人天帝君天帝丈人九老仙都君九炁丈人百千萬重道炁千二百官君太清金闕七寶玉陛下

空三行

年號歲次某甲某月某朔某甲子某時章於某處齋壇拜上

空三行

可漏用全紙一幅爲之

太清玄元無上三天無極大道太清金闕七寶玉陛下 具章奏法位臣某姓某 上奏 謹封

內方函

謹 謹 上 詣 具章奏法位姓某謹重封 太上虛無丈人宮某曹治某宮

方函

謹 謹 上 詣 具章奏法位姓某謹重封 三天門下請進

三五言功章

具法位，

上言：謹按文書，臣等芻草之類，生於濁俗，仰藉宿慶，遭逢大化，歸依大道，過蒙天地覆載，丹靈所育，皇乾所養，星辰所衛，日月所照，四時所長，皇老好生，賜臣氣命，逮及今日，仰稟太陽，得廁人道。某不以愚昧，貪樂道法，歸命至真，賜授法戒、內外符籙、三五治職及三洞金書玉章，佩受已來，積年經載，香燈供養。但道重人輕，非凡穢所可叨佩，宿夜憂惶，不以寧處。臣等受法之日，要當自竭愚短，朝禮讀誦，宣揚道德，濟度一切，及以自身修靜念真，日月之精，注心玄虛，修行之炁，陰陽九轉，三五成丹，飛騰虛空，白日昇天。非法不精，非道不真，恐臣等前世今身所犯莫大之罪，乞身中功曹吏兵衆官，營衛臣等，及生緣家口壽命。上請祐衛將軍一人，官將百二十人，爲臣賚良方妙藥、甘靈芝英、金液玉漿，充哺養赤子，保國安神，皆令無他。願臣等學道昇仙，長生度世，出入行往，衆官吏兵乞垂衛護，不負效信。恩惟太上分別云云。今年月三會，都言功舉

遷，口啓章一通，上詣三天曹云云。

除泰山死籍章

具法位，

上言：謹按文書，臣某年若干，屬州縣鄉里住。臣素以胎生，宿緣幸會，得屬上帝十二司命君。伏按科法，三會吉日，落泰山死籍，削去有契。上請倉生君、八極五炁監年命，令臣等及生緣大小，壽三萬六千歲，記名玉曆，彌綸天地。即自荷恩，三月一時，爲天官君吏言功舉遷，名加爵秩，以報勞苦，不負效信。唯臣及生緣家口內外男女上下尊卑等身，年命延長，永爲種民。臣千罪萬過，乞丐原赦。恩惟太上分別云云。飛龍騎吏、左右龍虎君，各十八人出，操臣以今歲月日拜上絕除泰山死籍口啓章一通，上詣太上某宮曹治。

為先亡言功章

具法位，

上言：謹按文書，臣某年若干，屬州縣鄉里某處住。臣素以胎生，血誕之餘，千

載運會，得遇太上開化之際，盟威正教，驅除穢逆。但臣某稟炁暗鈍，六情閉塞，百行多違，未有微功，上答大造。蓋聞道法，三會吉日，

太上老君恩流八極，澤潤無外，生死蒙恩。是以人清鬼平，生死蒙泰。臣今章奏告下天地水三官土府、九江水帝河伯、將從掾吏，特乞一切之恩，原赦臣等七祖父母，前亡後化，一切宿罪重過，特垂放遣，賜與沐浴，上升玄都長生宮中，神登紫闕，衣食自然。臣等闔觀得受餘慶，福祚無窮，注上生名玉曆青篇之中，存亡咸泰，永為種民，光顯王道清真之信。恩惟

太上分別云云。陰陽神訣吏、左右龍虎君，各十八人出，操臣等吉日謹拜遷達先亡解除基考謫罰口章一通，上詣太上某宮曹治。

三月一時言功章

具法位，
上言：謹按

玄科，今據某素以胎生，凡質穢濁，得逢太上道炁開化，恩流八極，施布道法，

養育羣生。臣以有幸，得歸法門，天師矜愍，賜臣治職。臣以肌腥賤質，耳目閉塞，無輔助之效，夙夜憂惶，不自寧安。謹按文書，天師節度，一年三會吉慶，十月五日，都言功。謹條臣所領錄上辭旨，散民育物，男女良賤，命籍、戶口，年紀、顯達、人名，右列如牒。臣從今年七月七日已來，承上

三天無極大道、諸君丈人、天師法教，訓喻百姓，醫治百姓，助國扶命，即使肉人等，改惡為善，捨逆為順，去故就新，廢偽成真。臣身中吏兵功曹使者、陰陽神訣吏，關啓千二百官君，上請天官將吏兵、熒惑太白中陣兵、魁魁炁吏、上清玄君、五炁經君、朱雀君、日月天醫、和醫、太始剛武敢健吏、百蟲君、神男神女、玄男玄女、玉男玉女、素男素女、仙男仙女、詭吏化君，醫治疾病，公私口舌，行來道路，移徙嫁娶，葬埋作舍，求乞保護。臣及民所居鄉里，監察考召君吏、道上二玄三元四始諸官君、四野五野七野平都君，田蠶六畜，倍加衛護。天師所布下二十四治、三

十六靖廬、九州八極治化君將吏兵士，五方驅除君將吏，東九夷、南八蠻、西六戎、北五狄、中央三秦，黃書契令十二月命君等，男官女官，二十四官，男職女職，二十四職，及男女戶口所受錄上吏兵，請守宅三將軍、二十四吏，兵士三十萬人等，三曾五祖，五將五神，保護肉人等家，皆得端正。勞君苦吏，願一切悉為言功舉遷。臣以闇塞，不明鬼炁，謹請漢南昌都集君、還功君，將吏一百二十人，主分別諸將吏，有功勞者，分別皆當遷達，考召調正鬼炁，十等上至百等，從千等上至萬等，遷入中宮，隨功多少，各還本所。功曹顯達，受功者，與便曹穩職，無令失意。或有恚恨者，至來年正月五日，依法舉遷。臣及所願道民，口數端正，以為效信。千罪萬過，乞垂原赦。恩惟

太上云云。操臣為依常品拜上十月五日三會大慶言功口啓章一通云云。

三會言功章

某州某縣道士某，年若干，某月生，稽首，謹上啓

太上老君、天師、嗣師、系師、三師君夫人、門下典者，但某千生慶幸，值遇玄風，忝竊道門，身披冠褐，蒙師尊而開度，賜法錄以匡身，忝正一之初階，遷上清之極境。伏以人羸法細，違犯居多，晨夕乖於焚修，晦朔闕於朝禮，三元三會，或失焚修，八節庚申，皆違醮閱。身或穢觸，衝突靈官。口是心非，違科越禁。或思存散亂，妄想俱生；或喜怒無時，酒食失度。如上之罪，無量無邊，日往月來，無由洗滌。今因某歲三會吉辰，拜奏大法言功章一通，三五雜錄言功章一通，資次，伏願

太上三尊、天師衆聖，開大宥之澤，敷罔極之恩，賜洗前愆，蠲除往過。然乞臣所佩正一洞淵等錄，至于上清、上仙、上靈、二官吏兵、仙童玉女、文武官屬，悉爲言功報勞，益秩遷階，咸受功賞。受功事竟，各歸臣身中，安慰官府，守護臣身。乞灾厄蕩消，衰危殄滅，口舌不起，怨仇叶和。章醮符水，願有效徵。門徒興盛，住持清泰。出入休安，得允所祈。仰荷

玄造，請給謹狀。

鄆都章

具法位，

上言：謹按文書，某州縣某，即日稽首，謹叩頭乞恩，拜章拔贖亡人。伏聞

太上有濟度亡人之法，謹投

大道，未知亡人新逝已來，魂魄託生何道。恐在世之日，身處凡夫，餐啖衆生，烹炮物命，無非是罪。今請奏鄆都拔罪章一通，謹資法信，以爲證質。臣某奏章，伏願

太上無極大道、天師君、慈父聖母、上官主者，特垂大慈之澤，原赦亡人前身已來，三業六情，或積行所犯莫大之罪，或犯一百八十條科，輪迴萬劫，冥冥長夜。未測亡人魂魄作何驅役，隸屬何官？或恐在上中下二十四獄、三河九江，風刀之罪，幽繫三塗。請爲解釋。臣今爲申奏章表，乞賜亡人某魂昇三天，魄離閻府，永除苦惱，逍遙福庭，衣食自然，天堂受樂。次乞某家口大小，永保康寧，所願從心，常保元吉，以爲效信。恩惟

太上云云。

生死解殮洗蕩宅舍章

具法位，

上言：謹按文書，某州某縣將領家口大小若干人，即日稽首，歸命

太上。今緣住宅生產死亡，恐有殮穢。宅中十二時辰，行年本命，害氣相侵。今詣臣求乞章奏，洗浣宅庭，殮穢消蕩，內外光明，神龍備衛，防保人口。唯專一心，上憑

大道，乞求章文，解除殮穢，洗蕩宅舍，安穩無虞，具如所陳。臣以凡愚，不明氣候，輒承辭旨，伏地拜章一通，上聞天曹。謹爲上請東方青帝解殮君、南方赤帝解殮君、西方白帝解殮君、北方黑帝解殮君、中央黃帝解殮君，官將百二十人下，爲洗浣肉人，解除殮穢。玉女使者，官將百二十人，各資真精之水，五和之香，蕩灑某家井竈等，大殮入海，小殮入江，千殮萬穢，應時消滅。上請仙花玉女一千二百人，與東方青龍主水使者、南方赤龍主水使者、西方白龍主水使者、北方黑龍主水使者、中

央黃龍主水使者，各賚真精之水，洗滌弟子某家住宅神靈，內外清淨，并請勅河伯呂公子、營校尉督，一切水官將吏，更相傳送，除解某家內外神真，皆令清淨，利祐人口。大小若干人，乞無灾瘴，宅舍安寧，向去前途，五瘟不染，行年四出，常保無虞，以爲效信。恩惟太上云云。

大醮宅章

具法位，

上言，謹按文書，某州某縣某，即日乞恩，同心稽首，口辭自列，信向無功，招延不善，即日起造宅宇已來，未曾醮謝，恐動土興工，驚動宅上諸神，并及家口行年本命蠶室，奏書博士不敢自專，今謹請鎮宅十二禁忌紙章一通，防保宅上人口平安，具如所列。唯專一心，上憑

大道，向臣求乞章奏，願爲降赴，證明法教，奉用鎮信，以表五方靈官。上請天官爲某住宅之中四面內外十二時辰二十四禁忌太歲大將軍，青龍白虎朱雀玄武，宅中伏龍、日出日入，人口行年、

本命，一切神靈，從立宅已來未曾章醮，今選吉辰良日，謹於中庭安鎮法座，鋪陳質信，以表宅上十二時辰，分解禁忌。謹爲伏地拜章一通，上聞

天曹。伏願上官典者，特垂省理，如蒙恩煦，謹爲上請掾吏君五人、治宅官五人、制地君五人，官將百二十人，將軍十萬人，一合來下，將軍二十四吏兵三十萬人，及宅中備位神明，及所部里域真官，共部押宅中四面八方內外十二時辰二十四禁忌土公太歲大將軍、太陰夫人、青龍白虎朱雀玄武、伏龍勾絞、歲月大小、二耗三公、九卿將軍、發盜本命、子丑寅卯辰巳午未申酉戌亥，宅中內外，一切衆神，即日即時，應章上達，收斂十二時辰，鎮於本位，收捕宅上東西南北，並請安穩，無令觸犯。豎屋事訖，言功報勞，以爲某家清淨一切衆神，鎮宅之內，宮室之裏，錢財集聚，羅綺盈堂，一依符教，收却四面灾禍，永不侵擾，元元一心，以爲效信。恩惟

太上云云。

開通道路章

具法位，

上言：謹按文書，某州縣某，闔門長幼，同心稽首，叩頭乞恩辭。但某塚宅衰凶，神鬼侵逼，禍下自招，上延亡人，年若干歲，某月日時染疾，困重無藥能療，因此亡逝。謹依俗禮，棺殮在堂，終始永畢。未測亡人新逝已來，魂魄不知託生何道。恐在世之日，殺害衆生，傷損物命，繫閉三途，未蒙解脫。罔知作何功德，拔贖幽關。伏聞

太上大道有解拔之科，濟度亡魂之法，謹賚法信，獻五方靈官，薦拔亡人魂魄，闔通道路，無有窒礙。以今元元一心，請求騰奏。但以凡流不明氣候，垂恩請省。謹爲上請素車白馬大將軍一人、太玄君一人，各官將百二十人。又請直符告下天地水三官、女青詔書、土下二千石、丘丞墓伯、十二塚侯、泰山二十四獄、皇天九平獄、天一北獄、東嶽泰山、南嶽衡山、西嶽華山、北嶽恒山、中嶽嵩高山地獄，北都寒池地獄，牢檻諸獄，九江水帝，河伯河侯，將佐

掾吏，一切放遣亡人。伏願生前罪累，並乞消除，歿後愆尤，隨章蕩除。沐浴清淨，逍遙福堂。遷爽淨宮，參經洞府。然乞弟子闔門長幼，家口平安，以爲效信。恩惟太上云云。

拔河章

具法位，
上言：謹按文書，某州縣鄉里，某年若干，某月日生，即日口辭自列，胎素肉人，枯骨子孫，千載有幸，得奉大道，從來蒙恩，欣抃罔極。但由肉人信向多違，招延不利，多有厄難，夢想不真，所見不善。推尋算術，云有河神之厄，恐有衰疾，慮致傾危。今憑大道，告訴向臣，求乞章奏，開度衰年厄月，免離三河之厄。臣輒憑口辭，爲伏地拜章一通，伏願三河四海、九江水帝、諸神君等，解釋某衰年厄月，水府之中，但名係之處，願爲開度，無令繫閉諸獄。又請東方青帝河伯水官、南方赤帝河伯水官、西方白帝河伯水官、北方黑帝河伯水官、中央黃帝河伯水官，

各百二十人來下，主爲某解拔三河之厄。伏願天地水三官，女青詔書，拔度刑厄，永保無他，以爲效信。恩惟太上云云。

保蠶章

具法位，
上言：謹按文書，某即日乞恩，口辭自列，今爲累年養蠶不收，恐有犯獮，以今日吉日良時，於宅內上請東方青帝蠶室、南方赤帝蠶室、西方白帝蠶室、北方黑帝蠶室、中央黃帝蠶室、蠶家先祖、蠶家公姥、蠶家子孫、天上蠶室、地下蠶室、三十六蠶室，照察某日夜悲愁，罔知救護，唯以一心，上憑大道。謹賚心信，向臣求乞章奏，上請五方代公代姥、代家先祖、代家父母、代家子孫、左右四方力士，上請神君，下鎮養蠶之姑、養蠶新婦，黑蠶如龍，白蠶如虎，行聲如風，食聲如雨，雷聲震動，不爲禁忌，但是穢穢，並令消滅。謹賚法信，並在案前，奉請五方養蠶之女。又請五方養蠶之姑。又請蠶父北

陽之君、蠶母北君之女，爲某宅內今年蛾蠶如願，播植長滋，斥流瘟疫，蟲鼠虛耗，一切消滅。伏願收繭萬石，得絲千斤。知道爲真，知章爲神，謹爲某伏地拜章一通，上聞三天曹。伏願大道君吏、上官典者，特垂省察。如蒙哀祐，唯專一心，以爲效信。恩惟太上云云。

接算章

具法位，
上言：謹按文書，某即日口辭自列，素以胎生，千載慶善，得奉大道，從來蒙恩，誠深罔極。但以凡夫不知璇璣斗建，土宿臨刑，恐年命厄會不輕，元辰衝破，天羅地網，算盡將來，九醜備縈，日夜憂惶，貞吉難保，泉壤是虞。唯專一心，歸憑大道。謹備法信之具，表獻五方靈官，即日告臣，求乞章奏，上詣天曹，拔贖身命。臣雖不明氣候，輒承所請，謹爲伏地拜章一通，上聞天曹。伏願

太上老君、諸君丈人、三師夫人、門下典者、一切監司、陰陽諸曹二吏，施大慈之澤，布罔極之恩，願爲上請壽算君五人、保命君五人、消灾君五人、散禍君五人、扶衰度厄君五人、解羅脫網君五人，官將各百二十人，一合來下，爲某拔贖二十四獄、天曹地府、古廟靈壇、社稷將吏、司命曹局，尋檢某身有諸罪目，死名在黑簿之中者，乞爲改易，有厄脫除，有病爲愈，已枯更榮，已死更生，衰中得度，厄中得過，月厄年灾，並爲散釋。某年命不長，壽算短促，伏願大道弘慈，立更生之道。臣等瞻其跪信，上詣三天曹，請拔贖某身命，延年益壽，削死上生。今呈章奏之後，家口大小，灾厄過度，永保康平，宅舍清淨，塚宅潛寧，九祖已來，逍遙自在，元元一心，以爲效信。 恩惟

太上分別云云。拜上禳星益算延年章一通，上詣太上某宮曹治。

大塚訟章

具法位，

上言：今有某州縣鄉里某甲，投辭列款，稱門祚灾衰，家累疾病，所作不利，所居不安，求乞章奏，解除塚訟。今據其事狀，粗可根尋，必恐其七祖九玄、周親近屬，生存之日，過犯既多，亡歿已來，被諸考謫，子孫未與拔贖，冥漠得以怨嗟，或葬在水源之訟，或殯當神廟之訟，或墳塋穿穴之訟，或棺槨損傷之訟，或舊塚相重之訟，或新塚相犯之訟，年月浸遠，胤嗣不知，或水溺火燒之訟，或蟲傷藥毒之訟，或刀兵牢獄之訟，或瘟疫癰疽之訟，或伯叔兄弟，或姑姪姊妹，遞相連染，以作禍殃。有一於斯，罔不誅責，艷宮案罪，因所甘心，而玄律垂恩，亦容追過。臣輒依千二百官儀，并正一真人三天法師所授南嶽紫虛元君治病滅惡之法，謹上請天昌君，黃衣兵十萬人，收某家中百二十殃怪，中外強殍，十二刑殺之鬼，皆令消滅。又請無上高倉君，兵一萬人，爲某家收治五墓之鬼，傷亡往來，住著子孫，作殃怪禍害疾病某身，致令死傷不絕者，皆令消滅。又請運氣解厄君，兵

士一萬人，爲某解除家中逆注，某身中刑厄，十二刑殺，百二十殃考，皆令銷散注滯，使制鬼滅禍，遏却六天之氣。又請益天大將軍，大兵士一萬人，萬福君五人，官將百二十人，石安君，官將百二十人，朔平君，官將百二十人，治玄始宮，並爲某辟斥故氣，收捕天下飲食橫行鬼賊，作諸精祟，妨害某及家中大小者，皆令收絕，應時剪撲，即使摧滅，却死來生，滅禍致福。又請石仙君一人，官將百二十人，爲某家却滅強殍之鬼，厭絕精祟，不得爲害。又請四相君五人，官將百二十人，爲某銷散家中，有考訟鬼祟諸不正之氣，侵擾宅舍，致不安穩者，皆即收剪，解釋訟考，分別清濁。又請赤天食氣君，官將百二十人，爲某馳斥親屬遠近，及有異姓之訟，逮諸凶惡怨訴，共相侵擾，不肯散退，所爲崇害者，悉皆制絕銷滅。又請收神上明君，官將百二十人，爲某身解除惡夢錯亂，魂魄不守，精神離越者，令得安善，使夙注銷歇。又請太玄君，官將百二十人，治無渠宮，主某家有凶注

之氣，令人精神爽越，疾病顛倒，驚邪恍惚，不自知覺者，使銷滅賊害，永無殃患。又請制地君五人，官將百二十人，下治其冥泉宮，爲某身并家中大小，分解行年本命太歲土王墓辰建破，諸所觸犯，爲高下卑幼之鬼爲業害者，皆令消滅。又請無上天生君，兵士一萬人，無上方相君，兵士一萬人，並爲某收家門先後死亡，有相注逮者，令消滅之。又請厄鄉候君，官將百二十人，治太清宮；章釋君，官將百二十人，治太清宮。又請祐護將軍吏兵，賚太玄真符，攝下女青詔書，地下二千石、泰山二十四獄，爲某收捕分解塚墓殃逮之鬼，告下地中官長、丘丞墓伯、蒼林君、武夷君、左右塚侯、地中司激墓卿、右秩蒿里父老、諸地域所典，並令斷絕考害復注之氣，一切消滅。若某家祖曾已來，先亡後死，男女大小，凡葬埋所在，有犯十二月建破王耗八將六對傷絕禁忌，音向不正，哺次不得，左前右後，伏尸故傷，妨害男女位座，諸爲刑禍，致不安穩，子孫疾病者，悉爲解釋和合，

隨源補復，反凶爲吉，轉禍爲福，生死幽明，不相關涉。請都星君，官將百二十人，治華蓋宮；誅殃君，官將百二十人，治倉明宮；太白中陣明君，官將百二十人，並爲某家七祖已來，先亡後化男女大小，解星官復連，收十二時刑禍遲留逆殺，皆使除滅死亡，斷絕復注。若下官故氣，假託形影，導從鬼兵，驅逼先亡，傷注之鬼，去來家門，迫脅生人，拘錄魂魄，致爲疾病者，一依鬼律收治，皆令消滅。又請無上天玄君，兵士一萬二千人，爲某收治遠近貴賤尊卑男女，凡諸有謀口舌誹謗咒詛之氣，皆令伏匿，不得爲害。又請赤砂君，官將百二十人，治南昌宮，爲某家收五蠱六魅，百二十凶灾，及虛耗之鬼，常爲某所居宅舍致費損不利者，皆令消滅。凡上請二十四君官將吏兵，即日一合來下，各隨本職，爲某解散考謫，消除殃崇，和釋諸所，斷絕注氣，先亡後死，及種族親戚，有橫暴枉濫、流亡客葬、無後之鬼，預是前八十一訟之事件，百萬種種之考注，並各寢息，不得動作，一

皆消蕩。若猶有欲興造怨望，覘伺間隙，因垂衰便，搆扇禍害者，盡皆收檢剪撲，速令滅絕，不得與某有相關涉。存亡異境，禍福各對，當令某身并家口，從今以去，神氣流布，天靈輔衛，五藏調理，六腑宣通，真精內充，百病消歇，行業成就，功德日新，吉祥咸降，祆邪散滅，公私昌熾，存亡荷賴。所請天官君將吏兵、文武職司，並立勤績，驅除鬼害，收剪有功，請即爲言功遷賞，加秩進爵，差次高下，如天曹常科，無使恚恨。某所賚交賧，紫紋四十尺，命米一石二斗，錢一千二百文，著體淨衣一副，狀紙一百二十張，墨兩錠，筆兩管，朱一兩，書刀一口，淨席一領，淨巾一條，即以酬官君將吏勤勞之效。恩惟太上云云。臣謹爲某身居疾病，解先亡後死者考氣注逮，拜上大塚訟章一通，上詣云云。

又大塚訟章

起自茅山七真。許長史云：欲上昇，為上三世被冤家殃訟，有西靈夫人告令求道官拜奏塚訟章以解洗冤

債。其章具有儀注，若明日拜章，今夜具備浴室五所，如人之沐浴，具備如力，及先製小衣服三對，兼具銀錢，獻上先亡，以充洗浣。明日奏啓訖，即燒章。隨章燒衣服及錢財，亦須嚴潔，具備之。又云：夫人家事破落，名宦不泰，死厄疾病，痛苦連年，生業不興，子孫凌替，皆云上世考訟，亡靈不安，殃及生人子孫，致之如然。能三年內頻拜奏此章，當有大益。章詞臨時看意改移，當從簡正，不可煩瀆。

具法位，
上言：謹有某官某乙，年若干歲，某月日生，貫某州縣鄉里，某爲戶頭，即日叩頭，稽首自列詞狀，素以胎誕，千生慶幸，得奉
大道，荷恩資育，得見今日。伏以某身或有違忤，或有所求，或謀官宦，或疾厄，謝過，祈恩，任於此入語。莫不因其修習乖違，所行逆理，建功補過，積善不及，上累先亡之禍，下責生人之咎，致令某乙怪夢非吉，所向多違，修念有闕，厄患臻集，慮不

全生，莫悟考咎。實懼上世已來，先亡後死，墓謫不解，塚訟相逮，告訴臣，求乞解釋。臣某伏按：人生稟陰陽之正氣，受形氣於父母，血胤連屬，逮乎七世，傍貫伯叔，至于兄弟，莫不善惡同源，榮枯相繼。陽官賞罰，亦止此條；幽府所施，豈宜廣引。服屬既疏，爲患自息。且各有承嗣，不相濫混，臣以亡人魂爽，動以物接，記籍所明，爲例甚衆。但肉眼障滯，不能照睹，巫覡所見，亦未窮察，當是形聲既分，故音影莫會，至於光像，猶若于生。然情念異同，不必遵舊，所以多致尤恨，亟爲禍責。今若不濟彼苦津，離此怨路，則終成深害，咎崇方臻。是以經教懇切，每念遷拔爲本；訓誘款曲，必使解脫爲先。而當年在世，莫不罪多福少。罪事既多，則久嬰苦切；福業既少，故理無所有。是乃纏綿累業，殃注不已。今慮某家先亡後死眷屬名狀，冥府自然，未皆放縱。或有拘執責罰，便生訟引。且七世久遠，後胤莫測。其中善惡不可詳省。今者既無的知其事，謹

備顯衆目，具以陳言。恐某家七祖已來，過去既往，今於三官九府之中，或有溺死之訟，燒死之訟，傷死之訟，絞死之訟，囚死之訟，填進死之訟，墮墜死之訟，踴蹴死之訟，打撲死之訟，毒藥死之訟，毒蟲死之訟，產乳死之訟，飢餓死之訟，寒凍死之訟，熱渴死之訟，魔忤死之訟，瘟疫死之訟，中惡死之訟，霍亂死之訟，癰疽死之訟，腫注死之訟，癩疥死之訟，千疹百病，以致於死，皆各興訟。又有老死之訟，少死之訟，孤死之訟，獨死之訟，鰥死之訟，寡死之訟，客死之訟，寄死之訟，裸死之訟，暴露死之訟，無棺槨死之訟，有棺無槨之訟，棺槨穿敗之訟，尸體不埋之訟，骸骨不全之訟，鳥獸殘啄之訟，火燒骨之訟，水漬骨之訟，車馬踐轢之訟，掘鑿汗泥之訟，已葬之訟，未葬之訟，葬非本墓之訟，葬犯禁忌之訟，葬不安穩之訟，葬高下東西南北之訟，祖曾、父母、妻妾、娣姒、中外兒孫、兄弟姊妹、伯叔姑姪，更互相訟，育子不養之訟，有兒不舉、沒爲奴婢之訟，同姓

之訟，異姓之訟，無宅之訟，無後之訟，憤慨之訟，責怒之訟，悲傷之訟，奄忽之訟。又生時與人有寵愛之訟，有讎怨之訟，有爭訴之訟，有殺活之訟，有枉濫之訟，及死後受詰對之訟，有慚負之訟，有違約之訟，有咒詛之訟，受考罰之訟，受徒繫之訟，受謫役之訟，受二十四獄罪報之訟，受惡因緣牽引之訟。次求恩赦之訟，求還家之訟，求人代之訟，求迴道之訟。如此等訟訴之事，各有條領，若溺死之訟，訴其沉淪水府，衣形沾濕。燒死之訟，訴其髮膚焦灼，皮肉剝爛。傷死之訟，訴其身形殘毀，流連瘡血。絞死之訟，訴其繩約緊急，氣息壅閉。獄死之訟，訴其鑱械拳擊，不得解脫。囚死之訟，訴其囹圄幽嚴，道理不暢。徒配繫死之訟，訴其赭鉗在身，謫役苦劇。填迮之訟，訴其肢體屈壓，不得伸展。兵死之訟，訴其身首異處。墮墜死之訟，訴其筋骨摧碎。踣蹴死之訟，訴其體脉結痠。打撲死之訟，訴其頭破臂折。毒藥死之訟，訴其腸胃潰斷。虎狼死之訟，訴其

肌骨噉食。毒蟲死之訟，訴其皮肉腫爛。產乳死之訟，訴其腹裂腥臊。餓死之訟，訴其胃府空竭。寒凍死之訟，訴其戰竦冰噤。熱渴死之訟，訴其吸喘乏。魔忤死之訟，訴其精魂怖悸。鬼所制伏。溫疫之訟，訴其寒熱顛倒。經絞酖毒。中惡死之訟，訴其卒暴痛，急不得申開。霍亂死之訟，訴其飲食過度，氣脉翻錯。癰疽之訟，訴其皮膚膿血，藏腑傷潰。腫注、癰痲、中風、上氣、千疹萬病之訟，各訴其沈滯困劇。老死之訟，訴其筋骨疲頓。少死之訟，訴其年志未成。孤死之訟，訴其幼無父母。獨死之訟，訴其老無兒息。鰥死之訟，訴無妻妾。寡死之訟，訴無夫對。客死之訟，訴其非舊鄉。寄死之訟，訴其非本宅。裸死之訟，訴其無衣衾。露死之訟，訴其無覆蓋。無棺之訟，訴體親土壤。無槨之訟，訴朽腐開顯。棺槨穿敗之訟，訴漏不蔽尸。體不埋之訟，訴其求瘞掩。骸骨不全之訟，訴求聚合。鳥獸殘啄之訟，訴失肌膚。燒骨之訟，訴求補復。漬骨之訟，

訴求高燥。車馬踐轢之訟，訴求移改。鑿掘穢污之訟，訴求遷濯。已葬之訟，訴求修理。未葬之訟，訴求墳塚。葬非本墓之訟，訴非土域。犯禁忌之訟，訴干觸神位。不安穩之訟，訴地氣衝激。高下四方之訟，各訴其處，更須轉動。六親九族之訟，各訴其生人違背恩紀。育子不養之訟，訴天性忍害，不得生成。同姓之訟，訴無情禮。異姓之訟，訴相輕濫。無宅之訟，訴非所歸。無後之訟，訴絕祭祀。憤慨之訟，訴志氣不逞。責怒之訟，訴人侵割。悲傷之訟，訴多厄枉。奄忽之訟，訴不獲辭。又生時所與人仇讎事，各有訟訴，並是怨結，莫申追想，引逮其亡後，所興諸訟，皆由不能自忍，求對生人。大略雖合八十一訟，其中枝葉分散，變成百千萬種。又有生爲愆罪，死受責罰，湯煮火灼，風刀電解，負石鑿山，漕江壅海，如此之目，復百千萬條，悉皆訟引子孫，更相攝對。又有陰伏匿怨，內疽隱恨，發念出言，起訟幽顯。或值時世不理，患難迫身，不勝哀憂，心悲

口毒，劇言怨語，呼天喚地，辱詈光景，穢罵神祇，事徹曉冥，皆成訟考。又立行醜逆，構業無良，犯諸科律禁誡，悉入考目。百年、五十年、三十年、二十年、十年、一年、一月、一日、一時，積考相加，衆考集併，命沒已後，餘考不息，纏綿累積，世世不窮。不知某家七世已來，先亡後死，於此諸條，並何犯坐？或復捨命之日，不自甘分，怨天咎地，呼引鬼神，亦致遺殃相連，終不解釋。或有臨民理務，枉刻無辜，殺人取財，囚人受貨，因公行私，狼戾暴虐。或妻妾閨闈，照察不明，信用偏邪，寵縱讒賊，持上逼下，怨酷叢生。祝禱鬼巫，厭迨年命，使取魂魄，殺以償咎，因是相訟，亦無窮極。又恐某家七世已來，復有陰罪陰過，陽罪陽過，死罪死過，表裏沈疊，內外怨穢，無德無恩，不仁不孝，欺妄狡詐，違常悖理，塞源拔本，指是作非，天地所弗容，人倫所共棄，沒命三官，皆嬰對罰罪，相及世結，固督切考課，終無止息。魂爽艱急，日就難忍，不堪荼毒，辭訴鬼官，求引生人，

代其劇苦。幽司雖明，亦有曲佞。或能聽理鬼言，移檄召對，致某家累年疾厄，頻歲灾衰，光怪夢寤，錢財耗滅，無可禳厭。告乞玄師臣某，復覽誥傳，唯應分解塚訟墓注爲急，直旨研明，竊思承奉，願遵幽密，護物爲功，驅馳謹按，未敢懈怠，但聖匠遼遠，軌跡遷訛，迷非悶悞，靡知定本，輒極心究校，詳盡愚誠，參順經科，備伸虔奉，依法謹賚布素一百二十尺，五方繒紋、白素各八十尺，掃帚五枚，糞筐五枚，朱砂一兩二分，席一領，狀紙二百張，筆墨各二副，書刀一口，錢五千文，油一斤，香三兩，米二石四斗，并先宿備沐浴洗浣之具。臣謹爲伏地拜章一通，特願上官典者，垂神省覽，爲某家分解先亡後死塚訟訴注之氣，令復注絕滅，逮害潛消，人鬼異路，生死乖隔。謹請天官君，將吏兵各司所主，共爲某家厭制墓氣，解散殃咎，降某家塚瘞之所。又於鄆都、泰山、河海、丘陵諸謫役之處，三官三府各隨源檢紮，必使洗釋，輒按千二百官章儀，并正一真人所授南嶽魏夫人

治病制鬼之法，爲某家上請太玄君五人，官將各百二十人，又請左右都候官將百二十人，治太明宮；又請祐護將軍吏兵，太玄真符，攝解塚墓殃注逮之鬼并陰害，加符告下某家，各用本音姓，角姓塚訟交通所屬勾芒之神，徵姓塚訟交通所屬祝融之神，商姓塚訟交通所屬蓐收之神，羽姓塚訟交通所屬玄冥之神，官姓塚訟交通所屬勾陳之神也。及丘丞墓伯、地下一千石、蒼林君、武夷君、左右塚侯、地中司激墓卿右秩、蒿里父老，諸是地域所典主者，並嚴加斷絕某家塚訟之氣、復注之鬼。若某家自上係高曾祖父母已來，諸塚墓所在，有犯十二月建破王耗、八將六對、傷絕禁忌、音向不正、哺次不得、左前右後、伏尸某姓男女位坐，並爲刑禍，虛耗不息，妨害子孫者，兼爲解釋，和合補復，使生死咸安。即請大玄君，官將百二十人，治無渠宮。又請九地君，官將百二十人，治茂理宮。一合下，主爲某家分解葬埋所犯十二月建破王耗，及十二丘墓塚訟之鬼，一切須滅。又請都星君五人，官將百二十人，治倉明宮。又

請太白中陣明星君，官將百二十人等，一合下，並解某家七世已下，前昇後化亡人、星宿官將復連，收十二刑禍，遲留逆殺，除落死名，止殺滅殃。又請赤天食氣君，官將百二十人，主驅斥親疏遠近及有異姓訟，逮諸凶惡之鬼。又請無上高倉君，兵士十萬人，主收五墓之鬼，傷死往來病祟生人者。又請四胡君，官將百二十人，主消考訟之鬼、不正之氣，致不安穩者。又請收神上明君，官將百二十人，主收輜輳不寧、惡夢錯亂、魂魄不守者。又請天昌君、黃衣兵士十萬人，主收某家中百二十殃怪、中外強殍、十二月刑殺鬼。又請蓋天大將軍十萬人，主爲某家辟斥故氣，斷絕注鬼，却死來生，却禍來福。又請太白君百萬人，都官從事，考對殺君，各有種數千萬人，一合下，營護某身并某家，却死籍，上生名，斷祖世中外亡人死注。清濁之氣，破殺尸殃之鬼，不得伺候牽引，更相注逮。若下官故氣，假託形影，道從鬼兵，脅迫亡人，還逮家門者，一依女青詔書律令，收治絕滅。

所請十五君，官將吏兵等，願一合來下，各隨本職，爲某解除亡人考謫，療治衆苦，痛惱之疾，盡得平安。克使訟訴不生，殃注絕息。某家諸先亡後死中種族異姓、親戚周旋、朋友、奴婢、僕妾，橫暴枉濫，流亡客葬，無後之鬼，預是前八十一訟之事，及百千萬種殃考注逮等，各皆潛寧休息，不得復動作爲害。若猶欲怨望，覘伺間隙，搆扇禍害者，各盡收執，速令永滅，不使更興。章御之後，賜某家前亡後死祖世亡人，罪蒙原赦，魂昇三天，塚墓安寧，考訟沉靜，福被當今，慶流後代，子孫隆茂，宦學光顯，計圖勝展，公私利昌，疾病除差，怪消夢正，存亡獲福，以爲效信。所請天官，依都章言功，不負丹誓。恩惟

太上分別。求哀臣愚。謹因二官直使、正一功曹、左右官使者、陰陽神決吏、科車赤符吏、剛風騎置驛馬上章吏，官各二人出，操臣謹爲某官某乙身處官徒，官職沉滯，名位不遷，或云累代門戶衰微，子孫凌替，或云官私屯厄，口舌橫生，任隨本意言之，在臨時改張。

拜請

天官分解亡人塚墓考訟殃祟安死利生制滅禍害乞恩章一通，上詣太上某官曹治。伏須告報，臣某誠惶誠恐，稽首再拜以聞。

赤松子章曆卷之五

赤松子章曆卷之六

沐浴章

具法位，

上言：謹按文書右牒，即日稽首，仰慮亡人在生之日，多諸罪累，沒命之後，囚閉三官，困苦之中，未蒙解脫。今謹憑

大道之力，拯濟幽魂宿業愆尤，以今蕩滌。謹賫亡人在生衣物，及鎮信錢米香油方綵筆墨等，謹於淨庭立作浴室，沐浴之具，皆令清淨，免離幽塗。臣今謹爲伏地拜章，上請沐浴君吏，沐浴夫人，洗浣玉女千二百人，鑒臨亡人，沐浴身形，洗垢除穢，去離桎梏，得睹光明，逍遙快樂，衣食自然，無諸乏少，安穩塚墓，祐利生人，以爲效信。恩惟太上衆真分別，求哀。臣某謹爲拜上天官沐浴朱章一通，上詣

太上某宮曹治。云云。

解謫章

具法位，

上言：謹按文書右牒，即日稽首，仰恐亡人在生之日所向多違，招延不利，凶被亡人，遂爾終亡。如此苦切，人天罕測。罪積玄司，釁彰天府，亡者平生之日，三業六根，多諸罪結，上觸天禁，下犯地忌，中悞人鬼，有諒罪深，不測魂路，遂即一心，歸命

大道，告訴向臣，求乞章文，具如所列。臣謹爲伏地拜章，上請素車白馬將軍，兵士十萬人，又請太玄君一人，官將百二十人，一合來下，主爲亡人魂爽，永離三塗，名書六天，願爲度脫重罪。請太玄真符，告下天地水官府，女青詔書，地下二千石、丘丞墓伯、十二塚神，泰山二十四獄，東嶽泰山地獄，中都大獄，天一北獄，皇天九平獄，南嶽衡山地獄，西嶽華山地獄，北嶽恒山地獄，中嶽嵩高山地獄，北都寒池牢檻之獄，九江水帝河伯將佐掾吏，一切放遣亡人，永離幽塗，昇遷福堂，衣食自然，不得注訟生人。恩惟

久病大厄金紫代形章

具法位，

上言：謹按文書具銜，某年若干歲，某月日生，行年到某，今於某州縣鄉里觀院謹奏金紫代形章一通，某爰自幼小，以至于今，無德無功，叨榮重祿，歲月積久，罪咎彌深。又職在養人，政專撫俗，或緣情喜怒，傍公徇私，或率意刑罰，悞犯真聖，失在毫末，釁重山嶽，常懼冥責，唯無覺悟。某自某月已來，灾疾云云，伏惟

大道潛貸，有感必通，某微誠上陳，伏希降鑒。謹依儀式，賫金人一形，紫紋若干尺，隨年命，米一石二斗，鎮錢一千二百文，油一斗二升，紙一百二十幅，筆兩管，墨兩挺，青絲一百二十尺，算子一百二十條，淨巾一條，用爲法信，上投

大道，求乞章奏，削落死籍，注上生名。臣謹按師法，參詳天圖，某受生九天，冠帶五常，九宮籬落，八卦交纏，三光朗照，七元輔身，乾坤覆載，五氣翼形，陰陽育養，開導光明，法象天地，名參中

元，司命勒籍，太一檢年，玄符記錄，在南昌上宮、紫蘭之內，玉冊七寶之函，承天順地，稟氣玄天，定算冥中，初無夭傷，今世運否，三元交喪，真氣上昇，六天鼓行，千精萬邪，枉害生民，致有理不揚，抱枉不彰，三尸枉魂，飛爽彌天，怨鬼號訴，稱恨三官，天高地邈，幽冥不理，注連生人，致有先亡祖考，中外傷精，構合爲凶。臣按天師九道考經元辰包鈎命訣之法，人命受生，有吉有凶，脩短之期，各有歲月日時，生值吉德，則長享五福，犯刑遇害，終於六極。謹尋某本命某某，命人以某，爲鬼行年某灾厄深重，云云。伏聞

身入福德之中，以上官典者垂神省理，分解年命，生月胎日，宿新灾厄，凶禍之氣，隨事和解，爲某上請三十二天帝君、長生司馬，代形度命，南昌元君、監生使者、各三十二人，乘飛龍羽車，三十二天帝，兵馬各九億萬人，一合來下，賚某金人紫紋，上詣三十二天，曆星檢宿，宮曹之中，貿名易形，更請真神玄元生氣下入某身中，更注上生籍，延命無窮。謹請延年益壽君各五人，官將一百二十人，一合來下，賚某代形金人紫紋信物，上詣太清玄元生氣宮，伏請下條星度算君、貿名易形君、脫死上生君，又請臣身中功曹使者、太陰考召君吏，賚某代形金人紫紋，上詣北斗太陰御女下一重冥宮，太陰典死籍庫壁櫃之中，貿某身名，易某身形，上名生籍玉曆之中，延命無極。又請魁魁君五人，官將百二十人，太皇萬福解患君五人，官將百二十人，三天解厄君、解害君各五人，一合來下，主爲某上解生年日月胞胎所犯日月五星二十八宿醜星惡宿，下解地祇禁忌五灾六害七咎八

難九厄十苦十二刑殺，願北斗七星削除某死名，貪狼巨門斷絕死源，祿存廉貞貿易死形，文曲武曲除籍死錄，天網破軍殺氣不加。願三台君解某行年六害過度疾病死喪之厄，歲月日時之厄，天地之厄，牢獄之厄，兵賊之厄，四時五行金木水火土之厄，千凶萬厄，盡乞度脫。請煩東極青華九玄上宮青帝、監生度命君、貿名易形君、神仙度世君各一人，兵士各九百萬衆，乘青雲羽車，飛行萬里，一合來下，賚某代形金人紫紋，上詣長生宮中，爲某貿名易形，更上生籍玉曆之中，青帝冠帶，延命無窮。重煩南極南昌宮中赤帝、監生度命君、貿名易形君、元氣受生君、神仙度世君各一人，兵士各九百萬衆，乘赤雲羽車，飛行萬里，一合來下，賚某代形金人紫紋，上詣南極長生宮中，爲某貿名易形，更上生籍玉曆之中，赤帝冠帶，延命無窮。重煩西極白素宮中白帝、監生度命君、貿名易形君、元氣受生君、神仙度世君各一人，兵士各九百萬衆，乘素雲羽車，飛行萬里，一合來

下，賚某代形金人紫紋，上詣素雲宮中，爲某貿名易形，更上生籍玉曆之中，白帝冠帶，延命無窮。重煩北極玄斗太陰宮中黑帝、監生度命君、貿名易形君、元氣受生君、神仙度世君各一人，兵士各九百萬衆，乘玄雲羽車飛行萬里，一合來下，賚某代形金人紫紋，上詣太陰御女下一重冥宮中、太陰典死籍庫壁櫃之中，爲某貿名易形，更上生籍玉曆之中，黑帝冠帶，延命無窮。重煩中央高皇三十二天玄都紫微宮中黃帝、監生度命君、貿名易形君、元氣受生君、神仙度世君各一人，兵士各九百萬衆，乘黃雲羽車，飛行萬里，一合來下，賚某代形金人紫紋，上詣三十二天始生元氣宮中，爲某貿名易形，更上生籍玉曆之中，黃帝冠帶，延命無窮。謹請某本命某并從官某人，千乘萬騎，爲某保守祿命，拘制三魂，滅除九氣，易形生神，安鎮宮府，長生無窮。又請某行年某并從官某人，千乘萬騎，爲某保延祿年，拘制魂魄，削死上生，安神定氣，永鎮生宮之中。願真君父母爲某上消天

上四方星宿之災，下散地上八方之禍，各保某祿命，上詣三天曹，解某身中真官考召，解脫羅網，削死上生，移名玉曆生錄之中，轉禍爲福，轉凶作吉，以德消刑，以福消禍，四時五行，金木水火土，雖復相殺，還復相生，戊己中和，神仙道成，願左右玄元始氣生活某。若犯天地水三官殃考，應還鬼伍者，願三台君解除。億基萬考，千咎百禍，十凶九厄，三災八難之中，特爲解救，增益算壽，更著生錄。願明曹典者，尋拔十方之內，某所犯宿連罪命衰厄所在，悉爲隨事和釋於三河四海、九江八極、天地水三官、百二十曹府、六律九章、泰山二十四獄、玄河北獄之中，拔贖某三魂七魄，女十四魄。還附身形。又請三天拔命君、度厄君、度命君、濟厄君各十二人，消災散禍君十三人，倉穀吏、樹木嗇夫、二十八宿、三百六十五度、周天八極君十二人，左右執法君十二人，官將百二十人、河畔六府、河伯水府、解厄掾吏三百六十人，又請中宮閑能兵士百萬人，一合來下入某身中，消

除行年本命十二禁忌，衝破拘元檢敗，大會小會、五刑九厄、五凶六害、九醜衰厄安定五藏，調和六府，百病除差。又請周鼎君一人，治大夫宮中，爲某和解曆紀，周旋八極，除死籍，上生名，超百二十生氣，延年不老。又請南上君一人，官將百二十人，治列庫宮。周玉君一人，官將百二十人，治地理宮中，衣綵朱袍，丹陽之幘，通天之冠。又請周鼎玉女千二百人，衣綵衣，一合來下，爲某致含生之氣，延年度厄，召還魂魄，附某身中，記生名，除死籍，乞生活。章上所請千二百官君將吏兵，并勅下某身所住所居里中，監察真官四野九野都平君，道上二玄三元四始甲子諸官君，十二水帝河平侯，所在神祇社稷，咸承臣今章御之後，乞某災厄過度，年命延長，四大休吉，道力扶持，元元安穩，以爲效信。恩惟太上分別，哀原臣愚。謹因二官直使、正一功曹、左右官使者、陰陽神決吏、科車赤符吏、剛風騎置驛馬上章吏、飛龍騎吏等各二人出，操臣謹爲大道弟子

某奏金紫代形解厄延命大章一通，上詣太上某曹治。

收魔夢章

具法位，

上言：謹按文書，某列訴千生有幸，得在

道門，以自保持，被蒙恩覆，闔門端正，每自喜樂。但以肉人奉法初淺，愆咎累臻，某自近已來，寢卧不安，眠則魘魅，又夢寤參錯，多見先亡後化往來，輒便驚魘，大小惶怖。依憑

大道請治，告臣求乞章奏，以自救護。謹爲拜章上聞，願乞

大道哀愍肉人，解除殃害。若有故氣太歲太陰大將軍，此時司命十二月建，前後八神，拘刑破殺，宅中伏龍，七獄掾吏、遲留逆殺、四面蜚功、懸尸六害、十二下媚，及客鬼寄住之氣，盡令消散。謹請萬神君五人，官將百二十人，主爲某却死來生，却禍來福，辟斥故氣，精崇注鬼。重請天昌君，黃衣兵士十萬人，主收某家中外強殍、十二刑注、夢寤之鬼。重請太陽君一人，官將百二

十人，治佐蘭官，主治眠卧不安，驚怖之鬼，皆令銷却。若有塚墓十二塚訟強殍，復連一切，盡以三氣除之，解絕復連，不得爲後生人作精崇。重請天中敢健吏兵君，官將百二十人，主收捕某家先亡遲留逆殺考害之鬼，付女青北獄治罪。某身中所苦，悉令除差，卧得安貼，不復驚魘。恩惟

為亡人首悔贖罪解謫章

具法位，

上言：謹按文書，某乙素以下官子孫，運會有年，遭逢大化，操信制屬，以自保治，蒙恩覆蓋，大小慶慰。而以頑愚，修奉多違，以招考罰。頃來轆軻，凡百無善，某身疾病，從來云云。伏自考思，精崇所由。恐亡人某生時犯罪，不忠不孝，不仁不慈，姪情嫉妬，罵詈咒詛，牽天引地，叫喚神靈。或貪財盜竊，枉剋非理，改動所作，凡百無善，致收大考，繫身后土。恐亡歿之後，被受重謫，魂魄考對，結在三官，徒刑作役，楚毒備至，不堪困苦，逮累生人，致令某

家基考復注，殃禍不絕，生死困辱，不自解免。元元之情，憑恃道氣。某今備條某生時罪狀，首列詣治，并賚某物，以立心信，拔贖某生時所犯百萬之罪。臣以頑闇，不明鬼氣，謹承某辭，伏地拜章上聞。唯願

太上大道、天師門下典者，特垂愷悌之恩，察臣所奏，乞依

太上首悔之制，爲某家亡人某隨事和釋，解散考謫重遣。功曹使者，賚某信儀，遙詣

三天曹，按某生時所犯，隨原料剔，削除刑名，絕滅事目。謹請太玄真符攝下女青詔書，地下二千石，丘丞墓伯，十二塚神，泰山二十四獄，中都大獄，天一北獄，皇天九平獄，天地水三官，河侯河伯，將佐掾吏等，一切放某等魂魄，使還附尸骨，免離囚徒困苦之中，得上屬天曹和樂之地，斷絕殃注，滅除死籍。若某生時有犯五盟七詛，更相拘牽，結逮不解者，某乞丐一切解罷釋散。某家從今以去，令生死安穩，門戶隆利，疾病除差，以爲效信。恩惟

太上分別。求哀。

賣亡人衣物解罪謫遷達章

具法位，

上言：謹按文書，某列素以胎生肉人，下官子孫，千載有幸，得奉

大道，兼蒙恩育，賜某大小百官重錄，參佩內外，光顯非分，實荷罔極。但某等肉人，生長季俗，不能承科，奉戒多違，招延考罰。亡過某前得疾病，不蒙原赦，以某年月日謝命三官。從此已來，疾氣云云。恐某先身宿緣，及在世之時，所行罪惡，新故乘釁，及存亡考負，魂魄繫對，在三官困苦之中，不堪憂惱，注逮生人。某大小痛死憂生，無復情計，不知立何功德，以相拔贖，謹賚某生時服飾某種衣物，以贖某死魂，重謫斷絕，復連歸命。告臣求乞章奏，上如所列。臣以

大道慈化，憐生愍死，歸向之民，存亡戴賴，最以幽繫之魂，有昇遷之慶，法輪開度，化生人道。某丹心惻盡，敢緣慈恩，仰希照潤。謹冒清正，拜章上聞，唯蒙

太上無極至真申臣所奏，原赦某先身今世，特垂料省。謹爲上請素車白馬將軍，兵士十萬人，又請太玄君一人，官將百二十人，主知某魂神閉繫所在，若長淪三徒，名書六天，願盡爲度脫。重請仙官大歷君，官將百二十人，治西水宮；重請太玄真符，告下天地水三官，女青詔書，地下二千石，丘丞墓伯，十二塚神，泰山二十四獄，中都大獄，天一北獄，皇天九平獄，東嶽泰山地獄，南嶽衡山地獄，西嶽華山地獄，北嶽恒山地獄，中嶽嵩山地獄，北都寒池牢檻諸獄，九江水帝，河侯河伯，將佐掾吏等，一切放某魂魄，削去罪目，解除刑名，放囚出徒，沐浴冠帶，遷昇福堂，反胎化生，還於善門，絕死注於六官，上生名於丹籍，賜某等大小所苦，並蒙除愈，口數無他，向願從心，以爲效信。生死千罪萬過，唯乞原赦。恩惟太上分別。求哀。

滅度三塗五苦鍊尸受度適意更生章

具法位，

上言：謹按文書，臣以凡愚，先身功微，

雖生人道，履於穢世，塵濁所染，自分淪胥，絕望天路，皇極哀矜，未見刑辟，闕闕僥倖，得參三景真經。雖志自克勵，而爲尸蟲所纏，累在嗜欲，觸事違戒，加值今陽九運促，驅除已及，功沒罪見，未能自拔，常懼一旦奄忽無期，雖念自新，而結縛未解，善緣未至。敢以刑餘之命，於三掠之門，冒陳警誠，干忤天真，追念悚息。臣某等誠惶誠恐，頓首死罪死罪。臣竊見經旨明戒，有可憑恩。經言：自非先身有善，累劫之功，名書瓊簡，不得妄見寶經。預以見者，皆應昇度。或功德未足，生死未充，未得白日飛騰。或託尸解，暫經太陰，魂神受對，寄形地官，因緣期訖，得還故宅，一時俱昇。如靈旨所誠，則奉法者，猶有可冀。是以愚臣敢申所見。即日有某郡縣鄉里某，年如干歲，本命某甲，某帝領籍，某月生，受命某天。某在世之時，闕闕好慕，詣道士某，登壇結盟，奉受三景洞經，供養禮拜，時修齋直，但某身履下世，穢濁所牽，功德未滿，滅根未絕，如靈旨所期，某雖形滅，應在尸

解。恐某因緣未定，先功未充，以某月日時以疾去世，託滅太陰，形寄土官。今停柩殯宮，須待良辰，遷還蒿里。功德未足，未便早遷，恐爲土府所見驅逼，不相容安，魂飛魄揚，尸形匪寧，搖動考對，注連復生。臣宿世因緣，與某忝結天親，俱處末俗，私心憂念，雖靈契有定，臣猶不自安。嘉荷任之日，以開度爲先。今仰憑

無極天尊、元始大化、明真之旨、正一之科，謹爲攝齋，拜章上聞。願

大慈哀矜，原除某前身及在世時所犯罪釁，諸有三塗之根，五苦之結，在三官九府考屬執罰之曹，神兵力士鎚杖之下，刑係刀山劍樹，九幽長夜地獄之中者，乞申臣今章，告下三官，賜以某生時建善之功，拔度魂神，還復故形。若某神離魄蕩，尸肉朽腐，願五帝尊神還其肌膚，養復魂神，三光飲哺，注以洪泉，通其榮衛，潤以血氣，應轉者轉，應度者度，應生者生。願某所屬某嶽某山真靈正神，爲符下九土地官，各依部界，供給有無，一如明真科旨。當使形安

神守，魄不蕩散，頓消罪源，精神還復故宅。乞臣章御之後，某復受生鍊尸，還復故形，上補真仙。伏願

太上門下典者，申臣翹翹之心。所奏蒙御，開度幽冥，上願

天慈造化，無量大恩，下使臣愚念不辜。恩惟

太上分別。求哀云云。爲某拜上滅度形神、拔出三官九府三塗之根、五苦之結、開九幽地獄、還復魂神、鍊尸受度、適意更生章一通，上詣

太上某宮曹治。伏須告報。

出喪下葬章

具法位，

上言：謹按文書，某列奉法無狀，招延凶考，亡人某以某年月日沒命三官，安喪宅內某地，未得葬之。當以今月某日某時，權移某屍柩，從某地出，安埋某處。某奉屬清真，委誠道氣，不復從師卜問，懼爲太歲將軍、十二月建、鉤刑破殺、下官故氣、千禁萬忌所見傷害，求臣上聞，以自防護。臣按某爲道民，事與俗殊，送終葬死，無所忌諱，一心之民，在

可哀愍。謹請太素太始君五人，官將百二十人，又請葬埋吏十二人，一合下符，攝下女青詔書，地下二千石，丘丞墓伯，十二塚侯，及所經由里域路次禁忌之官，不得侵犯某家，當令某潛寧后土，精爽安穩附就，魁綱衆忌，一切消滅。要以某家死生無他，以爲效信。事訖言功。恩惟太上分別。求哀。

新亡遷達開通道路收除土殃斷絕復連章

具法位，

上言：謹按文書，某列素以胎生肉人，下官子孫，千載有幸，得奉

大道，被蒙恩覆，得全首領人口，某等誠用欣慰。兼蒙師道所見哀憐，賜署某大小天官錄治。荷恩隆重，實在罔極。肉人生長末俗，不能勤修，建立功德，上報恩澤，百行多違，罪過山積，招延考罰，家門衰頓，喪禍不絕。亡過某前得疾病，不蒙原赦，以某年月日命謝三官，從此已來，宅舍不安，鬼氣不絕，光怪夢寤，疾病云云。喪衰之餘，懼怖屏營，恐某等死時日惡，殃注不已，詣臣告

訴，求乞章奏，上如所列。臣接受陰陽造化而生，雖承九天之業，假備四大而成，生時相給，終畢相還，陰陽相配，雌雄相隨，陽唱陰和，男行女從，三萬六千神，眼爲生宗，受明日月，卯酉二門，在人爲神，去人爲鬼，人之將死，故眼睛光墮，左雄右雌，名曰土殃。從一至三，雄白雌黃，二七十四，毛羽飛翔。翅脚帶毒，動則輝光。口銜金殺，向人皆亡。東西緣緯，南北乘經，值遇太歲，太陰將軍、王耗之神，住不敢行。途路既塞，恐成灾殃。有犯重喪，奮羽吐毒，注害生人，死注不絕，緣此而興。

又恐某屬三塗，尸役地官，搖動驅逼，還逮生人。臣以師道正一嚴明，生死異世，不得相干。某生死氣逮，注復相延，如不解救，則存沒莫分。人命至重，枉濫難容。臣謹爲拜章一通，伏願師道必垂哀矜。願請仙官討氣君一人，官將百二十人，主爲死人某開通太歲、太陰大將軍，此時司命王耗，千禁萬忌，約勅四時之官，開通道理，不得拘留某精爽注復生人。又請北辰司馬都官從事

君一人，官將百二十人，誅殃君五人，官將百二十人，收捕某死時雌雄殃殺魁綱之鬼，復注之氣，疾速去離。某家各還本屬，四時之官，不得拘留，原某前身及今生在世時千罪萬過，千愆萬咎，悉皆赦除。某盟結既解，遷達魂神，去離三塗五苦，還昇福堂，衣食自然，利祐後人，不得更相戀慕，復連殃注，於今斷絕，地官衛尸，神還更生。並賜某家從今已去，大小某等疾病陰私除差，門戶安穩，生死受恩。恩惟太上分別。求哀。

新亡灑宅逐注却殺章

具法位，
上言：謹按文書，某素以胎生肉人，下官子孫，運會有幸，得染清化，常蒙恩覆，誠自歡慰。但肉人闔門頑愚，施行多違，招致考罰，頃年以來，家居輻輳，喪死相係。某抱病疾，以某月日死亡，恐某死亡之日，注復生人，有土殃惡氣，喪車魍魎雄雌之鬼，盤停宅內，傷賊不已。肉人惶悸，無復心膽，告訴向臣，求乞請除宅中注殺，安神定氣，上如所

列。臣按人死之日，魂魄流散，化成八殺，雌雄咎注，喪車魍魎，或出或上，還重殺害，纏綿宅內，伺候衰缺，復欲中傷，注害生人。謹爲伏地拜章一通，上聞，特從大道迴神降福，流清蕩濁。謹請天中敢健吏兵千二百人，又請逐注鬼禽奇君、水坦吏各一，合來下某家宅舍之中，收捕虜尸注鬼，雌雄客殺，喪車魍魎，一切絕滅。又請却殺將軍十二人，一合下到某家宅中，收却百二十殃殺之鬼，并勅某家所居里中真官注氣，并守宅三將軍，二十四吏，兵士三十萬人，各豎兵刃外向，繞宅三重。又請神水使者與請官併力掃灑宅中神水，雲行萬里，清嚴宅內，蕩除尸穢，衆官備衛，神明鎮守，并遷某臨亡之時報殺將軍，功成事訖，各還天曹，列受功賞。并請安宅、穩宅、鎮宅、清正吏一合下，安鎮宅舍，保護人口，使復注絕滅。肉人千罪萬過，生死所犯，一乞原赦。恩惟太上分別。求哀。

受官拜章

具法位，

上言：謹按文書，某素以下官之餘，胎生下愚，遭遇開泰，得在民次，猥蒙天地重光之覆，得預階倫。昔處在某朝，職滿被銓，遷報某位，王命已行，不敢稽闕。當以某日拜受板印，仰憑大化清淳之氣，奉發之日，不問時王，歸情師道，告臣求哀。謹爲伏地拜章上聞，爲某上請朱雀君一人，官將百二十人，治洛平宮，主萬民和合，賓客人衆，飲食皆令笑喜，無有怨惡。重請位官受爵君，官將各百二十人。重請四方夷蠻戎狄君，官將各百二十人，一合下，營衛某。受拜板印之後，辟斥衆災禁害之氣，使某職顯易遷，居官清利，安穩無他，以爲效信。所請君吏，謁言上官，中宮錄署，無令恚恨。恩惟太上分別。求哀。

臨官莅民章

具法位，

上言：某以下愚，誤蒙大恩，爲時所銓，顯叙某縣。王命既加，當親民物。便以

時世僞濁，人鬼互權，肉人功薄，無以

禳災。今月某日，啓邁即路，尅用某月日到境入界，仰恃道氣，不敢卜日間時。入境之日，爲土地精靈、符師社廟、飲食故氣、太歲將軍、道上禁訶、五行王相、魁綱諸忌所見中傷，告臣自列，求乞防保。謹爲拜章，願上官典者，告下某里中土地真官、郵書驛騎、亭傳里邑，皆爲開通營衛某身。重請昌落君一人，官將百二十人。重請祐護將軍、萬福丈人、官將，辟斥衆災。解除禁害君一人，官將各百二十人，與四方夷蠻戎狄君吏各一合來下，同共營衛某身，太歲將軍，四時王耗，千禁萬忌，使某到境入界，安穩無他，居官清利，口數康靖，在職遷顯，歲終如願，時君將吏，言功報勞。恩惟太上分別。求哀。

受官消滅妨害章

具法位，

上言：謹按文書，某遭遇時會，得在清化，身佩仙官，出入蒙恩，誠用光慰。某從某世已來，官爵相承，蒙國重恩。今

忝某職，以某日恭受王命，溥倚大道，不卜不問，不擇日，不揀時，持心而行。自受職已來，夢寤參錯，疾病更互，怪異妄生，不知何由。推按歲曆，天地六甲，受板日，某子值五離本命，某子行年甲午破子，以十一月受板。復是衰月，太歲某，刑殺在某，墓殺在某，某爲刑殺，更相衝尅。時日所臨，下值六合，仍會六害。伏聞

大道無禁無忌，精誠不至不能，禳災却害，馳來告臣，求乞文書，謹以上聞，願以道氣下流。謹爲上請天閣君，官將百二十人，治安陽宮，主開除九天禁忌。某受命者，消滅之。請天王玉女千二百人，衣青衣，主收天下萬民，拜官受位，印金銀，通神明，却灾除害，身壽百歲，若某拜受之日，爲五離時，有妖惡衆害，悉爲消滅，乞上官典者差下所請。某中如干政君若府，云府中二十四政。若郡，云郡中二十四政。若州，云州中十八政。縣，云縣中七政君。一合併力爲某禳却衆惡，消滅禁忌，在官無他，論議合德，吏民歡心，時蒙遷位，歲竟安穩。如願之日，

所請天官，言功報勞，不負效信。恩惟太上分別。求哀。

遷臨大官章

具法位，

上言：謹按文書，某素以胎生肉人，枯骨子孫，昔以樂化制，屬

大道以自保治，蒙恩端厚，常自喜慰。

某胃胤之門，世以仕官爲業，累爲某官，綜治王事，名績顯著，今還某職，非某肉

人所能披致，仰感大道覆載之祐。某官處在機要，或在塞外云云。職攝百國大

政，君臣多是強勢，吏民權下，悉皆習滑，又多獄繫，枉直難明，懼文失中，遭

罹譴負，歸誠

大道廣納之施，訴告向臣，求乞文書，以

自保護。臣忝荷重任，不勝肉人告訴之至，謹冒清嚴，拜章上聞，願垂矜祐。

謹請東九夷、南八蠻、西六戎、北五狄君各十二人，將吏兵士及時下，圍繞某

所住宅，俠從左右。重請萬福君五人，官將百二十人，主辟斥故氣精崇，咒詛

媚固，使却死來生，却禍來福。重請大星君五人，官將百二十人，治石仙宮，

主制百姓口舌，讒謗不行，收正其位，令百姓吏民相見笑喜。重請祐護將

軍、萬福丈人，官將百二十人，主營衛某身。重請青蒼君，官將百二十人，治巨

門宮，厭官怨讎刑禍之氣，止之不到。願上請天官時君，將吏一，合同時來下

某州郡縣鄉里舍，各隨所主，擁護某身，辟斥邪精瘟毒疫癘之氣，謀議媚固，皆

令消滅，使某心開意，悟五神聰，了所言者，當所作者，允如千百口，皆爲伏諾，

蘊積唯新，闔門平安，歲終舉善，公私隆利，以爲效信。當爲時君將吏言功

舉遷，以報勞苦，肉人大小千罪萬過，並乞原赦。恩惟

太上衆真分別。

保護戎征章

具法位，

上言：謹按文書，某列素以胎生肉人，下官子孫，運會有幸，遭逢大化，被受

恩覆，誠用欣慰。但以頑愚，罪過山積，常招禍崇。云云。道里長遠，行經江

山，歷涉淮泗，方向凶敵，白刃之中，鋒毒既交，酷加文武。又軍法嚴峻，動有

梟戮，妨惡持權，脅人爲暴。肉人功薄，無以禳災。恐某當此厄難，不能度

脫，元元之情，憑恃道氣，詣治告臣，求乞祐護。謹爲伏地拜章一通，上請東

方九夷君、南方八蠻君、西方六戎君、北方五狄君各十二人。重請千里君、

萬里將軍、祐護將軍，共營衛某身，隨逐覆蓋所在之處，常令安穩。辟斥衆災、

疫癘鬼賊，使某白刃不加，度脫厄難，官中清利，無他譴負，以爲效信。當爲時

君將吏言功報勞。恩惟太上衆真分別。求哀。

赤松子章曆卷之六

(尹志華點校)

069 太上宣慈助化章

經名：太上宣慈助化章。唐末道士杜光庭編集。五卷。底本出處：《正統道藏》洞玄部表奏類。

目錄

卷一

救急解計章

南嶽魏夫人生筭度厄章

卷二

道士悔謝章

道士解過章

道士遷考章

道士犯籙解謝章

道士遠行章

舊事道中絕於法契闊章

斷四面口舌章

疾病定氣章

道士天地水三官手書籙狀章

伏誓從道乞丐一生章

疾困延命章

請命章

疾病丐過請命章

困急日中上請命章

禁魂魄章

疾病却三官死解章

卷三

收犬子鬼章

斷除非所祭祀鬼神復連章

為疾病分解存亡盟禱咒詛章

生筭度厄章

卷四

元皇上品六合生筭章

卷五

三天請命章

太上宣慈助化章卷之一

廣成先生杜光庭集

救急解計章

凡人年有年災月厄，筭盡相臨、本命祿絕、行年妨害，宜奏此救急口章，災難消除，福祿立降。晝東向，夜北向。

銀環一雙，筭籌一百二十枚，青絲縷一丈二尺，信錢一千二百文，命米一石二斗，命繒二丈四尺。

次發爐

次長跪出官

泰玄都正一平炁，係天師陽平等二十四治，臣某稽首頓首，再禮

上言：謹案文書，今有某州某縣某鄉某里某觀弟子某，行年若干歲，戶口若干人，居住此處，即日叩頭，請福乞恩詞，肉人素質胎生，百官子孫，千載幸會，得奉

太上大道諸君丈人，受命皇極，自保生治，良由肉人某闔門大小頑愚，施行多違，招延不利，比年已來，輻軻不安，某

家口衰厄，錢財耗散，妖怪竟起，恐有某三灾九厄，頓集軀形，爲天羅所纏，地網所繞，壽命短促，年筭窮訖，死名解奏三官，又塚墓土絕，令先亡擾動爲殃，注復連所見，訟逮生人，且今世濁惡，百邪凶暴，鬼賊交行，百病殺害，平人死者狼藉，哭聲盈路，不可聽聞，肉人處在其中，無功自拔，深恐奄充灰壤，不自存保，無方爲計，推以一心歸命

大道告訴，向臣求乞章奏，解除某生命所犯三灾九厄、羅網纏縛，請贖應死之命，如所列訴，臣以下愚，不明鬼炁，恐某身爲六害，更相尅賊，又恐妖殍所見侵枉，又爲先亡後死，中外鬼賊塚墓之炁所可列逮，太山府君所可橫召，某誠復罪穢，但雀鼠之生，從道求哀，伏聞太上大道，慈育羣生，無不救拔，延命度厄，惟在恩覆置詞請命，露出中庭於太陰之下，北斗之前，伏地拜奏口章一通上聞

天曹，伏願

無極太上老君、太上丈人、三師君慈父

聖母，丐無極之恩，原除某年生已來所犯萬死之罪，萬愆之過，九厄之期，一切除蕩，乞某一生一活，一度一脫若三命已盡筭紀訖窮，特賜其短中得長，敗中得成，危中得安，厄中得濟，迴停漏刻，申借一期，請某本命生月神部，各領千乘萬騎，救解延命之厄，即爲排天，迺致書乞丐子午之筭，倍年百二十歲，乞爲肉人代名易形，削除惡簿，易短爲長，願轉化推移，展轉窮年，推於魁綱之下，更相拔贖，若某年命薄弱，當爲延續，倉穀乏少，增其斗斛，樹木枯槁，爲傳膏澤，若三壽短促，增其延續，若年命不長，增其筭祿，輒勞神兵功曹使者，賫持某年命簿帳目錄，上達

玉帝，几前隨事，爲對司命門下，分別料度簡書，乞除刑止殺，若某身壽有限，其度促短，九厄並會，身行多違，贓滿罪定，應允驅除，三命欲盡，三解已報，玉曆無籍，左契無名，三元無錄，司命輟籍，南宮不收，天帝不原者，乞丐除之，三月一時，三歲一期，都會周而復始，如蒙省理，則受師老再生之恩

主，爲某上請文昌宮中壽命君，次請南昌益筭君拔命君，各五人，官將各千二百人，一合來下，主爲某延請生命，增益壽筭，永保存活，又請

太上玄元始炁宮中請條星度筭君、轉名易形君、脫死上生君，各五人，官將千二百人，一合來下，與臣某身中功曹使者，太陰之下考召君吏，爲肉人某，上詣

北斗御女宮中主爲拔贖死籍，轉名易形，又請東華宮九龍符命告下五嶽仙公，勅水官河伯呂公子等，太山二十四獄掾吏。三台，八座司命，解除某身中罪，考一切和釋，爲拔出三魂七魄付與身中，不得放逸，請拘魂制魄君五人，官將千二百人，又請東方七童子，拔魂魄吏萬二千人，爲徑詣玄陰御女宮中，主爲拔贖某三魂七魄，拔出三命，永保生活，又請南昌主真君五人，官將千二百人，一合來下，隨臣章上詣

太浩天曹司命韓君門下玉案上，主爲某却三官死解，更定生名，度著左契玉曆神仙簿中，延年無窮，又請魁綱君五

人，官將百二十人，主爲某身上解生月胞胎，生日所犯五星二十八宿，下解孤虛滅沒之厄，五灾九厄之炁，賜純陽生炁布潤某身。所苦千灾萬痛，應章除差，恐立命以來犯觸天地四時。五行十二時辰，二十四神，天綱河魁，太一從魁功曹，傳送大吉小吉，勝先神后太衝，徵明青龍白虎，朱雀玄武，騰蛇天后，太陰天一，貴神日遊月行，千禁萬忌，殃考深重，應充鬼伴者，願七星君，次爲消除之，貪狼巨門，除斷鬼源，祿存廉貞，代名易形，文曲武曲，除却死錄，天綱破軍，斤却妖羣，使不加入，三台主除墓，考千罪萬過，十二刑殺之鬼，一切消滅，所患除愈，願上官典者，爲通行省理，令章上詣

三天曹，分別某家昔世已來，九玄七祖，父母及某身積行所犯頑逆醜惡，非人所行，淫色盜竊、違天負地，形禱咒詛、復連之炁，并肉人某身行年本命諸灾厄衰禍之炁，次解除五刑六害，短壽之厄，延年益筭，六甲六十日旬，陰陽六十神，各自驅使，檢統四海八極，十四

州九十郡，一千二百縣、萬二千鄉亭、萬二千里域之中，推某身所犯，並是何罪何事，在何宮在何司，何府何神所噴，爲何鬼所言，爲何考所逮，乞所召君將吏兵，上詣

三天曹道行之處，次爲和釋消滅之，使天無文書、地無簡籍、水無盟誓，一切爲原之。重請倉火玉女千二百人，各衣珠玉雜色之衣，三環結角，主爲某延年益壽，添倉益庫，更加壽筭，起百二十神炁，流布某身中，上昇泥丸，下治絳宮，養育根元，補護年命，乞醫理疾，病豁然除差，登行道路，又請玄老大將軍十萬人，玄老使者百萬衆，又請三天太上玉女千二百人，三環結角身著五色玄黃衣，足著師子履，三天上來下，口含雄黃之藥，手捧玉漿，吐哺真炁，共來濟療肉人，某身從頭至足，緣肌纏脉，和調六腑，筋骨充滿，百病除差，夢寤真正，得度九厄之中，主爲某身中上解除天厄。下解除地厄，次解三天星辰之厄，次解胎月之厄，次解生日之厄，次解年衰筭盡之厄，次解嫁娶移徙葬

埋犯觸十二時神之厄，次解大將軍太歲太陰十一月建王之厄，次解行年絕氣之厄，次解違天負地之厄，次解元辰衰否之厄，又恐某身本命衆厄兼會，有五方，驅除夷蠻戎狄及中外強殄，四面咒詛，尅害，致令肉人疾病厄困萬痛加某身，命在時尅恐不免三灾九厄之中，雀鼠之命，畏死貪生，重請三天解厄君五人，官將千二百人，又請太皇萬福君五人，官將千二百人，主爲某身於九天之下、九地之上，檢尋某筭籍，主知禍崇根元，灾厄深淺，一切悉爲和合，次消滅之解而度之，乞丐肉人某身百病去體，十善來親，千灾消滅，萬福唯新，重請南昌君五人，官將百二十人，攝錄肉人身中三尸九蟲，無令越逸，伺人罪過，佐助未周，牽引外邪，陰改賊病，一時消滅，願上官與者隨事料理，所請天官，以時差遣君將吏兵，各攝所部，盡除惡害，收捕邪炁，解除和釋，衆精魍魎，奇鬼妖魅，託形諸雜，神鬼盤固不去者，請天中敢健吏兵士千二百人，一合來下，到肉人居宅里中，收捕精祟萬

邪為害，令內外清潔，神明防衛，特乞某身康體健，真炁降流補潤四支，寧安五藏，調理百關，厄中得度，死中得生，徹滅短籍，著名長生玉曆之中，千罪萬過一切赦除，蒙恩之日，臣謹仰宣妙法，勸喻肉人，修善改惡，伏從科戒，不使復犯天官，營護有勞，隨臣都章，言功舉遷，以為效信，恩惟

太上省理，分別求哀，臣愚謹因二官直使，正一功曹，左右官使者，陰陽神決吏，科車赤符吏，剛風騎置史，驛馬上章吏官各二人出操，臣謹因拜救急口章一通，上詣

太上三天曹，伏須告報，臣某誠惶誠恐，稽首頓首再拜以聞。

臣姓某屬某州某縣某觀

泰清玄元無上三天無極大道太上老君，太上丈人，天帝君九老仙都君，九炁丈人，百千萬重道炁千二百官君，太清玉陛下，

太歲某年某月某日某時章某處拜上。

可漏用全紙一張為之。

大清玄元無上三天無極大道太清金闕玉陛下
具章奏法位臣姓某
上奏謹封

內方函

謹 謹 上 詣

具章姓某謹重封

太上虛無丈人官某曹治某官

外方函

謹 謹 上 詣

具章奏法位姓某謹重封

三天門下請進

南嶽魏夫人生筭度厄章

泰玄都正一平炁，係天師陽平等二十四治炁三洞道士臣某，稽首頓首，再拜上言，謹案文書，今有某州某縣某鄉某里某官弟子某，即日叩頭乞恩，禳灾解厄救病，斷絕外殍，復連安神定魄章詞，但弟子某千生有幸，得奉

大道太上諸君丈人道家法，因玄都香火以自保護，得在清化，誠用忻悅罔極之恩，但由弟子某胎生頑愚，不閑科典，奉道多違，招延考逮，比來輾轉，宅舍不安，鬼毒臨守，人神虛耗，錢財支散，田蠶不收，六畜損傷，人口疾患，灾厄相仍，常常夢寐，與先亡混雜，卜決云是太祖父母、伯叔兄弟、姑姨舅氏姊妹諸

房，腥臭死鬼，遽相牽引，共來為祟，致令弟子某身及家口大小，卜夢凶醜，所見非真，且見今時鬼賊流行，枉暴良善，遭罹病疹，死亡者眾，弟子某家口大小，處在其間，慮不免脫，驚惶恐怖，告請無方，唯以一心，上憑

大道，求生乞活，告訴向臣請乞章奏，以自禳解，小臣下愚，不明科法，依案天師千二百口章，考問精崇所由，弟子某口辭，自列卜決，唯言有先亡後死、太祖父母、伯叔兄弟姊妹、姑姨舅氏諸親外殍等鬼，各以往歲疾病死亡，或值日惡時凶，今來為祟，尅病生人，弟子某身及家口大小，灾厄困苦如此，或生名不定，或名入死解之中，今為追解，上計生筭，延年度厄，救急治病，乞得除却死籍，定上生名。生屬年名本命生月於此云但弟子某家口大小等，所有連星筭盡，上計衰厄，乞為延度，某身等或以子歲上計，丑歲上計，寅歲上計，卯歲上計，辰歲上計，巳歲上計，午歲上計，未歲上計，申歲上計，酉歲上計，戌歲上計，亥歲上計，乞為解除之，定上生名，簿

籍玉曆之中，魂魄歸附，灾厄度脱，疾病除差，家口大小，乞得平安，無他，又恐弟子某家口大小等，或以正月上計，二月上計，三月上計，四月上計，五月上計，六月上計，七月上計，八月上計，九月上計，十月上計，十一月上計，十二月上計者，並乞次第爲解除之，所有灾厄疾病之者，立蒙度脱，除差了了，人口平安，免灾度難，若弟子等或以子日上計，丑日上計，寅日上計，卯日上計，辰日上計，巳日上計，午日上計，未日上計，申日上計，酉日上計，戌日上計，亥日上計之者，乞真炁兵士，主爲弟子等，以次解除之，定上生錄，保護家口，乞得疾病除愈，衰厄度脱，鬼炁消滅，人口大小，平安無他，又恐弟子某身及家口大小等身，或以建日上計，除日上計，滿日上計，平日上計，定日上計，執日上計，破日上計，危日上計，成日上計，收日上計，開日上計，閉日上計之者，並乞真炁君將吏兵，次爲解除削落死籍，定上生名，灾厄度脱，復連斷絕，疾病除差，人口平安，又恐弟子某

身及家口大小，或以正月上計，死忌在寅，二月上計，死忌在卯，三月上計，死忌在辰，四月上計，死忌在巳，五月上計，死忌在午，六月上計，死忌在未，七月上計，死忌在申，八月上計，死忌在酉，九月上計，死忌在戌，十月上計，死忌在亥，十一月上計，死忌在子，十二月上計，死忌在丑，如上等忌疾厄深重，乞丐

大道真炁官將吏兵，次爲弟子垂慈，解除死籍，定上生名，或恐弟子某身及家口大小等，爲太歲所臨月厄，所守三魂七魄，閉在太山北獄之中，或有太陰大將使風伯雨師，自稱太歲太陰太陽大將軍，北時司命，十二月建，自稱官號，時遊天下，地上步從，鬼兵歌樂，羣行相隨，吹角打鼓，把旗執節，自稱符廟社稷，自稱宅中竈君夫人，自稱土公宅龍，自稱兵獵逢契李邀之鬼，交通千鬼萬神，天下地上百二十種刑厄，恐來害弟子某家，致令遭染病患，精炁離身，魂魄不附，灾厄相守，所向乖違，官橫肆起，如此困苦，切急憂惶，恐不免脱，告

請元元，情在可愍，臣不勝所見，謹冒罪伏地，拜奏救急解計治病口章一通，上詣

天曹，恩惟

太上老君太上丈人，天師女師三師君夫人門下典者五炁君等，留念小臣所上文書，以時上達

天府，乞真炁下流，覆蔭弟子某身及家口大小，良賤平安無他，永保元吉，弟子某家大小，所有深灾重障疾病之者，早蒙除差，度脱無餘，復連外辟遊逸諸鬼，並乞消滅，宅舍安泰，凶神惡鬼遠避他方，不相謀議，出入經行，善神扶衛，水火爲滅，金石爲開，仰銜罔極，謹爲上請東方九夷生筭君一人，官將百二十人，上請南方八蠻生筭君一人，官將百二十人，上請西方六戎生筭君一人，官將百二十人，上請北方五狄生筭君一人，官將百二十人，上請中央三秦君一人，官將百二十人，上請中央三秦戊己生筭君一人，官將三十九萬人，今所請天官君將吏兵，一合來下，主爲弟子某身拔出魂魄，恐閉繫在其星宮之中，或在角亢氏房心尾箕，斗牛女虛危

室壁奎婁，胃昂畢觜參井鬼，柳星張翼軫，魁魍魎魍魎，二十八宿，三十五星官等，一合來下，主爲弟子某身及家口大小，上解天羅，下除地網，消灾度厄，斷絕外殍，復連之鬼，並令破散消滅無餘，病者除差，食飲通利，還顏復色，四大調和，平復如本，人口大小良賤等身，各乞扶祐，安隱無他，所向元吉，仰荷重恩，謹爲上請正月寅上解繫大將軍一人，兵士十萬人來下，上請二月卯上解繫大將軍一人，兵士十萬人來下，上請三月辰上解繫大將軍一人，兵士十萬人來下，上請四月巳上解繫大將軍一人，兵士十萬人來下，上請五月午上解繫大將軍一人，兵士十萬人來下，上請六月未上解繫大將軍一人，兵士十萬人來下，上請七月申上解繫大將軍一人，兵士十萬人來下，上請八月酉上解繫大將軍一人，兵士十萬人來下，上請九月戌上解繫大將軍一人，兵士十萬人來下，上請十月亥上解繫大將軍一人，兵士十萬人來下，上請十一月子子解繫大將軍一人，兵士十

萬人來下，上請十二月丑上解繫大將軍一人，兵士十萬人來下，今所請十二月解繫將軍吏兵等，乞願具官一合來下，爲弟子某身及家口大小等，所有深灾重疾，次爲除解，或年中之厄，月中之厄，日中之厄，時中之厄，並乞真炁一切除解，超然過度，永保元吉，重請北方上仙解厄治病功曹千二百人，謹請素男素女十二人，謹請南昌宮河洛抽魂拔魄君一人，兵士千二百人，上請天醫治病功曹十萬人，地醫治病功曹十萬人，一合來下，主爲弟子某身及家口大小，解脫羅網，過灾度厄，拔出三魂七魄，付與身中，悉令備足，灾厄度脫，病患除差，了了無餘，先亡後死外殍等鬼，永辟異方，凶人謀議，一切消滅，乞使眠夢真正，宅舍清寧，大小家口，被蒙清吉，安隱無他，伏乞大道真官將吏兵士，爲弟子某等，於天地水三官、五嶽四瀆、三河四海、百鬼牢獄門下，求覓弟子某身及家口大小等，或年年窮筭盡之厄，魁綱加臨之厄，元辰勾絞之厄，五行相尅之厄，上從一厄，乃

至九厄百二十刑厄，次乞解除追攝魂魄，付與身中，即令痊差，如不見者，請爲約問，先代亡人三垢五墓門下，求覓弟子某身三魂七魄，女三魂十四魄，付與身中，如不見者，約問太山二十四獄之中，求覓某魂魄，付與身中，所有深灾重厄，千病萬痛，即蒙除差，千灾萬厄，究盡無餘，性命完全，平復如本，四支五體，三宮六腑，七竅榮衛，三百六十骨節，千二百形影，萬二千精光，五色琉璃，赤白在身若天倉乏少，益其斗斛，年命短促，加其筭祿，有不便者，請爲轉易，以短爲長，以青爲黃，當令壽命長延，灾衰永脫，所有病患，一切除斷，先亡後死，外殍等鬼，迴發善心，共相擁護，不相復連，人口平安，住宅清淨，出入通泰，所向從心，蒙如所願，被受重恩，小臣某所請天地水三官君將吏兵，主爲用力有功，隨臣三會都章，言功舉遷，不敢負信，恩惟太上省理，分別求哀，臣愚謹因二官直使，正一功曹左右官使者，陰陽神決

吏，科車赤符吏，剛風騎置吏，驛馬上章吏官各二人出操，臣謹爲弟子某及家口大小等，拜上生筭，解計度厄，禳灾治病，救急追魂拔魄，保護口章一通，上詣

太上三天曹，伏須告報，臣某誠惶誠恐，稽首頓首再拜以聞。

臣姓某屬某州某縣某觀

泰清玄元無上三天無極大道太上老君太上丈人，天帝君九老仙都君九炁丈人，百千萬重道炁，千二百官君泰清玉陛下。

太歲某年某月某日某時於某處拜上。

太上宣慈助化章卷之一

太上宣慈助化章卷之二

廣成先生杜光庭集

道士悔謝章

具法位臣姓某，誠惶誠恐，稽首頓首，再拜上言，某辭，千生有幸，得充治職，奉宣清法，醫治疾病，而以闇劣不曉鬼神之事，不能用心輔助師道，救療無方，以此獲罪，招罹灾考，疾患更互，所爲無可，所向不利，肉人輾軻，私心憂懼，告臣自訴，求乞救解，臣備師胤攸，攝是同謹承某辭，冒昧以聞，臣以某領戶化民，從來日久，或奉行違失，三氣錯亂，或功詭逋留，遷賞不達，或福儲天藏，不時輸送，或乞賜失理，怨恨者衆，諸如前罪，非一疊鍾考，加以致疾崇，願爲天地水三官考逮，君吏言功舉遷，遷上中宮，謁受功賞，署以使曹，無令怨恚，天曹典者，考申功過，垂恩寬宥，效其將來，千愆萬咎，一切赦貫，恩惟太上，分別哀臣愚劣，謹因二官直使，正一功曹左右官使者，陰陽神決吏，科車

赤符吏，剛風騎置驛馬上章吏官各二人出操，臣某謹爲某求乞，首愆謝過，請福禳灾恩章一通，上詣某曹，伏須告報，臣某誠惶誠恐，稽首頓首，再拜以聞。

道士解過章

具法位臣姓某，誠惶誠恐，稽首頓首，再拜上言，謹案文書，某以頑疏，奉道多違，雖忝法職，宣化無效，民物離散，救療逋遲，或知而故犯，意短不及，或因真行僞，前却法制，或領化民戶，恐動百姓，或吞臟啖罪，私用法物，或口恭心慢，輕傲師法，或稱教妄語，驅合虛詐，或迫人求錢，以輕作重，或宗室骨肉，不相和順，或門內父子，更相逆戾，或道義妒妬，淫亂穢濁，或暮晨罵詈，聲干清正，或心恚意怒，三五七九，長短失度，不秉六壬，更用六丙，背棄六癸，動向六丁，行氣錯誤，冒犯天忌，或恃寵自驕，不恤急厄，或見欲心蕩，託尊強求，飲酒食肉，姪色盜取，或吏兵有勞，不時舉遷，或凶險好鬥，持人長短，

或擅發陰私，評人曲直，或受化道辭，訕露幽密，或矯詐師老，驚怛愚俗，或評論真要，指形名道，或懷挾讎怨，走作考氣，或修飾自明，好己惡彼，諸如此罪，二十九條，其盡犯違，為玄司所糾，計愆量過，分足灰滅，大道崇寬，太上貴生，願垂憐者，乞丐生活，原赦千罪萬過之死，以明覆載之重，亦自克責，深脩法度，不敢以前為比，恩惟太上，分別哀臣愚劣，謹因二官直使、正一功曹左右官使者，陰陽神決吏，科車赤符吏，剛風騎置驛馬上章吏官各二人出操，臣某謹為某求乞，懺愆悔過，請命祈恩，寶章一通，上詣

道士遷考章

某曹，伏須告報，臣誠惶誠恐，稽首頓首，再拜以聞。

具法位臣姓某，誠惶誠恐，稽首頓首，再拜
上言，謹案文書某辭如右，胎生肉人，少不經學，大義不通，前以樂化，制屬大道，荷受殊恩，得充治職，化民領戶，出入有年，誠自喜樂，肉人無知，未能

報稱，誠恐負冰流汗，某伏自惟省，人輕任重，耳目閉塞，在職初淺，不曉科禁，奉行多違，無狀所致，以某年月日卒得疾病，未蒙除差，克己思愆，不自分解，惟懼罪過，深積醜惡，上聞

天曹典者遣考，召吏兵下，在某家考治某身，加以楚毒，晝夜考掠，不得休息，呼吸之氣，命在絲髮，某家大小惶怖，恐不生活，某在職以來，上不敬天地，下不孝父母，不順師法，多惡少善，多逆少順，多嗔少喜，觸犯天地日月星辰，違背五行王相四時禁忌，穿掘平地，填井塞瀆，或壅障水流，斷絕道路，伐樹殺生，採巢破卵，或陰行賊害，盜取人物，或枉殺羣生怨滿道路，或輕慢天地，呼謂無神，或取人財物、抵戾不還，或掩人之善，揚人之惡，或背真妄語，岐咽兩舌，咒詛罵詈，顛倒無道，或借使貧人，以利家私，或好色姪通，姦人婦女，或隔戾妬妒，憎嫉勝己，所為不當，所行昧理，致招重考，收魂縛魄，五毒慘至，分當萬死，彰示遠近，自知罪重，謹隨事首列，不敢藏情，有所遺脫，少得

蘇息，絡繹自改，疏洗腸胃，披析筋骨，不敢以前自比，肉人歸命，誠可哀傷，臣謹承其辭，觸冒湯火，拜章上聞，乞賜典者，垂恩料省，肉人以伏以諾、考召君吏有功，願還

天曹、受賞進入中宮、謁署便曹穩職，如常科比，無令怨恨，某雖罪定，應在灰滅，雀鼠貪生，志欲自改，願蒙原赦，更賜生命，除其愆責，許以後善，以某所苦和差還精復色，氣脉調理平復，以為效信，恩惟

太上分別，哀臣愚劣，謹因二官直使，正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣謹為某求乞，懺除罪咎，保衛病軀，恩章一通，上詣
天曹，伏須告報，臣某誠惶誠恐，稽首頓首，再拜以聞。

道士犯錄解謝章

具法位臣姓某，誠惶誠恐，稽首頓首，再拜

上言，某素下愚，以代務為業，樂化制屬，歸命諸君丈人道炁，被受大恩，得

充治職，佩受仙籙，領戶治民，宣揚正教，助國扶命，而某肉人生長濁世，少不經學，不具大義，奉法失中，施行有違，不忠不孝，不慈不仁，父母兄弟，不相敬順，貪財好色，飲酒食肉，舉動所爲，違犯籙禁，頃日以來，夢寤參錯，所見非常，家中不利，口舌橫生，肉人違科犯約，以致轆軻。心畏一旦，不自過度，謹觸冒湯火，貢章上聞，願請畢汝君一人官將百二十人，主爲某解犯籙上禁忌、飲酒、食肉，諸所違負，皆爲和解，千罪萬過，乞蒙原赦，某輒洗心濯志，改往脩來，敢如歲終無他，以爲效信，恩惟

太上分別，哀臣愚劣，謹因二官直使正一功曹左右官使者、陰陽神決吏、科車赤符吏，剛風騎置驛馬上章吏官，各二人出操，臣某謹爲某求乞，首雪愆尤，保安幻軀，恩章一通，上詣天曹，伏須告報，臣某誠惶誠恐，稽首頓首，再拜以聞。

道士遠行章

具法位臣姓某，誠惶誠恐，稽首頓首，再

拜

上言，某素百官子孫，千載有幸，得充治職，賜受天官吏兵，以自營護，非某頑賤所宜，被蒙奉化日淺，無所知識，夙夜戰灼，如臨深淵，今當到某處，經由嶮遠，世弊人僞，鬼氣未清，懼寇盜攻劫，行路詣臣自告，求乞上聞，謹爲某上請天官兵皇君一人，官將百二十人，搖天動地君九炁君十五萬衆，左馬君官將百二十人，各一合下，與某俱行辟斥姦邪，千凶萬惡，縣官口舌，不爲災害，吏兵所護，萬惡消除，攘却寇盜，通利道路，又請東九夷、南八蠻、西六戎、北五狄、中三秦諸君，各將兵士十萬人，及衣鐵履刃兵，滅亡水火兵，反甲逆鱗兵百二十萬人，九天兵符三十五官君，高麾大鼓赤陽十伐將軍兵十萬人，及四面真官注炁黃帝君，及營星君官將百二十人，同時來下衛某身，辟除群凶逆惡不軌之事，道中魍魎不正之氣，一切消伏，往還安穩，迴歸之日，爲所請官君將吏，言功平等，并所經遊郡縣，水陸鄉亭里域，監察考召諸君，道上二玄

三元，四始甲子諸官君，亭傳客舍，營署注鬼，四野九野都平君，山林孟長，十二溪女，九江水帝，河伯呂公子等，營護道路，使陸行通易，水行利涉，諸功勞者，至時還賞，不令違失，某蒙恩如願，以爲效信，恩惟

太上分別，哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置吏，驛馬上章吏官，各二人出操，臣某謹爲某求乞祈安，水陸保佑，行藏恩章一通，上詣

某天曹，伏須告報，臣某誠惶誠恐，稽首頓首，再拜以聞。

舊事道中絕於法契闕章

具法位臣姓某，誠惶誠恐，稽首頓首，再拜

上言，某下愚子孫，素修善道，昔漢運遷移，禮訓通流，某雖在俗，清法不墮，然鄰接下官，事與邪連，而某頑闇，功未足紀，爲惡鬼所見，侵尅頃來，家中多諸疾病，奴婢死亡，錢財損耗，考己思咎，不識所由，從道求哀，未蒙覆蓋，向臣自訴求乞文書，謹爲拜章以聞，願垂矜

省，臣以某家奉道彌久，當爲衆尊，所見覆載，而遇轆軻，不利之患，疑某失事，行違玄和，逆順顛倒，渾同凡俗，令三元四始，彌更清高，下官萬魅，以爲命主，一爾迷謬，尚不能自解，願蒙憐愍，一切原赦，使從今以後，所向隆利，衆疾消除，人口數端等，恩惟

太上，分別哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏，官各二人出操，臣謹爲某求乞，禳却裁衰，保安家眷，恩章一通，上詣

某天曹，伏須告報，臣某誠惶誠恐，稽首頓首，再拜以聞。

斷四面口舌章

具法位臣姓某，誠惶誠恐，稽首頓首，再拜上言，謹案臣枯骨子孫，生長荒俗，不閑道儀，謬以時乏，得補治職，當質對天地水三官文書，臣肉人頑愚，在職日月誠淺，多有違失，憂怖屏營，無所投厝，臣某稽首頓首，臣以某年月日受真一要言，實以闇昧，不能悉解養神受氣之

數，輒當奉順生世俗人，多有背向異辭，誹師謗道，口舌滋盛，詣臣各自以爲正，臣獲罪無狀，分當摧碎，不敢望生，被蒙諸君丈人之恩，謹伏地拜章上聞，願請無上青玄君兵士百萬衆，主收口舌，罵詈盟詛之鬼，重請南鎮六星君官將百二十人，周天越女兵三十億萬人，及時下收捕，惡逆不伏，謀議誹謗，諸爲口舌者，家到戶至，皆使和解，掩塞邪凶惡逆之謗，立時罷散，以爲效信，所請君將吏兵，及所在星中，四面注氣，監察考召諸君將吏，言功舉遷，不敢負信，乞重原臣身中前後所犯千罪萬過，臣盡力竭心，不敢懈怠，要以安隱無他，以爲效信，恩惟

慈父慈母，哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣謹爲某求乞，消除唇吻，孚佑形軀恩章一通，上詣

某天曹，伏須告報，臣某誠惶誠恐，稽首頓首，再拜以聞。

疾病定氣章

具法位臣姓某，誠惶誠恐，稽首頓首，再拜

上言，某素下官子孫，先人相承，酌祭群邪，不蒙其福，轆軻罹殃，歸命大道，以自存活，制屬以來，被蒙大恩，戶口端靜，實爲懽樂，而肉人施行多違，自從某年某月以來，連不安隱，四支沉重，卧多起少，夢寤參錯，或在靜室，穿敗之處，如對賓客，卧息其中，或登山越巔，或架車乘船，或懷恚恨，喜怒不節，或作鬼語，稱傳威教，或責望家中，道說百姓，或時悲哀，所作無端，淋瀝日久，一差一劇，骨肉消瘦，心畏一旦不自度脫，恐爲邪精所見，迷誤束首，向臣求自循省，臣以某雖佩清高，奉帶神籙，精誠微薄，志意不專，不能却邪除害，謹爲拜章，願請玄老大將軍十二人，官將百二十人，一合下某甲身，主收三官逆鬼，衆老之精，稱神出道者，一爲罷散，若某骨相與天相應，蒙差之後，進受中氣，願垂省察，分別真僞，邪惡精魅，消除氣候清正，以爲效信，恩惟

太上分別，哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣某謹爲某求乞四肢康泰，動履清安恩章一通，上詣

某天曹，伏須告報，臣某誠惶誠恐，稽首頓首以聞。

道士天地水三官手書籙狀章

具法位臣姓某，誠惶誠恐，稽首頓首，再拜

上言，某郡縣鄉里男女生某甲，年如千歲，謹條手書首罪，簿狀如左簿，狀之法一事一條，不得華辭文過，藏重出輕，若首而不盡，考官不解，一事以上，甲年如千，時所犯罪過，某年月日某時，某郡某縣某里男女生某甲，年如千歲，戶口如千人，某奉法違科，以某月某日卒得疾病苦厄是云云，至今不差，恐不生活，謹操手書錄狀，詣

泰清玄元無上三天無極大道太上老君，太上丈人都官君考行狀，六質六殼，二十四官君，天師嗣師系師三師君門下將吏所在郡縣治中，四面注氣，監

察考召四君，某今疾病，手書自證，首寫過咎輕重好醜種數，名列如牒，乞丐生活，疾病除差，當奉承手書，奉行孝道，案如師法，當慈仁忠孝，敬老愛少，收孤養寡，救活貧弱，所在師家，投理矜使，百事在前，當與師家共同腹目，不得隔戾姘妬，岐咽兩舌，背真妄語，自作一法，更相說道，匿醜說善，匿重說輕，不首情實，一旦違負手書，以身口數謝天地水三官，不敢自怨，謹請東九夷君，南八蠻君，西六戎君，北五狄君，中央三秦衣鐵履刃君，各十二人，官將百萬衆，逆毛錯鱗兵，東方青帝，南方赤帝，西方白帝，北方黑帝，中央黃帝，青龍白虎，朱雀玄武，勾陳等，皆共檢察，肉人自欲求生，乞丐存活，奉行師道，傳千萬世，咸使天下萬民已在道者，未在道者，皆使聞知，手書自證，從道取信，事在久遠，不能盡悉，重復思省，所得續上，三日一期，如蒙省察，慈父聖母，哀憐元元，自今以後，絡繹自改，蕩胃推筋折骨，不敢以前自比，乞丐生活，某今謹自手書，畫一爲信

上言，臣某胎生肉人，枯骨子孫，少不經學，無所知別，得充治職，忝爲祭酒，當助天師布演道炁，助國扶命醫治疾病，臣受性六弊，爲人闇鈍，不能宣揚道炁，勸善化惡，夙夜戰慄，無心自安，某同氣祭酒男女生，某甲奉道有違無狀，所致身被災病，連日累月，不覺損差，呼吸之氣，命在絲髮，思過自責，不能自解，窮迫處頓，無所歸憑，今來詣治，告臣首寫身中前後罪過，從年七歲以來所犯善惡好醜，輕重條列如牒，乞從大道，更受生活，肉人歸誠，在可憐傷，謹騰某辭，觸冒湯火，伏地拜章，辭達以後，分當萬坐，誠慙誠恐，負冰流汗，願乞典者案其簿狀，下天官地官水官一百二十曹，隨事原赦，還筭復紀，哀宥既往，責以將來，肉人已諾，首寫情實，考吏所考，事蒙立應，實有驗者，宜加遷賞，以報其勞，謹當一切，都爲天官地官水官考召君將吏，從考吏兵等，悉爲言功舉遷，加秩等數，如天曹科比隨章上詣，各歸本曹，列功多少，中宮謁署便曹穩職，無令失意，有怨恨者，某魂

魄繫在天曹，考對日久，重乞原赦，某三魂七魄還附某身，所苦除差，以爲效信，願慈父聖母，大恩省察分別，哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣某謹爲某求乞，度脫厄難，保衛形軀恩章一通，上詣

某天曹，伏須告報，臣某誠惶誠恐，稽首頓首，再拜以聞。

伏誓從道乞丐一生章

具法位臣姓某，誠惶誠恐，稽首頓首，再拜
上言，臣某昔以有幸，得染清化，被受重恩，賜某仙官吏兵以自營護，出入積年，大小端心，誠自喜樂，某受性頑塞，不明天地禁忌，奉行多愆，爲真官考氣所糾，以某日月被考，疾病積如干日，體羸氣乏，命在旦夕，大小惶怖，恐不生活，歸命
大道，伏罪首過，乞丐生活，仍於某家私自跪誓，言當改過爲善，改逆爲順，伏諾從道，不敢前却，唯乞原赦，假延日

月，令得視息，當精思身中所犯過罪，隨事列首，肉人誠淺，未蒙哀放，所苦沉滯，日有增劇，闔門大小，分爲灰土，匍匐詣治，告臣求哀，乞丐生命，更自修華，差愈之後，要當輔助師道，服膺法憲，除故自新，唯善是從，不敢有違，臣以愚闇，宣化無功，未審其罪過輕重，身被何考而委頓積時，不蒙差損，肉人元元，欲自改悔，雀鼠貪生，誠可憐傷，謹冒犯清正，觸蹈湯火，爲某拜章一通，上詣

三天司命曹，唯願上官典者，爲考校天曹文書，計功除過，和解考氣，謹請九天君一人，官將一百二十人，爲某解罪速召，上通中宮各署，便曹穩職，還某魂魄，令附身形，由來所行，無善可紀，積筭右宮，唯罪是書，有過無功，無以相補者，乞特原其萬罪，賜其一生，效其將來，責以後善，若某不負言則，考化爲功，如其背違治之不脫，臣不勝肉人危急，干冒上聞，伏以悚懼，恩惟
太上分別，哀臣愚劣，謹因二官直使正一功曹左右官使者，陰陽神決吏，科車

赤符吏，剛風騎置驛馬上章吏官，各二人出操，臣某謹爲某求乞，懺除罪咎，堅固道心，恩章一通，上詣
某天曹，伏須告報，臣某誠惶誠恐，稽首頓首，再拜以聞。

疾困延命章

具法位臣姓某，誠惶誠恐，稽首頓首，再拜

上言，某荒俗子孫，胎生肉人，樂化奉治，以自生活，而某多愆，以延災禍，昨得疾病，百毒備至，從來轉久，有增無損，今者沉困，示有氣息，累因衆官，乞請罪過，跪義信誓，未蒙垂恩，肉人怔營，無復心膽，分鬻灰土，永畢天地泉壤，臣備給驅使，奉宣慈化，當助皇老，扶危救厄起疾，臣之常職和愍，肉人命在絲髮，謹冒罪拜章，願請南昌宮中延命君五人，官將百二十人，一合下北詣玄陰御女宮，拔出某垂終之命，解其萬罪，從一至九，以度道數，又請壽命君保命君拔命君三官，各從百二十人下，爲某請丐生命，三月一時，三歲一期，要以某得生活，以爲效信，恩惟

太上分別，哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣某謹爲某求乞，消除疾病增益年齡恩章一通，上詣

某天曹，伏須告報，臣某誠惶誠恐，稽首頓首，再拜以聞。

請命章

具法位臣姓某，誠惶誠恐，稽首頓首，再拜

上言，某疾病云云，有自危篤，考己思愆，不自分別，比詣衆治，首寫求哀，而某疾病沉困，未蒙輕差，肉人憂惶，恐爲灰土，告臣自訴，求乞上聞，臣以愚矇備承，人乏不勝，肉人憑恃之情，謹冒清嚴，拜章以聞，案其疾苦，彌時有增無損，必有深重匿罪，事在難赦，或某命衰運終，應歸泉壤，誠非臣頑淺所可干冒，仰惟

太上，慈仁好生惡殺、罪無輕重，輸道必赦，緣恃廣潤含育之施，是以敢觸湯火，思效毛髮，願垂矜省，某有識以來，萬沒之罪，謹請南上君一人，官將百二

十人，爲某開生門益壽命，又請南昌君一人，官將百二十人，周詣八極之中，星度歷紀，脫某死籍，還年益壽，使泉壤之軀，得蒙更生，若某家有強殍不祭之鬼，因衰乘隙，纏綿某身，必固中傷者，願請剛武敢健嚴能吏兵百二十人一合下，收攝斷截，分別真偽，皆使罷散，令生死區別，各得其所，願章達日，爲臣立效，某若蒙差，言功舉遷，恩惟

太上分別，哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣某謹爲某求乞請命，祈恩保安病患，恩章一通，上詣

某天曹，伏須告報，臣誠惶誠恐，稽首頓首，再拜以聞。

疾病丐過請命章

具法位臣姓某，誠惶誠恐，稽首頓首，再拜

上言，謹按某昔以歸化，制屬道炁，受恩端等，以自勸勉，肉人罪積，招致重考，疾病云云，思愆首過，冒罪以聞，臣以某月日，爲某啓請治病功曹，天醫太醫，輔

助醫吏，典治某身田臣闕乏，精誠無感，某所苦轉更增劇，命如絲髮，大小狼狽，無復肝膽，不勝所見，謹重拜章，請功曹使者，四方胡越氏羌驛騎，逕詣安昌宮中，爲某上請護命君、延命君、南上君，三君官將各百二十人，爲某削除死籍，更定生名，三月一時，得蒙度脫，臣觸死冒責，罪當萬坐，乞丐原赦，以某生活爲效，恩惟

太上分別，哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣某謹爲某求乞保安病證，增益壽齡，恩章一通，上詣

某天曹，伏須告報，臣某誠惶誠恐，稽首頓首，再拜以聞。

困急日中上請命章

具法位臣姓某，誠惶誠恐，稽首頓首，再拜

上言，某素下官子孫，遭值有幸，大道開化，好樂清正，操信入法，係命三天，誠自榮慰，而某愚穢，奉氣失和，身被病苦，某處痛，命在轉燭，從道求

哀，未蒙除差，日更增劇，恐爲灰土，肉人惶怖，怔忡不能自勉，詣臣訴辭，求乞救護，臣輒省某所疾，甚爲危殆，或犯罪彌結，不可哀赦，或天年終盡，在於漏刻，臣伏以

大道真炁，含育群生，能使枯槁之骨，更受血氣之榮，臨冬之木，再有春葩之暉，迴樞起死，唯在垂恩，緣將廣潤，乞貸某命，謹重煩請南昌宮中延命君五人，官將百二十人，北詣玄陰御女宮，請贖某形軀，使垂絕之命，蒙更生之恩，上崇皇老神氣之高，下施雀鼠貪生之願，恩惟

三師省察，分別求哀，臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏官各二人出操，臣某謹爲某求乞，保衛病軀增延祿筭，恩章一通，上詣某天曹，伏須告報，臣某誠惶誠恐，稽首頓首，再拜以聞。

禁魂魄章

具法位臣姓某，誠惶誠恐，稽首頓首，再拜

上言，某制屬

太上諸君丈人道炁，蒙恩所祐，每相欣慰，肉人無狀，暴得疾病，合門大小，思過自責，歸命大道，未蒙除差，所苦云云，日更困篤，懼恐奄忽，命在朝夕，氣散神逝，往而不反，肉人惶怖，告臣求哀，謹爲拜章，冒罪以聞，願請地理宮中珠玉君一人，官將百二十人，朱衣赤幘，仗節鉞斧立至，爲某致百二十生氣，禁三魂七魄不令去離某身，轉益年壽，度名玉曆，令得免滅除之例，永爲種民，恩惟

太上分別，哀臣愚劣，謹因三官直使正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣某謹爲某求乞扶危，拯難續命，延年恩章一通，上詣某天曹，伏須告報，臣某誠惶誠恐，稽首頓首，再拜以聞。

疾病却三官死解章

具法位臣姓某，誠惶誠恐，稽首頓首，再拜

上言，某奉道失和，違負元始，身被三官

重考，以某月日得病苦，某處痛不下飲食，列辭訴臣求乞平省，臣輒具以師法，譴問某身何所犯坐，某比首寫歸誠，乞丐生命，某疾從來，積日轉更困篤，大小狼狽，肝膽塗地，臣不勝肉人性命，危急謹復，觸冒拜章以聞，恩惟

太上，原赦肉人萬死之厄，若某贓滿罪定，名入死次，三命已盡，願延一時，責以後善，使某追悔往罪，以修將來，謹爲某上請天一君、真一君、好生君、延命君、拔命君五人，官將各百二十人，賫臣章上詣

太浩天曹，北辰司命，韓君門下玉案上，却臣三官死解，定著生籍，重請無上天生君兵十萬人，主收百二十殺鬼，却死來生，又請越干玉女二百人，爲某增益倉穀，更延年壽，願上章之日，時蒙放赦，應令某得出長夜，復見日月君將吏兵，言功舉遷，以爲效信，恩惟

太上分別，哀臣愚劣，謹因二官直使正一功曹左右官使者，陰陽神決吏，科車赤符吏，剛風騎置驛馬上章吏官，各二人出操，臣某謹爲某求乞延年益筭，保病

扶衰恩章一通，上詣

某天曹，伏須告報，臣某誠惶誠恐，稽首頓首，再拜以聞。

太上宣慈助化章卷之二

太上宣慈助化章卷之三

廣成先生杜光庭集

收犬子鬼章


具法位某，誠惶誠恐，稽首頓首，再拜上言，謹條，某州某縣，某鄉某里，某官某，為疾厄所侵，凶鬼為祟，上請天官君將吏兵，收捕石下犬子鬼，天官名號，件列如左。

上請玄老大將軍兵士十萬人，上請威明大將軍兵士十萬人，上請地里大將軍兵士十萬人，上請石仙大將軍兵士十萬人，上請五色大將軍兵士十萬人，上請節蓋大將軍兵士十萬人，上請青蓋大將軍兵士十萬人，上請赤蓋大將軍兵士十萬人，上請白蓋大將軍兵士十萬人，上請黑蓋大將軍兵士十萬人，上請黃蓋大將軍兵士十萬人，上請督天大將軍兵士十萬人。

右件一十二部天官君將吏兵一合降下，天充地墜，盡來徑到某家身中，收捕某家所養石下犬子之鬼，水官乳母雜神

便斬殺之，以明大道之威，急急如律令。

勅某年太歲某某月某日某辰，祭酒臣謹移告抱壁州丘石郡太守，孔里縣令封亭鄉石葉里案前，件官所領境界山石下犬子鬼不淨，小鬼侵入異土，病害某家某身，晝夜啼叫，瘡痛痢瘡，癭疔不絕，尋看疾狀，正是犬子小鬼，水官乳母等為害，各有州郡，由其所管太守檢錄不勤，致令放逸，傷害天人，從今已去，宜精加檢錄，不得有違，若或更來犯害某身者，收得斬之，所主太守別加考責，一如太上老君律令。



收犬子鬼
好乳付兵
天獄之中

泰玄都云云

上言，謹案某州某縣某鄉某里。

大道弟子某往以奉屬

太上大道諸君丈人，因三師香火以自

保理，而修奉多違，動靜不利，自某月某日以來，男女某染疾，四支沉重，瘡腫啼叫，晝夜痛楚，乳哺不下，醫藥不愈，尋其疾由，恐是某家所養石下犬子，水官乳母牀前洗浣，新婦等鬼，伏人房室，取人兒女，尅害殺之，求乞章奏，以獲除滅，救拔男女某性命，得遂生全，長養成立，紹續胤嗣，元元之情，在可哀憫，臣不勝所見，謹爲冒罪，拜章一通，上聞天曹，伏惟

太上老君太上丈人、天師女師、三師君門下五炁君乞垂神貺覆衣，某家即日請太山青虎食犬頭肝，衡山赤虎食犬心，華山白虎食犬肺，鎮山黑虎食犬腎，嵩山黃虎食犬脾，五方虎軍同時來下，收食石下犬子，小鬼水官，乳母五瘟疫毒，兵獵注殺，形禱咒詛，新死故亡，邪魔魍魎，雜神惡鬼，假託自號壁州刺史，丘石郡太守，孔里縣令，封亭鄉石葉里，自稱崖王將軍，強殺將軍，善連天人，自稱東方青犬將軍，南方赤犬將軍，西方白犬將軍，北方黑犬將軍，中央黃犬將軍，自稱天上守門犬子，地下

守戶犬子，抄狼黃頭黑口青耳，白手白足，大者長一丈五尺，小者長一丈二尺，自稱天牢乳母，洗浣新婦，流行上下，傷害小兒，遭者非一太上真炁，無不收剪，今行符告壁州丘石郡太守，宜應精加檢錄，勿使更犯，所請一十二部天官君將吏兵，逕入某身，圍繞前後，嚴加備伺，必使擒獲犬子小鬼，五瘟疫毒，寒瘧外殍客死兵，獵新死故亡，破射之鬼，張羅布網，次第收剪，立令除殄，男女某所疾，悉令退散斷絕，以明大道正真之威，某性命獲全，灾厄度脫，乳哺甘進，宜利父母，永爲

大道香火，萬代種民，紹續系嗣，宅宇清吉，眷屬安寧，以爲效信，恩惟太上無極大道太上師尊上官典者，垂慈省理操，臣謹爲某請天官吏兵一十二部，收剪石下犬子小鬼，拜奏大章一通，上詣

某曹，伏須告報，臣誠惶誠恐，稽首頓首，再拜以聞。

斷除非所祭祀鬼神復連章

具法位臣某，誠惶誠恐，稽首頓首，再拜

上言，謹案文書，某州某縣某鄉某里，弟子某宿世積幸，奉屬大道，常蒙覆蔭，伏用欣榮，而修奉多違，動招考責，自頃以來，爲外殍鬼賊妄相刑尅，數爲崇害，性命危迫，披告向臣求乞章書，以自分別，臣不勝所見，謹爲冒罪，拜章上聞

天府，伏願

太上老君諸君丈人，天師女師，三師君門下五炁君等，垂神平省小臣所上章詞，即時上達，賜以道炁，覆衣某之身，臣伏尋外殍，某鬼與某家非有相關，自有子孫，依時祠祭不合，妄爲崇患，復連平民正一科，文女青鬼，律合申誅剪，以安萬姓，謹爲上請誅殃君，官將百二十人，治倉明宮，又請都星君一人，官將百二十人，治清蓋宮，又請下明害炁吏，又請天皇敢健吏兵士三十萬人，並一合來下，主爲某除蕩客死外殍異姓，非所祠祭之鬼，妄爲復連者，收而斬之，誅而滅之，斷而絕之，悉令分別立使清淨，又請男女尸殃，病死腥死，牢獄死燒死，刀兵虎狼死之鬼吏兵，各五

十人，主爲收除外鬼他神，非祭祀所及，妄來復連平人者，況烝嘗不同，祭祀各別，殊門異戶，不復相關，立須斷絕，不得妄相侵犯，如欲更來復連某人者，當得河水逆流，白石水上浮，亂絲千犬，馬角六尺，三足烏五十頭，九尾狐三百頭，可來相求，不能如此者，即與某人天別地絕，千年萬歲，無相侵擾，又請東西南北中五方斷訟神君各一人，官將各十二人，主爲某家閉絕復歲連歲，復月連月，復日連日，復時連時，皆令閉絕，某疾病除差，灾厄銷平，性命安全，魂神澄正，邪精摧伏，正炁宣行，千苦萬痛，豁然除愈，被受

大道罔極之恩，惟蒙

太上省理分別云云，操臣謹爲某請天官吏兵，除斷外姓鬼神強殍客死之鬼，妄爲復連，斷絕誅滅大章一通，上詣某曹，伏須告報，臣誠惶誠恐，稽首頓首，再拜以聞。

為疾病分解存亡盟禱咒詛章

具法位某，誠惶誠恐，稽首頓首，再拜上言，謹案文書，某州某縣某鄉某里，弟

子某年若干歲，某月某日生，即日奉詞，有幸之運，生在法門，得奉

大道，名係玄籍，荷恩受賜，綿歷歲年，而修奉多違，頻招不利，某以某年月忽染疾患，未獲痊平，旦夕憂惶，性命懸迫，察其狀候，恐有犯觸誓盟，厭蠱爲害，沉綿且久，憂迫萬端，求乞章書，以自分解，臣不勝所見，謹爲冒罪，拜章上聞

天府，乞丐

太上老君，太上丈人，天師女師三師君門下典者五炁君等，留神平省小臣所上章文，以時御達，賜

大道真炁覆衣，弟子某身即爲告下天官吏兵，解除某先世以來，九玄七世，三十六祖，有犯咒詛盟誓之炁來爲祟者，一切解除之，或有牽鬼引神，呼天告地，指日月星辰，及所在神祠符廟一切形像，有情無情，有識無識，樹石草木，山川水火，蠢動之物爲證誓者，或屠宰物命，飲血啗肉，或刻石折金爲證誓者，先人所作，殃逮子孫，致令疾病縈仍，性命不保，慮恐一旦淪沒九泉，雀鼠貪

生，求哀請命，謹爲上請赤巽宮中太丙君一人，官將百二十人，主爲分解先世

今世存亡所犯咒詛之炁，立令斷絕，又請破殍君一人，官將百二十人，主爲收斷咒詛形禱之鬼，又請護祐大將軍一人，官將百二十人，主爲保護疾厄之人，即蒙除差，灾厄度脫，年命延長，還顏復色，咒詛絕息，其先人所立咒誓，若以子丑寅卯日牽鬼呼神爲咒詛者，子丑寅卯神明君爲消除之，若以辰巳午未日牽鬼呼神爲咒詛者，辰巳午未神明君爲消除之，若以申酉戌亥日牽鬼呼神爲咒詛者，申酉戌亥神明君爲消除之，若形生命爲咒詛者，各隨物類消而化之，若折金石土木爲咒詛者，各隨其形自消平之，萬誓並除，千殃弭息，如願之日，被受重恩，惟蒙太上省理，分別云云，操臣謹爲某上請天官吏兵解除前代今生盟禱咒詛，保祐疾病乞就痊平章一通，上詣某曹，伏須告報，臣誠惶誠恐，稽首頓首，再拜以聞。

生筭度厄章

具法位某，誠惶誠恐，稽首頓首，再拜上言，謹案文書，某州某縣某鄉某里，

大道弟子某官，某年若干歲，本命某某月某日生，戶口若干人，即日叩頭列詞，歸命

太上大道，求乞章奏，扶衰度厄，延命生筭，安寧宅宇，清肅龍神，祐護人口，保宜財祿，解災救難，以全性命，詞情懇切，理在可申，臣不勝所見，謹爲冒罪拜章，上聞

天曹，伏惟

太上老君太上丈人，天師女師三師君門下上官典者君吏，留恩省念，小臣所上章書，通行上御，乞

大道真炁覆衣，某家大小之身平安無他，災厄超度，凶衰解散，憂患止息，臣謹爲某上請東宮生筭君一人，度三灾九厄吏兵君吏將士各百二十人，又請南宮生筭君一人，度瘟疫火灾厄官將吏兵各百二十人，又請西宮生筭君一人，度兵灾傷殺厄官將兵吏各百二十人，又請北宮生筭君一人，度疾病水灾厄

官將兵吏各百二十人，又請中宮生筭君一人，度五土山川灾厄官將兵吏百二十人，又請收殓君斷殓君破殓君各一人，官將兵吏各百二十人，又請雲中窮奇食鬼君一人，三足烏兵士四十萬人，九尾狐兵士四十萬人，一合來下，主爲某同心併力，上發天門，入九天之上，下發地戶，入九地之中，中詣五嶽四瀆，三河四海，九江八極，河伯水府，太山酆都，諸大地獄，三台四司，天下地上，天上地下，一切曹屬之中，解除某家親緣眷屬，男女大小所有前生今生千罪萬過，千殃萬結，千考萬責，千灾萬厄，一乞和解，考訟絕滅，上解天羅地網之厄，次解三天八會，二十八宿星辰之厄，次解十二時辰，支干歲刑，月殺魁綱，衝破加臨之厄，次解三五七九九橫九灾之厄，次解二四六八五行八節，八魁臨年之厄，次解宅舍虛耗，五凶六吹，姘鬼妬神，夫婦男女，父母妨害之厄，次解移徙嫁娶，行喪入塚，背黃向黑，背福向禍，背順向逆，背言向凶，背王向衰之厄，次解犯天禁地，忌

歲禁月，忌日禁時，忌年禁命，忌之厄，次解犯觸太歲大將軍，太陰太陽，大耗小耗，十二月建七十二神，陰陽刑德，凶吉衆神之厄，次解東西南北四面八方新死故亡，雄雌注殺，破射死次喪車，殺鬼星書，各取代形，復連枉橫，非灾之厄，次解違天犯地，破戒違經，愆盟負誓，忘恩不義，淫佚不仁之厄，次解他人社竈符廟，惡鬼凶神，遊殃客殺之厄，次解新舊宅宇，隔絕前後，犯觸土公傷害之厄，次解六畜收養欄檻槽圈，確磴井厠鎮壓犯害之厄，次解前世今生九玄七祖，宿殃餘考，債訟引注，考逮子孫之厄，次解前代今生所犯元逆醜惡，難赦不原之厄，次解五行大獄，九幽地獄，太山二十四獄，酆都三十六獄曹府，追攝拘執魂魄之厄，次解天曹地府，天地水三官，黑書死籍之厄，次解他人之家，先世今代，形禱咒詛，牽引復連之厄，次解祖宗眷屬，父母伯叔兄弟，姑姨姊妹，兒姪孫息，死亡復連之厄，次解鄰里四面疾病時瘟，疫毒之炁，連染之厄，次解征伐誅討，

劫殺謀害，刑獄刀兵，官災冤橫之厄，次解牢獄閉繫，囚束刑徒之厄，次解虎狼蟲蛇，毒物傷害之厄，次解惡人謀議，厭蠱盟咒相害之厄，次解六畜死亡傷失，財物耗散之厄，次解風虛勞冷，四百四病之厄，次解五方五厄，次解年窮筭盡，祿絕命凶之厄，次有夫妻男女，父母眷屬，身中大厄小厄，大衰小衰，並乞除解，即使東斗注筭，西斗記名，北斗落死，南斗上生，遷名玉曆青簿之中，上壽百二十歲，永爲

大道萬歲種民，出入隆利，卜夢貞吉，公私和泰，年祿永延，所請天官君將吏兵有功勤者，隨臣三會都章，言功舉遷，不負信誓，恩惟

太上省理云云操，臣謹爲某官某居家不利，分別灾厄，請天官吏兵，拜上解灾度厄大章一通，上詣


某曹，伏須告報，臣誠惶誠恐，稽首頓首，再拜以聞。

太上宣慈助化章卷之三

太上宣慈助化章卷之四

廣成先生杜光庭集

元皇上品六合生筭章



具法位某，誠惶誠恐，稽首頓首，再拜上言謹條，弟子某口辭具列，比來爲家轉軻，宅舍凶虛，夢想紛紜，諸無良利，即日叩頭陳諸，乞弟子某生筭度厄，增年益壽，解除妨害，推定生年生月，解灾度厄，防保身命章辭，但某自惟芻狗賤質，叨蒙至貴之身，朝菌之年，謬遇正真之道，祖宗傾仰，崇敬玄門，胤裔相承，歸命

太上大道，隸屬諸君丈人，荷霑慈衛，義重高天，奉賴薰修，恩深厚地，恐弟子某生逢五濁，運屬三灾，識染六情，業逢九厄，心神迷悶，智慧昏昏，至於奉法，多違正教，致使真靈不祐，鬼炁相侵，比載已來，且多迍軻，所睹觸犯非

宜，無途可告，至於遇患，灾興訟謫，宅舍不寧，人口瘳疔，然弟子某，入此歲初，肇臨春夏，群鳥亂鳴，惡音不絕，夢想無善，衰難灾生，志向悉乖本意，或是弟子夫妻妨害，或是年命衝破，生月子午相衝，生日尅身，有戾生年，計筭不定，生月又有參差，受命生時，星曆不穩，從茲一定，永劫畢身，輪尋用爲，於後永定，若非會厄灾忌，即是宅舍受灾，或遇七傷之年，或當五鬼之歲，或遇四殺之月，或值六害之凶，或臨八難之憂，或當七傷之忌，或臨九坎之禍，或值十絕之殃，或恐弟子某前後移徙，不得吉日，出入失於良時，所向既犯惡神，晨昏復乖，天道觸犯，無謝緣迍致凶，或夫妨妻子，刑及父母，命逢衝破，年到歲星，或入天門，或遇絕陽九厄之鄉，或臨地户絕陰入墓之凶，上爲天羅所纏，下爲地網所繞，魂囚魄繫，幽閉三官，陰陽閉隔，且非滅没之忌，在此之年，窮絕之凶，正當今歲，前衰未定，後厄復興，且會凶殃，屢逢軻軻，往往相尅，頻頻涉害，弟子某即目情下不安，

大小周樟，實爲驚駭，自非上託玄極，生進扶救，無以爽此深灾，若不告投幽司上真除禍，何能遣斯灾厄，闔門惶怖，歸心善護之門，拜首至真，歸命香火之下，辭表乞恩，委命投臣，仰存懇切之甚，理實可哀，至誠至重，無容抑塞，小臣愚昧，尚乃未悟玄規，淺識之稽豈窮，幽旨人法易倒，鬼事難明，謹述短聞，究除情要，又恐某魂魄橫被百鬼執迷，在於右宮黑簿之中，虛注上計名字，難可解釋，謹爲上請諸部天官君將吏兵部，具件如左：

上請赤天生筭解厄君一人，官將百二十人，上請保命解對君一人，官將百二十人，上請保護度厄君一人，官將百二十人，上請衛筭度厄君一人，官將百二十人，上請益筭度厄君一人，官將百二十人，上請延筭度厄君一人，官將百二十人，上請續筭度厄君一人，官將百二十人，上請扶筭度厄君一人，官將百二十人，上請倍筭度厄君一人，官將百二十人，上請定筭度厄君一人，官將百二十人，上請生筭度厄君一人，官將百二十

人，上請保筭度厄君一人，官將百二十人，上請招筭度厄君一人，官將百二十人，上請拔筭度厄君一人，官將百二十人。

右狀請前條諸部天官君將吏兵，各一合下，主爲弟子某生筭度厄，追贖魂魄，與身中右宮黑簿度厄左契長生錄中，收斷弟子某前世已來所犯深愆重過，乞賜原赦，削除死籍，定上生名，保符大吉，急急如律令。

上請春三月天醫保命功曹君一人，官將百二十人，上請夏三月天醫保命功曹君一人，官將百二十人，上請秋三月天醫保命功曹君一人，官將百二十人，上請冬三月天醫保命功曹君一人，官將百二十人，上請春三月九十日直符治病功曹君一人，官將百二十人，上請夏三月九十日直符治病功曹君一人，官將百二十人，上請秋三月九十日直符治病功曹君一人，官將百二十人，上請冬三月九十日直符治病功曹君一人，官將百二十人。

合下，主爲弟子某增年益壽，名入玉曆之中，灾衰度脱，永保元吉，急急一如太上老君律令。

上請保護君一人，官將百二十人，上請延命君一人，官將百二十人，上請招魂君一人，官將百二十人，上請拔魄君一人，官將百二十人，上請斷絕亡人復連君一人，官將百二十人，上請除灾解厄六甲元辰度厄君一人，官將百二十人，上請金木水火土之厄君一人，官將百二十人，上請三灾九厄君一人，官將百二十人，上請百二十刑厄君一人，官將百二十人，上請分解新死後亡君一人，官將百二十人，上請水官乳母石下犬子君一人，官將百二十人，上請好生度厄君一人，官將百二十人，上請收斷注祟君一人，官將百二十人。

右狀請前條諸部天官君將吏兵，各一合下，主爲弟子某削除死籍，定上生名，上壽百二十歲，增年益壽，永保無窮，急急一如太上老君律令。

上請東宮生筭君一人，官將百二十人，
上請南宮生筭君一人，官將百二十人，
上請西宮生筭君一人，官將百二十人，
上請北宮生筭君一人，官將百二十人，
上請中宮生筭君一人，官將百二十人，
上請倍倉益穀延命君一人，官將百二十人，
上請消除死籍定上生名君一人，
官將百二十人，上請和解三官九府君
一人，官將百二十人，上請元精解妨害
君一人，官將百二十人，上請解三灾九
厄君一人，官將百二十人。

右狀請前條諸部天官君將吏兵，各一
合下，主爲弟子某於天下地上，水土三
官曹府，厄難之方，次第求覓弟子某三
魂七魄，九命七籍，形影精光神炁，付
與身中，悉令備真，還魂復魄，延度灾
年，急急如律令。

上請七星門下君一人，官將百二十人，
上請北斗門下君一人，官將百二十人，
上請三十五星官門下君一人，官將百
二十人，上請營星門下君一人，官將百
二十人，上請箕星門下君一人，官將百
二十人，上請諸星門下君一人，官將百

二十人，上請天官門下君一人，官將百
二十人，上請地官門下君一人，官將百
二十人，上請水官門下君一人，官將百
二十人，上請土官門下君一人，官將百
二十人，上請木官門下君一人，官將百
二十人，上請火官門下君一人，官將百
二十人，上請金官門下君一人，官將百
二十人，上請判官門下君一人，官將百
二十人，上請元辰門下君一人，官將百
二十人，上請六甲門下君一人，官將百
二十人，上請恒山門下君一人，官將百
二十人，上請東嶽門下君一人，官將百
二十人，上請南嶽門下君一人，官將百
二十人，上請西嶽門下君一人，官將百
二十人，上請北嶽門下君一人，官將百
二十人，上請中嶽門下君一人，官將百
二十人，上請閻羅王門下君一人，官將
百二十人，上請斷蘭門下君一人，官將
百二十人，上請十八地獄門下君一人，
官將百二十人，上請五嶽四瀆門下君
一人，官將百二十人，上請四十八獄門
下君一人，官將百二十人，上請名山大
神門下君一人，官將百二十人，上請百

鬼門下君一人，官將百二十人，上請左
官門下君一人，官將百二十人，上請右
官門下君一人，官將百二十人，上請陰
官門下君一人，官將百二十人，上請陽
官門下君一人，官將百二十人，上請太
歲門下君一人，官將百二十人，上請大
將軍門下君一人，官將百二十人，上請
黃幡豹尾門下君一人，官將百二十人，
上請十二月建門下君一人，上請四季
大神門下君一人，上請九醜門下君一
人，上請左社右稷門下君一人，上請先
亡復連門下君一人，上請前亡後死門
下君一人，上請亡人塚訟門下君一人，
上請形禱門下君一人，上請真官門下
君一人，上請中宗外殍門下君一人，上
請河伯水官門下君一人，上請下官故
炁門下君一人，上請十二溪女門下君
一人，上請丘神門下，上請諸廟門下，
上請五盟七誓門下，上請日月南北二
斗門下，上請考官門下，上請神道門
下。
右狀請勅詣前條諸曹府百鬼牢獄門
下，請乞求覓弟子某三魂七魄，或橫被

百鬼執繫前件曹府門下，請乞
太上大道省覽章辭，上達應時，追拔放
縱弟子某精光形影神炁，歸付身中，悉
令備具，延命生筭，度脫衰厄，使生炁
布流，百靈匡衛，如願之日，奉荷
大道，罔極重恩，謹狀。

即日通詣

三尊門下，申

天官門下，過

三師門下，奏

太上老君玉几前。

泰玄都正一平炁云云，但由弟子不閑科
法，招延不利，比來住宅不安，人口疾
厄，累歲迤邐，夢想凶虛，鬼炁紛紜，人
神無定，頻延災衰，即日詣臣，求乞章
表，和解夫妻年命，推定星律，解釋災
厄，防保身命，但臣受法之日，告盟三
官，要當扶助師老，以救度爲先，諸有
憑祈，無容抑絕，謹按弟子某增添壽命，
追解上計名字，拔贖魂魄，分解厄忌，
防保身命，往以奉爲。

太上諸君丈人道法，籍係玄都，仰崇三
天，正法道炁，香章爲命，得在道門，誠

相勸化，自居此宅，凡百蹭蹬，解途不
善，伏聞

靈寶師老，有修齋謝過之科，正一盟威
有立功補過之格，是以歸心至極，翹仰
玄門，懇注丹誠，拜上章辭，除災解難，
又恐弟子某足履地網，頭戴天羅，連星
筭盡，災殺加臨，深恐一旦不免災厄之
次，次入圖云云恩惟

太上老君，云云乞丐元炁，下流覆育弟
子身命，謹請前條六十二部天官君將
吏兵，次第拔贖弟子魂魄，往詣百鬼天
牢地獄之內，求覓弟子某魂魄，付與身
中，調和百節，安帖精神，追計解厄，定
上生名，付與左契玉曆之中，永保元
吉，弟子災厄併會，所奏章辭，恐不蒙
上達，今奉帛素一疋，命米一斗二升，
命絲百二十尺，銀環一雙，立信道門，
以表丹誠之信，若樹木枯朽，蓊養枝
葉，倉穀乏少，益其斛斗，年命短促，延
其丈尺，得在上古種民之次，又請元精
父母十萬人，一合下，賚持臣章，逕詣太
極玉皇几前，又請東王父西王母各一
人，官將百二十人，一合下，主爲弟子

拔贖魂魄，增年益壽，禳災却禍，收斷
家親丈人，前亡後死注崇復連之炁，悉
使斷絕，拜章之後，住宅清宜，人口慶
泰，百病不侵，災衰度脫，如願之日，被
受重恩。

太上宣慈助化章卷之四

太上宣慈助化章卷之五

廣成先生杜光庭集

三天請命章

具法位某，誠惶誠恐，稽首頓首，再拜上言，謹條，男人某家口辭列，比來爲家轆軻，宅舍凶虛，夢想醜惡，鬼炁紛紜，所向乖違，諸無稱泰，錢財耗散，生業不興，田蠶少收，興求無利，肉人某以某月日已來，忽染疾患，四支羸劣，飲食不甘，顏色青黃，魂神離散，凶神降禍，惡鬼興災，名入三官死解上計簿中，五刑六害之內，上爲天羅所纏，下爲地網所繞，深恐一旦不自免脫，災厄禍難之次，卜決形候，並非吉兆，又恐入今歲來身中，年命有災厄，衆難筭壽窮盡，災殺加臨，即日馳來，請臣到宅，求乞拜奏延命生筭，扶衰度厄，增年益壽，追魂拔魄，三天請命，分解災忌章辭，乞保身命，解災度厄，辟斥下官故炁，中外妖祥，精邪魍魎，注按後庭鬼賊，謹爲上請天官君將吏兵部，具件別如左。

上請天曹，勅太山府君門下君一人，官將百二十人，上請天曹勅太山三官筭盡門下君一人，官將百二十人，上請天曹勅太山五官府門下君一人，官將百二十人，上請天曹勅太山主者門下君一人，官將百二十人，上請天曹勅太山功曹門下君一人，官將百二十人，上請天曹勅太山五道大神門下君一人，官將百二十人，上請天曹勅太山五獄大夫門下君一人，官將百二十人，上請天曹勅太山主筭門下君一人，官將百二十人，上請天曹勅太山呼召門下君一人，官將百二十人，上請天曹勂太山送解門下君一人，官將百二十人，上請天曹勂太山延命門下君一人，官將百二十人，上請天曹勂太山三丘五墓門下君一人，官將百二十人，上請天曹勂主筭門下君一人，官將百二十人，上請天曹勂度厄門下君一人，官將百二十人，上請天曹勂斷絕復連門下君一人，官將百二十人，上請天曹勂長生門下君一人，官將百二十人，上請天曹勂北時司命門下君一人，官將百二十人，上請

天曹勂司空門下君一人，官將百二十人，上請天曹勂主者典籍門下君一人，官將百二十人，上請天曹勂主簿孝春門下君一人，官將百二十人，上請天曹勂錄籍門下君一人，官將百二十人，上請天曹勂七獄掾吏門下君一人，官將百二十人，上請天曹勂卿考定生門下君一人，官將百二十人，上請天曹勂五社門下君一人，官將百二十人，上請天曹勂七竈門下君一人，官將百二十人，上請天曹勂五盟七誓門下君一人，官將百二十人，上請天曹勂十二月建門下君一人，官將百二十人，上請天曹勂太歲將軍門下君一人，官將百二十人，上請天曹勂社稷符廟門下君一人，官將百二十人，上請天曹勂三官拔命門下君一人，官將百二十人，上請天曹勂三官護命門下君一人，官將百二十人，上請天曹勂拔三魂七魄門下君一人，官將百二十人，上請天曹勂延生度死門下君一人，官將百二十人，上請天曹勂解災謝罪門下君一人，官將百二十人，上請天曹勂迴名易形門下君一人，

官將百二十人，右狀請前條都合三十六部天官君將吏兵，各百二十人，兵士十萬人，一合下，次為考問，太山三十六部，崑崙十二時司命，符廟府獄之中，拔贖，求覓肉人某三魂七魄，九命七籍，形影精光神炁，付與某身中，悉令備具，削除三官上計死籍，定上生名之簿，上壽百二十歲，中壽百歲，下壽八十歲，延命生筭，扶衰度厄，追魂拔魄，倍倉益祿，解災度厄，生炁布流，如願之日，仰荷

大道，罔極重恩，謹狀。


維某年歲月日朔，某州某縣某鄉某里，弟子某年若干歲，戶口若干人，今居某處住止，即日稽首乞恩，詣臣求乞，拜上三天請命扶衰度厄生筭益壽章辭，但由肉人某闔門頑愚，得廁道門，忝生人代，處在凡夫，招延考炁，自入今歲初春已來，經喪凶危，夢想無善，恐厄難災衰，併來相會，年窮筭盡，諸患加臨，三魂七魄，閉繫在天牢地獄之中，天地水三官死解上計簿中，五刑六害之內，闔家憂惶，安貞莫保，唯以一心上憑

大道，委命至真告訴，向臣求乞章奏，延命度厄，增年益壽，乞丐真炁，覆育肉人，身命君將吏兵，飛騰驛馬，迴度天地水三官門下，主為男人某分解上計，求覓三魂七魄，付與身中，過度災厄之門，永為上古種民之次，如願之日，仰荷


大道覆育重恩，謹狀。

已下符並朱書


謹請今某歲直符神某從官若干人




謹請今某月直符神某從官若干人



謹請今某日直符神某從官若干人



謹請今某時直符神某從官若干人



右狀請前條歲月日時符神，并從官君將吏兵，各一合下，同心併力，各賫持神符，上詣天官地府太山四十八獄之中，主為弟子某扶衰度厄，延命生筭，增年益壽，追魂拔魄，削除死籍，定上生名，今謹賫命繒白素一疋，命米一石二斗，絲百二十尺，作一結，刀一口，紙一百幅，筆墨油三升等，立信道門，拔贖魂魄，倍倉益庫，若年命短促，延其丈尺，乞得在上古種民之次，上壽百二十歲，過免三災九厄，削除死籍，定上生名，百病痊除，生炁布流，如願之日，仰荷

大道覆育重恩，謹狀。

太上三天曹主筭門下君官將百二十人，兵士十萬人，太上三天曹追拔魂魄門下君官將百二十人，兵士十萬人，解脫死名門下君官將百二十人，兵士十

萬人，解計拔命門下君官將百二十人，兵士十萬人，扶衰生筭門下君官將百二十人，兵士十萬人，解脫死籍門下君官將百二十人，兵士十萬人，主贖命門下君官將百二十人，兵士十萬人，斷絕三官執繫門下君官將百二十人，兵士十萬人，斷計解計門下君官將百二十人，兵士十萬人，倍倉益穀門下君官將百二十人，兵士十萬人，延命益筭門下君官將百二十人，兵士十萬人，拔度三十六獄門下君官將百二十人，兵士十萬人，太上三天曹北酆三十二獄門下君官將百二十人，兵士十萬人，太上三天曹一百二十曹府門下君官將百二十人，兵士十萬人。

右狀請前條勅詣天地水三官門下君官將各百二十人，兵士十萬人，一合下，主爲弟子某扶衰度厄，延命生筭，增年益壽，追魂拔魄，付與身中，悉令備具，削除死籍，定上生名，萬靈匡祐，生炁布流，如願之日，被受重恩，謹狀。上請甲子旬中收精吏十二人，官將百二十人，上請甲戌旬中收毒吏十二人，官

將百二十人，上請甲申旬中收炁吏十二人，官將百二十人，上請甲午旬中收瘟吏十二人，官將百二十人，上請甲辰旬中收神吏十二人，官將百二十人，上請甲寅旬中收鬼吏十二人，官將百二十人。

右狀請前條六甲旬用事天官君將吏兵，各一合下，主爲肉人某延命生筭，扶衰度厄，或因修新補故，犯觸土公、太歲、將軍、北時司命，十二月建前後八神，六甲鬼賊，五瘟五疫、鬼毒之炁一切消滅，防保人口，急急一如太上口勅律令。

上請春三月大監吏一人，兵士十萬人，上請夏三月大監吏一人，兵士十萬人，上請秋三月大監吏一人，兵士十萬人，上請冬三月大監吏一人，兵士十萬人。右狀請前條十二月四季之中，用事天官君將吏兵，一合下，主爲某分解身中衰灾，收除鬼炁，延命生筭，免灾脫厄，分解灾忌，平安無他，急急如律令。上請東方收除五炁君一人，兵士十萬人，上請南方收除五炁君一人，兵士十

萬人，上請西方收除五炁君一人，兵士十萬人，上請北方收除五炁君一人，兵士十萬人，上請中央收除五炁君一人，兵士十萬人。

右狀請前條五方用事天官君將吏兵士，各十萬人，一合下，主爲肉人某身中收除五方五色虚耗，鬼炁灾厄度脫，生炁布流，急急如律令。

上請春三月治病功曹吏十二人，官將百二十人，兵士十萬人，上請夏三月治病功曹吏十二人，官將百二十人，兵士十萬人，上請秋三月治病功曹吏十二人，官將百二十人，兵士十萬人，上請冬三月治病功曹吏十二人，官將百二十人，兵士十萬人。

右狀請前條十一月春夏秋冬四季九十日中，用事天官君將吏兵士各十萬人，一合下，主爲男人某身中解灾度厄，削除死籍，定上生名，上壽一百二十歲，爲上古種民之次，急急如律令。上請子年解計君一人，官將百二十人，兵士十萬人，上請丑年解計君一人，官將百二十人，兵士十萬人，上請寅年解

計君一人，官將百二十人，兵士十萬人，上請卯年解計君一人，官將百二十人，兵士十萬人，上請辰年解計君一人，官將百二十人，兵士十萬人，上請巳年解計君一人，官將百二十人，兵士十萬人，上請午年解計君一人，官將百二十人，兵士十萬人，上請未年解計君一人，官將百二十人，兵士十萬人，上請申年解計君一人，官將百二十人，兵士十萬人，上請酉年解計君一人，官將百二十人，兵士十萬人，上請戌年解計君一人，官將百二十人，兵士十萬人，上請亥年解計君一人，官將百二十人，兵士十萬人。

右狀請前條十二歲月日時中，上計并建除滿平定執，破危成收，開閉等日天官君將吏兵各十萬人，一合下，主爲肉人某身中解災度厄，削除死籍，定上生名，上壽百二十歲，元辰對會，連星死運，一切除蕩，如願之日，被受重恩，謹狀。

謹條天地水三官神鬼名字，曹府傳治件別如左。

請大道仁慈垂賜飛騰驛馬，走詣諸處神祇符廟之中，若肉人某三魂七魄繫在丘墓，外殍百鬼牢獄之中，次第求覓，拔出付與身中，悉令備具，若不具者，走詣東方河伯水官門下求覓之，若不具者，又詣中吏河伯水官門下求覓之，若不具者，又詣三天水曹門下求覓之，若不具者，又詣太歲大將軍門下求覓之，若不具者，又詣太祖父母家親丈人，并客死外亡男女之鬼亡魂門下求覓之，如不具者，又詣北時司命府獄門下求覓之，如不具者，又詣月建前後八神門下求覓之，如不具者，又詣五部土公宅龍門下求覓之，如不具者，又詣主簿孝春門下求覓之，如不具者，又詣司空校尉上府門下求覓之，如不具者，又詣司徒校尉上府門下求覓之，如不具者，又詣北酆二十四獄門下求覓之，如不具者，又詣宅中真官夫人門下求覓之，如不具者，又詣寒溫井竈門下求覓之，如不具者，又詣三丘五墓塚訟門下求覓之，如不具者，又詣行年本命六甲禁忌門下求覓之，如不具者，又詣三十

六獄門下求覓之，如不具者，又詣天地水三官曹府之中求覓之，請乞太上大道君將吏兵詣諸曹府之中，求覓肉人某三魂七魄，付與身中，衰厄度脫，壽命延長，死中得生，厄中得度，如蒙所願之日，被受大道慈育重恩，謹狀。

即日通詣

泰玄都云云，但由肉人不閑科法，奉道多違，招延不利，比來爲家轆軻，宅舍凶虛，夢想紛紜，鬼炁屯結，人口癭疔，卜決多忌，肉人某辭列，自入今歲來，身中年命有災，厄衆難筭，壽窮盡災，殺加臨連星，厄運名入三官死解上計簿中，五刑六害之內，上爲天羅所纏，下爲地網所繞，深恐一旦不自免脫災厄禍難之忌，闔家私心，宿夜憂怖，莫知何計，唯以一心上憑

大道，委命至真告訴，向臣求乞章表，以爲肉人某扶衰度厄，延命生筭，增年益壽，追魂拔魄，付與身中，悉令備具，收斷中外強殍精邪注崇復連鬼賊之炁，悉令次第滅除，保其年命，若入死圖即云云

小臣下愚，不勝所見，謹爲伏地拜章一通，上聞

某天曹，恩惟

太上無極大道太上師尊上官典者，垂慈省理，乞丐元炁，覆育人口身命平安無他，或以春三月九十日之中上計，或以夏三月九十日之中上計，或以秋三月九十日之中上計，或以冬三月九十日之中上計，或一年三百五十四日之中上計，或以三十日一節之中上計者，謹請大破除君一人，官將百二十人，解除肉人某，或以寅星寅宿寅歲寅月寅日寅時之中上計，或以卯星卯宿卯歲卯月卯日卯時之中上計，或以辰星辰宿辰歲辰月辰日辰時之中上計，或以巳星巳宿巳歲巳月巳日巳時之中上計，或以午星午宿午歲午月午日午時之中上計，或以未星未宿未歲未月未日未時之中上計，或以申星申宿申歲申月申日申時之中上計，或以酉星酉宿酉歲酉月酉日酉時之中上計，或以戌星戌宿戌歲戌月戌日戌時之中上計，或以亥星亥宿亥歲亥月亥日亥時之中上

計，或以子星子宿子歲子月子日子時之中上計，或以丑星丑宿丑歲丑月丑日丑時之中上計，上請天官君將吏兵北斗門下君，主爲肉人某身削除死籍，定上生名，某上壽百二十歲，中壽百歲，下壽八十歲，自此之外，皆爲凶橫所夭，乞爲肉人某身中分解三灾四殺，五刑六害，七傷八難九厄，三鬼五神，百二十刑厄，悉蒙超度，謹請拔命君一人，官將百二十人，度厄君一人，官將百二十人，謹請日月星宿，九宮華蓋北極君，乞爲肉人某身中分解年灾月厄，得蒙度脫，謹請生筭君十二人，謹請解厄君十二人，官將各百二十人，一合下，主爲肉人某身解除三灾九厄，千病萬痛，豁然除差，平復如本，謹請直使功曹千二百人一合下，口含神湯聖藥，醫治肉人某身中五藏安帖，六腑宣通，謹請治病功曹，又請陽神決吏各千二百人，謹請狼吏虎賁百二十人，主爲肉人某身中療治三百六十骨節之內，百病除愈，謹請參對馳驛吏千二百人，謹請都官僕射天驪甲卒天丁力士各千二百

人，主爲醫治肉人某四支五體之內百病，悉蒙除差，謹請甲子乙丑丙寅丁卯戊辰己巳庚午辛未壬申癸酉此一句中直符神，上詣天西門九宮之內，追拔某魂魄付與身中，悉令備具。謹請甲戌乙亥丙子丁丑戊寅己卯庚辰辛巳壬午癸未此一句中直符神上詣天西南門九宮之內，拔出肉人某三魂七魄付與身中，悉令備具。謹請甲申乙酉丙戌丁亥戊子己丑庚寅辛卯壬辰癸巳此一句中直符神上詣天東南門九宮之內，拔出肉人某魂魄付與身中，悉令備具。謹請甲辰乙巳丙午丁未戊申己酉庚戌辛亥壬子癸丑此一句中直符神，上詣天東北門九宮之內，拔出肉人某魂魄付與身中，悉令備具。謹請甲寅乙卯丙辰丁巳戊午己未庚申辛酉壬戌癸亥此一句中直符神上詣天西北門九宮之內，拔出肉人某魂魄付與身中，悉令備具。謹請甲午乙未丙申丁酉戊戌己亥庚子辛丑壬寅癸卯此一句中直符神上詣天東門九宮之內，拔出肉人某魂魄付與身中，悉令備具。謹請南昌宮中延命度

厄君一人，官將百二十人，一合下，主爲肉人某，防保身命，安魂定魄，削除死籍，定上生名，倍倉益穀，延命生筭，扶衰度厄，生炁布流，拜章之後，住宅清宜，人口康健，災衰度脫，永無天災，罪負消除，百靈匡衛，所請天官君將吏兵隨臣三會都章，言功舉遷，以爲效信，恩惟太上無極大道太上師尊上官典者，垂慈省理，謹爲弟子某拜諸天官君將吏兵，求乞扶衰度厄，增年益壽，三天請命，追魂拔魄，付與身中，悉令備具，太醫治病，防保身命，平安無他，臣謹爲拜上乞恩章一通，上詣

某天曹，伏須告報，臣誠惶誠恐，稽首頓首，再拜以聞。

太上宣慈助化章卷之五

（錢安靖點校）

070 太上濟度章赦

經名：太上濟度章赦。撰人不詳，似出於宋元以後。三卷。底本出處：《正統道藏》洞真部表奏類。

太上濟度章赦卷上

章

延生解厄章 七曜齋用

具位臣某誠惶誠恐，稽首頓首，再拜上言：臣濫叨真秩，誓暢玄風，凡激切以皈投，盍懇勸而敷奏。臣謹據齋意，臣仰惟圜穹廣覆，列緯經行，司下土之機祥，察人生之禍福，况命分枝幹，運列祿刑，六甲三元，周行歲月，三灾九厄，巡察日時，自非諸命以扶衰，曷俾消灾而益算。謹爲拜章一通，上聞三天，伏

望帝恩昭曠，宸澤敷羅，特降勅命，宣告日月星宿，璇璣玉衡，三天玄曹，十二分野，六十甲子，主宰官君，特爲齋主某人除本生身命之灾，解流年臨犯之厄。二運三限，俱進吉星，八卦九宮，無逢惡曜，庶蠲灾患，迓續禎祥。臣謹爲上請南上君、壽命君、丹秩君、絳宮君、消灾君、解穢君各一人，官將各一百二十人，主消滅惡星，度厄益壽。太和真一好生君、運氣君、定貴君各五人，官將各一百二十人，主和順流年，禳解惡曜。解刑度厄君、延壽益算君、請命好生君、收刑却煞君、斷刑絕煞君、執刑收煞君各五人，官將各一百二十人，主益算延年，拘制刑煞。萬福君、南極君、司命君、太白明星君、定名玉曆君、財庫祿庫君各五人，官將各一百二十人，主增注生名，削落死籍。拘魂制魄君，周玉君各一人，玉曆素女千二百人，主拘魂守魄，錄神衛氣。天曹解灾去禍君、五方生炁君、益命延壽君、六甲將軍從官吏兵，主度厄消灾，除邪保命。庶使齋主某人運限協和，身

命安泰，動靜出入，有祿馬之加臨，分野躔離，無灾刑之衝戰。木星爲灾，金星制之。土星爲灾，木星制之。金星爲灾，火星制之。水星爲灾，土星制之。俾得調理五行，和合四象，命基鞏固，壽址堅牢，度厄扶衰，解灾保算，益廣好生之澤，上裨育物之仁。蒙如所陳，允昭玄貺，恩惟大道，分別求哀。臣愚謹因二官直使、正一功曹、左右官使者、陰陽神决吏、科車赤符吏、剛風騎置吏、驛馬上章吏、飛龍騎吏進章，鳳凰騎上章，雲龍騎言章，風發騎御章，神龍騎奏章，飛龍飛虎騎各二人出操。臣爲齋主某人拜上某章，上詣三天曹，伏願天恩告報，臣誠惶誠恐，稽首頓首，再拜以聞。

謝土安宅章 安宅齋用

臣矢心領教，勵志度人，自揆疏庸，夙叨涵育，敢瀝粟絲之悃，仰酬山岳之恩。臣謹據齋意，臣切惟齋主某人繼述，謀家辛勤，問舍經營，版築莫莫，室廬填塞，掘移，慮傷禁忌。况星躔之臨照與神煞之循環，練日練時，或因冒觸，定方

定位，恐致灾衰，期寧靜於土司，盍皈依於帝闕，仰希福慶，預殄屯危。謹爲拜章一通，上聞三天，伏望皇極流祥，蒼旻委監，特降玉清道炁，靈寶妙光，灌注齋主某人所造屋宅之中，內外輝華，邇遐洞煥，導迎萬福，辟斥千妖，鎮守真靈，各安隅界，觸犯神煞，咸回善心，卜世卜年，永臻玄貺。臣謹爲上請

謝土君、制土君、解土君、安土君、安定君、安宅君、五方保護君、解功破耗君各五人，官將各一百二十人，主解謝造宅已來，前後動土觸犯禁忌。太歲太陰大將軍，一百二十位官符毒火吊客喪門上下神煞，悉令和釋，其有方隅神祇，因掘鑿權遷避者，請告諭宜復本位。陽方君、安上君、右都候君、安石安土君各一人，官將各一百二十人，考官吏兵，主收攝土公之鬼，毋敢侵犯鄉邑。大夫神君守宅，大神守宅，三將軍吏兵三十萬人，主驅遣五方土炁故炁，遏絕邪精，毋令侵犯。五岳將軍，六甲神將，五方安宅大將軍，護宅大將軍，保宅大將軍，鎮宅大將軍各一十一人，

鎮安宅舍，驅斥邪精，九橫三灾，千殃萬厄，悉皆消蕩。毋損居人，庶使齋主某人自今以往，百事康安，宅舍光鮮，門庭清謐，盜賊虛耗，遠離他方，水火官灾，毋撓近部，鬼邪絕滅，疾病消除，瘴疫不興，謀生稱遂，詩書有耀，富貴無涯，眷屬利安，以爲效信。

遣疫癘保病章

臣濫膺選舉，冒綴班聯，蹇淺自慚，希夷未悟，扣宸闈而屢請，覩靈府以知非，竄冀隆慈，曲垂涵貸。臣謹據齋意，臣切念齋主某人塵寰涉迹，身世謀生，五慾七情，寧無翳累，百非衆慝，易積愆尤，致寒暑燥濕之憑凌，乘身命運限之屯滯，忽沾疫炁，遂履危機，自非帝造之垂矜，曷俾餘生之有慶，謹爲拜章一通，上聞三天，伏望盛德，涵容玄恩，矜恤特降玉清道炁，靈寶妙光，灌注某人身家之中，俾正炁輝明，妖氛遠離，消灾解厄，保命延生，臣謹爲上請北闕九夷君，北黑天機君，運炁解厄君，地官督炁君各五人，官將各一百二十人，北城化吏五人，天市大夫一人，五瘟部炁

兵四十萬人，拒天大兵千萬人，主收制疫毒，斷除瘟炁。東方九夷君，八十一官君，斷青瘟青毒之炁。南方八蠻君，六十四官君，斷赤瘟赤毒之炁。西方六戎君，三十六官君，斷白瘟白毒之炁。北方五狄君，二十五官君，斷黑瘟黑毒之炁。中央三秦君，一十二官君，斷黃瘟黃毒之炁，大胡老君，家中守宅三將軍，左右三部將軍，赤陽兵士運炁解厄君，五瘟都炁君，吏兵各三十萬人，與里社井邑君，主同心收除斬制疫鬼。中宮遊邏大將軍，科車武騎大將軍，烽火虎賁大將軍，監天敢健大將軍，邀遮大將軍，烽火大將軍，驍騎大將軍，斬斷虎賁大將軍，羅網龍虎大將軍，討捕飛行大將軍，吞天絕地大將軍各一人，吏兵七十萬人，主收斷五瘟積類，無侵鄰里。搖天動地兵十萬人，討天君，胡越騎君，陰陽神決吏，收炁食炁吏，收神食神吏，收鬼食鬼吏，收毒食毒吏各一人，執赤越大胡君千二百人，三五元命功曹使者，魁罡擊刺將軍各一十五人，金剛八煞兵士各九十六

人，主收捕瘟鬼，掃蕩疫炁，免相侵染，貽禍鄉閭，即俾某毒炁消除，病源康復，天醫扶體，靈藥資身，家門尊卑，均臻景貺。

收邪斷怪解厄保命章

臣蹄泔卑賤，茅徑昏愚，夙沐洪恩，濫司玄教，誓度人而激切，庶贊化以承宣，凡有皈投，敢忘關告。臣謹據齋意，臣切念齋主某人運逢屯否，身際妖邪，致寢食之倉皇，覺精神之顛倒，致生疾患，藥餌罔功，恐涉冤愆，況綿莫釋，歷時既久，怪證愈深，自非請命於虛玄，曷克流恩於圓輻。謹爲拜章一通，上聞三天，伏望廣運慈悲，曲加拯援，特降玉清道炁，靈寶妙光，灌注齋主某人身家之中，俾內外洞明，門庭輝煥，靈光所燭，邪祟遠離，疾病安痊，壽齡延永。臣謹爲上請斷邪天靈官功曹，攝神衛身吏，斷邪使者，護身將軍，檢邪直符，斬邪刺姦吏，攝神使者，主驅逐精魅，收捕兇邪。好生保命大將軍，續命大將軍，驅邪大將軍，斬邪大將軍，度厄大將軍各一人，官將各一百二十人，主解

除灾厄，却去精邪。安平守石君一人，官將一百二十人，無上監炁君一人，兵士七十萬人，天罡大兵五丁君一百萬人，無上天生君五人，兵士一百二十人，蓋天大將軍，兵士七十萬人，高麾大鼓五湖將軍，反甲逆鱗兵四十萬人，收鬼食鬼吏，收炁食炁吏，收神食神吏，主收捕諸惡君擾害生民。無上中官五曹校尉兵五十萬人，清玄公君一人，官將一百二十人，主捕制鬼賊，陸梁犯人。歲甲君、太甲君、朱陰君各一人，官將各一百二十人，五天侯將軍兵士十萬人，主擒戮精魅，勦蕩無留。陽明君一人，官將一百二十人，與所在真官諸部吏兵，社稷土地山林孟長，同心協力，和合家中守宅諸神，併力追捉，無令隱漏，攝赴天獄，依律蕩除。又爲上請左右陰陽太醫吏，救治病源，太和真一好生君，解穰惡曜，庶使齋主某人身體安和，邪精殄滅，疾病痊愈，藥食調平，眷序康寧，門庭清肅，起居隨意，謀爲稱心，永保利貞，以爲效信。

保病解厄章

資福齋用

臣學業愚蒙，性資荒陋，幸緣宿慶，僭陟真階，誓殫濟度之勤，庸報生成之德。臣謹據齋意，臣切惟齋主某人命運灾衰，形神凋瘁，三業十惡，夙累行藏，六曜五星，偶凌次舍，忽染疾疢，寢食靡寧，藥餌罔動，日時浸久，夙宵驚戰，控告無門，非賴併蒙，曷臻平復？謹爲拜章一通，上聞三天，伏望隆慈，誕施惠澤，特降玉清道炁，靈寶妙光，灌注齋主某人身家之中，俾灾炁消除，靈光照耀，目今病患，早遂平安。臣謹爲上請陽秩君一人，司命吏一百二十人，各主重病未痊速令康愈。須臾君、赤天食炁君各二人，官將各一百二十人，主久病困衰即得痊療。收神上明君一人，官將各一百二十人，主明暢精神，斷除惡夢。赤星君、三天慰愈君各一人，官將各一百二十人，主制絕家親，乘時構釁。解考君、度命君、益算君、誅殃君、遊邏大將軍，地燒大將軍各一人，官將各一百二十人，主收錄邪精，辟除故炁。火龍君，山周君，東明大夫君各五

人，官將各一百二十人，主制醫藥黃衣。節命玉女、月玄玉女各千二百人，主持神方太仙明堂。玉女千二百人，主按方治病。中宮大醫吏十二人，主擇方合藥。天醫、官醫、太醫五官治病醫吏，各一十二人，主入臟腑經絡關節，行神存炁。天曹、上平太醫吏一十人，治病功曹一十五人，主上詣鳳凰太清宮中，取五色神藥。和合官君，治療病患木官，持藥金官，持鍼水官，主湯火官，主灸土官，和德各奏奇勳。東青生炁君，南赤生炁君，西白生炁君，北黑生炁君、中黃生炁君，各領吏兵除邪收病。南昌朱陽君，黃老君，天魂君，地魄君各一人，起生。玉女，玉曆素女各千二百人，主扶却灾危，度脫年命。即俾齋主某人炁體康健，灾衰消散，精邪遠避，殃訟和平，病患蠲除，命身牢固，服藥有效，動止無魔，命運亨嘉，以爲效信。

傳法授道祈恩謝過章 傳度用

臣誤奉宸恩，濫承師派，期提後進，庸紹前脩，僭陳悃悞之私，仰謝涵濡之澤。

臣謹據齋意，臣切惟女青玉律，選舉至難，太極金科，保任尤重，儻傳授有乖於踐履，則師資俱冒於憲章。今弟子某人潔己求真，願參上法，靜言障累，越有數端，或神炁難保於脩齡，或骨相不符於道品，或九玄七祖冢訟未消，四負三生，兇仇猶結，或宿劫今世譴考尚縈，或故作誤爲，愆尤莫釋。匪賴甄陶之賜，曷諧願望之隆？謹爲拜章一通，上聞三天，伏望曲施玄釐，俯矜丹悃，特降玉清道炁，靈寶妙光，灌注弟子某人五宮六府之中，俾正炁輝華，道心開發，靈光羅絡，妄累消鎔。仍乞救命，宣告三界十方，應于玄局，特爲蠲消考訟，解釋愆尤，紀字玄編，定名青簡。臣謹爲上請無上九天帝君，三十二天帝君，五老帝君、日宮月府，五星四曜，南辰北極，列宿星君，三省五師，三官九府天曹主執，四洞真靈，福地洞天，五岳四瀆，地水職司，三界神祇，俱赴玄壇，證明傳度。又爲上請靈寶六部，仙官三界，所向玄曹，赫奕仙曹，玄壇侍經，護道降真，召靈合屬仙吏，九天司

命府，青玄黃籙院，玉清神霄玉府，上清童初府，玄靈璇璣府，北魁玄範府，靈寶如意萬司，九天溥度院，隨所傳俱開寫將軍神吏，玉童玉女，合該傳授。將吏官君，疾速分景化形，隨逐香火伺候，交撥輔佐宣行。庶弟子某人，證誓萬靈，告盟衆聖，勤修精進，學道參真，存念行持，濟生度往，身膺仙職，心契玄宗，智慧洞明，慈悲利益，魔試寢絕，靈貺日臻，譽望興隆，邇遐皈向，功圓道備，舉形仙飛，永暢真風，益光宗緒，誓終浩劫，歸戴玄元。蒙如所陳，允昭聖造。

謝罪祈雨章 雷霆齋合用

臣愚蒙無取，疏謬何庸，夙依覆育之恩，勉飭精修之志，承符領教，宣德濟人，凡有皈投，理宜關告。臣謹據齋意，臣切惟春耕秋斂，稼穡之常，久旱亢陽，炁運之變，儻時雨未敷於播種，則嘉禾曷望於豐登？況溝澮之如焚，極閭閻之愁嘆，何以卒歲？坐見饑荒，諒萬兆之積過浩繁，而司土之神明譴責匪繇，帝力莫顧民哀。謹爲拜章一通，上聞三

天，伏望道德曲成，慈悲善應，特降敕命，告下十方三界一切真司，原赦下民隱顯之愆，垂軫歲事阻飢之苦。亟沛甘澤，爲長禾苗，更乞告宣主宰雷霆之司，掌執風雨之吏，湫澗澤洞，威聖龍神，城隍山川，祀典社貌，應千攸屬，各體慈仁。嘯命風伯雨師，指麾雷公電母，普注膏雨，甦解焦枯。臣謹爲上請

天翁正氣君，河上真人，九海九江九河北玄君各一人，官將一百二十人，主水炁泉源，興雲致雨。海中玉女千二百人，河伯呂公子三十六人，主興起水脉，立降風雨。四洲九谷君，靈臺漢明君，九州玄冥君，九江北玄君，九侯君各一人，官將各一百二十人，湖中玉女千二百人，主召攝河伯使者，青水帝君，九江水帝，十二溪女，水部鬼神，河平掾吏，合符行雨。應時下降於疆邑之內，驅雷役電，興風布雲，先霖霖於江河，次霧霏於郊野，即俾甘霖，應候好雨知時，槁禾回青，平疇變綠，苗秀而實，歲稔且穰。騰樂事於垆原，播歡聲於甌壑，願拜成終之造，允垂資始之

恩，更冀百穀用成，九垓咸遂，遺蝗遁影，妖魅潛蹤。飽食暖衣，極三農而快樂；仰事俯育，歷百歲以光華。蒙如所陳，允昭宸貺。

祈嗣章祈嗣用

臣草芥微生，塵泥賤品，濫承正化，得奉真宗，無半功之可書，有千愆之堪錄，曲蒙覆育，寬籍汪涵，敢九拜以歸誠，僭一言而瀆聽。臣謹據齋意，臣切惟父子有親，人倫之本，夫婦有別，天屬之常，儻身命有犯於孤辰與運限，或罹於寡宿，或相囚戰，或犯刑衝，致嗣續之未諧，使宗祊之莫托，逡巡暮景，翁忽衰齡，自非請命於玄穹，曷克承恩於黃混？謹爲拜章一通，上聞三天，伏望大德好生，至仁無外，特降敕旨，告下玄曹，應身命中，夙生今世，所有戰衝，盡與解釋。仍乞賜降玉清道炁，靈寶妙光，灌注某人妻某氏身心之中，即令起處安和，胞胎凝結，疾病不作，榮衛勝常，十月周圓，誕生男嗣，願心圓滿，福慶駢臻。臣謹爲上請司命君，司錄君，南斗降生度化君，東斗度星通炁君，西

斗度魂結胎君，北斗通魂通血實骨君，中斗度魂成人音聲君，主成就胞胎，結聚魂魄。注生夫人，注生天女，通脉運骨天女，回星度胎天女各五人，從官各一十二人，主和合陰陽，結胎成形。度胎夫人五人，上詣五方五斗闕下，請以五方真炁覆育己身，榮衛調和，凝結胎孕。五行君，素白玄明君，文曆君各一人，官將各一百二十人，主降炁結胎，除邪護正，解除夫妻刑害，成就陽男中神。太和真君，陰陽生炁君，三元丹田赤白君各五人，官將各一百二十人，主血炁流通，黃白相裹，多引陽炁，牢結男胎。陽神決吏，男神玉女各二人，甲子神人君吏，主扶助真胎凝結陽炁，若已孕女，回轉爲男。即俾某人妻某氏懷胎含孕，起居不傷，全陽成男，飲食無忌，月數滿足，必產陽男。日吉時良，速得分娩，母子周圓，以爲效信。

文昌祈祿章祈祿用

臣睚眦無取，骯髒何庸，濫叨雨露之恩，思積雷霆之譴，尚祈洪造，俯賜慈觀。臣謹據齋意，臣職惟領教理，難抑違依，

按真科次第修奉。臣切惟登崇俊良，拔擢材彥，一則闕於運限，二則系於修爲，儻祖宗之積累未陳，與今昔之過愆尤厚，既乖踐履，難就功名，自非帝造之維持，曷副民情之願望？謹爲拜章一通，上聞三天，伏望大慈曲垂惠澤，特降敕命，行下三界合屬玄曹，爲某人禳謝星躔，和平運氣，赦除障累，紀錄善功，增注勳名，光榮宗祖。臣謹爲上請夫子君一人，官將一百二十人，東井清明君決了吏，一合來下，以溫潤清和英靈善爽之炁，下布某人五藏四肢，身體骨節之間，安定神靈，衛護真炁，驅三尸，滅九蟲，背死向生，却禍來福，心志開通，超拔林能。五經九炁君一人，官將一百二十人，主智慧圓明，與衆有異，天王玉女千二百人，衣青衣，主部領萬官賜以印綬，運爲舉動，能通神明。玉曆素女千二百人，衣赤衣，主紀姓名於玉曆，注壽算於丹書。若某人入仕之初，或願主倉庫，或願職金帛，或願典場務，或願領兵卒，或願司學校者，則陰陽有神靈主之，乞爲關告所在

靈應神祇、正直土地，默賜隲相，使之爵祿隨心，德行備足。若大選之後，圖謀願望，升品進階者，則上有星辰主之，乞爲宣告紫微太微二垣，公卿將相，大理尚書，文昌三台，南斗北斗，東壁奎宿，羽林壘壁，師門將軍，應主宰人間官職。諸星並爲垂象，宣精舒光絢彩，即俾橫飛，直上於省臺部監，徼塞邊陲，有九遷之榮華，膺十賚之富貴，公忠許國，清白傳家，祿壽兼全，以爲效信。

延生解厄延壽章 祈壽用

臣夙藉慶基，生逢昌運，佩鸞圖而領教，承鳳牒以學真，亶賴帡幪，若爲報稱，輒瀆千鈞之聽，庸陳一得之愚，仰冀高明，俯垂監察。臣謹據齋意，臣切惟人情欲壽，大德好生，儻運限有犯於威躔，致身命或臨於屯否，易逢厄疾，曷保年齡？今某人藉祖宗積累之功，膺門戶付託之任，欲祈眉壽，或衍遐齡，庸安樂於期順，勿馳驅於障難，子孫昌熾，富貴利宜，自非玄造之慈觀，焉得黃垓之佚老？謹爲拜章一通，上聞三天，伏望

廣運深仁，廓施惠澤，特降敕命，行下三界十方合屬玄曹，爲某人辟斥凶星，斷除戾炁，冤愆頓釋，身心雙隆，八節四時，纖災無惹，常居吉慶，永處福齡，百歲周圓，一身康泰。臣謹爲上請天曹，解厄去禍君，益算延壽君，五方生炁君，六甲將軍，主消災度厄，益命除邪。太和真一好生君，萬福君，解刑度厄君，益壽延命君，請命好生君，保命生炁君，收刑却煞君，斬絕刑煞，增益壽命。萬福君，運炁君，解厄君，南上君，司命君，司錄君，太白明星君，拘魂拘魄君，財庫君，祿庫君，定名玉曆君，各五人，官將各一百二十人，主落除死籍，注上生名。收殍君，斷殍君，破殍君，各一人，官將各一百二十人，主解除殍厄，拔贖壽命。東斗主算君，西斗紀名君，北斗落死君，南斗上生君，中斗大魁君各一人，官將一百二十人，主度脫五行災厄，增紀壽算。六十甲子，從官吏兵，主張解年窮算盡之厄，消除命衰運敗之災。五方五帝君，從官吏兵，各乘本方真炁，執符持節，上詣二十三

天星宿，玉曆之宮，檢尋命籍，增注年
齡。延命大將軍，兵士千二百人，主解
消灾厄，增益年命。明堂君，南昌君，
朱陵君，黃老君，天魂地魄君各一人，
拔命君十二人，鼎倉玉女五人，五緯玉
女，起生玉女，玉曆玉女各一千二百
人，主度脫年命，增壽延生。諸部官
君，和合保護，解除二十四厄，增延壽
算。即俾某人命運亨通，灾危驅遁，福
祿興萃，壽算延長，無難無灾，多样多
慶，雲仍袞袞，門戶輝輝，以為效信。

謝罪祈晴章

祈晴用

臣稟資疏散，賦性庸愚，印武班聯，
強顏奏對，每捫心而省過，期弘道以憲
天，庶證勳勞，上裨化育。臣謹據齋意，臣
切惟務農種穀，宜藉天時，秋斂春耕，
惟資地利，所願五風而十雨，庶令百穀
以三登。況茲郊野之田，勢處陂塘之
側，纔致霖潦，澎湃莫支，乃經旬罹積
雨之傷，致稻苗多乘流而槁。歲事足
慮，生民荐飢，若非開霽以斷流，何以
有年而多稼？全資聖造，特賜慈觀。
謹為拜章一通，上聞三天，伏望帝德好

生，民情堪憫，特降敕命，關告匝境里
社，一切玄司，散茲雨陰，即成晴淋，庶
得三農勤動，百穀豐成，田疇無滄浸之
憂，黎庶免飢饉之苦，優游卒歲，允藉
天恩。臣謹為上請天翁正炁君一人，官
將一百二十人，兵士七十萬人，九海北
玄君一人，官將一百二十人，河上玉女
千二百人，主收雲止雨，致風興霽。水
泉官屬八海九江掾吏，主決開壅脉，疏
導百川，即俾四境狂霖，登時開霽，陰
雲解駁，紅日陸離，田野歡心，耕耘樂
意。坐看刈穫，白粲登場，實叨覆護之
恩，加拜生成之賜。更祈敕旨，行下四
海四瀆，溪源潭洞，應干龍神，洎玄虛
主，掌今年今季風雷雨部，一切神祇，
咸令知委，並與停風息浪，收雨散雲，
濃陰開明，日光照野，禾稻豐稔，稼穡
盈成，樂歲無憂，以為效信。

禳火灾章

禳灾道場用

臣草茅賤質，樗櫟散材，謬處班聯，濫司
濟度，敢罄小心之禱，庸祈大造之仁。
臣謹據齋意，臣切惟仰事俯育，端藉室廬，
接棟連甍，乃堪衣食，實生成之厚利，

宜上帝之矜憐。倏於前朝忽傳星變，
謂來墮於屋角，勢有似於火殃，由中驚
惶，罔知攸措。私料近至信宿，遠則旬
時，恐有燎原之憂，或致焚如之慘，綿
連井落，延亘鄉閭。若非請命於上蒼，
曷克流恩於下界？謹為拜章一通，上
聞三天，伏望廣運隆慈，廓施妙化，特
降敕命，關告匝境里域，一切真司，為某
人驅除火灾，即移他境，無生殃咎，流
虐黎元。臣謹為上請九海北玄君，天翁
正炁君，兵星神君，游都君，明星君，誅
殃君，天昌君各一人，官將各一百二十
人，河上玉女千二百人，蓋天大將軍黃
衣兵吏各十萬人，無上天君兵士七十
萬人，主動畢星升陰炁，驅六丁六甲，
消滅火殃之鬼，驅逐火精之怪，與北方
黑帝羽子之精，壬癸正炁，太陰水德，
防制火灾，即令斷絕。仍關風伯雨師
下雨滅火，當境神祇，斥遣火怪，速令
遠離，庶得流熒遷徙，里社安寧，眷序
不移，屋宅如故，以昭宸貺。

謝罪遣蝗保田章

禳蝗道場用

臣塵泥賤品，草莽微生，值昌運之興行，

際真詮之曉覺，學真領教，弘道度人，誓補過以立功，庸承流而宣化。臣謹據齋意，臣切惟春耕秋斂，覬爾有年，地瘠天災，將成凶歲。既蟲蝗之誕發，實妖戾之肆興，林木盡童，田禾俱食，非箋心而哀籲，為請命以祈禳，曷保稻粱，終無損蠹。謹為拜章一通，上聞三天，伏望廣運慈悲，曲加鑒采，特降敕命，關告匝境，一切神司，辟斥妖蝗，斷除戾炁，乘狂風而徙他境，因暴雨而移別鄉，悉化餘蟲，無令遺種，庶得田禾秀發，成熟可期。臣謹為上請四野君，五野君，九野君，里域山川社稷君，蘊元君，白蠶五穀君，大田五斗君，六富君各二人，官將各百二十人，地畜君，天甲君，五千王君各一十二人，官將各一百二十人，主田疇豐稔，五穀登成，辟斥螟蝗，驅除鼠雀，稻苗秀好，蟲蟻遯逃。與社稷山川城隍神君，遞相保護，即俾田禾秀實，蟲蝗去離，轉之外疆，以為效信。

諸章官式 祈禳通用

保蠶

謹為上請暴食君，供食君，千澤君各一人，官將各一百二十人，仙宮玄男玄女，神男神女，素男素女，玉男玉女，蠶室仙吏，絲綿仙吏二十四人，養育蠶桑，保護絲繭，辟斥鼠耗，萬倍稱收。

保胎

謹為上請安胎君，護胎君，扶衰度厄君，萬福解厄君，護胎聖母，天醫玉女，護胎成生吏，保胎成生聖母，各二人，主保護胎孕，無有疾傷，十月周圓，產蓐快利。天醫太產吏，治通乳母，天門中君，天醫助生君，催生童子各二人，官將各一百二十人，主調理陰陽，和安胎藏，產蓐無阻，得就陽男。九天好生君，監生大神，衛房聖母，主錄勒籍真人，傳胎應夢童子，三元保胎大神，六十甲子從官符吏，主保胎護命，定魄安魂，臨產之時，毋有厄難。

保男

謹為上請陽仙護魂君，陰仙護魄君，天靈陽生君，主通於營衛，乳食平安。太皇萬福君，解患君各五人，官將各一百二十人，主錄護生氣，辟斥邪精。

逐盜

謹為上請五陽君，斥災君，營星君各一人，天位君，暴勝君，東西太白君各五人，官將各一百二十人，搖天動地君，九炁太兵五十萬人，赤衣日男、白衣月女各千二百人，絳衣日月大兵，承天大將軍兵士各十萬人，追逐寇盜，驅斥賊徒，遠離門庭，惠安閭里。

保六畜

謹為上請六畜王相君，天陽君，天儀君，天休君，黑水期君各一人，官將各一百二十人，主孳養六畜，榮盛不傷，斷逐疫瘟，斥除邪炁。歲星太元君一人，官將一百二十人，周天兵士十萬人，主治祠廟傷鬼擅殺六畜。

絕墓訟

謹為上請九地君，大元君，都侯君，文童君地甲君，九玄察氣君，卿大夫各一

人，官將各一百二十人，收塚訟鬼，安穩生人。五行君一人，大墓君、小墓君各五人，官將各一百二十人，主解除祖先譴責，利安塚墓風水，斥絕故炁，斷伏殃訟。太玄君，都侯君，誅殃君，太白中陳明星君各五人，官將各一百二十人，主收斷塚訟家鬼，解散和釋。

斷口舌

謹爲上請五經君一人，清靈六鐘太皇君五人，官將各一百二十人，主制斷口舌，斥絕變鬪。無上清玄君兵士十萬人，南鐘六星君五人，南鐘太真君一人，官將一百二十人，太陰君吏十二人，主收捕口舌，禁斥誣罵。左惠右善君一人，官將一百二十人，仙花玉女千二百人，主斷除口舌，解消耗殃。五方大領神吏，主鎖惡人口舌，令不言語，從今絕滅。

除官訟

謹爲上請冠帶君，青禽君，四顧君，八門君，北一官左童君各一人，官將各一百二十人，收刑領連吏一百二十人，八甲周趙女三千七百人，主縣官公事，悉

令消絕。察惡君一人，官將一百二十人，主收斥毀謗，息弭衆言。五方五帝大夫君吏五十人，斬斧陽父君，破市大將軍，破獄大將軍，脫繫大將軍，解患大將軍，散事大將軍，鎮訟大將軍，七部大夫官將吏兵，主迴化官事，悉令消除。

翻呪詛

謹爲上請翻倒君一人，官將一百二十人，主翻解呪詛，和釋冤憎。青龍白虎大將軍，年月日時四煞，天煞地煞，三十六煞，官將各一百二十人，主收攝呪詛，和同仇讎。若東方木地，年月日時，就木神呪詛者，請金炁神解而除之。若南方火地，年月日時，就火神呪詛者，請水炁神解而除之。若西方金地，年月日時，就金神呪詛者，請火炁神解而除之。若北方水地，年月日時，就水神呪詛者，請土炁神解而除之。若中央土地，年月日時，就土神呪詛者，請木炁神解而除之。天罡五行君，赤帝兵士百萬人，建天司馬千二百人，主收捕廟貌之鬼。南昌君、東關君各

一人，官將各一百二十人，主收捕林社呪詛之鬼。旺相君一人，官將一百二十人，主收捕師巫竈前呪詛之鬼。八卦君兵士十萬人，還功君、破邪君各一人，官將各一百二十人，主收捕造作形像呪詛之鬼。五方大額君各一人，兵士各一百二十人，主收捕口舌叫喚呪詛之鬼。邪神淫祠，盟誓魔倒，貪饕陷害，侵損生人，諸部官君速令消滅。若惡人謀議呪詛者，請無極天生兵馬十萬人，主收逆理陷害禱祠之鬼，攝送酆獄，歸身自受，遷拔亡爽，即得超升。

除顛邪

謹爲上請無上中宮五營校尉兵五十萬人，請玄公君一人，官將一百二十人，無上天士君五人，官將一百二十人，無上九江茂盛君兵士百萬人，主收捕陸梁精邪、狂歌叫喚、興妖之鬼。太古華蓋君二十四人，天樂君五人，述炁君，地精君，破逆君，天地水炁君，天玄開閉君各一人，考毒君五人，官將各一百二十人，地孔君青衣兵士十萬人，主叫呼狂易，失志顛邪。天宮健吏十二人，

兵士一百二十人，赤車將軍十二人，吏兵士十萬人，天貴君敢健吏，天五侯將軍兵士十萬人，太甲君，朱陰君，門都君，右玄都君，陽明君各一人，官將各一百二十人，主收捕精邪，誅滅鬼賊，與所在真官，社稷山林孟長家中守宅衆神，一合誅戮，種類無遺。

防劫盜

謹爲上請萬維君，東西面太白天戰君各一人，官將各一百二十人，九天乾元君，搖天動地君九炁兵五十萬衆，天大兵十萬人，主盜賊劫掠，收捕無餘。五方大額君各十萬人，主圖謀抄掠，神歸陰。東九夷君，南八蠻君，西六戎君，北五狄君，中三秦君，各十二人，主守護井間，辟斥劫盜。

利宅舍却虛耗

謹爲上請安炁君，太玄君，赤白沙君，元炁君，天玄君各一人，官將各一百二十人，主收攝橫禍，利安宅庭，斥散凶殃，擒束蠱怪。天昌君黃衣兵士，太白君各十萬人，天罡官將一百二十人，主收捕殃煞，解逐災害。青龍君一人，官

將一百二十人，五福天官，地祇十二官將，與守宅三將軍三十萬，主驅遣虛耗，利宜畜養。天德廣大吏五人，主驅除群凶，收絕邪鬼。

保遠行

謹爲上請萬里君，北馬君各一人，官將各一百二十人，明堂玉女千二百人，主遠行利涉，謀望稱懷，盜賊不逢，災殃遠離。

保移徙

謹爲上請郡邑大神君，仙官將息君，去穢君各一人，官將各一百二十人，主宅舍移徙，不傷禁忌，人口安泰，財畜和平。

解冤愆

謹爲上請解罪君，解過君，解刑君，解謫君各一人，官將各一百二十人，主解釋冤愆，調除考謫。

祈雪

謹爲上請靈臺漢明君，九洲玄明君各一人，官將各一百二十人，主攝河伯。呂公子三十六人，與水帝十二溪女，水部神祇，興雲下雪。九江北玄君，四洲

九谷君，四洲九海君，浮雲使者各一人，官將各一百二十人，一合來下，關風伯雨師，社令正神，起風積雪。

右諸項章請官式，在人分合，以滿齋主期望之心。又須知行下所屬玄曹，假如祈雨則須乞教旨，下扶桑水府，賜谷神王，蓬萊都水使者，水官司命，四海九江，三元水府，四瀆五湖，十二溪真，泉源潭洞，今年歲分行雨，龍神風伯雨師，雷公電母，九州社令，管界神祇，協力同心，起風雲雷電，下雨應時。

太上濟度章赦卷上

太上濟度章赦卷中

章

破酆都開業道章

關度黃錄用

具位臣某誠惶誠恐，稽首頓首，再拜上言，臣樗櫟散材，蓬茅賤質，幸緣宿慶，濫綴真班，功無絲粟之圓，過有淵陵之積，曲蒙涵貸、未賜誅夷，誓勉操修，庸期報稱，既承投懇，敢不關聞。臣謹據入意，臣切惟三官九署，北都羅酆，六洞十宮，冥關幽夜，水火考對，生死拘維，茹苦終天，千齡展轉，雖衆生之妄業自受，而上玄之仁澤堪矜，非賴赦原，曷臻超邁？謹爲拜章一通，上聞三天，伏望慈悲，曲垂矜憫，特降玉清道炁，靈寶妙光，煥朗十方，開明九壘，即俾亡故，某人暨九玄七祖，億劫種親，六道四生，諸類幽爽，灌沐妙炁，頓悟良心，宿劫冤愆，應時解散。臣謹爲上請十方飛天使者，十方救苦玉童玉女，上詣三天金闕玉陛下，請降元始符命，救苦真符，

告下十方三界無極神鄉天地水官，陰陽罪錄。三官九府，百二十曹，北都羅酆，內外宮洞，阿鼻無間，大小鐵圍，十二河源，泉曲之府，九幽五嶽，罪考主司，五苦三塗，諸大地獄，五道都府，執法冥曹，乘此符光，輝明照耀，鐵城摧毀，苦考蠲停，枷索脫除，繫囚消廢，爐炭銅柱，化作騫林，鑊湯冰池，悉成蓮沼，灰河炮炭，俱變清涼，劍戟刀山，盡爲寶樹，蠲炎烈火之獄，爍重重金剛之山，執對停平，冤仇和釋，惡根落滅，罪籍捐除，赦宥亡過。某人溥及幽冥，無鞅滯爽囚徒苦趣，悉遂逍遙，滯魄沉魂，各獲解脫，更希睿旨，勅下青宮，開紫陽玉匱之函，出應化慈尊之號，十方流演，萬品皈依，廣開法門，飛度累戶，庶使善緣霽霈，靈貺羅敷，均沐生成，以爲效信，恩惟太上，分別求哀。臣愚謹因二官直使，正一功曹，左右官使者，陰陽神訣吏，科車赤符吏，剛風騎置吏，驛馬上章吏，飛龍騎吏，進章鳳凰騎，上章雲龍騎，言章風發騎，御章神龍騎，奏章飛龍飛虎騎各二人出操。

臣爲齋主某拜上破酆都開業道章文，上詣三天曹，伏願天恩告報。臣誠惶誠恐，稽首頓首，再拜以聞。

空三行

臣姓某屬州某縣某鄉某里某宮觀某靖焚修。

空三行

太上無形無名虛無自然至真大道無上玄尊金闕七寶玉陛下。

空三行

太歲某年月日於某處拜上。

右凡書章用黃紙朱書，紙高一尺一寸六分，行闊一寸二分，幅宜單幅，幅宜單行，每行定排十七字，前一幅指兩行，空第三行，方寫章銜疊書，下寫臣某誠惶誠恐，稽首頓首再拜。此一行不指字，看長短到何處住。第四行寫上言字，低於職銜一寸，此行方指十七字數也。自上言以下，至後每行指字如法，行上留半存，行下不通。走蠟人姓名作一字，寫不得抽破，如鬼字，如凶字，如死字，如賊字，諸不佳字不得在行上頭。如仙字、人字、生字諸佳字不得在行下

頭寫，至以為效信。即揆云：恩惟太上，分別求哀，臣愚謹因二官直使，正一功曹，左右官使者，陰陽神訣吏，科車赤符吏，剛風騎置吏，驛馬上章吏，飛龍騎吏，進章鳳凰騎，上章雲龍騎，言章風發騎，御章神龍騎，奏章飛龍飛虎騎各二人出操。臣

為齋主某人拜上某章，上詣三天曹，伏願天恩告報。臣誠惶誠恐，稽首頓首，再拜以聞。以聞二字低前行一字，與再拜相去空三行，疊書臣姓某，屬州某縣某鄉某里某宮觀某靖焚修，須自半行寫至下，其下與紙下頭相平。又空三行疊寫：大道銜太上無形無名虛無自然至真大道無上玄尊金闕七寶玉陛下，只指書四寸八分。又空三行自半行寫太歲某年某月某日於某處拜上，其下與紙下頭相平，太歲以後皆空紙矣。書章不隔日，填大道銜不隔時，故留某時及陛下一點及以聞字內耳。字一直筆未填，至校章時方填也。章可漏，上寫大道銜具法位銜，臣姓某章奏，謹封方函。上

寫謹謹上詣三天門，下具法師銜位，臣姓某謹重封入章在函內。章函長一尺二寸，闊一寸八分，以青緊線三度纏之，其十字結處及兩頭，並貼紙印封之，又入青紙方函寫如前方函式，前後以袱包之，此封章法也。

素車白馬章

臣賦性迂疏，稟姿愚拙，職忝司於濟度，誠敢怠於關聞，竄冀高明，曲原狂斐。臣謹據入意，臣職惟領教，理難抑違，謹涓今月某日為始，就某處肅建玄壇，依按真科次第修奉。臣切惟九幽六洞三官北酆，冥路幽關，職司考對，匪藉蒼穹之宣告，曷令部衛於形魂。謹為拜章一通，上聞三天，伏望慈悲，曲垂矜憫，特降玉清道炁，靈寶妙光，照耀陰鄉，煥明夜府，即俾亡故某人，洎九玄七祖，億劫種親，六道四生，諸類幽爽，免淪苦趣，各脫拘維，來詣玄壇，證品升度。臣謹為上請素車白馬大將軍一十

二人，官將一百二十人，九龍符命使者一十二人，官將一百二十人，太玄玉女一十二人，官將一百二十人，太玄直符

一十二人，官將一百二十人，上詣三天金闕玉陛下，請降太上赦赦生天寶籙，告下十方三界，無極神鄉，北都羅酆，泉曲之府，三官九署，百二十曹，水火陰陽，內外宮洞，三十六獄，無間阿鼻，大小鐵圍，炎池冰沼，四瀆五岳，十二河源，五帝考官，六宮掾吏，巨天力士，執罰神兵，司殺司功，司錄司命，主考主罪，主獄主非，四明賓公，天門庭長，十宮六洞，五帝大魔，溟泠大神，五道都府，幽臺冥掾，長夜鬼官，無量陰曹，咸令知委遵承。今來建壇之所頒行符命，侍衛送迎，疾令上件亡魂，衆苦蕩除，出離地獄，永辭幽夜，睹見光明，黑簿燒焚，業根披散，參朝玄座，受煉更生，以為效信。

開通道路章

臣惟蠢濁，性稟顛蒙，冒領玄階，竄繇洪造，敢竭再三之瀆，庸抒萬一之忱。臣謹據意忱，臣職惟領教，理難抑違，謹涓今月某日為始，就某處肅建玄壇，依按真科次第修奉。臣切慮魂魄，爽識來往，經由道路關津，或生拘障，非賴上

玄之誥命，曷令阡陌之開通？謹爲拜

章一通，上聞三天，伏望慈悲，曲垂矜憫，特降玉清道氣，靈寶妙光，開闢幽途，光明無極，即俾亡故某人洎九玄七祖，億劫種親，六道四生，諸類幽爽，徑離所部來覲齋壇，釋罪通幽，朝真受煉。臣謹爲上請太玄直符，太乙使者，五帝直符，十天傳言騎吏，玄都金龍茭龍驛吏，玉龍飛龍驛吏各一十二人，官將各一百二十人，上詣三天金闕玉陛下，請降東華青宮九龍符命，紫陽寶節，五方生炁，十天寶符，洞朗幽陰，開明長夜，告下天牢地獄，水府陰曹，冥局土司，泉曲六道，北酆九壘，三官九幽，五嶽十宮，九州社令，洞天福地，考校曹僚，蒿里丈人，丘丞墓伯，河侯河掾，土下官君，歲德尊神，山林孟長，泉源溪澗，冥路幽關，血食神司，城隍里域，社廟土地，一切主曹，咸稟天符，遵依告戒，除冤拔罪，啓路開扃，釋放上件亡魂，整肅形儀，經歷次第，來詣壇席，聽法參真，傳授戒符，領沾功德，幽夜不經於險阻，冥關克遂於逍遙，召攝無

拘，以符效信。

攝召亡魂章

臣控伺無識，愚鈍自將，冒闡明科，奉揚妙化，爰瀆聖威之峻，荐陳愚悃之微，亶藉慈悲，俯垂采覽。臣謹據入意，臣職惟領教，理難抑違，謹涓某月某日爲始，就某處肅建玄壇，依按真科，次第修奉。臣切慮冥途寥廓，幽路淒迷，匪憑召攝之威，曷顯神虎之政？謹遵太乙神虎祕法，宣告太乙玄冥玉札神虎符命，鐵迹臺光，寶章建立，神虎攝召，壇刻時定，令追攝亡故某人洎九玄七祖，億劫種親，六道四生，諸類幽爽，顯接陽眷，昭現神機。謹爲拜上章文，上聞三天，伏望慈悲，曲垂矜憫，特降玉清道炁，靈寶妙光，洞朗幽關，無有窒礙，玉札符命，照耀輝華，冥吏幽曹，丕承敬聽。臣謹爲上請北魁玄範，神虎內真，雄左大力，統制百節，三魂符吏，衆機玉曹，玄伯雌右武鸞，提魂攝魄倒生玄司，飛符玉札主吏，上部追魂使者，中部追魂使者，下部追魂使者，追家先七祖三魂，上元玉女，追傷亡癩癩癩癩瘡瘡

亡魂，中元玉女，追無主癆瘵風癱亡

魂，下元玉女，追瘟疫雷噴亡魂，玉符玉女，追驚吊刀刑自縊落水投火胎產厭穢亡魂，龜真素握玉女，追毒藥厭魅呪詛刀兵劫掠王法禽獸所害亡魂，九靈幽臺玉女，追見禁罪魂。正一延生六甲隱天靈符玉女，疾速來降，承符宣德，攝魄召魂。又爲上請丹天左衛大將軍，五方啓道童子，十方道主者，六道功曹，三界追魂使者，天洞天真，清泠泠，尋魂攝魄，對魂聚魂諸大將軍，一合來下，爲臣攝召上件亡魂，聚神復炁，克返陽居，升幡現形，通靈入夢，上彰道化，下慰哀情，受煉膺符，聞經聽法，削罪書於北鬱，紀真籍於南丹，時刻升遷，以爲效信。

沐浴醫治章

臣塵泥漏品，螻蟻微生，冒膺宣德之班，敢怠度人之典，威顏有赫，采聽是期。臣謹據入意，臣職惟領教，理難抑違，謹涓某月某日爲始，就某處肅建玄壇，依按真科，次第修奉。臣切慮上件亡魂，幽關閉鬱，陰垢纏罹，欲期容體之澄清，

必賴神泉之蕩滌，謹爲拜章一通，上聞三天，伏望慈悲，俯垂矜憫，特降玉清道炁，靈寶妙光，浹灌蘭池，輝華沐浴，即俾亡故某泊九玄七祖，億劫種親，六道四生，諸類幽爽，蠲消氛翳，潔湛形神，六府洞明，一塵不染。臣謹爲上請

東井玉女，華池夫人，浣濯玉女，沐浴君吏，日月童子各一人，五方解穢君將吏各一百二十人，一合下降，神化東井黃華之池，西田流汨之沼，汲取石景王肥，黃華神水，五方正炁，日月芝英，甘露金津，雲腴玉醴，沐浴所度，亡魂灌煉，罪塵滌除，障垢淨結，節胞胎之穢，清冤債煩惱之氛。又爲上請東方青靈始老，哺飴以九炁之青津，南方丹靈真老，哺飴以三炁之丹華，西方皓靈黃老，哺飴以七炁之素漿，北方五靈玄老，哺飴以五炁之玄滋，中央黃靈玄老，哺飴以一炁之黃英，定魄安魂，自生五臟。又爲上請金剛百煉，玉液千和，太白流光，元皇散精，解除鬱煩，去蕩滓穢，身心清淨，智慧洞明。又爲上請天醫神吏，尚藥靈官，三五功曹，天

醫博士，砭石小吏，敷藥靈童，密運九轉芝英，五色神藥，布散經絡藏府之中，救療生前榮衛之病，即使上件亡魂宿患清平，沈痾痊愈，精神復舊，肢體潔清，受化更生，以爲效信。

溥度幽魂章

臣忝列真階，莫裨玄化，矢心領教，勵志度人，荐干咫尺之威，庸露億千之愫。臣謹據齋意，臣職惟領教，理難抑違，謹涓今日某日爲始，就某處肅建玄壇，次第修奉。臣切見冥關幽路，滯魄窮魂，或水火飄焚，或兵戈謀害，或木石損磕，或挺刃刑傷，或久抱飢寒，或曾遭鳩毒，或寇盜殺戮，或蛇虎吞殘，或王法凌遲，或震雷噴擊，或覆車墜馬，或自縊投河，或他境流亡，或從軍傾斃，或鬼神拘繫，或冤對勾連，或瘡跛聾盲，或瘴瘟癰疰，或胎產殞命，或疾病夭傷，或宿抱怨嗟，或常懷憂忿，或玄恩未度，或常赦不原，孤滯千名，沈淪萬姓，山林寄影，郊野潛形，流浪無歸，實堪憐恤，惟黃籙昭天漏，泉之澤正，陰關求哀，望度之機。臣雖稟承玉符，

冒頒大赦，尚慮功德未徧幽冥，謹遵無量度人之道，取今日某日夜，修設玄都大獻，玉山淨供，攝召九州十界六道四生諸類傷亡，無邊爽識，享食受煉，脫苦生仙，自非大道之慈憐，曷俾衆魂之解脫？謹爲拜章一通，上聞三天，伏望慈悲，特垂矜憫，頒降玉清道炁，靈寶妙光，遍滿十方，輝明九野，上極無上，下極無下，接引萬類，均赴法筵，滌罪解冤，煉形受化。臣謹爲上請玉清溟滓大梵靈官，青玄黃籙救苦靈官功曹，玉童玉女，各三十二人，仙吏一百人，上詣三天金闕玉陛下，請降元皇慈悲，吉祥甘露，賫持天慈，赦宥寶幡，一合下降，即爲呪洒甘露，溥化斛筵，周徧虛空，無窮無盡，哺飴衆爽，充足豐盈，隨感來歆，悉皆飽滿。仰承元始符命，金籙白簡，救苦真符，長生靈符，太上生天寶籙，東華青宮，九龍符命，寶光羅絡，拔度幽沈，不分六道四生，咸受黃籙冶煉，即使未度者度，未生者生，未升者升，未化者化，合符膺券，返陰還陽，超凌人天，以爲效信。

九煉生仙升度亡魂章

臣道未通玄，德難入妙，屢爲人而造請，每拊己以凌兢，仰藉汪涵，俯加原貸。臣謹據齋意，臣職惟領教，理難抑違，謹涓今月某日爲始，就某處肅建玄壇，次第修奉。臣切慮上件亡魂，陰暗久淪，陽光易隔，匪藉黃華之治煉，曷令碧落之登真？謹取某日夜，遵依靈寶大法，無量度人，開廓五文，奉行九煉，先爲拜章一通，上聞三天，伏望慈悲，曲垂矜憫，特降玉清道炁，靈寶妙光，灌注玄壇，輝明洞耀，即俾上件亡魂，身沐靈光，心滌陰穢，水火煉質，表裏周圓。謹爲上請南宮度人，不死尊神，南極長生大君，度世司馬大神，好生韓君丈人真君，南上司命司錄，延壽益算度厄尊神，迴骸起死無量度人真君，度魂上生南宮真君，奉爲亡故某人注算金文，定名玉簡。又爲上請太乙救苦仙吏，金闕化身仙吏，朱陵度命仙吏，逍遙快樂仙吏，寶華圓滿仙吏，煉度玉司，靈寶仙官，玉童玉女，將軍使者，功曹主吏，上詣三天金闕玉陛下，請降元始符命，金

錄白簡，長生靈符，內音玉字，赤書真文，上生黃籙寶誥，下臨壇席，奉爲亡故某人破酆都之穢濁，蕩泉壤之幽陰，削落業根，焚燒罪籍，飛度五戶，斬滅三尸，建立法橋，迴旋雲界，啓黃華之寶井，立流火之神庭，陶冶陽靈，蕩除陰翳，上登朱府，下入開光，復返萬神，重生九炁，披登天之法服，駕蓮花之寶輿，徑詣天門，朝禮金闕，逍遙自在，與道合真，永無輪轉之憂，常履熙明之運。

酆都赦罪章 明真齋用

臣生居濁世，運際昌期，佩籙參玄，傳經悟道，誓度人而領教，庶補過以立功，凡有皈投，敢忘關告。臣謹據齋意，臣切惟三官九署，百二十曹，六洞十宮，三十六獄，鐵圍無間，泉曲河源，五苦三途，九幽五岳，典司憲令，考對愆尤。愚俗衆生，罔明正理，造冤積業，抱惡逞非，致使名隸北酆，魂歸幽夜，拘閉陰獄，囚繫終天，痛苦備嬰，莫由解脫，匪賴玄虛之曲赦，曷令罪報之蠲除？謹爲拜章一通，上聞三天，伏望大德好

生，至仁無外，特降玉清道炁，靈寶妙光，朗映十方，煥明三界，冥關幽路，照耀輝華，地累罪魂，應時清淨。即俾上件亡魂，出離夜壑，睹見晨陽，開發善心，自識宿命，悔過進善，脫苦超生。臣謹爲上請降真召靈符吏，降真召靈童子各一人，特爲亡故某人恭請大極真符，告下東極天中長樂宮內大慈仁者，尋聲赴感太乙救苦天尊，希降威神，慧光普照，十方世界，重陰極壘，北都寒池，一一獄中，悉成陽境，鐵城摧毀，枷鎖脫除，赦宥亡故某人萬罪，蕩除冤仇，和釋不經，地獄睹見，光明仰賴。天尊上聖，召十方飛天神王救苦真人，救苦童子，青玄玉女，遍下幽獄，降慈悲之法雨，洒甘露之寶漿，即得冰雪生春，炎烟息焰，刀化玉樹，劍變騫林，寒冰溟泠，頓除凜冽，鑊湯銅柱，悉獲清涼，獄卒牛頭，俱生善念，銅蛇鐵狗，永斷惡緣，曹局除考對之名，司案焚業報之字，以至驅雷役電，漣汲溟波，負石擔沙，天圓轉匝，穿地引水，運風掃山，謫役囚徒，均承妙化，斷地逮役，度上南

宮，蒙如懇切之祈，允拜提携之造。

沐浴煉度章

臣塵埃賤質，草莽微生，誤沐甄陶，俾登階品，宣藉圓成之造，敢忘報稱之私，誓拯沈淪，庶敦勳行。臣謹據齋意，臣職惟領教，理難抑違，謹涓今日某日爲始，就某處肅建玄壇，依按真科，次第修奉。臣切惟積夜重泉，冥鄉幽路，陰氛縈結，業垢交罹，衆神魂墮寒庭，神歸夜壑，陰霾混翳，晦濁蒙維，雖已頒告符章，曲行攝召，慮淪幽域，莫遂參朝，自非沐浴於神泉，曷俾形魂之蕩滌？謹爲拜章一通，上聞三天，伏望大德好生，至仁無外，特降玉清道炁，靈寶妙光，洞映蘭池，神化玄液，即俾亡故某人澡身浴德，蕩垢清塵，洗表裏之昏蒙，除形神之熱惱，朝真聽法，度命升玄。臣謹爲上請五方五靈童子各五人，解穢君吏各一百二十人，浣濯夫人黃華玉女各一人，應時下降，取黃華神水，煉尸素漿，甘露金津，雲腴玉醴，灌注蘭湯之中，沐浴亡故某人，湔滌塵勞，消除罪障，五臟六腑，悉得清明，九竅四肢，

俱成澄潔。又爲上請主水主火大將軍，石景水母，流精玉女，九光童子，火鈴靈童，青玄煉魂，應干真衆，取南昌朱陵流火之庭，東井黃華流汨之沼，真水真火，一合來下，專爲亡故某人煉洗穢氛，陶澄累垢，粧嚴受度，克應升仙，永證無爲，不經輪轉。

升度亡靈章

臣陋質何庸，短材無取，師恩赫奕，幸睹希微，帝力輝華，若爲報效，期廣揚於濟度，克昭贊於生成。臣謹據齋意，臣職惟領教，理難抑違，謹涓今日某日爲始，就某處肅建玄壇，依按真科，次第修奉。臣切惟上件亡魂久淪陰地，獲睹陽光，自非度命以反生，曷俾超凌而自在？謹爲拜章一通，上聞三天，伏望大道好生，至仁無外，特降玉清道炁，靈寶妙光，朗耀玄虛，煥明壇墀，即俾上件亡魂，沐靈光而快樂，乘煉度以逍遙。臣謹爲上請南昌上官司命君、司錄君、延壽君、益算君、度厄君、度人不死君、南極長生君、度世司馬君、好生丈人君、迴骸起死無量度人君，升度亡故某人，

先入黃華寶井，次入流火神庭，濯質蕩形，除陰煉穢，挹九天之真炁，灌五帝之靈芒，氣象周圓，形神完復，飈車碧落，羽駕太清，升入天門，佩符合券，永無輪轉，常獲逍遙，受化更生，以爲效信。

遷拔亡靈章

遷拔道場用

臣福基夙挺，昌運欣逢，佩籙進階，傳經受道，深慚蹇淺，莫悟希夷，過有貫盈，功無縷積，尚沐生成之澤，俾司濟度之科，益勉操修，庸期報稱，敬奉詞悃，所合奏聞。臣謹據齋意，臣職惟領教，理難抑違，謹涓今日某日爲始，就某處肅建玄壇，依按真科，次第修奉。臣切惟三官九署，六洞十宮，泉曲河源，北鄴東岱，考校善惡，毫髮無差，濁世衆生，罔知修飾，六根三業，五慾七情，流浪顛冥，馳騁不息，致使魂歸幽府，神返幽關，冤仇繫縈，曹局推對，悠悠長夜，深可矜憐，自非上聖推惻隱之仁，曷俾下愚免沈淪之苦？謹爲拜章一通，上聞三天，伏望道德，曲成慈悲，丕冒特降玉清道炁，靈寶妙光，照耀鬱單，煥明

澤壘，即使亡故某人睹此靈輝，自識宿命，捨惡趨善，脫苦上生。臣謹爲上請太上十一陽門開光童子一十二人，天道功曹一人，九天雲路正一功曹九人，南昌上宮扶接引送神童玉女各一百二十人，手執太上遷神符命，開導靈幡，接引所薦亡魂蒙陽光之下燭，指雲路以上升，逍遙太空，永無淪墜。

蕩滌血湖章

血湖道場用

臣塵泥賤類，草莽微生，誤玷班聯，濫司濟度，莫報生成之德，誓宣化育之仁，凡有皈依，敢忘關告。臣謹據齋意，臣切念亡故某人三生四負，多積冤愆，六慾七情，易招釁咎，命罹產厄，神墮幽關，北酆東岱之曹，紀錄姓字，硤石血湖之獄，考對形魂，抱痛終天，無由解脫，爰念稟生之本始，孰非祖炁之分靈，妄業自招，實堪矜憫，帝恩無外，諒賜哀憐。謹爲拜章一通，上聞三天，伏望垂惠重泉，曲加省覽，特降玉清道炁，靈寶妙光，洞映十方，照燭長夜，變陰暗爲陽明之境，化血湖爲清淨之場，令諸罪人，自識宿命，捨惡趨善，脫苦超生。臣

謹爲上請三炁流光符吏，蕩滌血湖符吏各一人，官將各二十四人，上詣三天金闕玉陛下，請降三炁流光，真符玉元，蕩滌血湖，真符告下，北都羅酆大鐵圍山，硤石無間、血湖地獄，即冀符光朗耀，陰壤開明，原赦亡故某人洎見禁經產身亡，未得出離者，並與疾除罪簿，落滅惡根，解釋冤仇，開通性識，承今符命，獲脫冥途，來詣玄壇，聞經聽法，全形復質，隨果注生。又念淪染血腥，形神穢濁，來朝三寶，難近天光，謹爲上請五方五帝解穢君吏各一人，玉女使者各二十四人，九鳳破穢大將軍，滌穢大將軍，洗穢大將軍，滅穢大將軍各一人，官將各二十四人，沐浴東井君一人，官將二十四人，浣濯夫人黃華玉女各一人，仙花玉女一百二十人，一合來下，爲取黃華神水，煉尸素漿，甘露金津，雲映玉醴，灌注蘭湯之內，沐浴亡故某人，洗除產厭，蕩滌穢腥，俾令內外光明，形神潔淨，根塵業垢，並與澄清。又念亡故某人，淪謝之初，自膺痛毒，榮衛傷瘁，未遂安痊，謹爲上請天醫神

吏，尚藥靈官，治病功曹，太醫博士各一人，一合來下，密運神聖工巧，餌以日精月華，玉芝金醴，五色神丹，救療諸苦，庶得陰陽通暢，血炁和平，經絡還元，魂神澄正，朝真受度，托化人天，永無淪墜之憂，自在光明之界。更願靈光煒燁，慧澤周流，業海澄波，血湖息浪，人民品物，並受生成，舒化日於三塗，播仁風於八極。

滅度煉尸生仙章

五煉生尸齋用

臣幸藉宿因，濫裨妙化，誓廣宣於濟度，庸上贊於生成，過有淵陵，功無毫髮，尚祈恩霈，俯賜包容。臣伏爲先師某人，元命某年月日時生存日佩某經受某錄，奉某法補充某職，係某靖焚修。末學道淺，仙品未充，莫能背土凌空，飛騰霄漠，運應滅度，以某年月日身經太陰，享年幾歲，已準三洞仙度品格，衣服枕席，遍篆靈章，衛其尸形，又準滅度五煉生尸，寶經玉字真文，安鎮五方、護其神識，練吉遷葬，寄形土官。未葬更伺練吉寄形土官尤慮生存之日功德未周，恐阻超邁，遂卜今月某日，謹就某處崇建

靈寶滅度五煉生尸妙齋二晝夜，期將先師某人扶接引送，返形受生，遊行太空。臣事金闕，臣義同父子，志劇悲惶，孝子云情鐘父子志劇悲惶恭按真科次第修奉。臣切惟三官九府百二十曹，四極明科，三品洞律，昭如日月，威若雷霆，學道參真，易招罪戾，未經赦宥，必墮幽鄉，轉眼畏途，惟增駭汗。今先師某人生逢昌運，佩奉玄元，未明修真御景之方，徒抱濟物利人之志，元臘節會，禁戒多違，經錄法階，朝修有缺，重以飛章進表，每瀆仙真，設醮建齋，或干神吏，致使玄曹畢錄，黑簿登書，陽過未原，陰愆莫道，倏忽厭世，遽受沈寥，自非大道廣運於慈悲，曷俾後學疾躡於沖躡？謹為拜上丹章一通，上聞三天，伏望上聖垂仁，至真矜憫，特降玉清道炁，靈寶妙光，下覆先師某人魂魄尸形，削落愆尤，解除考訟，隨光御炁，徑上虛無，仍乞告下十方三界，一切真司，特為原赦宿生今世三業六情，泊學道以來無邊過咎，並從寬釋，移名紫籍，受化更生。臣謹為上請靈寶落滅惡道

靈官三人，官將各一百二十人，斷絕地根靈官四人，官將各一百二十人，飛度累戶靈官五人，官將各一百二十人，一合下降，為先師某人落滅三惡，斬絕地根，飛度五戶，名列太玄，乘景升神，上登無極。若先師某人魂魄淪墜三塗五苦、六天九幽者，即為度脫，高升上境。又為上請玄都金龍驛吏一十二人，東華青宮九龍符命使者，九天道功曹一人，十方飛天使者十人，官將各一百二十人，上詣三天金闕玉陛下，請降元始符命，金籙白簡，長生靈符，東華青宮九龍符命，登真度命，出離生死真符，南昌上宮寶誥，告下三官九署，五帝四司，無鞅陰治，若先師緣公私罪犯，未得解釋者，願乘此仙度功德，悉為赦除，若因三曾九祖億劫種親宿對罪緣結繫幽冥者，願為條錄生前建善之功，速為解宥，即冀改易罪籍，定名玉簡，遷神度品，高步天衢。又為上請九天三十二天，五老上帝諸天省府，北斗南辰，日月五星、天曹真衆、各降真炁，接引先師某人，蕩滌愆瑕，進升道境，復還

治職，炁入玄玄，登品成真，永無輪轉。更願先師某人所屬某岳某山，真靈正神，符下九土地官，各依部界，營衛尸形，灾害消除，塚墓寧靜，形安神守，魄不敢揚，持節契符，重甦骨肉，形與神合，遊宴騰凌，得為神仙，一如五煉生尸經旨，永奉玄恩，以為效信。

升度仙魂章師友命過用

臣綴武班聯，濫司濟度，叨恩逾分，拊己知元，誓弘洞輔之仁，密贊生成之德，尚祈洪造俯鑒丹忱。臣謹據齋意，臣職惟領教，理難抑違，切念某人幸藉夙緣，叨承玄蔭，佩錄奉法，受經學真，易涉塵寰，未明竅妙，建齋設醮，每冒威儀，拜表上章，實乖俯仰，破齋犯戒，縱業逞情，常失天和，多循人慾，三元五臘，莫謹朝修，甲子庚申，曾無懺謝，過書黑簿，名錄玄曹，未能坐脫，立忘升神，御炁，運應滅度，身經太陰，莫測升沈，倏經旬朔。孝子云，臣情鐘父子，志劇悲惶。弟子云，臣義均師友，志劇悲惶，自非上聖垂慈，高真孚佑，俯矜愚昧，力賜帡幪，何以洗浣前愆，導迎新貺？庸是

不揆狂斐，謹爲拜章一通，上聞三天，伏望大慈曲成，至仁無外，特降救命，行下十方三界，合屬去處，將某人浩劫以來，稟生之後，應有過犯，並與赦除，即俾定錄青宮，移名朱府，形神混合，烝象周圓，隨我學功，校勳遷賞，復還治職，烝入玄玄，克爲聖君金闕之臣，大揚聖化，緣運不絕，身得神仙，逍遙上清，永無輪轉。

斷絕復連章 度星齋用

臣性識迂愚，資材短陋，綴班聯而領教，誓濟度以推仁，凡有皈依，敢忘關奏？臣謹據齋意，臣切見上件亡魂，涉生以來，造業縱情，罔知檢戒，厭世之後，積愆抱釁，自致沈淪，流曳三途，顛連五苦，惟思執滯，豈念超凌。眷屬姻親，俱罹傳染，家門大小，積致傾亡。求替代以莫能，遂復連而無已，如斯陷溺，實可矜傷，自非玄造之拯提，曷俾下愚之安泰？謹爲拜章一通，上聞三天，伏望隆慈，曲加哀憫，特降玉清道炁，靈寶妙光，照燭重泉，釋明夜壘，即俾亡故某人，開通正念，悔悟宿因，醒覺前

非，自求升邁，免致延累，永斷復連。臣謹爲上請石安君、都星君、誅殃君、都平君、朔平君、天玄君、石仙君、高都君、斷殄君、回化君十人，天醫博士，善談大夫各一人，官將各一百二十人，除殃君、天昌君、無上高倉君、中宮左都候君各一人，兵士各一萬人，素車白馬君一人，吏兵十萬人，參星將軍，太白兵星，熒惑吏，鐵面敢健食鬼力士，天鄒甲卒吏兵官將，一合來下，爲齋主某人化諭先亡，分解冢訟，消除執著，斷絕復連。又爲上請斷蛀大將軍，斷尸大將軍各一人，官將兵士十萬人，九天補氣將、甘露將、護命將各一人，官將各三十二人，一合來下，保護未來病苦，斷除先亡復連，即令某人神魂利安，塚墓寧靜，徵呼塚訟，自此斷除，釋罪登真，永超幽暗。齋主某人泊內外眷屬，合門姻親，快樂逍遙，竟離傳染，精神安泰，營衛和平、富壽康寧，以爲效信。

啓告玄穹章 預修黃籙齋用

臣濫承玄貺、叨領真班，仰荷甄陶，俯深

銜戴，期暢生生之厚澤，庸裨化化之深仁，控告既勤，關聞敢後？臣謹據齋意，臣切慮建壇之所，劫灰以來，陰濁混凝，游氛四塞，塵霾流伏、昏垢飛揚，非繇解被之功，曷肅玄真之奉？重以故烝糾雜，人物紛葩，宜解滌除，庶令清淨。謹爲拜章一通，上聞三天，伏望大慈，曲施玄化，特降玉清道炁，靈寶妙光，上煥雲霄，下輝風壘，十華八極，罔不洞明，即俾所建齋壇，灌沐靈光，一塵不立，內外融潔，寶芝自生。臣謹爲上請五方五帝，解穢君各一人，官將一百二十人，捧持五和香泉，真精法水，一合下降，浣濯靈壇，解除厭穢。仙花玉女一千二百人，九鳳破穢，錄中運穢、解穢、收穢、却穢、除穢、斷穢、洗穢、蕩穢諸大將軍各一人，官將各一百二十人，五方五龍，主水使者，一合下降，蕩滌內外，潔齋應辦，器用室廬，悉獲澄清，更無厭滓。又爲上請降真召靈符吏，降真召靈童子各一人，賫持高上玉清仙王降真符命，元皇召靈符命，宣告三界，嘯命十方，策役千靈，關盟萬聖，

護持壇律，糾正齋功，由始及終，迄無障撓。更希敕旨行下玄壇，受事靈寶仙曹，省府院司，官君將吏，從臣請降，共佐洪釐，使齋主某人善果周圓，嘉祥密被，承恩今日，流慶他生，散壇言功，不負效信。

超凌祖玄解冤章

臣學術荒疏，材能淺局，每為人而有請，惟拊己以知慚，仰藉高明，俯垂淵鑒。臣謹據齋意，臣職惟領教，理難抑違，謹涓今日某日為始，就某處崇建玄壇，依按真科，次第修奉。臣切惟齋主某人，世緣酬酢，塵務蒙迷，九祖七玄，寧無罪累，三生四負，或結冤仇，非由解釋以超凌，曷俾善功而圓滿？謹先於某月某日夜，修設玄都大獻，玉山淨供，攝召上件亡魂，普及六道四生，諸類幽爽，享食受煉，膺戒佩符，若冤若親，俱超淨域，庶使齋主某人，一身清淨，萬罪蕩除，豕訟不生，怨憎何有，逍遙自在，成就良因。謹為拜章一通，上聞三天，伏望大慈，曲施宏化，特降玉清道炁，靈寶妙光，照耀陰局，開明夜府，幽冥萬

類，均脫化機，乘此靈光，來親壇墀，聞經聽法，各遂騰凌。臣謹為上請玉清溟滓大梵靈官三十二人，仙吏一百人，為齋主某人呪洒甘露，溥化斛筵，周遍虛空，無窮無盡，哺飴衆爽，各獲豐盈，隨感來歆，悉皆飽滿。又為上請玉清上解祖考靈官，解冤釋結靈官各三十二人，仙吏各一百人，為齋主某人開釋祖玄，疾除罪簿，永超愛網，獲脫輪迴，解釋仇讎，齊同慈愛，克離冤囿，竟陟生方，俾先亡永無繫戀之憂，而齋主克遂熏修之果。更為上請朱陵火府，南昌上宮，黃籙靈曹，執法仙衆，各持真水真火，煉度衆魂，俾出幽關，咸生淨域，庶幾恩甦品類，悉出迷途，冤愛冥靈，齊登道岸，敷太上無私之澤，贊玄元有造之仁，極天際地，咸膺至化。

不經地獄章

臣一介愚蒙，千生緣會，冒憑涵育，荐瀆崇嚴，雖揣分以凌兢，敢謄詞而關告。臣謹據齋意，臣領詞虔切，理難抑違，謹涓今日某日為始，就某處肅建玄壇，依按真科，次第修奉。臣切惟齋主某人，

托迹塵籠，隨緣世網，為人為己，易積愆尤，謀身謀家，動招罪障，恣情於三尸五累，逞志於三業六根，東岱簡書，北鄴錄籍，百年運盡，慮墮幽寥，九夜神遷，必膺考校，茲預投誠於玄極，先期曲赦於蒼穹，懺往罪而盡消，悔前非而不作，勿經幽暗，常履光明，徑上南宮，永離北府。究觀衷素，實可矜憐。謹為拜章一通，上聞三天，伏望大慈，曲施宏化，特降敕命，宣告二官九府百二十曹，六洞十宮，羅鄴鬱絕，河源泉曲，五道溟泠，五帝考官，六宮掾吏，巨天力士，執罰神兵，司殺司功，司命司錄，城隍社令，主罪職寮，俾齋主某人，積劫以來，稟生之後，心生口語，自作教他，輕重罪愆，未經原赦，因今善果，咸與蕩除，削過黑編，移名青錄，將來運應滅度，身經太陰，所在玄曹，普加部衛，不罹苦趣，疾詣南天，受化朱陵，逍遙自在，輪轉不絕，得為神仙，蒙如所陳，允昭真貺。

南宮寄籍章

臣迂疏賤類，朴野愚生，誤綴班聯，濫司

濟度，既投誠而懇告，盍請命以關聞。臣謹據齋意，臣職惟領教，理難抑違，謹涓今月某日爲始，就某處肅建玄壇，依

按真科，次第修奉。臣切惟齋主某人，身隨塵域，心慕玄關，謝過祈恩，既殫懇切，修齋行道，爰罄修崇，期生前削落於罪愆，庶身後轉輪於福祐，北都泉曲，願滌刑編，南昌上宮，覬書真籍，儻此日寄名而有耀，則他生受化以無憂，洞察忱恂，委堪矜憫。謹爲拜章一通，上聞三天，伏望大慈，曲施宏化，特降敕命，宣告南曹，爲消黑鬱之名，即紀朱陵之籍。臣謹爲上請南宮度人，不死尊神，南極長生大君，度世司馬大神，好生韓君丈人真君，南上司命司錄，延壽益算度厄尊神，迴骸起死無量度人真君，一合來降，特爲齋主某人寄名玄籍，削罪艷山，運盡百年，即登朱火，不經陰地，常睹陽天，流餘慶於曾玄，沛天恩於浩劫。更希睿渥遍澤群靈，監善惡之敷羅，沐齋功之廣大，普天率土，均衍蕃釐，六趣三途，俱承純嘏，慈雲誕布，湛露密濡，動桓飛潛，生生自

在，幽冥品類化化無方，陶太和之靈風，鼓時雍之至治。

衆真監度章

臣夙承玄運，生際昌時，慚無及物之功，期暢度人之澤，荐敷萬一，敢殫再三，尚冀高明，俯垂采聽。臣謹據齋意，臣職惟領教，理難抑違，謹涓今月某日爲始，就某處肅建玄壇，依按真科，次第修奉。臣切慮齋主某人，業機累性，世網謀生，五慾七情，寧無過咎，六因十習，易積愆尤，雖汨沒於今時，恐紛紜於身後，懺罪北府，寄籍南宮，諒荷玄恩，俯垂洪澤，自非生身而受度，永斷惡緣，曷令膺戒以佩符，常趨善地。庸罄忱恂之請，仰干穹昊之仁。謹爲拜章一通，上聞三天，伏望大慈，曲施宏化，特降敕命，宣告十方三界，合屬玄曹，俾齋主某人，肅建壇場，羅敷盟信，徼迎萬聖，降召千真，遵金錄度命之文，受九戒二簡之妙，他年滅度，不墮迷途，徑上朱宮，更生受化。謹爲上請無上九天帝君，三十二天帝君，五靈五老帝君，日月五星真君，南辰北斗，二十八

宿，三官帝君，南昌上宮度人真衆，天曹地府，五岳四瀆，無鞅真宰，俯降玄壇，監真證度，奉爲齋主某解釋冤仇，超度宗祖，飛滅途苦，斷落業根，割削陰名，移注真籍，降金液而煉質，灌靈芽以生津，九炁周流，八景合備，消五行之魔試，度萬劫之凶災，白簡上生，赤書保運，欣慶受度，既無拘於天門，逍遙登真，自永離於地戶，百年運盡，直詣南丹，受書超凌，永登妙果，培今生之慶址，植他世之昌基，與道合真，以爲效信。

太上濟度章赦卷中

太上濟度章赦卷下

赦

玉清大赦 開度黃籙用

泰玄都省牒酆都九幽主者，億萬冥曹。

敕門下：天地之大德曰生，仁涵三極，日月之容，光必照恩，浹九幽睽，庶類之流，形均一元之稟氣。六塵六識，陽源易汨於化機，萬死萬生，陰域遂蒙於業網。冥冥罪性，慘慘窮魂，雖黔黎之妄垢自貽，而玄元之真慈曲憫。今據法師銜奏為齋意伏候敕旨事，牒三天門下敕，陳詞激切，頒旨允俞，依金籙白簡之文，敷玉匱明真之典，普今夜壑咸樂春臺。可大赦三界，應赦恩到日，九幽罪人，除十惡五逆不忠不孝、誹謗大道、毀壞經教者不赦外，其餘雜犯以下，已發覺未發覺，已結證未結證，已受苦未受苦，已受報未受報不論輕重常赦，所不原者，咸赦除之。

應冥吏陰曹有功高德重者，與陞仙

職，以次進補陽官。

應山川神祇，係祀典不係祀典，有功德及生民者，並與遷官推賞，務令允當。

應一切天仙道，一切神明道，一切人倫道，一切地獄道，一切餓鬼道，一切畜生道，若胎生卵生，濕生化生，並與解除宿對，原釋前愆，永離輪迴，上生福境。

應三途五苦，謫役囚徒，地水二司，見禁罪爽，並與原釋罪犯，削落簡書，出離冥途，受生陽界。

應玄壇所度亡過某人，及某氏九玄七祖，歷劫種親，宜與和釋冤仇，削除罪累，證品超度，受化更生。

應在世水火飄焚，兵戈謀害，寇盜殺戮，蛇虎吞殘，王法凌遲，震雷噴擊，木石墜損，挺刃刑傷，久抱饑寒，曾遭鳩蠱，覆車墜馬，自縊投河，他境流亡，從軍傾斃，鬼神拘繫，冤對勾連，疾患喪生，胎產殞命，盲聾跛啞，癱疾拳攣，久滯幽鄉，未得解脫，並與蠲消宿債，洗滌新愆，超離苦輪，

往生善道。

應三生七世，結為冤仇，執對不釋，並與齊同慈愛，和釋牽纏，各遂超生，永消宿憾。

應鐵圍無間，硤石血湖，囚繫產魂，並與蕩除業垢，和釋憎仇，澄正形神，獲生樂界。

應冥關幽路，一切孤魂滯魄，若有主若無主，若凶終若善終，士農工商，文武醫卜，男女老少，民俗衣冠，中國外夷，九州四海，沈淪既久，超離無因，並與洗除罪犯，解散冤仇，隨願往生，逍遙自在。

應赦書該載，不盡事件所在，長吏條錄奏聞。

於戲！除罪簿，滅惡根，庸廣昭天漏泉之澤；離鬼官，出地戶，允符登真度命之恩。嘉與含生，同歸至化。赦書到日，主者施行，牒奉上帝，敕請翻錄，行下疾速，遍牒所屬，遵依帝敕，各宜祇奉，風火無停。故牒。

年 月 日牒

具法位

姓某承誥奉行

列 八 相 位

右玉清大赦，常時不用，惟黃籙壇用之。以大紙札之數幅，大書前，敕門下及三天門下敕，二敕字不可趁筆寫，須控了，待法師錄赦副具奏三天門下及三省飛神，上朝金闕，激切奏告，候得旨回歸。然後法師用朱筆親填其敕門下，用此敕字外用大可漏，正面書謹法師銜姓某押承誥奉行。封背面書泰玄都省牒九幽酆都主者，億萬冥曹，並大書，與救苦簡同發。

青玄寶赦青玄黃籙用

青玄黃籙左府牒九幽主者，億萬冥曹。敕門下職，覆職。載天地之常運無窮時慘時，舒陰陽之化機不息，瞻羅酆之鬼域，號鬱絕之神鄉。蠢蠢下愚，每稟惡緣而報對，巍巍上聖，常矜善性以提携。崇九華雨露之恩，息六洞雷霆之考，盍宣德澤，普軫慈悲，俾離幽暗之都，均入光明之界。今據法師銜奏為齋，意伏候敕旨事，牒奉青玄上帝敕，宜頒鳳詔，併煥龍符，開九地以逍遙，

拯群靈而快樂。可曲赦三界，應赦恩到日，九幽罪人，除在世十惡五逆、不忠不孝、誹謗大道、毀壞經教者不赦，其餘雜犯以下，已發覺未發覺，已結證未結證，已受苦未受苦，已受報未受報，不論輕重，咸赦除之。

應山林社稷神祇，聰明正直，功德及民者，所在長吏，條錄奏聞，言功遷賞。諸北酆、東岱地水職司，見禁囚考對一切罪魂，宜與疾除罪簿，焚毀冤書，離苦登真，超生陽界。

諸三途五苦，謫役囚徒，八難幽關，遍繫積爽，宜與原釋過犯，解蕩冤仇，托化人天，隨品受度。諸玄壇所度亡過某人及某氏，九玄七祖，億劫種親，宜與削除愆過，解釋冤仇，各遂升遷，受生樂境。諸冥關幽路，滯魄窮魂，執迷沈淪，未得解脫，宜與開導正性，啓發善心，各俾托生，毋自執著。諸傷亡死非正命，陷沒幽途，實可哀憫，宜與罷散仇讎，消除罪累，身心

清靜，早得托生。

諸在世微有片善，長夜顛冥，歲月既深，未曾超度，宜與考校料簡，條錄關陳，上名青宮，準備任使。

諸血湖獄禁繫產魂，宜與斷絕冤愆，解釋執對，潔清形質，隨品受生。

諸九州十道，中國外夷，凶終令終，有主無主，男女老少，士農工商，無鞅數衆，久在冥關，宜與和合冤親，蠲消罪累，普受開度，時刻昇遷。

諸赦書該載不盡事件，所在長吏，條陳以聞。

於戲！無拘留逼合之憂，品類咸超於北府，有侍衛送迎之喜，形魂徑上於南宮。嘉與混輿，同歸陶冶。赦書到日，主者施行。牒奉青玄上帝，敕請翻錄，行下所屬，遵依帝敕，疾速奉行，風火無停。故牒。

年 月 日

具法位

姓某承誥奉行，

知青玄黃籙左府事，
判青玄黃籙左府事。

右青玄寶赦，青玄救苦妙齋用之。

書寫格式如前，得旨填敕亦如之，只用此敕字可漏，前正面如前，後背面大書青玄黃錄左府牒九幽主宰，億萬冥曹，與九龍符同發。

玉皇上帝徽號寶赦九天齋用

泰玄都省 牒九幽主宰億萬冥曹。

敕門下：天施地生，仰乾坤之大造，陽闔陰關，符晝夜之常經。故黑單司考對於推研，而紫極沛慈仁於覃宥，興言六趣，莫慘九幽。積夜迷烟，鎖業機於夜壑重泉昏霧，閉冤網於泉扃，豈無悔過之心，孰導求生之性，靜惟沈滯，實可矜憐。今據法師銜奏為齋意伏候敕旨事，牒奉上帝敕所陳詞旨，備切忱恂。恭惟玉皇上帝徽號，名非常名，上極無上，聞之者萬罪消滅，得之者千冤解除，仁浹混輿，事彰載籍，隨赦頒降，如帝親行。蓋誕布於德音，庸煥敷於寶誥，庶提苦趣，均證樂鄉。可大赦三界，應今月某日建壇以前，九幽罪人，除十惡五逆、不忠不孝、誹謗大道、毀壞經教者不赦，所有雜犯以下，已發覺未發覺，已結證未結證，已受苦未受苦，

已受報未受報，不論輕重，咸赦除之。

應山川神祇有功德及民者，所在長吏，條陳奏聞，言功遷賞。

應冥吏陰曹無濫刑，無僭賞者，與陞仙職，以次進補陽官。

應三途五苦，見禁謫役地水二司，囚繫罪爽，並與蠲除宿犯，解釋冤仇，脫離幽途，往生福境。

應六道四生，展轉報對，無有窮已，並與原宥愆過，和釋冤讎，俾出輪迴，超登善界。

應玄壇所度亡故某人及某氏，九玄七祖，億劫種親，並與消解宿憾，落滅惡根，受化超生，逍遙自在。

應世傷亡，死非正命，沈魂滯魄，久墮冥鄉，並與削除過咎，解釋冤憎，隨品受生，免輪幽暗。

應血湖地獄諸類產魂，並與蠲滌過犯，蕩除冤仇，母子分離，形神超邁。應諸類幽魂，曾經子孫薦拔，未遂超升者，並與引用，日前所修，功德無大小，咸使升遷，毋滯陰域。

應九州十道萬姓三軍，士農工商，男

女老少，有主無主，凶終善終，沈淪幽鄉，久不受化者，並與洗蕩冤枉，散釋愆辜，速令轉輪，受生樂處。應赦書談載不盡事件，所在長吏，條錄奏陳。

於戲！疾痛呼天，尚期蠲於翳累，齋戒事帝，猶冀滌於愆瑕，况赦書之敷諭周詳，而寶誥之光明煒燁。十華讚嘆，三極皈依，宜回幽路之春，肆闢寒庭之旦，下塞死戶，上開生門，凡爾攸司，各宜遵奉。赦書到日，主者施行，牒奉上帝，敕請翻錄，行下所屬，遵依帝敕，風火無停。故牒。

年 月 日

具法位

列 八 相 位

姓某承諾奉行

右玉皇徽號寶赦，九天生神齋用之。

書寫格式，得旨填敕，亦如前，只用

此敕字可漏，背書泰玄都省牒九幽

主宰，億萬冥曹。

太上濟度章赦卷下

(李剛點校)

071 萃善錄

經名：萃善錄。原不題撰人，約出於明代。二卷。底本出處：《正統道藏》洞神部表奏類。

萃善錄卷上

聖節祝君之詞

聖人生焉，瑞遶紫樞之電；上帝臨汝，喜開黃道之雲。齋肅陳詞，明晨有請。伏念新傳祖印，遠覲宸廷，香頌龍虎之壇，親承上旨；壽祝麒麟之殿，未遂南轅。命玄侶以脩齋，對威顏而歸美。恭願綠章夜達，來仙仗於清都；丹宸春融，永丕基之洪福。

謝雨詞

布地爲壇，土皆作玉，望雲請命，天乃雨珠，生意頓回，元功不宰。伏念自名以道，待飽於農，凡仰愧俯作之

餘，有春作秋祈之望，屬以亢旱，異於曩時。既自郊而徂宮，禱之久矣；庶匪朝而依夕，苗則勃然。蓋移粟之民已疲，倘荐饑則歲何仰，不違咫尺，遂俾霽霏，返神水以安靈，薦潢污而報本。伏願賜之終惠，保此有年，自三日已往爲霖，更溥餘波之潤，無一夫不被其澤，同爲樂國之歸。

天師在京就山還醮

君命不埃駕，阻瞻咫尺之清光；皇天無私親，妙運兩間之元化。敬緘香於帝里，歸奏牘於宗壇。伏念慶藉世資，叨傳祖印，言尤行悔，顧教法以多違；家難命奇，致災非之荐見。幸際龍飛之治，造爲驛傳之朝，孰謂微痾，竟淹半載，思切宸旒之寵對，聿嚴靈寶之齋脩，謝過消災，祈恩請命。伏願帝心簡在，人欲必從，鑒其悔艾之私，錫以生成之造，真風赫奕，日深丹宸之知；新渥駢蕃，露重紫泥之賜。凡存志命，悉宥恩庥。

酬禳火醮詞

庚午年吳皆春夢，見崇禧廳前有一物，又遇竹軒魂歸，乃云其房當有火災，久軒遂許醮獲安。

夢而占夢，同知幻境之無憑，疑以傳疑，敢忽前車而不戒，昔焉徼福，今也酬恩，伏念求木苟完，寢薪是懼，彼蝶化之紛紜莫詰，聞者隱憂；况鹿隍之失得或然，慎之爲貴。乃以恍惚杳冥之故，而爲和平安靜之求，帝示矜容，人思報稱。伏願初盟克踐，終惠允諧，曷日而忘，永戴風雨旃幪之造，惟天所命，密符祖宗香火之心，德布春陽，恩沾莫景。

天師慶成藏殿醮詞

道機無息，乃眷殊庭，法藏聿新，寔依玄造，爰慶成於一醮，庸籲告於群真。伏念切已興思，拊躬省過，或以前因而今受，或謂寡是以多非，或下情宿怨而罔知，或陰隲可爲而自失，或命身之位與孤曜以相逢，或嗣息之宮背吉星而不照，乖違至此，懺釋何由。謂寶藏經營，信斡旋之有地，况真旂森列，可運轉以回天，幸人巧之成功，希聖明

之從欲，肅陳凡愫，恪露中誠。伏願霽仰威顏，春生容德，造化無停輪之理，變通於轉轂之間，八卦凝神，見乾坤之六子，三陽發秀，回否泰於一時，錫命在天，俟恩即日。

吳惟德薦母

客途天遠，空馳游子之心，鄉岫雲停，不見慈親之面，俯遵玄教，仰叩清都，伏念淺矣學仙，闕焉事母，將謂轉蓬苟得，尚酬菽水之歡，豈期泛梗言還，遽洒萊衣之血。揆一子出家而奚益，幸十方救苦之不誣，愍日適臨，沖科特啓。伏願珠浮獅坐，玉揉龍章，蓬島回車，喚醒虛無之夢，桃池侍宴，容登快樂之鄉，魂氣有歸，後昆允賴。

建九幽正醮詞

物莫預知，痛先臣之棄背，情惡可已，祈上帝以超升，言不成文，泣盡繼血。伏念父吳霜未老，燕璞何仇。孰謂無牙，而蘊至深之毒，迺傷其指，竟罹罔極之憂。豈其遺胤之不夭，抑亦患身之有數，丹心耿耿，不能鳴沒世之悲，玄範恢恢，庶以慰重泉之望，澗芹

可薦，鑿藻無私，伏願開解脫門，指虛無路，宿冤冰釋，搯喉敢起於妄心，逝魄雲升，鍊質全資於善果，率行正道，惠迪後人。

仙姑薦父母

父何怙，母何恃，嗟永隔於歸寧；乾資始，坤資生，冀重開於化育。三熏請命，九拜投誠。伏念季女有歸，二親莫贖，謏焉供祀，贊善教以利人；惕若奉先，愧近功而撫己。蒿日濺感時之淚，草心萌追遠之思，明水具陳，恩波允賴。伏願大鈞無息，至鑒有容，地道陽光，超椿萱之朽質，人元合妙，副葵藿之私情。

周年建醮薦母

母兮鞠我，蓼莪之痛無窮；葺而小祥，白駒之過何速，惟攄哀素，上徹穹蒼。伏念某自罹陟屺之悲，忍見星周之次，念升沉之莫測，幸拔度之有科，謹潔塵居，肅迎飈馭。伏願雲開黃道，風送綠章，詔三界以逍遙，擁萬真之來下，慈光遠被，庸昭觀盥之誠，明日將朝，不盡童蒙之瀆。

孫秋碧就普度酬所許保安就薦先師祖盧自問

追想前猷，願有盟而必答；寓誠普度，思如在以宜超，敢食前言，輒干上聽。伏念有身為患，厥疾弗瘳，急告于天，猶幸苟延於一醮，回生無地，忽驚已過於七年，逝者遠而許者存，心所知即神所記，謏焉報貺，期以出幽。伏願大道有情，至真無外，指蓬萊路，或從織女而歸，入黍米中，同會天人之樂，周圓功果，啓迪仍昆。

陳制帥黃籙宿啓詞

綠林戢盜，熟小麥以休師；皂嶺巢仙，潔菁茅而事帝，科嚴修於玉匱，事宿闡於瑤壇。伏念謬以撫綏，任茲討捕，謂人爲天地之貴，何忍殘生；若賊遺君父之憂，是名負國。爰親從於士卒，偶活致於渠魁，雖幸凱還，能無濫殺，報風聲鶴唳之助，見莠除苗長之仁。伏願旋斡雍熙，銷沈乖盪。兵凶器，用非得已，壹空白骨之冤；利公家，知無不爲，洞鑒丹心之素。

三朝詞

涼生藥殿，夏五月以風薰；梵遶芝壇，日三朝而晝永。響天威之咫尺，贊君德之輝光。伏念某叨竊寵靈，周旋軍旅，僅解嚴於汀建，復蓄銳於洪虔。蟻穴就焚，幸兇渠之檻送；龍顏動喜，因捷報於驛聞。茲聞事於閭峰，敬歸功於魏闕。伏願皇天佑宋，舊境還周，萬化更新，見君臣之慶會，五兵寢息，增朝野之歡娛。

晚朝詞

細柳除營，甫定積年之寇；白楊悲隴，莫招長夜之魂，即福地以脩齋，遡昊天而瀝懇。言念盜興於贛，人死如麻，就縛抵刑，自速藁街之戮；摧鋒陷陣，多銜草野之冤。在臣意者以拯民，惟帝相之而破賊，殺非得已，生亦無窮。伏願大赦幽牢，普超苦爽，五方異俗，化金革於農桑；三代同風，混車書於禮樂。

宮門驅蝗

多稼連疇，意豐登而可待；群蝗入境，迺侵齧以爲災，民命所關，帝心

斯在。言念大江之右，夙稱樂土之中，

邊國粗寧，幸免軍需之急；浙鄉不熟，已傷官糴之繁。正望稔於此秋，庶全生於爾衆。屬蝗蝻之大孽，遍滿鄉間；顧蟻蝨之小臣，主持宮宇，力捕莫施於坎地，醮禳惟謹於祈天。伏願哀憫衆生，赦原萬罪，羽蟲揖揖掃除，勅田祖之神；寶穡垂垂刈穫，錫農夫之慶。矢詞迫切，拜賜須臾。

顯應觀設醮祈晴詞

望霓有禱，既賜霽霽，積潦不收，遂憂昏墊，睽浙人之宅土，即澤國之圍田，凡雨過多，雖苗無秀，矧江潮之齧岸，加湖水之滄廬，因沮洳以復陰，將鬱蒸而成疾，天子側躬而軫慮，計臣思戢以違安，肅闡醮筵，恪陳奏牘。伏願乾坤軒豁，離曜輝光，農務三時，訖暑耘而秋熟，王幾千里，保物阜以民康。

明堂預告設醮祈晴詞

君國子民，紹一元之大統，父天母地，嚴三世之親祠，爰合祭以戒食，用前期而申禱，伏願璇穹秋豁，玉燭時調，上帝降祥，禮迄成於重屋；冲人嗣

服，祚益茂於丕基。

顯應觀祈雨詞

民亦勞止，春失種以無秋；天何言哉，日常暘而不雨，深惟闕政，祇控危衷。伏念護漕罔功，來歸未遂，星流白晝，屢傳旱野之占；氣入朱明，愈急水田之務，既群祠而遍禱，惟上帝之求哀。伏願勅下雲雷，澤盈溝澮，貽弊播穀，錫歲事之豐登；合璧連珠，示乾文之嘉瑞，如乖吏狀，請罰臣躬。

顯應觀再設醮祈雨詞

農時既失，旱太甚以如焚；天聽孔卑，信未孚而弗福，故忘煩喋，仰叩穹明。伏念兩儀漕畿，孤忠體國，經費倍支而罕撥，叨榮宜去而復留。浙西東粒米之鄉，所祈豐稔；夏仲孟梅霖之景，迺向焦枯。暴巫徒市，莫效於人爲；呼電召龍，率由於帝命。既瀕湖而醮款，祈沛澤以昭蘇。伏願敕斂驕陽，恩敷甘雨，水耕火耨，亟施田峻之功；粟腐錢流，汔濟邦儲之用，尚諧中熟，庶弭多虞。

代茅山祈雨詞

年穀垂成，政需澤潤，秋陽爲沴，反病亢乾，即仙聖之所居，爲黎元之有禱，伏念濫膺顯闈，兼領陪京，維時多虞，所望一稔，序既當於拏斂，田尚苦於燥剛，始自近郊，遠連並塞，地綿千里，皆懷卒歲之憂，帝監四方，忍絕斯人之命，使旱勢遍臻於屬部，恐咎端專，在於微臣，實震懼之靡寧，冀精誠而上達，伏願普敷德澤，徧惠群生，哀此矜人，久服勞於穡事，沛然下雨，俾無廢於歲功。

開元宮禳火詞

流星隕晝，仰天戒之高明，比屋延燒，傷民生之蕩析，肅持惻怛，上告穹蒼，伏念無補，使家僅尋時瘼，泉務流而迺壅，已病閭閻，火弗戢而屢焚，仍空蓋藏，維商丘之有祀祚，宋國之無疆，爰脩瓊瓚之儀，祇款琳琅之駕，伏願誕施仁愛，潛弭災虞，地大京師，息融風而奠枕，春深田野，賜膏雨以催耕。

禳兵詞

峒穴無知，輒起綠林之盜，封疆所界，深懷赤子之憂，仰遡顛穹，肅陳危悞。伏念典州踰歲，闔境逢年，鄰寇鴟張，毒忽流於塗炭，兇徒鼠伏，釁將動於蕭牆，荷天敗其逆徒，尚日馳於警報，王宮陷逐，寨卒創殘居多，控扼之兵未快蕩平之舉，敬爲民之請命，輒籲帝以投誠，伏願赦過一方，全生萬衆，厄會密移於天運，先聲克壯於軍容，殲厥渠魁，稍謝無辜之鬼，安其田里，咸歸不殺之仁。

祈皇嗣

南面視朝，久嗣大君之位，東儲繼體，宜膺男子之祥，屢醮禱於蒼穹，佇感通於禁掖，即太乙貴神之館，合下元本命之辰，申飭羽流，恪陳朱奏，伏願帝心，顧佑國脉，昌隆帶鞶，授弓駢集，椒途之喜，承桃主器，允符瓜瓞之綿。

章尚書九幽醮詞

劬勞念母德，至大以難酬，哀痛徹天道，無方而善應，輒脩清醮，恭瀝丹忱。伏念亡母，懿行在躬，先臣同齒子

七人，而保抱忠孝良勤孫，三世以團樂，慈憐備至，湯沐既開於鄰國，旨甘粗適於偏闈上，壽以傾諸孤之釁，顧微軀而若失，更再懇以增悲，敬遵玉匱之科，荐剡綠章之奏。伏願恩言曰可，過誤其空。風起白楊，不待幽阡之閉；火傳金錄，亟超樂土之生。下及漏泉，旁沾餘潤。

方司法五七詞

女子有行，所期偕老，吾夫又死，幾不勝哀，舉塵案以自憐，寫綠章而上奏。伏念亡夫，甫沾寸祿，杳失層親，枕塊纏悲，方經營於遠日，臨塋成疾，竟殞滅於芳年，痛茲家室之情，慘甚戶門之禍，孤嫠無倚，痛泣何聞，伏願降鑒哀恫，赦除愆妄，度此魂於生地，仍識天倫，撫弱子者寡妻，常依道廕。

陳帥玉隆宮黃籙宿啓詞

視事惟新，未靖綠林之寇，感時多故，輒脩黃籙之齋。躬造福庭，宿開靈墀，臣丹心君上，白髮兵間。閩部解嚴，幸君民之肅睦，江墟徙鎮，傷饑饉之荐臻。豈生靈積過之滿盈，抑官吏貪殘

之由致，祇醮神仙之宅，覬回天地之仁，伏願玉燭調和，珠躔循軌，上固一人之壽，下全萬物之生，峒孽就平，師不煩於久外，田禾告稔，臣庶獲以偷安。

天曆為宗師還保安醮詞

北望鴈書，想玄門之宗主，東瞻馬首，祈洪造之真靈，應不逾時，報當知本，伏念進脩在己，行止非人，司教日邊，每盡扶持之力，縻身關外，適當間隔之時，嘗徼福以籲上天，乃蒙恩而有今日，端不由於幸得，何敢食於盟言，敬肅元壇，恪酬清醮，伏願國經求舊，帝渥從新，教雨載濡，納道山於九潤，壽星一點，暎台象於三階。

天師留京建年經詞

日之餘，歲之餘，幸依光而及此，邦必達，家必達，期徼福以皆然，且謝且祈，如臨如履，伏念某朝，君身遠祀，帝心長時，荐易於年華，德難忘舊，天密胚於道脉，恩企迎新，恪陳藻薦之誠，默寓葵傾之悃，銘藏匪報，鑒照惟明，伏願洪造垂仁，皇都協慶，生成一致，門迎佳氣之春，出處兩榮，驛寄喜

音之早誓，脩陰德仰答元功。

解壇詞

人間塵世，嚴祭祀之瓊壇，帝所清高，下照臨之玉節，朝儀已備，齋事告周，禮貴節以成文，義有同於既灌，伏願皇靈穆穆，鑒觀趨退之恭，師造昭昭，察宥慎終之典。

謝恩詞

一陽來復父，初索於震男，三願幸孚帝，下觀而臨汝，此恩此德，何報何言，伏念某素款既周，皇靈不昧，雪先呈瑞，餘半月以俱晴，日暖如春，後三朝而乃雨，皆神明之所感，於氣象以可知，况凡我同盟，相終始於陟降，暨百爾執事，咸進退以安閑，非由臣意，簡在帝心，何以天時合於人事，載熏載沐，且謝且祈，伏願鑒藻，有開澗蘋，惟享幾微，發見驗所欲之必從，兆朕萌芽，信不言而善應。

代人保疾詞

疾病同心，義重扶持之日；愛慈異骨，誠祈覆燾之天，惟帝納言，以人從欲。伏念某力開道宇，身積患端，風

為未疾之根，外因猶淺疾，有逆流之水，遠慮實深，未收功於參術之奇，曷滿望於桑榆之晚，掃觀庭而葢醮，款鸞駕以希恩，伏願仙墨香留，神丹霧散，天醫臨地，醫會有藥。長生福星，明壽星高，如椿難老，瑕疵一洗，膏馥同霑。

庚午年春，舒貴和捧御香入山建

金錄大齋宿啓詞

皇天后土，既全付於丕圖，名山大川，庸聿嚴於外祀，遠馳一使，祇格三靈，當鼓鐘玉帛之初陳，乃圭辟琮璜之具備，昭其文也，寓乾坤宗子之心，神而明之，為社稷生民之地。

早朝詞

申明春令，爰據朝日之誠，寅畏夙興，敢替事天之敬，仰觀非遠，默感而通，念有民何賴以治安，亦惟帝實為之主宰，天高星遠，行五緯以無差，地利人和，鎮八維而不動。

午朝詞

離文明兩，如日再中，乾道時成，惟天為大，肅使華而代祀，仰帝闕以趨朝，願感至誠聿嚴善應，一民莫非其

有，天與禎祥萬物，各遂其生，日依化育。

晚朝詞

纂圖御衆，不忘夕惕之思，分命祈天，益謹暮朝之敬，緘一誠而自遠，貫三極以潛通，密勿之間，對揚斯在，國經咸若，尚聞堯壤之歌、皇極無偏，丕錫箕疇之福。

正醮詞

社稷艱難，叨承基緒，山川裡祀，曷答穹祇。念有土之多虞，揆爲君之不易，赤子備嘗於危殆，凶年不免於流亡，無以回天，豈其能國。敢寓誠於一醮，庶悔禍於三靈。啓迪時幾，願示小康之效；昭蘇邦本，即開大有之祥，生聚收寧，治安馴致。

壬申聖節宿啓詞

誕彌厥月，揆初默軫於中懷，欽若昊天，報本聿嚴於外祀，乃馳使幣祇，醮仙壇，脩五禮，以如方祈三靈而有鑒，盛德在木，載揚發育之心，明日將朝，荐啓敷宣之目。

早朝詞

夙興惟謹、致祀帝之初誠，盱食靡寧，以保民爲先務，托玄科而請命，見宗子之用心，懷在有仁，念茲惟帝，五風十雨，得中道之豐登，四海九州，足小康之資聚。

午朝詞

日中則昃，戒實在於滿盈；天聽孔卑，念孰爲之保定，國有與立，時方可爲。奉金籙以祈恩，啓丹扃而事命，惟天孚佑，益開享祚之祥；率祖攸行，訓至寧邦之盛。

晚朝詞

日之餘曰夜，敢終怠於朝儀，國之本在身，忝丕承於明命，時臨初度，齊啓沖科，寧無自求多福之心，所願密注，長生之字，大恩曷報，躬行遵道之言，終惠有祈，誓體代天之責。

正醮詞

日當再育，忝分光嶽之靈，天無常親，密運基圖之重，撫時以感，出命而祈，翦焉夜寐以夙興，比者冬行於春令，孰爲民極，固不止水旱疾疫之憂，

自揆國經，何以追脩齊治平之責，林然庶證，叢於厥躬，乃脩外祀之嚴，願格三靈之佑，有人有土，志維綏靖之求，而國而家，身見隆平之效。

聖節宿啓詞

三日天氣新，揆於初度，八荒開壽域，保運長存，香霧空濛，真風演迤，遙金人捧水心之劍，建瑤壇，懸黍米之珠，宿啓沖科，仰關宸慮，伏願三境疏恩，萬真降鑒，九五福曰壽，九五福曰富，廓寰宇以爲家，八千歲爲春，八千歲爲秋，長上古而不老。

朝詞

聰明作后，虹流上巳之辰，馨香感神，鰲抃普天之下，來皇華於福地，肅金籙以祈天，稽首紅雲，投誠青祝，恭願星輝，海潤開壽，當於三宮，山高日升，育人民於九土。

又

天道惟欽，謹緘香於福地，帝心簡在，祈眷祐於皇家，俯瀆綠章，上陳玄鑒，伏願咫尺，若臨卑高，罔間不言善應，陰陽順而風雨時至，治無爲，股肱

良，而庶民育。

天曆祝聖

代天作子，方當繼統之初，繞電有期，預至祝釐之請，伏願清時偃武，黔首歸仁，甲兵洗衣裳，垂太平有象，日月光，山河壯，萬壽齊天。

閻皂山國醮詞

天錫九疇，撫下期躋於壽域；國專七祀，升中爰即於名山。眷膺金闕，以定四郵，及在玉衡，以齊七政，皆陰隲下民之力，致虔昭上帝之心，伏願八表，又寧三宮益壽，天地平而元氣正，俾萬物以無疵，陰陽和而庶類成，資一人之有慶。

早朝詞

浴咸池，出暘谷，現赤日之九芒，排闥闔，入帝居，覲紅雲之一朵，眷宵衣而待旦，吹暖律以回暄，遠馳奏事之香，待錫治安之策，伏願福持寶位，慶浹璇宮，慰安向於龍樓，贊休徵於鶴禁，陽分陰而二儀立，衍億世之皇圖，正得秋而萬寶成，洽八方之黎獻。

午朝詞

日至昆吾，而正中克成厥象，風駕扶搖而直上，敷奏以言，矧金鐸之息聲，暨玉衡之順軌，用殫朕志，簡在帝心，伏願俯贊，皇猷誕敷文德，六府三事，允治丕弘有永之基，四海九州攸同，共樂無爲之治。

表榜

正薦太陰表

生明合德，運天一之至精，懸象降靈，行地中之溥潤，恢恢真造，泯泯神機，某臨照隨人，盈虛有道，廣寒清靜，嚴七寶之高居，明水苾芬，叶方諸之大用，欲成玉鍊九生之妙，必資金波一滴之餘，共望澤潤下，滋類從俯，應天與形，道與貌必符造化之全，月爲魄日，爲魂不越陰陽之外，陶鎔允賴俛仰知歸。

鍊孤魂第九夜天尊表副

玉匱盟真，超幽魂於九地，寶華應號，證道果於諸天，仰瀆宸聰，俯攄齋

悃，共望玉京毓秀，瓊闕騰芳，萬寶裝嚴，仰彌羅之梵炁，九天照燭，開幽暗之昏衢，魂度朱陵，慶流後裔。

黃籙榜語迎真

六琯浮春，一陽來復，九關戒曉，萬聖齊臨，方黃壇望幸之時，正紫氣開先之際，將恭清道，仰止浮空，雲漢昭回，神氣運風霆之表，天地明察，袞衣流日月之光，方域百靈，起居先路，瑤壇絳節，久凝藥籍之班，玉几紅雲，一鑒松花之會。

監門榜

法門廣大，曾何間於戚疏，帝所清高，若不違於咫尺，必恭敬止，盍歸來乎，莫問子爲誰，孰云身是客，衆妙非妙，於此示寂然不動之機，至言無言，亦豈有甚高難行之事，好共看天人黍米，信本無風雨，蓬萊潔己，從之致身，易爾，塵世茫茫，汲汲何許，是到家時，玄關直直，堂堂這裏，有入門處，神明懋戒，凡聖同歸。

天醫榜

世之最苦者曰窮民，偏多疾疢，天

果何爲而有，醫道默與主張，至於遊魂爲變之時，亦有仰首鳴號之意，想神農想軒后，九霄難問於高居，如秦緩如越人，千載猶存於生氣，玉皇之上藥，三品金碧之大丹，九還補造化而裨陰陽，有神氣而無形跡，洪惟天法道，每垂情於養，痾疾痛之間，莫謂鬼非人，重施力於神聖工巧之外，贊彼元化，相我齋功。

沐浴榜

詩人吟玉女有益，只要洗頭，漁父答大夫，此水但堪濯足，皆非盡善，不可效尤，蓋陰陽顛倒之坎離，其功甚大，况一六生成之天地，得氣最先，飲之者冷暖自知，掬之者清涼無盡，是名沐浴，具體設陳，秋入肺肝五內，洒金莖之露，冷侵毛骨，一壺浸寒玉之冰，對之而塵垢自消，因得以形神俱妙，非如春暮，果從沂水以詠歸，豈比華清咲出溫泉而拜賜，脫然無我，洗者是誰？

監生榜

太極肇判，乾坤定而六子生，元氣散分，陰陽交而萬形具，惟人最貴，所

主有神，以其爲天地之心，果誰執造化之柄，茁蘭可愛，皆由萬靈恭奉而來，坐草云亡，或出一念，扶持之外，未脫秋瓜之蒂，莫回寒谷之芳，秩秩有司，化化無跡，子知向來夢，應作如是觀，靈芝本亦無根，到此好叅衆妙，桃花自貪結子，教人錯恨東風，淨洒洒然，長惺惺去。

監齋榜

黍稷非馨，吾聞其語，粢盛不潔，士聽無譁，天地之道昭昭然，鬼神之情洞洞爾，非誠莫享，在德宜酬，蓋芬苾具陳，雖松華而不棄，若馨香可薦，縱蘊藻以無嫌，然勞薪之火，其可以炊，而埃墨之飯，安敢以祭，况失飪不食，聖人之教訓宜然，苟聞腥于天，上帝之崇高，則否致其潔也，將何道神而明之，惟汝賢尚昭乃勳，母曠厥職，道腴非味，何求易牙之知，食指欲嘗，罔俾子公之染，雲厨必戒，天爵宜陞。

菱郭

立菱郭以款幽魂，一期兩見，到蓬山而聞妙道，千載重逢，流年擲梭，紅

顏春樹，人生能幾何，朔風驚沙，枯梢號寒，子行亦良苦，四海兄弟，一會神仙，曩者玄師，曾指幽關之正路，今茲教主，又宏苦海之慈航，以何因緣，得此方便，生我所欲也，義我所欲也，幸逢兼取之魚熊，貴者驕人乎，賤者驕人乎，勿效相持之鵝蚌，雪起可以適口，雲笈爲之洗心，道味悠長，善端呈露，天寬地大，曾何夜雨煩冤，陰極陽回，別有春風消息。

孤魂榜

莊子嘗言，受成形而形有盡，阮瞻所見，論無鬼而鬼不然，則知一氣之良能，難以一途而偏廢，伯有彭生之事，古人豈欺我哉，魏其灌夫之冤，信史有如彼者，生生死死，古古今今，金谷園林，此地豈無歌舞，平泉花木，幾人看到，子孫逝川，只解東流白日，又還西落，曰鰥寡曰孤獨，况下民多無告之窮，或札瘥或夭昏，而上天之剝喪者半，艱難萬狀，貧病交攻，其間浩歎何勝，到底同歸于盡，以無祭主，故曰孤魂，幸今逢黃籙齋官，又特啓玄科好

事，飽汝以食而無餒，暖汝以衣而不寒，三十六部尊經善緣，得未嘗有一萬二千金簡，魂氣當無不之仙道佛道，儘堪行天門人門，皆可去黃壇回首處，快乘蓬島清風，丹府記名，時盡入黍珠碧落，皆大懽喜，便好超升。

將吏榜

雲篆太虛，道因文顯，風霆神氣，將以心存，况兩間光嶽之散分，有一揆天人之會合，魯公竟爲雷吏，傳說自是列星，李將軍生不封侯，其必在爵秩同升之列，張睢陽死願殺賊，將亦發英雄未了之心，雖道之體本出於自然，而法之用寔存乎策役，瓊臺拔地，玉輦瞻天，金簡合符，寶書啓鑰，于以廓靈風而昭慧日，于以引歸路而濟迷津，九幽之黑處，皆明一寸之丹心，默契惟道，貴度非神，不行作善，降祥馴致仙家之喜慶，論功行賞，超遷天上之班資。

節次榜

齋以事帝，固宜由本，以及文道不遠人，其可有綱而無目，眷我黃壇列職，無非紫府朝班，秩秩有儀，諄諄以

告，言而爲法，動而爲則，當如君父之在前，舉之於口，筆之於書，須信神仙之可學，必也周行中規，折行中矩，勿謂視於無形，聽於無聲，謫果何尤，黃庭之誤者一字，過無可奏庚申，何畏乎三尸，相與盟天，有如皎日。

茶榜

問海上靈槎，光彩已騰於星漢，擷山中瑞草，芳香又接於薔薇，策上品之奇勳，吸群英之佳氣，共惟天師，胄承漢葉，器備仙根，道味精微，灼見中灑之水，善芽茂密，未論蒙頂之苞，紫蘭香桂之所依，朱草嘉禾之近侍，輕雷破莢，甦醒群昏，明月爲團，晶輝獨露，一飲者已量，俱足共談，而舌本潛通，曳翠旗，按蓬萊，清風兩腋，執蒼璧，朝闈闔，喜徹九重，遲遲三丈之日高，款款五千之文進，佳句自聯於石鼎，貴名又起於金甌，白雪滿椀花徘徊，小引鼻端之馥，仁風暗結珠，蓓蕾早回掌上之春，點首而前，瀹心以進。

酒榜

黃壇設醴，洪鈞轉而一陽生，玄館

飛觴，大禮成而諸福備，竹松如醉，猿鶴歡迎，共惟天師，雲烝尊疊，道山鐘鼎聖明時，和熏甘露，神仙府瑞靄香風，舉瓢酌天漿，神情邁俗，停杯問明月，逸興無塵，混融乎青州鬲上之分，浹洽乎玉瓊黃中之妙，沉酣道味，醞藉仙風，有盎然深念之良心，便釀就滿腔之喜烝，與人傳頌，何須論千日奇芳，天子呼來，又欲醉九重春色，想宴罷鳳邊丹詔記，賜來馬上黃封，敲玉壺冰想道臣心之如水，指金莖露，笑看仙掌之凝珠，鬱鬱味濃，薔薇香近。

水燈榜

水燈映水，開成仰覆之蓮花，天影粘天，照見虛無之蓬島，九淵不夜，千炬浮春，烏兔讓輝，到海坐通於銀漢，魚龍吹浪走盤，疑是於明珠，然此一點金色光，盡在諸公筆頭上，懷沙包黍，何勞招屈子之魂，逐浪生花，又可誦坡仙之句，餘明所及，幽壤咸歸。

普度告盟榜

寶月重圓，始停玉斧，春風九夜，爰啓金科，肅肅乎塵馬不飛，飄飄然仙

車無跡，五難緣理，去三炁攸分，十方浮空，來一珠俱攝，中有自然造化，於焉溥度幽冥鶴信，曉通龍文雲起，慎終追遠，具陳潔己之誠心，脫苦登真，仰止度人之妙道，時其可矣，天實臨之。

萃善錄卷上

萃善錄卷下

李氏崇建九幽昇度大齋薦拔亡夫

及子孫孤魂正醮詞

禮慶天昏，死生大矣，齋戒沐浴，

天地臨之，已蒙金簡之曲成，庸闡瓊科而昭謝。伏念臣妾得天何淺，惠妾無終，兩年而有七喪，夫亡子繼，一身而哭三世，女殞孫殂，間逢疾狀之可疑，或謂患端之有在，神靈震怒，灾禍頻仍，身不敢以違安，心實知其有罪。亦嘗潔己，津六道以消愆；孰若投誠，醮名山而請命。皇穹在上，明水自陳。伏願道有生神，仁無棄物，仙科九鍊，感歸解脫之門，人道一新，永塞伏連之路，蒙恩有日，積善酬天。

宿啓詞

上帝至仁，常恐乖違於人道，凡民有死，猶傳濟物之真科，何垂老而兼失於所天，彼長逝者孰開其生地。乃據丹烟，祇肅瑤壇，五幙風微，幸網維於玄範，九關雲啓，容朝夕於清光。

早朝詞

好生德大，感上聖之垂光，追遠心長，肅初朝而請命，旦氣接天人之會，陽明通造化之機，三極神交，九原慶幸，玉文布勅，爰指路於仙靈，金簡流丹，式合符於凡悃。

午朝詞

事帝夙興，致齋忱而未悉，趨朝晝接，愬家難以申言，比由外患之干，而有中殤之哭，省愆終日，悔禍惟天，否塞潜通，北斗弭伏連之路，離明洞照，南宮升解脫之魂。

晚朝詞

夕殿澄秋，監人生之多難，朝儀卜夜，奏童瀆之微言，道開幽壤之光明，德沛餘波之膏潤，允資既往，兼惠其生，天定而人景，幸收於榆晚，日昌厥後春，益茂於蘭芽。

元君薦三十七代天師希微宿啓詞

嗟子行役，竟客死而不歸，惟天聰明，念民情之無告，倚門望絕，啓醮詞真。伏念某人嗣教三年，束裝萬里，藉祖宗之福澤，偶有遭逢，嬰疾病之淹

留，胡然天喪，心拆外書之至，神傷旅
櫬之來，母子至情，死生大事，敬歸依
於祖教，先汛掃於家庭。伏願四炁朗
清，五文開廓，北方不可久處，帝遣三
招，東極無量度人，經傳十徧。

二日早朝詞

曙色蒼涼，不見衣冠之拜母；凡
情懇惻，正憑箋牘以籲天，儼十方三界
之臨，正二日六朝之始。伏願陽者普
照，勅札下頒，報冀朔之游魂，許從瀟
雪，注蓬瀛之仙籍，得遂超升。

午朝詞

日之方中，缺望晝歸之錦，神其如
在，揭虔露悃之香，哭子聲悲，望天情
切。伏願玉天賜勅，金闕疏恩，大開流
火之庭，盡除宿垢，入侍太玄之省，得
遂超升。

晚朝詞

時當昏定，長兒不見於寢闈，醮有
晚朝，列聖尚臨於壇席，恪遵教範，昭
格上穹。伏願夜氣澄清，天真登引，神
魂可度，願永遂於逍遙，母子有緣，或
相逢於夢寐。

三日早朝詞

林迎曉日，傷情看返哺之鳥；壇
望昊天，銜赦想朝陽之鳳，沐熏皈命，
俯伏祈恩。伏願閭闔廣開，珪璋入覲，
念陽平之遺裔，俾綴仙班，受玉局之真
詮，親聞至道。

午朝詞

日景舒長，愴南去北來之異路，天
威咫尺，監母老子幼以何心，明水再
陳，哀情深切。伏願符頒玉陛，勅下朱
陵，乘飈羽以歸來，略思舊隱，入寶珠
而聽瑩，頓悟昨非。

晚朝詞

白髮青燈，永斷持環之夢，金書丹
簡，爰依鍊玉之科，夜景閭寥，齋功圓
滿。伏願乾文絜布，帝澤廣宣，遺世登
真，既返天地山川之氣，說經授道，應
悟死生晝夜之常。

天師入覲回山奉旨修金錄齋宿啓詞

皇帝若曰：敬恭卜日，致山川社
稷之心，禮樂事天，備玉帛鼓鐘之實，
乃三極交孚之際，當一炁戒肅之初。
於行用金，其土皆玉，端倪仰止德，曷

敢於二三；戴履孔昭威，不違於咫尺，
雲車穆穆，星幄熒熒。錫命會同，神合
吉，時合序，降祥茲至，日重暉，月重
明。七政咸齊，五兵不試。

早朝詞

日出寅賓，堯則天而爲大；天休
申命，湯銘日以能新。存旦氣之清明，
秉晨朝而齊肅，有神如在，惟帝念茲，
歛福群生，期不孤於皇極，書年大有，
毋專美於春秋。

午朝詞

離文明照，仰承並日之言，乾象高
陳，敢替奉天之訓，神洋洋其在上，皇
剡剡兮揚靈，玄極受朝，清都分命，神
州國本，鎮九有以不搖，畿縣民風，張
四維而大治。

晚朝詞

一信始秋，當莫朝而曰夕，寸誠獨
露，存夜氣以事天，沖漠之際無私，密
勿之間有命，丕承率祖，克相厥家，黃
屋非心，允賴弼基之道，明堂坐治，敢
違輔德之原。

正醮詞

國稱宗子，若重器之在躬，父曰嚴君，宜平居而請命，時措敢違於責任，日宣密謝於扶持。禮以達言，誠惟克享，民胞物與，同流一視之仁，俗美政成，丕顯三靈之德。

千秋節宿啓詞

丕承任重，繼體乾坤，載育惟時，潛心天地，誠遠將於玉帛，儀祇肅於瑤臺，夙清下土之塵，俯埃高穹之命，瓊輪出警鸞，和側聽於宸遊，金籙啓玄鴻，造不違於夕奏。

三朝詞

惟天孚佑下民，日省青宮之寄，自朝至于中昃，寅恭紫極之朝，撫己實生，效心遠致，冀神靈之委鑒，綿宗社以流恩，五學身脩，夙懋成人之地，兩宮眉宇，春融問寢之天。

正醮詞

國本承祧，責任敢違於繼述，王春育質，主張實兆於生成，監誕日以遣香儀，即名山而修金籙，惟天不隔，若帝之臨，監國撫軍，極扶持於內外，問安

侍膳，全忠孝於君親。

宿啓詞

宮占象緯，馳使命以有嚴，方鎮龍章，按壇儀之初肅，雲閣琅霄之雨，塵消金殿之風，帝命春融，國忱夕奏，一體班行之序，明日將朝，九闕輦路之光，惟天所命。

早朝詞

升日車於黃道，曉肅朝班，擁仙仗於紅雲，空浮御路，致國家之忱悃，禳火土之光芒，雖君德自可以回天，必帝命以先之爲地，星當翼軫，集百順於皇躬，月在晉秦，合三方於洪福。

午朝詞

天文推步，國禳太史之占，春晝朝元，使肅近臣之敬，祝釐者臣之責任，懼灾者帝可轉移，對越脩辭，敷宣待命。首尾違行天道，星不沴於坤儀，吉祥茂集慈躬，德永裨於乾御。

晚朝詞

司曆占星，窺稷氛而奏上，奉祠祝國，存夜氣以朝元，惟熒惑之留退靡常，而玄科之禴禳可用，綱維有在，回

斡非難，主鬯無虞，藹春暉於花萼，承桃有慶，動喜色於楓宸。

正醮詞

乾稱父，坤稱母，臺占留退之躔，天成象，地成形，國有祭禳之旨，玄範俯陳於瓊館，綠章上奏於清都，分命星辰，流恩君后，片言退舍，毋專美於春秋，一氣居中，永鎮安於民社，福沾聖嗣，慶衍宗枝。

聖節詞

欽若昊天，式付纂承之重，無疆歷服，深惟克紹之艱，揆初度以再時，爰省躬而事帝，齋脩金籙，文啓瓊科，視聽弗違，已罄朝元之禮，監臨有赫，庸殫歸美之誠，遙睇碧霄，重敷綠奏。伏願玄功不宰，玉曆綿洪，陰陽調而風雨時，群生胥樂，股肱良而庶物育，萬邦以貞。

保生度往醮詞

稔愆降疾，伏地省躬，追遠固存，籲天請命，寫丹心之耿耿，瀆玄聽之高。伏念尤悔積中，天昏逮下，遊魂爲變，死者不可復生，天患有身，存者其

能自保，兩端危急，一揆憂惶。爰潔志於名山，祈通情於絳闕，科修金簡，醮款瓊輪。伏願丕顯至仁，曲垂三宥，救苦之符廣大，出苦無他，好生之德克周，延生有自，克昌家脉，永戴天恩。

丙寅普度齋宿啓詞

體天地心，撫三春而悲九夜，即神仙境，由千里而致一忱，玄範初盟，綠章敷奏。伏念以平心而處物，將推己以及人，側聞名山溥度之常，政協寸地永懷之自。謂甚堪憫，魂而不祀者則爲孤；倘遂可超升，親而當思者其敢後。前言如日，中誠契天，既嘗昭告以率先，敢不躬行而善始，壇規冰肅，輦路雲開。伏願五炁凝真，三靈合德，玄風發育，又開太極之初；道月光明，洞照重陰之表。

早朝詞

帝館雲紅，普泉曲希陽而度，仙階土碧，肅班行戒曉之朝，日下照於傾葵，春不違於一草，更生之道，無息者天，明荐起於東方，有如此旦，樂莫加於南面，奚取斯言。

午朝詞

道妙畫前之易，相見乎離，陽生貞下之元，以觀其復，望丹靈而請命，希金簡以成功，三炁有融，一光普及，日魂既鍊，了然以出於機，天性無違，超乎而會其極。

晚朝詞

鵷序星羅，立夕儀之濟濟，龍章露奏，浮夜氣之融融，存誠殫事帝之恭，演教襲度人之大，慧光燭下，心體鏡如，玉字策勳，又睹三生之日月，寶符度命，重開四象之乾坤。

正醮詞

雷動雨盈，幽壤之煩冤頓洗，天明地察，玄門之善利無私，惠澤潛符，齋忱允遂。伏念服膺妙道，引領真科，莫得而名者，固非常名，無所不度者，是爲溥度，乃啓如心之恕，以干成物之仁，東極楊枝，密洒清涼之餘潤，始青黍米，中含發育之陽春，變法雨以涵濡，噓靈風于枯朽，已著顯然之功用，必無不濟之幽冥，菲薦庸陳，隆恩曷報。伏願九真慶會，一德昭融，大道可

以情求，人事盡而理現，本心所發，敢窺天地之全，庶物咸亨，孰外乾坤之大。

就普度會酬醮超度詞

母子至情，嘗致抱病保安之請；幽冥異路，罔殫愛生傷死之思，一謝一祈，三薰三沐。伏念臣亡男某，草茅賤質，蒲柳微資，偶違攝養之方，久困沉綿之疾，遂同夫主，仰告皇天，念駒犢之可憐，冀鴻雁之默佑，豈期夭折，糜藥石以無功，相繼凋零，痛藁砧之傾世，莫道未亡人之咎，竟乖元微福之盟，茲逢普度之齋筵，回助往生之善果。伏願蒼穹錫鑒，黑籍銷名，日居月諸，用助孤嫠之初款，父前子後，同登上品之仙階。

五真人薦成舍人

天垂濟度，恩不間於幽冥，人有懇祈，事每關於傷悼，一忱請命，百拜陳詞。伏念臣亡孫某，生也時乖，死而日遠，襁中抱養，本爲繼絕之謀，冠後擬婚，遽作永歸之訣，泉壤之塗既隔，母孫之念何窮，茲已及於大祥，敢肅陳於

清醮、爰資薦拔，俾遂超升。伏願紫府洗愆，玄功錫造，性天朗徹，廓除宿昔之沈迷，法雨載濡，溥及邇遐之枯槁，凡茲靈識，同一逍遙。

會首建九幽薦親宿啓詞

日往月來，思親念切，天高地厚，追遠心長，求大道以有門，醮名山而告簡，愚誠宜致，師造曲成，瓊篆發光，靈寶之科肇啓，王書錫命，朱陵之路常開，不次之恩，莫窮之報。

三朝詞

乾始坤生，天獨存於淪祭，夙興夜寐，日三接於朝儀，賴仙科成物之仁，啓子職報親之禮，俯陳凡悃，仰答真旂，惟孝感于神明，鞠躬茲愧，謂生同於夜旦，撫乎知歸。

正醮詞

斡旋人道，生生之造無窮，瞻望帝闈，嶷嶷之忱惟謹，恭趨仙境，俯控丹衷。伏念蒿目懷親，草心遊子，昊天罔極，莫回長夜之光明，春雨既濡，益重九原之悽慘，况本根之難泯，在眷序以攸同，憑金簡以出幽途，遵玉符而開生

路，恪陳清醮、祇答洪休。伏願三炁流光，一元啓運，物觀其復，又分太極之天，光晦而明，載育中華之地，銘心從欲，種德酬恩。

薦孫真率宿啓詞

追遠何由，教育之原敢昧；出幽有造，超升之望焉依，庸歷寸丹，恭祈三寶。伏念先師某，生惟任直，死亦無他，人事莫齊，美惡難調於衆口；世緣多妄，晦明或昧於本心，懼寡過以未能，率下忱而有請，迺修玄範，昭潔瑤壇。伏願教道所宗，師真實主，玉書炳煥，照開十地之門；瓊駕徘徊，來下九天之馭，仰瞻伊始，望幸無窮。

三朝詞

夙興卜日、祈超異骨之親，夕惕事天，肅致寸心之敬，朝端謹飭，帝所清高，惟師承難泯於後人，蓋道用不違於一物，資憑善利，接引冥行，金簡通神、直指逍遙之地、丹臺聽命，同遊清靜之天。

正醮詞

授業惟師，莫詰九原之下，生神有

道，又開太極之初，允荷曲成，敢忘大造。伏念先師某，幻而爲果，空本無花，望冥海之茫洋，云何超越，賴玄科之方便，得所憑依。攝先靈以惠來，度苦魂而兼濟，萬緣解紐，三業無根，酬恩羞藻薦之恭，執禮盡葵傾之敬。伏願靈尊克享，至澤旁流，法身報身，一指虛無之路；天道人道，同爲清靜之歸，餘慶所沾，後昆永戴。

張國祥薦父終七詞

無父何怙，嗟爲子以略依；謂天蓋高，痛思親而曷報，日云終七，露悃再三。伏念亡父某，涉世心長，謀身計拙，惟勞生若夢，欲寡過以未能；日度死有科，豈遺孤之敢後，潔蝸廬而請命，告龍簡以宣恩，敬寓潢汙，禮陳清醮。伏願至仁無外，洪造有容，哀矜追遠之誠，恢廣濟生之道，太虛蕩蕩，漠乎無眚之神，長夜漫漫，示以自新之路。

張梧山還保女醮詞

惟疾之憂，女均爲子，無德不報，人敢違天，果符一願之愚，敢負初盟之

善。伏念某昨因女某，血滯於氣，乳結而癰，盡乞靈徼福之心，庶幾不死；拜度厄消災之賜，幸爾更生。相攸已遂於宜家，醮款仍書於欠籍，乃清塵宇，祇肅飈車。伏願雲擁洪禧，星開黃道，門闌多喜，春濃甥館之娛；宅相克成，早滿親庭之望，百爲兼順，二美同榮。

張資善還玉臺保母

疾首弗瘳，莫代慈闈之痛；矢心請禱，幸推金闕之仁，禮寶誥以無他，奏藥功而有自。念拜雖萬萬，果何益於昊天，然聽匪高高，實潛通於寸地，庸告成於願力，爰敬葺於醮修，潢潦至微，清都不遠，惟帝心之簡在，祈母筭以增延。菽水春暉，錫雙親之齊老，萱花晚景，增百福以攸同，何以酬恩，敢忘種德。

還保岳母醮詞

親其親，長其長，宜休戚之相關；道可道，名可名，信精誠之不隔，賴天從欲，伏地知歸。伏念某昨以外母某，疾亟于躬，勢危如髮，急於問寢，懼窮日之後時；行未及門，乃籲天於中道。

半子之心如願，上帝之德曰生，敢食盟言，謹陳醮禮。伏願壽增寶曆，數幹璣躔，堂上萱椿。耐春光而不老，門中桃李，托餘蔭以同榮，永戴璇穹，旁沾玉潤。

黃竹軒提點七十常住建醮慶壽詞

大厦棟梁之寄，主者獨稱，七旬弧矢之期，人生所慶。以福地寅恭之義，致祈天助愛之誠，惟帝所從，允臣至願，壺中日月，留不老之春光，鑄外山川，均無窮之道味。

節次啓許保安七醮合醮詞

瀆本戒三，況乞靈而致七；敬惟主一，庸專志以酬初。寓悃綠章，通誠丹陛，伏念山林之役，天地焉休，俯省前猷，積願言而莫踐，適當後繼，凜負咎以奚文，雖本原所任之責有殊，然福利奉公之心則一，神豈可負，道無不同，爰葺醮以報恩，冀鑒情而宥過。伏願大造優容，衆真歆格。謝往愆，祈終惠，來日正長，居善地，樂清時，惟天所命。

衆為某保安詞

人疾必呼其父母，誰使之然，仙源端賴於祖宗，宜衆以告。惟呂氏某，以弱質處胚暉之際，偶深居失調護之方，馴致微痾，頗關遠慮。念仰瞻推本，豈能違師天裕後之恩，苟回盼資生，即自有隨日遣安之道，外求則妄，至敬無文。伏願醮悃上孚，奏言下錫，艾香越井，早收神藥之奇功；蘭茁謝庭，行見孫枝之喜色，綱維有在，銘鏤難磨。

吳宗師丙寅冬捧香回山建醮并慶

成三清殿宿啓詞

惟天惟祖宗，纂承任重；有民有社稷，定保心長，適名山崇帝所之新，以秩祀致國忱之遠，迺馳玄使，祇肅瑤壇。昭其度，昭其文，齋莊有執；潛而天、潛而地，敷奏以言。

早朝詞

至誠望秩，朝徹無違，大本欲安，夙夜以告，惟高厚之氣順，則參贊之功存，修德承天，享誠隨地，一元保合，時成物象之通，三極交孚，日永道原之大。

午朝詞

六瑄陽生，揆國經於治象；九關晝接，祈邦本於時康，蓋有民為兩極之心，而立命者一人之責，多儀克享，明照不違，四海永清，誕保金甌之固，三時不害，益綿玉燭之和。

晚朝詞

天付有家，脩身為本，日嚴祇敬，遵道而行，存夜氣以敷言，致夕儀而對越，非后何戴，惟帝念茲，宮壺一和，式永綏於內治，宗枝百順，尚丕顯於前猷。

正醮詞

小心圖治，協和之效如斯，一德感神，望秩之忱敢後。屬真境告成於御宇，以祠官祇薦於多儀。乾文之昭示者，欲得其平，地利之或乖者，盍求其故。何以納黎元於熙洽，何以臻中外之乂安。為國有經，涉淵思濟，每見幾於終日，惟助順之在天，麟趾應時，自省玉成之道，鴻禧流慶，永依鈞轉之仁，一氣還元，太平有象。

丁卯春建保安醮詞

福地措躬，每懷遠慮，雲天垂蔭，允賴真靈，敢忘燕安防患之時，況值蜚集建齋之日。葵傾請命，藻薦祈恩，願憫至情，介水官而永鎮；相安無事，戴淵造以難磨。

天師退潮預建醮詞

省府憂潮，致驛書而有命，臣門如水，率祖教以將行。心惟道之是遵，事非天而易濟。預陳清醮，仰冀洪恩，威命煥頒，祈早清於海怪，教風誕播，還舊障之沙隄，益固民情，永寧邦本。

戊辰年天師建黃籙宿啓詞

黃壇特啓，按參天兩地之規，丹府具陳，酬三世一家之願，思過不幾於寡信，踐言兼首於前非，明察有容，顯幽是賴。伏願道常善應，斡化機於儀象之間，聖不可知，交神氣於天人之表，詰朝而見，先事以聞。

一日早朝祝君

忠實答天，奉齋科之重典，清明在旦，謹禮節於初朝，假靈不敢以及私，贊化先期於報上。伏願曉開閭闔，日

暖旌旗，乾符坤珍，洽睹垂衣之治，天心民命，歡吟洗甲之詩。

午朝臣僚

上答天心，孫謀子職，俯綏國本，世治臣賢，朝真敷晝接之誠，宣化極時需之望。伏願慶霄扶日，寒谷噓春，玉燭順時，不出燮調之外，金湯固本，咸歸陶冶之中。

晚朝天下

齋忱夕奏，潔己而言，教典夙遵，裕民為急。敢曰遽形於私請，幸期先及於生靈。伏願昧谷陽生，景星光現，帝憐赤子，春回草木之寒，天轉洪鈞，日借桑榆之暖。

二日早朝孤爽

昧爽朝元，曦輪雨旦，大明燭下，淵鑒兼融，念誰憐遊魄之無歸，欲自拔迷津而莫可，惟玄科之有道，此上帝之至仁。伏願慧日乘晨，靈風造曉，坎納戊，離納己，乃火降以水升；乾資始，坤資生，又天涵而地育。

午朝正薦

日瑞再中，何造朝之喋喋，天臨在

上，敢微福於冥冥，重惟一門謝世之親，誕啓十迴度人之道，玉文有證，金簡無私。伏願鍊質離明，超神旅進，祖其裕後，仰承玄省之宗，女亦有仙，尚隸易遷之籍。

晚朝附薦

臣卜其夜，仙貴度以垂文，人有常言，仁者存乎博愛。眷道俗戚疏之既往，想精神魂魄以何之，一指虛無，同歸清靜。伏願慧光如月，覺性俱天，幻身非身，了取靈明之本，無質生質，超然夜旦之常。

三日早朝教門

日射金門，三觀紅雲之曉，露陳玉座，一干玄造之春，謫焉司教之在躬，惕若隨時之爲義，閨楊相戒，戰栗以言。伏願遵晦而明，依光不昧，真源承緒，箕裘之學無遺，新渥如綸，冠褐之宗益大。

午朝師門兼宮門

千年祖教，嗣福地以奉祠，大易人文，列家人之正位，相關幽戚，均乞平安。朝接晝以云三，聽回春而采錄。

伏願天光日麗，雲覆雷同，綿綿香火之隆，恩覃自上，秩秩本支之茂，福在其中。

晚朝祈嗣

久矣呼天，冀玄宗之有托，凜焉終日，何素志之未孚。想因先世之所招，或者微躬之自召，將非塚訟，其有詛盟。適當朝謁之終，輒敢敷陳之告。伏願列真肆赦，洗萬罪以消屯，九氣妙凝，接一陽而來復。

昊天正詞

天籍屢書，有上世久盟之黃籙，露忱密奏，兼微臣自許之丹衷，答貺愆期，陳情俟命。伏念某少而失怙，惕若投艱，半生素志之未孚，一脉後憂之甚大。親莫留而願在，躬自省以心知，事會因循，默推源之有故，神明森列，豈責報之所關，苟爲又食斯言，其將奚辭于罰，千愆並謝，三款一酬。伏願曲宥無遺，俯從允賴，帝當博愛，溥成物以資生，臣不敢言，竊容心而抱送，知恩有日，積善酬天。

三天詞

急乃籲天，可食言而棄信，吉焉卜日，庸報貺以修齋，惠普及於顯幽，鑒潛孚於微隱，曲成有在，善應無違，思以致祥，誓廣行於陰德，賜之如願，敢自泯於良心。

東極詞

明科肇啓，兼酬宿昔之言，逝爽同升，一拜維新之命，聖功不宰，人道重開。瑞光之假借非私，生意之貫通無跡。同胞同與，各隨分以短長，自色自形，初何心於造化。

后土南極北極九幽

帝留齋法，救長夜之冥行，臣撫愚衷，答先時之宿款，道存萬範，恩到九泉，惟濟死以及生，乃度幽而爲福。伏願善無不溥，咸升朱府之高，願有必從，少待洪鈞之轉。

萃善錄卷下

(錢安靖點校)

『十五』國家重點圖書出版規劃項目

主編 張繼禹

本冊主編 李剛

華夏出版社

中華道藏

第八冊

目錄

001 無上金玄上妙道德玄經(敦煌本)	一
002 無上妙道文始真經	七
003 文始真經註	二二
004 文始真經言外旨	一一三
005 太上老君開天經	一六〇
006 太上老君虛無自然本起經	一六三
007 太上老君太素經	一六九
008 太上妙始經	一七〇
009 太上洞玄寶元上經	一七三
010 老子變化經(敦煌本)	一八一
011 老君變化無極經	一八三
012 老子化胡經(敦煌本)	一八六
013 太上靈寶老子化胡妙經(敦煌本)	二〇七
014 太上老君中經	二一一
015 老子西昇經〔御注〕	二二七
016 西昇經集註	二五二
017 太上老君大存思圖注訣	二九二
018 傳授經戒儀注訣	三〇一
019 太上三洞傳授道德經紫虛籙拜表儀	三〇八

020 太上正一法文經	三一四
021 正一法文天師教戒科經	三一七
022 正一法文經章官品	三二六
023 正一法文經護國醮海品	三五五
024 正一法文修真旨要	三六二
025 正一法文十籙召儀	三七一
026 正一法文傳都功版儀	三七三
027 正一法文法籙部儀	三八二
028 正一法文太上外籙儀	三九三
029 太上三五正一盟威籙	四三一
030 太上正一盟威法籙	四四四
031 四斗二十八宿天帝大籙	四五一
032 太上正一延生保命籙	四五四
033 太上正一解五音咒詛秘籙	四五六
034 太上正一度仙靈錄儀(擬)	四七三
035 上清洞天三五金剛玄籙儀	四七六
036 洞玄靈寶課中法	四八一
037 太上三五正一盟威閱籙醮儀	四八七
038 太上正一閱籙儀	四九〇
039 太上正一閱衆錄儀(擬)	四九二
040 太上正一閱紫錄儀(擬)	四九七
041 太上金書玉牒寶章儀	四九七
042 正一出官章儀	四九七

043 正一指教齋儀	五〇四
044 正一指教齋清旦行道儀	五〇六
045 正一敕壇儀	五〇八
046 正一解厄醮儀	五一一
047 正一醮宅儀	五一四
048 正一醮墓儀	五一六
049 洞真黃書	五一八
050 上清黃書過度儀	五二四
051 洞真三天秘諱	五三三
052 無上三天法師說蔭育衆生妙經	五三六
053 正一天師告趙昇口訣	五三八
054 太上正一咒鬼經	五四〇
055 三天內解經	五四四
056 尊下長樂經(擬)	五五〇
057 正一論	五五三
058 陸先生道門科略	五五六
059 洞玄靈寶五感文	五六〇
060 老君音誦誡經	五六三
061 太上老君戒經	五七一
062 太上老君經律	五八一
063 太上經戒	五八七
064 老子說百八十戒序(敦煌本)	五九五
065 老子說法食禁誡經(敦煌本)	五九七

066 女青鬼律	五九九
067 玄都律文	六一二
068 赤松子章曆	六二〇
069 太上宣慈助化章	六八一
070 太上濟度章赦	七〇九
071 萃善錄	七三三